


# Godeeyo To Tekepo



Portions of the New Testament in the Odoodee language of  
Papua New Guinea

**Godeeyo To Tekepo**  
**Portions of the New Testament in the Odoodee language of Papua New Guinea**  
**Sampela hap Nupela Testamen long tokples Odoodee**

copyright © 2006, 2015, 2017 Wycliffe Bible Translators, Inc.

Language: Odoodee

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-30

---

PDF generated using Haiola and XeLaTeX on 18 Apr 2025 from source files dated 31 Aug 2023  
ffb0eddd-0f6e-5201-89ab-6fcbfcaebaba

## Contents

FRT . . . . .	1
INT . . . . .	2
Matiyu . . . . .	3
Maka . . . . .	73
Luka . . . . .	116
Yonee . . . . .	187
Diye Di Odo . . . . .	240
Loum . . . . .	308
1 Tesalonika . . . . .	340
2 Tesalonika . . . . .	346
1 Timoti . . . . .	350
2 Timoti . . . . .	359
Taites . . . . .	365
Palimon . . . . .	369
Yemes . . . . .	371
1 Yonee . . . . .	379
2 Yonee . . . . .	387
3 Yonee . . . . .	388
Yuda . . . . .	390
XXB . . . . .	393
Pidi to abo . . . . .	396

## **Godeeyo To Tekepo**

Published with support of Friends  
of the Odoodee people  
A Partial New Testament in the  
Odoodee language  
which is spoken by approximately  
700 people  
who live in Western Province,  
Papua New Guinea

Illustrations on pages 17, 50, 56,  
63, 70, 73, 75, 89, 91, 92, 93, 97,  
100, 109, 136, 182, 199, 241, 322  
and 352 (2x) are by Louise Bass  
© The British & Foreign Bible  
Society, 1994.

Illustrations on pages 3, 7, 41, 67,  
80, 102, 104, 107, 112, 115, 118,  
170, 178, 180, 191, 202, 206, 218,  
222, 226, 229, 238, 245, 261, 263,  
284 and 286 are © 1996 David C.  
Cook. Used by permission.

Illustrations on pages 6, 65 and  
187 are by Darwin Dunham ©  
United Bible Societies, 1989.

Illustrations on pages 94, 148, 334  
and 353 are by Horace Knowles  
© The British & Foreign Bible  
Society, 1954, 1967, 1972, 1995.

Illustrations on pages 122, 171,  
304 and 308 are by Gordon  
Thompson © 2012 Wycliffe  
Bible Translators Inc. and  
are licensed under the Cre-  
ative Commons Attribution-  
NonCommercial-NoDerivs 3.0  
Australia License.

Illustrations on pages 5, 27, 44, 55,  
66, 120, 150, 158, 196 and 243 are  
by Graham Wade © United Bible  
Societies, 1989.

© 2017 Wycliffe Bible Translators,  
Inc.  
First Edition 2017 - 150  
ISBN: 0 86893 492 5

## **Preface**

This book contains the following New Testament books, translated into the Odoodee language: Matthew, Mark, Luke, John, Acts, Romans, 1 & 2 Thessalonians, 1 & 2 Timothy, Titus, Philemon, James, 1,2,3 John and Jude.

All Scripture is inspired by God and is useful for teaching the truth, rebuking error, correcting faults, and giving instruction for right living, so that the person who serves God may be fully qualified and equipped to do every kind of good deed. (2 Tim 3:16-17)

We pray that God, through the Word of His grace, will build up the faith of the Odoodee people.

## **To daga malalo**

Booka toowa hagee ma kulodu booka pepuso hagee moloso: Matiyu, Maka, Luka, Yonee, Diye di odoo, Loum, 1 & 2 Tesalonika, 1 & 2 Timoti, Taites, Palimon, Yemes, 1,2,3 Yonee, osoloso Yuda.

Godeeyo to booka mapoo hogugu susuga ee Godee maga simi. Esiga Godeeyo to booka mapoo hogugu goo oso odoo mapoo tei goo eligilone, edebeeyo dooboo dagaduga, tei goo eligi mapoo ka ido sibo domoloso. Osoloso Godeeyo to booka mapoo hogugu goo oso edebeeyo tekepo badeli goo ee eligiliso, Godeeyo odoo oso mopoodoo doloso goo tekepo susuga tomo silesibilei ee tebilame. (2 Timoti 3:16-17)

Iyo Godee mapoo takooso, Godeeye yayo sooloo dolone pidili to tekepo maga nibada tei too goo ee kibilame.

## Matiyu To tekepo Matiyuye hogugu

### *Matiyu booka goo eyo bei*

Matiyu yo Yesu o hamamee dili odoo 12 ee ma kulodu hee yoso. Yo o hu hee Libai deliso. Yu odooso Yesu mapoo tei talame to hogugu hagee yayo dimapoo teneeso. Esiga yayo to hogugu hagee ma kulodu Godeeye To Magoo Booka Nape mapoo taka goo ee Yesuye medee tobuloso tomo sileeso. Osoloso Yesu Yu odooso bamelee Kelisoso.

### *Yesuwo amawe dio (Luka 3:23-38)*

<sup>1</sup> Yesu Keliso yo Deibidiyo amawe, osoloso Deibidi yo Eibalahameeyo amawe. Esiga Yesuwo amawe dio dia hu hagoso.

<sup>2</sup> Eibalahameeyo owolo Aisek, osoloso Aisekeeyo owolo ee Yekob, Yekobeeyo owolo ee Yuda, osoloso Yekobeeyo owolo dio abo.

<sup>3</sup> Osoloso Yudayo owolo ee Peles dio Sala dio (osoloso egee bia dia owee ee Tamala), osoloso Peleseeyo owolo ee Heslon, osoloso Hesloneeyo owolo ee Lam.

<sup>4</sup> Osoloso Lameeyo owolo ee Aminadab, osoloso Aminadabeeyo owolo ee Nason, osoloso Nasonneeyo owolo ee Salmon.

<sup>5</sup> Osoloso Salmonowo owolo ee Bowas (Bowaseeyo owee ee Leihab), osoloso Bowaseeyo owolo ee Obed (Obedeeyo owee ee Lut), osoloso Obedeeyo owolo ee Yesi.

<sup>6</sup> Osoloso Yesiyo owolo ee wiligi odoo toboloso badebei Deibidiso. Deibidiyo owolo ee Solomon. (Solomonowo owee ee daga Yulayayo osobo.)

<sup>7</sup> Osoloso Solomonowo owolo ee Lehobowam, osoloso Lehobowameeyo owolo ee

Abiya, osoloso Abiyayo owolo ee Asa.

<sup>8</sup> Osoloso Asayo owolo ee Yehosapat, osoloso Yehosapateeyo owolo ee Yeholam, osoloso Yeholameeyo owolo ee Yusaya.

<sup>9</sup> Osoloso Yusayayo owolo ee Yotam, osoloso Yotameeyo owolo ee Ahas, osoloso Ahaseeyo owolo ee Hesekeya.

<sup>10</sup> Osoloso Hesekeyayo owolo ee Manase, osoloso Manaseeyo owolo ee Amon, osoloso Amoneeyo owolo ee Yosaya.

<sup>11</sup> Yosayayo owolo ee Yekonaya, osoloso Yosayayo owolo dio abo.

Biame domo omapoo Isalael odooso odoo abo sabolo ha temeleso, diba Babilon mi mapoo dabalame iyado diso.

<sup>12</sup> Esiga Isalael odooso Babilon mi mapoo dala ma kulodu debei biame omapoo Yekonayaye giso holo soomagooso, o hu ee Selatiyel. Osoloso Selatiyeleeyo owolo ee Selubabel.

<sup>13</sup> Osoloso Selubabeleeyo owolo ee Abiyud, osoloso Abiyudowo owolo ee Eliyakim, osoloso Eliyakimeeyo owolo ee Asol.

<sup>14</sup> Osoloso Asolowo owolo ee Sadok, osoloso Sadokowo owolo ee Akim, osoloso Akimeeyo owolo ee Eliyud.

<sup>15</sup> Osoloso Eliyudowo owolo ee Eliyasal, osoloso Eliyasaleeyo owolo ee Matan, osoloso Matanneeyo owolo ee Yekob.

<sup>16</sup> Osoloso Yekobowo owolo ee Yosep. Esiga Yosepeeye Meli huso. Osoloso Meliye Yesu edebeeyo takolone Keliso deli ee soomagooso.

<sup>17</sup> Esiga Eibalahameeye badebei biame omaga bei mooloogooloso di wiligi odoo Deibidiye badebei biame omapoo, Kelisowo amawe dio 14 odoo hagee biaso debeiso. Osoloso wiligi odoo Deibidiye badebei biame omaga bei mooloogooloso di Babilon

odoo oso Isalael odoo dala ma kulodu gilimado di biame omapoo, Kelisowo amawe dio 14 odoo hagee biaso debeiso. Osoloso abaga bei mooloogooloso di Yesu soomagoo biame mapoo, Kelisowo amawe dio 14 odoo hagee biaso debeiso.

*Yesu Keliso soomagoo  
(Luka 2:1-7)*

<sup>18</sup> Yesu Keliso soomagoo goo ee egeesee moloso. Owee Meli Yosepeeye hulame dadagoloso debeiso. Esino diba huilega dobolone, Meli yo Dio Tei oso kitulugu maga koowasi moodoo goo ee eyo nediliyo ogoloso gooleedooso.

<sup>19</sup> Esino Yosepeeye goo hagee duloso, gowoolone Meli pagalame gooleeso. Esino Yosep yo Godeeyo howo woola tekepo badeli. Esiga odoo susuga eyo howo woola Meli pagalai yo goomegele. Egeeseelone Meli hulame dadaga ee mada pagalame yo goomogaso.

<sup>20</sup> Yosep yo goo hamaga goolone badoboome, Godeeyo momaiye oso sapootia mapoo yimapoo sibilesi egeesee takaso, “Yosep, Deibidiyo amawe, no Meli hulei na ebi. Bei, yo Dio Tei oso kitulugu maga koowasi moodooloso ka badoso.

<sup>21</sup> Esiga yo giso holo soomagalaiso. Egeeseega nayo o hu Yesu hedi. Bei, o odoo oso dibada goo tokenee eyo nei telega pagalame, yayo diba pidileiso,” diso.

<sup>22</sup> Esiga Godeeye o odoo yimaga to toloso kokodo takomo sili odoo yimaga to taka goo oso tei dalame, goo susuga hagoso tei peledabaso. Bei, yayo egeesee takaso,

<sup>23</sup> “Sobo obuo giso dia goo gooleedele poogoo oso koowasi moodooloso giso holo soomagalaiso.

Osoloso odoo susuga oso o hu ee Imanuwel dolone dabalaiso,” diso.

Hu eyo bei ee Godee ibolo hodobo badoso.

<sup>24</sup> Esem Yosep yo tia hogabuloso Godeeyo momaiyeso yimapoo taka to ee dodolone Meli huso.

<sup>25</sup> Esino Yosep dio Meli dio hedebe delega badolone, Meliye giso holo soomagooso. Esem Yosepeeye hope o hu Yesu hediso.

## 2

*Giwo hesigeli odoo oso Yesu agalame di*

<sup>1</sup> Helodeeye Yu odoowo wiligi odoo toboloso badebei biame omapoo, Yudiya mi toowa ma kulodu Betilihem mi pepooko mapoo Meliye Yesu soomagooso. Yesu soomagoloso hamamee giwo hesigeli odoo oso osokoso sibili maga Yelusalem mi mapoo sibadeeso.

<sup>2</sup> Diba Yelusalem mapoo peledoboloso egeesee takomo silesibiso, “Ibada midee mapoo dobolone egeino, giwo toowa osokoso sibili omapoo molome egeiso. Iyo giwo egee ogoloso, wiligi odoo hee olo soomagoo doloso gooleedoloso hamapoo ka sibadee. Esiga holope Yu odoowo wiligi odoo toboloso badalame soomagoo ee kasomo? Bei, iyo o hu dokodoo poudalame ka sibadee,” dee takomo silesibiso.

<sup>3</sup> Esino wiligi odoo Helodee sabolo osoloso Yelusalem mapoo debeli odoo susuga sabolo oso goo hagee duloso diya gooleeso.

<sup>4</sup> Egeeseelone Helodeeye tei moso wiligi odoo tebisa sabolo osoloso tei eligili odoo gilimadoloso dimapoo egeesee takaso, “Godee maga to toloso kokodo takomo silesibili odoo oso takolone Keliso kamapoo soomagaigonala?” diso.

<sup>5</sup> Esem diayo nei egeesee takaso, “Yudiya mi toowa ma kulodu Betilihem mi pepooko mapoo soomagaigona diso. Bei, Godee maga to toloso kokodo takomo sili odoo oso egeesee hoguguso,

<sup>6</sup> ‘Betilihem Yuda mi ee ma kulodu,

Nayo Yuda mi toowa ee ma kulodu goo toowa ka moloso.

Bei, nee mi omaga wiligi odoo tabalai ee sibileiso.

Yayo mo odoo Isalael mi mapoo debeli odoo ee bamalaiso, 'dee takeliso."

<sup>7</sup> Esem Helodeeye goo hagee duloso, giwo hesigeli odoo mapoo giwoso peledaba biame ee gooleedalame diba mada gilimadooso.

<sup>8</sup> Osoloso diayo nei taka duloso diba Betilhem mapoo diye dolone to egeesee takaso, "Niba dilesos holope egee medee esiameloso ogoloso see wedi sibilesos amapoo takee. Egeesega anosee yimapoo dilesos o hu dokodoo poudileiya," dee takaso.

<sup>9-10</sup> Esem giwo hesigeli odoo osos Helodeeyo to duloso dulone, giwo diayo dia mi mapoo egei hedebe onosee see egeiso. Diba giwo egee ogoloso diya goomoga sabolos giwosos malalo dime hamamee deede diso. Diba giwo egee hamamee dodomo dime, giwosos dilesos holopesos badebei mosos eyos tobudu pouni melesos.

<sup>11</sup> Esem giwo hesigeli odoo osos holopesos badebei mosos eyos kulodugadilesos egeinos, holopesos owes Meliodio badoboome egeisos. Esem diayogauwulosos dobolone holopesos eyos hudo kodoo poudosos. Osoloso emegei di bi gold molee, osoloso sigas medeesisigageli bis medees tekepo, osolosomopoodosos soos kolos mapoo hedili hageesee yimapoo teneesos. <sup>12</sup> Esinodiba see wedi dilame tianos, sapootiamapoo Godeeye dimapoo egeesee takaso, "Niba see wedi dugas, Helodeeyebadebei magas na di. Esinoniba eli hee magas nibada mi mapoo ka diyadee," diso. Esem diba to eedodolone eli hee magas dibada mi mapoo diyadeesos.

### *Isipi mi mapoo kukulo di*

<sup>13</sup> Osoloso hamamee giwo hesigeli odoo olo dime, gesi omapoo Yosep tiamolome, sapootiamapoo Godeeyo momaiyes osos sibilesos

yimapoo egeesee takaso, "Nosogabulosos holopesos sabolos osolosos owes sabolos gilimadolosos Isipi mi mapoo kukulo di. Bei, Helodeeyos odoo osos holopesos egee wooloomalames esiamos sibileiso. Esigas niba kukulos dilesos Isipi mi mapoo dabalames di. Niba omapoo dilesos dogas, niyos see wedi sibilei biames ee ayos nimapoo takalaiso," diso.

<sup>14</sup> Egeesee taka dulosos gesi omapoo Yosep hogabulosos holopesos sabolos owes sabolos gilimadolosos Isipi mi mapoo kukulo diso.

<sup>15</sup> Diba omapoo dilesos Helodeetowas belesos bameleesos. Esigas goos hagee teis peledabaso, Godeeyeos odoo yimagas tos tolosos kokodotakomos sili odoo yimagas takas tos sabolos tebilames. Tos eehagosos, "Ayo mo holo Isipi mi ee poogolosos sibilames iso."

### *Giso holaiso piligu*

<sup>16</sup> Esinos giwo hesigeli odoo osos Helodee mapoo takalames see wedi sibilegas, eli hee magas dibada mi mapoo wedi di goos ee dulosos yos diya kamanasos. Osoloso yayos eyos nediliyos egeesee gooleesos, "Giwo hesigeli odoo osos giwo dias midees mapoo egei biames omagas simi dugos bakadio olo poogoosos. Esigas ayos mo odoo mapoo takolones, gisoholaisos dugos bakadio poogosos sabolos osolosos dimas hamamee soolooagas magos sabolos piligiyes dagas, holopesos egeesabolos wooloomalaisos," diso. Esigas yayos os odoo mapoo tos kituluguteneesos, diayos Betilhem mi mapoo osolosos mi pepusos abos koolas mapoo bumodi, omapoo dilesos gisoholaisos pepusos susugas piligilames. Esem diayos dilesos gisoholaisos dugos bakadios osolosos dimas hamamee soolooagas magos sabolos piligusos.

<sup>17</sup> Esigas goos hagosos peledoboome Godee magas tos tolosos kokodotakomos sili odoo Yelemayayes takas tos sabolos teibasos. Bei, yayos egeesee hogugusos,



18 “Diya gooheleme Lama mi ee ma kuloduga pisa ee duso.  
Bei, sobo Laiseleeye owolo dio halo ka pusumo siloso.  
Esiga yo pisa koo koodobuoso.  
Bei, owolo dio susuga olo piliguga.”

*Yosepeeye Nasalet mi mapoo see wedi simi*

19 Yosep Isipi mi mapoo osee bado-boome, wiligi odoo taba Helodee taso. Esem Yosep tiamolome sapootia mapoo Godeeyo momaiye oso sibilesa yimapoo egeesee takaso,

20 “No hogabuloso holope sabolo owee sabolo gilimadoloso Isalael mi mapoo see wedi di. Bei, giso holo egee wooloomalame esieli odoo egee bia olo wediaso,” diso.

21 Esem Yosep to hagee duloso, holope sabolo owee sabolo gilimadoloso see Isalael mi mapoo wedi diso.

22-23 Esino Helodee teme, see owolo Akaleyoseeye Yudiya mi mapoo wiligi odoo toboloso badebeiso. Esem Yosep goo hagee duloso mi omapoo dilei ebiaso. Esem sapootia mapoo Godeeyo momaiye oso see tobu sibilesa yimapoo egeesee takaso, “No Yudiya mi mapoo na di,” diso. Yosep yo momaiyeso egeesee taka duloso see Gelili mi toowa ma kulodu Nasalet mi pepooko mapoo badalame diso. Esiga Godee maga to toloso kokodo takomo silesibili odoo oso taka to sabolo teibaso. Bei, diayo egeesee takaso,  
“Edebeeyo yo Keliso dolone Nasalet odoo dalaiso,” diso.

### 3

*Yonee odoo howo oluguli odoo oso to taka*

*(Maka 1:1-8; Luka 3:1-18; Yon 1:19-28)*

1 Osoloso Yesu Nasalet mi mapoo badoboome, Yonee odoo howo oluguli odoo oso sibilesa Yudiya

miwe poogoo mi mapoo Godeeyo to egeesee takomo siliso,

2 “Niba goo goolee su wudoloso nibada tokenee maga miligi pie. Bei, Godeeye wiligi doloso badeli goo oso sibilei olo koola tooboo,” dee takomo siliso.

3 Esiga Yonee odoo howo oluguli odoo eyo goo maga Godee maga to toloso kokodo takomo sili odoo Aisayaye egeesee takaso,

“Odoo heeso miwe poogoo mi omaga egeesee idagoo,  
‘Lodeeye sibilei eli moodee.  
Osoloso o eli medee hoodo magee,’  
dee takomoloso.”

4 Yonee yo kemol be too oso dugo dusa kaloso silone, gala koloso bagi mapoo gudu masi kaloso siliso. Osoloso nei yayo nali ee tapala sabolo koo sabolo nali.

5 Odoo susuga oso Yelusalem abaga osoloso Yudiya abaga osoloso Yoden howo palaga debeli mi maga Yoneeye taka to ee dulame sibadeeso.

6 Diba Yoneeye taka to ee duloso dibada goo tokenee yilige bugume, Yoneeye diba Yoden howo mapoo howo oluguso.

7 Esino Yoneeye odoo howo olugumolome, Pelisi odoo susuga sabolo osoloso Sedisi odoo susuga sibilesa omapoo peledabaso. Esem Yoneeye diba ogoloso dimapoo egeesee takaso, “Niba hebise, nimapoo odoo agayo takolone, niba Godeeye kamana goo egee sibo maga mada pia dabalai teiba, dee ka takana?”

8 Esiga niyo debei goo maga nibada goo tokenee mapoo tei miligi pia goo ee eligi.

9 Osoloso niba niso nediliyo niba Eibalahameeyo amawe dioga, Godeeye kamana goo maga mada pia dabalaiso, dee na goolee. Bei, ayo nimapoo taka. Godee yimapoo kitulugu moloso, yo hagosoo see Eibalahameeyo amawe dio palai.

<sup>10</sup> Esiga kabee homo bei mapoo olo magoo moloso. Esiga homo kaso ko tekepo pelega mologa, homo egee holoso dou mapoo toodalaiso.

<sup>11</sup> Nibada goo tokenee goo mapoo miligi pia maga ayo niba wulo howodee mapoo oluguso. Esino odoo ama hamamee egee sibo oso Dio Tei nima kulodu tenelaiso. Osoloso yayo yimapoo tei tele poogoo odoo ee dou mapoo toodalaiso. Esiga yayo kitulugu oso a dagadi. Esiga ayo o homo mapoo kali bi ee todilei a tebile.

<sup>12</sup> Yayo witi wo ko sabolo osoloso so ee pilame o tou teli bi mopoodoo doloso badoso. Osoloso witi wo ko ee mosopoo kukuleiso. Osoloso witi wo so ee dou koo semili mapoo toodalaiso,” diso.

*Yesu howo olugu  
(Maka 1:9-11; Luka 3:21-22)*

<sup>13</sup> Biame domo omapoo Yesu Gelili mi maga Yoden howo mapoo Yoneye yo howo olugulame simiso.

<sup>14</sup> Esino Yoneye Yesu yo howo olugulei gowoolone yimapoo egeesee takaso, “Bei kasi maga no ayo howo olugulame amapoo ka simiyo? Nayo a howo olugulei tekepo,” diso.

<sup>15</sup> Esemenei Yesuye yimapoo egeesee takaso, “Epedee hamapoo nayo a howo olugulei tekepo. Bei, goo hagee Godeeye goomoga goo oso,” diso. Esemenei Yonee to hagee duloso Yesu howo oluguso.

<sup>16</sup> Osoloso Yesu howo oluguloso gasibilesu tobudulone egeino, Kei mi osulu yamagoloso Dio Tei oso molo masi pusibilesu yimapoo pubalegeme egeiso.

<sup>17</sup> Esemenei Kei mi ma dokodooga toso egeesee taka, “Hagee ayo diya gooma mo Holo oso. Ayo yimapoo diya goomogo,” dee takaso.

## 4

*Saitenso Yesu kukulo egei  
(Maka 1:12-13; Luka 4:1-13)*

<sup>1</sup> Osoloso hamamee bo holo dia wiligi odoo Saitenso Yesu kukulo agalame, Dio Tei oso Yesu miwe poo-goo mi mapoo ido palaso.

<sup>2</sup> Yo biame 40 osoloso gesi 40 ee ma kulodu nei nelega sileeme yo diya hodiaso.

<sup>3</sup> Esemenei kukuli odoo Saitenso sibilesu Yesu mapoo egeesee takaso, “No tei Godeeye owolo daga, nayo yo hagoso see wo pe dee takee,” diso.

<sup>4</sup> Esino Yesuye nei egeesee takaso, “Godeeye to booka mapoo hogugu oso egeesee takooso, ‘Edebeeye hedebe nei nolone badoga, gie badeli talaime. Esino Godeeye to wo masi nolone badoga, yo gie badeli talaiso,’” diso.

<sup>5</sup> Esemenei Saitenso see Yesu idoloso Godeeye hu dokodoo poudili mi Yelusalem mapoo ido diso. Osoloso tei moso tegei omu ma dokodoo ido peleso tobudume yimapoo egeesee takaso,

<sup>6</sup> “No tei Godeeye owolo daga, no moso omu ma dokodooga miyomoo bologobigi. Bei, Godeeye to booka mapoo hogugu oso egeesee takooso, ‘Godeeye o momaiye mapoo, no medee bamelee, dalaiso. Egeesega diayo no dia deeso douguleiso, no yo mapoo homodobiyaga.’”

<sup>7</sup> Esemenei Yesuye nei egeesee takaso, “Godeeye to booka mapoo hogugu oso see tobu egeesee takooso, ‘Nee\* wiligi odoo Godeeye taka to ee dada belesu agalame yimapoo na kukulo ege,’ diso.”

<sup>8</sup> Osoloso Saitenso Yesu see mubi toowa ma dokodoo ido palaso. Osoloso yayo mi edebeeye bia susuga oso toowa di sabolo osoloso oso tekepo ee yimapoo eligiso.

<sup>9</sup> Esemenei Saitenso yimapoo see egeesee takaso, “Nayo amapoo

**3:11:** Yon 1:26-27, 33; Diye 1:5; 2:1-13    **3:16:** Yon 1:32    **3:17:** Psa 2:7; Isa 42:1; Mat 12:18; 17:5; Luka 9:35    **4:1:** Hib 2:18; 4:15    **4:2:** Exo 34:28    **4:4:** Deut 8:3    **4:6:** Psa 91:11-12    **4:7:** Deut 6:16    \* **4:7:** To Isalael odoo dimapoo taka hagee Godeeye To Magoo Booka Nape mapoo hogugu moloso.

gasuwoloso a dokodoo poudoga, mi susuga hagee ayo namapoo tenelaiso,” diso.

<sup>10</sup> Esemé Yesuye yimapoo egeesee takaso, “Saiten, no amaga peegoo di. Bei, Godeeyo to booka mapoo hogugu oso egeesee takoo, ‘No\* hedebe nee wiligi odoo Godee mapoo gauwuloso o hu dokodoo poudoolone o to mapoo ka mesimo sile,’ diso.”

<sup>11</sup> Esemé Saitenso Yesu poogoloso diso. Esemé Godeeyo momaiyeso sibilesó Yesu pidiso.

*Yesuye Gelili mi mapoo o tou bei mooloogoo*

*(Maka 1:14-15; Luka 4:14-15)*

<sup>12</sup> Yonee odoo howo oluguli odoo ee neliga moso ma kulodu magoo goo ee duloso, Yesu see Gelili mi toowa ee ma kulodu o midée Nasalet mapoo wedi diso.

<sup>13</sup> Osoloso yo Nasalet poogoloso see Kapeniyum mi mapoo badalame diso. Kapeniyum mi hagee Gelili abei palaga mapoo doso. Mi egee bala bakadio Sebulun dio osoloso Naptali egee bia dia mi.

<sup>14</sup> Godee maga to tolosó kokodo takomo sili odoo Aisayaye taka to sabolo tebilame goo hagoso tei peled-abaso. Bei, yayo to egeesee takaso,

<sup>15</sup> “Gelili odoo, niba Yu odoonee sabolo doso.

Nibada mi Yoden howo hodi-okoo Gelili abei palaga mapoo moloso.

Osoloso odoo aboso nibada mi ee Sebulun sabolo osoloso Naptali sabolo dia mi deliso.

Esiga niba mo to dui.

<sup>16</sup> Neliga ma kulodu debeli odoo, niba gadeebugu toowa agalaiso.

Osoloso odoo susuga oso teli mi mapoo debeli odoo, nimapoo gadeebugu toowa oso pounileiso.”

<sup>17</sup> Osoloso biame domo omapoo Yesuye Godeeyo to takalame bei mooloogoolone egeesee takomo sileeso, “Nibada goo goolee su wuduloso nibada goo tokenee maga miligi pie. Bei, Godeeye wiligi doloso badeli goo oso sibilei olo koola toobooso,” dee takomo sileeso.

*Yesuye o hamamee dili odoo abo daga malalo gilimadoo*

*(Maka 1:16-20; Luka 5:1-11)*

<sup>18</sup> Biame heeso Yesu Gelili abei palaga maga dimeleeno, di kebili odoo bakadio Saimon dio osoloso omolo Endulu dio egeiso. Saimonowo hu hee Pita. Esemé diba dia pei howo kulomoo ogusamo sile-sibume, Yesuye sibulone diba egeiso.

<sup>19</sup> Esemé dimapoo egeesee takaso, “Niba ama hamamee deede sibe. Niba daga di kebigeli odoo doloso debeiso. Esino see epedee biame domo hamaga niba see odoo susuga Godee mapoo gilimadoloso sibili odoo doloso dabalaiso,” diso.

<sup>20</sup> Esemé diba to egee duloso dia pei omapoo saga poogoloso Yesubolo hodobo diyadeeso.

<sup>21</sup> Osoloso diba omaga dulone egeino, di kebili odoo Sebediyo owolo bakadio Yemes dio osoloso omolo Yonee dio egeiso. Dibada amabolo du ma kulodu pei mopoodoolone debeiso. Esemé Yesuye dimapoo egeesee takaso, “Niba ama hamamee deede sibe,” diso.

<sup>22</sup> Esemé diba to ee duloso dibada pei sabolo osoloso dibada ama sabolo du ma kulodu saga poogoloso Yesubolo hodobo diyadeeso.

*Yesuye odoo paigiga susuga tekepo moodooga*

<sup>23</sup> Esiga Yesuye Gelili mi toowa ma kulodu mosobia susuga mapoo silone, dibada howo gisili moso susuga ma kulodu to tekepo Godeeye wiligi doloso badeli eyo goo ee eligimo sileeso. Egeeseemo silone

**4:10:** Deut 6:13 \* **4:10:** To Isalael odoo dimapoo taka hagee Godeeye To Magoo Booka Nape mapoo hogugu moloso. **4:12:** Mat 14:3; Maka 6:17; Luka 3:19-20 **4:15:** Isa 9:1-2 **4:17:** Mat 3:2; 19:27 **4:23:** Mat 9:35; Maka 1:39; Diye 10:38

odoo paigiga susuga sabolo tekepo moodoogamo sileeso.

<sup>24</sup> Esemé Gelili mi hodiokoo mi toowa Siliya deli omapoo debeli odoo oso yayo goo moodoomo silee goo ee duso. Goo egeesi maga odoo susuga oso paigiga opusomo opusomo di odoo ee Yesuye tekepo palame yayo badebei mapoo iyado sibadeeso. Esiga paiye opusomo opusomo di oso too odoo hagee diayo Yesu mapoo iyado sibadeeso. Odoo aboso odoo dala toowa too ee iyado simiso, osoloso odoo aboso odoo bo holo paladee iyado simiso, osoloso odoo aboso odoo todili iyado simiso, osoloso odoo aboso odoo su kakawa poogoo iyado simiso. Esemé Yesuye diba susuga tekepo paso.

<sup>25</sup> Osoloso odoo mooloogoodoo bei oso Gelili abaga osoloso Dekapolisi\* abaga osoloso Yelusalem abaga osoloso Yudiya abaga osoloso mi abo Yoden howo hodiokoo debeli mi maga Yesuye badebei mapoo sibilesa yima hamamee deede diyadeeso.

## Yesuye mubi ma dokodoo odoo mapoo eligi

### 5

*5:1–7:29*

<sup>1</sup> Yesuye odoo mooloogoodoo bei oso yimapoo sibadee ogoloso, mubi ma dokodoo peleso biaso. Esemé o hamamee dili odoo oso yimapoo sibadeeso.

<sup>2</sup> Esemé omapoo yayo Godeeyo to dimapoo eligilame bei mooloogoolone egeese takaso,

*Goomoga sabolo dabalai (Luka 6:20-23)*

<sup>3</sup> “Edebeeyo Godeeye diba pidilame yimapoo kibiloso dogaa, diba goomoga sabolo dabalaiso. Bei, diba Godeeye wiligi doloso ka badoso.

<sup>4</sup> Osoloso edebeeyo goohele sabolo pupusigilone dogaa, diba goomoga sabolo dabalaiso. Bei, Godeeye diba pidileiso.

<sup>5</sup> Osoloso edebeeyo mesie sabolo dogaa, diba goomoga sabolo dabalaiso. Bei, hamamee mipoo susuga hagee dibada mi dalaiso.

<sup>6</sup> Osoloso edebeeyo goo tekepo Godeeye goomoga goo ee talai ono diya goolee sabolo dogaa, diba goomoga sabolo dabalaiso. Bei, diayo Godeeye goomoga goo ee talame, yayo diba pidileiso.

<sup>7</sup> Osoloso edebeeyo emegei sooloo dolone dogaa, diba goomoga sabolo dabalaiso. Bei, nei Godeeye dimapoo sooloo dolone badalaiso.

<sup>8</sup> Osoloso edebeeyo hedebe Godee mapoo goo hoodolone dogaa, diba goomoga sabolo dabalaiso. Bei, diayo Godee agalaiso.

<sup>9</sup> Osoloso mesie dabalame segeli odoo doloso dogaa, diba goomoga sabolo dabalaiso. Bei, Godeeye diba owolo dio dalaiso.

<sup>10</sup> Osoloso edebeeyo Godeeyo howo woola goo tekepo too maga dala tolone dogaa, diba goomoga sabolo dabalaiso. Bei, diba Godeeye wiligi doloso ka badoso.

<sup>11</sup> Osoloso niyo amapoo tei too goo maga edebeeyo nimapoo to tokenee takoloso dala tenelone nimaga gamenee goo takooga, niba goomoga sabolo dabalaiso.

<sup>12</sup> Esiga niba sigabolone goomege. Bei, Kei mi mapoo nei toowa niyo talame nibada hu sabolo olo mopoodoo doloso moloso. Esiga nimapoo dala tenelone egee do egee dia amawe diayo Godee maga to toloso kokodo takomo silesibili odoo daga hoogoo debei mapoo dala hedebe egeese tenemeleeso.”

**4:24:** Maka 6:55      **4:25:** Maka 3:7-8  
mooloogoodoloso hedi eyo hu toowa oso.  
**37:11**      **5:6:** Isa 55:1-2      **5:10:** 1Pita 3:14

\* **4:25:** *Dekapolisi* - mosobia dee bakadio tiadoo  
**5:3:** Isa 57:15      **5:4:** Isa 61:2-3; Yili 7:17      **5:5:** Psa  
**5:11:** 1Pita 4:14      **5:12:** 2Chr 36:16; Diye 7:52



*Solu sabolo gadeebugu sabolo  
(Maka 9:50; Luka 14:34-35)*

<sup>13</sup> “Mi toowa mapoo debeli odo mapoo niyo solu masi ka doso. Esino soluso hadali me poogooga, nayo solu ee see hadalame kasee moodolaiyo? Esiga solu hadali me poogooga, yo goo mauwe malaiso. Osoloso mi mapoo togobuguga, edebeeyo dokodoooga homosos ebidileiso.

<sup>14</sup> Esiga mipoo toowa hamapoo debeli odo susuga mapoo niyo gadeebugu masi ka doso. Bei, mubi ma dokodoo mi edebeeyo bia mologa, mi egee mada malaimo. Haye. Yo medee woola molo egeliso.

<sup>15</sup> Esiga odo heeso keme pouloso tolo oso koo gagali. Haye. Yo keme pouloso odo susuga oso o moso kulodu dobolone gadeebugu ee agalame woola pou mageliso.

<sup>16</sup> Egeesi maga niyo mipoo toowa hamapoo debeli odo mapoo gadeebuguloso dabalai tekepo. Egeeseega odo susuga oso niyo goo tekepo tolone egee do ogoloso diayo nibada Ama Godee Kei mi ma dokodoo egee bado o hu dokodoo poudileiso.”

*Godeeye tei magoo hogugu*

<sup>17</sup> “Esiga Moseseeye tei magoo hogugu sabolo osoloso Godee maga to toloso kokodo takomo silesibili odo oso Godeeye to hogugu ee ayo peegoo magalame ka simidoo, niyo dee na goolee. Haye, ayo egeese selame ka sibile. Esino ayo wulo diayo taka goo susuga ee tobuloso talame ka simi.

<sup>18</sup> Esiga ayo nimapoo taka. Mipoo toowa sabolo kei sabolo mauwe pegelega osee mologa, Godeeye tei magoo ma kulodu hu bei pepuso heeso peegoo osugobalaimo. Esino tei oso taka goo susuga oso tobuloso peledabalaiso.

<sup>19</sup> Esiga edebeeyo Godeeye tei magoo ma kulodu tei pepooko hedebe mapoo mesilega badolone, emegei dimapoo goo egeesi masi

moodoolame eligimo siloga, yo Godeeye wiligi doloso badeli mapoo diya pepooko doloso badalaiso. Esino edebeeyo Godeeye tei magoo susuga mapoo mesiloso badolone, emegei dimapoo goo egeesi masi moodoolame eligimo siloga, yo Godeeye wiligi doloso badeli mapoo toowa doloso badalaiso.

<sup>20</sup> Esiga ayo nimapoo taka. Niyo Godeeye tei magoo mapoo mesie goo oso tei eligili odo sabolo, osoloso Pelisi odo sabolo oso Godeeye tei magoo mapoo mesili goo ee dagadilega poogooga, niba Godeeye wiligi doloso badalaimo.”

*Kamanali goo*

<sup>21</sup> “Esiga Godeeye olo daga hoogoo ibada amawe dimapoo to egeese taka goo ee niba olo duso, ‘Emegei bei mauwe wooloomalai tei. Esiga edebeeyo emegei bei mauwe wooloomaga, o goo midileiso.’

<sup>22</sup> Esino goo hamaga ayo see egeese takooso. Edebeeyo emegei dimapoo kamana sabolo badoga, yo goo midili mapoo ido palaiso. Osoloso edebeeyo emegei dimapoo no tokenee odo daga, niyo yo wiligi odo tebisa dimapoo ido peleso o goo midilei tekepo. Osoloso edebeeyo emegei dimapoo no boobada odo daga, yo nei Dou mi mapoo toodalai tekepo.

<sup>23-24</sup> Esiga nayo Godee mapoo emegei di bi tenelame badolone epedee omapoo nee odo oso namapoo egee gooomolo gooleebuguga, nee emegei di bi ee omapoo magoloso see saga dilesos nee odo omapoo emegei di to takee. Osoloso see wedi sibilesos emegei di bi egee Godee mapoo tenee.

<sup>25</sup> Esiga namapoo goweli odo oso no goo midilei mapoo ido duga, no eli domopoo yibolo dulone yayo namapoo gowe egee molo pagalame yibolo saga emegei dee. Esino

nayo goo egeesi moodelega poo-googa, yayo no goo midili odoo mapoo ido peleso nee goo midileiso. Egeeseega goo midili odoo oso no neliga moso gibadeli odoo mapoo tenelaiso. Egeeseega see yayo no neliga moso ma kulodu toosoolaiso.

<sup>26</sup> Esiga ayo namapoo taka, no neliga moso ee ma kulodu badolone nayo peegoo dilei eli agalaime. Esino molee yayo hesia sabolo tobuloso nayo yimapoo teneega, no peegoo dileiso.”

*Adaba kooka sobo goo heli teli goo sabolo, osoloso sobo pegeli goo*

*(Mat 19:19; Maka 10:11-12; Luka 16:18)*

<sup>27</sup> “Esiga niba to egeesee taka olo duso, ‘Adaba kooka sobo sabolo kooka giso sabolo goo heli talai ee tei,’ diso.

<sup>28</sup> Esino ayo nimapoo egeesee takooso, edebeeyo emegei dia kooka sobo mapoo howo todolone goo goolee ma kuloduga yibolo goo heli talame gooleega, o goo goolee oso yo sobo egee olo goo heli tooso.

<sup>29</sup> Esiga nee howo deedee oso no goo tokenee talame gido duga, nee howo deedee egee tabigilei tekepo. Bei, nee howo bakadio sabolo badolone Dou mi mapoo dilei tekeponee. Esino nayo howo hedebe sabolo Kei mi ma dokodoo gadilei tekepo.

<sup>30</sup> Osoloso nee dee deedee oso no goo tokenee talame gido duga, nee dee deedee ee kobigilei tekepo. Bei, nee dee bakadio sabolo badolone Dou mi mapoo dilei tekeponee. Esino nayo dee hedebe sabolo Kei mi ma dokodoo gadilei tekepo.

<sup>31</sup> Osoloso niba to egeesee taka olo duso, ‘Edebeeyo osobo pagalame gooleega, yo sobo pegeli peipa mapoo to hoguguloso osobo mapoo tenee,’ diso.

<sup>32</sup> Esino ayo nimapoo goo hamaga egeesee takooso, nosobo na peegee.

Esino kooka sobo agayo giso hee sabolo goo heli too daga, yayo osobo egee pagalai tei mauwe. Esino yayo wulo goo hee maga osobo poogooga, yayo osobo ee goo tokenee mapoo gido duso. Bei, sobo ogoso giso hee mapoo obuoga, yo odoo heeyo giso ee peedee huso. Osoloso edebeeyo sobo omoye poogoo ee huga, yo odoo heeyo osobo ee peedee huso.”

*Goo talame tei mageli*

<sup>33</sup> “Osoloso daga hoogoo ibada amawe dimapoo to egeesee taka ee niba olo gooleedooso, ‘No goo tei moodoolame Godee mapoo tei magooga, tei egee na gababie,’ diso.

<sup>34</sup> Esino ayo goo hamaga see egeesee takooso, no goo hee moodoolame tei na ye. Esiga no Kei mi eyo hu hesialoso tei na ye. Bei, mi egee Godeeye wiligi doloso badeli oso.

<sup>35</sup> Osoloso mipoo toowa eyo hu hesialoso tei na ye. Bei, mi egee Godeeye o homo kokusoloso badeli mi oso. Osoloso Yelusalem mi eyo hu hesialoso tei na ye. Bei, mi egee wiligi odoo Godeeyo mi oso.

<sup>36</sup> Osoloso nee wiligi mapoo sigolone tei na ye. Bei, nayo egee takoo goo oso nee wiligi ma kulodu wudu heeso opusomo dalai tebile.

<sup>37</sup> Esiga odoo heeso nimapoo sibilesi takolone tou hagee teye dee takooga, niyo goo egee talai goomogoga, yimapoo hedebe niyo goomoga goo ee takee. Osoloso niba goo ee talai gowooga, niyo hedebe gowe goo ee takee. Bei, niyo egeesee selega poogooga, niba gamenee takooso. Esiga gamenee takeli goo ee Saiten maga siboso.”

*Nei su teli goo*

*(Luka 6:29-30)*

<sup>38</sup> “Osoloso niba to egeesee taka olo duso, ‘Odo heeso no woolone nee howo tabuguga, nei odoo o howo tabigilei tekepo. Osoloso see odoo

heeso nee maga mapoo woolone mei hedebe dobuguga, nei o mei dobigilei tekepo.’

<sup>39</sup> Esino ayo goo hamaga see egeesee takooso, no odoos heeso namapoo tokenee goo kasee moodooga, nayo yimapoo nei goo egeesi masi na moodee. Esiga odoos heeso nee haleegi mapoo kobuguga, see nee haleegi hodio mapoo kobugulame heligi magalai tekepo.

<sup>40</sup> Osoloso edebeeyo nee sedi talame goomogolone no goo midili mapoo ido duga, nayo nee sedi egee sabolo osoloso nee kekeisu dugo sabolo yimapoo tenee.

<sup>41</sup> Osoloso odoos heeso o bi kadaloso yibolo mi hee koola mapoo dilame sibilesa no giga, see nayo yibolo hodobo o bi eli sage kadadilei tekepo.

<sup>42</sup> Esiga edebeeyo namapoo bi howaga, yimapoo wulo tenee. Osoloso edebeeyo namapoo bi hoowadalai goomogoga, yimapoo tenee.”

*Nimapoo ha teli odoos sooloo dele  
(Luka 6:27-28, 32-36)*

<sup>43</sup> “Esiga niba to egeesee taka olo duso, ‘Nee odoos sooloo dolone namapoo ha teli odoos hegie,’ diso.

<sup>44</sup> Esino ayo goo hamaga nimapoo egeesee takooso, nimapoo ha teli odoos ee sooloo dele. Egeeseelone nimapoo dala teneli odoos halo Godee mapoo takolone ka debee.

<sup>45</sup> Esiga niyo goo hageesee tolone dogo, goo oso niba tei ibada Ama Kei mi ma dokodoo badeli Godeeyo owolo dio doloso egee do goo ee ka eligiso. Egeesi ma kulodu Godeeyo howo woola tekepo debeli odoos sabolo osoloso tokenee teli odoos mapoo osoko pa sabolo howo sabolo tobuloso tenemoloso.

<sup>46</sup> Esiga niba hedebe nimapoo sooloo deli odoos ee sooloo dolone dogo, niba nei tekepo talaisomo?

Haye, talaime. Bei, tokenee teli odoos sabolo egeesee seliso.

<sup>47</sup> Osoloso niyo hedebe nee odoos mapoo mo odoos dolone badoga, egee goo tekepowa? Haye, peegoo debeli odoos sabolo goo hageesee teliso.

<sup>48</sup> Esiga nibada Ama Godeeye odoos susuga sooloo dolone egee bado egeesi masi niba nose odoos susuga sooloo dolone ka debee.”

## 6

*Bi mauwe odoos pidilei goo*

<sup>1</sup> “Esiga niba wulo edebeeyo agalame goo tekepo na tomo silesibe. Bei, goo hageesee tomo silesiboga, nibada Ama Godee Kei mi ma dokodoo badeli maga nei talaime.

<sup>2</sup> Egeesi ma kulodu niba bi mauwe odoos mapoo bi teneega, odoos howo woola na tenee. Bei, goo goolee bakadio gweli odoos oso odoos susuga oso hedebe diba tekepo doloso takalame, diayo goo hageesee howo gisili moso mapoo osoloso mosobia domopoo tomo silesibiliso. Esiga ayo nimapoo taka. Diayo goo egeesi tomo silesibume, odoos susuga oso diba ogoloso goomogolone egee do maga dibada nei tolone ka doso. Esiga diba Godee maga nei hee talaime.

<sup>3-4</sup> Esiga nayo bi mauwe odoos mapoo bi tenelame gooleega, nayo dimapoo mada tenee. Egeeseega Nama Godeeye nayo mada tekepo goo egee tomolo ogoloso namapoo nei tenelaiso.”

*Godee mapoo takeli goo  
(Luka 11:2-4)*

<sup>5</sup> “Esiga niyo Godee mapoo takolone goo goolee bakadio gweli odoos masi na debee. Bei, diba odoos susuga oso agalame, mosobia domopoo osoloso howo gisili moso ma kulodu malalo peleso tebisamolone Godee mapoo takalai, diba goomegeliso. Esiga ayo nimapoo taka. Diayo goo egeesi tolone egee do maga diba

nei tolone doso. Esiga diba Godee maga nei hee talaime.

<sup>6</sup> Esino nayo Godee mapoo takalame gooleega, nee moso ma kulodu gadilesosulu kisiloso edebeeyo koo egeli Nama Godee mapoo ka takee. Egeeseega nayo mada yimapoo egee takomolo ogoloso yayo namapoo nei tenelaiso.

<sup>7</sup> Osoloso niyo yimapoo takolone Godeeyo goo gooleedelee poogoo odoo oso dibada godee mapoo takeli egeesi masi takolone na debee. Bei, diayo Godee mapoo taka ee ma kulodu goo mauwe to diya sage takeliso. Bei, diayo goolee diayo sage takooga, dia godeeso duleiso, dee gweliso.

<sup>8</sup> Esiga niyo diba egeesi masi goo mauwe Godee mapoo takolone na debee. Bei, niyo goomoga goo ee nibada Ama Godee yayo malalo olo gooleedoloso ka badoso.

<sup>9</sup> Esino niyo Godee mapoo takooga, hageese takee,

‘Ibada Ama Kei mi ma dokodoo badeli,

biame susuga ma kulodu hedebe nee hu oso toowa doloso mele dee, odoo susuga oso dokodoo poudalame.

<sup>10</sup> Esiga nayo wiligi doloso badeli goo oso sibilei iba goomogo.

Osoloso Kei mi mapoo nayo goomoga goo egee tomolo goo ee see mipoo hamapoo debeli odoo oso tolone ka dabalame.

<sup>11</sup> Osoloso biame susuga ma kulodu nei iyo nalai imapoo tenee.

<sup>12</sup> Osoloso ibada goo tokenee hapoloso boobado bigi.

Bei, iba nosee odoo susuga oso goo tokenee susuga imapoo moodeli ee boobado bigiliso.

<sup>13</sup> Osoloso iba goo tokenee mapoo na gido di dee.

Esino iba Saitenso kitulugu omaga peegoo gilimado di.

[Bei, nayo wiligi doloso badeli goo sabolo,

osoloso nayo kitulugu egee molo sabolo,

osoloso nee hu oso toowa doloso kookaiyo moloso osee malaiso.

Hagee tei goo.]’

<sup>14</sup> Esiga odoo aboso nimapoo tokeenee goo moodooga, niyo dia tokenee ee boobado bigi. Niyo egeeseega, nei nibada Ama Kei mi ma dokodoo egee bado oso nibada goo tokenee hapoloso boobado bigileiso.

<sup>15</sup> Esino odoo aboso nimapoo goo tokenee moodooga, niyo dia tokenee ee boobado bigilega poogooga, nei nibada Ama oso nibada goo tokenee ee hapoloso boobado bigileime.”

*Nei tei doloso Godee mapoo takolone dabalai goo*

<sup>16</sup> “Osoloso niba nei tei doloso Godee mapoo takolone dobolone, goo goolee bakadio gweli odoo oso moodeli egeese na moodee. Bei, diba nei tei doloso dobolone, mudu poudoloso debeliso, odoo susuga oso diba nei tei doloso debee ee ogoloso gooleedalame. Esiga ayo nimapoo taka. Diayo goo egeesi moodoolone egee do maga, edebeeyo dia hu dokodoo olo poudooso. Goo egeesi maga Godeeye dimapoo nei hee tenelaime.

<sup>17</sup> Esino no nei tei doloso badolone Godee mapoo takalame gooleega, nee mudu howo hapoloso wudu gulo ka badebee.

<sup>18</sup> No egeese badoga, odoo susuga oso nayo nei tei doloso egee bado goo ee diba gooleedalaime. Esino odoo susuga oso koo egeli Nama Godeeye nayo mada nei tei doloso egee bado goo ee ogoloso namapoo nei tenelaiso.”

*Bi bei doloso badalai goo*

*(Luka 11:34-36; 12:33-34; 16:13)*

<sup>19</sup> “Esiga niba mi toowa hamapoo haga bi bei mooloogoo magoloso na



debee. Bei, mi toowa hamapoo nibada bi abo siso naliso. Osoloso abo emisia ki nadoloso tokenee peliso. Osoloso abo heli teli odoo oso gasibileso heli teliso.

<sup>20</sup> Esino niba Godeeye goomoga goo ee tolone ka debbee. Niyo egeesee seega, Godeeye Kei mi mapoo nei nimapoo tenelaiso. Mi omapoo siso nee bi koo nali, osoloso mi omapoo bi emisia ki nadoloso koo tokenee peli, osoloso heli teli odoo oso gasibileso nee bi heli koo teli.

<sup>21</sup> Nimapoo bi bei toowa ma mologa, nibada goo goolee oso omapoo meliso.

<sup>22</sup> Esiga nee su mapoo nee howo oso keme masi ka moloso. Osoloso nee howo oso tekepo mologa, nee su susuga gadeebugu malaiso.

<sup>23</sup> Esino nee howo oso tokenee poga, nee su susuga neliga malaiso. Egeesi ma kulodu namapoo gadeebugu egee molo semidiloso badoga, no tei diya neliga ma kulodu badoso.

<sup>24</sup> Esiga edebeeyo wiligi odoo bakadio eyo to mapoo mesiloso silone tou talai tebile. Bei, yo o wiligi odoo hee goomogolone hee gowoolaiso. Egeeseelone yayo wiligi odoo heeyo to mapoo mesiloso silone, see heeyo to mapoo mesileime. Esiga niyo Godee mapoo mesimo silone molee toowa toloso badalai goo mapoo mesilei tebile.”

*Tei toloso dobolone haga na goolee*

*(Luka 12:22-31)*

<sup>25</sup> “Esiga ayo nimapoo taka, niyo dobolone nei nalai sabolo osoloso howo nalai sabolo osoloso dugo kalai sabolo omapoo haga na goolee. Bei, nei nalai bi oso goo toowa koo moloso. Haye. Esino nibada gie badeli goo oso goo toowa ka moloso. Osoloso kali bi oso goo toowa koo moloso. Haye. Esino nibada su oso goo toowa ka moloso.

<sup>26</sup> Esiga niba só ogoloso goolee. Diba nali bi dieso sogoloso koo

gooloogali. Osoloso diba nei nali bi magalai moso mauwe. Esino nibada Ama Godeeye Kei mi ma dokodoo egee bado oso dimapoo nei nali bi ka tenemoloso. Esino Godeeyo howo woola só oso goo toowa koo moloso. Esino niyo goo toowa ka moloso.

<sup>27</sup> Esiga edebeeyo kali bi sabolo osoloso nei nali bi sabolo omapoo diya gooleega, o gie badeli see hoo-goo sagelisomo? Haye.

<sup>28</sup> Esiga niba kasi maga kali bi mapoo haga goolee sabolo ka dabala? Esino niba dobudu meli palapalawa tekepo ogoloso goolee. Bei, diba dieso nediliyo pidilame tou koo teli. Osoloso dugo dieso kalai koo duseli.

<sup>29</sup> Esiga ayo nimapoo ka taka, daga Solomonoye wiligi odoo toboloso badebei mapoo yayo kali bi medee tekepo kalaga meleeso. Esino dobudu meli palapalawa oso tekepo oso dugo tekepo Solomonoye kali ee dagadi.

<sup>30</sup> Esiga dobudu meli palapalawa tekepo oso epei bou gasibileso moloso, see biame hee mapoo wooseliso. Esino Godeeye palapalawa omapoo dugo masi tekepo ka kadili daga, a tei toso, Godeeye nimapoo dugo tekepo tenelaiso. Bei, niyo Godeeyo howo woola goo toowa ka moloso. Odoo niba tei too kibile.

<sup>31</sup> Esiga niba goo koudulone dobolone egeesee na goolee, ‘Iyo nei sabolo howo sabolo kamapoo talaisoba? Osoloso iyo dugo kalai bi kamapoo talaisoba?’ dee na goolee.

<sup>32</sup> Bei, peegoo debeli odoo oso bi hageesi maga diya goolone debeliso. Esino Nama Godeeye bi niyo talame goomegeli ee yayo malalo olo gooleedooso.

<sup>33</sup> Esiga niba Godeeye wiligi doloso badeli goo ee goolone, daga malalo nibada Ama yayo goomoga goo ee tolone ka debbee. Niyo egeeseega bi susuga niyo egee esigamolo ee nei

yayo nimapoo tenelaiso.

<sup>34</sup> Esiga niba godigi gooso peledabalai mapoo goo haga koudulone na debée. Bei, godigi eyo goo ee godigi eyo goo oso. Esino niba epei eyo goo ee goolone ka debée.”

## 7

*Emegei dia goo wulo goo mauwe na midi*

*(Luka 6:37-38, 41-42)*

<sup>1</sup> “Niyo nee odoó heeyo goo wulo goo mauwe na midi. Esino niyo egeesee midiga, nei Godeeye nibada goo onosee hedebe egeesee midileiso.

<sup>2</sup> Bei, niyo emegei dia goo kasee midiga, nei nibada goo onosee Godeeye hedebe egeesi midileiso. Niyo goo teiba hedebe egeesi midiga, nei yayo niba nosee teiba hedebe egeesi midileiso.

<sup>3</sup> No kasi maga nee odoowo howo mapoo gelesi pepooko egee molo medee ogolone, hee nee howo mapoo homo toowa egee molo egelega ka pagala?

<sup>4</sup> Osoloso nee howo mapoo homo toowa egee molo egelega no see kaseega nee odoó mapoo takolone, ‘Nee howo mapoo gelesi pepooko egee molo ayo tabiga,’ dee ka take-liyo?

<sup>5</sup> No tei goo goolee bakadio gweli odoó. Bei, daga nee howo mapoo homo toowa egee molo ee tabigi. Egeeseega nee odoowo howo mapoo gelesi pepooko egee molo medee ogoloso nayo tabigilei tebileiso.

<sup>6</sup> Godee mapoo tenelai bi ee so mapoo na tenee. Bei, soso namapoo see wedi sibilesó no palaiso. Osoloso namapoo bi tekepo egee molo be mapoo na togobise. Bei, beso bi mapoo homosó tooboomo siloga tokenee palaiso.”

*Esiaga agalaiso*  
*(Luka 11:9-13)*

<sup>7</sup> “Esiga ayo nimapoo taka, niba woose. Egeeseega, nimapoo tenelaiso. Osoloso niba esie. Egeeseega, niyo agalaiso. Osoloso niba osulu mapoo kalamadi. Egeeseega osulu nimapoo yamagalaiso.

<sup>8</sup> Bei, woosali odoó oso goo talaiso. Osoloso esieli odoó oso goo agalaiso. Osoloso osulu mapoo kalamadili odoó mapoo osulu yamagalaiso.

<sup>9</sup> Esiga edebeeyo owoloye wo nalame woosaga, yimapoo yo tenelaisomo?

<sup>10</sup> Osoloso yayo see di nalame woosaga, nayo yimapoo sa tenelaisomo? Haye.

<sup>11</sup> Niba tokenee odoó, esino niyo nibada owolo dimapoo bi tekepo tenelai goo ee niba gooleedooso. Esiga ibada Ama Godee Kei mi ma dokodoo egee bado yayo yimapoo bi woosali odoó mapoo bi tekepo teneli goo ee niba gooleedooso.

<sup>12</sup> Niba edebeeyo goo hee nimapoo moodoolame goomogoga, daga niyo dimapoo goo egee moodee. Bei, Moseseeye eligi goo sabolo osoloso Godee maga to tolosó kokodo takomo silesibili odoó oso to hogugu oso eligi goo eyo bei hagoso.”

*Osulu pepooko*  
*(Luka 13:24)*

<sup>13</sup> “Esiga osulu pepooko maga gadi. Bei, Dou mi mapoo dili osulu ee diya toowa osoloso eli onosee diya toowa. Egeesi maga odoó bei oso osulu omaga galagadilesó eli omaga ka diyadaga moloso.

<sup>14</sup> Esino gie badeli mapoo gadili osulu ee diya pepooko. Osoloso eli omapoo dili onosee diya pepooko. Esiga odoó aboso eli egee ogoloso omaga ka diyadaga moloso.”

*Gamenee goo eligili odoó medee hoodo ege*  
*(Luka 6:43-44)*

15 “Niba obeeyamo! Gamenee goo eligili odoos medee ege. Bei, diba kolo ma dokodooga odoos tekepo masi nimapoo sibiliso. Esino dibada kulodu dobu so kamanali egeesi masi nimapoo sibiliso.

16 Esiga niba diayo suso goo moodoo maga diayo egee do goo ee ogoloso gooleedeliso. Bei, pigi ko sabolo osoloso geleipi ko sabolo weti maga ko koo peeya.

17 Esiga homo su tekepo oso homokoko tekepo peliso. Osoloso homo su tokenee oso homokoko tokenee peliso.

18 Esiga homo su tekepo oso homokoko tokenee koo peeya. Osoloso homo su tokenee oso homokoko tekepo koo peeya. Haya.

19 Egeesi ma kulodu homo su kaso homokoko tekepo pelega mologa, homo egee heemagoloso dou mapoo toodalaiso.

20 Esiga gamenee goo eligili odoos ee diayo goo moodoo maga dia goo ee ogoloso niba gooleedalaiso.

21 Esiga haga odoos susuga oso amapoo Lodee, Lodee dolone egee do oso Godeeye wiligi doloso badeli mapoo gasibileime. Esino odoos agayo mo Ma Godee Kei mi ma dokodoo egee bado yayo goomoga goo ee tomo siloga, hedebe odoos egee bia oso gasibileiso.

22 Esiga goo midili biame mapoo odoos aboso sibiliso amapoo egeesee takalaiso, ‘Lodee, Lodee, iyo nee hu maga Godeeyo to takomo silesibiliso, osoloso nee hu maga odoos bo holo paladee peegoo hasiso bugu dolone silesibulone goo toowa opusomo di moodoomo silesibiliso,’ dee takalaiso.

23 Esino nei ayo dimapoo egeesee takalaiso, ‘Niba a gooleedele. Esiga niba amaga peegoo diyadee, niba tokenee teli odoos,’ dee takalaiso.”

### *Moso tegeli odoos bakadio (Luka 6:47-49)*

24 “Edebeeyo to ayo eligi duloso mesiloso siloga, yo odoos goo medee gweli oso moso tegelame mi nelegedi dooloso omou sooloso moso tegei odoos egeesi masi badoso.

25 Bei, i sabolo howo sabolo simiso, osoloso howo duwa oso o moso mapoo weino, moso egee kibiya meleeso. Bei, moso omou mi nelegedi doloso omou ka sooga.

26 Esino edebeeyo to ayo eligi duloso mesilega siloga, yo odoos goo medee koo gweli oso moso tegelame mi nelegedi doolega omou sooloso, moso tegei odoos egeesi masi badoso.

27 Bei, i sabolo howo sabolo simiso, osoloso howo duwa oso o moso mapoo woome, moso egee kibilega saga goboloso guobuguso.”

28 Yesuye goo hagee eligimeleso koodobume, odoos susuga yayo eligi du oso diya howoogadooso.

29 Bei, yayo eligi ma kulodu tei eligili odoos oso eligi egeesi masi koo eligime. Esino yayo odoos diya kitulugu oso eligi masi eligiso.

## 8

### *Yesuye odoos agagisa bia tekepo pa (Maka 1:40-45; Luka 5:12-16)*

1 Yesu mubi ma dokodooga kumoo moomolome, odoos mooloogoodoo bei oso yima hamamee diyadeeso.

2 Egeesee semelee biame domo mapoo odoos agagisa bia\* sibiliso Yesuwo homo beiyopoo ebiso miyomoo tugusaloso egeesee takaso, “Lodee, nayo a tekepo moodoolai goomogoga, a tekepo moodee,” diso.

3 Esemee Yesuye o deeso odoos egee sigolone egeesee takaso, “Ayo no tekepo palai a goomogo. Esiga no tekepo pe,” diso. Esemee epedee omapoo o kolo mapoo agagisa bia mauwe poogooso.

7:16: Gal 5:19-22; Yem 3:12    7:19: Mat 3:10; Luka 3:9; Yon 15:6    7:20: Mat 12:33    7:21: Luka 6:46; Yem 1:25    7:23: Psa 6:8; 2Tim 2:19    7:29: Maka 1:22; Luka 4:32    \* 8:2: *odoo agagisa bia* - Yu odoos dia tei oso takolone, odoos agagisa bia hageesee ee Godeeyo howo woola kee kauwe deliso. Osoloso Yu odooso diba sigilei tei deliso. Goo egeesi maga yo tekepo palame Yesu mapoo ka hoowa. 8:4: Lev 14:1-32; Mat 9:30; Luka 17:14

<sup>4</sup> Esemé Yesúye yimápoo egeesee takaso, “Nayo díleso no ayo tekepo moodoo goo ee odoó abo mapoo na takee. Esino nayo díleso Godee ogo odoó ogo doloso domo badeli odoó mapoo nee su tekepo pa goo ee ka eligi. Osoloso odoó susuga oso ogoloso no tekepo moodoo goo ee gooledalame, nayo Moseseeye tei magoo ee dodolone, nee su tekepo moodoo omaga emegei di bi tenee,” diso.

*Loum ha teli gíbadeli odoó oso tei too goo*

*(Luka 7:1-10)*

<sup>5</sup> Yesu Kapeniyum mi mapoo díleso peledoboome, Loum ha teli odoó 100 gíbadeli odoó\* oso yo pidilame Yesu mapoo sibilesó egeesee takaso,

<sup>6</sup> “Lodee, mo tou teli odoó hee diya paiyega su kakawoo buguloso tiamoloso,” diso.

<sup>7</sup> Esemé Yesúye yimápoo egeesee takaso, “Ayo sibilesó yo tekepo palaiso,” diso.

<sup>8</sup> Esino Loum ha teli odoó gíbadeli odoó oso nei egeesee takaso, “Lodee, nayo mo mosopoo sibilei, a tebile. Esino mo tou teli odoó ee tekepo palame, no wulo omaga tobudulone toso idagee.

<sup>9</sup> Bei, anosee odoó abo dia tou teli odoó. Osoloso odoó aboso mo tou teli odoó doloso dobolone mo to mapoo mesiloso sílesibiliso. Esiga ayo mo tou teli odoó hee mapoo, ‘no koo diye’ daga, yo omapoo díliso. Osoloso see odoó hee mapoo takolone, ‘no hamapoo sibeye’ daga, yo sibiliso. Osoloso see mo tou teli odoó hee mapoo takolone, ‘no goo hagee teye’ daga, yo goo ee teliso. Esino mo tou teli odoó ee tekepo palame nayo wulo toso idagee.”

<sup>10</sup> Yesu to hagee duloso howodolone yima hamamee sibadee odoó susuga mapoo egeesee takaso, “Ayo nimápoo taka, ayo Isalael mi mapoo sílee ee ma kulodu kibiya tei too odoó hee yo egeesi egele.

<sup>11</sup> Esiga ayo nimápoo taka, mi opusomo opusomo di maga sibilesó, Godeeye wiligi doloso badeli Kei mi mapoo Eibalaham, Aisek, osoloso Yekob sabolo hodobo mooloo-goodoloso nei nalame dabalaiso.

<sup>12</sup> Esino Yu odoó tei tele poo-goo ee Dou mi mapoo toodalaiso. Egeesega omapoo dobolone mei gísile sabolo pupusígilone dabalaiso.”

<sup>13</sup> Esemé Yesúye Loum ha teli gíbadeli odoó mapoo egeesee takaso, “No nee mosopoo di. Nayo goo peledabalaiso doloso tei too oso goo peledabalaiso,” diso. Egeesee semelee mapoo Loum ha teli gíbadeli odoó o tou teli odoowo mosopoo paiyega tiamelee odoó ee olo weidooso.

*Yesúye odoó susuga tekepo pa*  
*(Maka 1:29-34; Luka 4:38-41)*

<sup>14</sup> Osoloso Yesu Pitayo mosopoo diso. Yo omapoo díleso egeino, Pitayo nalobo paiyeso kolo dei moodoome tiamolome egeiso.

<sup>15</sup> Esemé Yesúye sobo egeeyo dee mapoo sígime, paiye weidooso. Osoloso yo toboloso wo síliso Yesu mapoo teneeso.

<sup>16</sup> Osoloso habe omapoo odoó susuga oso bo holo paladee susuga Yesúye badebei mapoo iyado sibadeeso. Esemé yayo to kitulugu sabolo takeme, bo holo susuga odoó ma kuloduga peegoo hasiso buguloso, odoó paígiga susuga ee tekepo paso.

<sup>17</sup> Esiga Godee maga to toloso kokodo takomo síli odoó Aisayaye daga hoogoo to taka sabolo tebilame síso. Bei, yayo egeesee takaso, “Yayo íbada paiye susuga egee molo yayo tolone íba tekepo paso.”

*Yesúye di hamamee dadalai goo*  
*(Luka 9:57-62)*

<sup>18</sup> Yesúye odoó susuga oso yimápoo sibilesó mooloo-goodoo

\* **8:5:** *Loum ha teli odoó* 100 gíbadeli odoó hagee Yu odoonee. **8:11:** Luka 13:29 **8:12:** Mat 22:13; 25:30; Luka 13:28 **8:17:** Isa 53:4



ogoloso, o hamamee dili odo mapoo egeesee takaso, “Iba abei hodiokoo dalo soowoomo,” diso.

<sup>19</sup> Osoloso biame omapoo tei eligili odo heeso sibilesi yimapoo egeesee takaso, “Eligili odo, nayo kamapoo dusomo, nayo di ayo hamamee deede sileiso,” dee takaso.

<sup>20</sup> Yesuye nei yimapoo egeesee takaso, “Dobu soso debeli mi moloso, osoloso soso tieseli dibada ou moloso. Esino Odo Holo ayo tieli moso mauwe,” diso.

<sup>21</sup> Osoloso odo abo Yesu ma hamamee dadagamo silesibili ee ma kulodu odo heeso Yesu mapoo egeesee takaso, “Lodee, a no dadalai goomogo. Esino nayo epedee amapoo biame tenee, a mo ma toga bouleiya,” dee takaso.

<sup>22</sup> Esem Yesuye nei yimapoo egeesee takaso, “No a deede sibe. Tei tele poogoo odo ee odo wedia masi doso. Esiga diayo dia odo wedia eyo kou ee boulei tekepo,” diso.

*Yesuye i sabolo howo ki sabolo hamaga taka*

*(Maka 4:35-41; Luka 8:22-25)*

<sup>23</sup> Esem Yesu o hamamee dili odo sabolo abei mapoo meilesi du mapoo dalaga poogoloso diyadeeso.

<sup>24</sup> Diba diyadaga molome, haga booloogelega i toowa sibume, howo ki toowa simiso. Osoloso howo ki toowa oso sibulone dibada du ma kulodu howo sasoso. Esino Yesu du ma kulodu tiameleeso.

<sup>25</sup> Esem Yesu o hamamee dili odo oso dileso Yesu tidibugulone yimapoo egeesee takaso, “Lodee, nayo iba pidi. Iba howoso nalasoo!” dee takaso.

<sup>26</sup> Esem Yesu yo tia hogabuloso dimapoo egeesee takaso, “Niba kaseega haga ka ebiala? Niyo tei too diya pepooko,” diso. Osoloso yayo toboloso i sabolo howo ki sabolo koodobilame to kitulugu sabolo takaso. Esem i sabolo howo

ki sabolo omapoo koodobume, abei see howo gie paso.

<sup>27</sup> Esem Yesu o hamamee dili odo oso goo hagee ogoloso howoogadolone egeesee takaso, “Odo hagee ogo odo bele? Poo sabolo osoloso howo ki sabolo oso o to mapoo duloso koodobiaso,” dee takaso.

*Yesuye odo bo holo pala bakadio tekepo pa*

*(Maka 5:1-20; Luka 8:26-39)*

<sup>28</sup> Osoloso Yesu abei hodiokoo daboogoloso Gadala odo eyo mi mapoo dileso peledabaso. Yo omapoo dileso peledoboome, odo bo holo pala bakadio oso odo bi maga yimapoo sibadeeso. Odo bakadio hagoso halabagamo silesibulone diya kitulugu sabolo silesibume, mosobia odo oso wedia eyo bi eli omaga koo silesibili.

<sup>29</sup> Esem odo bo holo pala oso Yesu mapoo sibilesi toso neligidi egeesee takaso, “Godeeyo owolo, nayo imapoo ogo goo moodoolame ka simiyo? No Godeeye biame magoo mapoo sibilega wulo domo mapoo iba ee tokenee palame ka simiyo?” diso.

<sup>30</sup> Diayo tebisamelee koola mapoo be hu mooloogoodoo toowa oso mi namo silesibiso.

<sup>31</sup> Osoloso bo holo oso Yesu mapoo howolone egeesee takaso, “Nayo iba peegoo hasiso buguga, iba be ma kulodu galaga di dee takee,” diso.

<sup>32</sup> Esem Yesuye diba be ma kulodu galagadi diso. Egeesee semelee domo omapoo odo bakadio hagee bia dia kuloduga bo holo peegoo galagadileso be ma kulodu galagadiso. Esem be mooloogoodoo susuga oso godobia maga kukulo meilesi, howomoo wediaso.

<sup>33</sup> Be bali odo oso goo hagee ogoloso, saga o mosobia mapoo hoguo dileso be mapoo goo peledaba sabolo osoloso odo bakadio tekepo pa goo ee oposusumo sileeso.

<sup>34</sup> Esemе mosobia omapoo de-beli odoo susuga oso Yesu agalame diyadeeso. Diba dileso yo ogoloso yimapoo howolone egeesee takaso, “No ibada mi hamaga peegoo di,” dee takaga meleeso.

## 9

*Yesuye odoo su kakawa poogoo tekepo pa*

*(Maka 2:1-12; Luka 5:17-26)*

<sup>1</sup> Osoloso see Yesu o hamamee dili odoo sabolo du ma kulodu meilesu bulumaloso o midee Kapeniyum mapoo dalo soowaso.

<sup>2</sup> Diba omapoo dalo sooweleso peledoboome, odoo aboso odoo su kakawa poogoo ee kida mapoo tiediloso Yesu mapoo imado sibadeeso. Esemе Yesuye diayo tei too goo ee ogoloso odoo su kakawa poogoo yimapoo egeesee takaso, “Emegei, no howaleegeе. Nee goo tokenee ee olo hapoloso boobado buguso,” diso.

<sup>3</sup> Esino tei eligili odoo abo oso Yesuye egeesee taka duloso gowoolone diesono egeesee takaso, “Odoо hagoso Godee bolo takoo,” diso.\*

<sup>4</sup> Esino Yesu diayo goo goolee olo ogoloso egeesee takaso, “Niba kasi maga ayo taka goo mapoo dooboo goolone diya gowoolone ka dabala?”

<sup>5</sup> Niba odoo su kakawa poogoo hagee ege. Yimapoo goo kasee takalai oso sebe ka mololo? Ayo odoo su kakawa poogoo mapoo ‘Nee tokenee ayo olo boobado buguso,’ dee takooga, o tokenee boobado bugu ee niyo gooleedalaimе. Esino ayo yimapoo takoo, ‘No toboloso nee kida tolosо di,’ daga, yo toboloso duga, odoo tekepo peli kitulugu amapoo molo doloso niyo gooleedalaiso.

<sup>6</sup> Esino Odoо Holo amapoo kitulugu olo teneeso, mipoo hamapoo goo tokenee hapoloso

boobado bigilei goo ee niyo ogoloso gooleedalame, ayo nimapoo eligileiso.” Osoloso yayo odoo su kakawa poogoo mapoo egeesee takaso, “No hogabuloso nee kida tolosо mosopoo di,” diso.

<sup>7</sup> Esemе odoo su kakawa poogoo toboloso o mosopoo diso.

<sup>8</sup> Esemе odoo susuga oso goo hagee ogoloso howoogadolone Godeeyo hu dokodoo poudoolone debeiso. Bei, Godeeye kitulugu hagee odoo mapoo tenee ogoloso.

*Yesuye Matiyu idoo*

*(Maka 2:13-17; Luka 5:27-32)*

<sup>9</sup> Goo hagee koodobume Yesuye dulone egeino, tekisi molee teli odoo Matiyuye tekisi molee mageli moso ee ma kulodu badoboome egeiso. Osoloso Yesuye yimapoo egeesee takaso, “Ama hamamee sibe,” diso. Esemе yo toboloso Yesuye di hamamee diso.

<sup>10</sup> Yesu o hamamee dili odoo sabolo Matiyuwo mosopoo peleso nei nolone doboome, tekisi molee teli odoo sabolo osoloso tokenee teli odoo oso sibilesо dibolo mooloo-goodoloso nei nolone debeiso.

<sup>11</sup> Esino Pelisi odoo oso goo hagee ogoloso gowoolone Yesuwo hamamee dili odoo mapoo egeesee takaso, “Bei kasi maga nibada eligili odoo oso tekisi molee teli odoo sabolo osoloso tokenee teli odoo sabolo nei nolone ka badabala?” diso.

<sup>12</sup> Esemе Yesuye to hagee duloso nei egeesee takaso, “Odoо paile poogoo ee melesenee neli odoo mapoo koo diya. Esino hedebe odoo paigiga oso melesenee neli odoo mapoo ka diya.

<sup>13</sup> Esiga Godeeyo to booka ma hogugu oso egeesee takooso, ‘Emegei sooloo dolone nei pidi nei pidi dolone dabalai goo ee ayo diya gooleeso. Esino nei niyo amapoo gala hu wooloso tenelai goo ee

**9:1:** Mat 4:13    \* **9:3:** Tei eligili odoo diba Yesu yo Godeeyo owolo, osoloso goo tokenee hapalai kitulugu Godeeye tenee yimapoo moloso doloso tei tele.    **9:4:** Luka 9:47; Yon 2:25    **9:6:** Yon 17:2  
**9:11:** Luka 15:2    **9:13:** Mat 12:7; Hos 6:6

ayo haga koo gweli,' dee takooso. Esiga niyo dilesa to hagee takoo goo eyo bei medee gooleede. Bei, ayo simi hagee, Godeeyo howo woola tekepo teli odoe ee gilimalame ka sibile. Esino tokenee teli odoe ee gilimadoloso Godee mapoo sibilame ka simi," diso.

*Yesuye nei tei doloso debeli goo ee eligi*

*(Maka 2:18-22; Luka 5:33-39)*

<sup>14</sup> Biame heeso Yoneeyo hamamee dili odoe oso sibilesa Yesu mapoo egeesee takaso, "Ibalo osoloso Pelisi odoe sabolo Godee mapoo takolone dobolone nei tei doloso debeliso. Esino bei kasi maga nee hamamee dili odoe ee nei tei delega ka dabalala?" diso.

<sup>15</sup> Esemee Yesuye dimapoo wudu takolone nei egeesee takaso, "Sobo hulei odoe oso sobo hulame nei mopoodoo doloso o odoe gilimileiso. Egeeseega o odoe susuga sibilesa gooholone nei tei doloso dabalaisomo? Haye. Diba goomoga sabolo sobo huli odoe sabolo hodobo dobolone nei nolone hodobo dabalaiso. Esino biame heeso sobo huli odoe ee dimaga peegoo ido duga, diba nei tei doloso dabalaiso."

<sup>16</sup> Yesuye wudu takolone see egeesee takaso, "Edebeeyo dugo nape mapoo dugo dia koodoloso omapoo opodoloso koo dusiya. Bei, dugo egee hapoloso magooga, dugo dia oso gawoolone sesegawe oso, dugo nape ee tologodoloso ou toowa moodolaiso.

<sup>17</sup> Osoloso see edebeeyo wain i dia katolo gout be koloso moodoo nape mapoo koo salama seeya. Bei, wain i dia oso kitulugu oso katolo be gout koloso moodoo nape ee gabuguga, wain i ee hodalaiso. Osoloso katolo gout be koloso moodoo ee tokenee palaiso. Esiga wain i dia ee medee katolo gout be koloso moodoo dia mapoo salama salai tekepo. Egeeseega wain i sabolo osoloso katolo gout be koloso moodoo sabolo tokenee palaime."

*Yesuye sobo holo sabolo osoloso sobo hee tekepo pa*

*(Maka 5:21-43; Luka 8:40-56)*

<sup>18</sup> Yesuye Yoneeyo hamamee dili odoe mapoo to osee takomolome, howo gisili moso gibadeli odoe oso sibilesa Yesuwo homo beiyopoo gauwuloso badolone egeesee takaso, "Mo sobo holo epedee taso. Esiga nayo sibilesa yo o gie badeli see talame nee deeso sige," diso.

<sup>19</sup> Esemee odoe ogooso toboloso dime, Yesu o hamamee dili odoe sabolo tebisaloso yibolo hodobo diso.

<sup>20-21</sup> Diba osee diyadaga molome, sobo hee aso woolooma koodobilega dugo 12 ma kulodu badebei oso Yesuwo dugo mapoo sigilame yima hamamee sibilesa egeesee gooleeso, "Ayo dugo Yesuye ka eyo su mapoo wulo sigoga, a tekepo palaiso," dee gooleeso. Osoloso hegi sibilesa sigeso.

<sup>22</sup> Esemee epedee omapoo Yesu bidi toboloso sobo ogoloso yimapoo egeesee takaso, "Mo holo, no howaleege. Nayo amapoo tei too maga no olo tekepo paso," diso. Esemee epedee omapoo sobo egee olo tekepo paso.

<sup>23</sup> Osoloso Yesu see abaga howo gisili moso gibadeli odoe eyo mosopoo palaiso. Diba omapoo peleso egeino, odoe aboso goohele sabolo dobolone bogobou masi gawulone doboome egeiso. Esemee odoe aboso pupusiga meleeso.

<sup>24</sup> Yesuye goo hagee ogoloso dimapoo egeesee takaso, "Niba peegoo diyadee. Sobo holo hagee koo tamoloso. Esino yo wulo tiamolo," diso. Esemee diayo Yesuwo to duloso tei telega poogoloso wulo yiliga meleeso.

<sup>25</sup> Esino Yesuye odoe susuga peegoo diyadee doloso sobo holo oso tamelee moso ee ma kulodu peleso o dee mapoo tooso. Esemee sobo holo tamelee oso ta maga see hogabiaso.

<sup>26</sup> Esemé mi su koola omapoo debeli odoo mapoo goo hagee dudobuguso.

*Yesuye odoo howo neliga sabolo osoloso odoo to koo keli ee tekepo pa*

<sup>27</sup> Yesu moso omaga miyomoo meilesó dimeleeno, odoo howo neliga bakadio oso yima hamamee toboloso dulone toso neligidi takolone egeesee takaso, “Deibidiyo amawe,\* nayo iba sooloo dologa, iba pidi,” dee takomo diyadeeso.

<sup>28</sup> Osoloso Yesu yo see moso kulodu polome, odoo howo neliga bakadio oso yayo badebei mapoo sibadeeso. Esemé Yesuye dimapoo egeesee takaso, “Niba tei tosono, ayo niba tekepo moodoolai a teiba?” dee takaso. Esemé diayo to nei egeesee takaso, “O, Lodee. Iba tei toso,” dee takaso.

<sup>29</sup> Esemé Yesuye dibada howo mapoo sigolone egeesee takaso, “Niyo amapoo tei too goo maga niyo goomoga goo ee peledabalaiso,” diso.

<sup>30</sup> Esemé dibada howo ee tekepo paso. Esino Yesuye to kitulugu sabolo dimapoo egeesee takaso, “Niyo dileso goo hagee odoo abo mapoo na takee,” diso.

<sup>31</sup> Esino odoo bakadio oso mi su koola omapoo debeli odoo susuga mapoo Yesuwo goo ee oposusumo diyadeeso.

<sup>32</sup> Odoo howo neliga tekepo pa bakadio oso epedee omaga peegoo diyadaga molome, odoo aboso odoo bo holo pala Yesu mapoo ido simiso. Odoo hagee bo holoso yima kulodu badolone, to kelega badeliso.

<sup>33</sup> Esino Yesuye bo holo ee yimaga peegoo hasiso bugume, yo see to keiso. Esemé odoo susuga oso goo hagee ogoloso howoogadolone egeesee takaso, “Iba Isalael mi ma kulodu daga goo hageesee egele,” dee takaso.

<sup>34</sup> Esino Pelisi odoo oso egeesee takaso, “Bo holo dia wiligi odoo oso Yesu mapoo kitulugu teneega, yayo kitulugu omaga bo holo peegoo hasiso bugulone ka silo,” dee takaso.

*Yesuye odoo susuga diya sooloo deli*

<sup>35</sup> Osoloso Yesuye mi susuga ma kulodu silone, Yu odoowo howo gisili moso susuga ma kulodu to tekepo Godeeye wiligi doloso badeli goo ee eligimo sileeso. Osoloso yayo odoo paigiga susuga tekepo poomo sileeso.

<sup>36</sup> Egeeseelone Yesuye odoo susuga ogoloso diya sooloo dalaso. Bei, diba pidili odoo mauwe goo tiadoloso dobolone, sipi beso odoo diba bali mauwe debeli egeesi masi debeiso.

<sup>37</sup> Esemé Yesuye o hamamee dili odoo mapoo egeesee takaso, “Homolee ma kulodu nei susuga olo bi moodooloso goalai ee moloso. Esino nei ee gooloogalái tou teli odoo haga beinee.

<sup>38</sup> Esiga homolee gibadeli odoo mapoo woose, yayo o homolee ma kulodu nei gooloogalame tou teli odoo abo diye dalame,” diso.

## 10

*Yesuye odoo 12 hesiga (Maka 3:13-19; Luka 6:12-16)*

<sup>1</sup> Yesuye o hamamee dili odoo 12 gilimadoloso, yayo dimapoo kitulugu teneeso, diayo silesibulone odoo susuga dima kulodu bo holo paladee ee peegoo habuguloso, odoo paigiga susuga tekepo palame.

<sup>2</sup> Esiga Yesuye diye di odoo 12 hagee bia dia hu ee hagoso. Saimon, o hu hee Pita, osoloso omolo Endulu, osoloso Sebediyo owolo bakadio Yemes dio Yonee dio,

<sup>3</sup> osoloso Pilipi, osoloso Batolome, osoloso Tomas, osoloso tekisi molee teli odoo Matiyo, osoloso Alpiyeseeyo owolo Yemes, osoloso Tadiyes,

**9:27:** Mat 20:29-34 \* **9:27:** Deibidiyo amawe deli hu eyo bei ee Godeeye hudi magoo dolone takoo. **9:30:** Mat 8:4 **9:33:** Maka 2:12 **9:34:** Mat 12:24; Maka 3:22; Luka 11:15 **9:35:** Mat 4:23; Maka 1:39 **9:36:** Zec 10:2; Num 27:17; 1Ki 22:17; Mat 14:14; Maka 6:34 **9:37:** Luka 10:2 **10:1:** Maka 6:7; Luka 9:1



<sup>4</sup> osoloso Loum gamalee mapoo ha teli odoos Saimon, osoloso Yudas-Iskaliyot (yayo hamamee Yesu ha teli odoos dimapoo tiasoos).

*Yesuye odoos 12 diye di  
(Maka 6:7-13; Luka 9:1-6)*

<sup>5</sup> Yesuye odoos 12 hagee bia diye dolone dimapoo egeesee takaso, “Niyo duga, Yu odoonee mapoo osoloso Samaliya odoos mapoo na di.

<sup>6</sup> Esino niba Isalael odoos mapoo di. Bei, diba sipi be hu oso diba bali odoos mauwe debeli egeesi masi doso.

<sup>7</sup> Esiga niyo dileso Godeeyo to egeesee takee, ‘Godeeye wiligi doloso badeli goo ee olo koola tooboos,’ dee takomo diyadee.

<sup>8</sup> Egeeseelone odoos paigiga susuga tekepo pe, osoloso odoos wedia mapoo see gie badeli tenee, osoloso odoos agagisa bia see tekepo pe, osoloso odoos ma kulodu bo holo paladee peegoo hasiso bigi. Ayo nimapoo kitulugu hagee nei mauwe teneeso. Esiga niyo odoos susuga pidimo silone, tou eyo nei talame na howamo silesibe.

<sup>9-10</sup> Niyo dulone molee sabolo, osoloso o sabolo, osoloso sedi bakadio sabolo, osoloso homo mapoo kali bi hee sabolo, osoloso susu sabolo tolosos na diyadee. Bei, tou teli odoos ee dia tou eyo nei talai tebiliso.

<sup>11</sup> Niyo mi hee mapoo dileso, mi omapoo odoos hee niba medee egeli esie. Niba odoos egeesee ogoloso yibolo hodobo o mosopoo debree. Osoloso mi egee poogoo dilega osee dobolone, yibolo o moso omapoo debree.

<sup>12</sup> Osoloso niba moso hee mapoo ido pologa, niyo moso omapoo debeli odoos mapoo emegei di to egeesee takee, ‘Godeeyo mesie goo oso nibolo mele dee.’

<sup>13</sup> Egeeseega moso ee ma kulodu debeli odoos oso emegei dolone mesie sabolo niba moso kulodu iyado pologa, Godeeyo mesie goo oso

dibolo malaiso. Esino diayo niba dibada moso kulodu iyado pelega poogooga, Godeeyo mesie goo oso dibolo malaime.

<sup>14</sup> Esiga niba mi hee mapoo duga, edebeeyo niba idilega poogoloso nibada to mapoo mesilega poogooga, mi egee poogoloso dulone, megegu nibada homo mapoo mologa omapoo te, Godeeye komonolone dimapoo dia goo tokenee eyo nei tenelai goo ee gooleedalame.

<sup>15</sup> Esiga ayo nimapoo taka, mosodei kaso niba sibadeega, ogoloso goomoga sabolo niba iyadilega poogooga, nei Godeeye midilei biame omapoo, dala toowa diayo talai oso Sodom bia sabolo osoloso Gomola bia oso dala talai ee dagadileiso.”

*Dala egee sibo eyo goo  
(Maka 13:9-13; Luka 21:12-17)*

<sup>16</sup> “Esiga ayo niba sipi be hu masi dobu so kamanali ma kulodu diye deeso. Esiga niba hebise masi dobolone medee goolee sabolo bolone ka debree. Osoloso niba molo masi dobolone niyo debree ma kulodu goo tokenee mauwe debree.

<sup>17</sup> Esiga niba obeeyamo. Edebeeyo niba tolosos goo midili moso mapoo ido polo dolone dabalaiso. Osoloso niba dibada howo gisili moso mapoo ido peleso wooloogolone dabalaiso.

<sup>18</sup> Osoloso niba mo goo maga gamalee wiligi odoos tebisa sabolo osoloso wiligi odoos toowa tebisa abo dia mudugiyopoo ido peleso omapoo holoogalaiso. Esino niyo omapoo peleso mo goo ee dimapoo osoloso Yu odoonee mapoo takolone dabalaiso.

<sup>19</sup> Egeesi ma kulodu edebeeyo niba goo midili moso mapoo ido pologa, niyo takalai goo ee haga na goolee. Bei, biame omapoo Dio Tei oso niyo takalai goo goolee tekepo ee nimapoo tenelaiso.

<sup>20</sup> Esiga niba niso goolee takalaime, esino Nama Godeeye

Dio Tei nimapoo tenee oso nibolo toboloso goo goolee tekepo teneega niyo egeesee takalaiso.

<sup>21</sup> Biame omapoo edebeeyo emei dio omolo dio wooloomalame diba goweli odoo mapoo tiasalaiso. Osoloso amaye owolo mapoo egeesee selaiso. Osoloso owoloye dibada ama dio owee dio mapoo mesilega poogoloso diba wooloomalame tiasalaiso.

<sup>22</sup> Bei, niyo amapoo tei too goo omaga odoo susuga oso nimapoo heiga toowa malaiso. Esino edebeeyo eyo tei too kibiloso badolone hoo poogoo mapoo dilesa peledobooga, yo badoboso kookaiyo gie badeli talaiso.

<sup>23</sup> Esiga odoo susuga oso nimapoo dala teneega, mi omaga mi hee mapoo kukulo diyadee. Esino ayo nimapoo taka. Niyo egeeseelone Isalael mi toowa ma kulodu mi pepooko susuga mapoo Godeeyo to osee takomo silesiboga, Odoo Holo ayo omapoo sibileiso.

<sup>24</sup> Esiga hamamee dili odoo oso dia eligili odoo ee dagadilesa koo badoso. Osoloso tou teli odoo oso dibada wiligi odoo taba ee dagadilesa koo doso.

<sup>25</sup> Egeesi ma kulodu dibada eligili odoo mapoo goo heeso peledaba hedebe egeesi oso o hamamee dili odoo dimapoo peledobooga, diba goomoga sabolo dabalai tekepo. Osoloso wiligi odoo taba mapoo goo heeso peledaba hedebe egeesi oso o tou teli odoo dimapoo peledobooga, diba goomoga sabolo dabalai tekepo. A nibada wiligi odoo doloso ka badoso. Esiga odoo aboso a hu tokenee Belsebul\* hediga, niba nosee hu diya tokenee hedigileiso.”

*Mi odoobolo na ebi*  
(Luka 12:2-7)

<sup>26</sup> “Esiga niba goweli odoo ee bolo haga na ebi. Bei, goo susuga mada

egee molo see woola peledabalaiso. Osoloso edebeeyo koo duli goo ee see woola takooga duleiso.

<sup>27</sup> Esiga ayo nibolo silone goo abo hedebe nimapoo takeli susuga ee see niyo woola yilige bigi. Osoloso ayo nimapoo goo hee mada dulu mapoo takooga, goo egee niyo moso omu ma dokodoo peleso see woola takee.

<sup>28</sup> Esiga niba odoo nimapoo goweli ee bolo haga na ebi. Bei, diba hedebe su wooloomali ee gooleedoo, esino dio wooloomalai diba tebile. Esino niba hedebe Godeebolo obulone ka debee. Bei, yayo nibada su sabolo osoloso dio sabolo tokenee palame, Dou mi mapoo toodalai yo teiba.

<sup>29</sup> Esiga niba goolee, só pepuso bakadio ee wulo molee ko ta hedebeso teli. Esino ee ma kulodu só pe heeso talai ee ibada Ama Godeeye koo goomogoga, só pe egee talaima.

<sup>30</sup> Esiga nibada wiligi mapoo wudu susuga egee molo, Godee yo olo gooleedoo. Bei, yayo susuga olo hesigaso.

<sup>31</sup> Esiga niba haga obugulone na debee. Bei, Godeeyo howo woola sóso goo toowa koo moloso. Haye. Niyo goo toowa ka moloso.

<sup>32</sup> Esiga odoo agayo odoo howo woola tobudulone yayo amapoo tei too goo ee yilige buguga, nei ayo mo Ma Godee Kei mi ma dokodoo egee bado eyo howo woola yo mo odoo dalaiso.

<sup>33</sup> Esino odoo agayo odoo howo woola tobudulone yayo amapoo tei tele poogoo goo ee woola yilige buguga, nei ayo mo Ma Godee Kei mi ma dokodoo egee bado eyo howo woola yo mo odoonee dalaiso.”

*Domo pilei goo*  
(Luka 12:51-53; 14:26-27)

<sup>34</sup> “Esiga niba ayo mi toowa hamapoo mesie goo tosimi dee na goolee. Haye, ayo mesie goo tosimile, esino domo pilame ka simi.

**10:21:** Mica 7:6; Mat 10:35; Maka 13:12; Luka 21:16    **10:24:** Luka 6:40; Yon 13:16; 15:20    **10:25:** Mat 9:34; 12:24; Maka 3:22; Luka 11:15    \* **10:25:** *Belsebul* ee Saiteneeyo hu hee.    **10:26:** Maka 4:22; Luka 8:17    **10:28:** Yem 4:12; Loum 8:31    **10:31:** Mat 6:26    **10:33:** Maka 8:38; Luka 9:26; 2Tim 2:12    **10:35:** Mica 7:6

<sup>35</sup> Esiga ayo simi goo eyo bei egeesee moloso.

Giso holo oso amabolo domo pileiso.

Osoloso sobo holo oso oweebolo domo pileiso.

Osoloso gisowo osobo oso odoowa dio domo pileiso.

<sup>36</sup> Esiga egeesi ma kulodu nee soosoosoo namapoo ha teli odoo doloso dabalaiso.

<sup>37</sup> Edebeeyo ama sabolo, owee sabolo, owolo giso holo sabolo, osoloso sobo holo mapoo diya goolee sabolo badolone, hee a goolee pepooko mologa, yo ayo di hamamee deedeede sibilei tebile.

<sup>38</sup> Osoloso odoo agayo talai sabolo dala toowa talai sabolo goo medee moodelega poogoloso, ayo di hamamee dedelega poogooga, yo ayo di hamamee deedeede sibilei tebile.

<sup>39</sup> Esiga edebeeyo o gie badeli eyo nediliyo balai daga, o gie badeli ee osugobalaiso. Esino edebeeyo mo goo maga o gie badeli osugobooga, yo badoboso kookaiyo gie badeli talaiso.”

*Nei tekepo talai  
(Maka 9:41)*

<sup>40</sup> “Edebeeyo niba o mosopoo gili-mado pologa, yayo a ido poloso. Esiga edebeeyo o mosopoo a ido pologa, yayo mo Ma Godee a diye di ee ido poloso.

<sup>41</sup> Osoloso edebeeyo Godee maga to toloso kokodo takomo sili odoe ee ogoloso, o mosopoo ido pologa, yo Godee maga to toloso kokodo takomo sili odoe oso nei teli yinosee hedebe egeesi masi talaiso. Osoloso edebeeyo Godeeyo howo woola odoe tekepo ogoloso, o mosopoo ido pologa, yo Godeeyo howo woola odoe tekepo oso nei teli yinosee hedebe egeesi masi talaiso.

<sup>42</sup> Osoloso edebeeyo mo hamamee dili odoe hee wuluge ogoloso yimapoo bi pepooko wulo howo

egeesi keneega, yo nei toowa talaiso. Esiga hagee tei goo.”

## 11

<sup>1</sup> Yesu o hamamee dili odoe 12 mapoo goo hagee taka koodobuloso see Gelili mi toowa ee ma kulodu Godeeyo to takomo silame diso.

*Yesu dio osoloso Yonee odoe howo oluguli dio*

*(Luka 7:18-35)*

<sup>2</sup> Yonee odoe howo oluguli oso neliga moso ma kulodu badolone, Kelisoye goo tomo silee duloso o hamamee dili odoe abo Yesu mapoo diye diso.

<sup>3</sup> Esemme diba dileso Yesuye badebei mapoo peledoboloso yimapoo egeesee takaso, “Yoneeye iba namapoo diye dolone to egeesee takeeyena, ‘No tei Keliso iyo hagee bamolo odoe osomo? O, iba odoe hee bamalaiyo?’” diso.

<sup>4</sup> Esemme Yesuye nei dimapoo egeesee takaso, “Niba see wedi dileso niyo egei goo sabolo osoloso niyo du goo ee Yonee mapoo takee.

<sup>5</sup> Bei, odoe howo neliga oso see medee ogowa. Osoloso odoe bagi daga poogoo sabolo see tekepo poloso ka silesiba. Osoloso odoe agagisa bia sabolo tekepo poloso ka silesiba. Osoloso odoe dulu tabaga onosee tekepo poloso to taka see duliso. Osoloso odoe wedi sabolo hogogabuloso see silesiboso. Osoloso to tekepo hagee bi mauwe odoe oso duluga moloso.

<sup>6</sup> Esiga odoe agayo ayo goo moodoo ee ogoloso diayo amapoo tei too goo ee pegelega poogooga, Godeeye dimapoo goomoga goo tenelaiso.”

<sup>7</sup> Yonee o hamamee dili odoe oso see wedi diyadeeme, Yesuye odoe mooloogoodoo mapoo Yoneeyo goo takalame bei mooloogooso. Osoloso yayo egeesee takaso, “Niba miwe poogoo mi mapoo ogoe goo agalame ka diyo? Pooso sibulone obu dabisa ee agalame ka diyo?”

<sup>8</sup> Niba edebeeyo dugo tekepo kaloso badoboome ee agalame ka diyo? Haye. Bei, dugo tekepo kalagali odoo ee wiligi odoo tebisa oso debeli moso tekepo mapoo debeli.

<sup>9</sup> Esino niba wulo Godee maga to toloso kokodo takomo sili odoo ee agalame ka diyo? O. Niyo dilesa egei odoo Yonee hagoso Godee maga to toloso kokodo takomo sili odoo daga hoogoo debei ee yayo dagadilesa ka badoso.

<sup>10</sup> Bei, Godeeyo to booka mapoo hogugu oso egeesee egee takoo ee Yoneeyo goo ee takooso,

‘Ayo mo to tosili odoo yo daga malalo diye dalaiso,  
odoo susuga oso nayo sibilei mapoo mopoodoo doloso de-beeye dalame,’ diso.

<sup>11</sup> Esiga ayo nimapoo taka. Odoo daga hoogoo debei susuga ee Yoneeye dagadilesa ka badoso. Esino edebeeyo Godeeye wiligi doloso badeli goo mapoo odoo wuluge oso Yonee dagadilesa ka badoso.

<sup>12</sup> Esiga odoo howo oluguli Yoneeye Godeeyo to takomo silee biame omaga bei mooloogoloso abaga simino epedee hamapoo tokenee teli odoo oso ha teli odoo masi Godeeye wiligi doloso badeli goo ee tokenee palame diya kituluguso.

<sup>13</sup> Yonee sibilega badoboome, Moseseeye eligi goo sabolo osoloso Godee maga to toloso kokodo takomo sili odoo susuga oso hogugu oso Godeeye wiligi doloso badeli goo ee takemeleeso.

<sup>14</sup> Esiga niyo to diayo taka hamapoo tei toga, niyo Yonee see Ilaya dalaiso. Bei, Godeeyo to booka mapoo hogugu oso Ilayaye sibilei goo ee takemeleeso.

<sup>15</sup> Niba dulubolo, esiga ayo hagee takoo medee hoodo dui.”

<sup>16</sup> Osoloso Yesuye see egeesee takaso, “Odoo epedee biame hamapoo egee do odoo ee kasee

masiso dosomo? Diba holaiso masi go domopoo dobolone emegei dimapoo nei takoo nei takoo dolone dobolone egeesee takaga meliso,

<sup>17</sup> ‘Iyo goomoga kosaiya poume, niba hepele. Osoloso iyo goohele kosaiya poume, niba pisile,’ diso.

<sup>18</sup> Niba odoo egeesi masi doso. Bei, Yonee odoo howo oluguli yayo sibilesa nei haga toowa namo sile, osoloso wain i keesoo nele. Esino niyo yo bo holo paladoo, dee takeliso.

<sup>19</sup> Osoloso hamamee Odoo Holo a olo simiso. Ayo sibilesa wo sabolo wain i sabolo namo sileeme, niyo a nei sabolo yugune sabolo dooboo nali odoo, dee takeliso. Osoloso niyo a tekisi molee teli odoo sabolo, osoloso tokenee teli odoo sabolo hedebe doloso ka badeli deliso. Esino odoo agayo Godeeyo goo goolee tekepo gooledoloso tomo siloga, yayo Godeeyo goo goolee ee tekepo dolone ka eligiso.”

*Yesuye odoo tei tele poogoo eyo goo taka*

*(Luka 10:13-15)*

<sup>20</sup> Yesuye mi abo mapoo goo toowa opusomo di moodoomo sileeme, odoo mi omapoo debeli oso dia goo tokenee su wudelega poogoome, yayo odoo egee bia dia goo ogoloso dimapoo diya takolone egeesee takaso,

<sup>21</sup> “Kolasin bia sabolo Betesaida bia, dala toowaso niba bamoloso. Bei, ayo nibada mi mapoo goo toowa mudu opusomo opusomo di ee moodoogamo silee egeesi masi Taya bia mapoo osoloso Saidon bia mapoo moodoogamo silee diepi, diba haga booloogelega, dibada goo tokenee maga miligi pialoso debeliyo. Osoloso diayo dibada goo tokenee maga miligi pia goo ee eligilone dugo tokenee kelekaloso dosou holugaloso silesibiliyo.

<sup>22</sup> Esino ayo nimapoo taka, Godeeye goo midilei biame mapoo dala toowa Kolasin bia sabolo osoloso



Betesaida bia oso talai oso Taya bia sabolo osoloso Saidon bia oso talai ee dagadileiso.

<sup>23</sup> Osoloso Kapeniyum mosobia niba Kei mi ma dokodoo ido palaiso, dee goolone ka dosomo? Haye. Niba toloso Dou mi mapoo toodalaiso. Ayo nibada mi mapoo goo toowa mudu opusomo di moodoogamo silee egeesi masi Sodom mi mapoo moodoogamo silee diepi, Sodom mi tokenee pelega epedee hamapoo osee meliyo.

<sup>24</sup> Esino ayo nimapoo taka, Godeeye goo midilei biame omapoo dala toowa Kapeniyum bia niyo talai oso Sodom bia oso talai ee dagadileiso.”

*Amapoo sibilesa hese  
(Luka 10:21-22)*

<sup>25</sup> Esemee Yesuye egeese takaso, “Ma, Kei mi sabolo osoloso mipoo sabolo nayo wiligi doloso ka badoso. Esiga a namapoo goomogo. Bei, nayo wiligi doloso badeli goo mada egee molo ee, odooo goo goolee toowa mapoo yilige bigile. Esino nayo goo goolee dele poogoo odooo mapoo yilige buguso.

<sup>26</sup> O. Tei takoo, Ma. Goo hagee nayo goomoga goo oso.”

<sup>27</sup> Yesuye see tobu egeese takaso, “Mo Maye goo susuga amapoo olo teneeso. Esiga odooo heeso Owolo a gooleede. Esino hedebe mo Maye Owolo, a ka gooleedoo. Osoloso odooo heeso mo Ma gooleede. Esino hedebe Owolo ayo mo Ma ka gooleedoo. Odooo ogu bia mapoo Owolo ayo mo Mayo goo ee yilige bigilame goomogoga, odooo egee bia oso mo Mayo goo ee diba nose gooleedalaiso.

<sup>28</sup> Esiga edebeeyo hegi bi masi kadaloso silone kwasu sabolo siloga, niba amapoo sibe. Egeeseega ayo nimapoo hasali tenelaiso.

<sup>29</sup> Osoloso ayo eligi goo ee ogoloso mo goo peedee. Bei, a mesie odooo. Esiga niba hasalame amapoo sibe.

<sup>30</sup> Bei, goo ayo eligi ee dadalai haga kodianee. Osoloso bi masi ayo nimapoo eimedilame egee molo ee diya poopeeya.”

## 12

*Pelisi odooo dia hasali biame maga  
Yesubolo toso agadiga*

*(Maka 2:23-28; Luka 6:1-5)*

<sup>1</sup> Yu odoowo hasali biame heeso, Yesu o hamamee dili odooo sabolo witi wo ko segei ee ma kuloduga diyadaga meleeso. Osoloso Yesu o hamamee dili odooo oso diya houdume, witi wo ko gooloogaloso nalagamo diyadeeso.

<sup>2</sup> Esemee Pelisi odooo oso goo hagee ogoloso Yesu mapoo egeese takaso, “Bei kasi maga nee hamamee dili odooo oso iyo hasali biame mapoo witi wo ko ka goologayo? Diayo ibada tei gababuso,” diso.

<sup>3</sup> Yesuye nei egeese takaso, “Deibidiye o odooo sabolo houdume diayo moodoo goo ee Godeeyo toso booka mapoo hogugu niyo hesigeleyo?”

<sup>4</sup> Bei, Deibidiye Godeeyo tei moso ma kulodu gadileso tei wo toloso o odooo sabolo neso. Esino tei wo hagee ibada tei ee dodolone Godee ogo odooo ogo doloso domo debeli odooo hedebe oso nali. Esino Deibidiye o odooo sabolo wo ne oso tei magoo ee gababiaso.

<sup>5</sup> Osoloso Moseseeye tei hogugu ma kulodu to hee hageese egee takoo niyo hesigeleyo? Goo egee Godee ogo osoloso odooo ogo doloso debeli odooo oso hasali biame mapoo tei moso ma kulodu dia tou teliso. Diayo goo egeesi moodeli oso tei magoo gababiliso. Esino Godeeye goo egee ogoloso tokenee dee koo takeli.

<sup>6</sup> Esiga ayo nimapoo taka, goo hee dia epedee hamapoo sibilesa egee molo oso tei moso oso kitulugu ee dagadilesa ka moloso.

<sup>7</sup> Esiga Godeeyo to booka mapoo hogugu oso egeesee takooso, 'Niyo emegei pidilei ono ayo diya goolone niyo nei amapoo gala wooloso teneli goo ee ayo haga koo gooleeso,' diso.

Niyo to eyo bei medee kibiya gooleedoloso ka debei diepi, niyo mo hamamee dili odoo ee tokenee odoo dee takele pegeliyo.

<sup>8</sup> Bei, niyo hasali biame egee Odoo Holo ayo wiligi doloso ka badoso."

*Yesuye odoo dee hodio seeseegedoo poogoo tekepo pa*  
(Maka 3:1-6; Luka 6:6-11)

<sup>9</sup> Yesuye to taka hagee koodobuloso see omaga diayo howo gisili moso mapoo palaso.

<sup>10</sup> Osoloso moso eyo kulodu odoo dee hodio seeseegedoo poogoo bado-boome egeiso. Egeesi ma kulodu Pelisi odoo aboso Yesu tokenee odoo dalame eli esilone yimapoo egeesee takaso, "Ibada tei magoo oso takolone iyo hasali biame mapoo odoo tekepo palai tekepowa?" diso.\*

<sup>11</sup> Esino Yesuye nei dimapoo egeesee takaso, "Nima kulodu odoo heeso o sipi be hedebe oso niyo hasali biame mapoo wulu ma kulodu toodobuoga, yayo yo hudilega pagalaisomo? Haye. Yayo yo wulu ma kulodu badoga see hudileiso.

<sup>12</sup> Esiga Godeeyo howo woola sipi beso goo haga toowa koo moloso. Haye. Edebeeyo goo toowa ka moloso. Esiga edebeeyo ibada hasali biame mapoo goo tekepo talai ee tei mauwe."

<sup>13</sup> Esemee Yesuye odoo dee hodio seeseegedoo poogoo yimapoo egeesee takaso, "Nee dee seeseegedoo poogoo egee see hoodode," diso.

Esemee odoo egee o dee see hoododeme, dee egee tekepo poloso o dee tekepo hodio egeesi masi meleeso.

<sup>14</sup> Esemee Pelisi odoo oso goo hagee ogoloso komonolone dia howo gisili moso maga peegoo diyadeeso. Osoloso diayo dilesa Yesu tolosa woolame diesono to mousa.

*Yesu yo Godeeye hesia*

<sup>15</sup> Esiga diayo to mou goo ee yo olo gooleedoloso, Yesu yo see mi hee mapoo diso. Esemee odoo susuga oso yo deede diso. Esemee odoo paigiga susuga dima kulodu melee ee yayo tekepo paso.

<sup>16</sup> Osoloso yayo dimapoo to kitulugu sabola egeesee takaso, "Niyo mo goo hagee odoo susuga mapoo na oposisiye," diso.

<sup>17</sup> Godee maga to tolosa kokodo takoma sili odoo Aisayaye taka to sabola teibasa. Bei, yayo egeesee takaso,

<sup>18</sup> "Ege, hagee mo tou teli odoo. Yo ayo hesia.

Ayo yo diya goolone

yimapoo diya goomogoso.

Ayo mo Dio yimapoo tenelaiso.

Osoloso tei goo ee yayo Yu odoonee susuga mapoo takalaiso.

<sup>19</sup> Osoloso yayo odoo hee sabola toso agadigilone to boowolaime.

Osoloso yayo eli domopoo eligiga to neligidi takalaime.

<sup>20</sup> Osoloso yayo tiosi seegee magoo ee gobigileime.

Osoloso keme pepooko paimologa yayo semidileime.

Esiga odoo tei too kibile poogoo yayo egee pidimolo goo ee epedee pagalai mauwe.

Esino odoo susuga oso Godeeye goomoga goo ee dodomolo ogoloso omapoo koodobileiso.

<sup>21</sup> Esiga o hu maga Yu odoonee susuga oso diayo dulone egee bamolo gie badeli ee talaiso."

**12:10:** Luka 14:3 \* **12:10:** - Pelisi odoo aboso Yesu mapoo hageesee takaso, bei, diayo tei goo ee dodolone dia hasali biame mapoo odoo paiye ee moodolai tei. **12:11:** Luka 14:5 **12:14:** Yon 5:16 **12:16:** Mat 8:4; Maka 3:12 **12:18:** Isa 42:1-4; Mat 3:17

*Yesu dio Belsebul dio  
(Maka 3:20-30; Luka 11:14-23)*

<sup>22</sup> Biame omapoo odoo aboso odoo hee howo neliga mapoo bo pala oso to kelega badebei odoo ee Yesu mapoo ido simiso. Esemme Yesuye yo tekepo paso. Esemme domo omapoo odoo egee olo howo puo ogoloso see to keiso.

<sup>23</sup> Odoo susuga oso goo hagee ogoloso howoogadolone egeesee takaso, “Odoo hagee Deibidiyo amawe bele,” diso.

<sup>24</sup> Esino Pelisi odoo oso goo hagee duloso egeesee takaso, “Yesuye Belsebul oso kitulugu maga bo holo peegoo hasiso bigiliso. Bei, Belsebul yo bo holo dia wiligi odoo,” diso.

<sup>25</sup> Esino Yesuye diayo goolee goo ee gooleedoloso dimapoo egeesee takaso, “Mi toowa mapoo debeli odoo oso abo puloso dieso nediliyo ha toga, mi toowa egee malaime, tokenee palaiso. Osoloso soosoo heeso o, mosobia heeso abo puloso dieso nediliyo ha toga, diba dabalaimme, tokenee palaiso.

<sup>26</sup> Esiga Saiten oso bo holo peegoo hasiso buguga, dia mooloogoodoo ma kulodu abo puloso dieso nediliyo ha talaiso. Yayoo egeesee seega, yayoo wiligi doloso badeli goo oso kookaiyo osee malaisomo? Tokenee palaiso.

<sup>27</sup> Esino ayo bo holo peegoo hasiso bigili kitulugu hagee tei Belsebul oso kitulugu maga ka hasisimo silo daga, nibada hamamee dili odoo oso bo holo peegoo egee hasisimo sile-sibo kitulugu egee kamapoo teliyo? Esiga diayo takooga niyo amapoo egee takoo goo ee tei goonee, dee takalaiso.

<sup>28</sup> Esino ayo Godeeyo Dio Tei oso kitulugu maga bo holo peegoo ka hasisimo siloso. Goo oso Godeeye wiligi doloso badeli goo oso olo nimapoo simi goo ee ka eligiso.

<sup>29</sup> Esiga odoo heeso kitulugu odoo eyo moso mapoo peleso bi heli talame gooleega, yo daga kitulugu

odoo egee tiso tialogoloso magalaiso. Osoloso hamamee o moso kulodu peleso o bi heli talaiso.

<sup>30</sup> Esiga edebeeyo abolo tebel-ega poogooga, yayoo amapoo ha to-moloso. Osoloso edebeeyo abolo odoo Godee mapoo gilimado sibilega poogooga, yayoo odoo Godee maga peegoo hasiso bugu domoloso.

<sup>31</sup> Esiga ayo nimapoo taka. Goo tokenee susuga edebeeyo teli sabolo osoloso emegei dimapoo to tokenee takeli goo ee Godeeye hapoloso boobado bigileiso. Esino edebeeyo Dio Tei eyo goo maga to tokenee takooga, o goo tokenee egee Godeeye hapoloso boobado bigileime.

<sup>32</sup> Osoloso edebeeyo Odoo Holo amaga to tokenee takooga, Godeeye o goo tokenee egee hapoloso boobado bigileiso. Esino edebeeyo Dio Tei eyo goo maga to tokenee takooga, yo goo tokenee moloso kookaiyo osee malai ee toso. Esiga o goo tokenee egee Godeeye hapoloso boobado bigileime.”

*Homokoko maga homo o su ka gooleedeeya  
(Luka 6:43-45)*

<sup>33</sup> “Esiga homo tekepo oso homokoko tekepo peliso. Esino homo tokenee oso homokoko tokenee peliso. Esiga homo su susuga oso ko pa maga ka gooleedeeya.

<sup>34</sup> Esiga niba tokenee odoo hebise masi dobolone niyo see goo tekepo takalai tebile. Bei, edebeeyo goo goolee dia sooloo ma kulodu egee molo ee dia magaso takooga woola yilige bigiliso.

<sup>35</sup> Esiga goo tekepo teli odoo oso goo tekepo o goo goolee mapoo meli ee o magaso woola yilige bigiliso. Osoloso goo tokenee teli odoo oso goo tokenee o goo goolee mapoo meli ee o magaso woola yilige bigiliso.

<sup>36</sup> Egeesi ma kulodu ayo nimapoo taka. Goo midilei biame mapoo odoo susuga oso goo tokenee diayo taka

goo eyo bei ee Godee mapoo woola yilige bigileiso.

<sup>37</sup> Esiga Godeeye goo midilei biame mapoo, to no takeli goo sabolo teiba nee goo midileiso. Egeesi ma kulodu no to tekepo takomo sili daga, yayo no odo tekepo dalaiso. Esino no to tokenee takomo sili daga, yayo no odo tokenee dalaiso.”

*Edebeeyo goo toowa opusomo di moodoo ee agalame goomoga  
(Maka 8:11-12; Luka 11:29-32)*

<sup>38</sup> Biame heeso Pelisi odo abo sabolo osoloso tei eligili odo sabolo oso Yesuye badebei mapoo sibiles egeese takaso, “Eligili odo, nayo kitulugu too egee tei Godee maga simidoo doloso gooleedalaiya, nayo goo toowa opusomo di hee moodee,” diso.

<sup>39</sup> Esemee Yesuye nei dimapoo egeese takaso, “Odo epedee hamapoo egee do niba diya tokenee. Osoloso niyo amapoo tei talai goweliso. Esiga niyo ayo wulo goo toowa opusomo di moodoo ee agalame amapoo takeliso. Esino ayo nimapoo goo toowa opusomo di hee eligilei mauwe. Esino hedebe Godee maga to toloso kokodo takomo sili odo Yonayo goo ono nimapoo eligileiso.

<sup>40</sup> Yona biame bakadio hedebe di osoloso gesi bakadio hedebe di ee ma kulodu di toowa eyo gemedei ma kulodu badebeiso. Esiga Odo Holo anosee biame bakadio hedebe di osoloso gesi bakadio hedebe di mapoo midoo ma kulodu ta malaiso.

<sup>41</sup> Esiga Niniba odo oso goo midilei biame mapoo nibolo hodobo toboloso nibada goo midiloso, niba tokenee odo dalaiso. Bei, Yonaye Godeeyo to dimapoo takeme, diayo dia goo tokenee maga goo su wuduloso miligi piasso. Esino ayo Yona dagadiles ka badoso. Esino ayo Godeeyo to nimapoo takeme, niyo duloso nibada goo tokenee maga goo su wuduloso miligi pile.

<sup>42</sup> Osoloso goo midilei biame mapoo Siba mi eyo wiligi odo taba sobo onosee nibolo hodobo nibada goo midiloso niba tokenee odo dalaiso. Bei, wiligi odo taba Solomonoye eligi goo ee dulame yo eli sage abaga simiso. Esino ayo Solomonon dagadiles ka badoso. Esino niyo mo to dulei ka gowooso.”

*Bo holoso see wedi sibili goo  
(Luka 11:24-26)*

<sup>43</sup> “Esiga bo holoso odo maga pee-goo gaduga, yo diles do budu yayo badalai mi ee esiamo sileiso. Yo mi esiamo siloso koo ogoga, eyo nediliyo egeese takalaiso,

<sup>44</sup> ‘A mawo daga badebei moso mapoo see wedi dileiso,’ dee takalaiso. Osoloso yo see sibiles ogoga, gelesi kadee doloso bi medee mopoodoo ma molo agalaiso.

<sup>45</sup> Eseega yo see do budu wedi diles bo holo diya kitulugu abo 7 gilimadoloso sibiles moso omapoo dabalaiso. Egeeseega odo hagee eyo daga badebei poogoloso see diya tokenee badalaiso. Esiga goo tokenee teli odo epedee hamapoo egee do niyo daga debei poogoloso see diya tokenee dabalaiso. Bei, niyo ayo eligi goo mapoo tei tele poogooga.”

*Yesuwo owee sabolo osoloso omolo dio  
(Maka 3:31-35; Luka 8:19-21)*

<sup>46</sup> Yesuye odo mooloogoodoo mapoo to osee takomolome, owee dio osoloso omolo dio sibiles peegoo tebisamolone, yimapoo to takalame goomogaso.

<sup>47</sup> Esemee odo heeso Yesu mapoo egeese takaso, “No ege, noowee dio osoloso nomolo dio namapoo to takalame sibiles peegoo tebisamolone,” dee takaso.

<sup>48</sup> Esino Yesuye nei yimapoo egeese takaso, “Mo wee ogumo? Osoloso molo dio ogumo?” diso.

<sup>49</sup> Esemee yayo o hamamee dili odo dimapoo dee kou takolone



egeesee takaso, “Niba ege, odoo egee bia ee mo wee osoloso molo dio oso.

<sup>50</sup> Esiga edebeeyo mo Ma Kei mi ma dokodoo badeli oso goomoga goo ee tomo siloga, odoo egee bia ee molo dio, osoloso mo booba dio, osoloso mo wee dio oso,” dee takaso.

## 13

*Witi ko segei maga wudu taka*

*(Maka 4:1-9; Luka 8:4-8)*

<sup>1</sup> Biame hedebe ogoso Yesu moso kuloduga peegoo dilesa Gelili abei pee mapoo meilesa biaso.

<sup>2</sup> Yo omapoo badoboome, odoo susuga oso yayo eligi goo ee dulame yimapoo sibilesa diya mooloo-goodooso. Esemé Yesu yo du mapoo daboogoloso eligilone bado-boome, odoo susuga mubiyodoga tebisamolone duluga meleeso.

<sup>3</sup> Osoloso yayo goo susuga maga wudu takolone odoo susuga mapoo eligilone egeesee takaso, “Niba dui. Biame heeso odoo hee witi wo ko segelame diso.

<sup>4</sup> Yo witi wo ko sogomo sileeme, ko abo eli domopoo misigedibaso. Esemé só aboso sibilesa neso.

<sup>5-6</sup> Osoloso witi wo ko abo yugo kauwe mi mapoo misigediba ee bou saga pisigaso. Esino osoko pa oso dei moodoolone witi wo ko saga wediaso. Bei, too delega.

<sup>7</sup> Osoloso witi wo ko abo dagi we ti kauwe kadee mapoo misigedibaso. Osoloso bou pisigaso. Esino we ti sabolo palaga tiso tiademe susuga wediaso.

<sup>8</sup> Osoloso witi wo ko abo mi tekepo mapoo misigedibaso. Osoloso oso bou pisigaloso kakauwuloso ko diya palagaso. Egeesi ma kulodu witi wo ko aboso homokoko 100 egeesi palagaso. Osoloso aboso 60 egeesi palagaso. Osoloso aboso 30 egeesi palagaso.

<sup>9</sup> Odoo niba dulubolo, esiga to ayo hagee takoo medee dui!”

*Bei kasalame Yesuye wulo ka wudu takomo siliyo?*

*(Maka 4:10-12; Luka 8:9-10)*

<sup>10</sup> Osoloso Yesu o hamamee dili odoo oso sibilesa Yesu mapoo egeesee takaso, “Nayo kasalame odoo mapoo wulo ka wudu takomo siliyo?” diso.

<sup>11</sup> Esemé Yesuye nei dimapoo egeesee takaso, “Niyo Godeeye wiligi doloso badeli goo ee diya gooleedalaiso. Godeeye wiligi doloso badeli goo ee daga mada meleeso. Esino Godeeye epedee hamapoo nimapoo olo yilige buguso. Esino yayo odoo abo mapoo yilige bigile.

<sup>12</sup> Esiga to taka duli odoo mapoo Godeeye goo goolee tekepo bei tenelaiso. Esino edebeeyo mo to dulega poogooga, Godeeye yimapoo goo goolee tekepo pepooko egee molo see eyo peedee dalaiso.

<sup>13</sup> Ayo odoo mapoo wulo wudu takomo siliso. Bei, ‘diayo ogoloso medee kibiya egelega pagalame.

Osoloso diayo duloso goo eyo bei medee kibiya gooleedelega pagalame.’

<sup>14</sup> Osoloso Godee maga to tolosa kokodo takomo sili odoo Aisayaye taka to oso goo diayo moodeli sabolo teibasalo. Bei, yayo egeesee takaso, ‘Diayo medee hodu dilesa to taka duleiso,

esino goo eyo bei diayo medee kibiya gooleedalaime.

Osoloso diayo medee hodu dilesa agalaiso,

esino goo eyo bei diayo ogoloso gooleedalaime.

<sup>15</sup> Bei, diba tei goo ee gooleedalai gowoolone, dieso dibada deeso dia dulu tobodo osoloso dia howo gisigaso.

Esiga diba goo eyo bei ee gooleedalai tebile.

Esino diayo ogoloso, osoloso duloso goo goolee tekepo tolosa, amapoo wedi simi diepi,

ayo dibada goo tokenee hapoloso boobado bigiliyo.'

<sup>16</sup> Esino Godeeye mo hamamee dili odoonimapoo goomogoso. Bei, niyo ayo moodoo goo ee ogoloso duloso gooleedoo maga.

<sup>17</sup> Esiga ayo nimapoo taka. Godee maga to toloso kokodo takomo sili odoon daga debei sabolo osoloso Godeeyo howo woola tekepo debeli odoon oso niyo epedee egee ogomolo goo ee agalai doloso bameleeso. Esino diayo egele. Osoloso niyo epedee egee dumolo goo ee dulei doloso bameleeso. Esino diayo dule."

*Wudu taka goo eyo bei  
(Maka 4:13-20; Luka 8:11-15)*

<sup>18</sup> Yesuye see tobu egeese takaso, "Esiga witi wo ko segei maga wudu taka goo eyo bei medee dui.

<sup>19</sup> Esiga odoon abo witi wo ko oso eli domopoo misigediba egeesi masi doso. Diba to tekepo Godeeye wiligi doloso badeli goo ee duloso medee kibiya gooleedelega poo-goga, Saitenso sibilesos Godeeyo to dibada sooloo ma kulodu melee yayo peedee deliso.

<sup>20</sup> Osoloso odoon abo witi wo ko oso yugo kauwe mi mapoo misigediba egeesi masi doso. Esiga diayo Godeeyo to taka duloso goomoga sabolo saga teliso.

<sup>21</sup> Esino Godeeyo to oso dia sooloo ma kulodu too medee koo meili. Esiga diayo Godeeyo to duloso biame deiyepo mapoo tei teliso. Esino diayo Godeeyo to mapoo tei too goo maga hegi goo sabolo osoloso dala goo oso dimapoo siboga, diayo Godeeyo to mapoo tei too goo ee saga pegeliso.

<sup>22</sup> Osoloso odoon abo witi wo ko oso dagi we ti kauwe kadee mapoo misigediba egeesi masi doso. Diba Godeeyo to duloso tei teliso. Esino mi hamapoo dabalai maga goo kodia sabolo osoloso bi bei doloso dabalame goolee oso dibada tei too tokenee peliso. Egeesi maga diayo tei too goo oso homokoko masi koo peli.

<sup>23</sup> Osoloso odoon abo witi wo ko oso mi tekepo mapoo misigediba egeesi masi doso. Diayo Godeeyo to duloso gooleedeliso. Esiga odoon aboso homokoko masi 100 egeesi peliso, osoloso aboso 60 egeesi peliso, osoloso aboso 30 egeesi peliso."

*Witi wo ko sabolo osoloso obu ko sabolo*

<sup>24</sup> Osoloso Yesuye see hee wudu takolone odoon mooloogoodoo mapoo egeese takaso, "Godeeye wiligi doloso badeli goo ee egeesi masi moloso. Odoon heeso witi wo ko o homolee mapoo segeiso.

<sup>25</sup> Esino gesi odoon susuga tiesamolome, yimapoo ha teli odoon oso sibilesos yayo witi wo ko segei homolee omapoo obu ko sogoloso diso.

<sup>26</sup> Esiga witi wo ko segei olo kauwudoloso ko poome, obu ko segei sabolo hodobo palaso.

<sup>27</sup> Esemee o tou teli odoon aboso sibilesos egeese takaso, 'Nee homolee ma kulodu hedebe witi wo ko segeino, see kasi maga obu sabolo ka paladeeyo?' dee takaso.

<sup>28</sup> Esemee yayo nei egeese takaso, 'Imapoo ha teli odoon oso sibilesos ka segei molodoo,' diso.

Esemee o tou teli odoon oso yimapoo egeese takaso, 'Iyo dilesos obu egee tigoalosos peegoo togobisilei no goomogodo?' dee takaso.

<sup>29</sup> Esino yayo dimapoo egeese takaso, 'Haye, niyo na tige. Bei, niyo tigaga, witi wo ko segei sabolo tigebigiyaga.

<sup>30</sup> Esiga o diesono hodobo esee paladee dee. Osoloso ko goolai biame mapoo mo tou teli odoon oso daga obu ee tigoalosos dou mapoo toodee dalaiso. Esino witi wo ko segei oso paladee ee gooloogalosos mo nei mageli moso mapoo mooloogoo magee dalaiso.'"

*Yesuye ko pepooko masted deli sabolo osoloso yist maga wudu taka  
(Maka 4:30-32; Luka 13:18-21)*

<sup>31</sup> Osoloso Yesuye see hee wudu takolone o hamamee dili odoo mapoo egeese takaso, “Godeeye wiligi doloso badeli goo ee egeesi masi moloso. Odoo heeso ko pepooko masted deli todilesa o homolee mapoo segeiso.

<sup>32</sup> Esino ko abo ma kulodu ko masted deli hagee diya pepooko. Esino ko pepooko oso bou pisoloso kauwuga, homolee ee ma kulodu homo su oso toowa malaiso. Osoloso soso omapoo sibilesa o dee mapoo ou tegelaiso.”

<sup>33</sup> Osoloso Yesuye see hee wudu takolone dimapoo egeese takaso, “Godeeye wiligi doloso badeli goo ee egeesi masi moloso. Soboso wo palawa silame daga homolone, wo toowa ee ma kulodu yist pepooko kukoseliso. Osoloso yist pepooko oso wo palawa ee diya koudiliso.”

<sup>34</sup> Esiga Yesuye odoo mooloo-goodoo mapoo goo susuga hagee eligilame dimapoo wulo wudu takeliso.

<sup>35</sup> Yayo goo hageese tomo sili egee Godee maga to tolosa kokodo takomo sili odoo oso taka sabola tebilame ka eligimo sili. Bei, yayo egeese takaso, “Ayo odoo mapoo Godeeyo to eligilone wulo wudu takomo sileiso. Osoloso mi toowa bei mooloogolone goo mada melee ee see ayo woola yilige bigileiso.”

*Witi wo ko sabola osoloso obu maga wudu taka goo eyo bei*

<sup>36</sup> Yesuye odoo mooloogoodoo diye doloso, yo see moso kulodu palaso. Esem o hamamee dili odoo oso yimapoo sibilesa egeese takaso, “Witi wo ko segei sabola osoloso obu ko segei omaga wudu taka goo eyo bei nayo imapoo medee kibiya takee,” diso.

<sup>37</sup> Esem Yesuye dimapoo egeese takaso, “Witi wo ko segei mi ee Odoo Holo aso.

<sup>38</sup> Osoloso witi wo ko segei mi ee mipoo toowa hagoso. Osoloso witi

wo ko ee Godeeyo owolo dioso. Esino obu ko ee Saiteneeyo owolo dioso.

<sup>39</sup> Egeesi ma kulodu obu ko segeli odoo ee Saitenso. Osoloso goalai biame ee biame hoo poogoo oso. Osoloso witi wo ko goalai odoo ee Godeeyo momaiye oso.

<sup>40</sup> Esiga obu tigooso dou mapoo toodeli egeesi masi ee biame hoo poogoo mapoo Odoo Holo ayo Saiteneeyo owolo dio ee dou mapoo egeese toodalaiso.

<sup>41-42</sup> Egeesi ma kulodu Odoo Holo ayo mo momaiye diye dalaiso, diayo dileso odoo goo tokenee mapoo gido dili odoo sabola osoloso goo tokenee teli odoo ee gilimadoloso dou mi mapoo toodalaiso. Eseega diayo ee ma kulodu dobolone pisa sabola mei gisile sabola dabalaiso.

<sup>43</sup> Esino Godeeye tekepo deli odoo oso Ma Godeeye wiligi doloso badeli mi mapoo osokoso pa masi palaiso. Odoo niba dulubola, esiga to ayo hagee takoo medee dui!”

*Molee mada magoo maga wudu taka*

<sup>44</sup> “Esiga Godeeye wiligi doloso badeli goo ee egeesi masi moloso. Odoo heeso daga hoogoo bi medee tekepo molee toowaso too mi ma kulodu mada magoo ee odoo heeso mi doomeleso egeiso. Yo bi egee ogoloso see tobu miso gagaso. Osoloso goomoga sabola o mosopoo wedi dileso o bi susuga odoo abo mapoo teneloso nei molee tooso. Osoloso yayo molee oso mi egee tooso. Osoloso bi medee tekepo mada mi ma kulodu magoo sabola yayo tooso.”

*Beegee maga wudu taka*

<sup>45</sup> “Esiga Godeeye wiligi doloso badeli goo ee egeesi masi moloso. Odoo heeso beegesi esiamo siliso.

<sup>46</sup> Yayo esiamo siloso beegesi medee tekepo ogoga, yo see dileso o bi susuga odoo abo mapoo teneloso nei molee teliso. Osoloso yo molee oso beegesi tekepo teliso.”

*Pei maga wudu taka*

<sup>47</sup> “Esiga Godeeye wiligi doloso badeli goo ee egeesi masi moloso. Pei howomoo oluguloso di bei mologa egee misiga egeesi masi moloso.

<sup>48</sup> Egeesi ma kulodu pei mapoo di bei mologa, di kebili odoososo dia pei booboosese mapoo gimagoloso dobolone di piliso. Osoloso di tekepo ono o ma kulodu soliso, esino di edebeeyo koo nali ee peegoo togob-iseliso.

<sup>49</sup> Esiga biame hoo poogoo mapoo goo hageesi masi oso peledabal-aiso. Esiga Godeeyo momaiye aboso mipoo hamapoo sibilesa Godeeyo howo woola tekepo debeli odoosabolo osoloso goo tokenee teli odoos ee domo pileiso.

<sup>50</sup> Osoloso goo tokenee teli odoos ee Dou mi mapoo toodalaiso. Es-eega diayo ee ma kulodu pisa sabolo dobolone mei gisile sabolo dabal-aiso.”

<sup>51</sup> Yesuye o hamamee dili odoos mapoo egeesee takaso, “Niba ayo hagee takoo goo susuga eyo bei medee gooleedosomo?” diso. Esem diayo nei egeesee takaso, “O. Iba gooleedoso,” dee takaso.

<sup>52</sup> Esem Yesuye dimapoo egeesee takaso, “Tei too odoos agayo Godeeyo to eligilone, Godeeye wiligi doloso badeli goo ee gooleedolosos badoga, yo moso eyo ama masi badoso. Yayo moso ee ma kuloduga bi dia sabolo osoloso nape sabolo tolosos ka tosibo dalaiso.”

*Yesu o mosobia oso gowe*  
(Maka 6:1-6; Luka 4:16-30)

<sup>53</sup> Yesuye odoos susuga mapoo wudu takemelee koodobulosos mi hagee poogoo diso.

<sup>54</sup> Yo see wedi dileso o middee Nasalet mapoo badolone diayo howo gisili moso mapoo peleso Godeeyo to odoos mapoo eligilame bei mooloo-gooso. Esem odoos susuga oso yayo eligi duloso diya howoogadolone egeesee takaso, “Odoos hagoso goo

egee eligimo silos kapoo tobele? Os-oloso yayo goo toowa opusomos di egee moodoomos silos, kitulugos kapoo tobele?

<sup>55</sup> Yo wulos Meliyo owolos. Osoloso yo wulos moso tegeli odoos hamapoo badeli eyo owolos. Osoloso yo Yemes, Yosep, Saimon, osoloso Yudas egee bia dia emei.

<sup>56</sup> Osoloso obooba dios onosee ibolos hodobos hamapoo dosos. Esiga goo susuga egee Yesuyes kasee moodoomos silosomo?” dee takaso.

<sup>57</sup> Esiga diayos egeesee goolones Yesuyes eligi goo ee talai gowesos.

Esem Yesuyes dimapoo egeesee takaso, “Edebeeyos Godee magas to tolosos kokodos takomos sili odoos eyo to duloso mesilisos. Esino o mosobias sabolos osoloso o soosos oso o to mapoo duloso koo mesilis,” diso.

<sup>58</sup> Esiga Yesuyes diayos tei telegas poogolosos debei goo ee ogolosos o mi omapoo goo toowa opusomos di abos moodeles poogoosos.

## 14

*Odoos howo olugulis Yonee woolooma*

(Maka 6:14-29; Luka 9:7-9)

<sup>1-2</sup> Biame omapoo Gelilis mi gibadelis odoos Helodeeyes Yesuyes goo moodoomos silees dulosos o tou teli odoos mapoo egeesee takaso, “Odoos hagee Yonee odoos howo olugulis osos molodoo. Yo ta magas olo hogabiadoo. Esiga yayos see goo toowa opusomos di hageesee ka moodoomos silos,” dee takaso.

(Yayos hageesee takaso. Bei, Yonee telegas badoboome, goo hagosos peledabaso.)

<sup>3-4</sup> Biame heesos Helodeeyes omolos Pilipiyo osobos Helodiyes peedes husos. Esem Yoneeyes goo hagee ogolosos Helodee mapoo diyas takolones egeesee takaso, “Nayos nomolowos osobos peedes huleis tekeponee. Bei, egee tei,” diso.

Esem Helodee diyas komonolones, o has teli odoos mapoo takolones, Yonee



dee tialogoloso neliga moso ma kulodu huse diso.

<sup>5</sup> Esemeyo Yonee wooloomalame goomogaso. Esino odoobolo obulone wooloomemele poogooso. Bei, odoosusuga oso takolone Yonee Godee maga to toloso kokodo takomo sili odoodeliso.

<sup>6</sup> Osoloso hamamee Helodee yosoomagoo biame tugodeme, yayo o odoogilimadoloso sibilesowo nolone debeiso. Esemeyo Helodiye-seeyo sobo holo oso sibilesodia mudugiyopoo hopoome, Helodeediya goomogaso.

<sup>7</sup> Esemeyo nei Helodeeye gootei moodoolame takolone yimapoo egeeseetakaso, “Nayo goomoga bi ee amapoo takooga, ayo bi egeenamapoo tenelaiso,” diso.

<sup>8</sup> Yo to egeeseetaka duloso hopoomelee koodobuloso oweemapoo dileso yayo goomoga gooe duso. Osoloso see wedi sibileso Helodeemapoo egeeseetakaso, “AYonee odoohowo oluguli eyowiligi ono goomogo. Esiganayopedee o wiligi koodoloso tolo mapoo magoloso amapoo tenee,” deetakaso.

<sup>9</sup> Esino Helodee goohagee duloso Yoneeyowiligi koodoloso tenelaiyogoomegele. Esinoyayosoboholomapoo gootei moodoolame taka ee dibolohodobo nei nolone debeiodoo oso olo duso. Esiganagoo hageepagalaiyogoomegele.

<sup>10-11</sup> Esemeyayo o odoomapoo to kituluguteneeso, diayodileso Yoneeyowiligi koodoloso tosibilame. Osoloso o odoosoneliga moso ma kulodu gadileso, Yoneeyowiligi koodoloso tolo mapoo magoloso tosibilesosoboholomapoo teneeso. Esemeyo see yayo tosibilesoweemapoo teneeso.

<sup>12</sup> Esemeyo nei hamamee dili odoososibileso Yoneeyokoutodileso bouso. Osoloso dileso Yesu mapoo takaso.

*Yesuye odoos 5,000 mapoo nei pi (Maka 6:30-44; Luka 9:10-17; Yon 6:1-14)*

<sup>13</sup> Helodeeye Yonee woolooma gooe Yesu duloso, o hamamee dili odoosabolo du mapoo dalaga poogoloso, mi odoomauwe mapoo hasalame diyadeeso. Esino mi opusomopopusomo di mapoo debeli odoosogoo hagee duloso Yesuye badebei mapoomubili sibadeeso.

<sup>14</sup> Yesu du maga mubiyodoodaboogoloso tobudulone, odoosusuga oso mooloogoodoo ogoloso yayo diba diya sooloo dolone odoopaigiga tekepo paso.

<sup>15</sup> Yesuye egeeseemo sileeme, o hamamee dili odoosohabe sibilesoyimapoo egeeseetakaso, “Osoko olo todobuo. Esiganayoo doo susuga egeedo diyadeede, diayo mosobia koola keedo mapoo dileso nei diesonalai ee moleeso talame. Bei, mi iyo hageedo mapoo odoomauwe. Esigami hamapoo nei mauwe,” deetakaso.

<sup>16</sup> Esemeyo Yesuye dimapoo egeeseetakaso, “Niyo diba nei talame diyede na takee. Esino niyo nei dimapoo tenee,” diso.

<sup>17</sup> Esemeyo nei diayo yimapoo egeeseetakaso, “Imapoo wo si hedebe deetiadoo sabolo osoloso di bakadio moloso,” diso.

<sup>18</sup> Esemeyo Yesuye nei dimapoo egeeseetakaso, “Wo si sabolo osoloso di sabolo amapoo tosibe,” diso.

<sup>19</sup> Esemeyayo odoosusugapukusimapoo bulume deetakoloso, wo si deetiadoo sabolo di bakadio toloso Kei mi ma dokodoo bolone Godeemapoo goomoga to takoloso wo popeiso. Osoloso o hamamee dili odoomapoo nei egeeteneme, see diayo odoomooloogoodoo mapoo piso.

<sup>20</sup> Esemeyo odoosusuga oso nei teiba negadiya edigime nei hosudel-ega abo poogooso. Osoloso diayo nei naloso abo poogoo ee, Yesu o hamamee dili odoosomisigamo

dileso bou ma kulodu soo bou 12 egeesi metamagisaso.

<sup>21</sup> Osoloso giso sabolo sobo sabolo osoloso holaiso sabolo oso nei hagee neso. Esino hedebe gisowe hesiga ee 5,000.

*Yesuye howo ma dokodooga di  
(Maka 6:45-52; Yon 6:15-21)*

<sup>22</sup> Yesuye 5,000 odoo mapoo nei pi koodobuloso, o hamamee dili odoo mapoo egeesee takaso, “Daga niyo du toloso abei hodiokoo dalo soowee. Ayo odoo hagee bia diye doloso a hamamee ka sibileigo,” diso.

<sup>23</sup> Osoloso yayo odoo mooloo-goodoo olo diye doloso, see obusomo badalame mubi dokodoo howo gisilame palaso. Yo mubi dokodoo peleso badoboome neligaso.

<sup>24</sup> Esino biame omapoo o hamamee dili odoo oso du mapoo toboloso abei domopooga diyadaga meleeso. Esemee poo sabolo howo ki sabolo simi oso dia du diya bidigaso.

<sup>25</sup> Osoloso gesi domo kudi takeme, Yesuye abei ma dokodooga dimapoo diso.

<sup>26</sup> Esemee diayo Yesuye simi ogoloso dio dulone diya ebigaso. Bei, diayo goolee boso siba bele dolone diya googaso.

<sup>27</sup> Esemee Yesuye saga dimapoo egeesee takaso, “Niba howaleege. Haga na ebi. Ayo siba,” dee takaso.

<sup>28</sup> Esemee Pitaye egeesee takaso, “Lodee, tei nayo siboga, nayo anosee howomoo meledoboloso howo ma dokodooga namapoo sibeye dee,” diso.

<sup>29</sup> Esemee Yesuye nei egeesee takaso, “Sibe.” Esemee Pita howomoo meledoboloso howo ma dokodooga Yesu mapoo diso.

<sup>30</sup> Esino yo dulone egeino, poo toowa simi oso howo ki toowa sibume, yo diya ebiaso. Egeeseelone yo howo kulomoo oumo moume to neligidi egeesee takaso, “Lodee, a pidi,” dee takaso.

<sup>31</sup> Esemee Yesuye o deeso Pita saga toloso yimapoo egeesee takaso,

“Nayo tei too ee diya pepookodoo. Bei kasalame nayo tei too goo ee ka poogoowo?” diso.

<sup>32</sup> Osoloso o bakadio du ma kulodu daboogooome, poo simi omapoo koodobiaso.

<sup>33</sup> Esemee o hamamee dili odoo oso Yesuwo homo bei mapoo gasuwoloso dobolone egeesee takaso, “No tei Godeeyo Owolodoo,” diso.

*Odoo paigiga Genesalet mi mapoo  
debeli oso Yesu mapoo simi  
(Maka 6:53-56)*

<sup>34</sup> Yesu o hamamee dili odoo sabolo abei daboogoloso Genesalet mi mapoo dia du oluguso.

<sup>35</sup> Mi omapoo debeli odoo oso Yesu hoodo ogoloso mi opusomo opusomo di mapoo Yesu olo sibago doloso to takomo diso. Esemee odoo aboso odoo paigiga susuga Yesu mapoo ido sibadeeso.

<sup>36</sup> Osoloso odoo paigiga oso Yesu mapoo howolone egeesee takaso, “Iyo wulo nee dugo su mapoo sigilei soowayo?” diso. Esemee odoo paigiga oso Yesuwo dugo su mapoo sigime, odoo egee bia wegigadooso.

## 15

*Tei Godeeye eligi sabolo osoloso  
edebeeyo eligi goo sabolo  
(Maka 7:1-13)*

<sup>1</sup> Biame hedebeso Pelisi odoo abo sabolo osoloso tei eligili odoo abo oso Yelusalem maga sibilesi Yesuye badebei mapoo mooloogoodoloso yimapoo egeesee takaso,

<sup>2</sup> “Bei kasalame nee hamamee dili odoo oso ibada adaga dia goo ee dedelega poogoloso dia dee hapelega nei ka nasomo?” dee takaso.

<sup>3</sup> Esemee Yesuye nei dimapoo egeesee takaso, “Bei kasalame niyo tei Godeeye eligi goo ee poogoloso see nibada adaga dia goo ee ka dodomo silosomo?”

<sup>4</sup> Bei, Godeeye egeesee takaso, “Namamo to mapoo osoloso nooweeyo to mapoo mesiloso ka silesibe. Esino edebeeyo ama mapoo osoloso

14:23: Luka 6:12; 9:28

14:26: Luka 24:37

14:31: Mat 8:26; Maka 4:39

14:36: Mat 9:20-21

15:4: Exo 20:12; 21:17; Deut 5:16

owee mapoo to tokenee takooga, yo wooloome,' diso.

<sup>5</sup> Esino niyo egeesee eligiliso, odoo heeso ama dio owee dio biso pidilame tei magoo ee dadalai gowooga, yayo wulo takolone bi egee Godee mapoo tenelame olo to magoloso ka moloso, dee takalai tekepo deliso.

<sup>6</sup> Goo egeesi maga edebeeyo ama dio owee dio pidilame niyo hamaga takeliso. Niyo goo egeesi moodoolone, Godeeye tei magoo goo ee dedelega see nibada adaga dia goo ee dodolone ka doso.

<sup>7</sup> Niba goo bakadio gweli odoo. Godee maga to toloso kokodo takomo sili odoo Aisayaye nibada goo maga tei goo takaso. Bei, yayo goo Godeeye taka egeesee hoguguso,

<sup>8</sup> 'Odoo hagee bia oso dia magaso wulo gamenee amapoo goomoga poudiliso.

Esino dibada sooloo ma kulodu tei amapoo mesili goo ee mauwe.

<sup>9</sup> Esiga diayo amapoo goomogolone mo hu dokodoo poudili goo eyo bei mauwe.

Bei, diayo tei edebeeyo eligi goo ee ayo eligi masi see diayo odoo mapoo eligimo silesibiliso.'"

*Ogoo gooso odoo tokenee ka peliyo?*

*(Maka 7:14-23)*

<sup>10</sup> Yesuye odoo susuga gili-madoloso dimapoo egeesee takaso, "Odoo susuga niba mo to hagee dulosoo medee gooleede.

<sup>11</sup> Esiga edebeeyo nei ne oso Godeeyo howo woola yo tokenee koo peli. Esino edebeeyo o sooloo ma kuloduga goolee to tokenee ee takooga oso Godeeyo howo woola yo tokenee peliso," dee takaso.

<sup>12</sup> Osoloso o hamamee dili odoo oso yimapoo sibilesi egeesee takaso, "Pelisi odooso nayo taka goo mapoo egee kamanaga no ogoloso gooleedo-somo?" diso.

<sup>13</sup> Esemee Yesuye nei dimapoo egeesee takaso, "Nei howo mo Ma Kei mi ma dokodoo badeli yayo segele susuga ee o too sabolo tigadoloso togobileiso.

<sup>14</sup> Esiga Pelisi odoo ee nei howo segei egeesi masi moloso. Niyo diba haga na goolee. Diba odoo howo neliga masi doso. Esiga odoo howo neliga heeso odoo howo neliga hee ido duga, o bakadio ou mapoo tigidibileiso."

<sup>15</sup> Esemee Pitaye egeesee takaso, "Nayo wudu taka goo eyo bei imapoo medee kibiya eligi," diso.

<sup>16</sup> Esemee Yesuye nei egeesee takaso, "Niba to hageeyo bei gooleedelega osee dosomo?"

<sup>17</sup> Esiga nei niyo toloso nali oso nibada sooloo ma kulodu tokenee koo peli. Bei, nei egee nayo nalo soolooloso see nee gemedei maga peegoo gadiliso.

<sup>18</sup> Esino odoo o magaso to tokenee takeli goo susuga oso o sooloo ma kuloduga woola takooga goo oso yo Godeeyo howo woola tokenee peliso.

<sup>19</sup> Bei, o sooloo ma kuloduga goo tokenee susuga hagoso woola peledebeliso: tokenee gweli goo, osoloso odoo hee wooloomali goo, osoloso adaba kooka sobo sabolo kooka giso sabolo goo heli teli goo, osoloso sobo obuo sabolo giso kadiga sabolo goo heli teli goo, osoloso adaba bi heli teli goo, osoloso emegei dimaga gamenee takeli goo, osoloso emegei dia goo maga to tokenee takeli goo.

<sup>20</sup> Esiga goo tokenee susuga hagoso Godeeyo howo woola odoo tokenee peliso. Esino dee hapelega nei nali oso yo tokenee palaime."

*Yu sobonee oso tei too*  
*(Maka 7:24-30)*

<sup>21</sup> Yesu o hamamee dili odoo sabolo mi egee poogoloso see Taya mi toowa sabolo osoloso Saidon mi toowa koola mapoo mi pepuso mapoo diyadeeso.

<sup>22</sup> Diba omapoo dilesu peledo-boome, sobo heeso Yesuye badebei mapoo simiso. Sobo egee Keinen sobo. Esiga yayo Yesu ogoloso to neligidi egeese takaso, “Lodee, Deibidiyo amawe, nayo a sooloo dele. Bei, mo sobo holo yima kulodu bo holo peleso badolone yimapoo dala toowa tenee domoloso,” diso.

<sup>23</sup> Esino Yesuye to hagee duloso to nei takele. Esem o hamamee dili odoosoo Yesu mapoo sibiles o egeese takaso, “Sobo hagoso iba deede silone to neligidi takomo silo. Esiga nayo yo diye dee takee,” diso.

<sup>24</sup> Esem Yesuye nei dimapoo egeese takaso, “Godeeye a hedebe Isalael odoosoo sipi be hu masi osugobuloso egee do mapoo diye diso,” dee takaso.

<sup>25</sup> Esem sobo hagoso see sibiles o Yesu o homo bei mapoo gasuwoloso badolone egeese takaso, “Lodee, a pidi,” diso.

<sup>26</sup> Esem Yesuye nei sobo yimapoo wudu takolone egeese takaso, “Holaiso dia nei tolosoo see so mapoo tenelai tekeponee,” diso.

<sup>27</sup> Esino sobo hagoso Yesu mapoo egeese takaso, “O. Lodee nayo tei takoo. Esino so ee amaye nei nolone kokou miyomoo mou ee nalagamo silesibiliso,” diso.

<sup>28</sup> Esem Yesuye nei yimapoo egeese takaso, “Sobo, nayo tei too diya toowadoo. Esiga nayo goomoga goo taka ee ayo moodolaiso,” diso. Esem biame omapoo sobo egeeyo owolo sobo holo olo tekepo paso.

*Yesuye odoosoo paigiga susuga tekepo pa*

<sup>29</sup> Yesu mi egee poogoloso see Gelili abei palaga dimeleeso. Yo see abaga peleso mubi dokodoo biaso.

<sup>30</sup> Osoloso odoosoo mooloogoodoo oso odoosoo paigiga gilimado sibiles o Yesuwo homo beiyopoo ibedigaso. Odoosoo abo bagi daga poogoo, osoloso odoosoo howo neliga, osoloso odoosoo su kakawa poogoo, osoloso odoosoo to koo

keli, osoloso odoosoo paigiga opusomo opusomo di abo sabolo Yesu mapoo gilimado sibadeeso. Esem Yesuye odoosoo paigiga susuga egee bia tekepo paso.

<sup>31</sup> Esem odoosoo susuga oso goo hagee ogoloso diya howoogadolone Isalael odoosoo dia Godee mapoo goomoga toowa poudoosoo. Bei, to koo keli odoosoo see to keiso, osoloso odoosoo su kakawa poogoo see toboloso silesibiliso, osoloso bagi daga poogoo odoosoo see tekepo poloso silesibiliso, osoloso odoosoo howo neliga see egeiso.

*Yesuye odoosoo 4,000 mapoo nei pi (Maka 8:1-10)*

<sup>32</sup> Osoloso Yesuye o hamamee dili odoosoo gilimadoloso egeese takaso, “Odoosoo mooloogoodoo hagee bia biame bakadio hedebe di ee ma kulodu abolo hodobo debeiso. Esino see diayo nei mauwe debei ogoloso diba diya sooloo dalaso. Ayo diba nei tenelega diye daga, diba eli domopoo dumologa houdulone diya wosalai malaiso,” dee takaso.

<sup>33</sup> Esem o hamamee dili odoosoo yimapoo egeese takaso, “Nei mauwe mi hamapoo iyo nei kapoo tolosoo odoosoo mooloogoodoo mapoo teiba ka tenelaiyo?” diso.

<sup>34</sup> Esem Yesuye nei egeese takaso, “Nimapoo wo si kasolo molosomo?” dee takaso.

Esem diayo nei egeese takaso, “Imapoo wo si 7 sabolo osoloso di pepooko abo moloso,” diso.

<sup>35-36</sup> Esem Yesuye odoosoo susuga mi mapoo bulume dee takoloso wo si 7 sabolo osoloso di pepooko abo tolosoo Godee mapoo goomoga to takaso. Osoloso wo si popei, di hwei agisaloso o hamamee dili odoosoo mapoo teneme, see diayo odoosoo mooloogoodoo mapoo piso.

<sup>37</sup> Odoosoo susuga nei ne oso diya edigaso. Esem nei naloso abo poogoo ee o hamamee dili odoosoo oso misigaloso bou tegei ma kulodu soo bou 7 egeesi metamagisaso.



<sup>38</sup> Osoloso giso sabolo sobo sabolo osoloso holaiso sabolo oso nei hagee neso. Esino hedebe gisowe hesiga ee 4,000.

<sup>39</sup> Yesuye odoosusuga diye deetokoloso o hamamee dili odoosabolo meilesodu ma kulodu tebisaloso, Magadan mi koola mapoo dalosoowaso.

## 16

*Edebeeyo goo toowa opusomo di moodoo ee agalame goomoga*

*(Maka 8:11-13; Luka 12:54-56)*

<sup>1</sup> Osoloso Pelisi odoosabolo osoloso Sedisi odoososo Yesu mapoo sibilesoyimapoo kukulo agalame egeesee takaso, “Nayo kitulugu too egee tei Godee maga simidoo dolosogooleedalaiya, nayo goo toowa opusomo di hee moodee,” deetakaso.

<sup>2-3</sup> Esino Yesuye dimapoo egeesee takaso, “Habe osoko tekepo mouga ogoloso niyo egeesee takeliso, ‘Godigi osoko tekepo polodoo,’ deetakeliso. Osoloso gesikolo mi hemiye ogoloso, ‘Epei howo sibulodoo,’ deliso. Esiga goo egeesi oso peledabalai niba olo gooleedooso. Esino goo susuga ayo epedee hagee eligi sabolo osoloso goo susuga ayo epedee hagee moodoomolo eyobei, niba gooleedele.

<sup>4</sup> Odoosusuga ayo epedee hamapoo egeedo niba diya tokenee. Osoloso niyo amapoo tei talai goweliso. Osoloso niyo wulo goo toowa opusomo di moodoo ee agalame amapoo takeliso. Esino ayo nimapoo goo toowa opusomo di hee eligilei mauwe. Esino hedebe Godee maga to tolosokokodo takomo sili odoosono Yona eyogoo ono nimapoo eligileiso.” Yesuye goo hagee takemelee koodobuloso diba poogoo diso.

*Pelisi odoosabolo osoloso Sedisi odoososo eligi goo ee na deede*

*(Maka 8:14-21)*

<sup>5</sup> Osoloso Yesu o hamamee dili odoosabolo abei dalo soowaso. Diba omapoo dilesodobolone egeino o hamamee dili odoososo wo telega boobada neme goo diya koudiaso.

<sup>6</sup> Diba goo koudulone doboome Yesuye dimapoo egeesee takaso, “Obeeyamo! Pelisi odoosabolo osoloso Sedisi odoodia wo ee habiaga, niba medee koolone ka debee.”

<sup>7</sup> Esino Yesu o hamamee dili odoososo goo hagee duloso, diesono to moulone egeesee takaso, “Iyo wo telega boobada poogoo simiga Yesuye iba ogoloso egeesee ka takoo,” diso.

<sup>8</sup> Esemediayo goo koudulone debei ee Yesuye ogoloso dimapoo egeesee takaso, “Bei kasi maga niyo wo telega boobada poogoo simi maga goo diya koudulone ka dabala? Niyo tei too goo ee diya pepookodoo.

<sup>9</sup> Esiga niba ayo kitulugu goo ee gooleedelega osee doso. Esiga niba ayo odoosusuga ayo mapoo wo si deetiadoo populoso pi goo ee boobado buguloso ka doso. Osoloso diayo wo naloso abo poogoo, niyo misigaloso bou ma kulodu soo bou bei metamagisa goo sabolo boobado buguso.

<sup>10</sup> Esiga niba ayo odoosusuga ayo mapoo wo si 7 populoso pi goo ee boobado buguloso doso. Osoloso diayo wo naloso abo poogoo, niyo misigaloso bou ma kulodu soo bou bei metamagisa goo sabolo olo boobado buguso.

<sup>11</sup> Esiga ayo nimapoo wodee eyogoo maga takele. Esino bei kasi maga niyo goo hagee gooleedelega ka dosomo? Esiga ayo taka goo ee niyo Pelisi odoosabolo osoloso Sedisi odoososo eligi goo mapoo hamamee dedeyaga niso nediliyo medee balame to hagee nimapoo ka taka.”

<sup>12</sup> Esemediayo Yesuye wodee eyogoo maga takelega, wulo Pelisi odoosabolo osoloso Sedisi odoososo eligi goo\* maga ka takeme, Yesu

**16:1:** Mat 12:38; Luka 11:16    **16:4:** Mat 12:39; Luka 11:29    **16:6:** Luka 12:1    **16:9:** Mat 14:17-21

**16:10:** Mat 15:34-38    \* **16:12:** Pelisi odoosabolo osoloso Sedisi odoodiayo eligi goo ee wo habia masi moloso. Bei, wo giedege sabolo wo habia sabolo hamaga, wo giedege tekepo ee tokenee palaiso.

o hamamee dili odoo oso omapoo ogoloso olo gooleedooso.

*Pitaye Yesuwo goo yilige bugu  
(Maka 8:27-30; Luka 9:18-21)*

<sup>13</sup> Yesu dilesa Kasaliya-Pilipai mi mapoo silone o hamamee dili odoo mapoo egeesee takaso, “Edebeeyo Odoo Holo a odoo ogu deliyo?” diso.

<sup>14</sup> Esemе diayo yimapoo egeesee takaso, “Odoo aboso no Yonee odoo howo oluguli odoo osodoo, dee take-liso. Osoloso odoo aboso no Ilaya, dee takeliso. Osoloso odoo aboso no Yelemaya deliso. Osoloso odoo aboso no Godee maga to tolosa kokodo takomo sili odoo hee daga badebei oso molodoo, dee takeliso.”

<sup>15</sup> Esemе Yesuye nei dimapoo egeesee takaso, “Esino hee niyo a odoo ogu deliyo?” diso.

<sup>16</sup> Esemе Saimon-Pitaye nei egeesee takaso, “No Keliso, Godeeye hudi magoo, kookaiyo badoboso gie badeli Godeeyo owolo osodoo,” dee takaso.

<sup>17</sup> Esemе Yesuye nei yimapoo egeesee takaso, “Saimon-Pita, Yon-ayo owolo, no goomege. Bei, odoo heeso goo hagee namapoo ka eligile. Esino mo Ma Kei mi ma dokodoo egee bado oso namapoo ka eligi.

<sup>18</sup> Esiga Pita, ayo namapoo taka, no yo masi badoso. Esiga ayo yo hagee ma dokodooga mo sosee\* bei mooloogoolaiso. Egeesi ma kulodu teliso kitulugu oso sosee hagee da-gadileime.

<sup>19</sup> Osoloso ayo Godeeye wiligi doloso badeli osulu ee gibadalame kitulugu namapoo tenelaiso. Esiga nayo takolone, edebeeyo mipoo hamapoo goo moodolai ee tei daga, goo egee Kei mi mapoo olo tei doloso moloso. Osoloso nayo takolone, edebeeyo mipoo hamapoo goo moodolai ee tei me daga, goo egee Kei mi mapoo olo tei me moloso.”

<sup>20</sup> Osoloso yayo tobudulone to kitulugu sabolo o hamamee dili odoo mapoo egeesee takaso, “Niyo odoo abo mapoo takolone a Kelisoso, dee na takee,” diso.

*Yesu eyo talai goo ee taka  
(Maka 8:31-33; Luka 9:22)*

<sup>21</sup> Osoloso biame domo omaga Yesuye o hamamee dili odoo mapoo eyo talai eyo goo ee takomo silame bei mooloogooso. Egeeseelone yayo dimapoo egeesee takaso, “A Yelusalem mapoo pologa, Yu odoowo wiligi odoo sabolo, osoloso tei moso eyo wiligi odoo sabolo, osoloso tei eligili odoo oso amapoo dala tenelaiso. Osoloso edebeeyo a wooloomaloso, bi mapoo ta moloso biame bakadio hedebe di mapoo see bi maga hogadileiso,” dee takaso.

<sup>22</sup> Esemе Pitaye Yesu peegoo ido dilesa tobudulone yimapoo diya kitulugu sabolo takolone egeesee takaso, “Haye Lodee, goo hagoso namapoo peledbeyaga, Godeeye no gooleegeeye dee,” dee takaso.

<sup>23</sup> Esino Yesuye Pita mapoo bidi toboloso tobudulone egeesee takaso, “Saiten, no amaga peegoo di. To nayo egee takoo oso ayo Godeeye goomoga goo talai ee eli poo. Bei, nayo to egee takoo Godeeye taka ee koo takoo. Esino edebeeyo taka goo ee takoo,” diso.

*Yesu goolone badalai  
(Maka 8:34-38; Luka 9:23-26)*

<sup>24</sup> Yesuye o hamamee dili odoo mapoo see tobu egeesee takaso, “Edebeeyo ayo di hamamee sibilei goomogoga, yo daga eyo goomoga goo tomo sili ee poogoloso, eyo talai sabolo dala toowa talai goo sabolo medee mopoodoo doloso ama hamamee ka sibe.

<sup>25</sup> Esiga edebeeyo o gie badeli eyo goodogoga, o gie badeli ee osug-obalaiso. Esino edebeeyo mo goo

**16:14:** Mat 14:1-2; Maka 6:14-15; Luka 9:7-8    **16:16:** Yon 6:69    **16:17:** Gal 1:15-16    **16:18:** Yon 1:42; Epe 2:20    \* **16:18:** *sosee* hu eyo bei ee tei telaga odoo susuga mipoo hamapoo egee do ee takooso.    **16:19:** Mat 18:18; Yon 20:23    **16:24:** Mat 10:38; Luka 14:27    **16:25:** Mat 10:39; Luka 17:33; Yon 12:25

maga o gie badeli eyo goodegelega poogooga, yo badoboso kookaiyo gie badeli talaiso.

<sup>26</sup> Esino edebeeyo mipoo hamapoo badolone, eyo goomoga goo susuga ee tomo siloso, hedebe gie badeli goo ee telega dagaduga, yo see ogoogo talaisomo? Mauwe. Bei, yayo gie badeli eyo nei talai mipoo hamapoo bi hee mauwe.

<sup>27</sup> Esiga Odoo Holo ayo mo Maye toowa doloso badeli goo omaga o gadeebugu sabolo, osoloso o momaiye sabolo sibilesos, odoo susuga oso goo tomo silee eyo nei ayo dimapoo teiba tenelaiso.

<sup>28</sup> Egeesi ma kulodu ayo nimapoo taka. Nima kulodu odoo abo wedilega egee do ee osee dogo, Odoo Holo ayo wiligi doloso badalame sibileiso.”

## 17

*Yesuye Moses dio osoloso Ilaya dio to kei*

*(Maka 9:2-10; Luka 9:28-36)*

<sup>1</sup> Osoloso biame 6 poogoloso Yesuye Pita, Yemes, osoloso Yeme-seeyo omolo Yonee esee gilimadoloso mubi hoodee mapoo dabalame paladeeso.

<sup>2</sup> Diba omapoo peleso dobolone egeino, Yesu o su opusomo doloso osokoso poni masi o mudu maga poni molome egeiso. Osoloso o dugo oso heliye diya gadeebugu masi molome egeiso.

<sup>3</sup> Diba omapoo dobolone egeino, Moses dio Ilaya dio peledoboloso Yesubolo to kesamolome egeiso.

<sup>4</sup> Esem Pitaye Yesu mapoo egeese takaso, “Lodee, iba hamapoo dabalai tekepo. Esiga nayo goomogoga, iyo waseme bakadio hedebe di tegelaiso. Hee nee, osoloso hee Moseseeyo, osoloso hee Ilayayo dalaiso,” dee takaso.

<sup>5</sup> Pita yo to osee komolome, kolobo diya heliye oso sibilesos diba gidis-ooos. Esem kolobo ma kuloduga toso egeese takaso, “Hagee ayo gooma mo holo oso. A namapoo diya goomogo. Esiga o to mapoo medee dui,” diso.

<sup>6</sup> Esem Pita diayo goo hagee dulosos diya obulone miyomoo balaboo tiesaso.

<sup>7</sup> Esino Yesuye sibilesos dimapoo sigolone egeese takaso, “Niba tebise. Haga na ebi,” diso.

<sup>8</sup> Esem diba tebisaloso egeino Yesu obusomo tobudume egeiso.

*Yesu o hamamee dili odoo oso Ilayayo goo maga woosa*

*(Maka 9:11-13)*

<sup>9</sup> Osoloso diba mubi dokodooga see kumoo moulone, Yesuye dimapoo egeese takaso, “Goo niyo egei ee odoo abo mapoo na takee. Esino Odoo Holo a ta maga see hogado pala ogoloso, niyo hamamee ka takomo silesibe,” dee takaso.

<sup>10</sup> Esem Pita diayo Yesu mapoo egeese woosaso, “Bei kasalame tei eligili odoo oso eligilone ‘Daga malalo Ilayaye sibilesos Keliso hamamee sibileigo’ dee ka takeliyo?” diso.

<sup>11</sup> Esem Yesuye dimapoo egeese takaso, “Ilaya tei sibilesos goo susuga see medee mopoodoo dalaiso.

<sup>12</sup> Esino ayo nimapoo taka, Ilaya yo olo simiso. Esino edebeeyo yo medee kibiya hoodo egelega yimapoo dala tenemeleeso. Egeeseelone diayo Odoo Holo amapoo dala egeesi masi tenemalaiso.”

<sup>13</sup> Osoloso diayo Yesuye egeese taka dulosos nei diayo goolee, Yonee odoo howo oluguli eyo goo ee takoo doloso olo gooleedoos.

*Yesuye holope bo holo pala ee tekepo pa*

*(Maka 9:14-29; Luka 9:37-43)*

<sup>14</sup> Yesu o hamamee dili odoo bakadio hedebe di sabolo mubi

dokodooga meilesa, odoo susuga diba balagamelee omapoo peledoboome, odoo heeso sibilesa Yesuwo homo beiyopoo gasuwoloso badolone egeesee takaso,

<sup>15</sup> “Lodee, nayo mo giso holo sooloo dologa yo pidi. Bei, yo todo dolone halaboomo silone, eyo nediliyo howomoo homodobuo osoloso dou mapoo homodobuo dolone dala toowa teliso.

<sup>16</sup> Esemee ayo holope egee nee hamamee dili odoo mapoo ido simino, diayo yo tekepo moodoolai tebilena,” diso.

<sup>17</sup> Esemee Yesuye nei egeesee takaso, “Niba tokenee odoo, tei too mauwe. Niyo amapoo tei talame a biame kasolo nibolo hodobo ka badalaiyo? Ayo biame sage nibolo hodobo badebeino, niyo amapoo tei telega osee dogo, a nimapoo diya gowooso. Esino holope egee amapoo ido sibe,” diso.

<sup>18</sup> Esemee bo holo holopeyo kulodu pala mapoo Yesuye to kitulugu sabolo takeme peegoo diso. Esemee epedee omapoo holope egee see tekepo paso.

<sup>19</sup> Goo hagoso dilesa koodobume, Yesu o hamamee dili odoo oso dibusomo dobolone Yesu mapoo egeesee takaso, “Iyo kaseme bo holo holopeyo kulodu pala ee peegoo habigilei kitulugu mauwe ka poogoowo?” diso.

<sup>20</sup> Esemee Yesuye nei dimapoo egeesee takaso, “Niyo tei too ee diya pepooko. Goo egeesi maga niyo bo holo peegoo habigilei kitulugu mauwe ka poogoo. Esiga ayo nimapoo taka. Niyo tei too goo ee homokoko pepooko masi mologa, niyo mubi mapoo takolone ‘no see koo dilesa mele’ dee takooga, tei egeesee selaiso. Esiga egeesi ma

kulodu goo susuga niyo moodoolai tebileiso. [

<sup>21</sup> Esino bo holo hageesi masi peegoo habigili ee hedebe nei tei doloso dobolone Godee mapoo taka maga bo holo peegoo ka habigiya.”]

*Yesu eyo talai goo ee see tobu taka (Maka 9:30-32; Luka 9:43-45)*

<sup>22</sup> Yesu o hamamee dili odoo oso sibilesa Gelili mi mapoo mooloogoodoloso doboome, Yesuye dimapoo egeesee takaso, “Odo Holo a odoo mapoo tiasalaiso.

<sup>23</sup> Osoloso diayo a wooloomalaiso. Esino a bi mapoo ta moloso biame bakadio hedebe di mapoo gie badeli tolosa hogadileiso.” Esemee Yesu o hamamee dili odoo oso to hagee dulosu diya gooheselo.

*Tei moso ee pidilame tekisi molee teneli*

<sup>24</sup> Osoloso see tobu Yesu o hamamee dili odoo sabolo dilesa Kapeniyum mi mapoo peledoboome, tei moso ee pidilame tekisi molee teli odoo aboso sibilesa Pita mapoo egeesee takaso, “Nibada eligili odoo yo tei moso ee pidilame tekisi molee tenelisomo?” diso.

<sup>25</sup> Esemee Pitaye nei egeesee takaso, “O. Teneliso,” diso. Esino Pita epedee omapoo moso kulodu Yesuye badebei mapoo gasibume, Yesuye Pita mapoo egeesee takaso, “Saimon, nayo goo hagee amapoo takee. Mipoo hageeyo wiligi odoo tebisa oso odoo ugu bia dimaga tekisi molee ka teliyo? Odo diayo bali maga teliyo o, odoo abo maga ka teliyo?” dee takaso.

<sup>26</sup> Esemee Pitaye nei egeesee takaso, “Odo abo maga ka teli,” diso.\*

Esemee Yesuye nei egeesee takaso, “Esiga wiligi odoo diayo bali odoo diba tekisi molee dia wiligi odoo mapoo koo teneli.\*

<sup>17:19:</sup> Mat 10:1 <sup>17:20:</sup> Mat 21:21; Maka 11:23; Luka 17:6; 1Kol 13:2 <sup>17:22:</sup> Mat 16:21 <sup>17:24:</sup> Exo 30:13; 38:26 \* <sup>17:26:</sup> Yesuye badebei biame omapoo, wiligi odoo toowa taba oso o ha teli odoo sabolo ha temeleso, odoo diayo dagadi egee bia dimaga yayo tekisi molee teliso. Esino o mosobia maga koo teli.

\* <sup>17:26:</sup> Yesuye to hageesee taka goo eyo bei ee, Godeeyo owolo dio oso tei moso ee pidilame tekisi molee tenelega pagalai ee tei mauwe doloso ka taka.



<sup>27</sup> Esino tei moso ee pidilame tekisi molee teli odoos hagee bia ee kemeneyaga, iyo tekisi molee tenelega pagalai tekeponee. Esiga no dileso abei mapoo kimaso di gi. Osoloso di malalo gi eyo maga gwaloso ogoga molee ko molo agalaiso. Eseega nayo molee egee toloso dimapoo ibada tekisi molee magee,” dee takaso.

## 18

*Godeeye wiligi doloso badeli goo mapoo odoos agayo toowa doloso ka badosomo?*

*(Maka 9:33-37; Luka 9:46-48)*

<sup>1</sup> Biame domo omapoo Yesu o hamamee dili odoos oso sibilesos Yesu mapoo egeesee takaso, “Godeeye wiligi doloso badeli goo mapoo odoos agayo toowa doloso ka badosomo?” diso.

<sup>2</sup> Esemes Yesuyes holopes hee idolosos dima domo tobudumes, o hamamee dili odoos mapoo egeesee takaso,

<sup>3</sup> “Ayo nimapoo taka. Nibada goo goolee su wudolosos holopes hageesesi masi badelegas poogooga, niba Godeeye wiligi doloso badeli goo mapoo gadileimes.

<sup>4</sup> Esiga odoos agayos holopes pepooko hageesesi masi o su eyo nediliyos pepooko daga, yo Godeeye wiligi doloso badeli goo mapoo toowa dolosos ka badosos.

<sup>5</sup> Osolosos odoos agayos holopes hageesesi masi mo hu magas o mosopoo idos pologas, yo a idos pala masi idos polosos.

<sup>6</sup> Esino odoos heesos tei toos odoos hee goo tokenees mapoo gidos duga, nei odoos heesos o mu mapoo yo toowa bagagolosos howo bou mapoo toosoolai ees dala hagas toowanees. Bei, hamamees Godeeyes odoos goo egeesesi moodelis mapoo dalas toowas tenelaisos.

<sup>7</sup> Ye-ee, mipoo hamapoo debelis odoos, niba emegei! Bei, mipoo hamapoo niba goo tokenees mapoo

gidos dili goos diyas bei molosos. Esigas goos egeeseesos sibilesos. Esino goo tokenees mapoo gidos dili odoos, niba obeeyamos! Godeeyes odoos egeesee seli mapoo dalas diyas toowas tenelaisos.

<sup>8</sup> Osolosos nee dees hodios oso no goo tokenees talames gidos duga, dees hodios egee kobigis, dees hediliwes badobosos kookaiyos gies badelis talais tekepos. Esino nee dees bakadios dou koo semilis mapoo dileis tekeponees. Osolosos nee homos hodios oso no goo tokenees talames gidos duga, homos hodios egee kobigis, homos hediliwes badobosos kookaiyos gies badelis talais tekepos. Esino nee homos bakadios dou koo semilis mapoo dileis tekeponees.

<sup>9</sup> Osolosos nee howo hodios oso no goo tokenees talames gidos duga, nee howo hodios egee tabigis, howo hediliwes badobosos kookaiyos gies badelis talais tekepos. Esino nee howo bakadios dou koo semilis mapoo dileis tekeponees.

<sup>10</sup> Esiga niba obeeyamos. Holaisos hagee bias goos mauwes dees nas goolees. Bei, Godeeyos momaiyes oso Kei mi mas dokodoogas Mas Godeeyos howo woolas dimapoo kas bamolosos. [

<sup>11</sup> Bei, Odoos Holo ayo simis hagees odoos Godees magas peegoo osugobas dimapoo gies badelis tenelames kas simis.”]

*Sipi be hu osugoba*

*(Luka 15:3-7)*

<sup>12</sup> “Odoos heesos sipi be hu 100 gibadalaisos. Egeesesi mas kulodus sipi be hedebe osugoboodogas, yayos sees ogoo goo moodoolaisomos? Sipi be hu abos 99 ees omapoo dogas, yo sees hedebe osugobas ees esiamos dileisos.

<sup>13</sup> Esiga ayo nimapoo taka. Sipi be hu 99 osugobelis mapoo yo goomogas molosos. Esino sipi be hedebe osugobas ees esiamelesos ogogas, yo diyas goomogalaisos.

<sup>14</sup> Esiga holaisos hageesee heesos yimagas peegoo osugobalais nibada



Ama Kei mi ma dokodoo egee bado yo koo goomogoso.”

*Tei too odoosoo oso tokenee toga, yo pidi*

<sup>15</sup> “Esiga tei too odoosoo oso namapoo goo tokenee moodooga, nayo mada dileso yimapoo o goo tokenee ee takalai tekepo. Egeesi ma kulodu yayo nee to duloso mesioga, yo see goo tekepo mapoo ido siboso.

<sup>16</sup> Esino yayo nee to duloso mesile poogooga, nayo see tei telaga odoosoo hedebe, o, bakadio egeesi gilimadoloso yo agalame di, diayo to nayo taka ee tei takadoo dalame.

<sup>17</sup> Egeesi ma kulodu yayo dibada to duloso mesile poogooga, goo hagee tei telaga odoosoo susuga sosee ma kulodu egee do mapoo takee. Esino yayo see dibada to duloso mesile poogooga, yo see peegoo badeli odoosoo o, goo tokenee teli odoosoo dalai tekepo.

<sup>18</sup> Esiga ayo nimapoo taka. Osoloso niyo ogoosoo goo ee mi hamapoo tiadoo mologa, Kei mi ma dokodoo osee tiadoo molo agalaiso. Osoloso niyo mi hamapoo ogoosoo goo ee puobuguga, Kei mi ma dokodoo puobugu molo agalaiso.

<sup>19</sup> Esiga ayo see nimapoo taka. Mipoo hamapoo odoosoo bakadio oso goo goolee hedebe doloso ogoosoo goo talame Godee mapoo takooga, mo Ma Kei mi ma dokodoo egee bado oso diayo goomoga goo ee tei moodoolaiso.

<sup>20</sup> Esiga odoosoo bakadio egeesi o, bakadio hedebe di egeesi oso sibilesosoo mo hu maga mooloogoodolosoo dogaa, a dibolo hodobo badosoo.”

*Odoosoo koo sooloo deli odoosoo*

<sup>21</sup> Osoloso domo omapoo Pitaye sibilesosoo Yesu mapoo egeesee woosaso, “Lodee, mo tei too odoosoo oso amapoo goo tokenee toga, ayo nei o goo tokenee ee kasolo boobado

bigileiyo? 7 mapoo toobooga ka koodobileiyo?” dee takaso.

<sup>22</sup> Esemee Yesuye nei egeesee takaso, “Haye, hedebe 7 mapoo toobooga o goo tokenee na boobado bigi. Esino o goo tokenee hapolosoo boobado bigili ee na koodobie.

<sup>23</sup> Osoloso Godeeye wiligi dolosoo badeli goo ee egeesee molosoo. Wiligi odoosoo o tou teli odoosoo oso molee howadoosoo, see hamamee teiba hedebe egeesi yimapoo ka tenelame. Esemee hamamee wiligi odoosoo oso molee egee see talai goomogolone, o odoosoo mapoo takolone, odoosoo molee howadoo egee bia yimapoo gilimado sibeye diso.

<sup>24</sup> Esemee o tou teli odoosoo hee daga molee toowa 10,000 talent\* deli ee howadoo ee yimapoo ido simiso.

<sup>25</sup> Esemee odoosoo ogoosoo molee teiba egeesi nei tenelai tebile. Esemee wiligi odoosoo oso o odoosoo mapoo egeesee takaso, ‘Odoosoo hagee sabolo, osoloso osobo, osoloso owolo dio, osoloso o bi susuga tolosoo odoosoo abo mapoo tenee, nei molee talame. Osoloso see molee egee amapoo tosibe,’ dee takaso.

<sup>26</sup> Osoloso o tou teli odoosoo yayo o wiligi odoosoo homo beiyopoo gasuwolosoo ebisoo miyomoo tugusalosoo badolone howolone egeesee takaso, ‘Nayo a sooloo dologa biame deiyepo amapoo tenee. Ayo hamamee nee molee teiba hedebe egeesi namapoo tenelaisoo,’ diso.

<sup>27</sup> Esemee wiligi odoosoo oso yo diya sooloo dolone yimapoo egeesee takaso, ‘Nayo mo molee howadoo eyo nei hamamee amapoo tenelaigo, dee takemeni ee bige peegee. Bei, ayo goo egee olo boobado bugusoo. Esiga no goomoga sabolo di,’ dee takaso.

<sup>28</sup> Osoloso tou teli odoosoo ee see wedi dulone o odoosoo tugodoosoo. O odoosoo hagoso yimaga molee howadoo

**18:15:** Luka 17:3; Gal 6:1    **18:16:** Deut 19:15; Yon 8:17    **18:18:** Mat 16:19; Yon 20:23    **18:19:** Maka 11:24; Yon 15:7    **18:22:** Luka 17:4    \* **18:24:** talent goo eyo bei hagoso. Odoosoo heeso dugo 15 ma kulodu tou temelee eyo nei molee toowa talent deli hedebe teliso.    \* **18:28:** denaliyus goo eyo bei hagoso. Odoosoo heeso biame hedebe mapoo tou too eyo nei molee ko denaliyus deli hedebe teliso.

ee haga toowanee (goo egee, molee ko 100 denaliyus\* deli ee howadoo). Esino tou teli odoososo yo ogoloso o gabada mapoo tolosodebidolone egeesee takaso, 'Nayo mo molee howadoo eyonei teiba hedebe egeesi amapoo tenee,' diso.

<sup>29</sup> Esemee odoososo hagoso tou teli odoososo homo beiyopoo gasuwolosoebisomiyomoo tugusalosobadolone yimapoo howolone egeesee takaso, 'Nayo a sooloo dologa biame deiyepo amapoo tenee. Bei, ayo hamamee nee molee teiba hedebe egeesi namapoo tenelaiso,' diso.

<sup>30</sup> Esino tou teli odoososo yo o odoososo egeesee takeme gowoolone yo todilesoneeliga moso mapoo toososo, yayo nei teiba egeesi yimapoo teneega peegoo ka tamagalame.

<sup>31</sup> Esino wiligi odoososo o tou teli odoososo aboso goo hagee ogoloso diya gowoolone wiligi odoososo mapoo takalame diyadeeso.

<sup>32</sup> Esemee wiligi odoososo yo goo hagee duloso o tou teli odoososo ee idoloso yimapoo egeesee takaso, 'No tei diya tokenee odoososo. Nayo mo molee hoowadoloso see hamamee tenelai tebile neme, ayo no sooloo dolone bige peegee dee takaso.

<sup>33</sup> Goo egeesi maga, nayo mo tou teli odoososo hee sooloo dala diepi, tekepo meliyo,' diso.

<sup>34</sup> Egeesee takolosowiligi odoososo komonolone o tou teli odoososo ee neliga mosogidebeli odoososo mapoo teneeso, diayo yo neliga moso mapoo toosolosodala tenelame. Osolosoyayo nei teiba hedebe egeesi yimapoo teneega peegoo ka tamagalame."

<sup>35</sup> Yesuye to hagee taka koodobuloso see odoososo mapoo egeesee takaso, "Esiga niyo nee sooloo ma kulduga tei too odoososo eyogoo tokenee boobado bigilega poogooga, wiligi odoososo o tou teli odoososo mapoo

moodoo egeesi masinei mo Ma Kei mi ma dokodoo egee bado osonimapoo egeesee moodoolaiso."

## 19

### *Sobo huloso pegeli goo ee eligi (Maka 10:1-12)*

<sup>1</sup> Yesuye goo hagee takolosokoodobuloso Gelili mi poogoloso see Yudiya mi mapoo dulone Yoden howo daloso diso.

<sup>2</sup> Yo omapoo dime, odoososo mooloo-goodoo osoyo dodomo diso. Esemee Yesuye paiye dima kulodu melee susuga ee tekepo paso.

<sup>3</sup> Esemee biame omapoo Pelisi odoososo aboso sibilesosYesu mapoo gameneekukulo agalame yimapoo egeesee takaso, "Edebeeyosobohuloso wulogoo hee maga osobopagalai teimolosomo?" diso.

<sup>4</sup> Esemee Yesuye nei dimapoo egeesee takaso, "Niba Godeeyo to hesigeleyo? Godeeye mipoo hagee moodoo biame mapoo giso sabolo sobo sabolo moodoso.

<sup>5</sup> OsolososGodeeye egeesee takaso, 'Esiga gisoso ama dio owee dio poogoloso see osobosabolo hedebe dolosobadalaiso. Osolososobakadio su hedebe dolosodabalaiso,' dee takaso.

<sup>6</sup> Esiga diayo debei ee ma kulodudiba bakadio nee, esinodiba see olo hedebe dolosoka doso. Esiga Godeeye diba hedebe di goo ee see odoososo heeso domo na pi."

<sup>7</sup> Esino Pelisi odoososo nei Yesu mapoo egeesee takaso, "Bei kasi magamoseseeye takolone, sobopagalame gooleega, sobopegeli peipa mapoo hoguguloso soboegee pagalaisoowa, dee ka takayo?" diso.

<sup>8</sup> Esemee Yesuye nei dimapoo egeesee takaso, "Moseseeye egeino yayo eligi goo mapoo niyomesilega poogoloneme, bige, sobopagalaisoowa dee ka taka. Esino bei mooloogoo biame mapoo sobohuloso pagalagoo ee Godeeye takele.

<sup>9</sup> Esiga ayo nimapoo taka, gisoso osobo na peegee. Esino soboso giso hee sabolo olo goo heli too daga, omoye osobo egee pagalai tei mauwe. Esiga gisoso wulo goo hee maga osobo poogoloso see sobo hee huga, yo odoo heeyo osobo ee peedee huso.”

<sup>10</sup> Esemé Yesu o hamamee dili odoo oso yimapoo egeesee takaso, “Esiga gisoso wulo goo hee maga osobo pagalai ee tei daga, gisoso sobo hulei tekeponee,” diso.

<sup>11</sup> Esemé Yesuye nei dimapoo egeesee takaso, “Goo hagee odoo susuga oso dadalai tebile. Esino hedebe Godeeye kitulugu tenee odoo oso goo hagee dadalai teiba.

<sup>12</sup> Bei, odoo aboso sobo huloso holo sooloo ga magalai tebile. Bei, diba dibada oweeye ho mauwe sooma-googa. Goo egeesi maga diba sobo koo huli. Osoloso odoo abo ho tigaga diba sobo koo huli. Esino odoo aboso Godeeye wiligi doloso badeli eyo goo maga sobo koo huli. Esiga edebeeyo sobo huli eyo goo maga ayo eligi goo ee talai teiba daga, yo goo ayo eligi hagee medee dadalai tekepo.”

### *Yesuye holaiso pidi*

*(Maka 10:13-16; Luka 18:15-17)*

<sup>13</sup> Odoo aboso owolo dio Yesu mapoo iyado simiso, Yesuye o deeso diba sigolone diba Godee mapoo takalame. Esemé o hamamee dili odoo diayo goo hagee ogoloso hamaga takaso.

<sup>14</sup> Esemé Yesuye o hamamee dili odoo mapoo egeesee takaso, “Holaiso amapoo sibadee dee, diba na hamaga takee. Bei, edebeeyo holaiso hageesi masi oso Godeeye wiligi doloso badeli mapoo gadileiso,” diso.

<sup>15</sup> Osoloso yayo o deeso diba sigolone Godee mapoo takoloso see mi hee mapoo diso.

### *Bi bei odoo*

*(Maka 10:17-31; Luka 18:18-30)*

<sup>16</sup> Odoo heeso Yesu mapoo sibilesos egeesee takaso, “Eligili odoo, ayo

ogoo goo tekepo ee toga, badoboso kookaiyo gie badeli ka talaiyo?” dee takaso.

<sup>17</sup> Esemé Yesuye nei yimapoo egeesee takaso, “Bei kasalame nayo sibilesos goo tekepo talai goo maga amapoo ka woosowala? Hedebe Godeeye tekepo ka badoso. Esiga no badoboso kookaiyo gie badeli talai goomogoga, no tei magoo goo ee medee deedee.”

<sup>18</sup> Esemé odoo ogoso egeesee takaso, “Tei magoo kagee takala?” diso.

Esemé Yesuye nei yimapoo egeesee takaso, “Odoo na wooloome, osoloso adaba kooka sobo sabolo goo heli na te, osoloso adaba bi heli na te, osoloso odoo hee mapoo gamenee na gigidi,

<sup>19</sup> osoloso nama dio noowee dio oso taka to mapoo mesie, osoloso nee su no nediliyo egee sooloo dolo egeesi masi nee odoo hee nose egeesee sooloo dele.”

<sup>20</sup> Esemé odoo gie kauwa ogoso Yesu mapoo egeesee takaso, “Tei magoo goo susuga ayo tobuloso medee deedeeso. Esino ayo see ogoo goo hee ka moodoolaisomo?” dee takaso.

<sup>21</sup> Esemé Yesuye nei yimapoo egeesee takaso, “No medee teedee badalai goomogoga, nee bi susuga odoo abo mapoo teneloso nei molee tolosos odoo bi mauwe mapoo tenee. Nayo egeesee seega, Kei mi mapoo bi bei nee hu sabolo malaiso. Osoloso a dodomo sibe,” diso.

<sup>22</sup> Esemé odoo gie kauwa ogoso Yesuwo to duloso diya goohele sabolo diso. Bei, yo bi bei doloso badebeiga.

<sup>23</sup> Esemé Yesuye o hamamee dili odoo mapoo egeesee takaso, “Ayo nimapoo taka. Bi bei odoo oso Godeeye wiligi doloso badeli goo mapoo gadilei diya kalawa.

<sup>24</sup> Esiga ayo nimapoo see tobu taka, dugo duseli midole ou maga kemol be toowa oso gadilei kalawa. Esino bi bei odoo oso Godeeye wiligi doloso

badeli mapoo gasibilei diya kalawa toowa,” diso.

<sup>25</sup> Esem e hamamee dili odoosoo yayo eligi goo hagee duloso diya dio dulone egeese takaso, “Goo egee diya kalawadoo. Esiga odoosoo agayo gadileisomo?” diso.

<sup>26</sup> Esem Yesuye dimapoo bolone egeese takaso, “Edebeeyo o gie badeli eyo nediliyo pidilei tebile. Esino Godee yo teiba. Bei, goo susuga yayo moodolai haga kalawanee,” diso.

<sup>27</sup> Esem Pitaye nei Yesu mapoo egeese takaso, “Ibada bi susuga hoogoo poogoloso nayo di hamamee deede simiso. Esiga iba nei ogoosoo bi talaiyo?” diso.

<sup>28</sup> Esem Yesuye nei egeese takaso, “Ayo nimapoo taka. Godeeye goo susuga see dia moodolai biame mapoo, Odoosoo Holo ayo wiligi doloso badeli mi mapoo badalaiso. Osolosoo biame omapoo mo hamamee dili odoosoo 12 niba nose wiligi odoosoo oso bili 12 mapoo dobolone, Isalael odoosoo bala 12 ee niyo gidabalaiso.

<sup>29</sup> Osolosoo odoosoo agayo emei dio, omolo dio, omoo dio, ama dio, owee dio, owolo dio, osolosoo dia mi sabolo, dia moso poogoloso mo goo tomo siloga, diba nei toowa talaiso. Osolosoo diba kookaiyo badoboso gie badeli talaiso.

<sup>30</sup> Esiga odoosoo abo epedee hamapoo malalo hagee do ee see diba hamamee dabalaiso. Esino odoosoo abo epedee hamapoo hamamee hagee do oso see malalo dabalaiso.”

## 20

*Tou teli odoosoo eyo goo maga wudu taka*

<sup>1</sup> “Godeeye wiligi doloso badeli goo ee egeesi masi moloso. Homolee eyo amaye gesikolodee tou teli odoosoo gilimalame diso, diayo o homolee geleipi ko segei mapoo tou talame.

<sup>2</sup> Osolosoo yayo odoosoo abo ogoloso yibolo hodobo to moulosoo goomoga

magoosoo, biame hedebe mapoo diayo tou too eyo nei odoosoo hedebe hedebe dimapoo molee ko\* hedebe tenelame. Osolosoo diba tou talame diye diso.

<sup>3</sup> Osolosoo homolee eyo amaye osoko howo 9 domo mapoo yo see wedi dileso egeino, odoosoo abo tou telega wulo tebisamolome egeiso.

<sup>4</sup> Esem yayo dimapoo egeese takaso, ‘Niba see mo homolee mapoo tou talame di. Eseega ayo habe nimapoo niyo tou too eyo nei molee teiba tenelaiso,’ diso.

<sup>5</sup> Esem diba tou talame diso.

Osolosoo biame hedebe omapoo osoko oo domo tooboome, odoosoo abo gilimado dileso o homolee mapoo tou teye diso. Osolosoo biame hedebe ososee osoko howo bakadio hedebe di mapoo, yayo see tobu odoosoo abo gilimado dileso o homolee hedebe omapoo tou teye diso.

<sup>6</sup> Osolosoo biame hedebe omapoo osoko howo dee tiadoo mapoo tooboome, yo see wedi dileso egeino, odoosoo abo tou telega wulo tebisamolome egeiso. Esem yayo dimapoo egeese takaso, ‘Niba kasalame tou telega biame toowa wulo hamapoo mosoowe ka tebisamalala?’ diso.

<sup>7</sup> Esem diayo nei egeese takaso, ‘Odoosoo heeso imapoo o tou teye dee takele,’ diso. Esem yayo dimapoo egeese takaso, ‘Niba nose mo homolee mapoo tou talame sibe,’ dee takaso.

<sup>8</sup> Esem habe homolee eyo amaye o tou teli eyo wiligi odoosoo mapoo egeese takaso, ‘Homolee ma kulodu tou telagali odoosoo gilimadoloso dia tou too eyo nei molee tenee. Esiga nayo nei molee teneega, tou talame hamamee sibili odoosoo mapoo daga malalo ka tenee,’ dee takaso.

<sup>9</sup> Esem tou teli odoosoo oso dia nei talame siblesoo mooloogodoome, odoosoo tou talame hamamee sibili

**19:26:** Job 42:2    **19:28:** Mat 25:31; Luka 22:30; Yili 3:21    **19:30:** Mat 20:16; Luka 13:30    \* **20:2:** molee ko hageeyo hu ee denaliyus (Mat 18:28 mapoo ege).    **20:8:** Lev 19:13; Deut 24:15



dimapoo tou too eyo nei molee ko hedebe hedebe di teneeso.

<sup>10</sup> Osoloso gesikolodee odoo daga malalo tou talame diyadee oso goo egee ogoloso diayo goolee, diba dia tou eyo nei toowa talaiso, dee goolone debeiso. Esino diba onosee molee ko hedebe egeesi tooso.

<sup>11</sup> Diba molee egee toloso gowoolone homolee eyo ama mapoo egeesee takaso,

<sup>12</sup> ‘Iba biame toowa osoko pa mapoo tou toowa telagameleeso. Esino odoo hagee bia wulo osoko howo deiyepo mapoo tou ka too. Esino nayo kasi maga molee dimapoo tenee hedebe egeesi masi imapoo ka tonowala?’ diso.

<sup>13</sup> Esem homolee eyo amaye dima kulodu odoo hee mapoo egeesee takaso, ‘Emegei, ayo goo tokenee hee namapoo moodele. Bei, no biame hedebe mapoo tou too eyo nei molee ko hedebe egeesi masi talai doloso tou talame goomoga magooso.

<sup>14</sup> Esiga nee molee egee toloso di. Ayo molee namapoo tenee hedebe egeesi masi odoo abo mapoo tenelai a goomogo.

<sup>15</sup> Bei, mo molee oso mawo goomoga goo ee talai tekepo. Esino kasi maga goo tekepo ayo moodoo ee ogoloso, nayo amapoo ka komonowala?’ dee takaso.”

<sup>16</sup> Esem Yesuye see egeesee takaso, “Esiga odoo abo epedee hamapoo malalo hagee do ee see diba hamamee dabalaiso. Esino odoo abo epedee hamapoo hamamee hagee do oso see malalo dabalaiso.”

*Yesu eyo talai goo ee see tobu taka  
(Maka 10:32-34; Luka 18:31-34)*

<sup>17</sup> Yesu Yelusalem mapoo polone o hamamee dili odoo 12 peegoo gilimado dileso dobolone dimapoo egeesee takaso,

<sup>18</sup> “Goolee! Iba Yelusalem mapoo olo duso. Omapoo Odoo Holo a Yu odoo dia tei moso wiligi odoo tebisa

sabolo osoloso tei eligili odoo mapoo tiasalaiso. Osoloso diayo mo goo midiloso ayo talai goo ee takalaiso.

<sup>19</sup> Osoloso Yu odoonee oso a toloso manolone woolaiso. Osoloso a woomo dileso homo bulubo magoo ma dokodoo yoguso enigileiso. Esino a bi ma kulodu ta moloso biame bakadio hedebe di mapoo see gie badeli toloso hogadileiso.”

*Yemes dio Yonee dio egee bia dia  
oweeye goomoga goo ee ogo taka  
(Maka 10:35-45)*

<sup>20</sup> Osoloso Sebediyo owolo Yemes dio Yonee dio oweeye gilimadoloso Yesu mapoo simiso. Osoloso oweeye goomoga goo ee Yesu mapoo ogo takalame, o homo beiyopoo gasuwoloso badebeiso.

<sup>21</sup> Esem Yesuye yimapoo egeesee takaso, “Nayo amapoo ogo goo takalame ka simiyo?” diso. Esem yayo Yesu mapoo nei egeesee takaso, “Nayo wiligi doloso badalai mi mapoo mo holo bakadio hagee heeso nee dee deede dokolo bado, osoloso hee nee dee dobusu dokolo bado dalai tekepowo?” dee takaso.

<sup>22</sup> Esem Yesuye dimapoo egeesee takaso, “Niyo egee takoo goo ee niba koo gooleedo,” dee takaso. Osoloso yayo Yemes dio Yonee dio mapoo egeesee takaso, “Dala toowa ayo talame egee molo niba nose egeesee talai teibayo?” diso.

Esem diayo nei egeesee takaso, “O. Iba teiba,” dee takaso.

<sup>23</sup> Esem Yesuye nei dimapoo egeesee takaso, “Tei takoo, niba nose dala hageesee talaiso. Esino mo dee deede dokolo dabalai odoo sabolo, osoloso mo dee dobusu dokolo dabalai odoo hesigilei amapoo kitulugu mauwe. Esino hedebe mo Maye hesiga odoo oso mi omapoo dabalaiso.”

<sup>24</sup> Egeesi ma kulodu Yesu o hamamee dili odoo abo 10 oso to hagee dulo Yemes dio Yonee dio mapoo diya kamanaso.



<sup>25</sup> Esemé Yesúye o hamamee dili odoo susuga gilimadoloso dimapoo egeesee takaso, “Yu odoonee dia wiligi odoo oso dima hemidu debeli odoo ee kitulugu sabolo gidebeliso.

<sup>26</sup> Esino nima kulodu egeesee selai tekeponee. Esiga nima kulodu edebeeyo toowa doloso badalai goomogoga, yo tou teli odoo masi mesie sabolo odoo abo halo tou tolone ka badebee.

<sup>27</sup> Osoloso edebeeyo malalo badalai goomogoga, yo tou wulayo teli odoo masi odoo abo halo tou tolone ka badebee.

<sup>28</sup> Bei, Odoo Holo ayo mipoo hamapoo simi hagee edebeeyo a pidilame ka sibile. Esino ayo odoo pidilame ka simi. Osoloso odoo susuga Godee mapoo iyado sibilame a talame ka simi.”

*Yesúye odoo howo neliga bakadio tekepo pa*

*(Maka 10:46-52; Luka 18:35-43)*

<sup>29</sup> Yesu o hamamee dili odoo sabolo Yeliko mi poogoloso diyadaga molome, odoo mooloogoodoo toowa oso diba dodomo sibadeeso.

<sup>30</sup> Egeesee semelee domo omapoo odoo howo neliga bakadio eli pee mapoo debeiso. Diayo Yesúye simi goo ee duloso to neligidi egeesee takaso, “Lodee, Deibidiyo amawe, nayo iba sooloo dolone pidi,” dee takaso.

<sup>31</sup> Esino odoo susuga oso dimapoo diya takolone egeesee takaso, “Niba to mauwe debee,” diso. Esino odoo susuga oso dimapoo egeesee takeme, diba dia to dulega see diya neligidi egeesee takaso, “Lodee, Deibidi amawe, nayo iba sooloo dolone pidi,” dee takaso.

<sup>32</sup> Esemé Yesúye omapoo kookoodoboloso, diba iyadoloso dimapoo egeesee takaso, “Ayo nimapoo ogoo goo moodolai goomogolo?” diso.

<sup>33</sup> Esemé diayo nei yimapoo egeesee takaso, “Ibada howo tekepo moodee. Iba agalai goomogo,” dee takaso.

<sup>34</sup> Yesúye diba sooloo dolone dibada howo deeso sigeso. Esemé saga omapoo dibada howo tekepo poome, Yesúye di hamamee diso.

## 21

*Yesúye Yelusalem mi mapoo di*  
*(Maka 11:1-11; Luka 19:28-40; Yon 12:12-19)*

<sup>1</sup> Yesu o hamamee dili odoo sabolo Yelusalem mi koola mapoo dulone, Olipi mubi kumoo mi pepooko Betapage mapoo peledabaso. Diba omapoo peledoboloso dobolone, Yesúye o hamamee dili odoo bakadio malalo diye dolone egeesee takaso,

<sup>2</sup> “Niba mi hee malalo koogee mapoo di. Niba omapoo dilesosogoga, donki be o pe sabolo dia mu mapoo ebigiso bagagoloso, omou mapoo bagagoo mologa saga agalaiso. Eseega niyo ebigi pidiga poogoloso amapoo hado sibe.

<sup>3</sup> Egeesi ma kulodu odoo heeso nimapoo takooga, niyo nei yimapoo egeesee takee, ‘Lodeeye donki be bakadio egee goomogogona,’ dee takee. Egeeseega odoo ogoso saga nimapoo takolone donki be egee hado diye dalaiso,” diso.

<sup>4</sup> Esiga goo hagosos peledaba ee Godee maga to tolosokokodo takomosili odoo oso to taka sabolotebilame ka see. Bei, yayo egeesee takaso,

<sup>5</sup> “Niyo Yelusalem mapoo debeli odoo mapoo takee, ‘Ege, nibada wiligi odoo nimapoo olo sibo.

Yo mesie taba. Yo donki be pepooko mapoo buloso ka siboso.’”

<sup>6</sup> Esemé Yesu o hamamee dili odoo bakadio oso Yesúye taka goo ee tobulosomoodooso.

<sup>7</sup> Diba dilesos donki be owee sabolosoloso o pe sabolohadolimiso. Osoloso dibada kekeisudogotigadolosodonki be dia wagi madokodoo palagaloso, Yesúye omapoo pelesobiaso.

8 Esemе odoo mooloogoodoo toowa oso dia kekeisu dugo tigadoloso eli domopoo palagamo dime, odoo aboso weiyo kookooloso Yesuye sibilei eli mapoo palagamo diso.

9 Esemе Yesuye donki be ma dokodoo buloso dimolome, malalo diyadee odoo sabolo osoloso Yesu ma hamamee sibadee odoo oso to neligidi egeesee takaso,

“Iba Deibidiyo amawe mapoo goomogo.

Odoo Godeeyo hu maga kitulugu sabolo egee sibo yo Godeeye pidiye dee.

Kei mi ma doko hodoo badeli Godee mapoo goomogo,” dee takagamo diyadeeso.

10 Yesu Yelusalem mi ma kulodu gadime, odoo susuga omapoo debei oso diya dio dulone egeesee takaga meleeso, “Hagee odoo ogubele?” dee takaso.

11 Esemе odoo mooloogoodoo oso nei egeesee takaso, “Hagee Godee maga to toloso kokodo takomo sili odoo Yesu oso. Yo Gelili mi toowa ma kulodu Nasalet mi pepooko maga ka siboso,” diso.

*Yesuye Yu odoo dia tei moso ma kuloduga odoo peegoo hasiso bugu (Maka 11:15-19; Luka 19:45-48; Yon 2:13-22)*

12 Yesuye Yelusalem mapoo sibilesos tei moso mapoo peleso egeino, odoo susuga oso tei moso tegei ma kulodu gala sabolo bi abo sabolo neiso telaga molome egeiso. Yo goo egee agalai gowoolone, yayo moso ee ma kulodu melee bi eyo ama sabolo osoloso bi ee telaga odoo sabolo peegoo hasiso buguso. Osoloso molee piligeli odoo dia debi pooba sabolo bidige buguso. Osoloso molo huyado sibilesos nei moleeso teli odoo susuga oso bili pooba sabolo bidige buguso.

13 Osoloso Yesuye dimapoo egeesee takaso, “Godeeyo to booka mapoo hogugu oso egeesee takooso,

‘Mo tei moso ee edebeeyo sibilesos Godee mapoo takeli moso,’ diso.

Esino niyo Godeeyo moso hagee heli teli odoo oso mada wuli moso ka poso,” diso.

14 Egeesee semelee biame omapoo Yesu tei moso ma kulodu bado-boome, howo neliga odoo abo sabolo, osoloso odoo bagi daga poogoo yimapoo sibadeeso. Esemе yayo diba tekepo paso.

15 Esino tei moso wiligi odoo tebisa sabolo osoloso tei eligili odoo oso Yesuye goo toowa opusomo di moodoomo silee ogoloso diya kamanaso. Egeeseelone holaisoso tei moso ma kulodu dobolone toso neligidi takolone egeesee takaso, “Deibidiyo amawe Yesu mapoo goomogo,” dee takaga melee duloso diayo dimapoo diya goweso.

16 Osoloso diayo see Yesu mapoo egeesee takaso, “No holaisoso to egee takoo medee dusomo?” diso.

Esemе Yesuye nei dimapoo egeesee takaso, “O. A duso. Esino niba Godeeyo to booka mapoo hogugu ee hesigelega dosomo? Bei, Godeeyo to booka mapoo hogugu oso egeesee takooso,

‘Godeeye holaiso sabolo osoloso holope oso o hu dokodoo poudilei goo ee dimapoo olo eligiso,’ dee takaso.”

17 Osoloso Yesuye diba poogoo dilesos Yelusalem mi maga see Betani mi mapoo tilame diso.

*Pigi homosos sia*

*(Maka 11:12-14, 20-24)*

18 Gesikolo Yesu Yelusalem mapoo see wedi dulone hodiaso.

19 Esemе dulone pigi homo eli palaga mapoo dime ko pa beleso agalame diso. Esino ko pelega wulo duwe molome egeiso. Esemе Yesuye pigi homo hamapoo egeesee takaso, “No see tobu ko palaime,” diso. Esemе epedee omapoo homo saga siaso.

<sup>20</sup> Yesu o hamamee dili odoosoo hagee ogoloso dio dulone egeesee takaso, “Pigi homo hagee saga kasee siabele?” diso.

<sup>21</sup> Esemee Yesuye nei dimapoo egeesee takaso, “Ayo nimapoo taka. Niyo tei toloso dobolone goo goolee bakadio delega doga, ayo homo hamapoo moodoo goo ee niba nose egeesee moodoolai tebileiso. Osoloso goo hedebe hagonosee talai tebile. Esino niyo goo toowa abo moodoolaiso. Egeeseelone niyo mubi hamapoo takolone ‘no nediliyo tadoloso howomoo mei’ dee takooga, goo oso tei peledabalaiso.

<sup>22</sup> Esiga niyo tei tolone Godee mapoo takooga, yayo goo niyo hoowa eyo nei nimapoo tenelaiso.”

*Yesuye kitulugu maga woosa  
(Maka 11:27-33; Luka 20:1-8)*

<sup>23</sup> Yesu see Yu odoowo tei moso mapoo peleso Godeeyo to odoosoo susuga mapoo eligimolome, tei moso wiligi odoosoo tebisa sabolo osoloso Yu odoosoo dia wiligi odoosoo tebisa oso sibilesoo Yesu mapoo egeesee takaso, “No agamo kitulugu maga goo hagee ka moodoomo silala? Odoosoo agayo namapoo kitulugu hagee ka teneeyo?” diso.

<sup>24-25</sup> Esemee Yesuye nei dimapoo egeesee takaso, “Anosee woosali to hedebe nimapoo woosalaiso. Odoosoo agayo Yonee mapoo kitulugu ka teneeyo, yayo odoosoo howo olugulame? Kitulugu Godeeye teneeyo o, edebeeyo teneeyo? Esiga niyo to eyo nei amapoo takooga, anosee ayo kitulugu toloso hagee silo eyo goo ee nimapoo ka takalai,” diso.

Esemee diayo to hagee duloso dieso nediliyo to moulone egeesee takaga meleeso, “Iyo kasee takalaisomo? Iyo takolone Yoneeye kitulugu ee Godeeye teneedoo, dee takooga, see nei Yesuye imapoo egeesee takalaiso, ‘Niba bei kaseme Yoneeyo to mapoo tei telega ka poogoowo?’ dalaiso.

<sup>26</sup> Osoloso iyo takolone kitulugu odoosoo maga simigo daga, odoosoo susuga oso imapoo diya kamanalaiso. Bei, odoosoo susuga oso takolone Yonee yo Godee maga to toloso kokodo takomo sili odoosoo deliso.”

<sup>27</sup> Egeeseelone diayo nei Yesu mapoo egeesee takaso, “Yoneeye kitulugu too goo eyo bei, iba gooleedele,” dee takaso.

Esemee Yesuye nei dimapoo egeesee takaso, “Esiga ayo goo hagee moodoomo silame kitulugu too hagee nimapoo takalaime,” diso.

*Yesuye holaiso bakadio eyo goo maga wudu taka*

<sup>28</sup> “Esiga niba goo hamapoo kasee goolesomo? Odoosoo heeso o giso holo bakadio gilimadoloso debeiso. Esiga yayo daga holo mapoo egeesee takaso, ‘Mo holo, no epei geleipi ko segei homolee mapoo tou talame di,’ dee takaso.

<sup>29</sup> Esino giso holo oso nei egeesee takaso, ‘A gowoo,’ diso. Esino yo see hamamee o goo goolee su wuduloso tou talame diso.

<sup>30</sup> Osoloso amaye see tobu owolo hee mapoo dileso egeesee takaso, ‘No geleipi ko segei homolee mapoo tou talame di,’ dee takaso. Esemee owoloye nei egeesee takaso, ‘O. A tou talame dileiso,’ diso. Esino yo dilega poogooso.

<sup>31</sup> Esiga holaiso bakadio hagee bia hee kaso amaye goomoga goo ka toowo?”

Esemee tei moso wiligi odoosoo tebisa sabolo osoloso Yu odoosoo dia wiligi odoosoo tebisa oso yimapoo egeesee takaso, “Daga holo oso amaye goomoga goo ee tooso,” dee takaso.

Esemee Yesuye dimapoo egeesee takaso, “Ayo nimapoo taka. Tekisi molee teli odoosoo sabolo osoloso domo silesibili sobo oso daga diayo Godeeye wiligi doloso badeli goo mapoo gadulone hee niba peegoo pagalaiso.

<sup>32</sup> Bei, Yoneeye nimapoo goo tekepo eligime, niyo o to duloso tei

tele. Esino goo tokenee teli odoos hagee bia oso Yoneeyo to duloso tei tooso. Osoloso niyo diayo tei too goo ogoloso goo goolee su wuduloso Yoneeyo to mapoo tei tele poogooso.”

*Odoos tokenee bali eyo goo maga wudu taka*  
(Maka 12:1-12; Luka 20:9-19)

<sup>33</sup> “Osoloso see hee hagee wudu takoo dui. Biame heeso homolee eyo amaye homolee mapoo geleipi ko segeiso, osoloso pee maga beeleeso. Osoloso ko i debilame yo ou poogoloso homolee egee gibadalame doko moso tegeiso. Osoloso yayo homolee bali odoos\* abo mapoo beye doloso, yo see mi eli sage mapoo badalame diso.

<sup>34</sup> Yo omapoo dileso bado-boome, homokoko palagaloso olo bi moodoogaso. Esemeyo o tou teli odoos abo mapoo takolone o homolee mapoo dileso homokoko egee gooloogaloso o hodio ee yimapoo tosibeye diso.

<sup>35</sup> Esino homolee bali odoos oso diayo sibadee ogoloso diba toloso, hee wulo woomele poogooso. Osoloso heeno wulo wooloomaso, osoloso hee yoso wooloomaso.

<sup>36</sup> Esemeyo homolee eyo amaye goo hagee duloso see tou teli odoos bei diyadeeye diso. Esino homolee bali odoos oso diba nosee toloso woomele poogoloso abo yoso piligusu.

<sup>37</sup> Esemeyo see hamameedee owolo diye dolone egeesee gooleeso, ‘Homolee bali odoos oso mo holo mapoo mesilone yo wooloomalaime,’ dee gooleeso.

<sup>38</sup> Esino homolee bali odoos oso homolee eyo amayo owoloye simi ee ogoloso dieso nediliyo egeesee takaga meleeso, ‘Holo hagoso hamamee ama toga, yayo geleipi ko segei hagee talaiso. Esiga geleipi ko segei hagee see iyo talame yo wooloomamo,’ dee takaso.

<sup>39</sup> Esemeyo diayo holaiso hagee homolee maga peegoo ido dileso wooloomaso.

<sup>40</sup> Esiga homolee eyo amaye sibilesos o homolee bali odoos mapoo kasee moodoolaisomo?”

<sup>41</sup> Esemeyo tei moso wiligi odoos tebisa sabolo osoloso Yu odoos dia wiligi odoos tebisa oso nei egeesee takaso, “Homolee eyo amaye sibilesos homolee bali odoos wooloomaloso see bali odoos abo mapoo beye dalaiso. Osoloso odoos egee bia oso homokoko gooloogaloi biame mapoo homokoko gooloogaloso homolee eyo ama mapoo hodio tenee demelaiso.”

<sup>42</sup> Esemeyo Yesuye dimapoo egeesee takaso, “Niba Godeeyo to booka mapoo hogugu ee hesigeleyo? Bei, omapoo egeesee takooso,

‘Moso tegeli odoos oso omou gowoolone togobugu  
oso see epedee hamapoo moso omu domo pupodoo ka moloso.

Esiga goo hagee Lodeeye ka moodoo.

Esiga iba goo hagee ogoloso howoodolone tekepo deeso.’

<sup>43</sup> Esiga ayo nimapoo taka. Godeeye wiligi doloso badeli goo ee nimaga peedee doloso, see Godeeye goomoga goo tomo silesibili odoos omapoo tenelaiso.

<sup>44</sup> Esiga odoos agayo omou omapoo takodee buguloso homodobuoga, yo ki gebisa pagalaiso. Osoloso omou oso odoos hee bulugu magooga, odoos egee balado dileiso,” dee takaso.

<sup>45</sup> Esemeyo tei moso wiligi odoos tebisa sabolo osoloso Pelisi odoos oso Yesuye wudu taka goo ee duloso “ibada goo takolone bado,” doloso egeesee gooleeso.

<sup>46</sup> Egeeseelone diayo Yesu talai eli esiaso. Esino odoos susuga oso Yesu yo tei Godee maga to toloso kokodo takomo sili odoos doloso takolone debee ee duloso, diayo yo talai ebiaso.

**21:33:** Isa 5:1-2 \* **21:33: homolee bali odoos** - odoos hagee bia oso homolee mapoo tou too eyo nei homokoko gooloogaloso hodio diayo teliso. Osoloso hodio homolee eyo amaye teliso. **21:38:** Mat 27:18 **21:39:** Hib 13:12 **21:42:** Psa 118:22-23; Loum 9:33; 1Pita 2:6-8



## 22

### *Sobo hu wo ne maga wudu taka (Luka 14:15-24)*

<sup>1</sup> Esemé Yesúye see tobu wudu takolone, tei moso wiligi odoo tebisa sabolo, osoloso Yu odoo dia wiligi odoo tebisa mapoo egeesee takaso,

<sup>2</sup> “Godeeye wiligi doloso badeli goo ee egeesee moloso. Wiligi odoo taba eyo owoloye sobo hulei maga nei toowa mopoodoo dooso.

<sup>3</sup> Yo nei mopoodoo koodobuloso o tou teli odoo diye dolone egeesee takaso, ‘Odoo daga ayo nei mopoodoo hamapoo sibilame taka ee niyo hamapoo gilimado sibe,’ diso. Esemé o tou teli odoo oso to hagee todilesó odoo egee bia dimapoo takano, diba sibilei goweso.

<sup>4</sup> Esemé yo to egee duloso, wiligi odoo taba oso o tou teli odoo abo see tobu diye dolone egeesee takaso, ‘Niba dileso odoo daga ayo sibeye dee taka mapoo to egeesee takeeye diso, “Be hu olo piliguloso moloso, osoloso nei olo mopoodoo doloso moloso. Esiga niba sobo hu wo ne mapoo sibadeeye,” dee takee,’ diso.

<sup>5</sup> Esemé diayo to hagee todilesó takano, odoo aboso to hagee duloso gowoolone see dia tou talame diyadeeso. Egeeseelone, odoo aboso dia homolee mapoo diyadeeso. Osoloso odoo aboso dia bi neiso teli moso mapoo diyadeeso.

<sup>6</sup> Esemé see odoo aboso to hagee duloso wiligi odoo taba o tou teli odoo ee toloso piliguso.

<sup>7</sup> Esemé wiligi odoo taba oso goo hagee duloso diya komonolone o ha teli odoo mapoo egeesee takaso, ‘Emegei piligili odoo hagee bia piliguloso dia mi onosee dou gileegee,’ dee takeme, diayo egeesee moodooso.

<sup>8</sup> Esemé wiligi odoo taba oso o tou teli odoo mapoo see egeesee takaso, ‘Nei toowa olo mopoodoo doloso moloso. Esino odoo ayo gi hagee bia

ee dia goo tokenee maga hamapoo sibilei tebile.

<sup>9</sup> Esiga niyo dileso mi domo omapoo silesibulone odoo susuga wo nalame gilimado sibe,’ diso.

<sup>10</sup> Esemé o tou teli odoo oso dileso odoo susuga gilimadoloso wo nalame sibadeeso. Egeeseelone goo tekepo teli odoo sabolo, osoloso goo tokenee teli odoo sabolo sibadeeso. Esemé odoo moso ee ma kulodu diya muguleso.

<sup>11</sup> Esino wiligi odoo taba oso moso ee ma kulodu odoo agalame gapeleso egeino, odoo hee sobo hu wo ne mapoo kali bi ee kelega sibileso badoboome egeiso.

<sup>12</sup> Esemé wiligi odoo taba oso yimapoo egeesee takaso, ‘Emegei, no sobo hu wo ne mapoo kali bi ee kelega hagee bado, no moso hagee ma kulodu kasee gasimiyo?’ diso. Esino odoo egee to nei takele.

<sup>13</sup> Esemé wiligi odoo taba oso o tou teli odoo abo mapoo egeesee takaso, ‘Odoo hagee dee sabolo homo sabolo tiso tialogoloso moso peegoo neliga mapoo togobigi. Yo omapoo badolone pisa sabolo mei gisile sabolo badalaiso,’ diso.

<sup>14</sup> Esiga Godeeye odoo susuga yimapoo sibilame gilimolone ka badoso. Esino yo wulo odoo abo ono ka hesiga moloso.”

### *Sisa mapoo tekisi molee tenelai (Maka 12:13-17; Luka 20:20-26)*

<sup>15</sup> Osoloso Pelisi odoo oso peegoo dileso Yesu kukulo agalame to mouso, yayo to tokenee takooga yo ka talame.

<sup>16</sup> Egeeseelone diayo dia hamamee dili odoo sabolo, osoloso Helodeeyo hamamee dili odoo sabolo Yesúye badebei mapoo diye diso. Esemé odoo egee bia oso dileso Yesu mapoo egeesee takaso, “Eligili odoo, iba gooleedoo, no tei goo moodeli odoo. Osoloso nayo Godeeyo goo eligilone hedebe tei goodee ee eligili. Osoloso



no odoo bolo koo ebili. Osoloso no odoo su mapoo koo egeli.

<sup>17</sup> Esiga nayo kasee gooleedo? Imapoo takee, iyo Loum gamalee wiligi odoo Sisa mapoo tekisi molee tenelai tekepowa?" dee takaso.

<sup>18</sup> Yesuye diayo goo tokenee moodoolame to mou goo ee yo olo gooleedoloso dimapoo egeesee takaso, "Niba goo bakadio gweli odoo. Bei kasi maga niyo a kukulo agalame ka sala?"

<sup>19</sup> Esiga niyo tekisi molee magalame mooloogoo molee ko hedebe amapoo eligi." Esemee diayo molee ko hedebe yimapoo tosimiso.

<sup>20</sup> Esemee Yesuye dimapoo egeesee takaso, "Molee hamapoo agamo mudu sabolo osoloso agamo hu oso ka mololo?" diso.

<sup>21</sup> Esemee diayo nei egeesee takaso, "Sisayo mudu sabolo osoloso o hu oso ka molo," diso. Esemee Yesuye nei dimapoo egeesee takaso, "Niyo Sisayo bi ee Sisa mapoo tenee, osoloso Godeeye bi ee Godee mapoo tenee," dee takaso.

<sup>22</sup> Diba to hagee duloso diya howoogadoloso Yesu poogoo diso.

*Ta maga hogabili eyo goo maga Yesu mapoo woosa*

*(Maka 12:18-27; Luka 20:27-40)*

<sup>23</sup> Osoloso biame omapoo Sedisi odoo abo oso Yesuye badebei mapoo sibadeeso. Odoo hagee bia oso takolone, "Odoo wedia see hogabileime," dee takeliso. Esemee diayo Yesu mapoo sibilesa egeesee takaso,

<sup>24</sup> "Eligili odoo, tei magoo Mosese-eye hogugu oso imapoo egeesee takooso. 'Gisoso sobo huloso holo soomagelega toga, see omoloye emei tayo osobo bau ee huloso emeiyo hu maga holo soolooga magee,' diso.

<sup>25</sup> Esiga odoo heeso giso holo 7 soomagooso. Osoloso daga emeiye sobo huso. Osoloso yo holo soomagelega taso. Esemee omolo yima hamamee soomagoo oso emeiyo osobo bau ee huso.

<sup>26</sup> Esino yinosee holo soomagel-ega taso. Esemee see omolo yima hamamee soomagoo oso emeiyo osobo bau ee huso. Esino yinosee holo soomagelega taso. Egeeseelone giso holo 7 susuga hagee bia oso holo soolooga magelega wediaso.

<sup>27</sup> Osoloso hamameedee sobo bau yinosee taso.

<sup>28</sup> Esiga odoo wedia maga see hogogadilei biame mapoo sobo egee tei odoo agamo osobo dalaisomo? Bei, giso 7 oso sobo hedebe hagee huso," diso.

<sup>29</sup> Esemee Yesuye nei dimapoo egeesee takaso, "Niba goo dooboo gweli odoo. Bei, niba Godeeye kitulugu sabolo osoloso o to sabolo gooleedelega ka doso.

<sup>30</sup> Bei, odoo wedia ee bi maga see hogogabuoga, diba see sobo huleime, osoloso giso obileime. Esino diba see Godeeye momaiye oso Kei mi mapoo egee do egeesi masi dabalaiso.

<sup>31</sup> Esiga niba Godeeye odoo wedia see hogogadilei eyo goo maga taka to hogugu hagee hesigeleyo? Bei, yayo egeesee takaso,

<sup>32</sup> 'A Eibalahameeyo Godee, Aise-keeyo Godee, osoloso Yekobowo Godee doloso ka badoso,' dee takaso. Esiga Godee hagee odoo wedia eyo Godeenee. Haye, odoo gie egee do eyo Godee."

<sup>33</sup> Esemee odoo susuga oso Yesuye eligi goo hagee duloso diya howoogadooso.

*Tei magoo kaso toowa ka molo-somo?*

*(Maka 12:28-34; Luka 10:25-28)*

<sup>34</sup> Sedisi odoo oso Yesuye taka eyo nei takalai tebile poogoo ogoloso Pelisi odoo susuga diesono hodobo mooloogoodoloso to mousu.

<sup>35</sup> Osoloso mooloogoodoo omaga tei eligili odoo heeso Yesu kukulo agalame yimapoo sibilesa egeesee takaso,

<sup>36</sup> “Eligili odoo, Moseseeye tei magoo ma kulodu tei magoo kaso diya toowa ka molosomo?” diso.

<sup>37</sup> Esemé Yesuye nei yimapoo egeesee takaso,

“Nayo nee wiligi odoo Godee diya goolee,

nee sooloo ma kuloduga goolee sabolo, osoloso nee dioso goolee sabolo, osoloso nayo goo goolee oso diya goolee.’

<sup>38</sup> Esiga tei magoo susuga ee ma kulodu tei hedebe hagoso daga malalo diya toowa ka moloso.

<sup>39</sup> Osoloso ee ma hamamee tei magoo toowa egeesi masi hee hagoso,

‘Nayo no nediliyo diya egee goolee, egeesee goolone nee odoo noseediya egeesee goolee.’

<sup>40</sup> Esiga Moseseeye tei magoo susuga sabolo osoloso Godee maga to tolosokokodo takomo sili odoo oso to hogugu susuga eyo bei ee tei magoo bakadio hamapoo moloso.”

#### *Keliso agamo owolowo?*

*(Maka 12:35-37; Luka 20:41-44)*

<sup>41</sup> Pelisi odoo hodobo mooloo-goodoloso osee doboome, Yesuye dimapoo egeesee takaso,

<sup>42</sup> “Niba Kelisowo goo maga kasee gooleesomo, yo agamo owolowo?” dee takaso. Esemé diayo egeesee takaso, “Deibidiyo amawe,” diso.

<sup>43</sup> Esemé Yesuye nei dimapoo egeesee takaso, “Bei kaseme Deibidiye Dio Tei maga takolone Keliso yo Lodee dee ka takayo? Bei, Deibidiye egeesee takaso,

<sup>44</sup> ‘Godeeye mo Lodee mapoo egeesee takaso:

No abolo wiligi doloso badalame mo dee deede dokolo bie.

Esiga nayo badolone namapoo ha teli odoo ee ayo dagadileiso,’ diso.

<sup>45</sup> Esiga Deibidiye Keliso o Lodee diso. Esiga kasi maga Keliso yo

**22:37:** Deut 6:5    **22:39:** Lev 19:18; Mat 7:12

**22:44:** Psa 110:1; Mat 26:64    **23:3:** Mal 2:7-8

\* **23:5:** *kali dugo su mapoo ti sage bagagoo* - Edebeeyo howo woola medee tekepo, dee gweliso.

Deibidiyo amawe dee ka seeyo?” diso.

<sup>46</sup> Esemé odoo heeso o to su mapoo to nei hee takele. Esiga biame domopooga dulone, odoo susuga oso Yesu mapoo woosalai obulone yimapoo hee woosele poogooso.

## 23

### *Yesuye tei eligili odoo sabolo osoloso Pelisi odoo dia goo ee eligi*

*(Maka 12:38-39; Luka 11:43-46; 20:45-46)*

<sup>1</sup> Esemé Yesuye odoo mooloo-goodoo mapoo, osoloso o hamamee dili odoo mapoo egeesee takaso,

<sup>2</sup> “Tei eligili odoo sabolo osoloso Pelisi odoo oso Moseseeye tei magoo nimapoo ee eligilei dimapoo kitulugu moloso.

<sup>3</sup> Esiga dibada to mapoo mesimo silesibulone, diayo taka goo ee tolone debee. Esino diayo suso goo moodeli ee ogoloso niyo na peedee. Bei, diayo tei ma goo ee nimapoo eligilino, see dieso suso koo edidili.

<sup>4</sup> Esiga diayo tei eligi goo oso odoo mapoo hegi toowa teneliso. Osoloso diayo emegei pidilone hegi su ee see dieso koo teli.

<sup>5</sup> Esiga goo susuga diayo moodoo ee wulo edebeeyo agalame ka moodeli. Osoloso diba Godeeyo to abo hogugu ee debege masi diya toowa kaloso ee ma kulodu sooloso edebeeyo agalame silesibiliso. Osoloso edebeeyo agalame, diayo howo gisilone, kali dugo su mapoo ti sage bagagoloso\* kalagaloso silesibiliso.

<sup>6</sup> Osoloso ibada howo gisili moso ma kulodu, osoloso wo toowa ne mapoo diba medee malalo peleso bilei ono diya goomegeliso.

<sup>7</sup> Osoloso mi domo mapoo edebeeyo dimapoo gauwuloso emegei di to takooga ee dulei onosee diya goomegeliso. Osoloso odoo susuga

**22:40:** Loum 13:10; Gal 5:14

**22:42:** Yon 7:42

**23:5:** Mat 6:1; Exo 13:9; Deut 6:8; Num 15:38-39

Edebeeyo ti sage hagee ogoloso, Pelisi odoo diba

oso diba eligili odoos dalame diya goomegeliso.

<sup>8</sup> Esino odoos susuga oso nimapoo takolone eligili odoos dalai tekeponee. Bei, nibada eligili odoos hedebe ayo ka badoso. Osoloso nima kulodu odoos heeso dagadilesos koo badoso.

<sup>9</sup> Osoloso mipoo hamapoo odoos heeyo hu dokodoo poudoolone, yimapoo takolone ma dee na see. Bei, nibada Ama hedebe yayo Kei mi ma dokodoo ka badoso.

<sup>10</sup> Osoloso odoos heeso nimapoo takolone wiligi odoos dalai tekeponee. Bei, nibada wiligi odoos hedebe Kelisos aso.

<sup>11</sup> Esiga nima kulodu odoos hu toowa too oso nibada tou teli odoos dolosos badalai tekepo.

<sup>12</sup> Osoloso odoos agayo dieso nediliyo diba si howolone doga, nei Godeeye diba pepooko dalaiso. Esino odoos agayo dieso pepooko dolosos doga, diba nei Godeeye toowa dalaiso.”

*Ye-ee, tei eligili odoos sabolos osolos Pelisos odoos!*

*(Luka 11:39-52; 20:47)*

<sup>13</sup> “Tei eligili odoos osolos Pelisos odoos, niba goo bakadio gweli odoos! Godeeye nimapoo dala toowa tenelaiso. Bei, niyo edebeeyo Godeeye wiligi dolosos badeli goo mapoo gadilei eli poolone ka doga. Osoloso niba nosees omapoo koo gadili.

[<sup>14</sup> Tei eligili odoos sabolos osolos Pelisos odoos, niba goo bakadio gweli odoos! Godeeye nimapoo dala toowa tenelaiso. Bei, niyo sobo bauwe diba ebilame gamenees takoloso, dia moso sabolos bi sabolos niyo tolosos omapoo dobolone, nibada goo gagalosos Godee mapoo taka diya sagelisos, odoos abosos niba tekepo odoos dees goolame. Esiga goo egeesos maga niba nei dala toowa talaiso.]

<sup>15</sup> Tei eligili odoos osolos Pelisos odoos, niba goo bakadio gweli

odoo! Godeeye nimapoo dala toowa tenelaiso. Bei, Yu odoonees oso see Yu odoos dalame niyo mipoo hamapoo odoos esiamos silesibiliga. Osoloso niyo odoos hees tolosos goos tokenees niyo eligi oso yo diya tokenees pelisos. Goo egeesees moodos oso niyo yo Dou mi mapoo idos duso. Bei, goos tokenees yayos too oso goos tokenees niyo too ees dagadilesos molosos.

<sup>16</sup> Niba odoos howo neliga oso odoos abo gilimados di masi gilimados duso. Esiga Godeeye nimapoo dala toowa tenelaiso. Bei, niyo egeesees eligilisos, ‘Odoos heesos to magolones tei mosos eyo hu sabolos tei yelis ees goos hagas toowanee,’ delisos. ‘Esinos edebeeyos tei mosos ma kulodus molees egees molos eyo hu sabolos tei yelis goos onos diya toowa,’ delisos. ‘Esiga sees hamamees to magos ees na gababies,’ delisos.

<sup>17</sup> Niba howo neliga boobada odoos. Molees ees goos hagas toowanee. Esinos tei mosos tegees oso goos diya toowa ka molosos. Bei, molees oso tei mosos ma kulodus mologas, molees egees Godeeyos dolosos ka molosos.

<sup>18</sup> Osoloso niyo sees egeesees eligilisos, ‘Odoos heesos to magolones Godee mapos emegees di bi tenelames nei sili dosulus tei mosos ma kulodus egees molos eyo hu sabolos tei yelis ees goos hagas toowanee,’ delisos. ‘Esinos yayos to magolones dosulus mapos emegees di bi magos eyo hu sabolos tei yagas, goos onos diya toowa,’ delisos. ‘Esiga sees hamamees to magos ees na gababies,’ delisos.

<sup>19</sup> Niba odoos howo neliga masi. Tei mosos ma kulodus bi dosulus mapos egees molos oso goos toowa koo molosos. Esinos dosulus oso goos toowa ka molosos. Bei, emegees di bi tenelis ees dosulus mapos mologas, Godeeyos dolosos ka molosos.

<sup>20</sup> Esiga odoos agayos to magolones dosulus eyo hu sabolos tei yagas, yo hedebe dosulus eyo hu sabolos koo yelis. Esinos yo dosulus eyo hu sabolos osolos dosulus mapos emegees di bi

magoo eyo hu sabolo tei ka yeli.

<sup>21</sup> Esiga odoo agayo to magolone tei moso eyo hu sabolo tei yaga, yo hedebe tei moso eyo hu sabolo koo yeli. Esino yo tei moso eyo hu sabolo osoloso ee ma kulodu badeli Godeeyo hu sabolo tei ka yeli.

<sup>22</sup> Osoloso odoo agayo to magolone Kei mi eyo hu sabolo tei yaga, yo hedebe Kei mi eyo hu sabolo koo yeli. Esino Godeeyo hu sabolo osoloso yayo bili eyo hu sabolo tei ka yaso.

<sup>23</sup> Tei eligili odoo sabolo osoloso Pelisi odoo, niba goo bakadio gweli odoo! Godeeye nimapoo dala toowa tenelaiso. Bei, niyo Godee mapoo emegei di bi tenelame kobu sabolo, osoloso nai sabolo, osoloso bi abo pepuso mooloogoo 10 egeesi mage-liso. Osoloso 10 ee ma kulodu hedebe Godee mapoo tenelone deliso. Esino nei tei magoo ee ma kulodu goo toowa egee molo ee talai boobado bigiliso. Goo ee, tekepo goo talai, osoloso emegei sooloo deli goo, osoloso tei talai goo. Esiga goo toowa hagee tolone medee ka debee. Egeeseelone goo pepuso talai na boobado bigi.

<sup>24</sup> Niba odoo howo neliga oso odoo abo gilimado di masi ka gilimado duso. Niba kababoo nibada wo mapoo badoga ogoloso peegoo habigiliso. Esino kemol be toowa oso nibada mudugiyopoo tiamologa egelega poogoloso wulo sooloogeliso.

<sup>25</sup> Tei eligili odoo sabolo osoloso Pelisi odoo, niba goo bakadio gweli odoo! Godeeye nimapoo dala toowa tenelaiso. Bei, nibada kapu sabolo osoloso peleta ee hedebe kolo ee hapoolone kulodu hapelega pegeli, niba egeesi masi doso. Bei, niyo hedebe kolo ono hapeli. Esino nibada sooloo ma kulodu bi goomegeli goo oso diya bei moloso. Osoloso niyo hedebe niso goomegeli goo ee tomo silesibiliso.

<sup>26</sup> Pelisi odoo niba howo neliga odoo. Niba daga nibada kapu sabolo osoloso peleta kulodu hapege. Egeeseega, kolo onosee dasegelega heliye malaiso.

<sup>27</sup> Tei eligili odoo sabolo osoloso Pelisi odoo, niba goo bakadio gweli odoo! Godeeye nimapoo dala toowa tenelaiso. Bei, niba odoo bi medee mopoodoo doloso meli egeesi masi doso. Bei, odoo bi ee dokodoo medee tekepo mopoodoo deliso. Esino odoo bi ee ma kulodu odoo wediayo ki sabolo ku sabolo bei meliso.

<sup>28</sup> Egeeseelone odoo aboso niba ogoloso niba odoo tekepo gweliso. Esino niba goo bakadio gweli odoo. Bei, nibada kulodu goo tokenee bei moloso.

<sup>29</sup> Tei eligili odoo osoloso Pelisi odoo, niba goo bakadio gweli odoo! Godeeye nimapoo dala toowa tenelaiso. Bei, niyo Godee maga to toloso kokodo takomo sili odoo wedia dia bi ma dokodoo moso pepuso tegegaloso mopoodoo doloso doso. Egeeseelone Godeeyo howo woola tekepo debeli odoo oso wedia eyo bi sabolo niyo medee mopoodoo doloso doso.

<sup>30</sup> Osoloso niyo see egeesee takolone doso, 'Ibada amawe diayo debei biame omapoo iba debei diepi, ibada amawe diayo Godee maga to toloso kokodo takomo sili odoo ee piligu sabolo hodobo hedebe delega pegeliyo,' deeso.

<sup>31</sup> Esino niyo egeesee taka goo oso niso nediliyo takolone, Godee maga to toloso kokodo takomo sili odoo ee wooloomali odoo ee nibada amawe dio dee ka takooso.

<sup>32</sup> Esiga goo tokenee namawe diayo bei mooloogoloso poogoo ee see niyo hosude.

<sup>33</sup> Niba hebiseyo owolo dio masi. Niba Dou mi mapoo egee du peegoo pia dabalai gooleesomo?

<sup>34</sup> Esiga ayo nimapoo Godee maga to toloso kokodo takomo sili odoo, osoloso goo goolee tekepo gweli odoo,



osoloso Godeeyo to eligili odoo sib-eye dalaiso. Esino niyo odoo abo piligileiso. Osoloso abo homo bulubo magoo ma dokodoo yoguso enigileiso. Osoloso odoo abo Yu odoo dia howo gisili moso ma kulodu woolaiso. Osoloso odoo abo niyo dala tenelone dobolone, mi hee maga mi hee mapoo hasiso bugu dolone dabalaiso.

<sup>35</sup> Esiga mipoo hamapoo nibada amawe diayo Godeeyo howo woola tekepo debeli odoo ee piligimo simiso. Egeeseelone diayo odoo tekepo Eibol woolooma maga bei mooloogooloso abaga simino Belekaya eyo owolo Sekalaya wooloomaso. Esiga diayo Sekalaya tei moso ogo osoloso Godee mapoo gala hu wooloso sili dosulu ogo doloso domopoo tobudume wooloomaso. Esiga nibada amawe dio oso daga hoogoo Godeeyo howo woola tekepo debeli odoo piligu eyo nei dala niyo talaiso.

<sup>36</sup> Esiga ayo nimapoo taka. Yu odoo epedee hagee do niyo, nibada amawe dio eyo tokenee eyo nei niyo talaiso.”

*Yesuye Yelusalem maga goohete*  
(Luka 13:34-35)

<sup>37</sup> “Yelusalem odoo, niba kasi maga Godee maga to tolosoko kokodo takomo sili odoo ee piliguloso, Godeeye nimapoo diye di odoo ee yoso ka enigeliyo? Kolokoloso o pe gilimadoloso medee egee wuo egeese selame, ayo biame susuga nowolo dio gilimadalai goomegeliso. Esino niba koo goomegelina.

<sup>38</sup> Esiga Yelusalem odoo, niba dui. Nibada tei moso tegei ee Godeeye poogoo duga, moso egee mosoowe malaiso.

<sup>39</sup> Esiga ayo nimapoo taka. Niyo a see agalaime. Esino biame oso siboga niyo egeese takalaiso, ‘Odo Godeeyo hu maga kitulugu sabolo egee sibo Godeeye yimapoo

goomogoso,’ dalaiso. Biame omapoo niyo a see agalaiso.”

## 24

*Yesuye tei moso tegei guobigilei eyo goo ee taka*

(Maka 13:1-2; Luka 21:5-6)

<sup>1</sup> Yesu tei moso poogoo dileso dimolome, o hamamee dili odoo oso yimapoo sibilesi egeese takaso, “Tei moso tekepo tegei hagee ege,” diso.

<sup>2</sup> Esemee Yesuye egeese takaso, “Niba goo susuga hagee medee ege. Ayo nimapoo taka. Moso hamapoo yo hedebeeso yo hee ma tobudoo molo agalaime. Esino yo susuga mi mapoo misigeduboloso molo agalaiso,” diso.

*Dala goo oso bei mooloogalai biame*

(Maka 13:3-23; Luka 21:7-24)

<sup>3</sup> Osoloso Yesu Olipi mubi ma dokodoo peleso badoboome, o hamamee dili odoo dibusomo sibilesi yimapoo egeese woosaso, “Tei moso guobigilei ogo biameso ka guobigileiyo? Osoloso nayo sibilei mologa, malalo ogo gooso ka peledabalaiyo? Osoloso mi hoo pagalai mologa, daga ogo gooso imapoo ka eligileiyo? Nayo imapoo takee.”

<sup>4</sup> Esemee Yesuye see dimapoo egeese takaso, “Niba obeeyamo! Odo heeso tei goodee maga niba peegoo gilimado diyaga.

<sup>5</sup> Bei, odoo aboso mo hu maga sibilesi takolone dieso nediliyo diba Kelisoso, dee takalaiso. Egeeseelone diayo odoo bei tei goo maga peegoo gilimado dileiso.

<sup>6</sup> Esiga ha too goo sabolo osoloso biliga goo oso peledoboomo duga goo ee duloso, niba haga na ebi. Bei, goo hageesi oso daga malalo peledabalaiso. Esino biame egee hoo poogoo osonee, hamamee sibileiso.

<sup>7</sup> Mi toowa heeso mi toowa hee sabolo ha talaiso. Biame omapoo



mi susuga mapoo nei mauwe pagalaiso. Osoloso mi susuga mapoo mibia toowa sibileiso.

<sup>8</sup> Goo hagoso peledobooga, dala biame oso bei mooloogolone ka seeso.

<sup>9</sup> Egeesi ma kulodu odoo aboso nimapoo dala teneloso niba piligilame odoo abo mapoo tenelaiso. Osoloso niyo amapoo tei too goo omaga odoo susuga oso nimapoo heiga toowa malaiso.

<sup>10</sup> Biame omapoo odoo aboso tei too goo ee pagalaiso. Egeeseelone diayo emegei tei too odoo ee hegilone, diba ha teli odoo mapoo tiasalaiso.

<sup>11</sup> Osoloso gamenee godee maga to toloso kokodo takomo sili odoo aboso sibileiso odoo abo peegoo gilimado dileiso.

<sup>12</sup> Egeesi ma kulodu goo tokenee goo oso diya toowa dolone, edebeeyo emegei sooloo deli goo ee me pagalaiso.

<sup>13</sup> Esino odoo agayo o tei too medee kibiloso badolone hoo poogoo mapoo dileso peledobooga, yo bado-boso kookaiyo gie badeli talaiso.

<sup>14</sup> Esiga mipoo hamapoo to tekepo Godeeye wiligi doloso badeli goo ee odoo susuga oso dulame takomo dileiso. Osoloso to tekepo hagee odoo susuga oso olo dulugaloso dogo, mi hoo pagalai biame omapoo peledabalaiso.

<sup>15</sup> Esiga hesigeli odoo, no to hageeyo bei medee gooleede. Bei, Godee maga to toloso kokodo takomo sili odoo Daniyeleeye egeese takaso, 'Niba bi diya tokenee mudu opusomo di oso tei moso ma kulodu molo agalaiso. Esiga bi ogoso Godeeyo howo woola tei moso tokenee palaiso,' diso.

<sup>16</sup> Egeeseega Yudiya mi toowa mapoo debeli odoo oso bi mudu opusomo di ee ogoga mubi ma dokodoo kukulo pele.

<sup>17</sup> Osoloso biame omapoo odoo moso hau mapoo badoga, see moso

kulodu gadilesu o bi na te.

<sup>18</sup> Osoloso odoo homolee ma kulodu siloga, o gidei talame mosopoo see na wedi di.

<sup>19</sup> Osoloso biame omapoo sobo koowasi sabolo, osoloso holope too nedili sobo ee kukulo dilei diya kalawa toowa molo agalaiso.

<sup>20</sup> Esiga Godee mapoo takee, niyo kukulo dilei biame ee wau biame o, iyo hasali biame omapoo peledebel-ega pagalame.

<sup>21</sup> Bei, biame omapoo dala toowa oso sibileiso. Esiga mi bei mooloogoo biame abaga simino epedee hamapoo, odoo susuga oso dala goo hageesi egele. Esino dala goo toowa hagoso sibileso koodobuoga, hamamee dala goo hageesi see agalaimo.

<sup>22</sup> Esino dala biame hagee see Godeeye deiyepo moodoolaiso. Bei, yayo biame sage magoo diepi, odoo heeso dala ee ma kulodu badalai tebile pegeliyo. Esino dala ee ma kulodu Godee eyo hesiga odoo ee halo, yayo biame see deiyepo moodoolaiso.

<sup>23</sup> Biame omapoo odoo heeso sibileso nimapoo takolone, 'Hamapoo ege, Keliso hagoso' o, 'Koo ege, Keliso ogoso,' dee takooga, o to mapoo tei na te.

<sup>24</sup> Bei, gamenee keliso deli sabolo, osoloso gamenee godee maga to toloso kokodo takomo sili odoo oso sibileso goo toowa opusomo di edebeeyo howeli moodoolaiso, odoo susuga sabolo osoloso odoo Godeeye hesiga oso peegoo dia beleso kukulo agalame.

<sup>25</sup> Esiga niba medee dui. Goo hagee peledebelega mologa, ayo daga nimapoo ka taka.

<sup>26</sup> Esiga odoo heeso nimapoo takolone, 'Niba ege. Keliso dobudu badoso,' dee takooga, yo agalame na di. Osoloso see yayo takolone, 'Niba ege. Keliso moso kulodu badoso,' dee takooga, omapoo tei na te.

27 Bei, kei ebiedigaga mi toowa egee gadeebugu egeesi masi ogoga, niyo Odo Holo a sibo agalaiso.

28 Osoloso mi hee mapoo hune mologa, kukodeeso hune egee nalame omapoo busiliso.”

*Odo Holo oso sibilei  
(Maka 13:24-37; Luka 21:25-36;  
17:26-36)*

29 “Osoloso hamamee haga booloogelega dala biame hagoso dileso koodobuoga, ‘osoko semelaiso.

Egeeseega anosee gadeebigileime. Osoloso giwo kei ma dokodoo egee molo mi hamapoo tigidibileiso.

Osoloso kei ma dokodoo kitulugu bi egee molo Godeeye halabuga ki me pagalaiso.’

30 Osoloso biame omapoo Odo Holo ayo sibilei eyo goo ee kei ma dokodooga eligiga, odo susuga oso agalaiso. Eseega odo susuga oso goohele sabolo pupusigileiso. Egeesi ma kulodu odo susuga oso Odo Holo ayo kolobo maga gadeebugu sabolo osoloso kitulugu toowa sabolo siboga agalaiso.

31 Osoloso kibu neligidi iga, ayo mo momaiye diye dalaiso, diayo dileso odo susuga Godeeye hesiga mi susuga mapoo egee do ee gilimalame.

32 Osoloso niba sogai maga goo hagee medee gooleede. Sogai du pisigaga ogoloso wau biame koola tooboo doloso gooleedeliso.

33 Esiga goo hagee egeesi masi moloso. Goo ayo taka hagoso peledaba ogoga, Odo Holo ayo sibilei olo koola tooboo doloso niba olo gooleedalaiso.

34 Ayo nimapoo taka. Odo epedee hamapoo egee do diba osee dogo goo susuga hagoso peledaba ee diba agalaiso.

35 Esiga kei sabolo mipoo sabolo mauwe pagalaiso. Esino mo to me pagalaimo.

36 Esiga Odo Holo ayo sibilei biame ee odo hee gooleede. Osoloso Godeeyo momaiye Kei mi ma dokodoo egee do sabolo osoloso Godeeyo owolo anosee gooleede. Esino hedebe mo Ma Godeeye biame egee gooleedoloso ka badoso.

37 Esiga Nowaye badebei biame omapoo goo peledaba goo hedebe egeesi masi oso Odo Holo ayo sibilei biame mapoo peledabalaiso.

38 Bei, Nowaye badebei biame omapoo, howo duwelega molome odo susuga oso nei sabolo howo sabolo nolone dobolone sobo hulone debeiso. Diba egeeseelone doboome, biame heeso Nowa du toowa ma kulodu gadiso.

39 Nowa du toowa ma kulodu gadime, odo susuga oso goo peledabalai ee kibiya gooleedelega doboome, howo toowa duwa oso diba howoso neso. Esiga Odo Holo ayo sibilei biame omapoo goo hedebe hageesi oso peledabalaiso.

40 Esino biame omapoo odo baka-dio homolee ma kulodu tou tomo silesiboga, odo heeno ido polone hee omapoo pagalaiso.

41 Osoloso sobo bakadio wo galaga mologa, sobo heeno ido polone hee omapoo pagalaiso.

42 Esiga niba mopoodoo doloso koolone ka debee. Bei, nibada Lodee ayo sibilei biame ee niba gooleede.

43 Esino niba goo hagee medee gooleede. Edebeeyo mesiyaso o moso mapoo sibilei biame ee duga, yo mopoodoo doloso badolone medee bamalaiso. Osoloso mesiya olo siboga ogoloso yo habigileiso.

44 Esiga niba nose medee mopoodoo doloso ka debee. Bei, Odo Holo ayo sibilei biame ee niba gooleede.”

24:27: Mat 24:37-39 24:28: Luka 17:37 24:29: Isa 13:10; 34:4; Ezek 32:7; Joel 2:10, 31; 2Pita 3:10; Yili 6:12-13 24:30: Zec 12:10; Yili 1:7; Dan 7:13 24:31: 1Kol 15:52; 1Tes 4:16 24:34: Mat 16:28 24:35: Mat 5:18 24:36: Diye 1:7; 1Tes 5:1-2 24:37: Gen 6:5-8 24:39: Gen 7:21-23 24:42: Mat 25:13 24:43: Luka 12:39-40; Yili 16:15

*Tou tekepo teli odoo sabolo osoloso tou tokenee teli odoo (Luka 12:41-48)*

<sup>45</sup> “Goo mapoo mesiloso silone tou tekepo teli odoo ee ogumo? Wiligi odoo oso odoo egeesi mapoo kitulugu tenelaiso, yayo o tou teli odoo susuga medee bolone yayo dimapoo nei nali pilame.

<sup>46</sup> Bei, wiligi odoo yo peegoo dilesi badoboso see sibilesi ogoga, o tou teli odoo oso o tou medee tekepo too daga, yimapoo diya goomogalaiso.

<sup>47</sup> Esiga ayo nimapoo taka. Wiligi odoo oso o tou teli odoo oso tou medee tekepo too ogoloso, see yimapoo bi susuga ee yayo bamelee dalaiso.

<sup>48-49</sup> Esino tou tokenee teli odoo oso o wiligi odoo saga koo siboga eyo nediliyo egeese takalai malaiso, ‘Mo wiligi odoo saga koo sibo,’ doloso tou teli odoo abo wooloogolone, yugune nali odoo gilimadoloso nei sabolo howo sabolo nolone dabalaiso.

<sup>50</sup> Yo egeeseemo silone mopoodoo delega badoga, o wiligi odoo omapoo sibileiso.

<sup>51</sup> Osoloso o wiligi odoo oso sibilesi yo diya wooloso peegoo habigileiso, goo bakadio gweli odoo sabolo dabalame. Osoloso diayo omapoo dobolone pisa sabolo osoloso mei gisile sabolo dabalaiso.”

## 25

*Sobo obuo 10 eyo goo maga wudu taka*

<sup>1</sup> “Biame omapoo Godeeye wiligi doloso badeli goo oso sibilei ee egeesi masi malaiso. Sobo obuo 10 oso dia keme toloso giso sobo hulame siboga, yo tugodalame diso.

<sup>2</sup> Osoloso dima kulodu sobo abo 5 ee goo medee koo gweli. Esino sobo abo 5 ee goo medee gweli.

<sup>3</sup> Egeesi ma kulodu sobo abo goo medee koo gweli oso dia keme howo keesoloso dulone, howo abo telega diyadeeso.

<sup>4</sup> Esino sobo goo medee gweli oso dia keme sabolo osoloso howo abo keesoo sabolo toloso diyadeeso.

<sup>5</sup> Diba dilesi balaga meleeno, odoo sobo hulei ee saga sibile. Esem diba diya tila poogoome tiesaso.

<sup>6</sup> Osoloso gesi domo mapoo odoo heeso to neligidi egeese takaso, ‘Sobo hulei odoo ee olo koola sibo. Esiga niba dilesi yo tugode,’ dee takaso.

<sup>7</sup> Esem sobo obuo susuga tiesamelee maga hogogabuloso dia keme wiki medee pailame hoo kookooso.

<sup>8</sup> Esino sobo obuo goo medee koo gweli oso sobo goo medee gweli mapoo egeese takaso, ‘Ibada keme howo olo hosudalaso. Esiga niyo iba howo tenee,’ diso.

<sup>9</sup> Esem goo medee gweli sobo obuo oso nei dimapoo egeese takaso, ‘Haye. Iyo ibada howo nibada keme mapoo keesoga, iba howo tebileime. Esiga niba howo abo neiso talame bi teli moso mapoo diyadee,’ diso.

<sup>10</sup> Esem diba howo talame dime, odoo sobo hulei ee sibilesi peled-abaso. Esem goo medee gweli sobo obuo yo bamelee diba yibolo hodobo nei nalame moso kulodu galagadiso. Diba moso kulodu doboome, osulu kisiso.

<sup>11</sup> Esino sobo obuo goo medee koo gweli diba hamamee sibilesi osulu mapoo kalamadulone egeese takaso, ‘Wiligi odoo, osulu yade, iba moso kulodu gasibileiya,’ dee takaga meleeso.

<sup>12</sup> Esino odoo sobo hulame simi oso nei dimapoo egeese takaso, ‘Haye. Niba gasibileime. Bei, ayo nimapoo tei taka. A niba gooleedele,’ dee takaso.

<sup>13</sup> Esiga niba medee koolone ka debbe. Bei, Odo Holo ayo sibilei biame ee niba gooleedele.”

*Tou teli odoo bakadio hedebe di eyo goo maga wudu taka (Luka 19:11-27)*

<sup>14</sup> “Osoloso Godeeye wiligi doloso badeli goo ee egeesi masi malaiso. Wiligi odoosoo mi eli sage mapoo dilame, o tou teli odoosoo gilimadoosoo. Osoloso dimapoo o bi medee bameleeye diso.

<sup>15</sup> Egeeseelone yayo o tou teli odoosoo mapoo molee tenelone dia goo goolee sabolo teiba teneeso. Egeesee solone yayo odoosoo hee mapoo molee ko 5,000 teneeso. Osoloso odoosoo hee yima hamamee taba mapoo molee ko 2,000 teneeso. Osoloso odoosoo hee ee ma hamamee taba mapoo molee ko 1,000 teneeso. Osoloso yo see mi eli sage mapoo diso.

<sup>16</sup> Esemee o tou teli odoosoo molee ko 5,000 too odoosoo oso molee egee tolosoo dileso bi neiso teli mosoo togoloso badolone molee ko hodio 5,000 toosoo.

<sup>17</sup> Osoloso molee ko 2,000 too odoosoo yinosee molee egee tolosoo dileso bi neiso teli mosoo togoloso badolone molee ko hodio 2,000 toosoo.

<sup>18</sup> Esino odoosoo hee molee ko 1,000 too yo o wiligi odoosoo molee egee tolosoo dileso mada mi doluguso.

<sup>19</sup> Wiligi odoosoo yo mi eli sage dileso biame sage omapoo badobosoo see wedi simiso. Yo sibilesoo yayo molee pi odoosoo ee gilimadoosoo, molee oso goo hee moodoo belesoo agalame.

<sup>20</sup> Esemee molee ko 5,000 too odoosoo oso molee tosibilesoo egeesee takasoo, ‘Wiligi odoosoo, nayo amapoo molee ko 5,000 tenee ee see ayo abaga odoosoo dino 10,000 tugodoo hagoso,’ diso.

<sup>21</sup> Esemee wiligi odoosoo oso nei yimapoo egeesee takasoo, ‘No tou medee goosaa teli odoosoo. Nayo tou tekepo too ee ogoloso a goomogoso. Esiga nayo bi pepookoo medee bamelee maga nei ayo namapoo bi toowa bameleeye dalaisoo. Esiga no mo mosoo kulodu abolo hodoboo goomoga sabolo badalame gasibe,’ diso.

<sup>22</sup> Esemee molee ko 2,000 too odoosoo yinosee molee tosibilesoo egeesee takasoo, ‘Wiligi odoosoo, nayo amapoo

molee ko 2,000 tenee ee see ayo abaga odoosoo dino 4,000 tugodoo hagoso,’ diso.

<sup>23</sup> Esemee wiligi odoosoo oso nei yimapoo egeesee takasoo, ‘No tou medee goosaa teli odoosoo. Nayo tou tekepo too ee ogoloso a goomogoo. Esiga nayo bi pepookoo medee bamelee maga nei ayo namapoo bi toowa bameleeye dalaisoo. Esiga no mo mosoo kulodu abolo hodoboo goomoga sabolo badalame gasibe,’ dee takasoo.

<sup>24</sup> Esemee molee ko 1,000 too odoosoo oso sibilesoo egeesee takasoo, ‘Wiligi odoosoo, a gooleedoo, no kitulugoo sabolo odoosoo mapoo diya seseli. Osoloso no odoosoo heeyoo nei segei wulo goobada teli.

<sup>25</sup> Esiga a noboloo obulone nee molee oso goo hee moodelega, wulo dileso mada mi ka dolugu. Esiga nee molee amapoo tenee ee teiba osee hagee molosoo,’ diso.

<sup>26</sup> Esemee o wiligi odoosoo oso nei yimapoo egeesee takasoo, ‘No tou diya tokenee teli wabada odoosoo. Nayo goolee, a emegei dia nei segei wulo gooloogali gweliso.

<sup>27</sup> Esino nayo kasalame mo molee kauwulame molee bali odoosoo dia mosoo mapoo magelega ka poogoowo? Nayo mo molee omapoo magoo diepi, ayo see wedi simi biame mapoo mo molee ogosoo toowa polosoo mologa teliyo,’ dee takasoo.

<sup>28</sup> Osoloso wiligi odoosoo oso o odoosoo abo mapoo egeesee takasoo, ‘Niyo yimapoo molee ko 1,000 egee molo tolosoo see odoosoo molee ko 10,000 too mapoo tenee.

<sup>29</sup> Bei, odoosoo agayoo dimapoo tenee bi ee medee bamologa, nei dimapoo bi bei tenelaisoo. Esino odoosoo agayoo dimapoo tenee bi ee medee belega poogooga, bi susuga dimapoo egee molo see padaga dalaisoo.

<sup>30</sup> Esiga tou too tokenee bali odoosoo ee peegoo neliga ma kulodu togobigi. Osoloso yo omapoo pisa



sabolo badolone mei gisile sabolo badalaiso.’”

### *Goo midilei biame*

<sup>31</sup> “Odoos Holo ayo kitulugu sabolo osoloso Godeeyo momaiye susuga sabolo siboga, biame omapoo ayo toowa doloso badeli goo omaga gadeebugu sabolo sibilesa ayo wiligi doloso bili mapoo badalaiso.

<sup>32</sup> Osoloso mi opusomo opusomo di mapoo debeli odoos susuga ee Godeeyo momaiye oso gilimado sibilesa mo mudugiyopoo mooloogoodalaiso. Osoloso be bali odoos oso o be domo puloso sipi be dibusomo pi, osoloso gout be dibusomo pi deli, egeesi masi solone ayo mi odoos susuga domo puloso mooloogoodoo bakadio moodoolaiso.

<sup>33</sup> Egeeseelone ayo odoos mooloogoodoo hee sipi be masi ee mo dee deede dokolo mapoo sibilesa mooloogoode, osoloso odoos mooloogoodoo hee gout be masi ee mo dee dobusu dokolo mapoo sibilesa mooloogoode, dee takalaiso.

<sup>34</sup> Osoloso wiligi odoos taba ayo mo dee deede dokolo mooloogoodoo odoos mapoo egeese takalaiso, ‘Mo Maye goomegeli odoos niba sibadee, Godeeye mipoo bei mooloogelee mapoo Godeeye wiligi doloso badeli mi niyo dabalame mopoodoo doloso egee molo mapoo gasibadee.

<sup>35</sup> Bei, a hodume niyo amapoo nei teneliso. Osoloso a howo na poogoome niyo amapoo howo keneliso. Osoloso a odoos soo masi sibume niyo a nibada moso mapoo ido peliso.

<sup>36</sup> Osoloso a boodo diwe badoboome, niyo amapoo dugo kalame teneliso. Osoloso a paiye badoboome, niyo a medee baliso. Osoloso a neliga moso ma kulodu badoboome, niyo a agalame sibiliso,’ dee takalaiso.

<sup>37</sup> Osoloso Godeeyo howo woola odoos tekepo debeli mo dee deede dokolo mooloogoodoo oso nei egeese takalaiso, ‘Lodee, kopolone

no hodia badoboome, iyo no ogoloso nei ka teneeyo? Osoloso kopolone no howo na paga badoboome, iyo no ogoloso howo ka keneeyo?

<sup>38</sup> Osoloso kopolone no odoos soo masi sibume, iyo no ogoloso ibada moso ka ido palayo? Osoloso kopolone no boodo diwe badoboome, iyo no ogoloso dugo kalame ka teneeyo?

<sup>39</sup> Osoloso kopolone no paiye badoboome, iyo no ogoloso medee ka bameleeyo? Osoloso kopolone no neliga moso ma kulodu badoboome, iyo no agalame ka simiyo?’ dee takalaiso.

<sup>40</sup> Osoloso wiligi odoos taba ayo nei egeese takalaiso, ‘Ayo nimapoo tei goo taka. Niyo tei telaga odoos abo wuluge pidimenee ee, niyo a pidi masi pidi,’ dee takalaiso.

<sup>41</sup> Osoloso wiligi odoos taba ayo mo dee dobusu dokolo mooloogoodoo odoos mapoo egeese takalaiso, ‘Niba amaga peegoo diyadee. Bei, niba Godeeyo kamana ma hemidu doso. Esiga Godeeye Saiten sabolo osoloso o momaiye sabolo dou koo semili mopoodoo doloso magoo mapoo dabalame diyadee.

<sup>42</sup> Bei, a hodume niyo amapoo nei tenele. Osoloso a howo na paga badoboome, niyo a howo kenele.

<sup>43</sup> Osoloso a odoos soo masi sibume, niyo a nibada moso mapoo ido pele. Osoloso a boodo diwe badoboome, niyo amapoo dugo kalame tenele. Osoloso a paiye badoboome, niyo a medee bele. Osoloso a neliga moso ma kulodu badoboome, niyo a agalame sibile,’ dee takalaiso.

<sup>44</sup> Egeeseega diayo nei egeese takalaiso, ‘Lodee, kopolone no hodia sabolo osoloso howo na paga badoboome iyo no ka egeiyo? Osoloso kopolone no odoos soo masi sibume iyo no ka egeiyo? Osoloso kopolone no boodo diwe badoboome iyo no ka egeiyo? Osoloso kopolone no paiye badoboome iyo no ka egeiyo?



Osoloso kopolone no neliga moso ma kulodu badoboome iyo no ka egeiyo? Osoloso iyo kopolone goo susuga hagee ogoloso no pidile ka poogoowo?’ dee takalaiso.

<sup>45</sup> Osoloso wiligi odoos taba ayo nei dimapoo egeesee takalaiso, ‘Ayo nimapoo tei goo taka. Niyo tei telaga odoos abo wuluge pidilega poogoomenee ee a pidile poogoo,’ dee takalaiso.

<sup>46</sup> Esiga odoos hagee bia peegoo dileso kookaiyo moloso osee malai dala goo mapoo dabalaiso. Esino Godeeye tekepo deli odoos ee Godee sabolo gie badoboso kookaiyo osee dabalaiso.”

## 26

*Yesu wooloomalame to mou  
(Maka 14:1-2; Luka 22:1-2; Yon 11:45-53)*

<sup>1</sup> Yesuye goo susuga hagee taka koodobuloso see o hamamee dili odoos mapoo egeesee takaso,

<sup>2</sup> “Niba olo gooleedoos, Godeeye Gababia wo nalai ee bei mooloogalai biame hoogoo bakadio moloso. Osoloso biame omapoo Odoos Holo a homo bulubo magoo ma dokodoo yoguso enigilame ha teli odoos mapoo tiasalaiso,” dee takaso.

<sup>3</sup> Osoloso biame omapoo Yu odoowo wiligi odoos tebisa sabolo, osoloso tei moso eyo wiligi odoos tebisa, diayo dia wiligi odoos Kayapaseeyo moso mapoo mooloogoodoloso to mouso.

<sup>4</sup> Diayo gamenee goo maga Yesu tolosos wooloomalame mada to mouso.

<sup>5</sup> Osoloso diayo egeesee takaso, “Iyo Gababia wo ne biame mapoo yo wooloomalaime. Bei, odoos susuga oso dimapoo komonolone biligiyaga,” diso.

*Betani mi mapoo sobosoo mopoodoo soos medee tekepo oso Yesuwo wiligi mapoo soos  
(Maka 14:3-9; Yon 12:1-8)*

<sup>6</sup> Yesu Betani mi mapoo badolone, odoos daga agagisa bia Yesuye tekepo pa Saimonowo moso mapoo palaso.

<sup>7</sup> Yo omapoo nei nolone badoboome, sobo heeso kapu yosoo moodoo mapoo mopoodoo soos medee tekepo keesoloso tosimiso. Yayo tosibilesos Yesuwo wiligi mapoo soosoo. Mopoodoo soos hagee molee toowasos teli.

<sup>8</sup> Esemee Yesu o hamamee dili odoos oso goo hagee ogoloso diya komonolone egeesee takaso, “Bei kasalame sobo hagoso mopoodoo soos medee tekepo ee wulo goo mauwe yimapoo soomelesos ka hosudoowo?”

<sup>9</sup> Yayo mopoodoo soos medee tekepo hagee odoos mapoo neisos talame tenee diepi, molee toowa tolosos bi mauwe odoos mapoo tenelai tebiliyo,” diso.

<sup>10</sup> Esino Yesuye diayos gowe goo ee ogoloso dimapoo egeesee takaso, “Sobo hagoso goo moodoo hagee ogoloso yimapoo to tokenee na takee. Bei, yayo amapoo goo tekepo moodoo.

<sup>11</sup> Esiga bi mauwe odoos ee biame susuga nibolos hodobo dabalaiso. Esino a biame susuga nibolos hodobo badalaime.

<sup>12</sup> Yayo mopoodoo soos egee mo wiligi mapoo soos oso mo susos bi ma kulodu malai ee mopoodoo doos.

<sup>13</sup> Ayo nimapoo ka taka. Edebeeyo mi kamapoo Godeeyo to tekepo takooga, diayos sobo hagoso goo moodoo onosee takalaiso. Osoloso edebeeyo o goo onosee osee goolee malaiso.”

*Yudaseeye Yesu tiasalame goomoga magoo  
(Maka 14:10-11; Luka 22:3-6)*

<sup>14</sup> Osoloso Yesu o hamamee dili odoos 12 ee ma kulodu badeli odoos hee Yudas-Iskaliyoteeye tei moso wiligi odoos tebisa mapoo dilesos egeesee takaso,

<sup>15</sup> “Ayo Yesu nimapoo tiasoga, niyo amapoo nei ogoos bi tenelaisomo?”

diso. Esemе diayo nei molee ko 30 yimapoo teneeso.

<sup>16</sup> Esemе domo omaga bei mooloogoloso Yudaseeye Yesu dimapoo tiasalame eli esiamo sileeso.

*Yesuye o hamamee dili odoо sabolo Godeeye Gababia wo ne*

*(Maka 14:12-21; Luka 22:7-13, 21-23; Yon 13:21-30)*

<sup>17</sup> Isipi mi maga peegoo di ee gooleebugu wo ne bei mooloogoo biame mapoo, Yesu o hamamee dili odoо oso dileso Yesu mapoo egeesee takaso, “Iba mi kamapoo dileso Gababia wo nalai ka mopoodoo dalaiyo?” dee takaso.

<sup>18</sup> Esemе Yesuye nei egeesee takaso, “Niba Yelusalem mi mapoo dileso odoо hee ogoloso yimapoo egeesee takee, ‘Eligili odoо oso egeesee taka: Mo biame Godeeye hesia ee olo koola toboogona. Esiga ayo mo hamamee dili odoо gilimadoloso nee moso mapoo Gababia wo ka nalaigona,’ dee takee.”

<sup>19</sup> Yesuye egeesee taka duloso o to ee dodolone o hamamee dili odoо oso dileso Gababia wo nalame mopoodoo dooso.

<sup>20</sup> Osoloso habe Yesuye o hamamee dili odoо gilimadoloso wo nalame bulumaso.

<sup>21</sup> Diba omapoo nei nolone dobolone Yesuye egeesee takaso, “Ayo nimapoo taka. Nimaga odoо heeso a ha teli odoо mapoo tiasalaiso,” diso.

<sup>22</sup> Yesu o hamamee dili odoо oso to hagee duloso goohele sabolo dobolone Yesu mapoo egeesee takaso, “Lodee, ayowo?” dee takaga meleeso.

<sup>23</sup> Yesuye nei dimapoo egeesee takaso, “Odoо agayo mo peleta mapoo abolo hodobo wo olugudoloso naga, a ha teli mapoo tiasalai odoо ogoso.

<sup>24</sup> Esino Godeeyo to booka mapoo hogugu oso taka ee dodolone, Odoо

Holo a talaiso. Esino Odoо Holo a ha teli odoо mapoo tiaseli odoо yo dala toowa talaiso. Oweeye yo soomagelega poogoo diepi, yo dala tele pegeliyo.”

<sup>25</sup> Esemе Yesu ha teli odoо mapoo tiaseli Yudaseeye egeesee takaso, “Eligili odoо, ayowo?” diso. Esemе Yesuye nei yimapoo egeesee takaso, “O. No olo egee takooso,” dee takaso.

*Lodee gooleebugu wo ne*

*(Maka 14:22-26; Luka 22:19-20; 1Kol 11:23-25)*

<sup>26</sup> Diba wo nolone doboome, Yesuye wo tolosa Godee mapoo goomoga to takoloso wo popeiso. Osoloso o hamamee dili odoо mapoo wo pulone egeesee takaso, “Wo hagee tolosa ne. Hagee mo suso,” diso.

<sup>27</sup> Osoloso see Yesuye kapu wain i keesoo tolosa Godee mapoo goomoga to takoloso o hamamee dili odoо mapoo tenelone egeesee takaso, “Niba susuga wain i hagee ne.

<sup>28</sup> Hagee mo sawo, odoо susuga dia tokenee hapalame ka sologo bugu. Mo sawo oso Godeeye o odoо mapoo to kitulugu magoo goo oso tei peledabalame.

<sup>29</sup> Esiga ayo nimapoo taka. Ayo epedee hamaga dulone wain i hagee see nalaime. Esino hamamee mo Maye wiligi doloso badeli mi mapoo ayo nibolo hodobo wain i dia see nalaiso.”

<sup>30</sup> Osoloso diba goomoga kosaiya hedebe pouloso Olipi mubi mapoo diso.

*Pitaye Yesu yo boobado bigilei goo ee taka*

*(Maka 14:27-31; Luka 22:31-34; Yon 13:36-38)*

<sup>31</sup> Yesuye see tobu o hamamee dili odoо mapoo egeesee takaso, “Epei gesi odoо susuga niyo a poogoo dileiso. Bei, Godeeyo to booka mapoo hogugu oso egeesee takooso,

‘Godeeye sipi be bali odoo ee wooloomaga,  
sipi be susuga oso yimaga peegoo kukulo dileiso.’”

<sup>32</sup> Osoloso Yesuye see egeesee takaso, “Esino a ta maga hogado dilesa, ayo daga malalo Gelili mi mapoo dilesa niba bamalaiso.”

<sup>33</sup> Esem Pitaye nei Yesu mapoo egeesee takaso, “Odoosusuga oso namaga peegoo kukulo duga, hedebe ayo no poogoo dileime,” diso.

<sup>34</sup> Esem Yesuye yimapoo egeesee takaso, “Ayo namapoo tei taka. Epei gesi kolokolo takelega mologa, nayo mo goo gagadilei bakadio hedebe dalaiso,” dee takaso.

<sup>35</sup> Esem Pitaye yimapoo egeesee takaso, “Ayo egeesee selaima. Edebeeyo no wooloomaga, a nobolo hodobo talaiso,” diso. Esem o hamamee dili odoo susuga oso to hedebe egeesee takaso.

*Yesuye Getesemeni homolee mapoo Godee mapoo taka (Maka 14:32-42; Luka 22:39-46)*

<sup>36</sup> Yesuye o hamamee dili odoo sabolo Getesemeni homolee mapoo dilesa dobolone dimapoo egeesee takaso, “Niba hamapoo debee. A koo dilesa Godee mapoo takalaiya,” diso.

<sup>37</sup> Yayo egeesee takoloso hedebe Pita osoloso Sebediyi owolo bakadio esee ido palaso. Yo peleso bado-boome, goohele goo sabolo osoloso su hegi goo oso yimapoo simiso.

<sup>38</sup> Osoloso yayo dimapoo egeesee takaso, “Mo su ma kulodu hegi goo toowa oso molone ayo talai olo koola tooboo. Esiga niba hamapoo dobolone, abolo hodobo koolone ka bamo,” diso.

<sup>39</sup> Yesu egeesee takoloso dimaga pepooko hoogoo dilesa ebiso miyomoo tugusaloso balaboo tiamolone Godee mapoo takolone egeesee takaso, “Ma, no goomogoga, amapoo dala egee sibo ee nayo peegoo magee. Esino nayo goomoga goo ee

moodee, ayo goomoga goonee,” dee takaso.

<sup>40</sup> Osoloso yo Godee mapoo taka koodobuloso dilesa egeino, o hamamee dili odoo bakadio hedebe di tiesamolome egeiso. Esem Pita mapoo egeesee takaso, “Niba kaseega ka tiesamalala? Niba biame deiyepo mapoo abolo hodobo koolone dabalai tebledoo.

<sup>41</sup> Niba bolone Godee mapoo takolone ka debee, kukuga homodobiyyaga. Bei, niba goo tekepo talame goomogoso. Esino nibada su oso ki me ka poogooso,” diso.

<sup>42</sup> Yo see tobu dilesa Godee mapoo takaso, “Ma, dala goo ayo talai oso a dagadilei tebile daga, a dala egee talaiso. Bei, ayo nayo goomoga goo ee talaiso.”

<sup>43</sup> Yesu see tobu dilesa Godee mapoo takoloso sibilesa egeino, o hamamee dili odoo bakadio hedebe di diba tila poogoome tiesa molo egeiso.

<sup>44</sup> Osoloso Yesu see tobu bakadio hedebe di mapoo dilesa goo hedebe eyo daga taka hedebe egeesee takaso.

<sup>45</sup> Osoloso yo see wedi sibilesa o hamamee dili odoo mapoo egeesee takaso, “Niba osee tiesa molosomo? Bei, Odoos Holo a tokenee odoo mapoo tiasalai biame olo siboso.

<sup>46</sup> Esiga koo ege, a tokenee odoo mapoo tiasalai odoo ee olo sibo. Esiga niba tebise, dimapoo dimo.”

*Edebeeyo Yesu wooloomalame ido di (Maka 14:43-50; Luka 22:47-53; Yon 18:3-12)*

<sup>47</sup> Yesu to osee komolome, o hamamee dili odoo hee Yudaseeye Yesu talame odoo mooloogoodoo toowa gilimado simiso. Egeesi ma kulodu tei moso wiligi odoo tebisa sabolo, osoloso Yu odoowo wiligi odoo tebisa oso Yesu talame odoo hagee bia diye diso. Esem diayo sibulone kaiya sabolo kodolo sabolo tolosa sibadeeso.

<sup>48</sup> Egeesi ma kulodu Yudas yo epedee sibilega badolone, odoo Yesu talai mapoo yayo egeese takaso, “Ayo dilesa adaga, odoo ogoso. Eeega niyo yo toloso ka ido di,” diso.

<sup>49</sup> Osoloso Yudaseeye odoo gili-mado sibilesa Yesu mapoo dilesa egeese takaso, “Emegei, eligili odoo,” dee takoloso yo adaso.

<sup>50</sup> Esememe Yesuye yimapoo egeese takaso, “Emegei, nayo goo moodoolame simi egee moodee,” diso. Esememe odoo susuga oso sibilesa Yesu tooso.

<sup>51</sup> Esino o hamamee dili odoo heeso kaiya toloso tei moso wiligi odoo taba eyo tou teli odoo eyo dulu koososo.

<sup>52</sup> Esememe Yesuye yimapoo egeese takaso, “Nee kaiya peegoo magee. Bei, emegei piligilame kaiya toloso silesibili odoo ee kaiyaso piligileiso.

<sup>53</sup> Esiga niba gooledeleyo, ayo a pidilame mo Ma mapoo takooga, yayo o momaiye mooloogoodoo <sup>12\*</sup> egeesi sabolo osoloso abo epedee saga meiyee dalaiso.

<sup>54</sup> Esino ayo egeese seega, ayo dala toloso talai goo ee Godeeyo toso booka maga taka sabolo kasee tebileisomo?” dee takaso.

<sup>55</sup> Esememe Yesuye yo talame sibadee odoo omapoo egeese takaso, “Niyo ogoga a mesiya daga, a talame kaiya sabolo osoloso kodolo sabolo misigaloso ka sibatada? Esino ayo biame susuga tei moso ma kulodu eligimo sileeme, niyo a egeliso. Esiga bei kaseme ayo omapoo eligimo sileeme niyo a telega ka poogoowo?”

<sup>56</sup> Esino niyo epei a talame simi hagoso Godee maga to toloso kokodo takomo silesibili odoo oso taka to sabolo olo tobuoso.” Esememe biame omapoo Yesu o hamamee dili odoo susuga oso yo poogoloso kukulo diyadeeso.

*Yesu wiligi odoo tebisa mapoo ido di*

*(Maka 14:53-65; Luka 22:54-55, 63-71; Yon 18:13-14, 19-24)*

<sup>57</sup> Edebeeyo Yesu toloso tei moso wiligi odoo taba Kayapaseeyo moso mapoo ido palaso. Esiga moso ee ma kulodu tei eligili odoo sabolo osoloso Yu odoowo wiligi odoo tebisa oso daga olo mooloogoodoloso debeiso.

<sup>58</sup> Esememe Pitaye hamameedee Yesu deede dilesa tei moso eyo wiligi odoo taba eyo moso beele ma kulodu gadiso. Yo tei moso gidebeli odoo sabolo omapoo badolone, Yesu mapoo ogoo goo mooda beleso bameleeso.

<sup>59</sup> Esememe tei moso wiligi odoo tebisa sabolo osoloso Yu odoo dia goo midili wiligi odoo tebisa oso Yesuwo goo maga gamenee takeli odoo ee esiaso, yimapoo goo tokenee hee mologa, Yesu ka wooloomalame.

<sup>60</sup> Egeeseelone edebeeyo wulo gamenee takolone Yesuwo goo maga goo opusomo opusomo di takaso. Esino diayo taka ee ma kulodu tei goo hee molo egele.

<sup>61</sup> Esememe odoo bakadio oso see hamamee sibilesa egeese takaso, “Iba Yesuye egeese takeme duso, Godeeyo tei moso hagee guobuguloso biame bakadio hedebe di ee ma kulodu see dia tegelai yimapoo kitulugu moloso, dee takeme duso.”

<sup>62</sup> Esememe tei moso wiligi odoo taba oso toboloso Yesu mapoo egeese takaso, “Odo hagee biaso nee goo maga goo opusomo opusomo di egee takoo mapoo nayo to eyo nei takalaimoyo?” diso.

<sup>63</sup> Esino Yesu to hee takele. Esememe tei moso wiligi odoo taba oso see tobu yimapoo egeese takaso, “Ayo gie badeli Godeeyo hu maga namapoo ka taka. No tei Godeeyo owolo Kelisosomo? Imapoo takee,” diso.

<sup>64</sup> Yesuye to nei yimapoo egeese takaso, “O. Nayo olo egee takooso.

<sup>26:51:</sup> Yon 18:26    <sup>26:52:</sup> Gen 9:6; Yili 13:10    \* <sup>26:53:</sup> *Momaiye mooloogoodoo* hedebe ee ma kulodu momaiye 6,000 egeesi meliso.    <sup>26:55:</sup> Luka 19:47; 21:37    <sup>26:61:</sup> Yon 2:19-21    <sup>26:63:</sup> Isa 53:7; Mat 27:12    <sup>26:64:</sup> Psa 110:1; Dan 7:13; Mat 24:30



Esino ayo nimapoo takooso. Hamamee niyo Odoos Holo a Kitulugu Godeeyo dee deede dokolo mapoo badoga agalaiso. Osoloso ayo kei ma dokodooga kolobo maga siboga agalaiso,” dee takaso.

<sup>65</sup> Esemetei moso wiligi odoos taba oso to hagee duloso diya gowoolone, o dugo tologo bugulone egeesee takaso, “Odoos hagos Godeeyo goo maga to tokenee takoo. Esiga iyo o goo see midilame to abo taka ee dulei koo goomogo. Bei, yayo Godeeyo goo maga to tokenee taka niba olo duso.

<sup>66</sup> Esiga niyo yimapoo ogoos goo moodoolai gooleedo?” diso.

Esemetei eligili odoos sabolo osoloso Yu odoos dia wiligi odoos tebisa oso nei egeesee takaso, “Yo tokenee olo tooso, esiga yo talai tekepo,” dee takaso.

<sup>67</sup> Osoloso diayo yo manolone o mudu mapoo magawo paganiso. Osoloso diayo o howo dugoso gagaloso, yo woolone yimapoo egeesee takaso,

<sup>68</sup> “Keliso, no tei Godee maga to tolos kokodo takomo sili odoos daga, no odoos agayo woolo?” dee takaga meleeso.

#### *Pitaye Yesuwo goo gagadi*

(Maka 14:66-72; Luka 22:56-62; Yon 18:15-18, 25-27)

<sup>69</sup> Pita epedee moso pee mapoo osee badoboome, tei moso wiligi odoos taba o tou teli sobo heeso sibiles yimapoo egeesee takaso, “Nonosee Gelili odoos Yesu bolo silee odoos hee noso,” dee takaso.

<sup>70</sup> Esemetei Pitaye odoos susuga eyo howo woola egeesee takaso, “Nayo egee takoo goo ee a gooleedele,” diso.

<sup>71</sup> Osoloso yo dileso moso beele osulu miyopoo tobudume, tou teli sobo heeso yo ogoloso odoos abo omapoo tebisamelee mapoo egeesee takaso, “Odoos hagee Nasalet odoos Yesu bolo sileeso,” dee takaso.

<sup>72</sup> Esemetei Pitaye see to kitulugu sabolo egeesee takaso, “A tei goo

taka. Odoos egeeyo goo a gooleedele,” diso.

<sup>73</sup> Biame deiyepo poogoloso hamamee odoos susuga omapoo tebisamelee oso sibiles Pita mapoo egeesee takaso, “No tei Yesubolo silee odoos hee noso. Bei, nayo to egee ko ee Gelili odoos oso to keli egeesee masi ko. Esiga nayo to kei oso nee goo ee yilige buguso,” diso.

<sup>74</sup> Esemetei Pitaye to kitulugu sabolo dimapoo egeesee takaso, “Ayo Godeeyo hu hesilone tei taka. Odoos egee a gooleedele,” diso. Pitaye egeesee takoloso badoboome kolokolo takaso.

<sup>75</sup> Esemetei Pita kolokolo taka duloso Yesuye taka to ee gooleebuguso. Bei, Yesuye yimapoo egeesee taka, “Kolokolo takelega mologa, nayo mo goo gagadi bakadio hedebe dalaiso,” diso. Esemetei yo to egee gooleebuguloso peegoo gadiles diya gooholone pisaso.

## 27

### *Yudas eyo nediliyo woolooma*

<sup>1</sup> Gesikolodee mapoo tei moso wiligi odoos tebisa susuga sabolo, osoloso Yu odoos dia wiligi odoos tebisa susuga oso to mouloso, Yesu wooloomalame goomoga magooso.

<sup>2</sup> Osoloso diayo Yesuwo dee tiso tiegisaloso gamalee wiligi odoos taba Pailiteeye badebei mapoo ido dileso yimapoo teneeso.

<sup>3</sup> Yesu tiaseli odoos Yudaseeye Yesu tei olo wooloomalame badebei goo ee duloso, diya gooheselo. Esemetei molee ko 30 yayo too ee see tei moso wiligi odoos tebisa sabolo, osoloso Yu odoos dia wiligi odoos tebisa mapoo tenelame diso.

<sup>4</sup> Yayo dileso dimapoo egeesee takaso, “Ayo odoos goo tokenee mauwe nimapoo tiasoo maga, a goo tokenee olo tooso,” diso. Esino wiligi odoos tebisa oso nei egeesee takaso, “Egee ibada goonee. Nee goo. Esiga



no nobusomo tekepo moodee,” dee takaso.

<sup>5</sup> Egeesee taka duloso Yudaseeye molee ko egee tei moso ma kulodu kugobuguloso, see wedi dilesos eyo nediliyo tiso mu mapoo bagagoloso, homo dee ma dokodooga bagagoo sooloso taso.

<sup>6</sup> Esem tei moso wiligi odoo tebisa oso molee ko misigelone egeesee takaso, “Ibada tei magoo oso egeesee takooso, ‘Molee hagee see tosibileso molee odoo aboso tenee sabolo hodobo magalai tei,’ deliso. Bei, molee hagee odoo wooloomalai eyo nei tenee,” dee takaso.

<sup>7</sup> Osoloso diba molee oso goo talai to magoloso bogoso sesepeni moodoogali odoo eyo mi molee ogooso tooso, Yu odoonee wedioga omapoo boulame.

<sup>8</sup> Bei egeeseega odoo susuga oso mi egee takolone sawo mi deliso.

<sup>9-10</sup> Esem biame omapoo goo hagoso Godee maga to toloso kokodo takomo sili odoo Yelemayaye taka to sabolo teibaso. Bei, yayo egeesee takaso,

“Isalael odoo diayo o su eyo nei magoo molee ko 30 ee toloso see odoo bogoso sesepeni moodoogali eyo mi ee tooso, Lodeeye amapoo taka to ee dodolone.”

*Pailteeye Yesuwo goo midi*  
(Maka 15:2-15; Luka 23:3-5, 13-25; Yon 18:33-19:16)

<sup>11</sup> Yesu Loum gamalee odoo Pailteeye badebei mapoo ido sibume, nei gamalee odoo oso yimapoo egeesee takaso, “No tei Yu odoo dia wiligi odoosomo?” diso. Esem Yesuye yimapoo nei egeesee takaso, “O. No olo egee takooso,” dee takaso.

<sup>12</sup> Esem tei moso wiligi odoo tebisa sabolo, osoloso Yu odoo dia wiligi odoo tebisa oso Yesuwo goo maga goo opusomo opusomo di takeme, yayo nei dimapoo to hee takele.

<sup>13</sup> Esem Pailteeye yimapoo egeesee takaso, “Odoosusuga oso nee goo maga goo opusomo opusomo di egee takaga, no dusomo?” diso.

<sup>14</sup> Esino Yesuye to hee takelega poogoome, gamalee odoo yo goo egee ogoloso diya dio diso.

<sup>15</sup> Dugo susuga ma kulodu Pailteeye Yu odoo goomogalame, Godeeye Gababia wo ne biame mapoo odoo susuga oso goomoga odoo hee neliga moso ma kuloduga peegoo tamageeye deliso.

<sup>16</sup> Biame omapoo mesiya hedebe odoo susuga oso gooleedoo ee neliga moso ma kulodu badebeiso, o hu ee Balabas.

<sup>17</sup> Esiga odoo susuga olo mooloogoodeme, Pailteeye dimapoo egeesee woosaso, “Ayo odoo ogu ee neliga moso ma kuloduga peegoo ka tamagalaiyo? Balabas o, Yesu, edebeeyo Keliso deli ee tamagalaiyo?”

<sup>18</sup> Egeesi ma kulodu Yu odoo dia wiligi tebisa oso Yesu mapoo koolone, diayo Yesu yimapoo ido simi goo ee, yo ogoloso olo gooleedooso.

<sup>19</sup> Paillet goo midili odoo oso bili mapoo osee badoboome, osoboye yimapoo to tenelone egeesee takaso, “Odoosusuga oo tokenee mauwe omapoo nayo goo hee na moodeeye. Bei, eiyo gesi ayo o goo maga sapootia diya ku tiaga,” dee takaso.

<sup>20</sup> Esino tei moso wiligi odoo tebisa sabolo, osoloso Yu odoo dia wiligi odoo tebisa oso odoo susuga mapoo toso pupulone egeesee takaso, “Paillet mapoo egeesee takee, ‘Yesu ono wooloomolone Balabas ono peegoo tamageeye,’ dee,” diso.

<sup>21</sup> Esem Pailteeye odoo susuga mapoo egeesee takaso, “Niba ayo odoo ogu ee neliga moso ma kuloduga peegoo tamagalai ee ka goomogolo?” Esem odoo susuga oso nei egeesee takaso, “Balabas ono peegoo ka tamagee,” dee takaga meleeso.

22 Esemе Pailteeye egeesee takaso, “Ayo Balabas yo neliga moso ma kuloduga peegoo tamagooga, hee Yesu edebeeyo Keliso deli ee kasee moodoolaisomo?” diso.

Esemе nei odoo susuga oso to neligidi takolone egeesee takaga meleeso, “Yo homo bulubo magoo ma dokodoo yoguso enige,” dee takaso.

23 Esino Pailteeye dimapoo egeesee takaso, “Yayo ogoogo toke-nee tooga, niyo yo wooloomalame ka sala?” diso. Esino odoo susuga oso to diya neligidi egeesee takaso, “Yo homo bulubo magoo ma dokodoo yoguso enige,” demeleeso.

24 Esemе odoo susuga oso Paillet yayo goomoga goo ee telega poo- goome, diba komonolone biligalame see ogoloso, yo howo keedoloso odoo susuga eyo howo woola o dee hapoolone\* egeesee takaso, “Niyo odoo hagee wooloomaga, mo goonee, esino nibada goo,” dee takaso.

25 Esemе odoo susuga oso egeesee takaso, “Yo wooloomaga eyo nei iyo ibada holaiso sabolo talaiso,” diso.

26 Esiga Pailteeye Balabas neliga moso maga peegoo tamagooso. Esemе yayo o ha teli odoo mapoo takolone, Yesu we tiso wooloso homo bulubo magoo ma dokodoo yoguso enige, dee takaso.

*Ha teli odooso Yesu mane  
(Maka 15:16-20; Yon 19:2-3)*

27 Esemе Paillet o ha teli odoo oso Yesu we tiso wooloso Loum gamaleeyo moso mapoo ido palaso. Esemе ha teli odoo susuga sibilesa Yesu domo tobudume toboloso silod- abaso.

28 Diba omapoo mooloogoodoloso, Yesu manolone o dugo tigamagoloso see wiligi odoo tebisa oso kali dugo bige sage ee yimapoo kadiso.

29 Osoloso we ti sidoloso o wiligi mapoo kadiloso, o dee deede mapoo homo magooso. Osoloso Yesu

mapoo manolone yimapoo gauwuloso egeesee takaso, “Yu odoo dia wiligi odoo taba, iyo nee hu dokodoo poudoso,” dee takaga meleeso.

30 Osoloso yimapoo magawo pogolone, homo o dee mapoo magoo ee see peedee doloso o wiligi mapoo osee woomeleeso.

31 Egeesee soloso koodobuloso ha teli odoo oso dugo Yesuye ka ee tamagoloso see Yesu o dugo kadiso. Osoloso yo homo bulubo magoo ma dokodoo yoguso enigilame ido diso.

*Yesu homo bulubo magoo ma dokodoo yoguso eniga*

*(Maka 15:21-32; Luka 23:26-43; Yon 19:17-27)*

32 Ha teli odoo oso Yesu idoloso Yelusalem mi maga peegoo gadulone, Kulene odoo Saimon tugodooso. Yo tugodoloso homo bulubo magoo Yesuye imado di ee see yayo ime diso.

33 Diba abaga dino Gologota mi mapoo peledabaso. Mi hu eyo bei ee wiligi ki mi.

34 Diba omapoo sibilesa Yesu mapoo wain i sabolo habili bi gal deli sabolo wuluguloso teneeso. Esino Yesuye howo egee wulo pepooko pia naloso poogooso.

35 Osoloso ha teli odoo oso Yesu homo bulubo magoo mapoo yoguso enigaloso tuluguloso, Yesu o dugo pilame diayo yoso dasigeli hee dasigaso.

36 Diba Yesuwo dugo puloso omapoo dobolone yo gibadebeiso.

37 Osoloso edebeeyo Yesu wooloomalai goo eyo bei ee odoo susuga oso gooleedalame, odoo heeso Yesuwo wiligi oo poogoo dokodooga to egeesee hoguguloso kalamaso,

“Hagee Yesu, Yu odoo dia wiligi odoo taba.”

38 Osoloso mesiya bakadio sabolo homo bulubo magoo ma dokodoo yoguso enigaso. Odoo hee Yesu o dee

27:24: Deut 21:6-9 \* 27:24: **Pailteeye o dee hapoo** eyo bei ee, Yesu woolooma ee o goo tokenee nee dolone ka hapoo. 27:25: Diye 5:28 27:28: Luka 23:11 27:30: Isa 50:6 27:34: Psa 69:21 27:35: Psa 22:18 27:38: Isa 53:12

deedee dokolo tulugu, osoloso hee o dee dobusu dokolo tulugu diso.

<sup>39</sup> Osoloso odoo aboso eli omaga dulone, Yesu ogoloso manolone dia wiligi wabisaso. Osoloso diayo yimaga to tokenee yimapoo takaga meleeso.

<sup>40</sup> Egeeseelone diayo yimapoo egeesee takaso, “Nayo takolone, tei moso ee guobuguloso biame bakadio hedebe di ee ma kulodu see dia ka tegelaigona, dee taka. Esiga no tei Godeeyo Owolo daga, no homo bulubo magoo ma dokodooga miyomoo meilesa no nediliyo pidi,” dee takaga meleeso.

<sup>41</sup> Osoloso tei moso wiligi odoo tebisa sabolo, osoloso tei eligili odoo sabolo, osoloso Yu odoo dia wiligi odoo tebisa dibolosee Yesu manolone egeesee takaso,

<sup>42</sup> “Yayo odoo abono pidimo siliso. Esino yo epedee eyo nediliyo pidilei tebledoo. Yo tei Keliso, Isalael odoo ibada wiligi odoo daga, yo homo bulubo magoo ma dokodooga miyomoo meilei tekepo. Egeeseega yayo mou ogoloso iyo yimapoo tei talaiso.

<sup>43</sup> Yo Godee mapoo tei teliso. Osoloso eyo takolone, yo Godeeyo Owolo, dee takomo siliso. Esiga iyo epedee yimapoo bamo, Godeeye gomogolone yo pida beleso agalame.”

<sup>44</sup> Goo hedebe egeesi masi moodoolone, mesiya bakadio onosee homo bulubo magoo ma dokodoo yoguso enigaloso molone, Yesu mapoo to tokenee takaso.

*Yesuye ta*

*(Maka 15:33-41; Luka 23:44-49; Yon 19:28-30)*

<sup>45</sup> Osoko oo domo tooboome, mi toowa egee nolugo doloso melee osoko howo bakadio hedebe di poogooso.

<sup>46</sup> Osoloso neliga melee ee mauwe poogoome, Yesuye to neligidi egeesee iso, “Ilai, Ilai, lama sabakatani.” To hageeyo bei ee

egeesi moloso, “Mo Godee, mo Godee, bei kasi maga nayo a ka pagala?”

<sup>47</sup> Esemme odoo koola omapoo tebisa melee oso to hagee duloso egeesee takaso, “Niba dui. Yo Ilaya i,” diso.

<sup>48</sup> Osoloso odoo heeso hoguo sibilesa dugo tolosa wain i mei nali mapoo olugu doloso homo sage su mapoo tialogoloso Yesuye nalame o maga mapoo heligiso.

<sup>49</sup> Esemme odoo aboso egeesee takaso, “Ougo! Ilayaye sibilesa yo tolosa miyomoo mouwa beleso bamo,” diso.

<sup>50</sup> Esemme biame omapoo Yesu to neligidi idagoloso taso.

<sup>51</sup> Esemme Yesuye ta biame omapoo, tei moso tegei ma kulodu dugo kodia oso kisi melee ee, dokodooga eyo tologomo abaga mouno miyomoo sabuguso. Osoloso mi halabulone yo toowa gagabuguso.

<sup>52-53</sup> Osoloso odoo bi goodogamo diso. Esemme Godee o odoo susuga wedia ee hogaduloso see gie badeli tooso. Osoloso odoo bi poogoloso diso. Osoloso Yesu ta maga hogaduloso hamamee, Yelusalem mapoo dilesa dieso nediliyo diba odoo abo mapoo eligiso.

<sup>54</sup> Esemme ha teli odoo gibadeli odoo sabolo, osoloso odoo yibolo Yesu gibadebei oso mibia simi sabolo, osoloso goo abo omapoo peledaba ogoloso diya obulone egeesee takaso, “Tei takoo, odoo hagee Godeeyo owolo doo,” diso.

<sup>55</sup> Esemme sobo abo Gelili abaga Yesubolo sibadee oso eli sage abaga Yesu homo bulubo magoo ma dokodoo molome balaga meleeso. Sobo hagee biaso Gelili abaga Yesubolo sibulone yo pidiso.

<sup>56</sup> Sobo hagee bia dima kulodu Meli-Magadalin, osoloso Yemes dio

Yosep dio dibada owee Meli, osoloso Sebediyo osobo sabolo omapoo dobolone balaga meleeso.

*Yesu bi ma kulodu magoo*

(Maka 15:42-47; Luka 23:50-56; Yon 19:38-42)

<sup>57</sup> Habedee bi bei odoo hee Ali-matiya mi maga simiso. O hu ee Yosep. Yinosee Yesuwo hamamee dili odoo hee yoso.

<sup>58</sup> Esiga yayo dileso Paillet mapoo Yesuwo kou talame woosaso. Esem Esem Pailteeye o odoo mapoo takolone, Yesuwo kou ee Yosep mapoo tenee, dee takaso.

<sup>59-60</sup> Esem Yosepeeye Yesuwo kou toloso dugo dia heliyeso tiadoloso o bi dia yo ou poogoo ee ma kulodu magooso. Osoloso wulu ou mapoo yo toowa bidigamo dileso kisiloso diso.

<sup>61</sup> Biame omapoo Meli-Magadalin dio osoloso Meli hee dio wulu koola omapoo dobolone balaga meleeso.

*Yesuwo bi gidebei*

<sup>62-63</sup> Osoloso biame hee mapoo Yu odoowo hasali biame omapoo, tei moso wiligi odoo tebisa sabolo, osoloso Pelisi odoo oso Pailteeye badebei mapoo dileso egeesee takaso, “Wiligi odoo, iba goo hagee gooleebuguso. Goo ee, gamenee takeli odoo Yesu hagoso gie badolone egeesee takeliso, ‘Yo bi ma kulodu biame bakadio poogoloso see biame hee mapoo hogabileiso,’ dee takeliso.

<sup>64</sup> Esiga iba goomogo, nee odoo oso biame bakadio hedebe di ee ma kulodu bi egee medee gidabalame. Bei, o hamamee dili odoo oso sibilesa o kou heli toloso see wulo gamenee takolone, Yesu olo hogaduloso dina, dee takeeyaga. Egeeseega hamamee gamenee taka goo hagoso daga yayo gamenee taka goo ee dagadileiso.”

<sup>65</sup> Esem Pailteeye egeesee takaso, “Niba mo ha teli odoo abo gilimado dileso bi egee medee gidebee,” diso.

<sup>66</sup> Esem diba susuga dileso bi omapoo dobolone yo ou yoso kisi mapoo eli peeso, odoo heeso mada sibilesa yo peegoo bidibugu beleso agalame. Osoloso gidebeli odoo mapoo takolone, medee gidebeeye, dee takaso.

## 28

*Yesu ta maga hogadi*

(Maka 16:1-10; Luka 24:1-12; Yon 20:1-10)

<sup>1</sup> Yu odoowo hasali biame oso dileso koodobuloso biame hee mapoo gesikolodee Meli-Magadalin dio osoloso Meli hee dio Yesuwo bi agalame diso.

<sup>2</sup> Diba bi mapoo diyadaga molome, haga booloogelega mibia toowa simiso. Esem Lodee o momaiye oso Kei mi ma dokodooga sibilesa yo peegoo bidi buguloso ee ma dokodoo biaso.

<sup>3</sup> Yo dugo diya heliye kaloso, o su maga diya gadee magoloso bado-boome egeiso.

<sup>4</sup> Esem bi gidebeli odoo oso diya obugulone kikiliga oso homodobuloso wulo wedia masi meleeso.

<sup>5</sup> Esino momaiye oso sobo bakadio mapoo egeesee takaso, “Niba haga na ebi. A gooleedooso, niba Yesu homo bulubo magoo ma dokodoo yoguso eniga ee esiamo silesibo.

<sup>6</sup> Yo hamapoo koo moloso. Yo to eyo taka ee dodolone yo see hogado diso. Esiga niba sibilesa o kouso melee mi mapoo ege.

<sup>7</sup> Osoloso niba see saga dileso o hamamee dili odoo mapoo egeesee takee, ‘Yesu ta maga see hogado dina. Osoloso yo malalo dileso Gelili mapoo diba bamoloso. Diba omapoo dileso yo agalaiso,’ dee takee. Mo to ayo nimapoo taka ee na boobado bigi.”

<sup>8</sup> Egeesee taka duloso sobo diba obulone see saga wedi dileso o hamamee dili odoo mapoo takalame diya goomoga sabolo diyadeeso.



<sup>9</sup> Diba diya goomoga sabolo diyadaga molome, haga booloogel-ega Yesuye eli domopoo diba tugodoloso egeesee takaso, “Emegei,” diso. Esemе sobo bakadio hagoso yimapoo sibilesо gauwuloso dobolone, o homo mapoo toloso o hu dokodoo poudooso.

<sup>10</sup> Esemе Yesuye dimapoo egeesee takaso, “Niba haga na ebi. Niba dilesо mo hamamee dili odoo mapoo takee, diba Gelili mapoo dilesо omapoo a galaiso,” dee takaso.

*Odoo bi gidebeli odoo ee moleeso howo gaga*

<sup>11</sup> Sobo bakadio hagoso Yesu o hamamee dili odoo mapoo takalame osee diyadaga molome, odoo bi gidebeli odoo aboso dilesо tei moso wiligi odoo tebisa mapoo goo susuga odoo bi omapoo peledaba ee takaso.

<sup>12</sup> Egeesee taka duloso tei moso wiligi odoo tebisa oso Yu odoo dia wiligi odoo tebisa sabolo to mouso. Esiga diba dieso to magoo ee dodolone, molee toowa odoo bi gidebeli odoo mapoo tenelone egeesee takaso,

<sup>13</sup> “Niyo odoo susuga mapoo egeesee takee, ‘Niba gesi tiesamolome, Yesu o hamamee dili odoo oso mada sibilesо Yesuwo kou todina,’ dee takee.

<sup>14</sup> Osoloso gamalee odoo Pailete-eye goo hagee duloso kamanaga, iyo yo hemisilame, nibada goo medee moodoolaiso,” dee takaso.

<sup>15</sup> Esemе odoo bi gidebeli odoo oso molee toloso, goo diayo moodeeye dee taka goo ee moodooso. Goo egeesi maga gamenee taka goo hagee Yu odooso dima kulodu osee takomo silesiboso.

*Yesuye o hamamee dili odoo diye di*

*(Maka 16:14-18; Luka 24:36-49; Yon 20:19-23; Diye 1:6-8)*

<sup>16</sup> Yesu o hamamee dili odoo 11 oso Gelili mapoo dilesо Yesuye taka to ee dodolone mubi hee mapoo palaso.

<sup>17</sup> Diba omapoo pelesо Yesu ogoloso yimapoo goomoga poudooso. Esino dima kulodu odoo aboso yo tei Yesudoo doloso tei tele.

<sup>18</sup> Esemе Yesuye dima hegi sibilesо egeesee takaso, “Kei mi sabolo osoloso mipoo hamapoo goo susuga ee balai kitulugu amapoo olo teneeso.

<sup>19</sup> Esiga niba mipoo susuga omapoo debeli odoo susuga mapoo dilesо, diayo amapoo tei toloso mo hamamee dili odoo dalame, Godeeyo to tekepo takomo di. Egeeseelone diba Mayo hu maga, osoloso Owolo mo hu maga, osoloso Dio Tei eyo hu maga diba howo olugi.

<sup>20</sup> Osoloso ayo kokodo taka to susuga niyo dodomo silesibilame nimapoo tenee ee see dimapoo eligi, diayo to egee dodolone ka dabalame. Esiga niba goo hagee medee gooleede, epedee hamaga bei mooloogoloso mi hoo poogoo mapoo duga, ayo biame susuga nibolo hodobo badalaiso.”

## Maka To tekepo Makaye hogugu

*Maka booka goo eyo bei*

Maka yo Yesuwo hamamee dili odoonee. Esino iba gooleedele, Yesuye goo moodoomo sileeme ee agalame, yinosee Yesubolo hodobo sileeso. Yayo Polo dio Banabas dio pidimo siloso, see hamamee Pita pidilone badebeiso. Makaye to hagee Yu odoonee mapoo hoguguloso teneeso, diayo Yesu mapoo tei talame. Yayo to hagee ma kulodu goo toowa hagosu. Goo ee, Yesuye kitulugu oso Saitenso kitulugu ee dagadiso. Bei, Yesuye mipoo hamapoo silone, odo paigiga tekepo moodoomo silone, goo toowa opusomo di moodoomo sileeso. Osoloso bo holo onosee odo ma kuloduga peegoo hasiso bugu domo sileeso.

*Odo howo oluguli, Yoneeye to tekepo taka goo*

*(Mat 3:1-12; Luka 3:1-18; Yon 1:19-28)*

<sup>1</sup> To tekepo bei mooloogoo hagosu, Godeeyo owolo Yesu Kelisowo goo.

<sup>2</sup> Daga hoogoo Godee maga to toloso kokodo takomo sili odo Aisayaye o booka mapoo Godeeye Yesu mapoo to taka egeesee hoguguso:

“Ayo mo to tosili odo malalo diye dalaiso.

Osoloso yayo dileso nee eli moodoolame.

<sup>3</sup> Miwe poogoo mi omaga edebeeyo egeesee idagoo,

‘Lodee yayo sibilei eli moodee. Osoloso medee hoodo magee.’ ”

<sup>4</sup> Yonee odo howo oluguli miwe poogoo mi mapoo peledoboloso, yayo odo howo ogusulone to tekepo takolone egeesee takaso, “Nibada goo tokenee mapoo miligi pialoso

howo ogusige. Eseega Godeeye nibada goo tokenee hapoloso boobado bigileiso,” dee takemeleeso. <sup>5</sup> Yudiya mi mapoo debeli mosobia sabolo, osoloso Yelusalem mi toowa mapoo debeli odo susuga oso Yoneeye to taka ee dulame sibadeeso. Diba Yoneeye taka to ee duloso dibada goo tokenee yilige bugume, Yoneeye diba Yoden howo mapoo howo oluguso.

<sup>6</sup> Yonee yo kemol be too oso dugo dusa kaloso silone, gala koloso bagi mapoo gudu masi kaloso siliso. Osoloso nei yayo nali ee tapala toowa sabolo koo sabolo nali.

<sup>7</sup> Yayo odo susuga mapoo egeesee takeliso, “Odo hee ama hamamee sibileiso. Yayo kitulugu oso ayo kitulugu ee dagadi. A tekeponee, o homo bei mapoo gauwuloso o homo bi ee pidigilei.

<sup>8</sup> Ayo niba howodeeso oluguso. Esino hamamee yayo Dio Tei nima kulodu tenelaiso.”

*Yesu howo olugu sabolo kuku sabolo*

*(Mat 3:13—4:11; Luka 3:21-22; 4:1-13)*

<sup>9</sup> Haga booloogelega Yesu Gelili mi toowa ma kulodu mi pepooko Nasalet omaga sibume, Yoneeye yo Yoden howomoo howo oluguso.

<sup>10</sup> Yesu howomooga gasibileso egeino, Kei mi osulu yamagoloso Dio Tei oso molo masi pusibileso yimapoo pubalegeme egeiso.

<sup>11</sup> Osoloso Kei mi ma dokodooga to egeesee taka, “No ayo gooma mo holo noso, a namapoo diya goomogo,” dee takaso.

<sup>12</sup> Osoloso biame omapoo Dio Teiso Yesu miwe poogoo mi omapoo diye diso.

<sup>13</sup> Yesu biame 40 omapoo gala seebee sabolo badoboome, Saitenso kuku demeleso. Esino Godeeyo momaiye sibileso yo pidiso.

*Yesuye di kebigeli odo bakadio bakadio di gilimadoo goo*

*(Mat 4:12-22; Luka 4:14-15; 5:1-11)*

<sup>14</sup> Yu odo dia wiligi odo taba Helodeeye, Yonee neliga moso ma kulodu husuloso hamamee, Yesu yo Gelili mi toowa mapoo dileso, to tekepo Godee maga simi takomo siliso.

<sup>15</sup> Yayo egeese takaso, “Biame tekepo olo simiso, osoloso Godeeye wiligi doloso badeli goo oso sibilei koola toobooso. Esiga niba goo tokenee maga miligi pialoso, to tekepo mapoo tei te.”

<sup>16</sup> Biame heeso, Yesu Gelili abei palaga maga dimeleeno, di kebigeli odo bakadio Saimon dio omolo Endulu dio peiso di giligamolome yayo egeiso.

<sup>17</sup> Esem Yesuye dimapoo egeese takaso, “Niba ama hamamee sibadee, ayo niba odo gilimeli eligileiya.”

<sup>18</sup> Esem diba Yesuwo to duloso, dia pei omapoo saga poogoloso, see Yesubolo hodobo diyadeeso.

<sup>19</sup> Osoloso yo pepooko hoogoo dileso, di kebigeli odo abo Sebediyowolo bakadio, Yemes dio omolo Yonee dio du ma kulodu dobolone pei moodoomolome egeiso.

<sup>20</sup> Osoloso Yesu diba ogoloso, yayo diba gilimadoo. Esem diayo dulone o tou telagali odo sabolo ama Sebedi sabolo du ma kulodu gilimane poogoloso, Yesubolo hodobo diyadeeso.

*Odo bo holo pala*

*(Luka 4:31-37)*

<sup>21</sup> Yesu o hamamee dili odo sabolo Kapeniyum mi mapoo simiso. Osoloso Yu odoowo hasali biame hee mapoo, Yesu howo gisili moso omapoo peleso, Godeeyo to eligilame bei mooloogooso.

<sup>22</sup> Odo susuga yayo eligi du oso diya howoogadooso. Bei, yayo eligi ma kulodu tei eligili odo oso eligi egeesi masi koo eligime. Esino yayo

odoo diya kitulugu oso eligi masi eligiso.

<sup>23</sup> Epedee omapoo, howo gisili moso ma kulodu odo bo holo pala hee omapoo badebeiso. Yayo to neligidi Yesu mapoo egeese takaso,

<sup>24</sup> “Yesu Nasalet odo, nayo imapoo ogo goo moodoolame ka simiyo? Nayo hamapoo iba tokenee palame ka simiyo? A gooleedooso, no Godeeyo tei odo.”

<sup>25</sup> Yesuye bo holo mapoo to kitulugu sabolo egeese takaso, “No to koodobuloso, odo ma kuloduga peegoo di,” diso.

<sup>26</sup> Esem bo holo oso odo ma kulodu badolone neligidi kikiligameleso gwa sabolo peegoo gadiso.

<sup>27</sup> Esem odo susuga oso goo hagee ogoloso howoogadooso, osoloso diesono nei woosa nei woosa diso, “Goo hagee ogo goowo? Eligili goo hagee dia, osoloso yayo kitulugu sabolo eligi. Bei, edebeeyo bo holo mapoo to takooga, peegoo koo gadili. Esino Yesuye bo holo mapoo to takooga, diba o to mapoo mesiloso peegoo gadiliso.”

<sup>28</sup> Esem Gelili mi toowa mapoo odo susuga goo ee saga takomo diyadeeso.

*Yesuye odo paigiga tekepo moodoo*

*(Mat 8:14-17; Luka 4:38-41)*

<sup>29</sup> Howo gisili moso poogoo dileso, Yesu Yonee sabolo Yemes sabolo, Saimon dio Endulu dio dibada moso mapoo diso.

<sup>30</sup> Saimonowo nalobo paiye kolo dei moodoome debi mapoo tiameleeso. Diayo Yesu mapoo sobo paiye eyo goo takaso.

<sup>31</sup> Osoloso Yesuye sobo paiye mapoo dileso, o dee mapoo toloso, “Tebee,” diso. Esem paiye kolo dei saga yimaga kodo diso. Esem yayo dimapoo nei teneeso.

<sup>32</sup> Habe osoko todobume odo abo oso odo paigiga sabolo bo holo

paladee odoo sabolo Yesu mapoo iyado sibadeeso.

<sup>33</sup> Osoloso Kapeniyum mi toowa mapoo debeli odoo susuga oso Yesuye odoo paigiga moodoo ee agalame, osulu miyopoo mooloo-goodooso.

<sup>34</sup> Esemee Yesuye odoo paigiga opusomo opusomo di yayo takeme tekepo poloso weido diso. Osoloso bo holo odoo ma kulodu debei peegoo hasilone dimapoo egeesee takaso, “Mo goo na takee,” diso. Bei, bo holo susuga oso Yesu yo Godeeyo owolo doloso diba gooleedooso.

*Yesuye Gelili mi toowa mapoo to takomo di goo*

*(Luka 4:42-44)*

<sup>35</sup> Gesikolodee mi hadobilega, Yesu tia maga hogabuloso moso poogoo dileso, obusomo odoo koola mauwe mi mapoo Godee mapoo takalame diso.

<sup>36</sup> Hamamee Saimonbolo debei odoo abo sabolo Yesu esiamo silesibiso.

<sup>37</sup> Diayo yo ogoloso yimapoo takaso, “Odoosusuga oso no esia moloso,” diso.

<sup>38</sup> Yesuye nei egeesee takaso, “Iba mi abo mapoo dimo, omapoo dileso Godeeyo to takalame. Bei, a goo egeetalam ka simi.”

<sup>39</sup> Osoloso yo Gelili mi toowa ma kulodu mi pepooko susuga mapoo dileso, Yu odoowo howo gisili moso susuga ma kulodu Godeeyo to takomo sileeso. Osoloso bo holo odoo ma kulodu paladee peegoo hasiso bugu demeleeeso.

*Yesuye odoo agagisa bia tekepo moodoo*

*(Mat 8:1-4; Luka 5:12-16)*

<sup>40</sup> Odoosusuga agagisa bia Yesu mapoo sibilesos ebiso miyomoo tugusalos egeesee howaso, “Nayo a tekepo moodolai goomogoga, a tekepo moodee.”

<sup>41</sup> Yesuye yo diya sooloo dolone o kolo mapoo sigolone yimapoo

egeesee takaso, “Ayo no tekepo palai, a goomogo. Esiga no tekepo pe.”

<sup>42</sup> Esemee epedee omapoo o kolo mapoo agagisa bia mauwe poogooso.

<sup>43</sup> Yesuye yo diye dolone to kitulugu sabolo egeesee takaso,

<sup>44</sup> “Nayo dileso no ayo tekepo pa goo ee odoo abo mapoo na takee. Esino, nee su tekepo pa goo ee, Godee ogo odoo ogo doloso domo badeli odoo mapoo dileso eligi. Osoloso nee su tekepo pa omaga emegei di bi tenee, Moseseeye tei magoo goo ee dodolone, odoo susuga oso ogoloso tekepo pa ee gooleedalame.”

<sup>45</sup> Esino yo Yesuwo to mapoo tei telega poogoloso, odoo susuga mapoo o agagisa bia tekepo moodoo goo ee oposususo. Bei egeesi maga Yesuye mi kamapoo disomo, odoo susuga oso Yesu agalame diya mooloogoodoo diso. Esemee Yesu mi abo mapoo odoo howo woola sile. Esino yo mi odoo mauwe mapoo bado neme, edebeeyo mi opusomo opusomo di maga yayo badebei mi mapoo yo agalame sibadee demeleeeso.

## 2

*Odoosusuga kakawa poogoo moodoo*

*(Mat 9:1-8; Luka 5:17-26)*

<sup>1</sup> Biame abo poogoloso hamamee, Yesu see Kapeniyum mi mapoo wedi sibume, edebeeyo Yesuye simi ogoloso, mi omapoo saga takomo diso.

<sup>2</sup> Osoloso odoo susuga sibilesos, o moso kulodu sabolo peegoo sabolo omapoo diya mooloogoodoome, Yesuye dimapoo Godeeyo to eligi meleeso.

<sup>3</sup> Esemee mi omapoo odoo su kakawa poogoo badebei ee, odoo bakadio bakadio di oso kida mapoo tiediloso imado sibadeeso.

<sup>4</sup> Osoloso diayo yo Yesuye badebei omapoo todilame goomogaso. Esino odoo beiga Yesu mapoo dilei eli egele. Esemee diayo odoo su



kakawa poogoo kida sabolo moso omu ma dokodoo imado palaso. Osoloso Yesuye to kemelee domo omaga seme ou tologo poogoloso tiso kida mapoo bagagoloso kida sabolo moso kulodu toosooso. <sup>5</sup> Diayo odoos su kakawa poogoo moso omu maga toosooloso goolee, odoos egee yayo moodoolai teiba doloso, Yesuye dia tei too ogoloso, odoos su kakawa poogoo mapoo takaso, “Mo odoos, nee goo tokenee ee olo hapoloso boobado buguso.”

<sup>6</sup> Esemee tei eligili odoos omapoo dobolone dieso nediliyo egeesee gooleemeleeso,

<sup>7</sup> “Odoos hagoso kaseme egeesee ka takayo? Yayo Godee dagadilame see, esino goo tokenee hapeli hedebe Godeeso.”

<sup>8</sup> Yesu o dio oso diayo dibada sooloo ma kulodu goolee melee goo ee gooleedoloso dimapoo egeesee takaso, “Niyo kasi maga nibada sooloo ma kulodu egeesee ka goolee malala?”

<sup>9</sup> Niba odoos su kakawa poogoo hagee ege. Yimapoo goo kasee takalai oso sebe ka mololo? Ayo odoos su kakawa poogoo mapoo ‘Nee tokenee ayo olo boobado buguso,’ dee takooga, o tokenee boobado bugu ee niyo gooleedalame. Esino ayo yimapoo takoo ‘No toboloso nee kida tolososo di,’ daga, yo toboloso duga, odoos tekepo peli kitulugu amapoo molo doloso niyo gooleedalaiso.

<sup>10</sup> Esino Odoos Holo amapoo kitulugu olo teneeso, mipoo hamapoo goo tokenee hapoloso boobado bigilei goo ee niyo ogoloso gooleedalame, ayo nimapoo eligileiso.” Osoloso yayo odoos su kakawa poogoo mapoo egeesee takaso,

<sup>11</sup> “No hogabuloso nee kida tolososo mosopoo di,” diso.

<sup>12</sup> Diayo balaga molome, odoos su kakawa poogoo hogabuloso, o kida tolososo saga diso. Diayo odoos su kakawa poogoo oso toboloso

di ogoloso diya howoogadooso. Osoloso Godee mapoo goomoga poudooso. Osoloso diayo egeesee takaso, “Iba daga goo hageesee koo egeeli.”

*Yesuye Libai idoo goo*  
(*Mat 9:9-13; Luka 5:27-32*)

<sup>13</sup> Yesu Gelili abei palaga maga see wedi dimeleeno, odoos susuga sibilesos yimapoo mooloogoodoome, yayo Godeeyo to dimapoo eligi meleeso.

<sup>14</sup> Yesu abei palaga dulone egeino, odoos Alpiyes eyo owolo Libai tekisi molee misigeli moso kulodu badoboome egeiso. Osoloso Yesuye yimapoo takaso, “Ama hamamee sibe.” Esemee Libaiye toboloso Yesuye di hamamee diso.

<sup>15</sup> Habe Yesu Libaiyo mosopoo badebeino, tekisi molee misigeli odoos bei sabolo, goo tokenee teli odoos abo sabolo, osoloso Yesuwo hamamee dili odoos sabolo, Yesubolo nei nameleeso. Odoos bei hageesee oso yimapoo hamamee dili odoos.

<sup>16</sup> Esino Yesu tekisi molee misigeli odoos sabolo, osoloso goo tokenee teli odoos sabolo nei namolome, tei eligili Pelisi odoos oso ogoloso, o hamamee dili odoos mapoo egeesee woosaso, “Bei kasi maga Yesuye tekisi molee misigeli odoos sabolo goo tokenee teli odoos sabolo nei nolone ka bada-bala?”

<sup>17</sup> Esemee Yesuye to hagee duloso nei dimapoo egeesee takaso, “Odoos paile poogoo ee melesenee neli odoos mapoo koo diya. Esino odoos paiye melesenee neli odoos mapoo ka diya. Ayo simi hagee, Godeeyo howo tekepo teli odoos doloso gweli odoos ee gilimalame ka sibile. Esino tokenee teli odoos doloso gooleedoo odoos ee gilimadoloso Godee mapoo sibilame ka simi.”

*Nei tei doloso dabalai goo*  
(*Mat 9:14-17; Luka 5:33-39*)

<sup>18</sup> Biame aboso Yonee odoos howo oluguli o hamamee dili odoos sabolo, osoloso Pelisi odoos oso Godee mapoo

takolone dobolone, nei tei doloso debeliso. Biame hedebeeso odoo aboso sibilesa Yesu mapoo egeesee woosaso, “Yoneeyo hamamee dili odoo sabolo, osoloso Pelisi odoowo hamamee dili odoo oso, nei tei doloso debeliso. Bei kasi maga nee hamamee dili odoo ee nei tei delega ka dabala?” diso.

<sup>19</sup> Esemee Yesuye dimapoo wudu takolone nei egeesee takaso, “Sobo hulei odoo oso sobo hulame nei mopoodoo doloso o odoo gilimileiso. Egeeseega o odoo susuga sibilesa gooholone nei tei doloso dabalaisomo? Haye. Diba goomoga sabolo sobo huli odoo sabolo hodobo dobolone nei nolone hodobo dabalaiso.

<sup>20</sup> Esino biame heeso sobo huli odoo ee dimaga peegoo ido duga, diba nei tei doloso dabalaiso,” diso.

<sup>21</sup> Yesuye wudu takolone see egeesee takaso, “Edebeeyo dugo nape mapoo dugo dia koodoloso omapoo opodoloso koo dusiya. Bei, dugo egee hapoloso magooga, dugo dia oso gawoolone sesegawe oso, dugo nape ee tologodoloso ou toowa moodoolaiso.

<sup>22</sup> Osoloso see edebeeyo wain i dia katolo gout be koloso moodoo nape mapoo koo salama seeya. Bei, wain i dia oso kitulugu oso katolo be gout koloso moodoo nape ee gabuguga, wain i ee hodalaiso. Osoloso katolo gout be koloso moodoo ee tokenee palaiso. Esiga wain i dia ee medee katolo gout be koloso moodoo dia mapoo salama salai tekepo,” dee takaso.

*Yu odoowo hasali biame goo  
(Mat 12:1-8; Luka 6:1-5)*

<sup>23</sup> Yu odoowo hasali biame heeso, Yesu o hamamee dili odoo sabolo witi wo ko segei ee ma kuloduga diyadaga meleeso. Osoloso Yesu o hamamee dili odoo oso witi wo ko gooloogaloso nalagamo diyadeeso.

<sup>24</sup> Esemee Pelisi odoo oso ogoloso Yesu mapoo egeesee woosaso, “No ege, bei kasi maga nee hamamee dili

odoo oso iyo hasali biame mapoo witi wo ko ka gooloogayo? Diayo ibada tei gababuoso,” diso.

<sup>25</sup> Yesuye nei egeesee takaso, “Wiligi odoo taba Deibidiye o odoo sabolo houdume, Deibidiye goo moodoo ee Godeeyo toso booka mapoo hogugu, niyo hesigeleyo?

<sup>26</sup> Abayata yayo Godeeyo tei moso wiligi odoo toboloso badebei omapoo, Deibidiye Godeeyo tei moso ma kulodu gadilesa tei wo tolosa o odoo sabolo neso. Esino tei wo hagee ibada tei ee dodolone, Godee ogo odoo ogo doloso domo debeli odoo hedebe oso nali. Esino Deibidiye o odoo sabolo wo ne oso tei magoo ee gababiaso.

<sup>27</sup> Godeeye edebeeyo hasali biame ee pidilame ka moodele. Godeeye odoo pidilame hasali biame ka moodoo.

<sup>28</sup> Esiga niyo hasali biame egee Odoo Holo ayo wiligi doloso ka badoso,” diso.

### 3

*Yesuye odoo dee hodio seeseegedoo poogoo tekepo moodoo  
(Mat 12:9-14; Luka 6:6-11)*

<sup>1</sup> Yesu see Yu odoowo howo gisili moso ma kulodu gapeleso egeino, odoo dee hodio seeseegedoo poogoo badoboome egeiso.

<sup>2</sup> Pelisi odoo aboso Yesu tokenee odoo dalame, Yesuwo goo ee medee balagamo silesibiso. Egeeseelone Yesuye dia hasali biame mapoo odoo dee hodio seeseegedoo poogoo tekepo moodabeleso bologolone debeiso.

<sup>3</sup> Esemee Yesuye odoo dee hodio seeseegedoo poogoo mapoo egeesee takaso, “No bia omaga tebee, odoo susuga oso agalame.”

<sup>4</sup> Osoloso Yesuye Pelisi odoo mapoo egeesee woosaso, “Ibada tei goo oso ibada hasali biame mapoo ogooo goo takoosomo? Biame omapoo goo tekepo talai ee

tekepowo? O, goo tokenee talai ee tekepowo? Osoloso tei goo oso imapoo ibada hasali biame omapoo odoo gie badeli pidilei goo ee takoosomo? O, odoo gie badeli wooloomalai goo ee takoosomo?" diso. Esino Pelisi odoo oso Yesu mapoo to nei takele.

<sup>5</sup> Dibada sooloo ma kulodu mesili goo mauwe poogoloso debeli ogoloso, Yesuye sooloo deleme kamana sabolo dimapoo egeino, odoo dee hodio seeseegedoo poogoo ogoloso yimapoo egeese takaso, "Nee dee seeseegedoo poogoo egee see hoodode." Esem e odoo egee o dee hoododeme, dee egee tekepo paso.

<sup>6</sup> Esem e Pelisi odoo oso Yu odoowo howo gisili moso maga peegoo dileso, Helodeeyo mooloogoodoo odoo tugodoloso, diayo Yesu toloso wooloomalame diesono to mouso.

### *Odoo susuga oso Yesuye di hamamee di*

<sup>7-8</sup> Yesuye o hamamee dili odoo sabolo Gelili abei mapoo dime, odoo mooloogoodoo toowa oso Yesuye di hamamee diyadeeso. Odoo susuga oso goo Yesuye moodoo duloso yimapoo sibadeeso. Odoo susuga hagee mi opusomo opusomo di mi hamaga sibadee: Gelili mi toowa, Yudiya mi toowa, Yelusalem mosobia, Idumiya mi toowa, Yoden howo hodio hoogoo debeli Taya mi toowa sabolo Saidon mi toowa omaga sibadeeso.

<sup>9-10</sup> Esem e Yesuye odoo paigiga abo tekepo moodome weido diso, osoloso odoo paigiga abo oso yimapoo sigilame hegi pupugamo sibume, yayo o hamamee dili odoo mapoo takaso, "Niba du hee tosibe, bei abei palaga omapoo odoo diya mooloogoo deeyaga," diso.

<sup>11</sup> Odoo bo holo paladee oso Yesu ogoga, diayo o homo beiyopoo gauwuloso goolone egeese takeliso, "No Godeeyo owoloso," diso.

<sup>12</sup> Esem e Yesuye odoo bo holo paladee omapoo to kitulugu sabolo egeese takeliso, "Nayo odoo abo mapoo a Godeeyo owolo dee na takee," dee takeliso.

### *Yesuye odoo 12 gilimadoo (Mat 10:1-4; Luka 6:12-16)*

<sup>13</sup> Yesu mubi ma dokodoo peleso yayo goomoga odoo hesigaloso yayo gilimademe, diba yimapoo sibadeeso.

<sup>14</sup> Yesuye odoo 12 hesigaloso dimapoo egeese takaso, "Niba abolo sile sibileiso, osoloso ayo niba diye dalaiso, Godeeyo to takomo sile sibilame.

<sup>15</sup> Osoloso, ayo nimapoo kitulugu tenelaiso, odoo bo holo pala peegoo hasisilame."

<sup>16</sup> Yesuye gilimadoo odoo 12 dia hu hagoso: Saimon (odoo hagee Yesuye o hu hee Pita hediso);

<sup>17</sup> osoloso Sebediyo owolo bakadio Yemes dio omolo Yonee dio (Yesuye hu hee hedi Bowaneges. Hu eyo bei ee to kei wei masi weli);

<sup>18</sup> osoloso Endulu, Pilipi, Batolome, Matiyo, Tomas, Alpiyeseeyo owolo Yemes, Tadiyes, Loum gamalee mapoo ha teli odoo Saimon-Selot,

<sup>19</sup> osoloso Yudas-Iskaliyot (yayo hamamee Yesu ha teli odoo dimapoo tiasooso).

### *Yesu dio Belsebul dio (Mat 12:22-32; Luka 11:14-23; 12:10)*

<sup>20</sup> Esem e Yesu o odoowo moso mapoo wedi dileso badoboome, odoo susuga oso see diya mooloogoodooso. Esem e Yesu sabolo o hamamee dili odoo sabolo diayo nei nalai biame egele.

<sup>21</sup> Esem e o soosooso goo egee duloso, yo halaboomo sila pele dolone, yo dibada mosopoo ido dilame sibadeeso.

<sup>22</sup> Esino tei eligili odoo Yelusalem maga sibadee oso egeese takaso, "Yesu yo bo dia wiligi odoo taba Belsebul (Saiten o hu hee) o kulodu

badoso. Esiga yayo bo wiligi taba oso kitulugu maga bo holo peegoo hasiso bugulone ka silo.”

<sup>23</sup> Esemé Yesuye tei eligili odoó gilimadoloso wudu takolone egeesee takaso, “Saiten odoó ma kulodu badebei dieso nediliyo peegoo kasee hasiso bigileiyo? Eli mauwe.

<sup>24</sup> Mi toowa mapoo debeli odoó oso abo puloso dieso nediliyo ha toga mi toowa egee malaime, tokenee palaiso.

<sup>25</sup> Osoloso soosoo heeso abo puloso dieso nediliyo ha toga soosoo egee dabalaime, tokenee palaiso.

<sup>26</sup> Osoloso Saiten eyo nediliyo o odoó sabolo ha toga, yayo kitulugu sagelaimé, omapoo mauwe palaiso.

<sup>27</sup> Esiga odoó heeso kitulugu odoó eyo mosopoo bi heli talame gooleega, yo daga kitulugu odoó tiso tiama-galaiso. Osoloso hamamee o moso kulodu peleso, o bi heli talaiso.

<sup>28</sup> Esiga ayo nimapoo taka, goo tokenee susuga edebeeeyo teli sabolo, osoloso to tokenee Godee mapoo takeli ee Godeeye hapoloso boobado bigileiso.

<sup>29</sup> Esino odoó agayo Dio Tei eyo goo maga to tokenee takooga, o goo tokenee egee hapalaime, o goo tokenee moloso kookaiyo osee malaiso.”

<sup>30</sup> Yayo goo hagee dimapoo takaso, bei diayo yo bo holo paladee dee takeme.

*Yesuwo owee sabolo omolo dio sabolo*  
(Mat 12:46-50; Luka 8:19-21)

<sup>31</sup> Yesuwo owee sabolo omolo dio Yesuye eligimelee moso mapoo peledabaso. Diba Yesubolo to kalame peegoo tebisa molome, odoó heeso Yesu takalame moso kulodu gadiso.

<sup>32</sup> Esemé odoó susuga Yesubolo debei odoó diayo ogoloso Yesu mapoo egeesee takaso, “Noowee sabolo no molo dio oso peegoo no esia molo.”

<sup>33</sup> Yesuye dimapoo eligilame to nei woosaso, “Mo wee sabolo molo dio odoó ogumo?”

<sup>34</sup> Osoloso see Yesuye odoó buluma omapoo ogogolone egeesee takaso, “Hamapoo ege, hagee mo wee sabolo molo dio oso.

<sup>35</sup> Odoó agayo Godeeye goomoga goo tomo siloga, diba tei molo dio osoloso mo wee dio oso.”

## 4

*Witi ko segeli odoó eyo goo maga wudu taka*  
(Mat 13:1-9; Luka 8:4-8)

<sup>1</sup> Yesuye Gelili abei palaga odoó susuga mapoo see tobu eligimeleeso. Esino odoó susuga yimapoo mooloo-goodeme, yo du ma kulodu mele-doboloso buloso pepooko hoogoo dileso omaga to takaso.

<sup>2</sup> Yesuye wudu taka susuga dimapoo eligiliso. Yayo eligilone dimapoo takaso,

<sup>3</sup> “Niba dui. Odoó hee ko segelame diso.

<sup>4</sup> Yo omapoo ko kukobugumo sileeno, ko abo eli domopoo misiged-ibaso. Esemé só aboso sibilesó neso.

<sup>5</sup> Osoloso ko abo yugogisi mi mapoo misigedibaso. Esemé mi sebeaga saga palaso.

<sup>6</sup> Esino osoko pa oso dei moodoome siligaloso wediaso. Bei, too mi ma kulomoo gameilega.

<sup>7</sup> Osoloso ko abo we ti bei kookoone poogoo omapoo misiged-ibaso. Esemé we ti ko sabolo palaso. Esino we tiso ko eyo bou tiademe dadailoso ko pele poogooso.

<sup>8</sup> Osoloso ko abo mi medee tekepo mapoo misigediba oso medee tekepo kauwa palaso. Osoloso ko paso, su aboso ko 30 egeesi paso, osoloso abo ko 60 egeesi paso, osoloso abo ko 100 egeesi paso.”

<sup>9</sup> Yesuye egeesee takaso, “Niba dubolobolo, esiga ayo hagee takoo medee hoodo dui.”



*Yesuye wudu taka goo eyo bei  
(Mat 13:10-17; Luka 8:9-10)*

<sup>10</sup> Hamamee Yesu obusomo bade-beino, o hamamee dili 12 odo sabolo, osoloso odo abo yimapoo mooloogoo doloso debei odo oso yimapoo, yayo wudu taka goo eyo bei woosaso.

<sup>11</sup> Esemé Yesuye nei dimapoo egeese takaso, “Godeeye wiligi doloso badeli goo ee daga mada meleeso. Esino nimapoo woola yilige bigileiso. Esino peegoo debeli odo mapoo ayo wudu takeliso.

<sup>12</sup> Esiga Aisayaye taka hagee peegoo debeli odo maga taka, ‘Diayo medee hodu dilesa agalaiso.

Esino goo eyo bei diayo ogoloso gooleedalaime.

Osoloso diba medee hodu dilesa to taka duleiso.

Esino goo eyo bei diayo medee gooleedalaime.

Diayo gooleedoo diepi, dibada goo tokenee maga miligi pialoso, Godeeye goo tokenee hapoloso boobado bigiliyo,’ diso.”

*Yesuye ko segei eyo bei taka  
(Mat 13:18-23; Luka 8:11-15)*

<sup>13</sup> Yesuye o hamamee dili sabolo odo abo dimapoo egeese takaso, “Bei kasi maga niba wudu taka hagee medee kibiya gooledelega ka pagala? Wudu taka hageeyo bei niyo medee kibiya gooledelega poogooga, wudu taka abo nimapoo ayo takooga, niyo kasee gooleedalaisomo?”

<sup>14</sup> Ko edebeeyo kukobigili ee Godeeyo to oso, osoloso yayo to egee odo mapoo takeliso.

<sup>15</sup> Esiga odo abo ko oso eli domopoo misigediba egeesi masi doso. Diba Godeeyo to duliso. Esino Saitenso saga sibilesa Godeeyo to dibada sooloo ma kulodu melee yayo peedee deliso.

<sup>16</sup> Osoloso odo abo ko yugogisi mi mapoo misigediba egeesi masi

doso. Diba Godeeyo to taka duloso goomoga sabolo saga teliso.

<sup>17</sup> Esino Godeeyo to oso dia sooloo ma kulodu too medee koo meili. Esiga diayo Godeeyo to duloso biame deiyepo mapoo tei teliso. Esino diayo Godeeyo to mapoo tei too goo maga hegi goo sabolo osoloso dala goo oso dimapoo siboga, diayo Godeeyo to mapoo tei too goo ee saga pegeliso.

<sup>18</sup> Osoloso odo abo ko oso daga we ti kauwe kadee mapoo misigediba egeesi masi doso. Diba Godeeyo to duloso tei teliso.

<sup>19</sup> Esino mipoo hageeyo gie badeli goolee sabolo, osoloso bi bei doloso badalai goolee sabolo, osoloso tokenee goo goolee sabolo oso dibada tei too tokenee peliso. Egeesi maga diayo tei too goo oso homokoko masi koo peli.

<sup>20</sup> Osoloso odo abo ko mi tekepo mapoo misigediba egeesi masi doso. Diayo Godeeyo to duloso tei teliso. Osoloso diba Godeeyo to duloso dibada sooloo ma kulodu Godeeyo to oso homokoko masi peliso. Esiga odo aboso homokoko masi 30 egeesi peliso, osoloso aboso homokoko 60 egeesi peliso, osoloso aboso homokoko 100 egeesi peliso.”

*Keme maga wudu taka goo  
(Luka 8:16-18)*

<sup>21</sup> Osoloso Yesuye dimapoo wudu takolone woosaso, “Odo heeso keme pouloso gadeebugu ee gooloo-goolame, tolo ma hemidu o, debi ma hemidu mada mageliso? Haye, yo keme pouloso dokodoo woola mageliso.

<sup>22</sup> Goo susuga epedee hamapoo mada egee molo, see hamamee gooleedalame gadeebugu mapoo woola peledabalaiso.

<sup>23</sup> Niba dulubolo, esiga ayo hagee takoo medee hoodo dui.”

<sup>24</sup> Osoloso Yesuye dimapoo egeese takaso, “To niyo du medee goolee. Niba to hagee medee kibiya

gooleedoga, goo abo niyo medee gooleedalaiso.

<sup>25</sup> Esiga to taka duli odoo mapoo Godeeye goo goolee tekepo bei tenelaiso. Esino edebeeyo mo to dulega poogooga, Godeeye yimapoo goo goolee tekepo pepooko egee molo see eyo peedee dalaiso.”

*Yesuye witi ko oso pala omaga wudu taka*

*(Mat 13:31-34; Luka 13:18-19)*

<sup>26</sup> Yesuye see wudu takolone egeesee takaso, “Godeeye wiligi doloso badeli goo ee egeesi masi moloso. Odoo heeso witi ko o homolee mapoo segeiso.

<sup>27</sup> Osoloso yo biame susuga, gesi susuga tialo hogabuo tialo hogabuo dolone witi ko oso pala, yo gooleedele.

<sup>28</sup> Witi ko segei eyo mi naga obusomo peliso. Osoloso kauwulone daga bou gasibiliso, osoloso du teliso, osoloso hamameedee ko peliso.

<sup>29</sup> Witi ko segei polososo telegeega, segeli odoo oso dileso gwaliso.”

*Ko pepooko masted deli maga wudu taka*

<sup>30</sup> Yesuye egeesee takaso, “Godeeye wiligi doloso badeli goo ee kaseeyo? Ayo ogoogo maga Godeeye wiligi doloso badeli goo ee nimapoo ka eligileiyo?”

<sup>31</sup> Esiga Godeeye wiligi doloso badeli goo ee egeesi masi moloso. Odoo heeso ko pepooko masted deli todileso o homolee mapoo segeiso.

<sup>32</sup> Esino ko abo ma kulodu ko masted deli hagee diya pepooko. Esino ko pepooko oso bou pisoloso kauwuga, homolee ee ma kulodu homo su oso toowa malaiso. Osoloso sóso omapoo sibilesoso o dee mapoo ou tegelaiso.”

<sup>33</sup> Yesuye odoo mapoo wudu takolone, Godeeye to takomo siliso. Esemee wudu taka oso dibada goo goolee sabolo teibaso.

<sup>34</sup> Yayo odoo susuga mapoo hedebe wudu takemeliso. Esino Yesu o hamamee dili odoo sabolo diesono

dobolone, yayo wudu taka eyo bei ee dimapoo takeliso.

*Yesuye i sabolo howo ki sabolo hamaga taka*

*(Mat 8:23-27; Luka 8:22-25)*

<sup>35</sup> Biame hedebe omapoo osoko olo moume, Yesuye o hamamee dili odoo dimapoo egeesee takaso, “Iba abei hodiokoo dalo soowoomo,” diso.

<sup>36</sup> Esemee Yesuye odoo abo poogoloso, hedebe o hamamee dili odoo sabolo du maga abei daso. Esino odoo abo du hee mapoo toboloso hamamee daso.

<sup>37</sup> Diba olo abei domopoo damolome, i toowa sibume, howo ki toowa simiso. Osoloso howo ki toowa oso sibulone, dibada du ma kulodu howo sasooso. Esiga diba abei osee damolome, howo sasoo oso dibada du howomoo owulame siso.

<sup>38</sup> Esino Yesu yo du osio mapoo wolomai wolomaloso tiameleeso. Esemee o hamamee dili odoo diayo yo tidibuguloso yimapoo egeesee takaso, “Eligili odoo, iba howomoo meilame hagee see, nayo iba sooloo dolosomo?”

<sup>39</sup> Esemee Yesu yo tia hogabulososo tobudulone, i sabolo howo ki sabolo omapoo egeesee takaso, “Epedee hamapoo koodobie!” Esemee i sabolo howo ki sabolo o to duloso, saga koodobiaso.

<sup>40</sup> Esemee see Yesuye o hamamee dili odoo dimapoo egeesee takaso, “Niba kaseega ka ebiala? Niba amapoo tei too meyo?”

<sup>41</sup> Esemee Yesu o hamamee dili odoo diba diya obume, diesono nei woosa nei woosa dolone egeesee takaso, “Hagee odoo ogumo? Yayo i sabolo howo ki sabolo omapoo takeme o to duloso koodobiaso.”

## 5

*Yesuye odoo bo holo pala tekepo moodoo*

*(Mat 8:28-34; Luka 8:26-39)*

<sup>1</sup> Osoloso Yesu o hamamee dili odoo sabolo Gelili abei daso. Osoloso

dibada du Gelasa mosobia dibada mi su mapoo oluguso.

<sup>2</sup> Osoloso diba du olo oluguloso, Yesu yo mubi dokodoo polomeleeno, odo bo holo pala oso odo bi maga Yesu mapoo simiso.

<sup>3</sup> Odo hagee biame susuga odo bi mapoo badeli, yo kitulugu toowaga edebeeyo yo ki tiso koo tialegeeli.

<sup>4</sup> Biame susuga o homo sabolo dee sabolo ki tiso tialogoloso magooga eyo kitulugu oso ki ti kokisa bigiliso. Esiga edebeeyo yo balai eli opupa meli.

<sup>5</sup> Biame susuga osoloso gesi susuga odo bi mapoo osoloso esia mapoo eyo nediliyo yoso kolo kookoome gwa sabolo siliso.

<sup>6</sup> Yesu eli sage hoogooga sibu-molome, odo yo Yesu ogoloso yo tugodalame hoguo diso. Osoloso o homo beiyopoo gawuaso.

<sup>7-8</sup> Esem Yesuye yimapoo egeesee takaso, “Bo holo, no odo yimaga peegoo gadi.” Esino odo bo holo pala oso toso neligidi egeesee takaso, “Yesu, dokodoo badeli Godeeyo owolo, nayo amapoo ogo goo moodoolame ka simiyo? Godeeyo goo maga nayo amapoo dala toowa na tenee!”

<sup>9</sup> Esem Yesuye yimapoo egeesee takaso, “Nee hu ogumo?”

Esem odo oso to nei yimapoo egeesee takaso, “Mo hu Bei. Bei, iba bei odo hageeyo kulodu.”

<sup>10</sup> Osoloso bo holo oso Yesu mapoo see howa see howa diso, bo holo mi hee mapoo seesee peegeeyaga.

<sup>11</sup> Esem koola omapoo esia ma dokodoo be hu mooloogoodoo toowa oso mi namo silesibiso.

<sup>12</sup> Esem bo holo odo ma kulodu debei oso Yesu mapoo see howolone egeesee takaso, “Nayo iba be mapoo palame seesee pagalai soowayo?” diso.

<sup>13</sup> Esem Yesuye diba be ma kulodu gasoowadee neme, bo holo odo ma kuloduga galaga sibilesi see be ma kulodu soowadeeso. Esem be bei 2,000 egeesi oso

esia dokodooga abei mapoo kukulo meilesi, howomoo wediaso.

<sup>14</sup> Esem be bali odo oso goo hagee ogoloso kukulo dilesi, dia mi mapoo osoloso mi pepooko abo mapoo goo egee takomo diso. Esem odo susuga oso to hagee duloso, diba agalame sibadeeso.

<sup>15</sup> Odo susuga oso Yesu mapoo sibilesi mooloogoodoo. Esino odo bo holo pala see tekepo poloso, goo tekepo gooleme dugo tekepo kaloso, Yesubolo badoboome ogoloso diya ebiaso.

<sup>16</sup> Esem be bali odo diayo goo odo mapoo peledaba sabolo be mapoo peledaba sabolo ogoloso odo susuga mapoo takaso.

<sup>17</sup> Esem odo mooloogoodoo susuga oso to hagee duloso, Yesu mapoo see howa see howa diso, “No ibada mi hamaga peegoo di,” diso.

<sup>18</sup> Yesu dilame du mapoo too-boome, odo bo holo pala Yesuye tekepo moodoo oso Yesu mapoo egeesee howaso, “A nobolo dilei goomogo.”

<sup>19</sup> Esino Yesuye yimapoo egeesee takaso, “Haye, no mosopoo wedi dilesi, Godeeye no sooloo dolone namapoo goo toowa moodoo goo ee nemisi dimapoo oposisi,” diso.

<sup>20</sup> Esem odo yo see abaga wedi dino Dekapolisi mi mapoo mosobia 10 mapoo takomo diso. Odo susuga oso to yayo taka ee duloso diya howoogadooso.

*Yesu mapoo tei teme nei yayo odo paiye moodoo*

*(Mat 9:18-26; Luka 8:40-56)*

<sup>21</sup> Yesu o hamamee dili odo sabolo abei hodiokoo dalo sibume, abei palaga mapoo odo susuga oso yimapoo mooloogoodoo.

<sup>22</sup> Mi omapoo Yu odoowo howo gisili moso gibadeli odo, o hu Yailas, yayo Yesu ogoloso o homo beiyopoo gawuaso.

<sup>23</sup> Osoloso yayo see Yesu mapoo howolone egeesee takaso, “Mo sobo

holo paiye moodoolame, yo talai koola taba. Esiga nee deeso yo sigilame sibe, yo paiye wediloso, see gie badalame.”

<sup>24</sup> Esemé Yesu yibolo dime, odoo mooloogoodoo susuga oso hamamee yo pupugamo diso.

<sup>25</sup> Osoloso mooloogoodoo ee ma kulodu sobo aso woolooma oso sawo dimeli ososee dugo 12 poogooso.

<sup>26</sup> Sobo yo melesenee neli odoo bei mapoo diayo pidilame dugo susuga dimeliso. Esino diayo yimapoo dala toowa tenemeleeso. Osoloso yayo dimapoo melesenee talame, melesenee eyo nei magolone o molee susuga hosudooso. Esino yo sawo dimeli koodobilega see toowa poloso, sawo osee dimeliso.

<sup>27</sup> Esino sobo yo daga Yesuye odoo tekepo moodoomo sili goo ee duloso, yayo odoo mooloogoodoo ee ma kuloduga Yesu yima hamamee sibilesa o dugo sage yayo ka mapoo sigeso.

<sup>28</sup> Sobo yayo goolee Yesuwo dugo sigoga yo tekepo palai gooleeso.

<sup>29</sup> Yayo Yesuwo dugo sigime sawo dimeli saga koodobiaso. Esemé yo eyo egeesee gooleeso, “Sawo dimeli tekepo pa,” dee gooleeso.

<sup>30</sup> Esemé Yesu eyo gooleeno, odoo weidilame moodeli kitulugu yimaga peegoo di neme, yo odoo mooloogoodoo mapoo hodio bidi toboloso egeesee takaso, “Odoo agayo mo dugo sigoba?” diso.

<sup>31</sup> Esemé o hamamee dili odoo oso yimapoo egeesee takaso, “Odoo susuga oso nobolo hodobo dulone, no ka sigo domo du. Esiga nayo kasalame, ‘Odoo agayo mo dugo sigoba’ doloso ka takala? Bei, odoo susuga oso nama sigoso,” diso.

<sup>32</sup> Esino Yesuye odoo mooloogoodoo kulodu osee esia meleeso, yo odoo agayo sigebeleeso.

<sup>33</sup> Esemé sobo Yesuwo dugo sige oso eyono moodoo gooleebuguloso obulone, kikiliga sabolo sibilesa o

homo beiyopoo gasuwoloso badebeiso, osoloso eyo goo moodoo Yesu mapoo takaso.

<sup>34</sup> Esemé Yesuye nei yimapoo egeesee takaso, “Mo holo, nayo amapoo tei too maga no olo tekepo paso. Esiga no mesie sabolo di. No olo tekepo paso,” diso.

<sup>35</sup> Osoloso Yesu to osee takomolome, odoo aboso Yailaseeyo moso abaga sibilesa Yailas mapoo egeesee takaso, “Nee sobo holo olo ta moloso. Esiga nayo eligili odoo hamapoo wulo goo mauwe na ido sibe,” diso.

<sup>36</sup> Esino Yesuye goo hagee duloso Yailas mapoo egeesee takaso, “No haga na ebi, wulo amapoo tei te.”

<sup>37</sup> Osoloso Yesuye egeesee takaso, “Odoo susuga, niba debee,” doloso hedebe Pita, Yemes, Yonee, osoloso Yailas esee Yesubolo diso.

<sup>38</sup> Diba abaga dino Yailas eyo moso mapoo peledoboloso egeino, odoo susuga oso to boowa sabolo pupusiga molome egeiso.

<sup>39</sup> Yesuye moso kulodu gadilesa odoo susuga mapoo egeesee takaso, “Niba kaseega to boowa sabolo ka pupusiga malala? Sobo holo hagee koo tamoloso. Esino yo wulo tia moloso,” diso.

<sup>40</sup> Esemé odoo susuga oso to Yesuye taka ee duloso yiligaso.

Esemé Yesuye odoo susuga mapoo egeesee takaso, “Niba moso kuloduga peegoo galagadi,” diso. Osoloso Yesu yo sobo holo oso tia melee debi mapoo dulone, hedebe oma dio owee dio, osoloso o hamamee dili odoo sabolo kulodu gadiso.

<sup>41</sup> Yesuye sobo holo ta o dee mapoo toloso yimapoo egeesee takaso, “Talita koum!” (To eyo bei sobo holo, no tebee.)

<sup>42</sup> Esemé sobo holo yo epedee omapoo saga toboloso siliso (yo dugo 12). Esemé oma dio owee dio, osoloso Yesu o hamamee dili odoo sabolo diya howoogadooso.



<sup>43</sup> Yesuye dimapoo to kitulugu sabolo egeesee takaso, “Ayo sobo holo hagee wedilame moodoo goo ee, niyo odoo hee mapoo na takee,” diso. Osoloso oma dio owee dio mapoo Yesuye egeesee takaso, “Sobo holo mapoo nei tenee,” diso.

## 6

### *Nasalet odoo oso Yesu gowe* (*Mat 13:53-58; Luka 4:16-30*)

<sup>1</sup> Yesu o hamamee dili odoo sabolo mi toowa omaga see o middee Nasalet mapoo diso.

<sup>2</sup> Osoloso Yu odoowo hasali biame hee mapoo howo gisili moso mapoo peleso, Godeeyo to odoo mapoo eligilame bei mooloogooso.

Eseme odoo susuga oso yayo eligi duloso diya howoogadolone, egeesee takaso, “Odoo hagosoo goo susuga hagee kasee gooleedoowo? Yo goo goolee medee tekepo. Yayo goo toowa opusomo di moodeli kitulugu kapoo toowo?”

<sup>3</sup> Yo wulo moso tegeli odoo, osoloso Meliyo owolo. Osoloso yo Yemes, Yosep, Yudas, osoloso Saimon egee bia dia emei. Osoloso obooba dio onosee ibolo hodobo hamapoo doso,” diso. Esiga diayo egeesee goolone, Yesuye eligi goo ee talai goweso.

<sup>4</sup> Eseme Yesuye dimapoo egeesee takaso, “Odooo susuga oso Godee maga to tolosoo kokodo takomo sili odoo eyo to duloso mesiliso. Esino o mosobia sabolo, osoloso o soosoo sabolo, osoloso o moso kulodu debeli odoo oso o to mapoo duloso koo mesili,” diso.

<sup>5</sup> Esiga bei diayo Yesu mapoo gowoolone tei too mauwe poogoloso debei ogoloso, yayo o mi omapoo goo toowa opusomo di moodele poo-gooso. Esino odoo paigiga abo o deeso sigime weido diso.

<sup>6</sup> Yesu diayo yimapoo tei too mauwe poogoo ogoloso diya hoowaso. Eseme Yesu Nasalet mi

omaga see poogoloso dileso mi pepooko abo mapoo Godeeyo to eligimo siliso.

### *Yesuye o hamamee dili odoo 12 diye di*

(*Mat 10:5-15; Luka 9:1-6*)

<sup>7</sup> Yesuye o hamamee dili odoo 12 gilimadoloso dieso nediliyo puloso bakadio tooboo, bakadio tooboo doloso mi opusomo opusomo di mapoo diye diso. Yayo diba diye dolone dimapoo kitulugu teneeso, diayo bo holo paladee ee peegoo hasisilame.

<sup>8</sup> Osoloso Yesuye dimapoo egeesee takaso, “Niyo dulone bi abo na todi. Esino niba wulo susu tolosoo diyadee. Osoloso nei sabolo, o sabolo, osoloso molee sabolo tolosoo na diyadee.

<sup>9</sup> Esino homo mapoo kali bi sabolo osoloso dugo niso ka hedebe egee mouloso dulone, dugo kali bi abo na te.”

<sup>10</sup> Osoloso Yesuye see dimapoo egeesee takaso, “Niyo mi omapoo dileso peledobooga, biame omapoo mosobia oso goomogolone moso teneega, moso hedebe omapoo doosoo mi hee mapoo dulone ka poogoo di.

<sup>11</sup> Osoloso niba mi hee mapoo duga, edebeeyo niba idilega poogoloso nibada to mapoo mesilega poogooga, mi egee poogoloso dulone, megegu nibada homo mapoo mologa omapoo te, Godeeye komonolone dimapoo dia goo tokenee eyo nei tenelai goo ee gooleedalame,” diso.

<sup>12</sup> Eseme Yesu o hamamee dili odoo diayo dileso, odoo susuga mapoo Godeeyo to takomo sile sibilone egeesee takaso, “Nibada goo goolee su wuduloso goo tokenee maga miligi pie,” diso.

<sup>13</sup> Osoloso bo holo odoo ma kulodu paladee diayo peegoo hasiso bugu dolone debeiso. Osoloso odoo paigiga sabolo diayo olipi iso dibada wiligi mapoo soome paigiga weido diso.

### *Yonee Odoo Howo Oluguli oso ta*

14 Mi susuga mapoo odoo susuga oso Yesuwo goo takomo dime, wiligi odoo taba Helodeeye duloso gooleedooso. Odoo aboso egeesee takaso, “Yo Yonee Odoo Howo Oluguli ta maga see hogabia, esiga kitulugu goo toowa hagee yima kuloduga tou ka to,” diso.

15 Esino odoo aboso egeesee takaso, “Yo Ilaya.”

Osoloso odoo aboso egeesee takaso, “Yo Godee maga to toloso kokodo takomo sili odoo hee daga badebei egeesi masi bado,” diso.

16 Esino Helodeeye goo hagee duloso yayo egeesee takaso, “Yonee Odoo Howo Oluguli, o wiligi kobugume ta odoo, yo see ta maga hogabia doo,” diso.

(Yonee telega badolone, daga goo peledaba hagoso.)

17-20 Biame heeso Helodeeye omolo Pilipiyo osobo Helodiyes peedee huso. Esem Yoneeye goo hagee ogoloso Helodee mapoo diya takolone egeesee takaso, “Nayo nomolowo osobo peedee hulei tekeponee,” diso. Esem Helodiyeseeye komonolone, Helodee mapoo dileso egeesee takaso, “Nayo Yonee neliga moso ma kulodu magee,” diso. Esem yayo Yonee neliga moso ma kulodu magalame, o ha teli odoo diye dee takeme, diayo dileso yo neliga moso mapoo magooso. Esino Helodiyes Yonee mapoo hegilone, yayo yo wooloomalame gooleeso. Esino yayo yo woolomele, bei Helodeeye Yonee woolomalai ebiaso. Yo gooleedooso, Godeeyo howo woola Yonee goo tokenee mauwe, osoloso yo odoo medee tekepo. Esiga yayo Yonee medee bameleeso. Yayo Yoneeyo to duloso goo diya tiadiliso, esino o to mapoo dulei goomogolone, o sooloo ma kulodu goomegeliso.

21 Esino hamamee Yonee wooloomalame biame tekeposo Helodiyes mapoo simiso. Helodee soomagoo biame mapoo wo toowa nalame, gamalee wiligi odoo tebisa sabolo,

osoloso o ha teli wiligi odoo tebisa sabolo, osoloso Gelili mi toowa ma kulodu wiligi odoo tebisaloso debei odoo sabolo Helodeeye gilimadoloso mooloogoodooso.

22 Diba wo nolone doboome, Helodiyeseeyo sobo holo oso diayo wo nolone debei moso ma kulodu gasibilesa, dimapoo goomoga tenelone habaso. Esem Helodeeye sobo yimapoo egeesee takaso, “Nayo goomoga goo amapoo takee, ayo bi egee namapoo tenelaiya,” diso.

23 Osoloso see Helodeeye tei yilone egeesee takaso, “Nayo goomoga goo amapoo takooga, ayo namapoo tenelaiso. Osoloso mi ayo hagee bamolo su sabolo nayo talai goomogoga, ayo namapoo tenelaiso.”

24 Esem sobo yayo owee Helodiyes mapoo dileso, yayo goomoga goo ee dulame diso.

Esem sobo owee Helodiyeseeye nei egeesee takaso, “Nayo goomoga Yonee Odoo Howo Oluguli eyo wiligi goomogo dee takee.”

25 Esem yayo oweeyo to duloso, saga wedi dileso Helodee mapoo egeesee takaso, “Epedee hamapoo Yonee Odoo Howo Oluguli eyo wiligi koodoloso tolo mapoo magoloso tosi-boga ee talai, a goomogo,” diso.

26 Helodeeye to hagee duloso yo diya gooheleso. Esino yo odoo susuga eyo howo woola mapoo eyo tei magoo ee gababilei ebiaso. Esiga yayo sobo o to mapoo gowelee.

27-28 Osoloso Helodeeye o ha teli odoo hee neliga moso gibali oso Yoneeyo wiligi koodolame diye diso. Esem yayo neliga moso mapoo dileso Yoneeyo wiligi koodoloso, odoo susuga oso agalame tolo mapoo magoloso, odoo howo woola tosi-bilesa sobo holo mapoo teneeso. Esem sobo yayo toloso owee mapoo teneeso.

29 Yonee o hamamee dili odoo oso goo hagee duloso, diayo sibilesa o

kou todilesa wulu odoo toga tooseli omapoo kulodu magooso.

*Yesuye sobo sabolo, holaiso sabolo, osoloso gisowe 5,000 mapoo nei pi*

*(Mat 14:13-21; Luka 9:10-17; Yon 6:1-14)*

<sup>30</sup> Yesuye diye di odoo 12 diba see wedige sibilesa, goo diayo moodoo sabolo osoloso goo diayo eligi susuga ee Yesu mapoo opusususo.

<sup>31</sup> Odoo susuga Yesuye badebei omapoo dile see sibo di oso, Yesu o hamamee dili odoo sabolo nei nalai biame tekepo egele. Esemee Yesuye o hamamee dili odoo mapoo egeesee takaso, "Iba ibusomo odoo mauwe poogoo mi mapoo dilesa hasalame dimo," diso.

<sup>32-33</sup> Esemee Yesu o hamamee dili odoo sabolo du ma kulodu bulumaloso, abei hodiokoo odoo koola mauwe mi mapoo dalo soowoolame moumeleeno, odoo abei palaga debei oso ogoloso gooleedooso. Esemee odoo susuga oso mi opusomo opusomo di maga Yesuye di mi mapoo malalo mili hoguga diyadeeso. Diba malalo dilesa balaga meleeno, Yesu o hamamee dili odoo sabolo du maga sibilesa gimagooso.

<sup>34</sup> Osoloso Yesu du maga mi mapoo pubalogoloso, odoo susuga oso mooloogoodoloso debei ogoloso, yayo diba diya sooloo dalaso, bei sipi be hu masi bali odoo mauwe poogoloso doboome. Esemee yayo goo susuga dimapoo eligiso.

<sup>35</sup> Osoko olo todobume, Yesu o hamamee dili odoo oso yimapoo sibilesa egeesee takaso, "Osoko olo todobuo. Osoloso mi iyo hagee do mapoo odoo mauwe. Esiga mi hamapoo nei mauwe.

<sup>36</sup> Esiga nayo odoo susuga egee do diyadee dee, diayo mosobia koola kee do mapoo dilesa nei dieso nalai ee moleeso talame," diso.

<sup>37</sup> Esino Yesuye o hamamee dili odoo mapoo nei egeesee takaso, "Diayo nei nalai niso toloso dimapoo tenee," diso.

Esemee diayo Yesu mapoo egeesee takaso, "Iyo nei toloso dimapoo teneega, molee ko\* 200 oso teli, esino iba molee mauwe."

<sup>38</sup> Esemee Yesuye dimapoo egeesee woosaso, "Diba wo kasolo molo-somo? Niyo agalame di."

Esemee diayo dilesa ogoloso, diayo yimapoo egeesee takaso, "Wo si dee tiadoo sabolo osoloso di bakadio moloso," diso.

<sup>39</sup> Esemee Yesuye o hamamee dili odoo mapoo egeesee takaso, "Odoo susuga mapoo egeesee takee, 'Niba mi mapoo pepooko mooloogoodoloso buluma mooloogoodoloso buluma,' dee takee," diso.

<sup>40</sup> Esemee diayo dimapoo takeme, diba mooloogoodoo opusomo opusomo doloso mooloogoodoo hee mapoo odoo 100, osoloso mooloogoodoo hee mapoo odoo 50 doloso bulumaso.

<sup>41</sup> Esemee Yesuye wo si dee tiadoo sabolo di bakadio sabolo toloso, Kei mi ma dokodoo bolone, Godee mapoo goomoga to takaso. Osoloso yayo wo popeiloso di sabolo agisaloso o hamamee dili odoo mapoo piso, diayo odoo susuga mapoo pilame. Esemee diayo wo si popei sabolo di hwei sabolo odoo susuga mapoo piso.

<sup>42</sup> Esemee odoo susuga oso nei teiba nega diya edigaso.

<sup>43</sup> Osoloso diayo nei naloso abo poogoo ee, Yesu o hamamee dili odoo oso misigamo dilesa bou tegei 12 egeesi metamagisaso.

<sup>44</sup> Osoloso sobo sabolo holaiso sabolo nei neso. Esino mooloogoodoo ee ma kulodu gisowe hesiga 5,000 oso nei ka ne.

*Yesuye howo dokodooga di  
(Mat 14:22-33; Yon 6:15-21)*

**6:30:** Luka 10:17    **6:34:** Num 27:17; Mat 9:36    **6:35:** Maka 8:1-9    \* **6:37:** molee ko hagee denaliyus deli ee, biame hedebe mapoo tou too eyo nei hedebe hageesee teliso.

<sup>45</sup> Diba nei nalaga koodobuloso, Yesuye o hamamee dili odoo malalo du maga Betesaida mi mapoo diye doloso, diba abei damolome, Yesuye odoo susuga dibada mi mapoo diye diso.

<sup>46</sup> Osoloso Yesuye odoo susuga diye doloso, yo obusomo Godee mapoo takalame mubi dokodoo palaso.

<sup>47</sup> Gesi domo o hamamee dili odoo dibada du maga abei domo damolome, Yesu yo obusomo mubi dokodoo badebeiso.

<sup>48</sup> Yesu mubi dokodoo badolone egeino, poo sabolo howo ki sabolo simi oso, o hamamee dili odoo dia du mapoo woome, diba kwasu sabolo du sulugamo diyadaga molome egeiso. Osoloso gesikolo kudi olo tadageme, yo howo dokodooga diba daga dilame dimeleeso.

<sup>49</sup> Esino o hamamee dili odoo diayo Yesu howo dokodooga dimelee ogoloso, diayo goolee boso siba bele dolone diya googaso. <sup>50</sup> Yesu o hamamee dili odoo oso yo ogoloso obugume, yayo dimapoo egeesee takaso, “Niba howaleege. Haga na ebi. Ayo siba.”

<sup>51</sup> Osoloso Yesu yo du ma kulodu daboogoome, howo ki sabolo poo sabolo saga koodobiaso. Esemé Yesu o hamamee dili odoo oso goo hagee ogoloso diya howogadooso.

<sup>52</sup> Diba Yesuwo kitulugu goolee-doo diepi, diba howoogelee pegeliyo. Esino diba howogadooso, bei dia goo goolee oso gooleedalai tebilega.

<sup>53</sup> Osoloso diba abei daloso abei hodiokoo Genesalet mi mapoo dibada du oluguso.

<sup>54</sup> Diba du oluguloso mubiyodoo dalaga poogoome, odoo omapoo tebisa melee oso yo kibiya hoodo egeiso.

<sup>55</sup> Odoo susuga mi opusomo opusomo di mapoo hoguga dileso, odoo paigiga dibada kida mapoo tiedigaloso Yesu mapoo emigado sibadeeso.

<sup>56</sup> Yesu mi opusomo opusomo di mapoo silime, edebeeyo odoo

paigiga kida mapoo tieduloso, bi teli go mapoo emigado sibilesi magooso. Esemé odoo paigiga oso Yesu mapoo howolone egeesee takaso, “Iyo wulo nee dugo su mapoo sigilei soowayo?” diso. Osoloso odoo paigiga oso Yesuwo dugo su mapoo sigime, odoo egee bia wegigadooso.

## 7

*Godeeye tei eligi goo sabolo edebeeyo tei eligi goo sabolo*  
(Mat 15:1-9)

<sup>1</sup> Biame hedebeeso Pelisi odoo sabolo osoloso tei eligili odoo abo oso Yelusalem mi maga sibilesi Yesu mapoo mooloogodooso.

<sup>2</sup> Osoloso diayo egeino, Yesu o hamamee dili odoo abo oso Yu odoowo tei dedelega poogoloso nei nalame, dibada dee howo koo hapagali.

<sup>3</sup> (Esino Yu odoo sabolo Pelisi odoo sabolo dibada adaga dia tei eligi goo ee dodolone, daga nei nalame dee howo hapagaliso.)

<sup>4</sup> Diba bi teli go mapoo bi toloso nala poogolone, daga dibada dee medee howo hapagaloso ka nali. Osoloso dibada adaga dia tei eligi goo ee dodolone, dibada kapu sabolo sesepeni sabolo osoloso disi sabolo howo hapagaliso.)

<sup>5</sup> Esemé Pelisi odoo sabolo osoloso tei eligili odoo oso Yesu mapoo egeesee woosaso, “Bei kasalame nee hamamee dili odoo oso ibada adaga dia tei eligi goo ee dedelega ka pagala? Diba dee howo hapegelega nei naliso,” diso.

<sup>6</sup> Esemé Yesuye nei dimapoo egeesee takaso, “Niba goo bakadio gweli odoo. Godee maga to toloso kokodo takomo sili odoo hee Aisayaye nibada goo maga tei goo takaso. Bei, yayo goo Godeeye taka egeesee hoguguso, ‘Odoo hagee bia oso dia magaso wulo gamenee amapoo goomogolone mo hu dokodoo



poudiliso. Esino dibada sooloo ma kulodu tei amapoo mesili goo ee mauwe.

<sup>7</sup> Diayo amapoo goomogolone mo hu dokodoo poudili goo eyo bei mauwe. Bei, diayo tei edebeeyo eligi goo ee ayo eligi masi see diayo odoo mapoo eligimo silesibiliso,' diso.

<sup>8</sup> Niba Godeeyo tei eligi goo ee poogoloso, see nibada adaga dia tei eligi goo ee deedeeso."

<sup>9</sup> Yesuye dimapoo see tobu egeesee takaso, "Niyo tei Godeeye eligi goo ee peegoo magoona, nibada adaga dia tei eligi goo ee talame.

<sup>10</sup> Esiga daga hoogoo Moseseeye tei goo Godee maga simi nimapoo tenee hagoso,

'Nama dio noowee dio oso to taka duloso dimapoo mesie. Esino odoo agayo ama dio owee dio mapoo to tokenee takooga, yo wooloomalaiso.'

<sup>11</sup> Esino niyo egeesee takeliso, 'Soowa, edebeeyo ama dio owee dio mapoo takoo, "Emegei, niba ayo pidileime, bei molee amapoo egee molo Godee mapoo tenelame siga. Molee egee ibada toso hedi koloban."

<sup>12</sup> Niyo odoo owee dio ama dio ee pidilei tei magooso.

<sup>13</sup> Niyo tei magoo ee dodolone Godeeyo tei magoo peegoo magolone ka doso. Osoloso niba goo abo susuga egeesi masi tomo silesiboso."

*Odoo sooloo ma kulodu Godeeyo howo woola tokenee peli goo*

*(Mat 15:10-20)*

<sup>14</sup> Esemé Yesuye odoo mooloo-goodoo see gilimadoloso, dimapoo egeesee takaso, "Odoo susuga niba, mo to hagee duloso medee gooleede.

<sup>15</sup> Esiga edebeeyo nei nali oso o sooloo ma kulodu Godeeyo howo woola tokenee koo peli. Esino odoo o sooloo ma kulodu goo gooleemeleso, to tokenee taka sabolo, osoloso yayo

goo tokenee tomo sili oso, o sooloo ma kulodu Godeeyo howo woola tokenee peliso. [

<sup>16</sup> Niba dulubolo, ayo hagee takoo niyo medee hoodo dui," diso.]\*

<sup>17</sup> Esemé Yesuye odoo mooloo-goodoo poogoo dilesó, moso kulodu gadime, o hamamee dili odoo oso dilesó yimapoo egeesee takaso, "Nayo wudu taka goo eyo bei imapoo medee takee," diso.

<sup>18-19</sup> Esemé Yesuye dimapoo egeesee takaso, "Niba goo eyo bei medee koo gooleedolo? Esiga nei niyo toloso nali oso nibada sooloo ma kulodu Godeeyo howo woola tokenee koo peli. Bei, nei egee sooloo ma kulodu koo gameli. Esino nayo nalo sooloogoloso see nee gemedei maga peegoo gadiliso." (Yesuye goo hagee takolone, yayo to kitulugu sabolo takaso, nei nali bi susuga nalai tekepo, diso.)

<sup>20</sup> Esino Yesuye see egeesee takaso, "Odoo o sooloo ma kulodu goo gooleemeleso, to taka sabolo, osoloso yayo goo tokenee tomo sili oso, o sooloo ma kulodu Godeeyo howo woola tokenee peliso.

<sup>21</sup> Esino o sooloo ma kuloduga goo tokenee susuga hagoso woola peledebeliso: tokenee gweli goo, osoloso sobo obuo sabolo giso kadiga sabolo goo heli teli goo, osoloso adaba bi heli teli goo, osoloso odoo wooloomali goo, osoloso adaba kooka sobo sabolo kooka giso sabolo goo heli teli goo,

<sup>22</sup> bi bei doloso badalai gweli goo, osoloso tokenee teli goo, osoloso emegei dimapoo gamenee takeli goo, osoloso odoo susuga eyo howo woola ebili goo talai, osoloso emegei dimapoo kweli goo, osoloso emegei dia goo maga to tokenee takeli goo, osoloso suwa peli goo, osoloso goo tekepo goolee me sili goo.

<sup>23</sup> Esiga goo tokenee susuga egee talame odoo o sooloo ma kulodu

**7:10:** Exo 20:12; 21:17; Deut 5:16    **7:15:** Diye 10:14-15    \* **7:16:** To hagee odoo abo oso taka Makaye hogugu dee takeliso, esino odoo bei oso taka Makaye hogugule dee takeliso.

gooleemeleso toga, o sooloo ma kulodu Godeeyo howo woola tokenee peliso.”

*Yu sobonee oso tei too  
(Mat 15:21-28)*

<sup>24</sup> Yesu o hamamee dili odoosabolo mi egee poogoloso, see Taya mi toowa koola mapoo diyadeeso. Osoloso yo dileso, odoosusuga oso yayo simi ogoloso gooleedeeyaga, moso hee mapoo kulodu gapeleso mada badebeiso. Esino odoosusuga oso yayo simi goo ee duloso, odoosaboo mapoo saga takomo dime, diba gooleedooso.

<sup>25-26</sup> Esemee Yu sobonee hedebe Ponesiya Siliya mi mapoo badeli oso Yesuwo goo ee duloso, yayo badebei mi omapoo simiso. Yayo sibilesos Yesuwo homo beiyopoo gauwuloso badolone egeesee hoowaso, “Mo sobo holo yima kulodu bo holo peleso badoso. Esiga nayo sibilesos o kulodu bo holo egee bado peegoo habigilame sibe,” diso.

<sup>27</sup> (Yu odoososo Yu odoonee mapoo so, dee takeliso. Osoloso Yu odoos ee takolone odoos holaiso, deliso. Esemee sobo yayo goo egee moodoolai kitulugu teiba doloso yimapoo tei too mala beleso agalame) Yesuyee sobo mapoo egeesee takaso, “Holaiso dia nei tolosos so mapoo tenelai tekeponee. Esino daga holaiso dimapoo nei tenelai tekepo,” diso.

<sup>28</sup> Esemee sobo hagoso Yesu mapoo nei egeesee takaso, “O. Lodee, nayo tei takoo. Esino so moso hemidu silesibulone, holaisos nei nolone kokou miyomoo mou ee nalagamo silesibiliso,” diso.

<sup>29</sup> Esemee Yesuyee sobo mapoo egeesee takaso, “Nayo amapoo to nei tekepo takaso. Esiga no mosopoo dileso nowolos sobo holo mapoo ege, yo tekepo badoso. Bo holo epedee o beliye ma kulodu mauwe,” diso.

<sup>30</sup> Esemee yo o mosopoo dileso, o sobo holo egeino bo holo o kulodu pala mauwe poogoloso, tekepo

polosos debi mapoo wulos tia molome egeiso.

*Yesuyee odoos dulu taba ibaya tekepo moodoo*

<sup>31</sup> Yesu o hamamee dili odoosabolo Taya mi poogoloso Saidon mi mapoo peledabaso. Osoloso diba see abaga dino Dekapolisi mosobia mapoo peledobolos, Gelili abei mapoo mousos.

<sup>32</sup> Osoloso odoos abosos odoos dulu taba ibaya Yesu mapoo idos sibilesos howasos, yayo o deesos sigilosos tekepo palame.

<sup>33</sup> Yesuyee odoos dulu taba ibaya odoos mooloogoodos omaga peegos idos dilesos, Yesuwo dees wolugulosos dulu taba ibaya eyos dulu os mapoo tulugulosos, makawos o dees mapoo pagas magolosos, odoos dulu taba ibaya eyos i mapoo sigesos.

<sup>34</sup> Osoloso Yesuyee Kei mi ma dokodoo bolone sooloo toowa polomelesos homodobulosos yimapoo o tosos egeesee takasos, “Epata!” (tos eyos bei ee yiliga magee).

<sup>35</sup> Esemee epedee omapoo dulu taba ibaya eyos dulu tekepo polosos tos takas o dulusos medees duso, osoloso o isos tos medees kalame bei mooloogosos.

<sup>36</sup> Osoloso Yesuyee odoos susugas mapoo takolone, goo yayo moodos ee na oposisidos dolos, dimapoo tos kitulugos sabolos takeliso. Esino yayo takolone diayos odoos abos mapoo na oposisidos dees takas poogolosos, see odoos abos mapoo oposisilisos.

<sup>37</sup> Esemee odoos susugas osos Yesuyee gos moodos dulosos diyas howoogadosos. Osoloso diayos see egeesee takasos, “Yesu gos susugas tomos sili medees tekepo. Iyo goolee edebeeyos odoos dulu tabagas ibayas tekepo koo moodoogamos silabelee dees. Esino yayo odoos dulu tabagas osoloso tos koo kalagalis yayo tekepo moodoogamos silisos.”

## 8

### *Yesuye odoo 4,000 mapoo nei pi (Mat 15:32-39)*

<sup>1-2</sup> Biame heeso Yesuye goo eligi ee dulame see yimapoo odoo susuga mooloogoodoloso debeiso. Esino nei mauwe poogoome, Yesuye o hamamee dili odoo gilimadoloso dimapoo egeesee takaso, “Ayo odoo susuga hagee diya sooloo dolo, bei diba abolo dobolone biame bakadio hedebe di poogooga. Esiga diayo nei nalai mauwe.

<sup>3</sup> Osoloso ayo diba nei tenel-ega, dibada mosopoo diyadee dee takooga, diba eli domopoo houdaso kitulugu me poogoloso howamada-galaiso, bei odoo abo dibada mi koola hapoonee,” diso.

<sup>4</sup> Esemé Yesu mapoo o hamamee dili odoo oso egeesee woosaso, “Nei mauwe, osoloso moso mauwe miwe poogoo mi hamapoo, iyo nei kamapoo toloso odoo susuga hamapoo ka tenelaiyo?” diso.

<sup>5</sup> Esemé Yesuye o hamamee dili odoo mapoo egeesee woosaso, “Nimapoo wo si kasolo molosomo?” dee takaso.

Esemé diayo nei egeesee takaso, “Imapoo wo si 7 moloso,” diso.

<sup>6</sup> Esemé Yesuye odoo susuga mi mapoo bulume diso. Osoloso yayo wo si 7 toloso Godee mapoo goomoga to takaso. Osoloso wo si popeiloso odoo susuga mapoo pilame, o hamamee dili odoo mapoo piso. Esemé diayo odoo mooloogoodoo susuga mapoo piso.

<sup>7</sup> Osoloso odoo mooloogoodoo ma kulodu di pepooko abo molo egeiso. Esemé Yesuye di toloso Godee mapoo goomoga to takoloso, o hamamee dili odoo mapoo teneme, diayo toloso odoo mooloogoodoo mapoo piso.

<sup>8</sup> Esemé odoo susuga nei ne oso diya edigime, diayo nei naloso abo poogoo ee, Yesu o hamamee dili odoo oso misigaloso, bou tegei ma kulodu soo bou 7 egeesi metamagisaso.

<sup>9</sup> Esiga biame omapoo odoo 4,000 oso nei egee neso. Osoloso diba nei naloso, hamamee Yesuye dibada mi mapoo diyadee, diso.

<sup>10</sup> Osoloso diba diye doloso, Yesu o hamamee dili odoo sabolo abei mapoo meilesa du ma kulodu bulumaloso, Dalmanuta mi mapoo dalo soowaso.

### *Pelisi odoo oso goo toowa opusomo di ee agalame goomoga (Mat 16:1-4)*

<sup>11</sup> Diba Dalmanuta mi mapoo soowooleso peledoboome, Pelisi odoo oso Yesu mapoo toso agadilame sibadeeso. Bei, diba goomogaso, Yesuye kitulugu egee tomolo tei Godee maga simibeleso kukuloso agalame. Egeesee meleso, diayo Yesu mapoo goo toowa opusomo di moodoo doloso takaso.

<sup>12</sup> Esemé Yesuye goo hagee duloso, yo diba gooheleme sooloo toowa polomeleso homodobuloso dimapoo egeesee takaso, “Bei kasi maga epedee biame hamapoo odoo susuga hagee do oso goo toowa opusomo di moodoo ee agalame ka woosaliyo? Esiga ayo nimapoo tei goo taka, ayo goo toowa opusomo di odoo epedee biame hamapoo hagee do omapoo niyo agalame see moodolaime,” diso.

<sup>13</sup> Osoloso Yesuye goo hagee takemelee koodobuloso, see o hamamee dili odoo gilimadoloso du mapoo meilesa, abei hodiokoo dalo soowaso.

### *Yesuye wo habili maga wudu taka (Mat 16:5-12)*

<sup>14</sup> Diba abei hodiokoo dalo soowoolone wo talai boobado bugunabu. Esino du ma kulodu wo si hedebe molome egeiso.

<sup>15</sup> Esemé Yesuye dimapoo kokodo takalame, wudu takolone egeesee takaso, “Niba obeeyamo! Bei, Pelisi odoo sabolo osoloso Helodee dibada goo ee wo habili masi moloso. Osoloso wo giedege sabolo wo habia

sabolo hamaga, wo giedege habia oso tokenee palaiso,” diso.

<sup>16</sup> Esemé diayo Yesuye taka duloso diesono to moulone egeesee takaso, “Iyo wo telega boobada poogoo simiga Yesuye iba ogoloso egeesee ka takoo,” diso.

<sup>17</sup> Esino diayo to moulone debei ee Yesuye ogoloso dimapoo egeesee takaso, “Bei kasi maga niyo wo telega boobada poogoo simi maga goo diya koudulone ka dabala? Esiga niba ayo kitulugu goo ee gooleedelege osee doso. Nibada sooloo ma kulodu goo ayo eligi ee gooleedoloso, nibada sooloo ma kulodu magalai diya kalawado?”

<sup>18-19</sup> Niba howo mauwega, egele ka pagala? Niba dulu mauwega, dule ka pagala? Niba ayo wo si dee tiadoo giso 5,000 mapoo pi goo ee boobadoolo? Diayo nei naloso, wo abo poogoome, niyo misigamo di bou tegei kasolo metamagisayo?” diso.

Esemé diayo nei egeesee takaso, “Bou tegei 12.”

<sup>20</sup> Esemé Yesuye see egeesee takaso, “Ayo odoo 4,000 mapoo wo si 7 populoso pi, wo abo poogoome, niyo misigamo di bou tegei kasolo metamagisayo?” diso.

Esemé diayo nei egeesee takaso, “Bou tegei 7.”

<sup>21</sup> Esemé Yesuye egeesee takaso, “Ayo odoo susuga mapoo wo pi goo ee niyo egeiso. Esino bei kasi maga Pelisi odoo sabolo Helodee dibada goo wo habili masi maga ayo hagee takoo niyo gooleedelega osee ka dabala?”

*Yesuye Betesaida mi omapoo odoo howo bakadio si tekepo moodoo*

<sup>22</sup> Osoloso diba Betesaida mi omapoo peledoboloso, odoo abo oso odoo howo bakadio si Yesu mapoo ido sibadeeso. Osoloso diayo Yesu mapoo howoolone egeesee takaso, “Odoo hagee nee deeso sigoloso yo tekepo pe,” diso.

<sup>23</sup> Esemé Yesuye o hamamee dili odoo sabolo dulone, yayo odoo howo bakadio si eyo dee mapoo toloso mosobia omaga yo peegoo ido diso. Osoloso Yesuye o howo mapoo makawo paganuloso, yayo odoo egeeyo howo mapoo sigoloso, Yesuye yimapoo egeesee woosaso, “No epedee bi susuga ogolo?”

<sup>24</sup> Esemé odoo yayo peegoo ogogolone egeesee takaso, “O, olo ogoso. Esino odoo silesibono medee koo ogo. Diba homo masi silesibo,” diso.

<sup>25</sup> Esemé Yesuye o deeso see odoo howo bakadio si eyo howo mapoo sigeme, olo epedee omapoo o howo tekepo poloso bi ogogolone egeesee takaso, “Bi susuga medee ogo,” diso.

<sup>26</sup> Yesu odoo howo bakadio si tekepo moodooloso, Yesuye yo tekepo moodoo odoo abo mapoo takelega pagalame, yo mosopoo diye dolone yimapoo takaso, “No duga mosobia kuloduga na di,” diso.

*Pitaye Yesuwo goo yilige bugu (Mat 16:13-20; Luka 9:18-21)*

<sup>27</sup> Yesu o hamamee dili odoo sabolo abaga mosobia koola Kasaliya-Pilipai mi mapoo polone, eli domo dulone, Yesuye o hamamee dili odoo dimapoo egeesee woosaso, “Edebeeyo a odoo ogu deliyo?”

<sup>28</sup> Esemé diayo Yesu mapoo nei egeesee takaso, “Odoo aboso taka, no Yonee odoo howo oluguli odoo toloso hogado simi deliso. Aboso taka, no Ilaya deliso, osoloso odoo aboso taka, no Godee maga to toloso kokodo takomo sili odoo hee daga badebei deliso.”

<sup>29</sup> Yesuye dimapoo egeesee woosaso, “Niyo a odoo ogu deliyo?”

Esemé Pitaye nei egeesee takaso, “No Keliso, Godeeye hudi magoo oso.”

<sup>30</sup> Esemé Yesuye dimapoo to kitulugu sabolo egeesee takaso, “Odoo mapoo a Keliso Godeeye hudi magoo dee na takeeye!” diso.



*Yesu eyo talai goo ee taka  
(Mat 16:21-23; Luka 9:22)*

<sup>31</sup> Yesuye o hamamee dili odoo eligi bei mooloogolone egeesee takaso, “Odo Holo, a dala toowa bei talaiso, osoloso Yu odoowo wiligi odoo tebisa sabolo, tei moso wiligi odoo tebisa sabolo, tei eligili wiligi odoo tebisa sabolo oso a gowoolone pagalaiso. Osoloso edebeeyo a wooloomaloso, bi mapoo ta moloso biame bakadio hedebe di mapoo see bi maga hogadileiso.”

<sup>32</sup> Yesuye goo hagee o hamamee dili odoo dimapoo woola yilige bugume, Pitaye yo peegoo ido dilesi yimapoo egeesee takaso, “No egeesee na takee.”

<sup>33</sup> Esem Yesuye o hamamee dili odoo dimapoo bidi toboloso bolone, Pita mapoo egeesee takaso, “Saiten, no amaga peegoo di! Nayo to egee takoo Godeeye taka ee koo takoo. Esino edebeeyo taka goo ee takoo.”

<sup>34</sup> Yesuye o hamamee dili odoo sabolo osoloso odoo mooloogoodoo gilimadoloso, dimapoo egeesee takaso, “Edebeeyo ayo di hamamee sibilei goomogoga, yo daga eyo goomoga goo tomo sili ee poogoloso, eyo talai sabolo dala toowa talai sabolo medee mopoodoo doloso ama hamamee ka sibe.

<sup>35</sup> Esiga edebeeyo o gie badeli eyo goodogoga, o gie badeli ee osugobalaiso. Esino edebeeyo mo goo maga sabolo osoloso to tekepo eyo goo maga o gie badeli eyo goodegelega poogoga, yo badoboso kookaiyo gie badeli talaiso.

<sup>36</sup> Esino edebeeyo mipoo hamapoo badolone, eyo goomoga goo susuga ee tomo siloso, hedebe gie badeli goo ee telega dagaduga, yo see ogoo goo talaisomo? Mauwe.

<sup>37</sup> Bei, yayo gie badeli eyo nei talai mipoo hamapoo bi hee mauwe.

<sup>38</sup> Esiga edebeeyo Godeebolo ebilega poogoloso, goo tokenee osee tomo silesibo epedee biame

hamapoo, edebeeyo abolo osoloso mo to mapoo gowooga, hamamee ayo mo Maye toowa doloso badeli goo omaga o gadeebugu sabolo, osoloso o momaiye sabolo sibilesi, nei ayo yo gowoolaiso.”

## 9

<sup>1</sup> Yesuye dimapoo egeesee takaso, “Ayo nimapoo ka taka, odoo abo hamapoo hagee do, niba epedee talaim. Esino daga malalo Godeeye wiligi doloso badalai biame goo kitulugu sabolo siboga agalaiso.”

*Yesu o su opusomo di  
(Mat 17:1-8; Luka 9:28-36)*

<sup>2</sup> Osoloso biame 6 olo poogoloso, hamamee Yesuye Pita, Yemes, osoloso Yonee esee mubi hoo dokodoo odoo mauwe mapoo ido paladeeso. Mubi hoo dokodoo o hamamee dili odoo oso balaga molome Yesu o su opusomo paso.

<sup>3</sup> Esem egeino Yesu o dugo diya hohodi ka heliye omaga poni oso howo dooso. Esiga mi hamapoo odoo heeso dugo hapooga dugo heliye egeesi molo agalaime.

<sup>4</sup> Diba omapoo dobolone egeino, Moses dio Ilaya dio peledoboloso Yesubolo to kesamolome egeiso.

<sup>5</sup> Pitaye Yesu mapoo egeesee takaso, “Eligili odoo, iba hamapoo dabalai tekepo. Esiga iyo waseme bakadio hedebe di tegegalaiso, hee nee, hee Moseseeyo, osoloso hee Ilayayo,” dee takaso.

<sup>6</sup> Pitaye takalai kibiya gooleedele, diba obume.

<sup>7</sup> Esem koloboso sibilesi, diba gidisooso. Osoloso kolobo ma kuloduga toso egeesee takaso, “Hagee ayo gooma mo holo oso. Esiga o to mapoo medee dui,” diso.

<sup>8</sup> Esem Pita, Yonee, osoloso Yemes to taka duloso egeino, Moses dio Ilaya dio mena, esino hedebe Yesu dibolo tobudume egeiso.

<sup>9</sup> Osoloso diba mubi dokodooga see kumoo moulone, Yesuye to kitulugu sabolo dimapoo egeese takaso, “Goo niyo egei ee odoo abo mapoo na takee. Esino Odoo Holo, a ta maga see hogado pala ogoloso, niyo hamamee ka takomo silesibe,” dee takaso.

<sup>10</sup> Esem Yesuye to taka diayo wulo kookodooso. Esino diayo Yesu ta maga see hogado pala goo eyo bei ee diesono nei woosa nei woosa demeleso.

<sup>11</sup> Osoloso diayo Yesu mapoo egeese woosaso, “Bei kasalame tei eligili odoo oso takolone, daga malalo Ilayaye sibilesi, Keliso hamamee sibileigo, dee ka takeliyo?” diso.

<sup>12</sup> Esem Yesuye nei dimapoo egeese takaso, “Ilaya tei sibilesi goo susuga see medee mopoodoo dalaiso. Godeeyo to booka mapoo hogugu oso egeese takooso, ‘Odoo Holo, a dala toowa talaiso, osoloso edebeeyo a gowoolaiso.’

<sup>13</sup> Esino ayo nimapoo taka, Ilaya yo olo simiso. Osoloso edebeeyo yimapoo dala teneeso, bei Godeeyo to booka maga taka ee dodolone.”

*Yesuye giso holo bo holo pala tekepo moodoo*

*(Mat 17:14-21)*

<sup>14</sup> Yesu o hamamee dili odoo bakadio hedebe di sabolo mubi dokodooga meilesi egeino, Yesu o hamamee dili odoo abo oso tei eligili odoo sabolo agadiga molome egeiso. Esem odoo susuga sibilesi mooloogodooso.

<sup>15</sup> Diba diesono mooloogoodoloso balaga meleeno, Yesu dimapoo simi ogoloso, diya howoogadooso. Osoloso diayo Yesu mapoo goomoga sabolo hoguga sibadeeso.

<sup>16</sup> Esem Yesuye dimapoo egeese woosaso, “Niba ogoo goo maga agadiga malala?” diso.

<sup>17</sup> Osoloso mooloogoodoo ee ma kuloduga odoo heeso egeese takaso, “Eligili odoo, mo giso

holo bo holo pala oso ibaya paga, nayo moodoolame ido simino, no hamapoo mena.

<sup>18</sup> Esiga bo holo yimapoo pologa, yo miyomoo homodobuloso, kakawa molone o mei wulo tekeliiso, osoloso maga maga makawo tiobiliso. Esino nee hamamee dili odoo dimapoo mo holo bo holo peegoo hasiso bigilame woosano, diayo bo holo peegoo hasiso bigile, bei diayo kitulugu tebilena.”

<sup>19</sup> Esem Yesuye dimapoo egeese takaso, “Niba tei too mauwe odoo. Niyo amapoo tei talame, a biame kasolo nibolo hodobo ka badalaiyo? Ayo biame sage nibolo hodobo badebeino, niyo amapoo tei telega osee daga, a nimapoo diya gowooso. Esino giso holo egee amapoo ido sibe,” diso.

<sup>20</sup> Esem diayo giso holo Yesu mapoo ido simiso. Esino bo holo eyo Yesu ogoloso, giso holo yo bo holoso o kulodu degiga meleso miyomoo homodobiaso. Esem maga mapoo makawo oudoo sabolo mi mapoo bidigamo sileeso.

<sup>21</sup> Yesuye holopeyo ama mapoo egeese woosaso, “Goo hagee kopolone holope yimapoo bei ka mooloogoowo?”

Esem holopeyo amameeye nei Yesu mapoo egeese takaso, “Yo peepooko mapoo bei mooloogoo.

<sup>22</sup> Biame susuga bo holoso holope wooloomalame yo dou mapoo toodoo, osoloso howomoo huso demeleso. Esiga no kitulugu teiba mologa, nayo iba sooloo dele, osoloso iba pidi,” diso.

<sup>23</sup> Esem Yesuye yimapoo egeese takaso, “Nayo taka, ‘No kitulugu teiba daga iba pidi,’ diso. Esino edebeeyo amapoo tei toga, goo susuga haga kalawanee.”

<sup>24</sup> Esem holopeyo amameeye Yesu mapoo toso neligidi egeese takaso, “Ayo namapoo tei tooso,

esino nayo a pidi, mo tei too pepooko see toowa dee,” diso.

<sup>25</sup> Esem e odoo susuga oso Yesu mapoo saga mooloogoodalame sibadee ogoloso, Yesuye bo holo mapoo toso neligidi egeese takaso, “No odoo mapoo dulu taba ibaya teneli. Esiga ayo namapoo to kitulugu sabolo ka taka, no epedee holope hageeyo kuloduga peegoo gasiboga, see holope hageeyo kulodu na gadi.”

<sup>26</sup> Osoloso bo holo gwa sabolo diya degiga meleso holope miyomoo togobuloso, yo peegoo gadiso. Esem holope mi mapoo degigilega kakawoloso meleeso. Esem odoo aboso goolee, yo olo ta, dee gooleeso.

<sup>27</sup> Esino Yesuye holopeyo dee mapoo toloso, yo tabalame pidiso. Esem holope yo tabaso.

<sup>28</sup> Osoloso Yesu o hamamee dili odoo sabolo dibusomo moso kulodu dobolone, diayo Yesu mapoo egeese woosaso, “Iyo kaseme bo holo holopeyo kulodu pala ee peegoo habigilei kitulugu mauwe ka poo-goowo?” diso.

<sup>29</sup> Esem Yesuye nei dimapoo egeese takaso, “Niyo daga Godee mapoo takooga, bo holo egeesi masi peegoo ka hasiso bigiya,” diso.

*Yesu eyo talai goo see taka  
(Mat 17:22-23; Luka 9:44-45)*

<sup>30</sup> Yesu o hamamee dili odoo sabolo mi egee poogoloso, see Gelili mi ee ma kuloduga diso. Osoloso Yesu yo goomegele, odoo heeso yo egeyaga.

<sup>31</sup> Bei, Yesuye o hamamee dili odoo eligi meleeso. Yayo dimapoo egeese takaso, “Odoo Holo, a amapoo ha teli odoo mapoo tenelame tiasalaiso. Osoloso diayo a wooloomalaiso, esino a bi mapoo ta moloso biame bakadio hedebe di mapoo gie badeli toloso hogadileiso.”

<sup>32</sup> Esino diayo Yesuye taka goo eyo bei medee kibiya gooleedele. Esem

diayo see Yesu mapoo woosalai ebigasoo.

*Odoo agayo wiligi doloso ka badalaiyo?*

*(Mat 18:1-5; Luka 9:46-48)*

<sup>33</sup> Yesu o hamamee dili odoo sabolo Kapeniyum mi mapoo peled-abaso. Osoloso diba moso dieso dabalai mapoo dobolone, Yesuye o hamamee dili odoo mapoo egeese woosaso, “Niba eli domopooga sibulone, ogo goo maga toso agadigamo simiyo?”

<sup>34</sup> Esino diayo to nei wedi dile. Bei, diayo dieso nediliyo dima kulodu odoo agayo wiligi doloso badalai goo maga toso agadigaso.

<sup>35</sup> Yesu yo biamolone o hamamee dili odoo gilimadoloso, dimapoo egeese takaso, “Edebeeyo malalo wiligi doloso badalai goomogoga, yo eyo nediliyo pepooko doloso badebee, osoloso yo tou teli odoo masi mesie sabolo odoo susuga ee halo tou tolone ka badebee.”

<sup>36</sup> Yesuye holope hee ido sibilesi, dibada mudugiyopoo tebidiso. Osoloso holope Yesuye maduloso dimapoo egeese takaso,

<sup>37</sup> “Edebeeyo holope hageesi masi mo hu maga o mosopoo ido pologa, yayo a ido poloso. Osoloso edebeeyo o mosopoo a ido pologa, yayo mo Ma a diye di ee ido poloso.”

*Odoo imapoo ha koo teli, diba ibada odoo*

*(Luka 9:49-50)*

<sup>38</sup> Esem Yoneeye Yesu mapoo egeese takaso, “Eligili odoo, iba odoo heeso bo holo ee nee hu maga odoo ma kuloduga peegoo hasiso bugume egeiso. Esem iyo yo hamaga takaso. Bei, yo ibada mooloogoodoo ma kulodu koo badeli.”

<sup>39</sup> Esem Yesuye egeese takaso, “Na hamaga takee. Odoo heeso mo hu maga goo toowa opusomo di moodooga, yayo mo goo maga toke-nee goo saga takalaime.

<sup>40</sup> Osoloso edebeeyo imapoo ha tel-ega badoga, yo ibada odoo oso.

<sup>41</sup> Ayo nimapoo taka, bei niba Kelisowo odooga, odoo heeso nimapoo howo keneega, yo nei toowa talaiso. Esiga hagee tei goo.”

*Tokenee goo mapoo gido dili  
(Mat 18:6-9; Luka 17:1-2)*

<sup>42</sup> Esemee Yesuye o hamamee dili odoo dimapoo egeesee takaso, “Odo heeso tei too odoo hee goo tokenee mapoo gido duga, nei odoo heeso o mu mapoo yo toowa bagagoloso howo bou mapoo toosolai ee dala haga toowanee. Bei, hamamee Godeeye odoo goo egeesi moodeli mapoo dala toowa tenelaiso.

<sup>43</sup> Osoloso nee dee hodio oso no goo tokenee talame gido duga, dee hodio egee kobigi, dee hediliwe badoboso kookaiyo gie badeli talai tekepo. Esino nee dee bakadio sabolo Dou mi mapoo dilei tekeponee. Dou egee koo semili.\*

<sup>45</sup> Osoloso nee homo hodio oso no goo tokenee talame gido duga, homo hodio egee kobigi, homo hediliwe badoboso kookaiyo gie badeli talai tekepo. Esino nee homo bakadio sabolo Dou mi mapoo dilei tekeponee.

<sup>47</sup> Osoloso nee howo hodio oso no goo tokenee talame gido duga, nee howo hodio egee tabigi. Godeeye wiligi doloso badeli omapoo howo hediliwe gadilei tekepo. Esino howo bakadio sabolo Dou mi mapoo toodalai tekeponee.

<sup>48</sup> Bei, mi omapoo ‘boobe egee molo koo wedili osoloso dou koo semili.’

<sup>49</sup> Esiga odoo susuga dala toga douso gawe masi gawoolaiso. Bei, Godee yo goomogoso, iba medee tekepo dabalame.

<sup>50</sup> Solu ee bi tekepo. Esino soluso hadali me poogooga, nayo solu ee see

hadalame kasee moodoolaiyo? Esiga niba solu masi molone nemegei dimapoo mesie sabolo debee.”

## 10

*Sobo huloso pegeli goo  
(Mat 19:1-12; Luka 16:18)*

<sup>1</sup> Yesu o hamamee dili odoo sabolo Kapeniyum mi poogoloso abaga dino Yudiya mi mapoo peledoboloso, see abaga dino Yoden howo daso. Osoloso omapoo egeino, odoo mooloo-goodoo yimapoo sibateme, Yesuye dimapoo Godeeyo goo eyo daga eligi egeesee eligiso.

<sup>2</sup> Esemee Pelisi odoo aboso sibilesu Yesuye to tokenee takabeleso, kukulo agalame yimapoo egeesee woosaso, “Edebeeyo sobo huloso wulo goo hee maga osobo pagalai tei molosomo?” diso.

<sup>3</sup> Esemee Yesuye dimapoo nei egeesee takaso, “Sobo huloso pegeli eyo goo Moseseeye nimapoo tei kasee eligiliyo?” diso.

<sup>4</sup> Esemee diayo egeesee takaso, “Moseseeye imapoo tei egeesee eligiso, gisoso sobo poogooga, daga sobo pegeli peipa mapoo to hoguguloso sobo yo ka peegeena.”

<sup>5</sup> Esino Yesuye nei dimapoo egeesee takaso, “Moseseeye egeino, yayo eligi goo mapoo niyo mesilega poogolo neme, bige, sobo pagalai soowa, dee takoloso tei hagee ka magoo.

<sup>6</sup> Godeeye mipoo hagee daga moodoo biame mapoo, giso sabolo sobo sabolo moodoso.

<sup>7</sup> Goo egeesi maga gisoso ama dio owee dio poogoloso, see osobo sabolo hedebe doloso dabalaiso.

<sup>8</sup> Osoloso obakadio su hedebe doloso dabalaiso. Esiga diayo debee ee ma kulodu diba bakadio nee, esino diba see olo hedebe doloso ka doso.

<sup>9</sup> Esiga Godeeye diba hedebe di goo ee see odoo heeso domo na pi,” diso.

**9:41:** Mat 10:42    **9:43:** Mat 5:30    \* **9:43:** 9:44 sabolo 9:46 sabolo Makaye hamapoo hogugule. Esino 9:48 maga taka to hedebe.    **9:47:** Mat 5:29    **9:48:** Isa 66:24    **9:50:** Mat 5:13; Luka 14:34  
**10:4:** Deut 24:1-4; Mat 5:31    **10:6:** Gen 1:27; 5:2    **10:7:** Gen 2:24; Epe 5:31-33



<sup>10</sup> Osoloso hamamee Yesu o hamamee dili odoo sabolo moso kulodu dobolone, sobo huloso pegeli goo maga diayo see tobu Yesu mapoo woosaso.

<sup>11</sup> Esemé Yesuye dimapoo egeesee takaso, “Edebeeyo osobo poogoloso, see sobo hee huga, yo odoo heeyo osobo ee peedee huso.

<sup>12</sup> Osoloso sobo yo omo poogoloso, see giso hee mapoo obuoga, yo odoo heeyo giso ee peedee huso.”

*Yesu sabolo holaiso sabolo  
(Mat 19:13-15; Luka 18:15-17)*

<sup>13</sup> Biame hedebeeso odoo aboso holaiso Yesu mapoo ido sibadeeso, o deeso sigoloso diba pidilame. Esino o hamamee dili odoo oso goo egee ogoloso hamaga takaso.

<sup>14</sup> Esemé Yesuye o hamamee dili odoo oso holaiso hamaga taka ogoloso, komonolone dimapoo egeesee takaso, “Holaiso amapoo sibilei soowa. Niyo na hamaga takee. Bei, edebeeyo holaiso hageesi masi oso Godeeye wiligi doloso badeli mapoo gasibileiso.

<sup>15</sup> Ayo nimapoo taka, edebeeyo o goo holaiso masi amamo to mapoo mesimo sili, egeesi selega poogoloso, Godee mapoo mesilega poogooga, yo Godeeye wiligi doloso badeli mapoo gasibilei mauwe.”

<sup>16</sup> Osoloso Yesuye holaiso gili-madoloso, yayo hedebe maduloso o deeso sigolone Godeeye no pidi dee takoo, hedebe maduloso o deeso sigolone Godeeye no pidi dee takoo, diso.

*Bi bei odoo  
(Mat 19:16-30; Luka 18:18-30)*

<sup>17</sup> Yesu o hamamee dili odoo sabolo mi hee mapoo dimeleeno, odoo heeso hoguo sibilesi, o homo beiyopoo gauwuloso, yimapoo egeesee takaso, “Eligili odoo tekepo, ayo ogoo goo toga badoboso kookaiyo gie badeli ka talaiyo?” diso.

<sup>18</sup> Esemé Yesu yo Godeeye hudi magoo doloso gooleedalame, yayo nei egeesee takaso, “Bei kasalame

nayo a tekepo ka takala? Hedebe Godeeno medee tekepo.

<sup>19</sup> Esino nayo woosa to eyo nei, Godeeyo tei magoo no olo gooleedooso: odoo na wooloome, adaba kooka sobo sabolo kooka giso sabolo goo heli na te, heli na te, odoo hee mapoo gamenee na gigidi, odoo hee mapoo gamenee goo maga heli na te, osoloso nama dio noowee dio to taka mapoo mesie.”

<sup>20</sup> Esemé odoo ogoso Yesu mapoo egeesee takaso, “Eligili odoo, a holope maga simi tei magoo susuga hagee ayo tobuloso tomo simiso,” diso.

<sup>21</sup> Esemé Yesuye sooloo dala sabolo odoo omapoo bolone yimapoo egeesee takaso, “No goo hedebe dooboo dagadi moloso. No dileso, nee bi susuga odoo abo mapoo nei moleeso talame todi. Osoloso bi too eyo nei molee bi mauwe odoo mapoo pi. Nayo egeesee seega, Kei mi ma dokodoo bi tekepo nee hu sabolo mologa agalaiso. Osoloso no a dodomo sibe,” diso.

<sup>22</sup> Osoloso bi bei odoo oso Yesuwo to duloso, diya goohele sabolo diso. Bei, yo bi bei doloso badebeiga.

<sup>23</sup> Esemé bi bei odoo dime, Yesuye o hamamee dili odoo mapoo bolone egeesee takaso, “Bi bei odoo oso Godeeye wiligi doloso badeli mapoo gasibilei diya kalawa.”

<sup>24</sup> Yesuye to taka duloso diba howoogaso. Esino Yesuye see dimapoo egeesee takaso, “Mo holo dio, Godeeye wiligi doloso badeli mapoo gasibilei diya kalawa.

<sup>25</sup> Esiga dugo duseli midole ou maga kemol be toowa oso gadilei kalawa. Esino bi bei odoo oso Godeeye wiligi doloso badeli mapoo gasibilei diya kalawa toowa,” diso.

<sup>26</sup> Esemé o hamamee dili odoo oso yayo eligi goo hagee duloso diya howoogadooso. Osoloso diesono nei woosa nei woosa dolone egeesee takaso, “Goo egee diya kalawadoo.

Esiga odoo agayo gie badeli ka talai-somo?" diso.

<sup>27</sup> Esemé Yesúye dimapoo bolone egeesee takaso, "Edebeeyo o gie badeli eyo nediliyo pidilei tebile. Esino Godee yo teiba. Bei, goo susuga yayo moodoolai haga kalawanee," diso.

<sup>28</sup> Esemé Pitaye Yesu mapoo egeesee takaso, "No ege, iba ibada bi susuga hoogoo poogoloso, nayo di hamamee deede simiso," diso.

<sup>29</sup> Esino Yesúye egeesee takaso, "Ayo nimapoo taka, edebeeyo ayo di hamamee sibilame, osoloso to tekepo eyo goo maga, o moso, o emei, o omoo, o omolo, o owee, o ama, o holaiso, osoloso mi poogooga,

<sup>30</sup> odoo yayo o bi susuga poogoo eyo nei toowa talaiso. Esiga yo mipoo hamapoo badolone, see moso, emei, omoo, omolo, owee, holaiso, osoloso mi bei malaiso. Osoloso edebeeyo yimapoo dala tenelaiso, bei yayo mo to mapoo mesiliga. Osoloso hamamee yo kookaiyo badoboso gie badeli talaiso.

<sup>31</sup> Esiga odoo abo epedee hamapoo malalo hagee do ee see diba hamamee dabalaiso. Esino odoo abo epedee hamapoo hamamee hagee do oso see malalo dabalaiso."

*Yesu eyo talai see tobu taka  
(Mat 20:17-19; Luka 18:31-34)*

<sup>32</sup> Yesu o hamamee dili odoo sabolo Yelusalem mi mapoo dulone, Yesúye malaso. Esino o hamamee dili odoo goo howoogamo dime, odoo abo hamamee sibadee diya ebigaso. Bei, odoo susuga oso goolee Yelusalem mapoo goo toke-nee peledébeyaga. Osoloso Yesúye o hamamee dili odoowe peegoo gilimado dileso dobolone, Yelusalem mapoo gooso yimapoo peledabalai goo ee takolone dimapoo egeesee takaso,

<sup>33</sup> "Iba Yelusalem mapoo peledobooga, Odoó Holo, a Yu odoo dia tei moso wiligi odoo tebisa sabolo, osoloso tei eligili odoo abo

mapoo tiasalaiso. Osoloso diayo mo goo midiloso, ayo talai goo ee takalaiso. Osoloso Yu odoonee mapoo tenelaiso.

<sup>34</sup> Diayo a manalaiso, osoloso amapoo makawo pagalaiso, osoloso a tiso dabalaiso, osoloso a wooloomalaiso. Esino biame bakadio hedebe di poogoloso hamamee a ta maga see gie badeli toloso hogadileiso."

*Yemes dio Yonee dio goomoga goo  
Yesu mapoo ogo taka  
(Mat 20:20-28)*

<sup>35</sup> Osoloso Sebediyo owolo Yemes dio Yonee dio Yesu mapoo sibilesó egeesee takaso, "Eligili odoo, goo iyo goomoga namapoo taka," diso.

<sup>36</sup> Esemé Yesúye nei egeesee takaso, "Ogoo goowo?"

<sup>37</sup> Esemé diayo nei egeesee takaso, "Nama Godeeye wiligi doloso badeli mi toowa mapoo siboga, iba goomogo, odoo hee nee dee deede dokolo buo, osoloso hee nee dee dobusu dokolo buo doloso goo susuga nobolo wiligi dalame," diso.

<sup>38</sup> Esino Yesúye dimapoo nei egeesee takaso, "Niyo egee takoo goo ee niba koo gooleedo. Esiga dala toowa ayo talame egee molo, niba nosee dala egeesee talai teibayo? Osoloso niba ayo talame egee molo, niba egeesee talai teibayo?" diso.

<sup>39</sup> Esemé diayo nei egeesee takaso, "O. Iba teiba," dee takaso.

Esemé Yesúye nei dimapoo egeesee takaso, "Dala toowa ayo talame egee molo, niba dala egeesee talaiso. Osoloso ayo talame egee molo, niba egeesee talaiso.

<sup>40</sup> Esino mo dee deede dokolo dabalai odoo sabolo, osoloso mo dee dobusu dokolo dabalai odoo hesigilei amapoo kitulugu mauwe. Esino hedebe Godeeye hesiga odoo oso mi omapoo dabalaiso."

<sup>41</sup> Osoloso Yesu o hamamee dili odoo abo 10 diayo Yemes dio Yonee

dio to taka duloso, dimapoo diya kamanaso.

<sup>42</sup> Esemé Yesúye o hamamee dili odoó gilimadoloso, dimapoo egeesee takaso, “Yu odoonee dia wiligi odoó oso dima hemidu debeli odoó ee diya kitulugu sabolo gidebeliso.

<sup>43</sup> Esino nima kulodu egeesee selai tekeponee. Esiga nima kulodu edebeeyo toowa doloso badalai goomogoga, yo tou teli odoó masi mesie sabolo odoó abo halo tou tolone ka badebee.

<sup>44</sup> Osoloso edebeeyo malalo badalai goomogoga, yo tou wulayo teli odoó masi odoó susuga halo tou tolone ka badebee.

<sup>45</sup> Bei, Odoó Holo, ayo mipoo hamapoo simi hagee, edebeeyo a pidilame ka sibile. Esino ayo odoó pidilame ka simi. Osoloso odoó susuga Godee mapoo iyado sibilame a talame ka simi.”

*Yesúye odoó howo neliga tekepo moodoo*

*(Mat 20:29-34; Luka 18:35-43)*

<sup>46</sup> Osoloso diba Yeliko mi mapoo peledoboloso, Yesu o hamamee dili odoó sabolo mi egee poogoloso dimeleeno, odoó mooloogoodoo susuga diayo di hamamee simiso. Esemé odoó howo neliga o hu Batimeyes, Timayes eyo owolo, Yesúye sibilei eli pee mapoo badolone molee howameleeso.

<sup>47</sup> Esiga Batimeyesye Yesu Nasalet odoó sibogo di duloso, toso neligidi takolone Yesu mapoo egeesee takaso, “Yesu, Deibidiyo amawe, nayo a sooloo dolone a pidiye!”

<sup>48</sup> Esemé odoó aboso yo hamaga takaso. Esino yo koodobilega, see diya neligidi egeesee takaso, “Deibidiyo amawe, nayo a sooloo dolone pidiye!” dee takaso.

<sup>49</sup> Esemé Yesúye o to duloso, kookoo toboloso tobudulone egeesee takaso, “Yo hapoo sibe dee takee.” Esemé diayo howo neliga odoó iso, osoloso yimapoo egeesee takaso,

“Goomege. No toboloso, di. Yesúye no i,” diso.

<sup>50</sup> Esemé Batimeyes o gidei togobuloso, saga dokodoo pupeleso, Yesu mapoo simiso.

<sup>51</sup> Yesúye yimapoo egeesee takaso, “No ayo namapoo ogoó goó moodoolai goomogolo?”

Esemé howo neliga odoó oso nei egeesee takaso, “Eligili odoó, a see agalai goomogo.”

<sup>52</sup> Esemé Yesúye yimapoo egeesee takaso, “No wulo di. Nee tei too goó oso no tekepo paso.” Esemé howo neliga odoó yo epedee omapoo see medee egeiso, osoloso yo Yesubolo eli maga diso.

## 11

*Yesúye Yelusalem mi mapoo wiligi odoó masi toboloso gadi*

*(Mat 21:1-11; Luka 19:28-40; Yon 12:12-19)*

<sup>1-2</sup> Yesu o hamamee dili odoó sabolo Yelusalem mi koola mapoo dulone, Olipi mubi kumoo mosobia bakadio, Betapage osoloso Betani mapoo peledabaso. Osoloso Yesúye o hamamee dili odoó bakadio diye doloso dimapoo egeesee takaso, “Mosobia koogee mapoo dileso, omapoo ogoga be hu gie kauwa donki, edebeeyo wagi ma dokodoo buloso dilega poogoo ee, o mu mapoo ebigiso bagagoloso, omou mapoo bagagoo moloso. Esiga be ee niyo ebigi pidi poogoloso, hapoo hado sibe.

<sup>3</sup> Egeesi ma kulodu odoó heeso sibileso nimapoo takolone, niba ogoo toowala, dee takooga, niyo nei yimapoo egeesee takee, ‘Lodeeye donki be hagee epedee talai goomogogona, osoloso see hamamee odoó heeso ka hado sibileigo,’ dee takeeye,” diso.

<sup>4</sup> Yesu o hamamee dili odoó bakadio mosobia omapoo dileso, donki be moso peegoo ebigi bagagoloso eli palaga tobudume egeiso.

<sup>5</sup> Esemе diayo donki be ebigi bagagoo pidi meleenо, odoо abо оmapoo debei oso dimapoo egeeseе takaso, “Niyo ogoо talame donki be ebigi bagagoo egee ka pidala?”

<sup>6</sup> Esemе Yesu o hamamee dili odoо oso to nei Yesuye dimapoo takee doloso taka tobuloso egeeseе takaso. Esemе odoо abо oso donki be hado dilei soowa diso.

<sup>7</sup> Esemе diayo donki be Yesu mapoo hado sibume, o wagi mapoo dugo pooloso, Yesu dokodoo buloso diso. <sup>8</sup> Esemе odoо susuga oso Yesu mapoo goomogolone dia kekeisu dugo tigadoloso, eli Yesuye dilei mapoo malalo palagamo dime, odoо aboso weiyo dibada go mapoo segei kookooloso eli mapoo palagamo diso.

<sup>9</sup> Esemе Yesuye donki be ma dokodoo buloso dimolome, malalo diyadee odoо sabolo osoloso Yesu ma hamamee sibadee odoо oso to neligidi egeeseе takaso,

“Inolome! Iba Godee mapoo goomogo!  
Odoо Godeeyо hu maga kitulugu sabolo egee sibo yo Godeeye pidiye dee!

<sup>10</sup> Wiligi doloso badeli mi ee sibo Godeeye pidiye dee. Hagee ibada amawe Deibidiye wiligi doloso badebei mi egeesi masi malaiso.

Osoloso iba Kei mi ma dokodoo, badeli Godee mapoo goomogo,”  
dee takomo diyadeeso.

<sup>11</sup> Osoloso Yesu o hamamee dili odoо sabolo Yelusalem mapoo sibilesо, Yesu Yu odoо dia tei moso ma kulodu gadiso. Yo moso kulodu bi susuga mapoo egegemelesо diso. Bei olo neligime, osoloso o hamamee dili odoо 12 sabolo Betani mi mapoo diyadeeso.

*Yesuye pigi homo mapoo to taka  
(Mat 21:18-19)*

<sup>12</sup> Yesu Betani mapoo tialoso, gesikolo Yelusalem mapoo dimeleenо, eli domopoo yo diya hodiaso.

<sup>13</sup> Esemе Yesu eli sage abaga sibulone, pigi homo du egeiso. Esemе ko pa belesо agalame hodu diso. Esino ko pelega wulo duwe molome egeiso. Bei, pigi ko peli eyo biamenee.

<sup>14</sup> Yesuye pigi homo hamapoo egeeseе takaso, “No hamamee homokoko see palaime!” Yesuye egeeseе taka, o hamamee dili odoо duso.

*Yesuye Yu odoо dia tei moso ma kuloduga odoо peegoo hasiso bugu  
(Mat 21:12-17; Luka 19:45-48; Yon 2:13-22)*

<sup>15</sup> Yesu o hamamee dili odoо sabolo Yelusalem mapoo peledoboloso, Yesu Yu odoо dia tei moso ma kulodu gadilesо egeino, odoо aboso bi abо nei moleeso talame si sabolo, osoloso odoо aboso bi abо nei moleeso telaga molome egeiso. Osoloso molee piligeli odoо dia debi pooba sabolo bidige buguso. Osoloso molo huyado sibilesо nei moleeso teli odoо susuga oso bili pooba sabolo bidege buguloso, diba susuga peegoo hasiso buguso.

<sup>16</sup> Osoloso odoо susuga bi tolosо tei moso tegei eli pee kuloduga gadiyaga Yesuye hamaga takaso.

<sup>17</sup> Yayo dimapoo eligilone egeeseе takaso, “Godeeyо to booka mapoo hogugu oso egeeseе takooso, ‘Mo tei moso ee odoо mosobia susuga maga oso sibilesо Godee mapoo takeli mosо,’ diso. Esino niyo goo egeesi tolone, adaba molee heli teliso. Esiga niyo Godeeyо mosо hagee heli teli odoо oso mada wuli mosо paso.”

<sup>18</sup> Esemе tei mosо wiligi odoо tebisa sabolo, osoloso tei eligili odoо susuga oso to hagee duloso, diayo Yesu wooloomalame eli esigamo sile-sibiso. Bei, diayo Yesubolo ebiasо, bei diayo eligi mapoo odoо susuga oso tei telega peegeeyaga, osoloso odoо susuga oso Yesuye eligi goo ee duloso howoogadooso.



19 Osoloso habe omapoo Yesu o hamamee dili odoo sabolo Yelusalem poogoloso diyadeeso.

*Pigi homo oso sia goo*  
(Mat 21:20-22)

20 Gesikolodee mapoo diba eli domopoo diyadeega meleen, diayo pigi homo egeiso. Pigi homo o dee sabolo o kou sabolo, osoloso too susuga sio doloso molome egeiso.

21 Pita Yesuye daga homo mapoo to taka gooleebuguloso, Yesu mapoo egeese takaso, "Eligili odoo, no ege. Nayo daga pigi homo mapoo to taka oso olo sio doloso molo," diso.

22 Esem Yesuye o hamamee dili odoo dimapoo egeese takaso, "Niba Godee mapoo tei te," diso.

23 "Ayo nimapoo taka, edebeeyo mubi hamapoo egeese takooga, 'No dileso, abei mapoo kulodu mei,' dee takooga, o sooloo ma kulodu goo goolee bakadio delega, yayo taka goo oso tei peledabalai dee gooleega, Godeeye goo hagee tei peledabalame moodoolaiso.

24 Esiga ayo nimapoo taka, niyo bi talame Godee mapoo takoloso, see bi egee talai doloso tei toga, bi egee niyo talaiso.

25 Esiga niyo Godee mapoo takolone, odoo heeso nimapoo goo tokenee moodoo mologa, niyo odoo egeeyo goo tokenee daga malalo boobado bigi. Egeeseega nibada Ama Kei mi ma dokodoo egee bado, Godeeye nibada goo tokenee hapoloso boobado bigileiso. [

26 Niyo odoo heeyo goo tokenee boobado bigilega poogooga, nei nibada Ama Kei mi ma dokodoo egee bado Godeeye nibada goo tokenee hapoloso boobado bigileime.]"\*

*Yesuye kitulugu maga woosa*  
(Mat 21:23-27; Luka 20:1-8)

27-28 Diba see Yelusalem mapoo sibadeeso, osoloso Yesu Yu odoowo tei moso ma kulodu sileeme, tei

moso wiligi odoo tebisa sabolo, osoloso tei eligili odoo sabolo, osoloso Yu odoo dia wiligi odoo tebisa oso Yesu mapoo sibiles egeese woosaso, "No agamo kitulugu maga goo hagee ka moodoomo silala? Odoo agayo namapoo kitulugu hagee ka teneeyo?" diso.

29 Esem Yesuye dimapoo nei egeese takaso, "Ayo woosali to hedebe nimapoo woosalaiso. Osoloso niyo to eyo nei amapoo takooga, ayo kitulugu toloso hagee silo eyo goo ee nimapoo takalaiso."

30 Esiga Yesuye dimapoo egeese woosaso, "Odoo agayo Yonee mapoo kitulugu ka teneeyo, yayo odoo howo olugulame? Kitulugu Godeeye teneeyo, o, edebeeyo teneeyo? Niyo amapoo to nei takee!" diso.

31 Esem diayo to hagee duloso dieso nediliyo to moulone egeese takaso, "Iyo kasee takalaisomo? Iyo takolone Yoneeye kitulugu ee Godeeye teneedo, dee takooga, see nei Yesuye imapoo egeese takalaiso, 'Niba bei kaseme Yoneeyo to mapoo tei telega ka poogoowo?' dee takalaiso.

32 Esino iyo takolone yayo kitulugu egee odoo maga simi dee takooga, odoo susuga oso imapoo diya kamanalaiso." Bei, odoo susuga oso goolee Yonee yo tei Godee maga to toloso kokodo takomo sili odoo, dee gweli.

33 Egeeseelone diayo nei Yesu mapoo egeese takaso, "Yoneeye kitulugu too goo eyo bei, iba gooleede," diso.

Esem Yesuye nei dimapoo egeese takaso, "Esiga ayo goo hagee moodoomo silame kitulugu too hagee nimapoo takalaime," diso.

## 12

*Geleipi ko segei homolee sabolo bali odoo sabolo*  
(Mat 21:33-46; Luka 20:9-19)

11:23: Mat 17:20    11:24: Mat 7:7    11:25: Mat 6:14-15    \* 11:26: To hagee odoo abo oso taka Makaye hogugu, dee takeliso. Esino odoo bei oso taka Makaye hogugule, dee takeliso.    12:1: Isa 5:1-2

<sup>1</sup> Yesuye see wudu takolone Yu odoo dia wiligi odoo tebisa mapoo egeesee takaso, “Biame heeso odoo hee o homolee mapoo geleipi ko sogoloso, pee maga beeleeso. Osoloso ko i debilame, yo ou poogoloso, see homolee egee gibadalame doko moso tegeiso. Osoloso yayo homolee bali odoo abo mapoo bamele-eye doloso, yo see mi eli sage mapoo badalame diso. <sup>2</sup> Osoloso yo omapoo dileso badoboome, homokoko palagaloso olo bi moodoogaso. Esemeyayo o tou teli odoo hee mapoo takolone, o homolee mapoo dileso homokoko egee gooloogaloso o hodio ee yimapoo tosibeye diso. <sup>3</sup> Esino yo omapoo dileso peledoboome, homolee bali odoo oso yo woomele poogoloso geleipi ko telega mosoowe see wedi diye diso.

<sup>4</sup> Esemeyayo egeesee ogoloso, homolee eyo amaye see o tou teli odoo hee diye diso. Esino homolee bali odoo oso odoo hagee o wiligi mapoo wooloso, yimapoo ebili goo teneloso see wedi diye diso.

<sup>5</sup> Esemeyayo homolee eyo amaye o tou teli odoo hee diye diso. Esino homolee bali odoo oso yo wooloomaso. Esemeyayo homolee eyo amaye o tou teli odoo abo susuga diye diso. Esino homolee bali odoo oso abo wulo wooloso poogooso, osoloso abo diayo piliguso.

<sup>6</sup> Esino yayo gooma owolo hedebe diye dolone egeesee gooleeso, ‘Homolee bali odoo oso mo holowo to dulosu, yimapoo mesileiso,’ dee gooleeso.

<sup>7</sup> Esino homolee bali odoo diayo homolee eyo amayo owoloye simi ogoloso dieso nediliyo egeesee takaga meleeso, ‘Holo hagoso hamamee ama toga, yayo geleipi ko segei hagee talaiso. Esiga geleipi ko segei hagee see iyo talame yo wooloomamo,’ diso.

<sup>8</sup> Esemeyayo diayo homolee eyo amayo owolo tolosu wooloomaso. Osoloso

o kou homolee maga peegoo togobuguso.”

<sup>9</sup> Yesuye to hagee taka koodobulosu badolone, o to dulone debei odoo mapoo egeesee takaso, “Esiga homolee eyo amaye see kasee moodoolaisomo? Yayo sibilesu homolee bali odoo piligulosu, see homolee bali odoo abo mapoo beye dalaiso.

<sup>10</sup> Esiga niba Godeeyo to booka mapoo hogugu hagee hesigeleyo? Bei, omapoo egeesee takooso, ‘Moso tegeli odoo diayo omou gowoolone togobugu oso epedee hamapoo moso omu domo pupodoo ka moloso.

<sup>11</sup> Goo hagee Godeeye ka moodoo. Esiga iba goo hagee ogoloso howoodolone tekepo deeso.’ ”

<sup>12</sup> Esemeyayo Yu odoo dia wiligi odoo tebisa oso Yesuye wudu taka goo ee dulosu, “Ibada goo takolone bado,” doloso egeesee gooleeso. Egeeseelone diayo Yesu talai eli esigamo silesibisu. Esino diba odoo mooloogoodoo toowa ogoloso, diayo yo talai ebigaso. Esiga Yesu telega poogoo diyadeeso.

*Sisa mapoo tekisi molee teneli  
(Mat 22:15-22; Luka 20:20-26)*

<sup>13</sup> Osoloso hamamee Yu odoo dia wiligi odoo tebisa oso Yesuye Loum gamalee mapoo goo tokenee abo takalame gooleeso. Esemeyayo diayo Pelisi odoo abo sabolo Helodeeyo hamamee dili odoo abo sabolo Yesu mapoo gamenee takalame diye diso.

<sup>14</sup> Esemeyayo odoo egee bia oso dilesu Yesu mapoo egeesee takaso, “Eligili odoo, iba gooleedooso, no tei goo takeli odoo. Osoloso no odoo bolo koo ebili, osoloso nayo odoo kolo mapoo koo egeli. Osoloso nayo Godeeyo goo odoo susuga mapoo tei eligi moloso. Esiga Loum gamalee wiligi odoo Sisa mapoo tekisi molee tenelai tekepowa, o, tokeneeyo?”

<sup>15</sup> Iyo tenelaisomo, o, tenelaimeyo?” dee takaso.

Esino Yesuye diayo goo tokenee moodoolame to mou goo ee, yo olo gooleedoloso dimapoo egeesee takaso, “Bei kasi maga niyo a kukulo agalame ka sala? Niba molee ko hedebe a agalaiya tosibe,” diso.

<sup>16</sup> Esemé diayo Yesu mapoo molee ko hedebe tosibilesó teneme, yayo dimapoo egeesee takaso, “Molee hamapoo agamo mudu sabolo osoloso agamo hu oso ka mololo?”

Esemé diayo nei yimapoo egeesee takaso, “Sisayo mudu sabolo, osoloso o hu oso ka molo,” diso.

<sup>17</sup> Esemé Yesuye nei dimapoo egeesee takaso, “Niyo Sisayo bi ee Sisa mapoo tenee. Osoloso Godeeyo bi ee Godee mapoo tenee,” diso.

Esemé diba to hagee duloso diya howoogadooso.

*Ta maga hogabili eyo goo maga Yesu mapoo woosa*

*(Mat 22:23-33; Luka 20:27-40)*

<sup>18</sup> Osoloso Sedisi odoó aboso Yesuye badebei mapoo sibadeeso. Odoó hagee bia oso takolone, “Odoó wedia see hogabileime,” dee take-liso. Esemé diayo Yesu mapoo sibilesó egeesee woosaso,

<sup>19</sup> “Eligili odoó, tei magoo Mosese-eye hogugu oso imapoo egeesee takooso, ‘Gisoso sobo huloso holo soomagelega toga, see omoloye emei tayo osobo bau ee huloso emeiyo hu maga holo soolooga magee,’ diso.

<sup>20</sup> Esiga odoó heeso giso holo 7 soomagooso. Osoloso daga emeiye sobo huso. Osoloso yo holo soomagelega taso.

<sup>21</sup> Esemé omolo yima hamamee soomagoo oso emeiyo osobo bau ee huso. Esino yo holo soomagel-ega taso. Esemé see omolo yima hamamee soomagoo oso emeiyo osobo bau ee huso. Esino yinosee holo soomagelega taso.

<sup>22</sup> Egeeseelone giso holo 7 susuga hagee bia oso holo soolooga magel-ega wediaso. Osoloso hamameedee sobo bau yinosee taso.

<sup>23</sup> Esiga odoó wedia maga see hogogadilei biame mapoo sobo egee tei odoó agamo osobo dalaisomo? Bei, giso 7 oso sobo hedebe hagee huso,” diso.

<sup>24</sup> Esemé Yesuye nei dimapoo egeesee takaso, “Niba goo dooboo gweli odoó. Bei, niba Godeeye kitulugu sabolo osoloso o to sabolo gooleedelega ka doso.

<sup>25</sup> Bei, odoó wedia ee bi maga see hogogabuoga, diba see sobo huleime, osoloso giso obileime. Esino diba see Godeeyo momaiye oso Kei mi mapoo egee do egeesi masi dabalaiso.

<sup>26</sup> Esiga Moseseeye odoó wedia see hogogadilei goo ee o book mapoo hogugu, niyo hesigeleyo? Eibalaham, Aisek, osoloso Yekob olo taso. Esino homo douso nademe, paiya biame omapoo Godeeye Moses mapoo egeesee takaso, ‘Epedee hamapoo a Eibalahameeyo Godee, Aisekeeyo Godee, osoloso Yekobowo Godee doloso ka badoso,’ diso. Odoó hagee wediaso, esino dibada dio oso epedee hamapoo gie doso.

<sup>27</sup> Esiga Godee hagee odoó wedia eyo Godeenee. Haye, odoó gie egee do eyo Godee. Esino niyo odoó toloso see gie badeli talaime dee gooleega, niba goo dooboo gweli odooso.”

*Tei magoo kaso toowa ka molo-somo?*

*(Mat 22:34-40; Luka 10:25-28)*

<sup>28</sup> Tei eligili odoó hee diayo toso agadigamelee omapoo sibilesó badolone dumeleeso. Osoloso Yesuye Sedisi odoó mapoo to nei tekepo taka duloso, yayo Yesu mapoo egeesee woosaso, “Tei magoo kaso diya toowa ka molosomo?” diso.

<sup>29</sup> Esemé Yesuye nei egeesee takaso, “Tei magoo toowa hagosó,

'Isael odoo niba dui! Ibada wiligi odoo Godee hedebe.

<sup>30</sup> Esiga nayo nee wiligi odoo Godee diya goolee, nee sooloo ma kuloduga goolee sabolo, osoloso nee dioso goolee sabolo, osoloso nayo goo goolee sabolo, osoloso nayo kitulugu oso diya goolee.'

<sup>31</sup> Osoloso tei magoo toowa hee hagoso: 'Nayo no nediliyo diya egee goolee, egeesee goolone nee odoo nose diya egeesee goolee.' Tei magoo toowa aboso, tei bakadio hagee dagadile," diso.

<sup>32</sup> Esem tei eligili odoo ogoso see Yesu mapoo egeesee takaso, "Eligili odoo, nayo tei goo olo takaso. Esiga Godee hedebe badoso, Godee hee mauwe.

<sup>33</sup> Esiga gala hu wooloso dou mapoo siloso Godee mapoo teneli sabolo, bi abo teneli sabolo, tei oso taka hagee haga goo toowanee. Esino tei magoo bakadio hagoso goo toowa ka moloso: Nayo Godee diya goolee, nee sooloo ma kuloduga goolee sabolo, osoloso nayo goo goolee sabolo, osoloso nayo kitulugu oso, diya goolee. Osoloso nayo no nediliyo diya egee goolee, egeesee goolone nee odoo nose diya egeesee goolee," diso.

<sup>34</sup> Esem Yesuye odoo ogoso to nei tekepo taka duloso yimapoo egeesee takaso, "No Godeeye wiligi doloso badeli mapoo gasibilei koola bado," diso. Esem odoo aboso goo abo Yesu mapoo woosalai obulone yimapoo hee woosale poogooso.

*Keliso agamo owolowo?  
(Mat 22:41-46; Luka 20:41-44)*

<sup>35</sup> Hamamee Yesuye Yu odoo dia tei moso tegei ma kulodu odoo susuga mapoo eligilone yayo egeesee woosaso, "Bei kasi maga tei eligili odoo diayo Keliso ee Deibidiyo amawe, dee ka takeliyo?

<sup>36</sup> Deibidiye to kitulugu sabolo Dio Tei maga egeesee takaso,

'Godeeye mo Lodee mapoo egeesee takaso:

"No abolo wiligi doloso badalame mo dee deede dokolo bie. Esiga nayo badolone namapoo ha teli odoo ee ayo dagadileiso," diso.'

<sup>37</sup> Deibidiye Keliso o Lodee diso. Esiga bei kasi maga tei eligili odoo diayo 'Keliso Deibidiyo amawe' dee ka takeliyo? Kelisoye Lodee osoloso Deibidiyo amawe dalai teibayo? O, Keliso yo Lodee osoloso yo Deibidiyo amawe oso."

Odoo susuga goomogolone o to mapoo medee duso.

*Yesuye tei eligili odoo dia goo taka  
(Mat 23:1-36; Luka 20:45-47)*

<sup>38</sup> Yesuye odoo susuga mapoo eligilone egeesee takaso, "Niba tei eligili odoo mapoo medee ege. Diba dugo medee tekepo megigaloso silesibiliso, osoloso bi neiso teli go mapoo debeli odoo oso diba ogoloso gauwuloso emegei di to takooga ee dulei onose diya goomegeliso.

<sup>39</sup> Diba howo gisili moso ma kulodu wiligi odoo taba eyo debi mapoo bulumulame, osoloso wo toowa nologolone debei mi mapoo wiligi odoo toowa taba eyo debi mapoo bulumulame goomegeliso.

<sup>40</sup> Esino diayo sobo bauwe ebilame gamenee takoloso, dia moso sabolo bi sabolo diayo toloso omapoo dobolone, dia goo gagaloso Godee mapoo taka diya sageliso, odoo aboso diba tekepo odoo dee goolame. Esiga goo egeesi maga diba nei dala toowa talaiso."

*Sobo bauso emegei di bi tenee  
(Luka 21:1-4)*

<sup>41</sup> Yesu tei moso tegei kulodu ede-beeyo emegei di molee tooseli ki bi oso moodoo mapoo soloogamelee koola mapoo badolone odoo susuga bameleeso. Bi bei odoo oso molee ko toowa sooso.

<sup>42</sup> Osoloso sobo bau bi mauwe oso sibilesi molee ko ta bakadio toosooso.



<sup>43</sup> Esemme Yesu o hamamee dili odoos gilimadoloso dimapoo egeesee takaso, “Ayo nimapoo taka, sobo bau bi mauwe hagoso tenee oso odoos abo susuga oso tenee ee dagadiso.

<sup>44</sup> Bei, bi bei odoos dia molee toowa osee molome molee su pepooko teneeso. Esino sobo bau bi mauwe hagee yimapoo molee ko esiesibo meleeno teneeso. Esiga yo wo talai molee olo mauwe.”

## 13

*Yesuye Godeeyo tei moso tegei oso tokenee palai goo taka (Mat 24:1-2; Luka 21:5-6)*

<sup>1</sup> Biame omapoo Yesu tei moso poogoo dilesos dimolome, o hamamee dili odoos heeso sibileso yimapoo egeesee takaso, “Eligili odoos, ibada tei moso yosos tegei medee tekepo hagee, no ege, osolosos yo toowa medee tekepo, no ege,” diso.

<sup>2</sup> Esemme Yesuye to nei yimapoo egeesee takaso, “Tei mosos tekepo tegei epedee no hagee ogo, hamamee guobigileiso, eseega yosos hedebesos yo hee ma tobudoo malaimo,” diso.

<sup>3</sup> Osolosos Yesu Olipi mubis ma dokodoo pelesos, tei mosos tegei ma hodiokoo bolonos badoboome, Pita, Yemes, Yonee, osolosos Endulus diayos dibusomos sibileso yimapoo egeesee woosaso,

<sup>4</sup> “Nayos imapoo takee, goo susugas hagosos kopolonos ka peledabalaiyo? Osolosos goo susugas hagosos peledabalame mologas, ogoos goosos imapoo ka eligileiyo?” diso.

<sup>5</sup> Esemme Yesuye dimapoo to nei egeesee takaso, “Nibas obeeyamos! Odoos heesos tei goodee magas nibas peegoo gilimados diyagas.

<sup>6</sup> Odoos abosos mo hu magas sibileso takolonos, diesos nediliyos dibas Kelisosos, dees takalaisos. Egeeseelonos diayos odoos bei tei goo magas peegoo gilimados dileisos.

<sup>7</sup> Esigas has too goos sabolos osolosos biligas goos osos peledoboomos dugas goos ees dulosos, nibas hagas nas ebis. Bei, goos hageesis osos dagas malalos peledabalaisos. Esinos biame egees hoo poogoo osonee, hamamee sibileisos.

<sup>8</sup> Osolosos mis toowas heesos mis toowas hee mapoo has talaisos. Osolosos mis susugas mapoo mibias toowas sibileisos. Osolosos neis me pagalaisos. Esinos goos susugas hagosos peledoboogas, dalas biame osos beis mooloogolonos kas seesos.

<sup>9</sup> Esigas goos susugas hagosos peledoboogas, nibas obeeyamos. Edebeeyos nibas tolosos goos midilis mosos mapoo idos polos dolonos dabalaisos. Osolosos nibas dibadas howos gisilis mosos mapoo idos pelesos wooloogolonos dabalaisos. Osolosos amapoo tei too goos magas nibas gamalee wiligis odoos tebisas sabolos, osolosos wiligis odoos toowas tebisas abo dias mudugiyopoo gilimados pelesos, niyos mo goos ees dimapoo takalaisos.

<sup>10</sup> Mis hoo pagalais hoogoo mologas, to tekepos hagee dagas edebeeyos mis susugas mapoo takomos dileisos, odoos susugas osos to tekepos ees dulame.

<sup>11</sup> Osolosos edebeeyos nibas goos midilis mosos mapoo idos pologas, niyos takalais goos ees hagas nas goolee. Bei, biame omapoo niyos takalais goos goolee tekepos ees nimapoo Godeeye tenelaisos. Esinos nibas nisos goolee takalaime, Dios Tei osos nibolos tobolosos to kas takalais.

<sup>12</sup> Biame omapoo edebeeyos emeis dios omolos dios wooloomalame, dibas gowelis odoos mapoo tiasalaisos. Osolosos amayas owolos mapoo egeesee selaisos. Osolosos owoloye dibadas amas dios owee dios mapoo mesilegas poogolosos dibas wooloomalame tiasalaisos.

<sup>13</sup> Bei niyos amapoo tei too goos omagas odoos susugas osos nimapoo heigas toowas malaisos. Esinos edebeeyos eyos tei too kibilosos badolonos, hoo poogoo mapoo dilesos peledoboogas, yos badobosos kookaiyos gis

badeli talaiso.

<sup>14</sup> (Hesigeli odo, no to hageeyo bei medee gooleede.) Niba bi diya tokenee mudu opusomo di oso tei moso ma kulodu molo agalaiso. Esiga bi ogo Godeeyo howo woola tei moso tokenee palaiso. Egeeseega Yudiya mi toowa mapoo debeli odo oso bi mudu opusomo di ee ogoga mubi ma dokodoo kukulo pele.

<sup>15</sup> Osoloso odo moso hau mapoo badoga, bi talame moso kulodu na gadi.

<sup>16</sup> Osoloso odo homolee mapoo nei howo sogomo siloga, o gidei talame mosopoo see na wedi di.

<sup>17</sup> Osoloso biame omapoo sobo koowasi sabolo, osoloso holope too nedili sobo ee kukulo dilei diya kalawa toowa molo agalaiso.

<sup>18</sup> Esiga Godee mapoo takee, goo hagoso wau biame mapoo peledelaga pagalame.

<sup>19</sup> Bei, biame omapoo dala toowa oso sibileiso. Esiga mi toowa bei mooloogoo biame abaga simino epedee hamapoo, odo susuga oso dala goo hageesi egele. Esino dala goo toowa hagoso sibilesi koodobuoga, hamamee dala goo hageesi see agalaime.

<sup>20</sup> Esiga Godeeye dala biame deiyepo moodoolaiso. Esino yayo biame sage magoo diepi, odo heeso dala ee ma kulodu badalai tebile pegeliyo. Esino dala ee ma kulodu Godee eyo hesiga odo ee halo, yayo dala biame see deiyepo moodoolaiso.

<sup>21</sup> Biame omapoo odo heeso sibilesi nimapoo takolone, 'Hamapoo ege, Keliso hagoso' o, 'Koo ege, Keliso ogo,' dee takooga, o to mapoo tei na te.

<sup>22</sup> Bei, gamenee keliso deli sabolo, osoloso gamenee godee maga to toloso kokodo takomo sili odo oso sibilesi goo toowa opusomo di edebeyo howeli moodoolaiso, odo susuga sabolo osoloso odo Godeeye

hesiga oso peegoo dia beleso kukulo agalame.

<sup>23</sup> Esiga niba obeeyamo! Goo hagee peledelaga mologa, ayo daga goo susuga nimapoo ka taka."

*Yesuye see sibilei goo*

*(Mat 24:29-44; Luka 21:25-33)*

<sup>24</sup> "Osoloso hamamee, biame omapoo dala goo hagoso dileso koodobuoga,

'osoko semelaiso. Egeeseega a nosee gadeebigileime.

<sup>25</sup> Osoloso giwo kei ma dokodoo egee molo mi hamapoo tigidibileiso. Osoloso kei ma dokodoo kitulugu bi egee molo Godeeye halabuga ki me pagalaiso.'

<sup>26</sup> Biame omapoo odo susuga oso Odo Holo, ayo kolobo maga gadeebugu sabolo, osoloso kitulugu toowa sabolo siboga agalaiso.

<sup>27</sup> Osoloso ayo sibilesi, mo momaiye diye dalaiso, diayo dileso odo susuga Godeeye hesiga mi susuga mapoo egee do ee gilimalame.

<sup>28</sup> Esiga niba sogai maga goo hagee medee gooleede. Sogai du pisigaga ogoloso, wau biame koola tooboo doloso gooleedeliso.

<sup>29</sup> Esiga goo hagee egeesi masi moloso. Goo ayo taka hagoso peledaba ogoga, Odo Holo ayo sibilei olo koola tooboo doloso niba olo gooleedalaiso.

<sup>30</sup> Ayo nimapoo taka, epedee biame hamapoo odo hagee do wedilega daga, goo susuga hagoso peledabalaiso.

<sup>31</sup> Kei sabolo mipoo sabolo mauwe pagalaiso. Esino mo to kookaiyo moloso osee malaiso."

<sup>32</sup> "Esiga Odo Holo ayo sibilei biame ee odo hee gooleede. Osoloso Godeeyo momaiye Kei mi ma dokodoo egee do sabolo osoloso Godeeyo owolo anosee gooleede. Esino hedebe mo Ma Godeeye biame egee gooleedoloso ka badoso.

<sup>33</sup> Esiga niba medee koolone ka debee. Bei, biame ogoso sibilei ee niba gooleedele.

<sup>34</sup> Odoos Holo, ayo sibilei goo ee egeesi moloso. Odoos heeso mi hee mapoo dulone, o tou teli odoos mapoo moso hagee medee bameleeye, dee takoloso dileiso. Osoloso yayo tou teli odoos mapoo moso egee bamalame, tou opusomo opusomo di pileiso. Osoloso osulu gibalai odoos mapoo yayo see wedi sibilei maga egeese takalaiso, 'Medee be!'

<sup>35</sup> Esiga mosowo ama masi aso. Esiga niba mopoodoo doloso koolone ka debee. Bei, ayo sibilei biame ee niba gooleedele. Habe sibumobelee, o gesi domo sibumobelee, o kudi takooga sibumobelee, o gesikolodee sibumobelee.

<sup>36</sup> Osoloso ayo saga sibileso ogoga, niba tiesa molo agalai tekeponee.

<sup>37</sup> Ayo nimapoo to taka see odoos susuga mapoo takooso, niba mopoodoo doloso, koolone ka debee," diso.

## 14

*Yesu wooloomalame to mou*  
(*Mat 26:1-5; Luka 22:1-2; Yon 11:45-53*)

<sup>1</sup> Osoloso Godeeye Gababia wo nalai sabolo osoloso wo mosoowe nalai biame bakadio hoogoo meleeso. Esemee tei moso wiligi odoos tebisa sabolo, osoloso tei eligili odoos sabolo diayo Yesu tolosa mada wooloomalame eli esiamo silesibiso.

<sup>2</sup> Esino diayo dieso nediliyo egeese takaso, "Iyo Gababia wo ne biame hamapoo yo tolosa wooloomalame. Bei, odoos susuga oso imapoo kamanaloso ibolo biligiyaga," diso.

*Betani mi mapoo soboso mopoodoo soo medee tekepo oso Yesuwo wiligi mapoo soo*

(*Mat 26:6-13; Yon 12:1-8*)

<sup>3</sup> Yesu Betani mi mapoo badolone, odoos daga agagisa bia Yesuye tekepo

pa Saimonowo moso mapoo palaso. Yo omapoo nei nolone badoboome, sobo heeso mai masi pepooko yo alabasta deli oso moodoo mapoo mopoodoo soo medee tekepo nad deli i salama soo tosimiso. Yayo tosimiso, me gooboo buguloso Yesuwo wiligi mapoo sooso.

<sup>4</sup> Esemee odoos abo omapoo debei oso ogoloso komonolone dieso nediliyo egeese woosagaso, "Bei kasalame sobo hagosoo mopoodoo soo medee tekepo ee wulo goo mauwe yimapoo soomeleso ka hosudoowo?" diso.

<sup>5</sup> "Yayo mopoodoo soo medee tekepo hagee odoos mapoo neiso talame tenee diepi, molee ko 300 ee tolosa bi mauwe odoos mapoo tenelai tebiliyo." Diayo dee takoloso, sobo yimapoo kamanaso.

<sup>6</sup> Esemee Yesuye dimapoo egeese takaso, "Yimapoo egeese na takee. Bei kasi maga niyo yimapoo kamanaloso ka takala? Yayo amapoo goo tekepo moodooso.

<sup>7</sup> Esiga bi mauwe odoos ee biame susuga nibolo hodobo dabalaiso. Esiga niyo diba gooleebuguga, diba biso pidilei tekepo. Esino biame susuga a nibolo hobobo badalaime.

<sup>8</sup> Esiga sobo hagosoo yayo moodoolai dee goolee goo ee amapoo moodooso. Yayo mopoodoo soo egee mo wiligi mapoo soo oso mo suso bi ma kulodu malai ee mopoodoo doo.

<sup>9</sup> Ayo nimapoo ka taka. Edebeeyo mi kamapoo Godeeyo to tekepo takooga, diayo sobo hagosoo goo amapoo moodoo onosee takalaiso. Osoloso edebeeyo o goo onosee goolee malaiso," diso.

*Yudaseeye Yesu tiasalame goomoga magoo*

(*Mat 26:14-16; Luka 22:3-6*)

<sup>10</sup> Osoloso Yesu o hamamee dili 12 ee ma kulodu odoos hee Yudas-Iskaliyot yayo tei moso wiligi odoos tebisa mapoo dileso Yesu dimapoo tiasalame diso.

<sup>11</sup> Esemе diayo o goo duloso, diya goomogolone yimapoo molee nei tenelame to takoloso edidi magooso. Esemе Yudaseeye Yesu dimapoo tiasalame eli esiamo silone biame tekepo bameleeso.

*Yesuye o hamamee dili odo sabolo Godeeye Gababia wo ne*

*(Mat 26:17-25; Luka 22:7-14, 21-23; Yon 13:21-30)*

<sup>12</sup> Isipi mi maga peegoo di gooleebugu wo ne bei mooloogoo biame mapoo, Yu odooso Godeeye Gababia wo nalame, sipi be hu weliso. Esemе Yesuwo hamamee dili odooso Yesu mapoo egeesee woosaso, “Nayo iba kamapoo dilesa Godeeye Gababia wo nalai mopoodoo dalai ka goomogolo?” diso.

<sup>13</sup> Esemе Yesu o hamamee dili odooso bakadio diye dolone egeesee takaso, “Niba Yelusalem mi mapoo diyadee. Osoloso niba omapoo dilesa ogoga odooso hee howo keedoloso eli domopoo dumologa tugodalaiso. Niba yo tugodoloso yo deede di.

<sup>14</sup> Osoloso niba yayo dilesa moso kulodu gaduga omapoo dobolone, mosowo ama mapoo egeesee takee, ‘Eligili odooso egeesee taka, “Ayo mo hamamee dili odooso gilimadoloso, Godeeye gababia wo nalame debi pooba gooboogoo kasomo?” ’ dee takee.

<sup>15</sup> Osoloso yayo niba moso dokohodoo ido peleso debi pooba gooboogoo toowa olo moodoo doloso melee eligileiso. Esiga niba iyo Godeeye Gababia wo nalai omapoo ka mopoodoo de,” diso.

<sup>16</sup> Esemе Yesu o hamamee dili odooso bakadio oso Yelusalem mi mapoo diyadeeso. Diba omapoo dilesa egeino, goo susuga ee Yesuye dimapoo taka goo sabolo tobuloso molome egeiso. Esemе diayo Godeeye Gababia wo nalame omapoo mopoodoo doloso, diba see Yesuye o hamamee dili odooso abo sabolo debei mapoo wedi diso.

<sup>17</sup> Osoloso habedee mapoo Yesu o hamamee dili 12 sabolo sibilesa moso omapoo peledabaso.

<sup>18</sup> Diba omapoo wo nolone do-boome, Yesuye dimapoo egeesee takaso, “Ayo nimapoo taka, nima kuloduga odooso hee abolo wo hagee namolo oso a ha teli odooso mapoo tiasalaiso,” dee takaso.

<sup>19</sup> Esemе Yesu o hamamee dili odooso oso to hagee duloso, goohele sabolo dobolone, Yesu mapoo egeesee takaso, “Ayonee, o ayowo?” dee takaga meleeso.

<sup>20</sup> Esemе yayo dimapoo nei takaso, “Odooso 12 mooloogoodoo hagee ma kulodu, odooso agayo mo peleta mapoo abolo hodobo wo olugudoloso naga, a ha teli mapoo tiasalai odooso ogoso.

<sup>21</sup> Esiga Godeeyo to booka mapoo hogugu oso taka ee dodolone, Odooso Holo a talaiso. Esino Odooso Holo a ha teli odooso mapoo tiaseli odooso yo dala toowa talaiso. Oweeye yo soomagelega poogoo diepi, yo dala tele pegeliyo,” diso.

*Lodee gooleebugu wo ne*

*(Mat 26:26-30; Luka 22:19-20)*

<sup>22</sup> Diba wo nolone do-boome, Yesuye wo tolosa Godee mapoo goomoga to takoloso wo popeiso. Osoloso o hamamee dili odooso mapoo wo pulone egeesee takaso, “Wo hagee tolosa ne. Hagee mo suso,” diso.

<sup>23</sup> Osoloso yo see kapu wain i keeso tolosa, Godee mapoo goomoga to takoloso, dimapoo teneme, diayo susuga wain i neso.

<sup>24</sup> Esemе Yesuye see egeesee takaso, “Hagee mo sawo, odooso susuga dia tokenee hapalame ka sologo bugu. Mo sawo oso Godeeye o odooso mapoo to kitulugu magoo goo oso tei peledabalame.

<sup>25</sup> Esiga ayo nimapoo taka. Ayo epedee hamaga dulone wain i see nalaimе. Esino hamamee Godeeye



wiligi doloso badeli mi mapoo wain i dia see nalaiso,” diso.

<sup>26</sup> Osoloso diba goomoga kosaiya hedebe pouloso, see Olipi mubi dokodoo paladeeso.

*Pitaye Yesu boobado bigilei goo ee Yesuye taka*

*(Mat 26:31-35; Luka 22:31-34; Yon 13:36-38)*

<sup>27</sup> Esemee Yesuye see o hamamee dili odoo mapoo egeesee takaso, “Odoosusuga niyo a poogoloso kukulo dileiso. Bei, Godeeyo to booka mapoo hogugu oso egeesee takooso,

‘Godeeye sipi be bali odoo ee wooloomaga, sipi be susuga oso yimaga peegoo kukulo dileiso.’”

<sup>28</sup> Osoloso Yesuye see egeesee takaso, “Esino a ta maga hogado dileso, ayo daga malalo dileso Gelili mi mapoo niba tugodalaiso.”

<sup>29</sup> Esemee Pitaye nei Yesu mapoo egeesee takaso, “Odoosusuga oso namaga peegoo kukulo duga, hedebe ayo no poogoo dileime.”

<sup>30</sup> Esino Yesuye yimapoo see egeesee takaso, “Ayo namapoo tei goo taka. Epei gesi kolokoloso taka bakadio delega, malalo hoogoo mologa, nayo mo goo gagadilei ee bakadio hedebe dalaiso,” dee takaso.

<sup>31</sup> Esino Pitaye to kitulugu sabolo nei egeesee takaso, “Ayo egeesee se-laim! Edebeeyo no wooloomaga, a nobolo hodobo talaiso,” diso. Esemee Yesuwo hamamee dili odoo susuga oso to hedebe egeesee takaso.

*Yesuye Getesemeni homolee mapoo Godee mapoo taka*

*(Mat 26:36-46; Luka 22:39-46)*

<sup>32</sup> Osoloso Yesu o hamamee dili odoo sabolo Getesemeni olipi homo segei homolee omapoo sibadeeso. Osoloso Yesuye o hamamee dili odoo dimapoo egeesee takaso, “A dileso Godee mapoo takalaiya, niba hamapoo debee,” diso.

<sup>33</sup> Osoloso yayo egeesee takoloso, hedebe Pita, Yemes osoloso Yonee esee ido palaso. Yo peleso bado-boome, goohele goo sabolo osoloso su hegi goo oso yimapoo simiso.

<sup>34</sup> Osoloso yayo dimapoo egeesee takaso, “Mo su ma kulodu hegi goo toowa oso molone, ayo talai olo koola tooboo. Esiga niba hamapoo koolone debee,” diso.

<sup>35</sup> Osoloso Yesu egeesee takoloso, dimaga pepooko hoogoo dileso, ebiso miyomoo tugusaloso balaboo tialoso molone Godee mapoo takaso, yimapoo dala toowa egee sibo ee Godeeye peegoo magalame.

<sup>36</sup> Yayo Godee mapoo takolone egeesee takaso, “Ma, mo Ma! Goo susuga namapoo kalawanee. Esiga dala toowa oso amapoo hagee sibo, nayo peegoo magalai soowayo? Esino nayo goomoga goo moodee, ayo goomoga goonee,” diso.

<sup>37</sup> Osoloso yo Godee mapoo taka koodobuloso wedi dileso egeino, o hamamee dili odoo bakadio hedebe di tiesamolome egeiso. Esemee yayo Pita mapoo egeesee takaso, “Saimon, no tiayo? No biame deiyepo hamapoo abolo hodobo koolone badalai tebiledo?”

<sup>38</sup> Esiga niba bolone Godee mapoo takolone ka debee, niba kukuli goo mapoo homodobiyyaga. Bei nibada goo goolee oso goo tekepo talame goomogoso, esino nibada su oso ki me ka poogooso,” diso.

<sup>39</sup> Osoloso yo see wedi dileso, Godee mapoo takolone goo hedebe onosee takaso.

<sup>40</sup> Osoloso yo see dimapoo wedi sibilesio egeino, diba tiesa molome egeiso, bei diba tila paga oso howo seme. Osoloso diayo Yesu mapoo to nei takalai gooledele poogooso.

<sup>41</sup> Yesu yo see bakadio hedebe di mapoo Godee mapoo takoloso, o hamamee dili odoo mapoo wedi sibilesio, dimapoo egeesee takaso, “Niba hosolone wulo tiesa malala?”

Tia olo oso! Odoos Holo, a tokenee odoo mapoo toloso tenelai biame olo epedee hamapoo sibo.

<sup>42</sup> Esiga koo ege, a tokenee odoo mapoo tiasalai odoo ee olo sibo. Esiga niba tebise, dimapoo dimo!" diso.

*Edebeeyo Yesu too*

(*Mat 26:47-56; Luka 22:47-53; Yon 18:3-12*)

<sup>43</sup> Yesu to osee komolome, o hamamee dili odoo hee Yudaseeye Yesu talame odoo mooloogoodoo toowa gilimado simiso. Egeesi ma kulodu tei moso wiligi odoo tebisa sabolo, tei eligili odoo tebisa sabolo, osoloso Yu odoowo wiligi odoo tebisa oso Yesu talame odoo hagee bia diye diso. Esem diayo sibulone kaiya sabolo kodolo sabolo toloso sibadeeso.

<sup>44</sup> Egeesi ma kulodu Yudas yo epedee sibilega badolone, odoo Yesu talai mapoo egeese takaso, "Ayo dileso adaga, odoo ogooso. Eseega niyo yo toloso medee bolone ka ido di," diso.

<sup>45</sup> Osoloso Yudas yo odoo mooloogoodoo poogoloso dileso, Yesuye tebidi mapoo hoogoo dileso, yayo egeese takaso, "Eligili odoo!" dee takoloso, Yesu adaso.

<sup>46</sup> Esem odoo abo oso sibilesos Yesu tooso.

<sup>47</sup> Esino Yesu o hamamee dili odoo hee koola omapoo tebidi oso o kaiya tadoloso, tei moso wiligi odoo taba eyo tou teli odoo kaiyaso woomeleso eyo dooboo poogoome, dulu asooso.

<sup>48</sup> Esem Yesuye yo talame sibadee odoo omapoo egeese takaso, "Niyo ogoga a mesiya daga, a talame kaiya sabolo osoloso kodolo sabolo misigaloso ka sibalala?"

<sup>49</sup> Esino ayo biame susuga tei moso ma kulodu eligimo sileeme, niyo a egeliso. Esiga bei kaseme niyo a omapoo telega ka poogoowo? Esino niyo epei a talame simi hagoso Godeeyo to booka mapoo hogugu oso taka to sabolo olo tobuoso," diso.

<sup>50</sup> Esem Yesu o hamamee dili odoo susuga oso yo poogoloso kukulo diyadeeso.

<sup>51</sup> Osoloso odoo gie kauwa dugo booloso, Yesu diayo toloso dime hamamee deede diso. Esem diayo yo ogoloso, yibolo talame o dugo mapoo temeleso, o dugo puobuguso.

<sup>52</sup> Esino o dugo dimapoo yane poogoloso, yo boodo diwe piase.

*Yesu wiligi odoo tebisa mapoo goo midilame ido di*

(*Mat 26:57-68; Luka 22:54-55, 63-71; Yon 18:13-14, 19-24*)

<sup>53</sup> Osoloso diayo Yesu toloso tei moso wiligi odoo taba eyo mosopoo ido diso. Esiga moso ee ma kulodu tei moso wiligi odoo tebisa sabolo, Yu odoowo wiligi odoo tebisa sabolo, osoloso tei eligili odoo oso daga olo mooloogoodoloso debeiso.

<sup>54</sup> Esem Pitaye hamamee Yesu deede dileso, tei moso wiligi eyo moso eyo beele ma kulodu gadiso. Yo omapoo badolone, tei moso gidebeli odoo sabolo kekeisime dou hameleso.

<sup>55-56</sup> Esem tei moso wiligi odoo tebisa sabolo, osoloso Yu odoo dia goo midili wiligi tebisa oso Yesuwo goo maga gamene takeli odoo ee esiaso, yimapoo goo tokenee hee mologa, Yesu ka wooloomalame. Egeeseelone edebeeyo wulo gameene takolone Yesuwo goo maga goo opusomo opusomo di takaso. Esino diayo taka ee ma kulodu, tei goo hee molo egele.

<sup>57</sup> Esino odoo aboso tebisaloso, Yesuwo goo maga gamene egeese takaso,

<sup>58</sup> "Iba odoo hagoso egeese takeme duso, 'Edebeeyo tei moso tegei hagee ayo guobuguloso, see biame bakadio hedebe di ee ma kulodu tei moso dia tegelaiso. Esino edebeeyo tegelaimo,' yayo dee takeme duso," diso.

<sup>59</sup> Esino diayo to opusomo opusomo di taka ee ma kulodu tei goo egele.

<sup>60</sup> Esemе tei moso wiligi odoo taba oso odoo susuga mooloogoodoo ma kuloduga toboloso Yesu mapoo egeesee woosaso, “Odoо hagee biaso nee goo maga goo opusomo opusomo di egee takoo mapoo nayo to eyo nei takalaimeyo?” diso.

<sup>61</sup> Esino Yesuye to nei takele poo-gooso.

Esemе tei moso wiligi odoo taba oso to see Yesu mapoo egeesee woosaso, “No Godeeyo owolo, Kelisosomo?” diso.

<sup>62</sup> Esemе Yesuye to nei egeesee takaso, “O, aso. Esiga hamamee Odoо Holo, a Kitulugu Godeeyo dee deede dokolo mapoo buloso yibolo wiligi doloso badoga niyo agalaiso, osoloso Kei mi ma dokodooga, kolobo ma kuloduga see wedi siboga niyo agalaiso,” diso.

<sup>63</sup> Esemе tei moso wiligi odoo taba oso to hagee duloso, diya komonolone o dugo tologo buguloso egeesee takaso, “Iyo o goo see midilame to abo taka ee dulei koo goomogo.

<sup>64</sup> Bei yayo ‘a Godeeyo owolo oso’ dee taka maga, yayo Godee mapoo mesilega osoloso ebilega to tokenee taka, niyo olo duso. Esiga niyo goolee yimapoo ogoо goo moodolaiyo?” diso.

Esemе Yu odoo dia wiligi odoo tebisa susuga oso egeesee takaso, “Yesu diya tokenee odoo, esiga yo wooloomalai tekepo,” diso.

<sup>65</sup> Esemе odoo aboso Yesu mapoo makawo pagaso. Osoloso diayo o howo dugoso gagaloso, dibada dee tiadoo oso woolone yimapoo egeesee takaso, “Keliso, no tei Godee maga to tolosokokodo takomo sili odoo daga, no odoo agayo woolo?” dee takaga meleeso. Osoloso tei moso gidebeli odoo oso yo ido dulone woomodiso.

<sup>66-67</sup> Osoloso Pita yo tei moso wiligi odoo taba eyo moso beelee ma kulodu kekeisime dou holone badebeiso. Esemе tei moso wiligi odoo taba o tou teli sobo heeso sibilesos yimapoo medee bolone, egeesee takaso,

“No nose Nasalet odoo Yesubolo silee odoo hee noso,” diso.

<sup>68</sup> Esemе Pitaye sobo yimapoo gamenee egeesee takaso, “Nayo egee takoo eyo goo ee, a gooleedele,” diso. Osoloso Pita yayo egeesee takoloso, moso beelee osulu gasibili pee mapoo diso. Esemе kolokolo takaso.

<sup>69</sup> Osoloso tei moso wiligi odoo taba eyo tou teli sobo hagosos Pita see omapoo tebidi ogoloso, yayo odoo abo omapoo tebisamelee mapoo egeesee takaso, “Odoо hagee tei Yesubolo sili hee yoso,” diso.

<sup>70</sup> Esemе Pitaye see egeesee takaso, “Haye! Asonnee,” diso.

Esemе diba pepooko dobosos hamamee, odoo abo koola omapoo tebisamelee oso Pita mapoo see egeesee takaso, “Bei no Gelili odoo osoloso Yesu sabolo Gelili odoo, esiga no Yesubolo sili odoo hee noso,” diso.

<sup>71</sup> Esemе Pitaye to kitulugu sabolo egeesee takaso, “Ayo tei goo takel-ega poogooga, Godeeye amapoo dala toowa tenelai goomogo! Niyo odoo egee takoo a gooleedele!” diso.

<sup>72</sup> Osoloso Pita yo egeesee takoloso epedee omapoo, kolokolo taka bakadio diso. Esemе Pita Yesuye yimapoo to taka hagee gooleebuguso, “Epei gesi kolokoloso taka bakadio delega, malalo hoogoo mologa, nayo mo goo gagadilei ee bakadio hedebe dalaiso.” Esemе Pitaye to hagee gooleebugume, goohele toowa sibume, diya pisaso.

## 15

*Pitaye Yesuwo goo gagadi*  
(Mat 26:69-75; Luka 22:56-62; Yon 18:15-18, 25-27)

*Yesu Paillet mapoo ido di*  
(Mat 27:1-2, 11-14; Luka 23:1-5; Yon 18:28-38)

<sup>1</sup> Osoloso gesikolodee mapoo tei moso wiligi odoo tebisa sabolo, osoloso tei eligili odoo sabolo, osoloso Yu odoo dia wiligi odoo tebisa sabolo, osoloso wiligi odoo tebisa abo susuga oso goo hee moodoolai to mouso. Osoloso diayo to mouloso, Yesuwo dee tiso tiegisaloso, Loum gamalee mi toowa wiligi odoo taba, Pailteeye badebei mapoo ido dileso yimapoo teneeso.

<sup>2</sup> Esem Pailteeye Yesu mapoo egeesee woosaso, “No tei Yu odoo dia wiligi odoo taba nosomo?” diso.

Esem Yesuye nei egeesee takaso, “O, no olo egee takooso,” diso.

<sup>3</sup> Esem tei moso wiligi odoo tebisa oso Yesu tokenee goo bei tooso doloso, diya gigidiso.

<sup>4</sup> Esem Pailteeye see Yesu mapoo egeesee woosaso, “No odoo susuga oso nee goo maga goo opusomo opusomo di egee takoo omapoo nayo to nei takalaimeyo?” diso.

<sup>5</sup> Esino Yesuye to nei takele. Esem Paillet yayo goo egee ogoloso diya dio diso.

*Pailteeye Yesu wooloomalame woosa*

(*Mat 27:15-26; Luka 23:13-25; Yon 18:39–19:16*)

<sup>6</sup> Dugo susuga ma kulodu Pailteeye Yu odoo goomogalame, Godeeye Gababia wo ne biame mapoo odoo susuga oso goomoga odoo hee neliga moso ma kuloduga peegoo tamageeye deliso.

<sup>7</sup> Biame omapoo odoo hee neliga moso ma kulodu badebeiso, o hu Balabas. Daga yayo o odoo sabolo oso Loum gamalee odoo mapoo ha temeleso, diayo odoo hee wooloomaso.

<sup>8</sup> Esem odoo mooloogoodoo oso sibilesa, Paillet mapoo egeesee takaso, “Nayo odoo hee neliga moso ma kuloduga peegoo tamageliso. Esiga nayo dugo hamapoo odoo hee neliga moso maga peegoo tamagee,” diso.

<sup>9-10</sup> Egeesi ma kulodu tei moso wiligi odoo tebisa oso Yesu mapoo

koolone, yo Paillet mapoo ido simi goo ee, yo ogoloso olo gooleedooso. Esem Pailteeye odoo susuga mapoo egeesee woosaso, “Ayo Yu odoo nibada wiligi odoo hagee peegoo tamagalai, niba goomogosomo?” dee takaso.

<sup>11</sup> Esino tei moso wiligi odoo tebisa diayo odoo susuga mapoo toso pupulone, Paillet mapoo egeesee takee diso, “Iba Yesu gowoo, esino Balabas neliga moso ma kuloduga peegoo tamageeye, dee takee,” diso.

<sup>12</sup> Esem Pailteeye dimapoo egeesee woosaso, “Ayo Balabas yo neliga moso ma kuloduga peegoo tamagooga, odoo hee hagee niyo Yu odoowo wiligi odoo taba deli ee, ayo kasee moodoolaisomo?” dee takaso.

<sup>13</sup> Esem nei diayo to neligidi takolone Paillet mapoo egeesee takaso, “Yo homo bulubo magoo ma dokodoo yoguso enige!” diso.

<sup>14</sup> Esem Pailteeye egeesee woosaso, “Bei kasi magayo? Yayo ogoogo tokenee toowo?” diso.

Esino odoo susuga oso to diya neligidi egeesee takaso, “Yo homo bulubo magoo ma dokodoo yoguso enige!” diso.

<sup>15</sup> Esem odoo susuga goomogalame, Pailteeye Balabas yo neliga moso maga peegoo tamagooso. Osoloso yayo o ha teli odoo mapoo takolone, Yesu we tiso wooloso homo bulubo magoo ma dokodoo yoguso enige, dee takaso.

*Ha teli odoo oso Yesu mane*  
(*Mat 27:27-31; Yon 19:2-3*)

<sup>16</sup> Esem Paillet o ha teli odoo oso Yesu we tiso wooloso Loum gamaleeyo moso mapoo ido palaso. Osoloso omapoo ha teli odoo susuga gilimadoloso mooloogoodooso.

<sup>17</sup> Osoloso diayo Yesu manolone gamenee yo wiligi odoo taba masi palame, kali dugo bige sage ee yimapoo kadiloso, we ti sidoloso o wiligi mapoo kadiso.

<sup>18</sup> Osoloso diayo Yesu mapoo manolone egeesee takaso, “Yu odoo



dia wiligi odoo taba, iyo nee hu dokodoo poudoso,” dee takaga meleeso.

<sup>19</sup> Osoloso Yesuwo wiligi mapoo diayo weiso see woo see woo dolone, yimapoo makawo paga demeleeso. Osoloso diayo Yesu mapoo manolone o mudugiyopoo dibada ebiso miyomoo tugusaloso wiligi gauwuloso gamenee yimapoo tei to demeleeso.

<sup>20</sup> Egeesee soloso koodobuloso ha teli odoo oso dugo Yesuye ka ee tamagoloso see Yesu o dugo kadiso. Osoloso yo homo bulubo magoo ma dokodoo yoguso enigilame ido diso.

*Yesu homo bulubo magoo ma dokodoo yoguso eniga*

*(Mat 27:32-44; Luka 23:26-43; Yon 19:17-27)*

<sup>21</sup> Osoloso ha teli odoo oso Yesu idoloso diyadaga meleeno, diayo Saimon eli domopoo Yelusalem mapoo sibumolome tugodooso. Osoloso diayo yo idoloso Yesuwo homo bulubo magoo imado diye, diso. (Saimon hagee Alesanda dio Lupus dio dibada ama. Yo Kulene mi mapoo badeli odoo.)

<sup>22</sup> Osoloso diayo Yesu toloso Golgota mi mapoo ido simiso. (Mi hu eyo bei ee wiligi ki mi.)

<sup>23</sup> Osoloso mi omapoo ido dilesa, diayo Yesu mapoo sibilesa wain i sabolo dala mauwe pegeli meleesene sabolo wuluguloso, Yesu mapoo tenelame siso. Esino Yesuye wain i egee nele poogooso.

<sup>24-25</sup> Esemme gesikolo osoko howo bakadio hedebe di poogoloso osoko pouneme, diayo Yesu homo bulubo magoo ma dokodoo yoguso enigaloso tuluguso. Osoloso Yesuwo dugo pilame, diayo yoso dasigeli hee dasigaso.

<sup>26</sup> Osoloso edebeeyo Yesu woolooma goo eyo bei ee odoo susuga oso gooleedalame, odoo heeso Yesuwo wiligi oo poogoo

dokodooga to egeesee hoguguloso kalamaso,

“Yu odoo dia wiligi odoo taba.”

<sup>27</sup> Osoloso mesiya bakadio sabolo homo bulubo magoo ma dokodoo yoguso enigaso. Odoo hee Yesuwo dee deede dokolo tulugu, osoloso odoo hee o dee dobusu dokolo tulugu diso. [

<sup>28</sup> Esiga Godeeyo to booka mapoo hogugu oso egeesee takooso,

“Yo mesiya masi talaiso.” Esiga Yesuye mesiya masi talame homo bulubo magoo ma dokodoo molone, to hagee tei diso.]\*

<sup>29</sup> Osoloso odoo aboso eli omaga dulone, Yesu ogoloso manolone dia wiligi wabisaso. Osoloso diayo yimaga to tokenee yimapoo takaga meleeso. Egeeseelone diayo yimapoo egeesee takaso, “Nayo takolone, tei moso ee guobuguloso, biame bakadio hedebe di ee ma kulodu see dia ka tegelaigona, dee taka.

<sup>30</sup> Esiga no telega pagalame homo bulubo magoo ma dokodooga miyomoo mei!” diso.

<sup>31</sup> Osoloso tei moso wiligi odoo tebisa sabolo, osoloso tei eligili odoo dibolosee Yesu manolone dieso dimapoo egeesee takaso, “Yayo odoo abo pidimo siliso. Esino yo epedee eyo nediliyo pidilei tebledoo.

<sup>32</sup> Keliso, Isalael odoo ibada wiligi odoo daga, yo homo bulubo magoo ma dokodooga miyomoo meilei tekepo. Egeeseega yayo mou ogoloso iyo yimapoo tei talaiso,” diso. Esemme mesiya bakadio oso, homo bulubo magoo ma dokodoo yoguso enigaloso molone, dibolosee Yesu mapoo maneso.

*Yesuye ta*

*(Mat 27:45-56; Luka 23:44-49; Yon 19:28-30)*

<sup>33</sup> Osoloso osoko olo oo domopoo tooboome, mi toowa egee nolugo

**15:21:** Loum 16:13    **15:24-25:** Psa 22:18    **15:27:** Isa 53:12    \* **15:28:** To hagee odoo abo oso taka Makaye hogugu dee takeliso, esino odoo bei oso taka Makaye hogugule dee takeliso.    **15:29:** Psa 22:7; 109:25; Maka 14:58    **15:34:** Psa 22:1

doloso melee, osoko howo bakadio hedebe di poogooso.

<sup>34</sup> Osoloso neliga melee ee mauwe poogoome, Yesuye o to oso neligidi egeesee iso, “Eloi, Eloi, lama sabakatani?” To hageeyo bei ee egeesi moloso, “Mo Godee, mo Godee, bei kasi maga nayo a ka pagala?” diso.

<sup>35</sup> Esemе odoо koola omapoo tebisa melee oso to hagee duloso, diayo egeesee takaso, “Dui! Yo Ilaya i,” diso.

<sup>36</sup> Esemе odoо heeso hoguo dileso dugo toloso wain i mei nali mapoo olugu doloso homo sage su mapoo tialogoloso Yesuye nalame o maga mapoo heligiso. Osoloso yayo egeesee takaso, “Ougo. Ilayaye sibilesa yo toloso miyomoo mouwa beleso bamo,” diso.

<sup>37</sup> Esemе epedee omapoo Yesuye neligidi iloso taso.

<sup>38</sup> Esemе Yesuye ta biame omapoo, tei moso tegei ma kulodu dugo kodia oso kisi melee ee, dokodooga eyo tologomo abaga mouno miyomoo sabuguso.

<sup>39</sup> Esemе ha teli odoо gibadeli odoо oso Yesuwo homo bulubo magoo ma koola omapoo tobudulone, Yesuye tolone goo moodoo ogoloso, yayo egeesee takaso, “Tei takoo, odoо hagee tei Godeeyo owolodoo,” diso.

<sup>40-41</sup> Esemе sobo abo Yesubolo Gelili abaga Yelusalem mapoo sibadee oso, eli sage abaga Yesu homo bulubo magoo ma dokodoo molome balaga meleeso. Sobo mooloogoodoo egee ma kulodu debei, dibada hu Meli-Magadalin sabolo, osoloso Meli hee (Yemes pepooko dio Yosep dio dibada owee) sabolo, osoloso Salome sabolo, diayo Yesu mapoo bameleeso. Sobo bakadio hedebe di hagoso daga Yesubolo Gelili mapoo silone, Yesu pidimo siliso.

*Yesu midoo ma kulodu toosoo*  
(*Mat 27:57-61; Luka 23:50-56; Yon 19:38-42*)

<sup>42-43</sup> Yu odoowo hasali biame malalo hoogoo molome, diayo tei doloso dabalame bi mopoodoo doo biame habe omapoo, Yosep Alimatiya odoо yayo Paileteeye badebei omapoo diso. Yo Yu odoowo wiligi toboloso badolone, Godeeye wiligi doloso badeli oso sibilei omapoo bameli. Yayo ebilega Yesuwo kou talame Pailet mapoo woosaso.

<sup>44</sup> Esemе Yosepeeye Yesu taso dee takeme, Pailet diya hoowaso. Bei, Paileteeye goolee Yesu tele, dee gooleeso. Esino Yesu olo saga taso. Esemе yayo ha teli odoо gibadeli odoо Yesuye ta egei mapoo egeesee woosaso, “Yesu taso dee takemeni teiyo?” diso.

<sup>45</sup> Esemе ha teli odoо gibadeli odoо oso Yesu tei taso dee takeme, Paileteeye Yosep mapoo egeesee takaso, “Yesuwo kou todi,” diso.

<sup>46</sup> Esemе Yosepeeye dugo sage medee tekepo moleeso toloso, Yesuwo kou homo bulubo magoo ma dokodooga miyomoo tomeilesa, dugoso tiadooso. Osoloso yayo Yesuwo kou toloso wulu ou sage yoso moodoo ma kulodu magooso. Osoloso yayo yo toowa bidigamo dileso, wulu ou miyopoo kisiso.

<sup>47</sup> Osoloso Meli-Magadalin dio Yosepeeyo owee Meli dio Yesuwo kou magoo mi diayo egeiso.

## 16

*Yesu ta maga hogadi*  
(*Mat 28:1-8; Luka 24:1-12; Yon 20:1-10*)

<sup>1</sup> Osoloso Yu odoowo hasali biame oso dileso koodobuloso, Meli-Magadalin, Yemeseeyo owee Meli, osoloso Salome, diayo sisigageli bi medee tekepo Yesuwo kou mapoo hedilame moleeso misigaso.

<sup>2</sup> Osoloso Sadee toowa biame gesikolodee osoko gie pouneme, diba Yesuwo bi agalame diyadeeso.

<sup>3</sup> Diba eli domopoo diyadulone, dieso dimapoo egeesee takaso, “Yo toowa wulu ou miyopoo kisi ee, odoо

agayo peegoo bidige bigileisomo?" diso.

<sup>4</sup> Esino diba dileso egeino, yo toowa wulu ou miyopoo kisi ee peegoo bidigamo dileso molome egeiso. Yo hagee diya toowa.

<sup>5</sup> Esememe sobo diayo wulu ou ma kulodu galaga dileso egeino, odoo gie kauwa dugo sage heliye mouloso dee deede dokolo badoboome egeiso. Esememe sobo diayo ogoloso, diba diya ebigaso.

<sup>6</sup> Esino yayo dimapoo egeesee takaso, "Niba haga na ebi. A gooleedooso, niba Yesu Nasalet odoo homo bulubo magoo ma dokodoo yoguso eniga odoo ee esiamo silesibo. Esino yo hamapoo koo moloso. Yo ta maga hogado diso. Esiga niba sibilesi o kouso melee mi mapoo ege.

<sup>7</sup> Esiga niyo dileso, Yesu o hamamee dili Pita dimapoo takee, 'Niba Gelili mapoo diyadee. Bei, Yesu yo daga malalo Gelili mapoo duso. Esiga niba dileso Gelili mapoo Yesu agalaiso. Bei, Yesu yayo to hagee daga nimapoo takaso,' " diso.

<sup>8</sup> Esememe diayo goo tiadoo sabolo obulone kikiligolone midoo maga hoguo diyadeeso. Esino diayo eli domopooga diyadulone, odoo hee mapoo to takele poogooso, bei diba obume.

*Yesuye daga odoo abo mapoo dileso peledaba\**

*(Mat 28:9-10; Yon 20:11-18)*

<sup>9</sup> Yesuye sadee toowa gesikolodee mapoo ta maga hogaduloso, yo daga Meli-Magadalin mapoo dileso peledabaso. Meli hagee Yesuye daga telega silone, bo holo 7 o kulodu do-boome, yayo peegoo hasiso bugu sobo yoso.

<sup>10-11</sup> Esememe Meli yayo Yesu ta maga hogaduloso silee ogoloso, Yesuwo hamamee dili odoo diayo goohede sabolo pupusugulone debei mapoo

dileso egeesee takaso, "Yesu ta maga hogaduloso sileeme, ayo egeiso," diso. Esino diayo to hagee duloso, o to mapoo tei tele poogooso.

<sup>12</sup> Osoloso see hamamee Yesubolo silesibili odoo bakadio Yelusalem abaga sibataga molome, Yesu yo mudu opusomo doloso dimapoo peledabaso.

<sup>13</sup> Esememe diayo Yesu ogoloso, diba see wedi dileso, Yesuwo hamamee dili odoo dimapoo diayo Yesu egei takeme, diayo dibada to mapoo tei tele poogooso.

*Yesuye o hamamee dili odoo 11 dimapoo dileso peledaba*

*(Mat 28:16-20; Luka 24:36-49; Yon 20:19-23; Diye 1:6-8)*

<sup>14</sup> Osoloso hamamee, Yesuwo hamamee dili odoo 11 wo nalaga molome, Yesu omapoo dileso peledabaso. Osoloso Yesuye to kitulugu sabolo egeesee takaso, "Niba tei too mauwe odoo! Bei kasi maga odoo abo oso a ogoloso, sibilesi nimapoo takeme, dimapoo tei telega ka poogoowo?" diso.

<sup>15</sup> Osoloso Yesuye dimapoo egeesee takaso, "Niba mi susuga mapoo dileso, to tekepo odoo susuga mapoo takomo di.

<sup>16</sup> Esiga odoo agayo to tekepo mapoo tei toloso howo oluguga, yo badoboso, kookaiyo gie badeli talaiso. Esino odoo agayo to tekepo mapoo tei telega poogooga, Godeeye goo midilei biame mapoo o goo midiloso yimapoo nei dala tenelaiso.

<sup>17</sup> Osoloso edebeeyo to tekepo mapoo tei toga, diayo mo kitulugu sabolo goo toowa opusomo di moodoogamo silesibileiso. Egeesi ma kulodu diayo odoo bo holo oso paladee mo hu maga peegoo hasiso bigileiso. Osoloso diayo to opusomo opusomo di kalagalaiso.

<sup>18</sup> Osoloso dibada deeso sa talaiso, osoloso pei i nalagaga, diba

**16:7:** Mat 26:32; Maka 14:28 \* **16:8:** To hagee odoo abo oso taka Makaye hogugu, dee takeliso. Esino odoo bei oso taka Makaye hogugule, dee takeliso. **16:14:** 1Kol 15:5 **16:15:** Diye 1:8 **16:16:** Diye 2:38 **16:17:** Diye 2:4; 8:7 **16:18:** Luka 10:19; Diye 28:3-6

wedileime. Osoloso odoo paigiga mapoo dibada deeso sigo daga, susuga weido dalaiso,” diso.

<sup>19</sup> Osoloso Lodee Yesuye dimapoo to taka koodobuloso, Godeeyo kitulugu oso yo Kei mi mapoo ido peleso, Godeebolo wiligi doloso badalame, Godeeyo dee deede dokolo peleso biaso. <sup>20</sup> Esem Yesu o hamamee dili odoo oso Yesuwo to ee mesilone, mi susuga mapoo to tekepo takomo diyadeeso. Egeeseelone diayo Lodeeye kitulugu sabolo goo toowa opusomo di moodoogaso. Bei, edebeeyo to tekepo mapoo tei doloso ogoloso gooleedalame.]



## Luka To tekepo Lukaye hogugu

### *Luka booka goo eyo bei*

Odoo Luka hagee Yu odoonee osoloso Yesuwo hamamee dili odoonee. Esino yo melesenee neli odoo badolone o odoo Poloye Godeeyo to takomo sileeme yibolosee silee. Lukaye goo toowa booka hamapoo hogugu ee egeesee moloso. Goo ee, Yesu Kelisoye hedebe Yu odoono pidilame ka sibile. Esino yayo Yu odoo sabolo osoloso mipoo toowa hamapoo debeli odoo susuga sabolo pidilame ka simi. Osoloso dala ma kulodu egee do sabolo osoloso goohele ma kulodu egee do sabolo pidilame ka simi. Osoloso Yesuye odoo susuga mapoo eligimo silee goo ee o booka hamapoo hoguguso.

1-2 Godeeye ima kulodu tou temelee odoo aboso bei mooloogoo maga goo egee ogoloso diba see Godeeyo tou talame, odoo ma kulodu goo egee takomo silesibilame bei mooloogooso. Diayo egee takomo silesibo goo ee iba olo duso. Esemee goo tei duluga odoo sabolo osoloso goo tei egei odoo sabolo oso taka dulosu, diayo goo ee hoguguso.

3-4 Esino goo susuga bei mooloogoo maga ayo medee gooleedooga, ayo to hagee see medee ka hoguga. Esiga Tiyo poles wiligi odoo hu toowa too, nayo du goo ee medee tei goodoo dalame, ayo namapoo to hogugu hagee ka teneeso.

### *Yonee odoo howo oluguli soomagalai goo ee yebugu*

<sup>5</sup> Helodeeye Yudiya mi mapoo wiligi toboloso badebei biame omapoo, Godee ogo odoo ogo doloso domo badeli odoo hee badebeiso, o hu Sekalaya. Yo Godee ogo odoo ogo

doloso domo badeli odoo mooloogoodoo hee Abiyayo mooloogoodoo ma kulodu badebeiso. Osoloso osobowo hu Elisabet, obakadio Elonowo soosoo.

<sup>6</sup> Sekalaya dio Elisabet dio Godeeyo howo woola mapoo tekepo doloso dobolone, Godeeye kokodo taka to sabolo osoloso yayo tei magoo goo ee medee dodolone debeiso.

<sup>7</sup> Esino diba holo soomagelega debeiso. Bei, Elisabet yo sobo deme taba, osoloso sobo adaga poloso badebei. Osoloso Sekalaya onosee olo adaga poloso badebei.

<sup>8</sup> Biame heeso Sekalaya o mooloogoodoo oso tou talai biame simiso. Esemee Sekalayaye Yu odoo dia tei moso mapoo peleso Godeeyo howo woola tobodulone tou temelee.

<sup>9</sup> Osoloso Godee ogo odoo ogo doloso domo badeli odoo oso dima kulodu odoo hee hesilame diayo yo odoo hu ma ee kobumeleso Sekalaya hesiaso. Esemee diayo Sekalaya yo Godeeyo tei moso ma kulodu sisigageli medee tekepo Godee mapoo gigalagalame hesiaso. Esemee Sekalayaye Yu odoowo tei moso mapoo peleso sisigageli medee tekepo gigalegemeleeso.

<sup>10</sup> Esemee yayo sisigageli medee tekepo gigalogomolome, odoo susuga oso tei moso pee mapoo dobolone Godee mapoo takemeleeso.

<sup>11</sup> Sekalaya yo tei moso ma kulodu osee badoboome, Godeeyo momaiye oso sisigageli medee tekepo gigaligili dosulu deede dokolo mapoo peledoboloso tebidiso.

<sup>12</sup> Esemee Sekalayaye momaiye ogoloso dio dulone diya ebiaso.

<sup>13</sup> Esino Godeeyo momaiye oso yimapoo egeesee takaso, "Sekalaya, no haga na ebi! Nayo Godee mapoo taka ee yayo olo duso. Nosobo Elisabet koowasi moodooloso giso holo soomagalaiso. Eseega nayo holope o hu Yonee hedi.

<sup>14</sup> Yayo namapoo goomoga tosbileiso. Osoloso yo soomagooga,

odoo susuga oso goomogalaiso.

<sup>15</sup> Bei, yayo Godeeyo howo woola hu toowa toloso badalaiso. Osoloso yo yugune nalaimo. Esino oweeye yo soomagoo maga bei mooloogoloso Dio Tei oso kitulugu sabolo badalaiso.

<sup>16</sup> Osoloso yayo Isalael odoo see tobu dibada wiligi odoo Godee mapoo gilimado sibileiso.

<sup>17</sup> Yo Ilayaye kitulugu sabolo badebei egeesi masi badolone, Lodeeye sibilei mologa daga malalo yayo sibileiso. Osoloso yayo odoo susuga Lodeeye egee sibo goo omapoo mopoodoo dolone dobolone, ma dio sabolo owolo dio sabolo mesie goo mapoo gilimado sibileiso. Osoloso yayo Godeeyo to mapoo koo mesimo silesibili odoo dia goo goolee ee see Godeeyo howo woola tekepo goo talame dia goo goolee su wudileiso.”

<sup>18</sup> Esino Sekalayaye Godeeyo momaiye mapoo egeesee takaso, “Ayo ogo goo ogoloso nayo egee takoo goo mapoo tei doloso ka gooleedalaiyo? Bei, a olo giso adaga osoloso mo sobo onosee sobo adaga,” diso.

<sup>19</sup> Godeeyo momaiye oso yimapoo nei egeesee takaso, “Mo hu ee Geibulu. A Godeeyo mudugiyopoo badeli. Ayo namapoo to tekepo hagee takalame, Godeeye a sibeye diso.

<sup>20</sup> Esino no dui! No to kelega poogoloso badalaiso. Bei, nayo mo to mapoo koo tei to. Esiga no to kel-ega badoga, ayo namapoo taka goo hagoso peledabalai biame tugodoo omapoo ogoloso see to kalaiso,” diso.

<sup>21</sup> Sekalayaye tei moso ma kulodu badebei diya koodoowoome, odoo aboso peegoo yo bolone dobolone egeesee takaga meleeso, “Yo ogo goo tamalabele?” diso.

<sup>22</sup> Sekalaya tei moso maga gasibilesi, to kelega tobudulone, wulo deeso edidi takaso. Esem odo

susuga oso goo ee ogoloso gooleedooso, yo tei moso tegei ma kulodu badolone o howo opusomo deme, goo hee egeidoo, diso.

<sup>23</sup> Sekalayaye tei moso ma kulodu tou temelee biame ee koodobuloso, yo see o mi mapoo wedi diso.

<sup>24</sup> Osoloso hamamee Sekalayayo osobo Elisabet koowasi moodooloso badolone, a dee tiadoo ma kulodu Elisabeteeye o moso kuloduga peegoo gadile.

<sup>25</sup> Osoloso Elisabet eyo nediliyo egeesee gweliso, “Godeeye a pidiso, osoloso ayo deme toboloso badolone odoo howo woola simili goo ee yayo amaga peegoo togobuguso,” deliso.

### *Yesu soomagalai goo ee yebugu*

<sup>26-27</sup> Elisabet koowasi moodooloso badebei a 6 poogoloso badoboome, Godeeye o momaiye Geibulu sobo obuo Meli mapoo meiye, diso. Meli yo Gelili mi toowa ma kulodu Nasalet mi pepooko mapoo badeli. Esino odoo hee Meli hulame badebeiso, o hu ee Yosep, yo Deibidi dio bala hedebe.

<sup>28</sup> Osoloso Godeeyo momaiye oso meilesi Meli mapoo egeesee takaso, “Emegei, Godeeye sobo no olo hesiaso. Osoloso Godeeye nobolo hodobo badoso,” dee takaso.

<sup>29</sup> Meli to hagee duloso goo tiademe, to hageeyo bei ee diya goolee meleeso.

<sup>30</sup> Esino Godeeyo momaiye oso Meli mapoo to nei egeesee takaso, “Meli, no haga na ebi. Bei, Godeeye namapoo diya goomogoso.

<sup>31</sup> No koowasi moodooloso giso holo soomagalaiso. Osoloso nayo o hu Yesu hedi.

<sup>32</sup> Yayo hu toowa toloso badalaiso. Osoloso yo Godeeyo owolo dalaiso. Osoloso amawe Deibidiye wiligi toboloso badebei goo ee see wiligi odoo Godeeye yimapoo tenelaiso.

<sup>33</sup> Esiga yayo Yekobowo bala ma kulodu wiligi toboloso badalaiso. Osoloso yayo wiligi toboloso badoga hoo pagalai mauwe,” diso.

<sup>34</sup> Esemé Meliye Godeeyo momaiye mapoo to nei egeesee takaso, “Goo hagee amapoo egeesee kasee peledabalaiyo? A sobo obuo, esiga giso dia goo ee a gooleedele,” dee takaso.

<sup>35</sup> Esino Godeeyo momaiye oso yimapoo egeesee takaso, “Dio Tei oso namapoo sibileiso, osoloso Godeeye kitulugu oso no gagalaiso. Esiga nayo holope soomagalame egee see ee tei holo, osoloso yo Godeeyo owolo dalaiso.

<sup>36</sup> Esiga no dui! No nemisi Elisabet goolee. Yo sobo adaga poloso badolone deme toboloso badoso diso. Esino yo epedee koowasi badebei a 6 poogooso.

<sup>37</sup> Bei, Godeeye goo susuga ee moodolai yo teiba,” diso.

<sup>38</sup> Meliye egeesee takaso, “A Godeeyo tou teli sobo. Esiga nayo amapoo taka goo ee amapoo moodolai a goomogo,” diso. Esemé Godeeyo momaiye oso Meli poogoo diso.

#### *Meliye Elisabet agalame di*

<sup>39-40</sup> Osoloso biame amapoo Meli yo mopoodoo doloso Elisabet agalame saga diso. Yo Yudiya esia mapoo peleso, Sekalayaye badebei mi pepooko mapoo peledoboloso, see Sekalayayo mosopoo diso. Yo Sekalayayo mosopoo dileso Elisabet ogoloso emegei di to takaso.

<sup>41</sup> Elisabet Meliye emegei di to taka du domo mapoo holope oso o beliye ma kuloduga dabaso. Osoloso Dio Tei oso Elisabet mapoo sibume, yo kitulugu tooso.

<sup>42</sup> Esemé yayo to neligidi egeesee takaso, “Sobo susuga ma kulodu Godeeye namapoo diya goomogolone, nama kulodu holope egee bado sabolo yimapoo diya goomogoso.

<sup>43</sup> A hu toowa too sobonee. Esino mo Lodeeyo oweeye a agalame simiso. Goo omapoo a diya goomogo.

<sup>44</sup> Esemé nayo amapoo emegei di to takeme, holope mo beliye ma kulodu badebei oso goomogolone dabaso.

<sup>45</sup> Godeeye namapoo peledabalai goo ee takeme duloso tei too maga, Godeeye namapoo goomoga tenelaiso,” diso.

#### *Meliye Godeeyo hu dokodoo poudoolone goomoga tenee*

<sup>46</sup> Osoloso Meliye egeesee takaso, “Mo sooloo ma kuloduga Godee mapoo goomoga to taka.

<sup>47</sup> Osoloso mo dio oso mo Godee mo gie badeli pidili mapoo goomogo.

<sup>48</sup> Bei, yayo o tou teli wuluge sobo a toowa doloso gooleeso.

Esiga epedee hamaga dulone odoosusuga oso a Godeeye pidi sobo dalaiso.

<sup>49</sup> Bei, Kitulugu Godeeye amapoo goo toowa abo olo moodooso.

Yo tei.

<sup>50</sup> Edebeeyo Godee mapoo mesilone dogo,

Godeeye sooloo deli goo oso dimapoo kookaiyo osee malaiso.

<sup>51</sup> Osoloso yayo kitulugu oso goo toowa abo olo moodoogaso.

Osoloso yayo odoosieso nediliyo tekepo doloso si howeli odoosie peegoo hasiso buguso.

<sup>52</sup> Osoloso yayo wiligi odoosie tebisa diayo wiligi dalame kitulugu too hu ee peegoo tabuguso.

Esino odoosieso pepooko doloso debeli odoosie pidilone, diba dokodoo poudooso.

<sup>53</sup> Osoloso yayo nei mauwe odoosie bi tekepo oso pidiso.

Esino bi bei odoosie mosoowe peegoo hasiso buguso.

54-55 Osoloso yayo ibada amawe dio sabolo to kitulugu magoo ee dodolone

o to mapoo mesimo silesibili Isalael odoo pidiso.

Esiga yayo sooloo deli goo oso Eibalaham sabolo osoloso amawe dimapoo kookaiyo moloso osee malaiso,” diso.

56 Meliye Elisabet dio badebei a bakadio hedebe di poogoloso see o mi mapoo wedi diso.

*Yonee odoo howo oluguli soomago*

57 Elisabet damamee ti biame omapoo, yayo giso holo soomagooso.

58 Godeeye Elisabet mapoo goo tekepo moodoo maga o soosoo sabolo, osoloso yima koola mapoo debeli odoo sabolo oso goo hagee duloso, goomoga hodobo Elisabet bolo poudooso.

59 Osoloso giso holo soomagoloso abaga dino biame 8 mapoo diayo holope o kolo koolame mooloo-goodooso. Osoloso diayo holope o hu amamo hu Sekalaya hedilame goomogaso.

60 Esino owee Elisabeteeye egeesee takaso, “Haye, o hu Yonee hedilei,” diso.

61 Esino diayo yimapoo egeesee takaso, “Yonee egee namawe dio eyo hunee,” diso.

62 Osoloso diayo see holope eyo ama mapoo o hu odoo ogu hedileiyo doloso deeso edidi takaso.

63 Esemé Sekalayaye holope eyo hu magalame odoo susuga mapoo dasogo sabolo homo kolo sabolo yimapoo tenee doloso deeso edidi takaso. Esemé yayo holope eyo hu egeesee magooso, o hu Yonee. Esemé odoo susuga oso goo hagee ogoloso dio diso.

64 Esemé epedee omapoo Sekalaya to kelega poogoloso badebei see to kolone Godeeyo hu dokodoo poudoomo sileeso.

65 Osoloso mi omapoo debeli odoo oso goo hagee ogoloso ebigaso. Osoloso Yudiya esia mapoo debeli odoo susuga oso goo hagee duloso to ke-sameleeso.

66 Osoloso goo hagee duli odoo oso goolone egeesee woosaso, “Holope hagee odoo kasi masi badobomobelee,” diso. Bei, diba egeiso, Godeeye kitulugu oso yibolo molome.

*Sekalayaye Godeeyo hu dokodoo poudoolone goomoga tenee*

67 Yoneeyo ama Sekalayaye Dio Tei oso kitulugu toloso badolone malalo hoogoo peledabalai Godeeyo to ee yayo malalo egeesee takaso,

68 “Isalael odoo dia wiligi odoo Godeeyo hu dokodoo poude!

Bei, yayo sibilesi o odoo see eyo gilimadalame neiso tooso.

69 Osoloso Godeeyo tou teli odoo Deibidiyo bala ee ma kuloduga gie badeli pidili odoo kitulugu toowa imapoo olo teneeso.

70 Daga hoogoo Godeeye goo hagee o howo woola todoloso dobolone Godee maga to toloso kokodo takomo sili odoo oso imapoo olo takaso.

71 Esiga imapoo ha teli odoo osoloso imapoo hegili odoo oso kitulugu ee ma kuloduga Godeeye iba peegoo gilimado dileiso.

72-73 Osoloso Godeeye ibada amawe dio sooloo dolone pidileiso diso.

Osoloso yayo Eibalaham dio to kitulugu magoo ee osee goolee malaiso diso.

74 Esiga Godeeye imapoo ha teli odoo ma kuloduga gilimadoloso peegoo dileiso,

iyo Godeeyo tou tolone dobolone ebia goo mauwe poogoloso dabalame.

75 Esiga iyo debei ma kulodu Godeeyo howo woola tekepo



dobolone todolone dabalai tekepo.

<sup>76</sup> Esino mo holo, no odoo susuga oso dokodoo badeli Godee maga to toloso kokodo takomo sili odoo dalaiso.

Bei, Lodee sibilega badoga, daga malalo nayo dileso yayo sibilei goo mapoo odoo mopoodoo dalame gu takala dileiso.

<sup>77</sup> Nayo o odoo gie badeli pidilei goo ee eligileiso.

Goo ee dibada goo tokenee hapooga, gie badeli talaiso.

<sup>78</sup> Godeeye iba sooloo dolone diya goolee moloso.

Esiga Kei mi ma dokodooga yayo hudi magoo odoo oso mi gie hadobuoga osokoso egee pouno egeesee masi imapoo sibileiso.

<sup>79</sup> Godeeye hudi magoo odoo hagoso teli mapoo dili eli omapoo egee do sabolo

osoloso neliga ma kulodu egee do odoo dimapoo pounileiso.

Osoloso yayo iba gilimado dileiso, Godee sabolo mesie dabalame," diso.

<sup>80</sup> Yonee kauwulone o dio oso kitulugu sabolo badebeiso. Yo miwe poogoo mi mapoo badoboso biame oso sibume, Isalael odoo dimapoo to tekepo takalame simiso.

## 2

### *Yesu soomagoo (Mat 1:18-25)*

<sup>1</sup> Biame omapoo Sisa-Ogastas yayo Loum odoo dia wiligi odoo toboloso badolone, odoo susuga eyo hu booka mapoo magalame tei magooso.

<sup>2</sup> Hu tomo di hagee hu tel-ega moloso Kuliniyos yayo Siliya mi mapoo wiligi odoo toboloso badolone daga bei ka mooloogoo.

<sup>3</sup> Esemé odoo susuga dibada midee mapoo dia hu magalame diyadeeso.

<sup>4</sup> Yosep hagee Deibidiyo amawe. Esiga yo Gelili mi ee ma kulodu mi hee Nasalet maga, see Yudiya mi

mapoo mi hee Betilihem mapoo o hu magalame palaso. Bei, Betilihem mi egee Deibidi o soosoo dibada midee.

<sup>5</sup> Yo Meli hulame dadagoloso dia hu magalame palaso. Esino Meli yo olo koowasi moodooloso badebeiso.

<sup>6</sup> Diba Betilihem mi mapoo dileso peledoboloso omapoo doboome, Meli damamee tiso.

<sup>7</sup> Osoloso yayo holope daga malalo giso holo soomagooso. Holope soomagoloso dugoso tiadoloso gala hu nei nedili moso tegei eyo kulodu howogi masi mapoo tiediso. Bei, odoo soo oso sibileso tieli moso ee ma kulodu debi mauwe neme.

### *Sipi be bali odoo oso Yesu soomagoo goo ee du*

<sup>8</sup> Yesu soomagoo gesi omapoo sipi be bali oso Betilihem mi koola mapoo dibada sipi be balaga meleeso.

<sup>9</sup> Esemé Godeeyo momaiye oso saga epedee omapoo dimapoo sibileso peledabaso. Osoloso Godee yayo toowa doloso badeli goo omaga o gadeebugu oso diba teme, diya ebigaso.

<sup>10</sup> Esino momaiyeso dimapoo egeesee takaso, "Niba haga na ebi. Bei, odoo susuga oso goomogalame ayo nimapoo to tekepo tosiba.

<sup>11</sup> Epei Deibidiyo mi mapoo odoo susuga eyo gie badeli pidilei holope ee soomagooso. Yo Keliso Lodee.

<sup>12</sup> Yo dugoso tiadoloso gala hu nei nedili howogi masi mapoo tiamologa ogoloso gooleedalaiso," dee takaso.

<sup>13</sup> Osoloso epedee saga omapoo momaiye mooloogoodoo toowa oso Kei mi maga sibileso, momaiye daga malalo simi sabolo hodobo mooloogoodooso. Osoloso momaiye susuga oso Godeeyo hu dokodoo poudoolone egeesee takaso,

<sup>14</sup> "Kei mi ma dokodoo badeli Godee mapoo goomoga poude!

Osoloso mipoo hamapoo Godeeye goomoga odoo dimapoo mesie goo oso mele dee," diso.

15 Osoloso momaiye susuga oso diba poogoloso Kei mi ma dokodoo see wedi paladeeso. Esem sipi be bali odoos oso dieso nediliyo egeese takaso, “Iba Betilihem mi mapoo Godeeye imapoo taka goo ee peledaba beleso agalame dimo,” diso.

16 Esem diba saga dileso egeino, Meli dio Yosep dio holope gala hu nei nedili howogi masi mapoo tiedi molome egeiso.

17 Osoloso diba dileso holope ogoloso momaiyeso holopeyo goo dimapoo taka ee see diayo odoos abo omapoo debei mapoo takaso.

18 Esem sipi be bali odoos oso holope eyo goo takeme duloso odoos susuga diya howoogadooso.

19 Esino Meli yo goo hagee duloso biame susuga ma kulodu boobado bigilega osee goolee meleeso.

20 Esem sipi be bali odoos diba see wedi dulone, diayo du goo sabolo osoloso diayo egei goo omaga Godee mapoo goomoga toowa poudooso. Bei, diayo egei goo susuga ee momaiyeso taka goo sabolo teibaneme.

### *Yesu yo tei moso mapoo ido pala*

21 Osoloso holope soomagoloso abaga dino biame 8 mapoo o kolo kooso. Osoloso yo Yesu hediso. Bei, daga yo Meliyo beliye ma kulodu mauwe mapoo momaiyeso hu hagee olo hediso.

22-24 Meli dio Yosep dio Moseseeye tei magoo ee dodolone Godeeyo howo woola tokenee mauwe dabalame, mopoodoo doo biame koodobuloso, diayo Yesu idoloso Yelusalem mi mapoo diso. Osoloso diba Yu odoowo tei moso mapoo peleso, diba see Godeeyo howo woola tokenee mauwe dabalame, só bakadio wooloso Godee mapoo teneeso. Bei, Godee o tei magoo oso egeese takaso, “Niba molo bakadio o, wi

pepooko bakadio wooloso amapoo tenee,” deeso. Osoloso diba tei moso tegei mapoo peleso, Yesu see Godee mapoo teneeso. Bei, Godee o tei magoo oso egeese takaso, “Malalo sooloo ga magoo giso holo susuga Godee mapoo tenee,” deeso.\*

25 Biame omapoo Yelusalem mi mapoo adaga hee badebeiso, o hu Simiyon. Yo Godeeyo howo woola tekepo doloso badolone, hedebe Godeeno diya goolee sabolo badeliso. Esino yayo Godeeye Isalael odoos mapoo hegi goo melee ee togobigilame biame oso sibilei ee bolone bameleeso. Osoloso Dio Tei oso yibolo badebeiso.

26 Esino yo adaga poloso telega badolone, Godeeye hesia Keliso yo agalai goo ee Dio Tei oso yimapoo olo takaso.

27 Osoloso Dio Tei oso Simiyon yo tei moso tegei mapoo ido diso. Osoloso Meli dio Yosep dio oso tei magoo ee dadalame holope Yesu yo tei moso mapoo ido palaso.

28 Esem adaga Simiyoneeye Yesu ogoloso maduloso Godee mapoo goomogolone to egeese takaso,

29 “Godee nayo takolone a Keliso ogoloso ka talai diso.

Esiga epei nee tou teli odoos ayo mesie sabolo talai tekepo.

30-31 Bei, mo howoso gie badeli pidili odoos ee nayo odoos susuga mapoo tenee a egeiso.

32 Yo gadeebugu, Yu odoonee dimapoo Godeeyo goo ee yilige bigilame.

Osoloso yimaga nee Isalael odoos diba dokodoo poudileiso,” diso.

33 Yesuwo ama dio owee dio Simiyoneeye taka to duloso diya howoogadooso.

**2:19:** Luka 2:51    **2:21:** Luka 1:31    **2:22-24:** Exo 13:2, 12; Lev 12:1-8    \* **2:22-24:** Yu soboso Moseseeye tei magoo ee dodolone giso holo soomagooga, yo biame 40 ee ma kulodu kee koododilega, o moso mapoo obusomo badeliso. Osoloso biame oso koodobuoga, see kee koododilame, Yu odoos dia tei moso mapoo dileso Godee mapoo emegei di bi teneliso.    **2:30-31:** Isa 52:10; Luka 3:6; Tait 2:11  
**2:32:** Isa 42:6; 49:6; 52:10    **2:34:** Isa 8:14; Mat 21:42; 1Pita 2:8

<sup>34</sup> Osoloso Simiyoneeye Godeeye diba pidilame takoloso Meli mapoo egeesee takaso, “Godeeye holope hagee hesiaso, Isalael odo aboso holope hagee gowooga, Godeeye diba pepooko dalame. Osoloso odo aboso holope hamapoo tei toga, Godeeye diba dokodoo poudileiso. Esiga odo aboso o goo talai gowoolone yimapoo ha talaiso.

<sup>35</sup> Goo egeesi maga dibada sooloo ma kulodu egee molo goo ee woola yilige bigileiso. Osoloso goohele goo oso nee sooloo mapoo kaiyaso heleegee masi halagalaiso,” diso.

<sup>36</sup> Osoloso domo omapoo Godee maga to tolosokokodo takomo sili sobo hee tei moso tegei ma kulodu badebeiso, o hu Ana. Sobo yo o bala Asel. Osoloso amamo hu Panuwel. Yo sobo adaga polosobadebeiso. Yo daga gisoso huloso dugo 7 ma kulodu omobolo badoboso, omo taso.

<sup>37</sup> Esemeyayo badebei dugo 84 poogoloso, omapoo yo bau osee badebeiso. Yo biame susuga tei moso tegei mapoo howo gisimo silone, biame sabolo osoloso gesi sabolo Godeeyo hu dokodoo poudoolone nei tei yuloso badolone Godee mapoo takemeleeso.

<sup>38</sup> Osoloso Simiyoneeye Meli dio Yosep dio to kesamolome, yo domo omapoo simiso. Yo sibilesogodee mapoo goomoga to takaso. Osoloso Yelusalem mi eyo hegi goo ee ma kuloduga gilimadoloso peegoo dilame balagamelee odo dimapoo Yesuwo goo takaso.

<sup>39</sup> Yosep dio Meli dio Godeeye taka tei goo susuga tolosokoodobuloso, see Gelili mi ee ma kulodu dia midee Nasalet mapoo wedi diso.

<sup>40</sup> Osoloso holope oso kitulugu sabolo kauwuloso goo goolee medee tekepo yimapoo meleeso. Osoloso Godeeye yo sooloo dolone pidimeleeso.

*Yesu yo pepooko mapoo tei moso mapoo peleso badebei*

<sup>41</sup> Dugo susuga ma kulodu biame hedebe mapoo Yesuwo owee dio ama dio Yelusalem mapoo Godeeye gababia wo nalame diliso.

<sup>42</sup> Osoloso dugo hee mapoo diba see gababia wo nalame dime, Yesu yo dibolo diso. Biame domo omaga Yesu o dugo 12.

<sup>43</sup> Gababia wo ne biame koodobume, diba see wedi diso. Esino Yesu yo dibolo dilega, Yelusalem mapoo badebeiso. Yesuye Yelusalem mapoo badebei owee dio ama dio gooleedele.

<sup>44</sup> Esino ama dio owee dio goolee, Yesu odo abo sabolo malalo di bele dolone, diba noseedisobolo. Diba dileso eli domopoo tilame dobolone, diayo dia soosoo ma kulodu osoloso dia odo ma kulodu Yesu esiaso.

<sup>45</sup> Diba omapoo Yesu esiameleeso koo egeme, see Yelusalem mapoo Yesu esilame wedi diso.

<sup>46</sup> Osoloso biame bakadio hedebe di poogoloso hamamee diayo Yesu Yu odo dia tei moso mapoo Yu odoowo tei eligili odo abo sabolo to kolone doboome egeiso. Ee ma kulodu Yesuye tei eligili odo oso eligi goo ee dulone badolone, yayo nei dimapoo woosa demeleeso.

<sup>47</sup> Osoloso nei tei eligili odo oso woosa to eyo nei dimapoo medee tekepo wedi di duloso, osoloso o goo goolee tekepo ogoloso odo susuga oso diya howoogadooso.

<sup>48</sup> Yesuwo owee dio ama dio oso Yesuye tei eligili odo sabolo to kolone badoboome ogoloso dio diso. Esemeweeye egeesee takaso, “Mo holo, nayo kasalame goo egeesee imapoo ka moodoowo? Nama asalo no esiamo silone diya kukuda sabolo sileeso,” diso.

<sup>49</sup> Esino Yesuye nei dimapoo egeesee takaso, “Niyo kasalame a ka esiamo sileeyo? Ayo mo mayo moso mapoo badalai goo ee niba gooleedeleyo?” diso.

<sup>50</sup> Esino Yesuye taka to eyo bei diba medee kibiya gooleedele.

<sup>51</sup> Osoloso Yesu see dibolo hodobo Nasalet mapoo wedi diso. Osoloso omapoo badolone, dibada to mapoo mesimo sileeso. Esino Meliye goo susuga hagee biame susuga osee goolee sabolo badebeiso.

<sup>52</sup> Yesu yo kauwulone goo goolee tekepo sabolo kauwaso. Esem Godee sabolo osoloso odoo sabolo oso yimapoo diya goomegeliso.

### 3

*Yonee odoo howo oluguli oso to taka*  
(*Mat 3:1-12; Maka 1:1-8; Yon 1:19-28*)

<sup>1</sup> Sisa-Taibiliyeseeye Loum wiligi toboloso badebei dugo 15 poogoloso, odoo abo hagee bia oso yima hemi wiligi tebisaloso debeiso. Pontiyus-Paileteeye Yudiya mi bameleeso, osoloso Helodeeye Gelili mi bameleeso, osoloso omolo Piliyiye Ituliya mi sabolo Talakonitis mi sabolo bameleeso. Osoloso Lisaniyaseeye Abilene mi bameleeso.

<sup>2</sup> Osoloso Anas dio Kayapas dio Yu odoo dia tei moso wiligi toboloso debeiso. Biame omapoo Sekalayayo owolo Yonee miwe poogoo mi mapoo badoboome, Godeeye o to yimapoo teneeso.

<sup>3</sup> Esem yayo dileso Yoden howo koola ogolone debeli mi mapoo Godeeye to takomo silone, odoo susuga mapoo egeese takomo sileeso, “Nibada tokenee mapoo miligi pialoso howo ogusige. Eseega Godeeye nibada tokenee hapoloso boobado bigileiso,” dee takemeleeso.

<sup>4</sup> Goo hagee Godee maga to tolosokokodo takomo sili odoo Aisayaye o booka mapoo hogugu to sabolo tobuoso. Bei, yayo o booka mapoo hageese hoguguso,  
“Miwe poogoo mi omaga edebeeye egeese idagoo,

‘Lodee yayo sibilei eli moodee,  
osoloso medee hoodo magee.

<sup>5</sup> Osoloso mi godobia mologa, omapoo mi abo kuge.

Osoloso eli mapoo esia mologa, esia egee gebese.

Osoloso eli halaga medee hoodo magee.

Osoloso eli tokenee medee moodee.

<sup>6</sup> Eseega odoo susuga oso gie badeli pidili Godee maga simi agalaiso,’ diso.”

<sup>7</sup> Odoo mooloogoodoo Yoneeye diba howo ogusigilame sibademe, yayo dimapoo egeese takaso, “Niba hebise, nimapoo odoo agayo takolone howo ogusiga goo oso Godeeye kamana goo egee sibo maga mada pia dabalaiso, dee ka takana?”

<sup>8</sup> Esiga niyo debei goo maga nibada goo tokenee mapoo tei miligi pia goo ee eligi. Osoloso niba niso nediliyo iba Eibalahameeye amawe dioga, Godeeye kamana maga mada pia dabalaiso dee na goolee. Bei, ayo nimapoo taka. Godee yimapoo kitulugu moloso, yo hagoso see Eibalahameeye amawe dio palai.

<sup>9</sup> Esiga kabee homo bei mapoo olo magoo moloso. Esiga homo kaso ko tekepo pelega mologa, homo egee holoso dou mapoo toodalaiso,” diso.

<sup>10</sup> Esem odoo susuga Yoneeye taka to ee duloso nei egeese takaso, “Egeeseega iba ogoo goo moodoolaisomo?” diso.

<sup>11</sup> Esem Yoneeye nei dimapoo egeese takaso, “Namapoo sedi bakadio mologa, nee odoo sedi me daga, hee yimapoo tenee. Osoloso namapoo nei mologa, nee odoo hee nei me daga, abo yimapoo tenee.”

<sup>12</sup> Osoloso tekisi molee misigeli odoo abo diba nosee howo ogusigilame sibilesi Yonee mapoo egeese takaso, “Eligili odoo, iba ogoo goo moodoolaisomo?” diso.

<sup>13</sup> Esem Yoneeye nei egeese takaso, “Niyo odoo mapoo tekisi molee misigaga, hodio niyo talai ee goolone tekisi molee magalame tobuloso magoo ee na dagapele.



Esino hedebe teiba ono odoo mapoo ka misige,” diso.

<sup>14</sup> Osoloso ha teli odoo aboso Yonee mapoo egeesee takaso, “Iba nose ogoo goo moodoolaisomo?” diso.

Eseme Yoneeye nei dimapoo egeesee takaso, “Niyo emegei dia molee heli talame na seesee. Osoloso emegei dia molee heli talame dimaga gamenee goo na takee. Esino hedebe niso tou too eyo nei molee ee tolone goomoga sabolo ka debbee,” diso.

<sup>15</sup> Odoo susuga oso Keliso bolone debei mapoo Yoneeye simi ogoloso, diayo goolee yo Keliso bele dee gooleeso.

<sup>16</sup> Eseme nei Yoneeye dimapoo egeesee takaso, “Ayo niba howodeeso oluguliso. Esino odoo hee ama hamamee egee sibo yayo kitulugu oso ayo kitulugu dagadi. Esiga ayo o homo beiyopoo gauwuloso o homo bi ee pidigilei a tebile. Osoloso yayo Dio Tei nima kulodu tenelaiso. Esino yayo yimapoo tei tele poogoo odoo ee dou mapoo toodalaiso.

<sup>17</sup> Yayo witi wo ko sabolo osoloso so ee pilame o tou teli bi sabolo mopoodoo doloso badoso. Osoloso witi wo ko ee moso mapoo kukuleiso. Osoloso witi wo so dou koo semili mapoo toodalaiso,” diso.

<sup>18</sup> Yoneeye to tekepo ee eli opusomo opusomo di maga odoo Godee mapoo gilimado sibilame, Godeeyo to tekepo takomo siliso.

<sup>19</sup> Esino Gelili mi eyo wiligi odoo taba Helodeeye goo tokenee tooso. Goo ee omolo osee badoboome, yayo omolowo osobo Helodiyees peedee huso. Eseme Yoneeye goo hagee ogoloso yimapoo diya takolone o tokenee goo abo sabolo yilige buguso.

<sup>20</sup> Eseme hamamee Helodee komonolone yo tokenee hee toowa tooso. Goo ee yayo Yonee neliga moso ma kulodu husooso.

*Yesu howo olugu  
(Mat 3:13-17; Maka 1:9-11)*

<sup>21</sup> Biame Yoneeye odoo howo ogusigamelee domo mapoo, Yesu yinosee howo oluguso. Yesu howo oluguloso gasibilesu tobudulone Godee mapoo takomolome Kei mi osulu yamagooso.

<sup>22</sup> Eseme Dio Tei oso molo masi pusibilesu yimapoo pubalagaso. Osoloso Kei mi ma dokodooga toso egeesee takaso, “No ayo gooma mo holo noso, a namapoo diya goomogo,” diso.

*Yesuwo amawe diowo hu  
(Mat 1:1-17)*

<sup>23</sup> Yesu yo dugo 30 domo mapoo badolone, o tou bei mooloogooso. Odoo susuga oso Yosepeeyo owolo gweliso.

Yosep yo Heliyo owolo.

<sup>24</sup> Heli yo Matateeyo owolo.

Matat yo Libaiyo owolo.

Libai yo Melkiyo owolo.

Melki yo Yanaiyo owolo.

Yanai yo Yosepeeyo owolo.

<sup>25</sup> Yosep yo Matatiyaseeyo owolo.

Matatiyas yo Amoseeyo owolo.

Amos yo Nahumeeyo owolo.

Nahum yo Esliyo owolo.

Esli yo Nagaiyo owolo.

<sup>26</sup> Nagai yo Mateeyo owolo.

Mat yo Matatiyaseeyo owolo.

Matatiyas yo Semeineeyo owolo.

Semein yo Yosekeeyo owolo.

Yosek yo Yodayo owolo.

<sup>27</sup> Yoda yo Yohanayo owolo.

Yohana yo Lesayo owolo.

Lesa yo Selubabeleeyo owolo.

Selubabel yo Selatiyeleeyo owolo.

Selatiyel yo Neliyo owolo.

<sup>28</sup> Neli yo Melkiyo owolo.

Melki yo Adiyo owolo.

Adi yo Kosameeyo owolo.

Kosam yo Elamadameeyo owolo.

Elamadam yo Eleeyo owolo.

<sup>29</sup> El yo Yosuwayo owolo.

Yosuwa yo Eliyeseleeyo owolo.

Eliyesel yo Yolimeeyo owolo.

Yolim yo Matateeyo owolo.

Matat yo Libaiyo owolo.

<sup>30</sup> Libai yo Simiyoneeyo owolo.

Simiyon yo Yudayo owolo.  
 Yuda yo Yosepeeyo owolo.  
 Yosep yo Yonameeyo owolo.  
 Yonam yo Eliyakimeeyo owolo.  
<sup>31</sup> Eliyakim yo Meleyayo owolo.  
 Meleya yo Menayo owolo.  
 Mena yo Matatayo owolo  
 Matata yo Neiteneeyo owolo.  
 Neiten yo Deibidiyo owolo.  
<sup>32</sup> Deibidi yo Yesiyo owolo.  
 Yesi yo Obedeeyo owolo.  
 Obed yo Bowaseeyo owolo.  
 Bowas yo Salmoneeyo owolo.  
 Salmon yo Nasoneeyo owolo.  
<sup>33</sup> Nason yo Aminadabeeyo owolo.  
 Aminadab yo Adimineeyo owolo.  
 Adimin yo Aliniyo owolo.  
 Alini yo Hesloneeyo owolo.  
 Heslon yo Peleseeyo owolo.  
 Peles yo Yudayo owolo.  
<sup>34</sup> Yuda yo Yekobeeyo owolo.  
 Yekob yo Aisekeeyo owolo.  
 Aisek yo Eibalahameeyo owolo.  
 Eibalaham yo Telayo owolo.  
 Tela yo Naholeeyo owolo.  
<sup>35</sup> Nahol yo Selugeeyo owolo.  
 Selug yo Lewuyo owolo.  
 Lewu yo Pelegeeyo owolo.  
 Peleg yo Ebeleeyo owolo.  
 Ebel yo Selayo owolo.  
<sup>36</sup> Sela yo Keinaneeyo owolo.  
 Keinan yo Alapakasadeeyo owolo.  
 Alapakasad yo Semeeyo owolo.  
 Sem yo Nowayo owolo.  
 Nowa yo Lamekeeyo owolo.  
<sup>37</sup> Lamek yo Metuselayo owolo.  
 Metusela yo Inokeeyo owolo.  
 Inok yo Yeledeeyo owolo.  
 Yeled yo Mahalaleleeyo owolo.  
 Mahalalel yo Kenaneeyo owolo.  
<sup>38</sup> Kenan yo Enoseeyo owolo.  
 Enos yo Seteeyo owolo.  
 Set yo Adameeyo owolo.  
 Adam yo Godeeyo owolo.

## 4

*Saitenso Yesu kukulo egei  
 (Mat 4:1-11; Maka 1:12-13)*

<sup>1</sup> Yesu yo Yoden howo mapoo Yone-eye howo oluguloso, Yesu Dio Tei oso kitulugu toloso yo miwe poogoo mi mapoo Dio Tei oso ido diso.

<sup>2</sup> Yesu miwe poogoo mi mapoo biame 40 ee ma kulodu nei nel-ega badoboome, Saitenso yo kukulo ogo demeleeo. Osoloso biame 40 poogoloso hamamee Yesu yo diya hodiaso.

<sup>3</sup> Esem Saitenso ogoloso yimapoo egeese takaso, “No tei Godeeyo owolo daga, nayo yo hagoso see wo pe dee takee,” diso.

<sup>4</sup> Esem Yesuye nei egeese takaso, “Godeeyo to booka mapoo hogugu oso egeese takooso, ‘Edebeeyo hedebe nei nolone badoga oso gie badeli talaima,’” diso.

<sup>5</sup> Esem see Saitenso Yesu idoloso mubi dokodoo ido palaso. Esem saga omapoo Saitenso mi edebeeyo bia susuga yimapoo eligiso.

<sup>6-7</sup> Osoloso yayo Yesu mapoo egeese takaso, “Daga Godeeye bi susuga hagee amapoo teneme, ayo bamo simiso. Esiga nayo amapoo gasuwoloso a dokodoo poudoga, mi susuga hagee sabolo, osoloso bi susuga ee ma kulodu egee molo sabolo, ayo namapoo tenelaiso. Bei, amapoo kitulugu moloso, odoo hee mapoo tenelai,” diso.

<sup>8</sup> Esem Yesuye Saiten mapoo nei egeese takaso, “Godeeyo to booka mapoo hogugu oso egeese takooso, ‘Nayo hedebe nee wiligi odoo Godee mapoo gauwuloso yo dokodoo poude. Osoloso hedebe o to mapoo mesie,’” diso.

<sup>9</sup> Osoloso see tobu Saitenso Yesu idoloso Yelusalem mapoo diso. Osoloso tei moso tegei omu ma dokodoo ido peleso tobudume yimapoo egeese takaso, “No tei Godeeyo owolo daga, no moso omu ma dokodooga miyomoo bologobigi.

<sup>10</sup> Bei, Godeeyo to booka mapoo hogugu oso egeese takooso,

‘Godeeye o momaiye mapoo no medee bamelee dee takaso.

11 Esiga diayo no dia deeso douguleiso, no yo mapoo homodobiya,” diso.

12 Esino Yesuye egeese takaso, “Godeeyo to booka mapoo hogugu oso egeese takooso,

‘Nee wiligi odoo Godee oso kitulugu ee hoodo agalame yimapoo na kukulo ege,’” diso.

13 Saitenso Yesu kukulo ogomo silee koodobuloso yo see tobu kukulo agalame biame tekepo ee bolone Yesu epedee poogoloso diso.

*Yesuye Gelili mapoo o tou bei mooloogo*

*(Mat 13:53-58; Maka 6:1-6)*

14 Yesu Dio Tei oso kitulugu sabolo Gelili mapoo wedi diso. Osoloso Gelili mi toowa ee ma kulodu odoo susuga oso Yesuwo goo dudobuguso.

15 Yayu Yu odoowo howo gisili moso susuga mapoo eligimo sileeme, odoo susuga oso yimapoo goomegeli.

16 Biame heeso Yesu eyo yo kauwa o midde Nasalet mapoo diso. Osoloso Yu odoo oso hasali biame mapoo Yesu eyo seli egeese solone, yo howo gisili moso mapoo palaso. Osoloso yo Godeeyo to booka mapoo hogugu ee hesigilame tabaso.

17 Osoloso Godee maga to toloso kokodo takomo sili odoo Aisayaye hogugu booka ee yimapoo teneeso. Yo booka toloso piligamo abaga dino to hogugu domo ee ogoloso, to hagee hesigaso,

18 “Godeeyo dio abolo hodobo badoso.

Bei, yayo a hesiaso, to tekepo bi mauwe odoo mapoo takalame.

Osoloso Godeeye a diye diso, neliga moso ma kulodu debeli odoo mapoo yayo diba peegoo gilimado dileiso dee takalame.

Osoloso howo siliga odoo see agalaiso dee takalame.

Osoloso Godeeye a diye diso, edebeeyo hegili odoo hegi goo ma kuloduga ayo peegoo gilimado dilame.

19 Osoloso Godeeye a diye diso, ayo Lodeeye o odoo mapoo goo tekepo moodolai biame oso egee sibo goo ee odoo mapoo eligilame.”

20 Yesu booka hesigamelee koodobuloso, see booka bali odoo omapoo teneloso biaso. Esem odoo susuga moso ee ma kulodu debei oso howoso medee kitulugu sabolo yimapoo bologolone debeiso.

21 Osoloso yayo dimapoo egeese takaso, “Niyo Godeeyo to hogugu booka maga takeme du goo oso nimapoo epei olo simiso,” diso.

22 Esem o to du odoo susuga oso yo tekepo odoo doloso, yayo to taka susuga ee tekepo diso. Diayo egeese takoloso, see egeese takaga meleeso, “Iba gooleedooso yo Yosepeeyo owoloso. Egesino yayo kaseme to tekepo egeese ka takayo?” dee takaga meleeso.

23 Yesuye see dimapoo egeese takaso, “A gooleedooso, niyo goo hamaga amapoo takalaiso, ‘Melesene neli odoo, no no nediliyo tekepo moodee. Osoloso nayo Kapeniyum mi mapoo goo mudu opusomo di moodoogamelee see nee midde hamapoo moodee,’ dee takalai malaiso,” diso.

24 Esino Yesuye see dimapoo egeese takaso, “Ayo nimapoo taka, Godee maga to toloso kokodo takomo sili odoo yo o mosobia oso gowoolaiso.

25 Esiga niba susuga dui. Ilayaye badebei biame omapoo mi toowa kibaso. Osoloso dugo bakadio hedebe osoloso a 6 ma kulodu howo sibilega nei mauwe badebeiso. Ee ma kulodu Isalael mi mapoo sobo bauwe debeiso.

<sup>26</sup> Esino ee ma kulodu Godeeye Ilayaye diba pidiye doloso yimapoo takele. Esino yo Ilayaye wulo Yu dele poogoo sobo Saidon mi ma kulodu mi hee Salipat mi mapoo badeli sobo bau ono pidilame diye diso.

<sup>27</sup> Osoloso Ilaisaye badebei biame omapoo, Isalael mi omapoo kolo tokenee odoo bei debeiso. Esino Ilaisaye odoo egee bia yayo pidile. Esino yayo Yu odoonee o hu Naman, Siliya mi mapoo badeli odoo ono tekepo moodooso,” diso.

<sup>28</sup> Esemee odoo howo gisili moso mapoo debei oso to hagee duloso diya kamanagaso.

<sup>29</sup> Esemee diba tebisaloso Yesu toloso mosobia pee mapoo esia goosoo mapoo halagasalame ido diso.

<sup>30</sup> Esino Yesu odoo mooloogoodoo ee ma kuloduga peegoo diso.

*Odoo bo holo pala  
(Maka 1:21-28)*

<sup>31</sup> Osoloso Yesu Gelili mi toowa ma kulodu mi hee Kapeniyum mapoo diso. Yo omapoo dileso badolone Yu odoo oso hasali biame heeso yayo howo gisili moso ma kulodu Godeeyo to eligimeleeso.

<sup>32</sup> Esemee odoo susuga oso yayo eligi duloso diya howoogadooso. Bei, yayo diya kitulugu sabolo eligime.

<sup>33</sup> Howo gisili moso ma kulodu odoo bo holo pala hee omapoo badebeiso. Yayo to neligidi Yesu mapoo egeesee takaso,

<sup>34</sup> “Hei, Yesu Nasalet odoo, nayo imapoo ogoo goo moodoolame ka simiyo? Nayo iba tokenee palame ka simiyo? Esiga no iba poogoloso di. Bei, a gooleedoo no Godeeye hesia odoo oso,” diso.

<sup>35</sup> Esemee Yesuye to kitulugu sabolo bo holo mapoo egeesee takaso, “No to koodobuloso odoo ma kuloduga peegoo di,” diso. Yesuye egeesee takeme, bo holo oso peegoo poogolone odoo egee odoo howo woola miyomoo homodobuloso molone yimaga peegoo diyadeeso.

Esino bo holo oso yimaga peegoo dulone yimapoo dala hee tenele.

<sup>36</sup> Esemee odoo susuga oso goo hagee ogoloso howoogadolone egeesee takaga meleeso, “Yayo taka goo ee kasiyo? Bei, yayo to kitulugu sabolo bo holo mapoo takooga diba o to mapoo mesiloso peegoo dilidoo,” dee takaga meleeso.

<sup>37</sup> Esemee odoo susuga oso goo hagee ogoloso mosobia susuga koola mapoo debeli mapoo takomo diyadeeso.

*Yesuye odoo paigiga tekepo moodoo  
(Mat 8:14-17; Maka 1:29-34)*

<sup>38</sup> Yesu howo gisili moso maga see Saimonowo mosopoo diso. Moso ee ma kulodu sobo Saimonowo nalobo pailone kolo diya dei moodoome tiameleeso. Esemee odoo susuga oso yo Yesuye tekepo moodoolame Yesu mapoo o goo takaso.

<sup>39</sup> Esemee Yesuye sibilesa yayo tiamelee koola mapoo gauwuloso badolone paiye mapoo egeesee takaso, “Yo poogoloso di,” diso. Esemee paiye saga weidooso. Esemee yayo toboloso nei toloso dimapoo piso.

<sup>40</sup> Esemee osoko todobume odoo susuga oso odoo paigiga susuga Yesu mapoo gilimado sibadeeso. Esemee yayo o deeso odoo paigiga susuga sigime wegigadooso.

<sup>41</sup> Esemee Yesuye odoo bo holo paladee tekepo moodoogoome bo holo oso peegoo dulone to neligidi takolone egeesee takaso, “No Godeeyo owoloso,” dee takaga meleeso. Esino Yesuye to kitulugu sabolo dimapoo egeesee takaso, “Niba to na ke,” diso. Bei, bo holo oso Yesu yo Godeeye hesia Keliso doloso diba gooleedooso.

<sup>42</sup> Gesikolodee mi hadobilega, Yesu tia maga hogabuloso odoo koola mauwe mi mapoo diso. Esino odoo susuga oso egeino yo me neme yima hamamee yo esiamo silesibiso. Diba



Yesu esiamo silesiboso yo ogoloso yimapoo egeesee takaso, “No iba na poogoo di,” diso.

<sup>43</sup> Esino Yesuye dimapoo egeesee takaso, “A mi abo mapoo Godeeye wiligi doloso badeli goo ee takomo dilei tekepo. Bei, Godeeye goo hamaga a diye diso,” diso.

<sup>44</sup> Osoloso Yesuye Yudiya mi toowa mapoo diayo howo gisili moso susuga mapoo Godeeyo to eligimo sileeso.

## 5

*Yesuye o hamamee dili odoo daga malalo abo gilimadoo*

*(Mat 4:18-22; Maka 1:16-20)*

<sup>1</sup> Biame hee mapoo Yesuye Gelili abei palaga mapoo Godeeyo to takomolome odoo susuga oso o to dulame diya mooloogoodooso.

<sup>2</sup> Yesu osee tobudulone di kebigeli odoo oso dia pei howo hapagalame dia du bakadio mubi dokodoo gisibado peleso ma molome egeiso.

<sup>3</sup> Yesu du bakadio ee ma kulodu Saimonowo du mapoo meilesi badolone Saimon mapoo takaso, “Du abei pee maga pepooko hoogoo pupubigi,” diso. Esememe yo du ma kulodu badolone odoo susuga mubiyodoo doboome, yayo Godeeyo to dimapoo eligiso.

<sup>4</sup> Yesuye odoo susuga mapoo Godeeyo to taka koodobuloso Saimon mapoo egeesee takaso, “Nee du howo bou mapoo sudo dileso di talame nibada pei howomoo oguse,” diso.

<sup>5</sup> Esino Saimonoye egeesee takaso, “Wiligi odoo, iba eiyo gesi pei ogusulone tou toowa tooso, esino iba di giligile. Esino nayo amapoo takaga, mo pei howomoo ogusuleiso,” diso.

<sup>6</sup> Osoloso diba dia pei howomoo ogusume di susuga oso dia pei mapoo tulone, dibada pei tologo bugulame seeso.

<sup>7</sup> Esememe diayo dia odoo abo du hee mapoo debei deeso iso, diba pidilame. Esememe diba sibateme dibada du bakadio ee diso metamagisilone howomoo owulame sino poogooso.

<sup>8</sup> Saimon-Pitaye goo hagee ogoloso, Yesuwo homo beiyopoo gauwuloso egeesee takaso, “Lodee, amaga peegoo di, a tokenee odoo,” diso.

<sup>9</sup> Bei, yibolo osoloso o odoo sabolo diayo di bei giliga ogoloso diya howoogadooso.

<sup>10</sup> Osoloso Saimonobolo tou teli odoo Yemes dio Yonee dio diba nosee goo hagee ogoloso diya howoogadooso. Odoo bakadio Yemes dio Yonee dio hagee Sebediyi owolo.

Osoloso Yesuye Saimon mapoo egeesee takaso, “No haga na ebi! No daga di giligeli odoo badebeiso. Esino epei hamaga no see odoo Godee mapoo gilimado sibili doloso badalaise,” diso.

<sup>11</sup> Osoloso diba dileso dia du oluguloso bi susuga omapoo poogoloso, see Yesubolo hodobo diyadeeso.

*Yesuye odoo agagisa bia moodoo*  
*(Mat 8:1-4; Maka 1:40-45)*

<sup>12</sup> Biame heeso Yesu see mi hee mapoo diso. Mi omapoo odoo agagisa bia badebeiso. Odoo ogoso Yesu ogoloso o homo beiyopoo ebiso miyomoo tugusaloso egeesee howaso, “Lodee, nayo a tekepo moodoolai goomogoga, a tekepo moodee,” diso.

<sup>13</sup> Esememe Yesuye o deeso odoo egee sigolone egeesee takaso, “Ayo no tekepo palai goomogo. Esiga no tekepo pe,” diso. Esememe omapoo o kolo mapoo agagisa bia saga mauwe poogooso.

<sup>14</sup> Esememe Yesuye yo diye dolone to kitulugu sabolo egeesee takaso, “Nayo dileso no ayo tekepo pa goo ee odoo abo mapoo na takee. Esino, nee su tekepo pa goo ee, Godee ogo odoo ogo doloso domo badeli odoo yimapoo dileso eligi. Osoloso nee su tekepo pa omaga emegei di bi

tenee, Moseseeye tei magoo goo ee dodolone, odoosusuga oso ogoloso tekepo pa ee gooleedalame,” diso.

<sup>15</sup> Esino odoosusuga oso Yesuwo goo ee mi susuga mapoo opo-susumo dime, odoosusuga oso dulugaso. Esemee odoosusuga oso Yesuye Godeeyo to taka ee dulame sibadeeso. Osoloso Yesuye dimapoo paigiga egee molo tekepo palame.

<sup>16</sup> Esino Yesu biame susuga dimaga peegoo dileso, odooskoola mauwe mi mapoo Godee mapoo takalame diliso.

*Yesuye odoosukakawa poogoo tekepo moodoo*

*(Mat 9:1-8; Maka 2:1-12)*

<sup>17</sup> Biame heeso Yesuye odoosusuga eligimolome, Pelisi odoosabolo tei eligili odoosabolo diba onosee omapoo debeiso. Odoohagee bia Gelili mi susuga maga, osoloso abo oso Yudiya mi maga, osoloso odoosabo oso Yelusalem mi maga sibadeeso. Esemee Yesuye odoopaigiga susuga tekepo moodoogalame Godeeye kitulugu oso yibolo meleeso.

<sup>18</sup> Esemee mi omapoo odoosaboso odoosukakawa poogoo kida mapoo magoloso tosimiso. Osoloso diayo yo Yesuye badebei mapoo todilame goomogaso.

<sup>19</sup> Esino odoobeiga Yesu mapoo dilei eli egele. Esemee diayo odoosukakawa poogoo kida sabolo moso omu ma dokodoo imado palaso. Osoloso Yesuye to kemelee domo omaga seme ou tologo poogoloso tiso kida mapoo bagagoloso kida sabolo moso kulodu toosooso.

<sup>20</sup> Diayo odoosukakawa poogoo moso omu maga toosoosoo goolee, odooegee yayo moodolai teiba doloso, Yesuye dia tei too ogoloso, odoosukakawa poogoo mapoo egeesee takaso, “Mo odoo, nee goo tokenee olo hapoloso boobado buguso,” diso.

<sup>21</sup> Esemee omapoo debei tei eligili odoosabolo Pelisi odoosabolo oso

o to duloso, dieso nediliyo egeesee gooleemeleeso, “Odoohagoso kaseme egeesee ka takayo? Yayo Godee dagadilame see, esino goo tokenee hapeli hedebe Godeeso,” diso.

<sup>22</sup> Esemee Yesuye diayo dibada sooloo ma kulodu gooleemelee goo ee gooleedoloso dimapoo egeesee takaso, “Niyo kasi maga nibada sooloo ma kulodu egeesee ka goolee malala?”

<sup>23</sup> Niba odoosu kakawa poogoo hagee ege. Yimapoo goo kasee takalai oso sebe ka mololo? Ayo odoosu kakawa poogoo mapoo ‘Nee tokenee ayo boobado buguso,’ dee takooga, o tokenee boobado bugu niyo gooleedalame. Esino ayo yimapoo takoo, ‘No toboloso nee kida toloso di,’ dee takoloso, yo tobooga, amapoo odoomodeli kitulugu molo doloso niyo gooleedalaiso.

<sup>24</sup> Esino Odoo Holo amapoo kitulugu olo teneeso, mipoo hamapoo goo tokenee hapoloso boobado bigilei goo ee niyo ogoloso gooleedalame, ayo nimapoo eligileiso,” doloso yayo odoosu kakawa poogoo mapoo egeesee takaso, “No hogabuloso nee kida toloso mosopoo di,” diso.

<sup>25</sup> Diayo balaga molome odoosu kakawa poogoo hogabuloso, o kida toloso o mosopoo dulone Godee mapoo goomoga poudoomo diso.

<sup>26</sup> Diayo odoosu kakawa poogoo toboloso di ogoloso diya howoogadooso, osoloso Godee mapoo goomoga poudooso. Osoloso diayo obulone egeesee takaso, “Iba epei goo toowa mudu opusomo di egeiso,” diso.

*Yesuye Libai idoo goo*

*(Mat 9:9-13; Maka 2:13-17)*

<sup>27</sup> Goo hagee koodobuloso hamamee, Yesu moso kuloduga peegoo gadiso. Esemee yayo dulone egeino, tekisi molee misigeli odoo Libai tekisi molee misigeli moso

kulodu badoboome egeiso. Osoloso Yesuye yimapoo egeesee takaso, “Ama hamamee sibe,” diso.

<sup>28</sup> Esemе Libaiye bi susuga omapoo poogoloso Yesuye di hamamee diso.

<sup>29</sup> Esemе Yesuye Libai yo idoo goo omaga Libaiye o mosopoo nei toowa siso. Esemе tekisi molee misigeli odoо bei sabolo osoloso odoо abo sabolo Yesubolo nei nameleeso.

<sup>30</sup> Esino Pelisi odoо sabolo osoloso tei eligili odoо sabolo oso goo hagee ogoloso gowoolone Yesu o hamamee dili odoо mapoo egeesee woosaso, “Niyo kaseega tekisi molee misigeli odoо sabolo osoloso goo tokenee teli odoо sabolo nei nologolone ka dabalaiso?” diso.

<sup>31</sup> Esemе Yesuye nei dimapoo egeesee takaso, “Odoо paiye mauwe melesenee neli odoо mapoo dileime. Esino odoо paiye ee melesenee neli odoо mapoo dileiso.

<sup>32</sup> Ayo simi hagee, Godeeyo howo woola tekepo teli odoо doloso gweli odoо ee gilimalame ka sibile. Esino tokenee teli odoо doloso gooleedoo odoо ee gilimadoloso Godee mapoo sibilame ka simi,” diso.

*Nei tei doloso badalai goo  
(Mat 9:14-17; Maka 2:18-22)*

<sup>33</sup> Esemе odoо aboso Yesu mapoo egeesee takaso, “Yoneeyo hamamee dili odoо oso howo gisilone nei tei doloso debeliso. Osoloso Pelisi dia hamamee dili odoо sabolo egeseliso. Esino bei kasi maga nee hamamee dili odoо oso biame susuga nei sabolo howo sabolo ka nalagamalala?” diso.

<sup>34</sup> Esemе Yesuye dimapoo egeesee takaso, “Edebeeyo sobo hulei biame omapoo yo o odoо abo sabolo osee dogo, diba nei nelega dabalaisomo? Haye! Diayo sobo hulei odoо sabolo hodobo dobolone goomoga sabolo nei nalaiso.

<sup>35</sup> Esino biame heeso odoо hagee dimaga peegoo ido duga, nei nelega tei doloso dabalaiso,” diso.

<sup>36</sup> Esemе Yesuye dimapoo wudu taka hee hagee takaso, “Edebeeyo o sedi dia koodoloso sedi nape mapoo opodoloso koo duseli. Egeeseega o sedi dia tokenee palaiso. Osoloso sedi dia koodoloso sedi nape mapoo opodoloso dusa ee sedi nape sabolo tebileime.

<sup>37</sup> Osoloso see edebeeyo wain i dia katolo gout be koloso moodoo nape mapoo koo salama seli. Bei, wain i dia oso kitulugu oso katolo be gout koloso moodoo nape ee gabuguga, wain i ee peegoo sologo bigileiso. Osoloso katolo gout be koloso moodoo ee tokenee palaiso.

<sup>38</sup> Esiga wain i dia ee medee katolo gout be koloso moodoo dia mapoo salama salai tekepo.

<sup>39</sup> Esiga edebeeyo wain i nape naga, yo see wain i dia nalai koo goomegeli. Bei, yayo egeesee takalaiso, “Wain i nape ono diya hadali,’ dalaiso.”

## 6

*Yu odooso hasali biame  
(Mat 12:1-8; Maka 2:23-28)*

<sup>1</sup> Yu odooso hasali biame heeso, Yesu o hamamee dili odoо sabolo witi wo segei ma kuloduga diyadaga meleeso. Osoloso o hamamee dili odoо oso witi wo ko ee gooloogaloso kolo soosoo poloso ko kulodu melee ono nalagamo diyadeeso.

<sup>2</sup> Esemе Pelisi odoо abo oso goo hagee ogoloso dimapoo egeesee takaso, “Niba bei kasi maga ibada hasali biame mapoo witi wo ka gwayo? Niyo ibada tei gababuo,” diso.

<sup>3</sup> Yesuye dimapoo to nei egeesee takaso, “Deibidiye o odoо sabolo houdume diayo moodoo goo ee Godeeyo toso booka mapoo hogugu niyo hesigeleyo?

<sup>4</sup> Bei, Deibidiye Godeeyo tei moso ma kulodu gadilesi tei wo toloso o odoо sabolo neso. Esino tei wo hagee Godee ogo odoо ogo doloso domo

badeli odoo hedebe oso nali. Esino Deibidiye o odoo sabolo wo ne oso tei magoo ee gababiaso,” diso.

<sup>5</sup> Yesuye dimapoo see egeesee takaso, “Niyo hasali biame egee Odoo Holo ayo wiligi doloso ka badoso,” diso.

*Yesuye odoo dee deedee seeseegedoo poogoo tekepo moodoo*

<sup>6</sup> See Yu odooso hasali biame hee mapoo, Yesu Yu odoowo howo gisili moso ma kulodu gapeleso odoo mapoo eligimeleeso. Moso ee ma kulodu odoo dee deedee seeseegedoo poogoo badebeiso.

<sup>7</sup> Esino tei eligili odoo sabolo Pelisi odoo sabolo oso Yesu tokenee odoo dalame, Yesuwo goo ee medee balagamo silesibiso. Egeeseelone Yesuye dia hasali biame mapoo odoo dee deedee seeseegedoo poogoo tekepo moodabeleso bologolone debeiso.

<sup>8</sup> Esino diayo goo goolee melee Yesuye ogoloso gooleedoloso, dee seeseegedoo poogoo odoo mapoo egeesee takaso, “No toboloso woola hamapoo sibilesa tebee,” diso. Esemee dee seeseegedoo poogoo odoo oso woola dileso tabaso.

<sup>9</sup> Osoloso Yesuye Pelisi odoo sabolo osoloso tei eligili odoo sabolo mapoo egeesee takaso, “Ibada tei goo oso ibada hasali biame mapoo ogo goo takoosomo? Biame omapoo goo tekepo talai ee tekepowa? O, goo tokenee talai ee tekepowa? Osoloso tei goo oso imapoo ibada hasali biame omapoo odoo gie badeli pidilei goo ee takoosomo? O, odoo gie badeli wooloomalai goo ee takoosomo?” diso.

<sup>10</sup> Yesuye dimapoo egeesee takoloso, see dimapoo bolone odoo dee seeseegedoo poogoo mapoo egeesee takaso, “Nee dee seeseegedoo poogoo egee see hoodode,” diso. Esemee odoo dee seeseegedoo poogoo oso o dee hoododeme o dee see tekepo paso.

<sup>11</sup> Esemee Pelisi odoo sabolo tei eligili odoo sabolo oso goo hagee ogoloso diya komonogolone dieso

nediliyo dima kulodu Yesu toloso kasee woolaisomo, doloso to mouso.

*Yesuye diye di odoo 12 gilimadoo goo*

*(Mat 10:1-4; Maka 3:13-19)*

<sup>12</sup> Biame domo mapoo Yesu mubi ma dokodoo peleso gesi hedebe omapoo Godee mapoo takemeleeso.

<sup>13</sup> Esemee mi hadobume Yesu yima hamamee dodomo silesibili odoo susuga gilimadooso. Osoloso dima kulodu odoo 12 ono toloso, dimapoo diye di hu teneeso. Yesuye gilimadoo 12 odoo dia hu hagoso.

<sup>14</sup> Saimon (odoo hagee Yesuye o hu hee Pita hediso), osoloso Saimonowo omolo Endulu sabolo, osoloso Yemes, osoloso Yonee, osoloso Pilipi, osoloso Batolome,

<sup>15</sup> osoloso Matiyu, osoloso Tomas, osoloso Alpiyeseeyo owolo Yemes, osoloso Loum gamalee odoo mapoo ha teli odoo Saimon,

<sup>16</sup> osoloso Yemeseeeyo owolo Yudas, osoloso Yudas-Iskaliyot (yayo hamamee Yesu ha teli odoo dimapoo tiasooso).

*Yesuye odoo eligilone odoo susuga tekepo moodoo*

*(Mat 4:23-25)*

<sup>17</sup> Yesuye o hamamee dili odoo 12 sabolo mubi dokodooga meilesa kubo mapoo debeiso. Diba omapoo meilesa dobolone egeino, Yesu o hamamee dili odoo susuga sabolo, osoloso odoo abo susuga Yudiya maga osoloso Yelusalem maga osoloso abei toowa palaga debeli Taya mi sabolo Saidon mi sabolo omaga sibilesa doboome egeiso.

<sup>18</sup> Diayo Godeeyo to Yesuye taka ee dulame sibadeeso. Osoloso paiye dimapoo melee tekepo palame sibadeeso. Egeesi ma kulodu Yesuye odoo ma kulodu bo holoso dala tenemelee ee dimaga peegoo hasiso buguso.

<sup>19</sup> Odoo susuga oso Yesuwo kolo sigilame goomogaso. Bei, diayo egeino kitulugu Yesu maga simi oso odoo susuga tekepo moodooga neme.



*Niba goomege*  
(Mat 5:1-12)

<sup>20</sup> Yesuye o hamamee dili odoo mapoo bolone egeesee takaso,

“Bi mauwe odoo niba goomege.

Bei, Godeeye wiligi doloso badeli ee ma kulodu niba gasibileiso.

<sup>21</sup> Odoo epedee hodia hagee do, niba goomege.

Bei, hamamee niba nei nameleso diya edigileiso.

Osoloso goohele sabolo egee pupusiga molo, niba goomege.

Bei, niyo goomogalai biame ee nimapoo tenelaiso.

<sup>22</sup> Odoo Holo mo goo maga edebeeyo niba heigoga, niba goomege, osoloso diayo niba tokenee odoo doloso gowoolone managa niba goomege.

<sup>23</sup> Esiga domo omapoo goomoga toowa sabolo debee. Bei, Kei mi ma dokodoo niyo talai nei ee nibada hu sabolo olo mopoodoo doloso moloso. Esiga niyo medee goolee, nimapoo dala teneli odoo egee bia dia amawedio oso Godee maga to toloso kokodo takomo silesibili odoo daga hoogoo debei mapoo dala hedebe hageesee masi tenemeleeso.”

*Niba obeeyamo!*

<sup>24</sup> “Ye-ee! Bi bei odoo niba obeeyamo!

Bei, niso goomoga goo olo tooso.

<sup>25</sup> Ye-ee! Niba epedee nei naloso oduguloso egee do odoo, niba obeeyamo!

Bei, hamamee nimapoo hodia goo toowa oso sibileiso.

Ye-ee! Yiligeli odoo niba obeeyamo!

Bei, hamamee niba goohele goo sabolo dobolone pupusiga malaiso.

<sup>26</sup> Ye-ee! Odoo susuga oso niba tekepona deli odoo niba obeeyamo!

Bei, nimapoo tekepona deli odoo egee bia dia amawedio oso gamenee godee maga to toloso kokodo takomo sili

odoo onosee diba tekepo odoo dee takaga meleeso.”

*Nimapoo ha teli odoo mapoo sooloo dele*  
(Mat 5:38-48; 7:12)

<sup>27</sup> “Mo to duli odoo, ayo nimapoo ka taka, nimapoo ha teli odoo ee sooloo dele osoloso niba hegili odoo mapoo goo tekepo moodee.

<sup>28</sup> Nimapoo duwa takeli odoo dimapoo goo tekepo tolone dimapoo goomoga tenee. Osoloso nimapoo dala teneli odoo diba halo Godee mapoo takee.

<sup>29</sup> Osoloso odoo heeso nee haleegi mapoo kobuguga, see nee haleegi hodio mapoo kobugulame heligi magalai tekepo. Osoloso odoo heeso nee kekeisu sedi tadoduga, see yimapoo nee sedidee tenee.

<sup>30</sup> Osoloso odoo heeso namapoo bi howaga yimapoo wulo tenee. Osoloso odoo heeso nee bi toloso toduga nayo nei yimaga see peedee dalame na takee.

<sup>31</sup> Esiga edebeeyo nimapoo ogoogoo moodoolame ka gooleesomo, nei niyo dimapoo goo hedebe egeesi masi moodolai tekepo.

<sup>32</sup> Niyo hedebe niba sooloo deli odoo mapoo sooloo dolone doga, odoo aboso niba tekepo odoo dalaisomo? Haye. Bei, tokenee teli odoo oso diba sooloo deli odoo mapoo nei diayo sooloo deliso.

<sup>33</sup> Osoloso niyo hedebe nimapoo goo tekepo moodeli odoo mapoo tekepo moodooga, edebeeyo niba tekepo odoo dalaisomo? Haye. Bei, tokenee teli odoo diba nose egeesee seliso.

<sup>34</sup> Niyo teneega nei tobuloso teneli odoo hedebe mapoo bi ka tenee domologa, edebeeyo niba tekepo odoo dalaisomo? Haye. Bei, tokenee teli odoo diba nose egeesee seliso. Diayo nei talai ee goolone dia bi odoo abo mapoo tenee deliso.

<sup>35</sup> Esino niba nimapoo ha teli odoo mapoo sooloo dolone ka de-bee. Osoloso dimapoo goo tekepo moodee. Osoloso dimapoo bi wulo wulayo teneloso see nei talai doloso na goolee. Niyo goo hageesi tolone dogo, niba nei toowa talaiso. Osoloso niba dokodoo badeli Godeeyo owolo dalaiso. Bei, Godeeye yimapoo goomoga to koo takeli odoo sabolo osoloso tokenee teli odoo sabolo mapoo goo tekepo tenelone ka badoso.

<sup>36</sup> Nibada Ama Godee yo emegei sooloo dolone badoso. Esiga niba nosee emegei sooloo dolone ka de-bee.”

*Odoo heeyo goo tokenee haga na goolee mele*

*(Mat 7:1-5)*

<sup>37</sup> “Nayo nee odoo heeyo goo ee goo mauwe na midi, eseega nei nee goo midileime. Osoloso nee odoo ee tokenee odoo dee na takee, eseega nei no tokenee odoo dalaime. Osoloso nee odoo oso namapoo goo tokenee toga, nayo o tokenee goo ee boobado bigi. Nayo egeesee seega nei nee goo tokenee onosee boobado bigileiso.

<sup>38</sup> Esiga nayo wulo tenemologa, no nei talaiso. Nayo odoo abo mapoo tenemologa, nei Godeeye namapoo toowa tenelaiso. Esiga Godeeye namapoo tenee goo hagoso bei molone abo peegoo misigedibileiso. Nayo bi kasee nee odoo mapoo ka teneesomo, nei Godeeye nei teiba egeesi namapoo tenelaiso,” diso.

<sup>39</sup> Osoloso Yesuye see wudu takolone egeesee takaso, “Odoo howo si oso o odoo hee howo si ido dilei tekepowa? Haye. Bei, o bakadio wulu mapoo tigidibigileiso.

<sup>40</sup> Esiga holaiso goo goolee gie to-molo oso o eligili odoo oso gooleedoo ee dagadileime. Haye. Esino yo o eligili odoo oso holaiso medee kibiya eligiga, holaiso yayo gooleedoo goo

ee o eligili odoo oso gooleedoo goo sabolo tebileiso.

<sup>41</sup> Nayo kasi maga nee odoowo howo mapoo gelesi pepooko egee molo medee ogolone, hee nee howo mapoo homo toowa egee molo egelega ka pagala?

<sup>42</sup> Osoloso nee howo mapoo homo toowa egee molo egelega no see kaseega nee odoo mapoo takolone, ‘Nee howo mapoo gelesi pepooko egee molo ayo tabiga,’ dee ka take-liyo? No tei goo goolee bakadio gweli odoo. Bei, daga nee howo mapoo homo toowa egee molo ee tabigi. Egeesee nee odoowo howo mapoo gelesi pepooko egee molo medee ogoloso nayo tabigilei tebileiso.”

*Homokoko maga homo o su ee goolee deliso*

*(Mat 7:16-20; 12:33-35)*

<sup>43</sup> “Esiga homo ko tekepo peli oso ko tokenee koo peli. Osoloso homo ko tokenee peli oso ko tekepo koo peli. Haye.

<sup>44</sup> Bei, homo susuga ee ko oso pa maga goolee deliso. Esiga pigi ko sabolo geleipi ko sabolo oso wulo homo hee mapoo ko koo peli. Haye.

<sup>45</sup> Esiga odoo tekepo oso o sooloo ma kulodu goo tekepo egee molo ee o maga maga woola yilige bigiliso. Osoloso odoo tokenee oso o sooloo ma kuloduga goo tokenee ee woola yilige bigiliso. Esiga ogoo goo oso odoo sooloo ma kulodu bei mologa, o maga maga goo egeesee takamalaiso.”

*Odoo bakadio oso moso tegei*

*(Mat 7:24-27)*

<sup>46</sup> “Niyo kasi maga amapoo ‘Lodee, Lodee,’ dolone dobolone hee nei ayo taka goo ee telega ka poogoosomo?

<sup>47</sup> Odoo agayo amapoo sibilesa mo to duloso mesimo siloga, yo egeesee badalaiso.

<sup>48</sup> Yo edebeeyo moso togolone mi nelegedi dooloso omou sooloso moso tegei egeesi masi badoso. Bei, howo duwolone howo ki simi oso moso

omapoo weiso. Esino moso egee dabisile. Bei, moso medee kalawa tegeiga.

<sup>49</sup> Esino odoo agayo mo to duloso mesilega siloga, yo odoo heeso moso togolone omou mi nelegedi doolega, moso tegei egeesi masi badoso. Bei, howo duwolone howo ki simi oso moso omapoo woome kibilega saga goboloso guobuguso.”

## 7

*Loum ha teli odoo gibadeli odoo oso tei too*  
(Mat 8:5-13)

<sup>1</sup> Yesu goo susuga odoo mapoo eligimelee koodobuloso see Kapeniyum mi mapoo diso.

<sup>2</sup> Kapeniyum mi mapoo Loum ha teli odoo 100 gibadeli odoo badebeiso. Esino domo omapoo yo o tou teli odoo hee paiye oso talai koola taba molome egeiso. Osoloso yayo o tou teli odoo egee bia diya gweliso.

<sup>3</sup> Esiga yayo Yesuye simi duloso Yu odoowo wiligi odoo tebisa abo mapoo Yesu idilame diye diso, Yesuye sibilesa o tou teli odoo ee tekepo palame.

<sup>4</sup> Osoloso Yu odoowo wiligi odoo tebisa egee bia oso sibilesa Yesu mapoo howolone egeese takaso, “Iba diya goomogo, nayo dileso ha teli odoo gibadeli ee pidilei.

<sup>5</sup> Bei, yayo ibada odoo halo ibada howo gisili moso tegeiso.”

<sup>6</sup> Esem Yesu to hagee duloso dibolo diso.

Yesu moso koola mapoo dimeleeno, ha teli gibadeli odoo oso o odoo abo diye neme, diayo sibilesa Yesu mapoo egeese takaso, “Ha teli odoo gibadeli odoo oso namapoo to egeese taka, nayo o moso mapoo dilei yo koo goomogogona. Bei, yo tokenee odooga, no o moso mapoo na sibiyena.

<sup>7</sup> Esiga yo see nayo bado mapoo sibilei koo goomogogona. Esino yo goomogogona nayo wulo no egee bado maga toso takeeyena o tou teli odoo ee tekepo palame.

<sup>8</sup> Osoloso yayo see egeese taka, yo odoo abo ma hemiduga tou tolone dia to mapoo mesiloso siliso. Osoloso yima hemi tou teli odoo abo dosogona. Esiga yayo dimapoo koo diye daga diliso. Osoloso yayo odoo hee mapoo no hamapoo sibeye daga sibiliso. Osoloso goo egee teye daga, yo see goo egee tobuloso teliso. Esiga yo goo egeese teliga nayo see wulo hamaga badolone toso takeeyena, o tou teli odoo ee weidilame.”

<sup>9</sup> Esem Yesuye ha teli odoo gibadeli odoo oso to taka duloso diya howoodooso. Osoloso odoo mooloogoodoo yima hamamee simi omapoo bidi toboloso dimapoo bolone egeese takaso, “Ayo nimapoo taka, ayo Isalael mi mapoo silee ee ma kulodu odoo kibiya tei too odoo hee egeesi egele,” diso.

<sup>10</sup> Osoloso ha teli gibadeli odoo oso diye di odoo diayo see wedi dileso egeino, ha teli gibadeli odoo eyo tou teli odoo ee weidiloso badoboome egeiso.

*Yesuye sobo bauwo owolo giso holo ta maga see hogabidi*

<sup>11</sup> Osoloso biame abo olo poogoloso hamamee Yesu mi hee Nein mapoo diso. Esem o hamamee dili odoo sabolo osoloso odoo abo susuga oso yo dodomo diso.

<sup>12</sup> Yesu dileso beelee osulu miyopoo dumolome odoo aboso edebeeyo bia mi maga giso holo gie kauwa ta eyo su imadoloso sibadeeso. Giso holo ta hagee sobo bau heeyo owolo hedebe oso. Osoloso odoo susuga oso sobo bau sabolo sibadeeso.

<sup>13</sup> Lodeeye sobo bau hagee ogoloso yo diya sooloo dolone yimapoo egeese takaso, “Haga na pise,” diso.

<sup>14</sup> Esem Yesuye dileso giso holo ta eyo su magoo sa tegei homo su mapoo sigime, odoo ta imadoloso diyadee diba omapoo kookoodabaso. Esem Yesuye giso holo ta yimapoo egeese takaso, “Mo holo, ayo namapoo takooso, no tebee!” diso.

15 Esemе giso holo yo hogabu-  
loso badolone to kemeleeso. Esemе  
Yesuye giso holo yo owee mapoo ido  
diso.

16 Odoо susuga oso goo hagee  
ogoloso diya dio dulone Godee  
mapoo goomoga goo poudo  
demeleeso. Egeeseelone diayo  
egeesee takaga meleeso, “Godee  
maga to toloso kokodo takomo sili  
kitulugu odoо oso imapoo peled-  
abadoo. Osoloso Godeeye o odoо  
pidilame olo simidoo,” dee takaga  
meleeso.

17 Edebeeyo Yesuye goo moodoo  
ogoloso Yu odoowo mi Yudiya mi  
susuga mapoo osoloso mi abo koola  
omapoo oposusumo diyadeeso.

*Yonee odoо howo oluguli oso  
Yesuwo goo duloso woosa  
(Mat 11:2-6)*

18 Yonee o hamamee dili odoо  
oso Yesuye goo tomo silee ee Yonee  
mapoo takaso. Esemе Yoneeye goo  
hagee duloso o hamamee dili odoо  
bakadio oso dileso, Yesu mapoo  
hageesee woosalo egeye diso,

19 “No tei Keliso iyo hagee bamolo  
osomo? O, iyo odoо hee bamalaiyo?”  
diso.

20 Esemе Yoneeyo hamamee dili  
odoо oso dileso, Yesu mapoo egeesee  
takaso, “Yonee odoо howo oluguli  
oso iba namapoo sibeye dolone  
egeesee taka, ‘No tei Keliso iyo  
bamelee osomo? O, iyo see odoо hee  
bamalaiyo?’ dee taka,” diso.

21 Esino biame domo omapoo  
Yesuye odoо paigiga sabolo osoloso  
odoо bo holo paladee sabolo osoloso  
odoо howo siliga sabolo tekepo  
moodoomo sileeso.

22 Yayo egeeseemo silone Yonee o  
hamamee dili odoо mapoo egeesee  
takaso, “Niba see wedi dileso Yonee  
mapoo niyo egei goo sabolo osoloso  
niyo du goo sabolo takee. Bei, odoо  
howo siliga oso see medee ogowa.  
Osoloso odoо kido tigidiba sabolo  
see tekepo poloso silesiboso. Osoloso

odoо kolo e bia sabolo tekepo poloso  
silesiboso. Osoloso odoо dulu tabaga  
nosee tekepo poloso to taka dulug-  
amo silesiboso. Osoloso odoо wedia  
sabolo hogogabuloso see silesiboso.  
Osoloso to tekepo hagee bi mauwe  
odoо oso duluga moloso.

23 Esiga odoо agayo ayo goo  
moodoo ee ogoloso diayo amapoo  
tei too goo ee pegelega poogooga,  
Godeeye dimapoo goomoga goo  
tenelaiso,” diso.

*Yesuye Yonee odoо howo oluguli  
eyo goo taka  
(Mat 11:7-19)*

24 Yonee o hamamee dili odoо  
oso see wedi dime Yesuye odoо  
mapoo Yoneeyo goo ee takalame  
bei mooloogooso. Osoloso yayo  
egeesee takaso, “Niba miwe poo-  
goo mi mapoo ogoо goo agalame ka  
diyo? Pooso siboga obuso dabisa ee  
agalame ka diyo?”

25 Niba edebeeyo dugo tekepo  
kaloso badoboome ee agalame ka  
diyo? Haye. Bei, dugo tekepo kala-  
gali odoо ee wiligi odoо oso debeli  
moso tekepo mapoo debeli.

26 Esino niba wulo Godee maga to  
toloso kokodo takomo sili odoо ee  
agalame ka diyo? O. Niyo dileso  
egei odoо Yoneeye Godee maga to  
toloso kokodo takomo sili odoо daga  
hoogoo debei yayo dagadiso.

27 Bei, Godeeyo to booka mapoo  
hogugu oso egeesee egee takoo, o goo  
ee takooso,

‘Ayo mo to tosili odoо yo daga malalo  
diye dalaiso.

Yayo nee eli hoodo magalame.’

28 Esiga ayo nimapoo taka, odoо  
daga hoogoo debei susuga ee Yonee-  
eye dagadileso badoso. Esino Godee-  
eye wiligi doloso badeli mapoo odoо  
wuluge oso Yonee dagadileso ka ba-  
doso,” diso.

29 Odoо susuga sabolo osoloso tek-  
isi molee misigeli odoо abo sabolo to  
hagee duloso Godeeyo goo ee tekepo



diso. Bei, diba nosee Yoneeye howo ogusigaso.

<sup>30</sup> Esino Pelisi odoo sabolo osoloso tei eligili odoo sabolo oso Godeeye goomoga goo diayo ee talai gowoolone diba howo ogusigilega poogooso.

<sup>31</sup> Osoloso Yesuye see egeesee takaso, “Epedee domo hamapoo egee do odoo ee odoo kasi masiyo?”

<sup>32</sup> Diba holaiso masi go domo mapoo dobolone emegei dimapoo nei takoo nei takoo dolone dobolone egeesee takaga meliso,

‘Iyo goomoga kosaiya poume niba hepele, osoloso iyo goohele kosaiya poume niba pupusigele.’

<sup>33</sup> Niba odoo egeesi masi doso. Bei, Yonee odoo howo oluguli oso simi ee yo wo sabolo wain i sabolo namo sile. Esino niyo yo bo holo paladoo dee takeliso.

<sup>34</sup> Osoloso hamamee Odoo Holo anosee olo simiso. Ayo sibilesa wo sabolo wain i sabolo namo siloga, niyo a wo sabolo yugune sabolo dooboo nali odoo deliso. Osoloso niyo a tekisi molee misigeli odoo sabolo osoloso tokenee teli odoo sabolo hedebe doloso ka badeli deliso.

<sup>35</sup> Esino odoo agayo Godeeye goo goolee tekepo gooleedoloso tomo siloga, yayo Godeeye goo goolee ee tekepo dolone ka eligiso,” diso.

*Tokenee teli sobo oso Yesuwo homo hapoo*

<sup>36</sup> Biame heeso Pelisi odoo Saimonoye Yesu idoloso o moso mapoo nei nalame diso. Esememe Yesu Saimonowo moso mapoo nei nalame biaso.

<sup>37</sup> Mi omapoo goo tokenee teli sobo hee badebeiso. Esino yayo Yesuye Pelisi odoowo moso mapoo nei namelee goo ee duloso sisigageli i medee tekepo yoso moodoo howogi mapoo salamasoloso tosimiso.

<sup>38</sup> Osoloso Yesuwo miligi maga gauwuloso pusulone o didawoso Yesuwo homo balagieso. Osoloso yayo see Yesuwo homo mapoo

o wudu oso tolone adameleeso. Osoloso sisigageli i medee tekepo oso Yesuwo homo mapoo soomeleeso.

<sup>39</sup> Osoloso Pelisi odoo Saimonoye goo hagee ogoloso egeesee goolee meleeso, “Odoo hagee tei Godee maga to toloso kokodo takomo sili odoo oso diepi, soboso yo sige medee hoodo egeliyo. Bei, sobo hagee goo tokenee teli sobo,” diso.

<sup>40</sup> Esememe Yesuye Pelisi odoo mapoo egeesee takaso, “Saimon, ayo namapoo goo takalai, a goomogo,” diso.

Esememe Saimonoye egeesee takaso, “Eligili odoo, takee,” diso.

<sup>41</sup> Esememe Yesuye yimapoo egeesee takaso, “Odoo heeso odoo bakadio mapoo molee teneeso. Egeeseelone yayo odoo hee mapoo molee ko 50 tenelone, odoo hee mapoo hedebe molee ko 50 teneeso.

<sup>42</sup> Esino hamamee odoo bakadio hagee bia dimapoo molee mauwe poogoome, nei o hedebe egeesi yimapoo tenelega poogooso. Esememe bi eyo amameeye goo hagee ogoloso dimapoo egeesee takaso, ‘Bige boobado bigi,’ diso. Esiga odoo bakadio hagee ma kulodu odoo hee kaso bi eyo ama diya ka gooleebuguba?” diso.

<sup>43</sup> Esememe Saimonoye nei yimapoo egeesee takaso, “A goolee, molee toowa too odoo oso ama diya goolee malaiso,” diso.

Esememe nei Yesuye Saimon mapoo egeesee takaso, “Nayo tei goo takoo,” diso.

<sup>44</sup> Yesuye sobo mapoo bolone Saimon mapoo egeesee takaso, “No sobo hagee ege! Ayo nee moso mapoo sibume, nayo mo homo hapalame howo amapoo tenele. Esino sobo hagoso o didawoso mo homo hapoloso see o wuduso mo homo taso.

<sup>45</sup> Osoloso ayo nee moso sibume nayo goomogolone a edele. Esino ayo nee moso mapoo simi domo

omaga sobo hagoso mo homo mapoo adamelee koodobile.

<sup>46</sup> Osoloso nayo olipi i oso mo wiligi mapoo soole. Esino sobo hagoso sisi-gageli i medee tekepo oso mo homo mapoo sooso.

<sup>47</sup> Esiga ayo namapoo taka. Sobo hagee o goo tokenee susuga olo hapoloso boobado buguso. Esiga sobo hagoso a diya goolee goo ee weliga yilige buguso. Esino odoo agayo ayo o goo tokenee pepooko hedebe hapoloso boobado buguga, yayo a goolee goo ee haga toowanee,” diso.

<sup>48</sup> Osoloso Yesuye sobo omapoo egeesee takaso, “No nee goo tokenee susuga ee olo hapoloso boobado buguso,” diso.

<sup>49</sup> Esemee odoo abo yibolo hodobo dobolone nei nalaga melee odoo oso goo hagee ogoloso dieso nediliyo dima kulodu egeesee takaga meleeso, “Odoo hagee odoo ogumo? Yayo goo tokenee hapoloso kasee boobado bugu domo ka silosomo?” diso.

<sup>50</sup> Diayo egeesee takomolome Yesuye sobo yimapoo egeesee takaso, “Nayo tei too goo maga badoboso kookaiyo gie badeli nayo olo tooso. Esiga no goomoga sabolo di,” diso.

## 8

### *Sobo aboso Yesubolo di*

<sup>1</sup> Goo hagoso dileso koodobume, Yesuye to tekepo Godeeye wiligi doloso badeli goo ee eligimo silone, mi hee maga mi hee mapoo du domo silesibiso. Osoloso o hamamee dili odoo 12 yibolo hodobo sileeso.

<sup>2</sup> Osoloso sobo paigiga Yesuye tekepo moodoo sabolo osoloso sobo bo holo paladee Yesuye tekepo moodoo oso Yesubolo sileeso. Sobo egee bia hagoso: Meli, o hu hee Magadalin. Yesuye sobo hageeyo kuloduga bo holo 7 peegoo hasiso buguso.

<sup>3</sup> Osoloso sobo hee Helodeeyo moso bali odoo hee Kusayo osobo Yowana, osoloso Susana, osoloso sobo abo dibolo silesibiso. Sobo hagee bia oso Yesu sabolo osoloso o hamamee dili odoo sabolo dimapoo diayo dia molee oso diba pidimo silesibiso.

### *Witi wo ko segei maga wudu taka (Mat 13:1-9; Maka 4:1-9)*

<sup>4</sup> Odoo susuga mi opusomo opusomo di maga sibilesi mooloogoodeme Yesuye wudu taka hamaga opususo,

<sup>5</sup> “Biame heeso odoo hee witi wo ko segelame diso. Yo witi wo ko sogomo sileeme, ko abo eli domo mapoo misigedibaso. Esemee edebeeyo eli omaga silesibulone witi wo ko dia homoso topoomo dime sóso sibilesi neso.

<sup>6</sup> Esemee witi wo ko abo ee yugogisi mi mapoo misigedibaso. Osoloso bou gasibilesi palame sino haga booloogelega wediaso. Bei, yugogisi mi ee ma kulodu howo mauwega.

<sup>7</sup> Osoloso witi wo ko abo obu ma kulodu misigedibaso. Esino haga booloogelega saga paladeeso. Esino oso polone obu sabolo palaga tiso tiadolone witi wo susuga wediaso.

<sup>8</sup> Osoloso witi wo ko abo mi tekepo mapoo misigedibaso. Osoloso bou pisoloso kauwuloso ko diya palagaso. Esemee witi wo ko susuga oso ko pa homokoko 100 egeesi oso palagaso.”

Yesuye to hagee takoloso tobudulone toso neligidi egeesee takaso, “Odoo niba dulubolo, esiga ayo hagee takoo medee hoodo dui!” diso.

### *Wudu taka goo eyo bei (Mat 13:10-23; Maka 4:10-20)*

<sup>9</sup> Yesuwo hamamee dili odoo oso Yesu mapoo egeesee takaso, “Wudu taka goo hageeyo bei kasiyo?” diso.

<sup>10</sup> Esemee Yesuye nei dimapoo egeesee takaso, “Niyo Godeeye wiligi doloso badeli goo ee ogoloso gooleedalaiso. Bei, daga Godeeye

wiligi doloso badeli goo ee mada meleeso. Esino epei nimapoo woola ka yilige buguso. Esino odo abo mapoo ayo biame susuga wudu takeliso. Bei, 'diayo ogoloso medee kibiya egelega pagalame.

Osoloso diayo duloso goo eyo bei medee kibiya gooleedelega pagalame.'

<sup>11</sup> Esiga wudu taka goo eyo bei hagoso: Witi wo ko ee Godeeyo to oso.

<sup>12</sup> Esiga odo abo witi wo ko eli domopoo misigediba egeesi masi doso. Diba to tekepo duliso. Esino Godeeyo to hagee dibada sooloo ma kulodu egee molo ee boobado bigilame Saitenso dimapoo boobado bigili goo teneliso. Bei, diayo to omapoo tei toloso gie badeli teyaga.

<sup>13</sup> Esiga odo abo witi wo ko yugogisi mi mapoo misigediba egeesi masi doso. Esiga diba Godeeyo to taka duloso goomoga sabolo medee teliso. Esino witi wo ko oso yugogisi mi mapoo polone o too medee meilega poogoo egee, diba onosee egeese seliso. Godeeyo to oso dibada sooloo ma kulodu too medee koo meili. Osoloso diayo Godeeyo to duloso biame deiyepo mapoo wulo tei teliso. Esino diayo Godeeyo to mapoo tei too maga, hegi goo sabolo dala goo sabolo oso dimapoo siboga, diayo Godeeyo to mapoo tei too goo ee saga pegeliso.

<sup>14</sup> Osoloso odo abo witi wo ko oso we ti kauwe kadee ma kulodu misigediba egeesi masi doso. Diba Godeeyo to duloso to ee teliso. Esino mi toowayo gie badeli goolee sabolo, osoloso bi bei doloso dabalai goo gweli sabolo, osoloso dibada su oso goomoga goo ee goolee sabolo diyadulone dibada tei too tokenee peliso. Goo egeesi maga diayo tei too goo oso homokoko masi koo peli.

<sup>15</sup> Osoloso odo abo witi wo ko mi tekepo mapoo misigediba egeesi masi doso. Diayo dibada sooloo ma

kuloduga tekepo goo gweli sabolo osoloso goomoga sabolo Godeeyo to duloso dibada sooloo ma kulodu medee tei teliso. Osoloso diayo o to kibiya kookoodoloso, dobolone homokoko masi diya peliso."

*Mo to medee dui  
(Maka 4:21-25)*

<sup>16</sup> "Edebeeyo keme pouloso tolo oso koo gagali, osoloso mada koo mageli. Yo keme pouloso woola mapoo pou mageliso, edebeeyo moso kulodu gasibilesa gadeebugu ee agalame.

<sup>17</sup> Bei, goo susuga epedee mada egee molo, see hamamee odo susuga oso agalame woola peledabalaiso. Osoloso odo susuga oso koo duli goo ee see odo susuga oso dulame woola yilige bigileiso.

<sup>18</sup> Mo to hagee niyo medee dui. Bei, to taka medee duli odo mapoo Godeeye goo goolee tekepo tenelaiso. Esino edebeeyo eyo nediliyo yo Godeeye wiligi doloso badeli goo ee yo gooleedoo doloso mo to dulega poogooga, Godeeye yimapoo goo goolee pepooko egee molo see eyo peedee dalaiso," diso.

*Yesuwo owee sabolo omolo dio sabolo  
(Mat 12:46-50; Maka 3:31-35)*

<sup>19</sup> Biame heeso Yesuwo owee sabolo omolo dio oso Yesu agalame sibadeeso. Esino odo bei diya mooloogoodoloso ka doboome, diba Yesuye badebei mapoo hodu dilei tebile.

<sup>20</sup> Esemee odo heeso diba ogoloso, Yesu mapoo egeese takaso, "Noowee sabolo osoloso nomolo dio sabolo oso peegoo no agalame balaga moloso," diso.

<sup>21</sup> Esemee Yesuye odo mooloogoodoo mapoo nei egeese takaso, "Edebeeyo Godeeye eligi goo ee duloso mesimo silesiboga, diba mo wee dio osoloso molo dio oso," diso.

*Yesuye i sabolo howo ki sabolo hamaga taka*

*(Mat 8:23-27; Maka 4:35-41)*

<sup>22</sup> Biame heeso Yesuye o hamamee dili odoo dimapoo egeesee takaso, “Iba abei hodiokoo dalo soowoomo,” diso. Esemé diba du mapoo bulumaloso soowadeeso.

<sup>23</sup> Diba abei domopooga damolome, Yesu tila poogoomé tiaso. Esemé haga booloogelega i toowa sibume, abei omapoo howo ki toowa simiso. Esemé howo ki toowa oso sibulone dibada du ma kulodu howo sasoo oso diba dia du sabolo howomoo owulame siso.

<sup>24</sup> Esemé Yesu o hamamee dili odoo oso dileso, Yesu tidilone egeesee takaso, “Wiligi odoo, iba howomoo owuloso wedilame see!” diso.

Esemé Yesu tia hogabuloso tobudulone i sabolo howo ki sabolo koodobilame to kitulugu sabolo takaso. Esemé i sabolo howo ki sabolo simi saga omapoo koodobiaso.

<sup>25</sup> Esemé Yesuye o hamamee dili odoo dimapoo egeesee takaso, “Niyo tei too kasomo?” diso.

Esemé Yesuwo hamamee dili odoo oso goo hagee ogoloso howoogadoloso obugulone diesono egeesee takaga meleeso, “Odo hagee odoo ogumo? I sabolo howo ki sabolo o to duloso koodobiaso,” dee takaga meleeso.

*Yesuye odoo bo holo pala ee tekepo moodoo*

*(Mat 8:28-34; Maka 5:1-20)*

<sup>26</sup> Osoloso Yesu o hamamee dili odoo sabolo Gelili mi maga abei daloso Gelasa mi mapoo peledabaso.

<sup>27</sup> Yesu du maga widi pee mapoo pubalokolone egeino, odoo bo holo pala oso yo tugodalame sibume egeiso. Odo hagee daga hoogoo doobudu boodo diwe silone biame susuga odoo bi mapoo badeli.

<sup>28-29</sup> Bei, bo holo oso kitulugu oso yimapoo toga edebeeyo ki tiso yo tialogoloso mageliso. Esino bo holoso kitulugu oso ki tiso tialogoloso magoo ee kookoobuguloso

odoo ee idoloso doobudu diliso. Esino odoo hagoso Yesu ogoloso miyomoo gasuwoloso gwa sabolo tiamolone toso neligidi yimapoo egeesee takaso, “Dokodoo badeli Godeeyo owolo Yesu, nayo amapoo ogo goo moodoolame ka simiyo?” diso. Osoloso yayo Yesu mapoo howoolone see egeesee takaso, “Nayo amapoo dala na tenee,” diso. Odo bo holo pala oso to hageesee taka. Bei, daga Yesuye bo holo odoo ma kulodu egee bado mapoo takolone peegoo gasibeye, dee takeme ka taka.

<sup>30</sup> Esemé Yesuye yimapoo egeesee takaso, “Nee hu ogumo?” diso.

Esemé yayo to nei egeesee takaso, “Ibada hu ee Bei,” diso. Bei, bo holo susuga oso yima kulodu doso.

<sup>31</sup> Esemé bo holo odoo ma kulodu debei oso egeesee takaga meleeso, “Nayo iba Dou mi mapoo na seesee peegee,” dee takaso.

<sup>32</sup> Esemé biame omapoo, esia ma dokodoo be hu susuga oso mooloogoo doloso, mi nalagamo silesibiso. Esemé bo holo odoo ma kulodu debei oso Yesu mapoo howoolone egeesee takaso, “Iba be ma kulodu galaga di dee takee,” diso. Esemé Yesuye dimapoo egeesee takaso, “Niba be ma kulodu galaga dilei soowa!” diso.

<sup>33</sup> Esemé bo holo susuga oso odoo ma kuloduga peegoo galaga dileso see be ma kulodu galaga diso. Esemé be susuga oso godobia maga kukolo meilesi, howomoo wediaso.

<sup>34</sup> Esemé be bali odoo oso goo hagee ogoloso kukulo dileso dia mi mapoo osoloso mi pepooko abo mapoo goo egee takomo diso.

<sup>35</sup> Esemé odoo susuga oso goo hagee duloso ee agalame sibadeeso. Diba sibilesi egeino, bo holo pala odoo ee tekepo poloso Yesuwo homo beiyopoo badolone goo goolee tekepo toloso dugo kaloso bado-boome egeiso. Esemé diba diya ebigaso.

<sup>36</sup> Esemé Yesuye odoo bo holo pala ee tekepo moodoome egei odoo oso



diayo egei goo ee agalame sibadee odoo dimapoo oposususo.

<sup>37</sup> Esemé Gelasa mosobia odoo susuga sabolo osoloso koola omapoo debeli odoo susuga sabolo oso Yesu mapoo egeesee takaso, “No mi hamaga saga peegoo di,” diso. Bei, diba Yesuye goo moodoo mapoo ogoloso diya obugume. Esemé Yesu dilame yo du mapoo dabagaso.

<sup>38</sup> Esemé odoo bo holo pala Yesuye tekepo moodoo oso Yesubolo dilame goomogaso. Esino Yesuye yimapoo egeesee takaso,

<sup>39</sup> “Haye. No abolo na sibe. No nee mi mapoo see wedi dilesó Godeeye namapoo goo toowa moodoo goo ee oposisi,” diso. Esemé odoo yo o mi mapoo see wedi dilesó, Yesuye yo tekepo moodoo goo ee oposusumo sileeso.

*Yesuye Yailaseeyo owolo ta ee see hogabilame tekepo moodoo sabolo osoloso sobo paiye tekepo moodoo goo*

*(Mat 9:18-26; Maka 5:21-43)*

<sup>40</sup> Yesu see abei hodiokoo dalo sibume, yo bolone debei odoo susuga oso yayo simi ogoloso diya goomogaso.

<sup>41</sup> Esemé omapoo haga booloogel-ega odoo hee, Yu odoo dia howo gisili moso gibadeli odoo taba, Yailaseeye, sibilesó Yesuwo homo beiyopoo gawusoloso badolone Yesu mapoo howoolone egeesee takaso, “No mo mosopoo sibe!

<sup>42</sup> Bei, mo sobo holo hedebe, o dugo 12, paiye oso olo talame soomoloso,” diso.

Esemé Yesuye Yailaseeyo mosopoo dumolome eli domopoo odoo susuga oso yima hodu diya mooloogoo doloso dulone nei halagabugu nei halagabugu domo diyadeeso.

<sup>43</sup> Osoloso odoo mooloogoo doloso diyadee ee ma kulodu sobo hee aso wooloomaloso badebei sabolo diso. Yo aso wooloomaloso badebei ososee dugo 12 poogooso. Esino odoo heeso yo tekepo moodolai tebile.

<sup>44</sup> Esino sobo hagoso Yesu dumolome, mada miligiyoopoo sibilesó Yesuwo dugo su mapoo sigeme, aso woolooma oso sawo soomelee omapoo saga koodobiaso.

<sup>45</sup> Esemé Yesuye egeesee takaso, “Odoó agayo a ka sigoba?” diso.

Esino odoo susuga oso Yesu sigile doloso diya pulugume, Pitaye Yesu mapoo egeesee takaso, “Wiligi odoo, odoo susuga oso nobolo hodobo dulone no ka sigo domo du,” diso.

<sup>46</sup> Esemé Yesuye nei egeesee takaso, “Haye. Egeesee sele. Odoó heeso a ka sigiwa. Esemé odoo weidilame moodeli kitulugu ama melee oso peegoo di mawo gooleedoso,” diso.

<sup>47</sup> Sobo hagoso goo moodoo ee mada magalai tebile doloso gooleedoloso kikiliga sabolo dilesó, Yesuwo homo beiyopoo gasuwoloso badebeiso. Osoloso Yesuye sobo yo weidilame moodoo goo sabolo, osoloso yayo Yesu sige goo ee oposusume odoo susuga oso duso.

<sup>48</sup> Esemé Yesuye sobo yimapoo egeesee takaso, “Mo sobo holo, no tei too maga no olo tekepo paso, esiga no mesie sabolo di,” diso.

<sup>49</sup> Osoloso Yesuye sobo yimapoo to takomolome, odoo heeso Yailaseeyo moso abaga sibilesó, Yailas mapoo egeesee takaso, “Nee sobo holo olo ta moloso. Esiga nayo eligili odoo hamapoo wulo goo mauwe na ido sibe,” diso.

<sup>50</sup> Esino Yesuye goo hagee duloso Yailas mapoo egeesee takaso, “No haga na ebi, wulo amapoo tei te. Egeeseega nee sobo holo ta egee molo see weidileiso,” diso.

<sup>51</sup> Diba dilesó mosopoo doboome, Yesuye dulone hedebe Pita, Yonee, Yemes, osoloso sobo holo eyo owee dio ama dio ono gilimadoloso, moso kulodu galagadiso.

<sup>52</sup> Diba moso kulodu galagadilesó egeino, odoo susuga oso sobo holo ta ee halo pupusiga molome egeiso. Esemé Yesuye dimapoo egeesee takaso,

“Niba egee pupusiga molo epedee omapoo koodobie. Bei, sobo holo yo koo ta moloso. Esino yo wulo tia moloso,” diso.

<sup>53</sup> Esemé Yesúye egeesee taka dulo diba yiligaso. Bei, sobo holo oso ta diba olo egeiga.

<sup>54</sup> Esino Yesúye sobo holo ta eyo dee mapoo toloso yimapoo egeesee takaso, “Sobo holo, no tebee,” diso.

<sup>55</sup> Esemé sobo holo ta ee o gie badeli see wedi sibume, yo hogabuloso tabaso. Esemé Yesúye dimapoo egeesee takaso, “Sobo holo mapoo nei tenee,” diso.

<sup>56</sup> Esino sobo holo eyo ama dio owee dio goo hagee ogoloso diya howoogadooso. Esemé Yesúye dimapoo egeesee takaso, “Niso egei goo hagee odoó abo mapoo na takee,” diso.

## 9

*Yesúye o hamamee dili odoó 12 diye di*

*(Mat 10:5-15; Maka 6:7-13)*

<sup>1</sup> Yesúye o hamamee dili odoó 12 gilimadoloso dimapoo kitulugu teneeso, diayo bo holo odoó ma kulduga peegoo hasiso bugu domo silesibulone odoó paigiga sabolo tekepo moodoo dalame.

<sup>2</sup> Osoloso yayo diba diye diso, diayo dileso Godeeye wiligi doloso badeli goo ee odoó mapoo eligimo silesibulone, odoó paigiga sabolo tekepo moodoo dalame.

<sup>3</sup> Osoloso yayo dimapoo egeesee takaso, “Niyo dulone, susu, osoloso o, osoloso wo, osoloso molee, osoloso kali bi bakadio na todi, wulo hedebe todi.

<sup>4</sup> Niba mi omapoo dileso pele-dobooga, omapoo edebeeyo niba o moso mapoo ido pologa, moso hedebe omapoo tia melee. Osoloso niyo mi omaga mi hee mapoo dulone, mi egee wulo poogoo du domo silesibe.

<sup>5</sup> Osoloso niyo mi hee mapoo dileso edebeeyo niba o moso mapoo ido

pelega poogooga, niba mi egee poogoo dulone, nee homo mapoo basago mologa omapoo tegene peegee, Godeeye komonolone dimapoo dia goo tokenee eyo nei tenelai goo ee gooleedalame,” diso.

<sup>6</sup> Osoloso diba see diyadeeso. Diba mi hee maga mi hee mapoo du domo silesibulone, Godeeyo to tekepo takomo silesibiso. Osoloso odoó paigiga susuga see tekepo moodoo domo silesibiso.

*Helodeeye goo tiadoo*

*(Mat 14:1-12; Maka 6:14-29)*

<sup>7</sup> Yesúye moodoomo sili goo susuga ee Gelili mi ee bali odoó Helodee duso. Esemé goo hagee dulooso yo diya goo tiadooso. Bei, odoó aboso Yesuwo goo mapoo egeesee takaso, “Yo Yonee odoó howo oluguli ta maga see ka hogabiadoo,” diso.

<sup>8</sup> Osoloso odoó aboso egeesee takaso, “Yo Ilayadoo.” Osoloso odoó aboso egeesee takaso, “Yo Godee maga to toloso kokodo takomo sili odoó hee daga badebei oso ta maga hogabuloso see ka simidoo,” diso.

<sup>9</sup> Esemé Helodeeye goo hagee dulooso egeesee takaso, “Yonee ayo wooloomeye neme olo wooloomaso. Esino ayo goo toowa hagee dumolo ee agamo goo ee dumolosomo?” diso. Yo diya goo tiademe, yayo Yesu agalame diya goomogaso.

*Yesúye odoó 5,000 mapoo nei pi*

*(Mat 14:13-21; Maka 6:30-44; Yon 6:1-14)*

<sup>10</sup> Yesúye diye di odoó 12 diba see wedige sibilesi, goo diayo moodoo sabolo osoloso goo diayo eligi susuga ee Yesu mapoo oposususo. Osoloso Yesúye diba gilimadoloso Betsaida mi mapoo dibusomo dabalame diyadeeso.

<sup>11</sup> Esino odoó susuga oso goo hagee dulooso diba nosee hamamee diyadeeso. Esemé diayo simi Yesúye ogoloso diba gilimadoloso dimapoo Godeeye wiligi doloso badeli goo ee

eligilone odoo paigiga sabolo weidilame tekepo moodoo demeleeso.

<sup>12</sup> Yesu yo egeeseemo sileeme, o hamamee dili odoo oso habe sibilesi yimapoo egeese takaso, "Odoo susuga hagee epedee diye dee, diba mosobia koola omapoo dileso dieso nei nalai sabolo moso tilei sabolo ee esilame. Bei, mi iyo hagee do mapoo nei iyo nalai sabolo moso iyo tilei sabolo mauwedoo," diso.

<sup>13</sup> Esem e Yesu ye dimapoo nei egeese takaso, "Niyo dimapoo nei tenee," diso.

Esem e diayo nei egeese takaso, "Odoo hagee diya bei. Esino imapoo wo si hedebe dee tiadoo sabolo di bakadio sabolo moloso. Esino nayo imapoo nei abo talame diye doloso ka takala?" diso.

<sup>14</sup> Bei, biame omapoo mooloo-goodoo ee ma kulodu gisowe hesiga ee 5,000.

Esem e Yesu ye o hamamee dili odoo dimapoo egeese takaso, "Odoo susuga nei nalame odoo 50 egeesiso mooloo-goodoo ka buluma, odoo 50 egeesiso mooloo-goodoo ka buluma dee takee," diso.

<sup>15</sup> Esem e odoo susuga olo nei nalame egeese bulumamo diso.

<sup>16</sup> Osoloso wo si dee tiadoo sabolo di bakadio Yesu ye toloso, Kei mi ma dokodoo bolone nei pidilame goomoga goo Godee mapoo takaso. Osoloso yayo wo popeiloso di bakadio agisaloso, o hamamee dili odoo mapoo piso, see diayo odoo susuga mapoo pilame. Esem e diayo wo si popei sabolo di hwei sabolo odoo susuga mapoo piso.

<sup>17</sup> Esem e odoo susuga nei ne oso diya edigime nei hosudelega abo poogooso. Osoloso diayo nei naloso abo poogoo ee Yesu o hamamee dili odoo oso misigamo dileso bou tegei mapoo soo 12 egeesi metamagisaso.

*Pitaye Yesuwo goo yilige bugu  
(Mat 16:13-19; Maka 8:27-29)*

<sup>18</sup> Biame heeso Yesu obusomo Godee mapoo takolone badoboome, o hamamee dili odoo oso yimapoo sibadeeso. Esem e Yesu ye dimapoo egeese takaso, "Edebeeyo a odoo ogu deliyo?" diso.

<sup>19</sup> Esem e diayo nei Yesu mapoo egeese takaso, "Odoo aboso taka no Yonee odoo howo oluguli dee take-liso. Aboso taka no Ilaya deliso, osoloso odoo aboso taka no Godee maga to toloso kokodo takomo sili odoo hee daga badebei oso ta maga hogabuloso see ka simidoo, dee take-liso."

<sup>20</sup> Esem e Yesu ye nei dimapoo egeese takaso, "Esino nei niyo a odoo ogu deliyo?" diso.

Esem e Pitaye nei egeese takaso, "No Godeeye hudi magoo Kelisoso," diso.

<sup>21</sup> Esem e see Yesu ye nei o hamamee dili odoo dimapoo egeese takaso, "Niyo odoo abo mapoo takolone a Keliso dee na takee," diso.

*Yesu ye eyo talai goo ee taka  
(Mat 16:21; Maka 8:31)*

<sup>22</sup> Osoloso see tobu Yesu ye o hamamee dili odoo dimapoo egeese takaso, "Odoo Holo, a dala toowa bei talaiso. Osoloso Yu odoowo wiligi odoo tebisa sabolo, tei moso wiligi odoo tebisa sabolo, tei eligili odoo sabolo oso a diya gowoolone pagalaiso. Osoloso edebeeyo a teli mapoo magalaiso. Esino biame bakadio midoo ma kulodu ta moloso biame hee mapoo see hogabileiso."

*Yesu ye yayo di hamamee dilei goo ee eligi*

*(Mat 16:24-28; Maka 8:34-38)*

<sup>23</sup> Yesu ye see odoo susuga mapoo egeese takaso, "Edebeeyo ayo di hamamee sibilei goomogoga, yo daga eyo goomoga goo tomo sili ee poogoloso, biame susuga ma kulodu eyo talai sabolo dala toowa talai goo sabolo medee mopoodoo doloso ama hamamee ka sibe.

<sup>24</sup> Osoloso odoo agayo o gie badeli eyo nediliyo pidilame seega, yo o gie badeli ee osugobalaiso. Esino odoo agayo mo goo maga o gie badeli pee-goo magooga, yo badoboso kookaiyo gie badeli talaiso.

<sup>25</sup> Esino odoo agayo mipoo toowa hamapoo badolone, eyo goomoga goo susuga tomo siloso, hedebe gie badeli goo ee telega dagaduga, yo see ogoo goo talaisomo? Mauwe.

<sup>26</sup> Osoloso odoo agayo abolo osoloso mo to mapoo gowooga, Odoo Holo ayo toowa doloso badeli goo omaga mo gadeebugu sabolo, osoloso mo Maye toowa doloso badeli goo omaga o gadeebugu sabolo, osoloso Godeeyo momaiye oso toowa doloso debei omaga gadeebugu sabolo sibilesa nei diba gowoolaiso.

<sup>27</sup> Esiga ayo nimapoo ka taka. Nima kulodu odoo abo olo doso, diba Godeeye wiligi doloso badalai biame oso simi ogoloso, hamamee wedileiso,” diso.

*Yesu o su opusomo di  
(Mat 17:1-8; Maka 9:2-8)*

<sup>28</sup> Osoloso biame 8 egeesi poogoloso, hamamee Yesuye dulone, Pita, Yonee, osoloso Yemes esee gilimadoloso mubi dokodoo Godee mapoo takalame palaso.

<sup>29</sup> Yesuye Godee mapoo takomolome, o mudu opusomo doloso o dugo diya heliye poloso omaga poniso.

<sup>30</sup> Esemе haga booloogelega, Ilaya dio Moses dio galaga sibilesa Yesubolo to kemeleeso.

<sup>31</sup> Diayo Kei mi diya gadeebugu sabolo peledoboloso Yesuye Godeeyo to dodolone Yelusalem mapoo dileso talai goo ee oposususo.

<sup>32</sup> Pita o odoo abo sabolo tięasoloso hogogabuloso keesee egeino, Yesu yayo toowa doloso badeli goo omaga o gadeebugu sabolo tobudulone odoo bakadio sabolo to kesamolome egeiso.

<sup>33</sup> Odoo bakadio oso Yesubolo to kesameleso dilame doboome, Pitaye medee goo goolega Yesu mapoo egeesee takaso, “Wiligi odoo, iba hamapoo dabalai tekepo. Esiga iyo waseme bakadio hedebe di tegegalaiso. Hee nee, hee Moseseyo, osoloso hee Ilayayo,” diso.

<sup>34</sup> Pita to osee komolome, koloboso sibilesa diba gidiseme, diya ebigaso.

<sup>35</sup> Osoloso kolobo maga toso egeesee taka, “Hagee mowolo, ayo hesia oso. Esiga o to medee dui!” diso.

<sup>36</sup> Kolobo ma kuloduga to taka koodobuloso, diayo Yesu obusomo tobudume egeiso. Pita diayo mubi ma dokodoo egei goo ee odoo abo mapoo saga takele.

*Yesuye giso holo bo holo pala tekepo moodoo*

*(Mat 17:14-18; Maka 9:14-27)*

<sup>37</sup> Diba biame hee mapoo mubi maga kumoo meilesa doboome, odoo susuga oso Yesuye badebei mapoo saga sibadeeso.

<sup>38</sup> Esemе odoo mooloogoodoo ma kuloduga odoo hedebeso toso neligidi Yesu mapoo egeesee takaso, “Eligili odoo, ayo namapoo howaso, nayo mo giso holo agalame sibe. Bei, yo mo holo hedebegea.

<sup>39</sup> Bei, bo holo oso yimapoo pologa, yo kikuliga sabolo homodobuloso gwa sabolo molone maga maga makawo tiodiliso. Bo holo oso yimapoo dala tenemolome yo biame susuga ma kulodu haga medee koo sili.

<sup>40</sup> Esino ayo nee hamamee dili odoo mapoo bo holo hagee peegoo hasiso bigi deme, diayo peegoo hasiso bigilei tebilena,” diso.

<sup>41</sup> Esemе Yesuye egeesee takaso, “Niba tei too mauwe tokenee odoo. Niyo amapoo tei talame a biame kasolo nibolo hodobo ka badalaiyo? Esino nowolo amapoo ido sibe,” diso.

<sup>42</sup> Giso holo Yesu mapoo ido sibumolome, bo holo yimapoo pala oso



kilikolone mi mapoo homodobiaso. Esemé Yesuye bo holo peegoo hasiso buguloso, yo tekepo poloso oma mapoo ido diso.

<sup>43</sup> Esemé odoo susuga oso Gode-eye kitulugu goo ogoloso diya howoogadooso.

Odoo susuga oso Yesuye goo moodoo susuga ee osee goolone doboome, Yesuye o hamamee dili odoo mapoo egeesee takaso,

<sup>44</sup> “Odoo Holo, a ha teli odoo mapoo tiasalaiso. Esiga niba ayo epedee goo hagee takoo na boobadee,” diso.

<sup>45</sup> Esino o hamamee dili odoo oso Yesuye taka goo eyo bei medee kibiya gooleedele poogooso. Bei, goo eyo bei ee dimaga mada magoloso meleeso. Esemé diayo see Yesu mapoo woosalai ebigaso.

*Odoo agayo toowa doloso ka badalaiyo?*

*(Mat 18:1-5; Maka 9:33-37)*

<sup>46</sup> Yesu o hamamee dili odoo oso dima kulodu odoo agayo toowa doloso ka badalaisomo, doloso dieso nediliyo toso agadigaso.

<sup>47</sup> Esino Yesuye dibada goo goolee ogoloso holope idoloso yima koola mapoo sibilesa tobudume, o hamamee dili odoo mapoo egeesee takaso,

<sup>48</sup> “Odoo agayo holope hageesi masi mo hu maga yibolo badalame idoga, yayo a idoso. Osoloso odoo agayo a idoga, yayo mo Ma a diye di ee idoso. Esiga nima kulodu odoo agayo eyo nediliyo pepooko daga, yo see toowa doloso badalaiso,” diso.

*Edebeeyo namapoo ha telega badoga, yo nee odooso*

*(Maka 9:38-40)*

<sup>49</sup> Esemé Yoneeye egeesee takaso, “Wiligi odoo, iba odoo heeso bo holo ee nee hu sabolo odoo ma kuloduga peegoo hasiso bugume egeiso. Esemé iyo yo hamaga takaso. Bei, yo

ibada mooloogoodoo ma kulodu koo badeli,” diso.

<sup>50</sup> Esino Yesuye yimapoo egeesee takaso, “Yo na hamaga takee. Bei, edebeeyo nimapoo ha telega badoga, yo nibada odoo oso,” diso.

*Samaliya odooso Yesu gowe*

<sup>51</sup> Yesu yo Kei mi ma dokodoo ido palai biame ee olo koola toboome, yo Yelusalem mapoo dilame goomogaso.

<sup>52</sup> Esemé yayo odoo abo Samaliya mi ee ma kulodu mi pepooko hee mapoo malalo diye diso, diayo dilesa omapoo yayo tilei moso ee mopoodoo dalame.

<sup>53</sup> Esino mosobia oso Yesuye Yelusalem mapoo dileigo di goo ee duloso, diayo yo gowoolone yimapoo moso tenele.

<sup>54</sup> Esemé Yesu o hamamee dili odoo Yonee dio Yemes dio goo hagee duloso yimapoo egeesee takaso, “Lodee, douso mosobia odoo hagee piligilame, iyo Kei mi ma dokodooga dou toose dee takalai, no goomogosomo?” diso.

<sup>55</sup> Esino Yesuye dimapoo bidi toboloso tobudulone dimapoo diya takaso.

<sup>56</sup> Osoloso diba see mi hee mapoo diyadeeso.

*Yesu dadalai doloso to taka odoo*  
*(Mat 8:19-22)*

<sup>57</sup> Yesu o hamamee dili odoo sabolo eli maga diyadaga molome, odoo hedebe oso sibilesa Yesu mapoo egeesee takaso, “Nayo mi hee kamapoo dusomo, ayo no deede sileiso,” diso.

<sup>58</sup> Yesuye yimapoo nei egeesee takaso, “Dobu so oso debeli mi ee moloso. Osoloso sóso tieseli ou moloso. Esino Odoo Holo, ayo tieli moso mauwe,” diso.

<sup>59</sup> Esemé Yesuye see odoo hee mapoo egeesee takaso, “Nayo a deede sibe,” diso.

Esino odoo ogoso nei egeesee takaso, “Lodee, nayo epedee amapoo

biame tenee, ayo mo ma toga midoosoolaiya,” diso.

<sup>60</sup> Esemé Yesuye yimapoo nei egeesee takaso, “Dio maga odo wedia oso dieso nediliyo odo wedia ee midoosodolone dabalai tekepo. Esino no sibilesó Godeeye wiligi doloso badeli goo ee odo mapoo takomo sile,” diso.

<sup>61</sup> Esemé odo heeso see egeesee takaso, “Lodee, a nama hamamee dadalai goomogo. Esino a epedee hamapoo mo soosoo dimapoo emegei di to takalame dia,” diso.

<sup>62</sup> Esemé Yesuye see yimapoo nei egeesee takaso, “Odo agayo ama hamamee dodolone see wedi dilame hamamee bidi ogo domo duga, odo egesi masi oso Godeeye wiligi doloso badeli goo ee halo tou talai tebile,” diso.

## 10

### *Yesuye odo 72 diye di*

<sup>1</sup> Goo hagoso dileso koodobume, Lodeeye odo 72 hesigaso. Osoloso dima kulodu odo bakadio tooboo bakadio tooboo doloso yayo dilei mosobia pepooko mapoo diba malalo diye diso.

<sup>2</sup> Egeeseelone yayo dimapoo egeesee takaso, “Homolee ma kulodu bi susuga ee olo teeleegeeloso goolai ee moloso. Esino bi ee gooloogalai odo ee haga beinee. Esiga homolee gibadeli odo mapoo woose, yayo o homolee ma kulodu bi susuga teeleegee ee gooloogali odo diye dalame.

<sup>3</sup> Esiga niba di! Esino niba goolee sabolo di. Bei, ayo niba sipi be hu pe masi dobu so kamanali oso egee do mi ma kulodu diye deeso.

<sup>4</sup> Niba dulone molee sabolo, o sabolo, osoloso homo mapoo kali bi sabolo na todi. Osoloso niba eli domopoo dulone, odo abo tugodoloso dibolo to na ke.

<sup>5</sup> Niyo mi hee mapoo dileso peledobooga, moso kamapoo gilimado polosomo, niyo daga moso mapoo egee do odo mapoo emegei di to takolone, ‘Godeeye mesie goo nibolo mele,’ dee takee.

<sup>6</sup> Esiga mesie odo oso moso ee ma kulodu daga, niyo emegei di to taka oso dibolo osee malaiso. Esino moso ee ma kulodu debeli odo koo mesili daga, niyo emegei di to taka oso dibolo malaime.

<sup>7</sup> Osoloso moso kasee nimapoo ka teneesomo, niba moso hedebe omapoo debee. Osoloso niba moso hedebe omapoo dobolone, diayo nimapoo nei teneega, nei ee nolone ka debee. Bei, tou teli odo ee dia nei talai tebiliso. Esiga niba moso hee mapoo dobolone, moso hee mapoo na du dee.

<sup>8</sup> Niba mi hee mapoo duga, mosobia odo oso emegei dolone nei teneega, hedebe ee namelee.

<sup>9</sup> Osoloso mi omapoo odo paigiga tekepo moodoogolone dimapoo ‘Godeeye wiligi doloso badeli goo ee nima koola mapoo moloso,’ dee takee.

<sup>10-11</sup> Esino niba mi hee mapoo dileso peledobooga, mosobia oso niba gowoolone moso tenelega poogooga, niba diayo bia eli domopoo dileso, to kitulugu sabolo dia mi basago oso nibada homo mapoo obooga ee dia howo woola mapoo te, Godeeye komonolone dimapoo dia goo tokenee eyo nei tenelai goo ee gooleedalame. Osoloso niyo dimapoo egeesee takee, ‘Niba medee goolee, Godeeye wiligi doloso badeli goo ee koola hamapoo moloso.’

<sup>12</sup> Esiga ayo nimapoo taka, mosobia kaso niba sibadeega, ogoloso goomoga sabolo niba iyadelega poogooga, nei Godeeye midilei biame omapoo dala toowa diayo talai oso Sodom mosobia oso dala talai ee dagadileiso.”

*Yesuye tei tele poogoo mosobia odoo mapoo taka*

*(Mat 11:20-24)*

<sup>13</sup> “Ye-ee! Kolasin mosobia odoo osoloso Betesaida mosobia odoo sabolo. Dala toowa oso niba bamoloso. Bei, ayo nibada mi mapoo goo toowa mudu opusomo opusomo di ee moodoogamo silee egeesi masi Yu odoonee mosobia Taya mapoo osoloso Saidon sabolo mapoo moodoogamo silee diepi, diba haga booloogelega, dibada goo tokenee maga miligi pialoso debeli. Osoloso diayo dibada goo tokenee maga miligi pia goo ee eligilone dugo tokenee megigaloso dosou holugaloso silesibili.

<sup>14</sup> Goo egeesi maga Godeeye goo midilei biame mapoo dala toowa Kolasin mosobia sabolo osoloso Betesaida mosobia oso talai oso Taya mosobia sabolo osoloso Saidon mosobia oso dala talai ee dagadileiso.

<sup>15</sup> Esino Kapeniyum mosobia odoo niba biame omapoo Kei mi ma dokodoo ido palaiso, doloso goolee sabolo dosomo? Haye, niba toloso Dou mi mapoo toodalaiso.

<sup>16</sup> Esiga odoo agayo nibada to duloso toga, yo mo to tolone ka seeso. Esino odoo agayo nibada to duloso niba diya gowooga, yo a gowoolone ka seeso. Esino odoo agayo a gowooga, yayo mo Ma a diye di ee gowoolone ka seeso,” diso.

*Odoo 72 oso see wedi simi*

<sup>17</sup> Yesuye odoo 72 diye di oso goomoga sabolo see wedi sibilesi egeese takaso, “Lodee, iyo nee hu sabolo takomo sileeme, bo holo odoo ma kulodu debei oso ibada to duloso mesiloso peegoo galagadiso,” diso.

<sup>18</sup> Yesuye dimapoo nei egeese takaso, “Keiso saga egee ebedigebugu egeesi masi Kei mi ma dokodooga Saiten miyomoo homodobume ayo egeiso.

<sup>19</sup> Esiga niba dui, niyo hebise sabolo homolobe sabolo mapoo dokodoo nibada homosu hamadabalame ayo nimapoo kitulugu olo teneeso. Esiga kitulugu oso Saitenso kitulugu ee dagadileso moloso. Esiga bi heeso nimapoo dala tenelai mauwe.

<sup>20</sup> Esino bo holo oso nibada to duloso mesiloso peegoo kukulo di goo mapoo haga na goomege. Esino nibada hu ee tei gie badeli booka mapoo egee molo omaga goomege,” diso.

*Yesuye Ama Godee mapoo goomoga tenee*

*(Mat 11:25-27; 13:16-17)*

<sup>21</sup> Yesu yo Dio Tei oso kitulugu maga goomoga sabolo badolone egeese takaso, “Ma, Kei mi sabolo osoloso mipoo sabolo nayo wiligi doloso badoso. Esiga a namapoo goomogo. Bei, nayo wiligi doloso badeli goo mada egee molo, goo goolee toowa odoo mapoo yilige bigile poogooso. Esino nayo goo goolee dele poogoo odoo mapoo yilige buguso. O. Tei takoo, Ma. Goo hagee nayo goomoga goo oso.

<sup>22</sup> Mo Maye goo susuga amapoo olo teneeso. Esiga odoo heeso Owolo a gooleede. Esino hedebe Maye Owolo, a ka gooleedoo. Osoloso odoo heeso Ma gooleede. Esino hedebe Owolo ayo Ma ka gooleedoo. Esiga odoo ugu bia mapoo Owolo ayo Mayo goo ee yilige bigilame gooleega, odoo egee bia oso Mayo goo ee diba gooleedalaiso,” diso.

<sup>23</sup> Osoloso o hamamee dili odoo mapoo bidi toboloso omapoo to budulone dimapoo egeese takaso, “Niyo egeli goo susuga mapoo goomege.

<sup>24</sup> Bei, ayo nimapoo taka, Godee maga to toloso kokodo takomo sili odoo daga hoogoo debei sabolo osoloso Yu odoowo wiligi odoo tebisa daga debei oso niyo epedee hagee ogo goo ee agalai doloso balaga

meleeso. Esino diayo egele. Osoloso diayo goo niyo epedee egee dumolo goo sabolo dulei doloso balaga meleeso. Esino diba dule,” diso.

### *Samaliya odooso emegei di goo*

<sup>25</sup> Biame hee mapoo tei eligili odoos heeso sibilesu Yesu tei ma susuga ee gooleedoloso badaba beleso egeesee takaso, “Eligili odoos, a gie badeli talame ogoos goo talaiyo?” diso.

<sup>26</sup> Yesuye to nei egeesee takaso, “Godeeyo to booka mapoo hogugu oso kasee takoolo? Nayo hesigaloso kasee gweliyo?” diso.

<sup>27</sup> Odoos oso to nei egeesee takaso, “Nee sooloo ma kuloduga goolee sabolo, osoloso nee dio maga, osoloso nayo kitulugu sabolo, osoloso nayo goo goolee sabolo oso nee wiligi odoos Godee diya goolee. Osoloso no nediliyo diya gweli egeesi masi nee odoos onosee diya egeesee goolone ka badebee,” diso.

<sup>28</sup> Yesuye yimapoo nei egeesee takaso, “Nayo tei goo takoo. Esiga no goo egeesi tolone badoga, goo oso no badoboso kookaiyo gie badeli talaiso,” diso.

<sup>29</sup> Esino odoos yayo eyo nediliyo yo tekepo dolone egeesee takaso, “Esino mo odoos ogumo?” diso.

<sup>30</sup> Esemee Yesuye yimapoo oposusu hee hagee oposususo, “Odoos hee Yelusalem maga Yeliko mapoo moumeleeso. Yo eli domopoo moumolome, mesiya aboso yo woomele poogoloso eli domopoo magoloso o dugo yayo ka sabolo osoloso o bi susuga sabolo heli tolosu diyadeeso.

<sup>31</sup> Yo eli domopoo talame seemolome, Godee ogo odoos ogo doloso domo badeli odoos oso eli hedebe omaga sibulone egeiso. Osoloso yayo sibulone egeino, odoos egee olo talame semelee ogoloso peegooga boloodabaso.

<sup>32</sup> Osoloso yima hamamee abaga tei moso tegei mapoo tou teli odoos, o

bala Libai, yinosee sibulone egeino, odoos eli domopoo mi mapoo homodobuloso tiamolome, peegooga boloodabaso.

<sup>33</sup> Esino Samaliya odoos yinosee eli hedebe omaga sibulone egeino, odoos eli domopoo talame seemolome egeiso. Yayo odoos egee ogoloso yo diya sooloo dalaso.

<sup>34</sup> Esemee yo odoos oso tiamelee mapoo dileso o kolo kookoo mapoo olipi i sabolo wain i sabolo oso hoduloso dugoso tialogooso. Osoloso yayo yo o be donki ma dokodoo tiedoloso, odoos soowo moso mapoo ido dileso yo bameleeso.

<sup>35</sup> Osoloso see biame hee mapoo Samaliya odoos oso odoos soowo moso gibadeli odoos mapoo molee ko bakadio yimapoo tenelone egeesee takaso, ‘Odoos hagee nayo medee bamelee. Esino nayo odoos hagee bolone molee hagee hosudoloso, see nee molee oso pidimologa, ayo see wedi simi biame omapoo, nei o egeesi ayo namapoo tenelaiso,’ diso.”

<sup>36</sup> Osoloso Yesuye see egeesee takaso, “Odoos bakadio hedebe di hageeyo kulodu mesiyaso wei eyo odoos tei ogumo?” diso.

<sup>37</sup> Esemee tei eligili odoos oso nei egeesee takaso, “Edebeeyo yo sooloo dolone yo pidi odoos ono tei o odoos oso,” diso.

Esemee Yesuye yimapoo egeesee takaso, “O. Tei takoo. Esiga no dileso goo egeesi tomo sile,” diso.

### *Meli dio Mata dio*

<sup>38</sup> Yesu o hamamee dili odoos sabolo dulone, mi hee mapoo dileso peledabaso. Esemee mi omapoo badeli sobo hedebe Mataye o moso mapoo Yesu ido palaso.

<sup>39</sup> Esemee Matayo omolo Meliye sibilesu Yesuwo homo beiyopoo badolone o to dulone badebeiso.

<sup>40</sup> Biame omapoo Mataye moso kulodu Yesuwo mooloogoodoo odoos eyo wo silone, tou bei neme Yesu



mapoo sibilesa egeesee takaso, “Lodee, moloye nobolo badoga, ayo mobusomo tou ka toga, diya kwasio. Esiga yayo a pidilame nayo yo sibeye dee takee,” diso.

<sup>41</sup> Esino Lodeeye egeesee takaso, “Mata emegei, no tou susuga tomo silone goolone goo diya kodio.

<sup>42</sup> Esino tou susuga ee ma kulodu tou hedebe hagono toowa ka moloso. Esino Meliye goo tekepo toowa olo tooso. Esiga odoo heeso goo egee yimaga peedee dalaime,” diso.

## 11

*Yesuye Godee mapoo takeli goo ee eligi*

*(Mat 6:9-13; 7:7-11)*

<sup>1</sup> Biame heeso Yesu mi hee mapoo dileso Godee mapoo takemelee koodobume, o hamamee dili odoo heeso egeesee takaso, “Lodee, Yoneeye o hamamee dili odoo mapoo Godee mapoo takeli goo eligimo silee egeesi masi nayo iba nose Godee mapoo takeli goo ee eligi,” diso.

<sup>2</sup> Esemé Yesuye dimapoo egeesee takaso, “Niyo Godee mapoo takolone egeesee takee:

‘Ma, biame susuga ma kulodu hedebe nee hu oso toowa doloso mele dee, odoo susuga oso dokodoo poudalame.

Esiga nayo wiligi doloso badeli goo oso sibilei iba goomogo.

<sup>3</sup> Osoloso biame susuga ma kulodu nei iyo nalai imapoo tenemelee.

<sup>4</sup> Osoloso ibada tokenee hapoloso boobado bigi.

Bei, iba nose odoo susuga oso goo tokenee susuga imapoo moodeli ee boobado bigiliso.

Osoloso iba goo tokenee mapoo na gido di dee’,” diso.

<sup>5-6</sup> Yesu Godee mapoo takeli goo hagee eligimeleso koodobuloso dimapoo see egeesee takaso, “Niba to hee hagee goolee. Odoo soo heeso gesi domo mapoo nee mosopoo sibileiso. Esino nayo yimapoo nei

siloso tenelai nei mauwe daga, mosobia ma kulodu nee odoo mapoo nei talame dileiso. No nee odoowo mosopoo dileso osulu mapoo kalamadulone egeesee takalaiso, ‘Mo odoo, odoo soo hee mo mosopoo simiga. Esino ayo yo pidilei nei mauwe. Esiga ayo namapoo nei talame ka siba,’ dee.

<sup>7</sup> Eseega nee odoo moso kulodu badebei oso egeesee takalaiso, ‘No see wedi di. Bei, a mo holo dio sabolo osulu kisiloso tiesamoloso. Esiga a toboloso namapoo nei tenelaime,’ dee.”

<sup>8</sup> Esemé Yesuye see dimapoo egeesee takaso, “Esino ayo nimapoo taka, yayo no wulo emegei doloso bi tenelaime. Esino nayo kalamadulone osee howamologa, yayo toboloso namapoo bi tenelaiso.

<sup>9</sup> Esiga ayo nimapoo taka, niba woose. Egeeseega nimapoo tenelaiso. Osoloso niba esie. Egeeseega, niyo agalaiso. Osoloso niba osulu mapoo kalamadi. Egeeseega osulu ee nimapoo yamagalaiso.

<sup>10</sup> Bei, woosali odoo oso goo talaiso. Osoloso esieli odoo oso goo agalaiso. Osoloso osulu mapoo kalamadili odoo mapoo osulu yamagalaiso.

<sup>11</sup> Esiga ma dio niba dui! Odoo agayo owoloye di nala poogoo daga, yimapoo sa tenelismo? Haye.

<sup>12</sup> Osoloso yayo só ho nala poogoo daga, nayo yimapoo homolobe tenelismo? Haye.

<sup>13</sup> Niba tokenee odoo. Esino niba gooleedooso, nibada owolo dimapoo bi tekepo tenelai. Esiga iba gooleedooso, Ma Godee Kei mi ma dokodoo egee bado oso yimapoo woosali odoo mapoo Dio Tei wulo tenemoloso,” diso.

*Yesu dio Belsebul dio*  
*(Mat 12:22-30; Maka 3:20-27)*

<sup>14</sup> Biame heeso odoo hee badebeiso. Daga bo holo oso odoo eyo su ma kulodu palademe, to kelega

poogoloso badebeiso. Esemé Yesúye odoo eyo su ma kulodu bo holo paladee peegoo habuguso. Osoloso bo holo oso odoo ma kuloduga peegoo gadime, to koo keli odoo yo see to keiso. Esemé odoo susuga oso goo hagee ogoloso diya howoogadooso.

<sup>15</sup> Esino odoo aboso egeese takaga meleeso, “Yesu yo Belsebuleeye kitulugu maga bo holo peegoo ka hasiso bigili molodoo. Bei, Belsebul yo bo holo dia wiligi odoo taba oso,” dee takaga meleeso.

<sup>16</sup> Esemé odoo aboso Yesúye kitulugu egee tomolo tei Godee maga simibeleso agalame yimapoo egeese takaso, “Nayo Kei mi ma dokodooga goo toowa opusomo di ee imapoo eligi,” diso.

<sup>17</sup> Esino Yesúye diayo goo goolee olo gooledoloso dimapoo egeese takaso, “Mi toowa mapoo debeli odoo oso abo puloso dieso nediliyo ha toga mi toowa egee malaime, tokenee palaiso. Osoloso soosoo heeso abo puloso dieso nediliyo ha toga soosoo egee pododalaiso.

<sup>18</sup> Esiga Saitenso o mooloogoodoo ma kulodu domo puloso dieso nediliyo ha toga, kaseega yayo wiligi doloso badeli goo oso osee ka malaiyo? Tokenee palaiso. Bei, niyo a Belsebul oso kitulugu maga bo holo peegoo ka hasiso bugu deligo daga, ayo goo hagee nimapoo ka taka.

<sup>19</sup> Esino ayo bo holo peegoo hasiso bigili kitulugu hagee tei Belsebul oso kitulugu maga ka hasisimo silo daga, nibada hamamee dili odoo oso bo holo peegoo egee hasisimo silesibo kitulugu ee kamapoo toowo? Esiga diayo takooga, niyo amapoo egee takoo goo ee tei goonee, dee takalaiso.

<sup>20</sup> Esino ayo Godeeye kitulugu maga bo holo peegoo ka hasisimo silo daga, Godeeye wiligi doloso badeli goo ee nimapoo olo simiso.

<sup>21</sup> Esiga kituluguli odoo oso tai sabolo tio sabolo toloso o moso

gibadoga, o bi moso kulodu meli ee edebeeyo heli talaime.

<sup>22</sup> Esino see diya kitulugu odoo oso siboga, yayo moso gibadeli odoo wooloso o tai sabolo tio sabolo peedee dalaiso. Osoloso moso kulodu peleso o bi susuga toloso odoo abo mapoo pileiso.

<sup>23</sup> Esiga odoo agayo a dokolo tebel-ega poogooga, yo amapoo ha tomoloso. Osoloso odoo agayo abolo odoo Godee mapoo gilimado sibilega poogooga, yayo odoo ee Godee maga peegoo hasiso bugu domoloso.”

*Bo holo oso see wedi sibili goo (Mat 12:43-45)*

<sup>24</sup> Esemé Yesúye egeese takaso, “Esiga bo holo oso odoo maga peegoo gaduga, yo dileso miwe poogoo mi mapoo eyo badalai mi esiamo sileiso. Yo mi esiamo siloso koo ogoga, eyo nediliyo egeese takalaiso, ‘A mawo daga badebei mapoo see wedi dia,’ dalaiso.

<sup>25</sup> Yo sibilesi ogoga, moso gelesi kadoloso bi medee mopoodoo ma molo agalaiso.

<sup>26</sup> Osoloso yo see wedi dileso bo holo diya kitulugu abo 7 gilimadoloso moso omapoo dabalaiso. Egeeseega odoo hagee eyo daga badeli poogoloso see diya tokenee badalaiso.”

*Odoo agayo goomoga sabolo ka dosomo?*

<sup>27</sup> Yesúye goo hagee odoo mapoo takomolome, odoo mooloogoodoo ma kuloduga sobo heeso toso neligidi egeese takaso, “No soomagoloso too nedimo silee sobo omapoo Godeeye goomoga tenelai tekepo,” diso.

<sup>28</sup> Esino Yesúye yimapoo egeese takaso, “Haye, emegei. Goo egeesi koo moloso. Odoo agayo Godeeyo to duloso omapoo mesie sabolo siloga, odoo yimapoo Godeeye goomoga teneliso,” diso.

*Edebeeyo goo opusomo di ee agalame goomoga*  
(Mat 12:38-42)

<sup>29</sup> Edebeeyo Yesu mapoo sibilesi mooloogoodeme, Yesuye dimapoo egeese takaso, “Epedee hamapoo egee do odo ee diya tokenee. Osoloso diba wulo goo opusomo di agalame amapoo takeliso. Esino ayo dimapoo goo toowa opusomo di hee eligileime. Esino hedebe Yonayo goo ono dimapoo ka eligilei.

<sup>30</sup> Bei, Godeeye Yona mapoo moodoo goo oso Niniba odo mapoo yayo tei Yona diye di goo ee eligiso. Esiga Odo Holo amapoo goo peled-abalai ee odo epedee hagee do mapoo Godeeye tei a diye di goo ee eligileiso.

<sup>31</sup> Osoloso goo midilei biame mapoo Siba mi eyo wiligi taba sobo onosee nibolo goo midi mapoo badolone nibada goo midiloso, niba tokenee odo dalaiso. Bei, yayo eli sage abaga sibilesi odo toowa Solomonoye eligi goo ee dulame simiso. Esino ayo Solomonodagadilesi ka badoso. Esino niyo mo to dulei ka gowooso.

<sup>32</sup> Esiga Niniba odo oso goo midi mapoo nibolo dobolone, nibada goo midiloso, niba tokenee odo dalaiso. Bei, Yonaye Godeeyo to dimapoo tosi bume, diba dia goo tokenee mapoo miligi piase. Esino Yona ayo dagadilesi badoso. Esino ayo Godeeyo to nimapoo takomo sibume, niyo duloso nibada goo tokenee mapoo miligi pile.”

*Ibada su mapoo howo oso gadeebugu ka moloso*  
(Mat 5:15; 6:22-23)

<sup>33</sup> “Edebeeyo keme pouloso mada koo mageeya. Osoloso toloso koo geegeeya. Haye, keme pouloso woola mageeya edebeeyo moso kulodu gasiboga gadeebugu ee agalame.

<sup>34</sup> Esiga nee su mapoo nee howo oso keme masi ka moloso. Osoloso

nee howo oso tekepo mologa, nee su susuga gadeebugu malaiso. Esino nee howo oso tokenee poga nee su susuga neliga malaiso.

<sup>35</sup> Esiga obeeyamo. Nee su mapoo gadeebugu egee molo medee hoodo ege. Bei, gadeebugu ee neliga molo malaiso.

<sup>36</sup> Esiga nee su ma kulodu gadeebugu toowa oso molone neliga hee me daga, nee su mapoo kemeso pouni masi gadeebugu malaiso.”

*Yesuye Pelisi odo sabolo osoloso tei eligili odo dimapoo taka*  
(Mat 23:1-36; Maka 12:38-40)

<sup>37</sup> Yesu to takameleso koodobume, Pelisi odo heeso o mosopoo nei nalame ido diso. Esem Yesu yibolo dileso nei nalame biaso.

<sup>38</sup> Pelisi odo oso Yesuye Yu odo dia tei magoo ee dedelega poogoloso dee howo sawilega nei ne ogoloso dio dulone diya gooleeso.

<sup>39</sup> Esem Lodeeye yimapoo egeese takaso, “Pelisi odo niba wulo nibada kapu sabolo peleta sabolo hedebe kolo ee hapoolone hee kulodu hapelega pegeli niba egeesi masi doso. Bei, niyo nibada kolo ono hapeliso. Esino sooloo ma kulodu tokenee goo sabolo osoloso bi goomegeli goo oso ka moloso.

<sup>40</sup> Niba boobada odo! Bei, Godeeye kolo sabolo osoloso kulodu sabolo moodooso.

<sup>41</sup> Esiga nimapoo bi teiba mologa bi mauwe odo pidi. Niyo egeese seega niba tokenee goo mauwe malaiso.

<sup>42</sup> Ye-ee Pelisi odo! Bei, niyo Godee mapoo emegei di bi kobu sabolo bi pepuso abo sabolo medee molone 10 ma kulodu hedebe Godee mapoo tenee dolone nei tei ma hogugu ee ma kulodu goo toowa magoo ee telega pegeliso. Goo ee odo mapoo goo tekepo moodeli sabolo osoloso Godee gweli goo sabolo oso. Esiga niyo Godee mapoo emegei di bi tenelone goo toowa bakadio hagee tobuloso moodee.

<sup>43</sup> Ye-ee Pelisi odoo! Bei, edebeeyo niba agalame howo gisili moso kulodu peleso odoo hu toowa too oso bili mapoo bilame goomegeliso. Osoloso eli domopoo edebeeyo nimapoo gauwuloso emegei di to takooga ee dulei, niba diya goomegeliso.

<sup>44</sup> Ye-ee Pelisi odoo! Niba odoo bi mada magoo masi moloso. Edebeeyo odoo bi egelega, dokodooga diliso. Niba egeesi masi moloso.”

<sup>45</sup> Osoloso tei eligili odoo heeso Yesu mapoo egeesee takaso, “Eligili odoo, nayo Pelisi odoo mapoo tokenee sisi oso ibolo hodobo tokenee ka susu,” diso.

<sup>46</sup> Osoloso Yesuye see tei eligili odoo mapoo egeesee takaso, “Ye-ee, tei eligili odoo! Bei, niyo tei eligi goo oso odoo mapoo hegi goo teneliso. Esino niyo diba pidilone hegi goo ee see niso koo teli.

<sup>47</sup> Ye-ee tei eligili odoo! Bei, niyo Godee maga to toloso kokodo takomo sili odoo ta eyo bi mapoo moso pepooko medee tekepo tegeliso. Esino niba gooleedeleyo, odoo egee bia namawe diayo piligu oso?

<sup>48</sup> Niyo namawe diayo goo moodoo tekepona doloso odoo dieso piligu eyo bi ma dokodoo moso pepooko tegeliso.

<sup>49</sup> Esiga Godeeye niyo goo moodoo olo hoodo ogoloso egeesee takaso, ‘Ayo Godee maga to toloso kokodo takomo sili odoo sabolo diye di odoo sabolo Isalael odoo mapoo diye dalaiso. Esino diayo abo piligilone abono wulo dala tenelaiso,’ diso.

<sup>50-51</sup> Osoloso mi bei mooloogoo omaga sibulone namawe diayo Godee maga to toloso kokodo takomo sili odoo piligimo simiso. Egeeselone diayo Eibol maga wooloomalai bei mooloogooloso abaga simino Sekalaya wooloomaloso omapoo koodobiaso. Bei, diayo Sekalaya yo tei moso tegei ogo osoloso Godee mapoo gala wooloso sili dousulu ogo doloso domo omapoo

wooloomaso. Esiga epedee hagee do odoo niyo namawe diayo Godee maga to toloso kokodo takomo sili odoo piligu eyo nei tokenee niyo talaiso. Esiga ayo nimapoo tei goo taka. Bei, niyo namawe diowo tokenee eyo nei talaiso.

<sup>52</sup> Ye-ee tei eligili odoo! Bei, Godee gooleedalai osulu yeli ki bi niyo mada magoloso ka doso. Osoloso niyo edebeeyo osulu omaga gadiyaga, kisiloso see niso koo gadu domoloso.”

<sup>53-54</sup> Yesuye Pelisi odoo sabolo tei eligili odoo mapoo to takameleso koodoboloso diba poogoloso diso. Esem diayo diya komonolone hamamee biame abo mapoo Yesu mapoo woosali goo opusomo opusomo di woosameleeso. Bei, diayo goomoga Yesuye to nei taka ee ma kulodu Moseseeye tei magoo gababuoga, yo toloso goo midilame.

## 12

*Yesuye goo bakadio gweli odoo mapoo kokodo taka*  
(Mat 10:26-27)

<sup>1</sup> Osoloso biame domo omapoo odoo susuga oso Yesu mapoo mooloogoodolone diya kumugulone nei halagabugu nei halagabugu diso. Esem Yesuye daga o hamamee dili odoo mapoo egeesee takaso, “Niba obeeyamo! Pelisi odoo oso goo bakadio gweli goo ee wo habia egeesi masi moloso. Bei, wo giedege wo habia sabolo hamaga, wo giedege tokenee palaiso.

<sup>2</sup> Esiga goo susuga mada egee molo see woola peledabalaiso. Osoloso edebeeyo koo duli goo ee see woola takooga duleiso.

<sup>3</sup> Osoloso niyo mada taka to ee see woola takooga duleiso. Osoloso niyo moso kulodu dulu mapoo mada taka see hamamee odoo susuga dulame moso omu ma dokodooga neligidi woola takalaiso.

*Godeebolo ebi*  
(Mat 10:28-31)



<sup>4</sup> Esiga emegei, ayo nimapoo taka. Odoo wulo su hagee wooloomali yibolo na ebi. Bei, yo hedebe su wooloomali ee gooleedoo, esino dio wooloomali yo tebile.

<sup>5</sup> Esino ayo nimapoo taka. Niba hedebe Godeebolo obulone ka debee. Bei, odoo wooloomaloso dio Dou mi mapoo toodalai kitulugu yimapoo moloso. Esiga niba hedebe Godeebolo obulone ka debee.

<sup>6</sup> Esiga niyo só pepuso dee tiadoo molee ko ta oso teliso. Esino ee ma kulodu Godeeye só pepuso hedebe koo boobado bigili.

<sup>7</sup> Osoloso Godeeye nibada wudu susuga yo gooleedooso. Bei, wudu susuga egee yayo olo hesigaso. Esiga niba haga na ebi. Bei, Godeeyo howo woola só ee goo toowa koo moloso. Haye. Niyo goo toowa ka moloso.”

*Odoo howo woola Kelisowo goo yilige bigi*

*(Mat 10:32-33; 12:32; 10:19-20)*

<sup>8</sup> “Esiga ayo nimapoo taka. Odoo agayo odoo howo woola tobudulone yayo amapoo tei too goo ee woola yilige buguga, nei Odoo Holo ayo Godeeyo momaiye eyo mudugiyo abaga tobudulone yo mo odoo dalaiso.

<sup>9</sup> Esino odoo agayo odoo howo woola tobudulone amapoo tei tele poogoo goo ee woola yilige buguga, nei ayo Godeeyo momaiye dia mudugiyo abaga tobudulone yo mo odoonee dalaiso.

<sup>10</sup> Osoloso odoo agayo Odoo Holo amaga to tokenee takooga, Godeeye o tokenee hapoloso boobado bigileiso. Esino odoo agayo Dio Tei eyo goo maga to tokenee takooga, o tokenee ee Godeeye hapalaime.

<sup>11</sup> Esiga edebeeyo niba howo gisili moso mapoo osoloso wiligi odoo taba eyo moso mapoo nibada goo midilame ido pologa, niyo nei takalai ee haga na goolee.

<sup>12</sup> Bei, niyo omapoo peleso tobudulone, to takalai ee Dio Tei oso nimapoo eligileiso.”

*Yesuye bi bei odoowo goo oposusu*

<sup>13</sup> Odoo mooloogoodoo ma kuloduga odoo heeso Yesu mapoo egeesee takaso, “Eligili odoo, nayo mo ei mapoo takee, yayo ibada ama ta eyo bi gilibo toloso badolone bi susuga yayo egee bamolo puloso abo hodio amapoo tenelame,” diso.

<sup>14</sup> Esemé Yesuye yimapoo nei egeesee takaso, “Emegei, amapoo kitulugu mauwe, nee bakadio nimapoo nibada nama ta eyo bi domo puloso pilei,” diso.

<sup>15</sup> Yesuye see odoo omapoo debei mapoo egeesee takaso, “Niba obeeyamo! Niba bi bei doloso badalai goo omapoo haga na goomege. Bei, bi bei doloso badalai goo oso tei gie badeli koo teneli,” diso.

<sup>16</sup> Osoloso Yesu to hagee takoloso see wudu taka hagee oposususo, “Bi bei odoo o mi mapoo yayo nei howo segei oso nali bi diya palagaso.

<sup>17</sup> Osoloso eyo nediliyo egeesee takaso, ‘Nei nali bi hagee malai amapoo moso hee mauwe. Esiga ayo oogo goo talaiyo?’ diso.

<sup>18</sup> Esemé yayo egeesee takaso, ‘A mo nei nali bi mageli moso guobuguloso see moso toowa abo tegelaiso. Osoloso ayo nei nali bi sabolo bi abo sabolo moso ee ma kulodu malaiso.

<sup>19</sup> Egeeseega amapoo bi tekepo bei oso dugo susuga ee ma kulodu osee ma malaiso. Esiga a tou hee talai mauwe. Esino a goomoga sabolo wulo badolone, wo sabolo osoloso howo sabolo namalaiso,’ diso.

<sup>20</sup> Esemé Godeeye yimapoo egeesee takaso, ‘No boobada odoodo! Esiga epei gesi nee gie badeli ayo namaga peedee dalaiso. Osoloso nayo nee su pidilame bi malos meli see odoo agayo ka talaiyo?’ diso.”

<sup>21</sup> Osoloso Yesuye see egeesee takaso, “Odoo agayo mipoo

hamapoo bi bei mooloogoo malosoo badolone, nei Godeeyo howo woola goo toowa telega poogooga, goo hageesi oso yimapoo peledabalaiso," diso.

*Tei toloso dobolone haga na goolee*

*(Mat 6:19-21, 25-34)*

<sup>22</sup> Yesuye see o hamamee dili odoo mapoo egeese takaso, "Ayo nimapoo taka. Niyo dobolone nei nalai sabolo osoloso dugo kalai sabolo omapoo haga na goolee.

<sup>23</sup> Bei, nei nali bi oso goo toowa koo moloso. Haye. Esino nibada gie badeli goo oso goo toowa ka moloso. Osoloso kali bi oso goo toowa koo moloso. Haye. Esino nibada su oso goo toowa ka moloso.

<sup>24</sup> Esiga niba só ogoloso goolee. Diba nei nali bi dieso sogoloso koo gooloogali. Osoloso diba nei nali bi magalai moso mauwe. Esino Godeeye dimapoo nei nali bi ka tenemoloso. Esino Godeeyo howo woola só oso goo toowa koo moloso. Esino niyo goo toowa ka moloso.

<sup>25</sup> Esiga edebeeyo kali bi sabolo osoloso nei nali bi sabolo omapoo diya gooleega, o gie badeli see hoo-goo sagelisomo? Haye.

<sup>26</sup> Goo pepooko hageesi moodoolai nimapoo kitulugu me daga, niba see goo abo mapoo haga na goolee.

<sup>27</sup> Osoloso niba see dobudu meli palapalawa tekepo ogoloso goolee. Bei, diayo dieso nediliyo pidilei tou koo teli. Osoloso dugo dieso kalai koo duseli. Esiga ayo nimapoo ka taka, daga Solomonoye wiligi odoo toboloso badebei mapoo yayo kali bi medee tekepo kalaga meleeso. Esino dobudu meli palapalawa oso tekepo oso dugo tekepo Solomonoye kali ee dagadi.

<sup>28</sup> Esiga dobudu meli palapalawa tekepo oso epei gasibilesi moloso, see biame hee mapoo wooseliso. Esino Godeeye palapalawa omapoo dugo masi tekepo ka kadili daga, a tei

toso, Godeeye nimapoo dugo tekepo tenelaiso. Niba tei too kibile odoo oso debei masi na debee.

<sup>29</sup> Esiga niba nei sabolo howo sabolo namalai mapoo haga na goolee.

<sup>30</sup> Bei, mi odoo oso bi egee talame diya gweliso. Esino Nama Godeeye bi niyo talame goomegeli ee yayo malalo olo gooleedooso.

<sup>31</sup> Esino niba daga malalo diya esie, Godeeye wiligi doloso badeli goo ee talame. Niyo egeese seega nei yayo bi niyo goomoga ee nimapoo tenelaiso.

<sup>32</sup> Esiga niba haga na ebi. Bei, sipi be bali odoo oso o be medee bali egeesi masi, Godeeye niba medee egeese bamoloso. Osoloso niba ebia sabolo na debee. Bei, Godeeye niba yibolo wiligi doloso badalame yayo goomoga sabolo niba olo hesiaso.

<sup>33</sup> Nibada bi odoo mapoo teneloso nei molee toloso bi mauwe odoo mapoo pi. Niyo egeese seega, nei Kei mi ma dokodoo bi bei nibada hu sabolo malaiso. Bi bei ogo Kei mi ma dokodoo mologa mauwe pagalaime. Bei, mi omapoo heli teli odoo oso sibilesi bi ee heli koo teli. Osoloso sisi bi koo nali.

<sup>34</sup> Nimapoo bi bei toowa ma mologa, nibada goo goolee oso omapoo meliso.

*Odoo Holo oso sibilei goo mapoo mopoodoo doloso debee*

*(Mat 24:45-51)*

<sup>35</sup> Esiga niba bi mopoodoo doloso goo mapoo dulone dobolone keme peyigaloso debee.

<sup>36</sup> Bei, tou teli odoo oso dia wiligi odoo ee sobo hu wo nalame di siboga, agalame bameli egeesi masi debee. Bei, yayo see wedi sibilesi osulu mapoo kalamadiga osulu saga yadalaiso.

<sup>37</sup> Tou teli odoo oso sibilei mapoo dulone dobolone osee bamologa, yayo simi ogoloso dimapoo goomogalaiso. Esiga ayo nimapoo taka, wiligi odoo yayo o tou teli odoo ogoloso

goomogolone, diba bulume doloso dimapoo nei nali tenelaiso.

<sup>38</sup> Esiga wiligi odoo oso sibilei, yo gesi domo sibumobelee o, kudi daga takooga sibumobelee, biame diba gooleedele. Esino o tou teli odoo oso yayo egee sibo mapoo dulone dobolone osee bamologa, yayo sibilesa diba ogoloso dimapoo goomogalaiso.

<sup>39</sup> Esino niba goo hagee medee goolee. Edebeeyo heli teli odoo oso o mosopoo sibilei biame ee dulo badebei diepi, yo olo mopoodoo doloso bolone badolone, heli teli odoo oso simi ogoloso yayo habigili.

<sup>40</sup> Esiga niba olo mopoodoo doloso dulone bolone ka debee. Bei, Odo Holo ayo sibilei biame niba gooleedele.”

<sup>41</sup> Esem Pitaye egeese takaso, “Lodee, no wudu hagee takoo wulo hedebe iyo dulame ka takala o, odoo susuga oso dulame ka takala?” diso.

<sup>42</sup> Esem Lodeeye nei egeese takaso, “Goo mapoo mesimo silone tou tekepo teli bali odoo ogumo? Wiligi odoo oso odoo egeesi masi mapoo kitulugu tenelaiso, yayo o tou teli odoo susuga gibolone yayo dimapoo wo tenemalame.

<sup>43</sup> Osoloso wiligi odoo oso peegoo dileso badoboso see wedi sibilesa ogoga o tou teli odoo oso o tou ee medee tekepo tolone badebei ogoloso yimapoo goomogalaiso.

<sup>44</sup> Esiga ayo nimapoo taka, wiligi odoo oso o tou teli odoo oso tou medee tekepo tolone badebei ogoga, yayo see yimapoo o bi susuga ee bamelee dalaiso.

<sup>45</sup> Esino tou tokenee teli odoo oso o wiligi odoo saga sibilega poogooga eyo nediliyo egeese takalai malaiso, ‘Mo wiligi odoo saga koo sibo,’ doloso, emegei sobo sabolo giso sabolo tou teli odoo abo woomele poogoloso, wo sabolo yugune sabolo ee nolone halabolone badalaiso.

<sup>46</sup> Yo egeese badolone mopoodoo delega badebei mapoo, o wiligi

odoo oso sibilesa peledabalaiso. Egeeseega o wiligi odoo oso sibilesa yo Godee mapoo odoo koo mesili sabolo badalame, yo diya woomeleso peegoo togobigileiso.

<sup>47</sup> Esiga tou teli odoo oso o wiligi odoo oso goomoga goo ee gooleedoloso tou ee telega poogoloso mopoodoo delega badoga, yo diya woolaiso.

<sup>48</sup> Esino tou teli odoo oso o wiligi odoo oso goomoga goo ee gooleedelega badolone goo ee telega badoga yo haga woolaime. Esiga Godeeye edebeeyo yo tou toowa talame goo goolee tekepo teneeso. Esiga yo goomogoso, goo goolee tekepo sabolo tou ee toowa tolone badalame. Osoloso Godeeye edebeeyo tou pepooko talame goo goolee tekepo teneeso. Esiga yo goomogoso, goo goolee tekepo sabolo tou pepooko ee tolone badalame.

*Mesie goo mauwe, esino domo pilei moloso*

*(Mat 10:34-36)*

<sup>49</sup> Ayo odoo susuga domo puloso dou gicalagalame mi toowa mapoo ka simi. Esino dou oso paiya ee agalai a goomogo.

<sup>50</sup> Esino ayo dala talai biame olo siboso. Esiga amapoo goohele toowa oso moloso. Esino ayo dala ma kulduga gaduga, goohele amapoo egee molo amapoo mauwe pagalaiso.

<sup>51</sup> Esiga niyo goo goolee oso a mipoo hamapoo mesie goo tosimidoo dee gweliyo? Haya, domo pilei goo ee tosimi.

<sup>52</sup> Esiga epedee domo hamaga dulone soosoo ma kulodu domo pimalaiso.

<sup>53</sup> Egeeseelone ama dio owolo giso holo dio domo pileiso. Osoloso owee dio owolo sobo holo dio domo pileiso. Osoloso gisowo owee dio osobo dio domo pileiso.”

*Gooso peledabalai biame ee medee ogoloso gooleedalai*

*(Mat 16:2-3)*

<sup>54</sup> Yesuye see odoo susuga mapoo egeesee takaso, “Niba kei ma dokodoo ogoga hemiye mologa, niyo egeesee takeliso, ‘Epedee howo sibilodoo,’ deliso. Egeeseega howo tei sibiliso.

<sup>55</sup> Osoloso niba kei ma dokodoo ogoga kolobo me poogoloso kei dasege mologa, niyo egeesee takeliso, ‘Epei mi kibolodoo,’ deliso. Egeeseega mi kibiliso.

<sup>56</sup> Niba goo bakadio gweli odoo! Howo sibilei goo sabolo osoloso mi kibilei goo sabolo niba olo gooleedooso. Esino bei kasi maga niba epedee hamapoo goo egee peledoboo ogoloso gooleedelega ka dabala?”

*Namapoo goweli odoo sabolo mesie*

*(Mat 5:25-26)*

<sup>57</sup> “Niba kasi maga nisono goo tekepo talai goo ee gooleedelega ka dabala?

<sup>58</sup> Esiga namapoo goweli odoo oso no goo midilei mapoo ido duga, no saga eli domopoo yibolo dulone yayo namapoo gowe egee molo pagalame yibolo emegei dee. Esino nayo goo egeesi moodelega poogooga, yayo no goo midili odoo mapoo ido peleso nee goo midileiso. Egeeseega see goo midili odoo oso no neliga moso gibadeli odoo mapoo tenelaiso. Egeeseega see yayo no neliga moso ma kulodu toosoolaiso.

<sup>59</sup> Esiga ayo namapoo taka, no neliga moso ee ma kulodu badolone, nayo peegoo dilei eli agalaime. Esino molee yayo hesia sabolo tobuloso nayo yimapoo teneega, no peegoo dileiso.”

## 13

*Niba nibada goo tokenee maga miligi pilega poogooga, niba wedileiso*

<sup>1</sup> Biame omapoo odoo abo oso sibilesi Yesu mapoo Gelili odoo aboso Godee mapoo gala hu wooloso tenelone doboome, Pailteeye diba piligu goo ee oposususo.

<sup>2</sup> Esemee Yesuye nei dimapoo egeesee takaso, “Niyo goo hagee ogoloso kasee gooleesomo? Gelili odoo abo piligu odoo hagee biaso Gelili odoo susuga ma kulodu hedebe diayo goo tokenee toowa tomo silesibume ka seeyo?

<sup>3</sup> Haye, egeeseenee. Esino niyo nibada goo tokenee maga miligi pilaloso Godee mapoo bidiga debelega poogooga, goo hedebe egeesee nose nimapoo peledabalaiso.

<sup>4</sup> Osoloso niba goo hee hagee goolee. Sailowam mi mapoo moso egi doko tegei oso goboolone odoo 18 piligusu. Odoo 18 piligu hagee biaso Yelusalem odoo ma kulodu hedebe diayo goo tokenee toowa tomo silesibume ka seeyo?

<sup>5</sup> Haye, egeeseenee. Esino niyo nibada goo tokenee maga miligi pilaloso Godee mapoo bidiga debelega poogooga, goo hedebe egeesee nose nimapoo peledabalaiso.”

<sup>6</sup> Osoloso Yesuye dimapoo wudu taka hee hagee takaso, “Odoo heeso geleipi ko segei ma kulodu pigi homo tabameleeso. Esino biame heeso segeli odoo oso pigi ko goolame agalame simiso. Esino sibilesi egeino, pigi ko pelega molome egeiso.

<sup>7</sup> Esemee yayo o homolee bali tou teli odoo mapoo egeesee takaso, ‘Dugo bakadio hedebe di ma kulodu a goomogaso, pigi homo hagoso ko poga nalame. Esino yo ko pele. Esiga heemagee. Yayo mo homolee ma kulodu molone mi tekepo ee namalai tekeponee,’ diso.

<sup>8</sup> Esemee o tou teli odoo oso yimapoo egeesee takaso, ‘Tba epedee dugo hedebe ma kulodu bolone, ayo medee mi nemalaiso.

<sup>9</sup> Egeesi ma kulodu yayo ko poga, tekepo. Esino yayo ko pelega poo-



googa, omapoo iba homo su egee heemagalaiso,' diso."

*Yesuye sobo gauwuloso sili tekepo moodoo*

<sup>10</sup> Yu odoowo hasali biame hee mapoo Yesuye dia howo gisili moso mapoo peleso eligimeleeso.

<sup>11</sup> Biame omapoo sobo hee dugo 18 ee ma kulodu badolone bo holoso o kulodu badoboome, yayo biame susuga ma kulodu gauwuloso siliso.

<sup>12</sup> Esino Yesuye yo ogoloso yo malalo hapoo sibe doloso yimapoo egeese takaso, "Sobo no biame susuga ma kulodu gauwuloso egee silo epedee hamapoo olo mauwe poogooso," diso.

<sup>13</sup> Egeese takoloso Yesuye o deeso sobo ee sigeso. Esem biame omapoo sobo gauwuloso sili ee see hoododoloso tekepo silame bei mooloogooloso Godee mapoo goomoga poudooso.

<sup>14</sup> Esem howo gisili moso wiligi odo taba oso Yesuye diayo hasali biame mapoo sobo tekepo moodoo ogoloso diya komonolone odo susuga mapoo egeese takaso, "Sadee hedebe ma kulodu biame 7 moloso. Esiga odo susuga oso biame 6 ma kulodu tou talai tekepo. Esiga niyo biame 6 hama kulodu odo paiye susuga gilimado sibilesi tekepo moodolai tekepo. Esino niyo iyo hasali biame mapoo sibilesi goo egeesi moodolai tekepenee," diso.

<sup>15</sup> Esem Lodeeye nei yimapoo egeese takaso, "Niba goo bakadio gweli odo. Bei, niba susuga oso hasali biame mapoo bulumakau ebigi pidiga buguloso howo nalame hado diliso.

<sup>16</sup> Esiga niyo iyo hasali biame mapoo nibada be hu pidiliso. Esino iyo hasali biame mapoo Eibalahameeyo eiye hagee tiso tia masi tiamolome pidibugu egee tekepeneeyo? Bei, Saitenso kitulugu oso sobo hagee dugo 18 ee ma kulodu tiso tialoso melee masi meleeso."

<sup>17</sup> Yesuye to hagee taka goo oso yimapoo kamanali odo mapoo simili goo teneeso. Esino odo abo oso Yesuye goo medee tekepo moodoogamo sili ogoloso diya goomogaso.

*Godeeye wiligi doloso badeli goo ee Yesuye wudu takolone eligi (Mat 13:31-33; Maka 4:30-32)*

<sup>18</sup> Osoloso Yesuye see dimapoo egeese takaso, "Godeeye wiligi doloso badeli goo ee kaseeyo? Ayo ogo goo maga Godeeye wiligi doloso badeli goo ee nimapoo ka eligileiyo?"

<sup>19</sup> Esiga Godeeye wiligi doloso badeli goo ee egeesi masi moloso. Odo heeso ko pepooko masted deli todilesi o homolee mapoo segeiso. Esiga ko pepooko oso peleso homo toowa poloso, dee bo moodooga, sóso sibilesi omapoo ou tegegeliso.

<sup>20</sup> Ayo ogo goo maga Godeeye wiligi doloso badeli goo ee nimapoo ka eligileiyo?"

<sup>21</sup> Ee egeesi masi. Soboso palawa wo silame, daga homolone palawa wo toowa ma kulodu yist pepooko kuko siliso. Egeeseega yist pepooko oso palawa wo ee diya kodiliso."

*Osulu pepooko (Mat 7:13-14, 21-23)*

<sup>22</sup> Yesuye Yelusalem mapoo dulone, mosobia pepooko abo eli domopooga dagamo dulone, Godeeye to eligimo diso.

<sup>23</sup> Egeeseemo dumolome odo heeso Yesu mapoo egeese woosaso, "Lodee, odo wulo hedebe bakadio oso gie badeli ka talaiyo?" diso.

Esem yayo nei yimapoo egeese takaso,

<sup>24</sup> "Niba osulu pepooko maga gadilame diya kitulugi. Bei, ayo nimapoo taka, odo susuga oso osulu pepooko omaga gadilame diya kituluguleiso, esino diba omapoo gadilei tebileime.

<sup>25</sup> Bei, moso eyo amaye toboloso osulu kisileiso. Egeeseega niyo

peegooga silesibulone osulu yama-galame osulu mapoo kalamadileiso. Egeeseelone egeesee takalaiso, 'Wiligi odo, iba gasibileiya osulu yam-agee,' dalaiso.

Esino yayo egeesee takalaiso, 'A niba gooledele. Niba mi kamaga sibadeeyo?'

<sup>26</sup> Egeeseega niyo nei egeesee takalaiso, 'Iba nobolo hodobo silesibulone wo sabolo howo sabolo namo siliso. Osoloso ibada mi mapoo nayo imapoo to tekepo eligimo siliso,' dalaiso.

<sup>27</sup> Esino yayo nimapoo see egeesee takalaiso, 'A niba gooledele. Niba mi kamaga sibadeeyo? Niba ayo hagee bado mapoo na sibadee. Amaga peegoo diyadee, niba goo toke-nee tomo silesibili odo,' dalaiso.

<sup>28</sup> Esiga niba Godeeye wiligi doloso badeli mi maga peegoo poogooga, peegooga dobolone, Eibalaham dio Yekob dio osoloso Aisek dio osoloso Godee maga to toloso kokodo takomo sili odo susuga oso Gode-eye wiligi doloso badeli mi mapoo do ogoloso goholone mei kumudoo sabolo dobolone pupusiga malaiso.

<sup>29</sup> Osoloso mipoo toowa hamapoo debeli mi susuga maga odo susuga oso Godeeye wiligi doloso badeli mi mapoo wo nalame sibilesi dabalaiso.

<sup>30</sup> Esiga odo susuga eyo howo woola odo hu toowa toloso epedee hagee do, ee see hamamee Godeeyo howo woola odo wuluge masi dabalaiso. Esino odo susuga eyo howo woola odo wuluge epedee hagee do, ee see hamamee Godeeyo howo woola diba hu toowa toloso dabalaiso."

*Yesuye Yelusalem goolee goo  
(Mat 23:37-39)*

<sup>31</sup> Biame omapoo Pelisi odo aboso sibilesi Yesu mapoo egeesee takaso, "No mi hagee poogoloso see mi hee mapoo di. Bei, Helodeeye no wooloomalame ina," diso.

<sup>32</sup> Esemene nei Yesuye dimapoo egeesee takaso, "Niba dileso dobu so masi Helodee mapoo takee, 'A epei osoloso godigi mapoo bo holo paladee odo sabolo osoloso odo paigiga sabolo ee tekepo moodoolone badalaiso. Osoloso see biame bakadio hedebe di mapoo a mo tou hosudalaiso,' dee takee.

<sup>33</sup> Tei taka, epei sabolo osoloso godigi sabolo osoloso biame hee sabolo mapoo mo tou ee osee tomo dileiso. Bei, edebeeyo Godee maga to toloso kokodo takomo sili odo ee Yelusalem mi peegoo wooloomalai tekeponee.

<sup>34</sup> Yelusalem, Yelusalem, nayo kasi maga Godee maga to toloso kokodo takomo sili odo piliguloso see Gode-eye diye di odo ee piligilame yoso ka enigeliyo? A biame kasolo mapoo kolokoloso o pe medee gilimadoloso wili egeesee selame ayo nee holo gilimado sibilame goomegeliso. Esino no koo goomegeli.

<sup>35</sup> Esiga Yelusalem odo, niba dui. Nibada tei moso ee mosoowe malaiso. Esiga ayo nimapoo taka. Niyo a see agalaime. Esino biame oso siboga, niyo egeesee takalaiso, 'Odo Godeeyo hu maga kitulugu sabolo egee sibo Godeeye yimapoo goomogoso,' dalaiso. Biame omapoo niyo a see agalaiso."

## 14

*Yesuye Pelisi odoowo mosopoo di*

<sup>1</sup> Yu odo diayo hasali biame heeso Yesu Pelisi odoowo wiligi odo taba eyo mosopoo peleso nei nalame badebeiso. Esemene odo susuga oso Yesu mapoo medee hodu dileso yimapoo balaga meleeso.

<sup>2</sup> Bei, moso ee ma kulodu odo hee paiye toowa oso toloso o su susuga tidodoloso molome egeiso.

<sup>3</sup> Egeesee ogoloso Yesuye Pelisi odo sabolo osoloso tei eligili odo dimapoo egeesee takaso, "Iyo

hasali biame mapoo odoo tekepo moodoolai ee ibada teiyo?" diso.

<sup>4</sup> Esino diba to hee takele. Esememe Yesuye odoo ee o deeso sigime tekepo paso. Osoloso yo diye diso.

<sup>5</sup> Osoloso yayo see Pelisi odoo sabolo osoloso tei eligili odoo sabolo mapoo egeesee takaso, "Nima kulodu nibada holo hee, o, bulumakau egeesi oso iyo hasali biame mapoo midoo ma kulodu todobuoga, yo peegoo tamagelega pagalaisomo? Haye. Niyo yo midoo ma kuloduga peegoo tamagalaiso," diso.

<sup>6</sup> Esememe diayo Yesu mapoo nei takalai me poogooso.

*Eyo nediliyo toowa dalai sabolo osoloso pepooko dalai goo sabolo*

<sup>7</sup> Yesu moso ee ma kulodu badolone egeino, odoo susuga oso wo ne mapoo sibulone odoo hu toowa too oso bili mapoo bulumalame diya goolee sabolo sibume egeiso. Esememe Yesuye wudu taka hagee dimapoo egeesee takaso,

<sup>8</sup> "Odoo heeso namapoo takolone sobo hu wo ne mapoo sibeye daga, no sibilesa wo nalame saga dilesa odoo hu toowa too oso bili mapoo na bie. Bei, odoo hu toowa too hee nama hamamee sibilei malaiso.

<sup>9</sup> Egeeseega mosowo amaye namapoo egeesee takalaiso, 'Nayo egee bado mapoo odoo toowa oso bie dee. Esiga no toboloso hamamee koo bilame di,' dalaiso. Egeeseega no hamameedee mapoo bilame diya simiye sabolo dilesa bileiso.

<sup>10</sup> Esino sobo hu wo nalame no sibeye daga, no sibilesa hamameedee bie. Egeeseega mosowo amaye no hamameedee mapoo badebei ogoloso no see malalo koodoo peleso bie dalaiso. Osoloso wo ne mapoo buluma odoo oso goo hagee ogoloso no odoo toowa dalaiso.

<sup>11</sup> Esiga odoo agayo eyo nediliyo yo toowa daga, nei yo Godeeye pepooko dalaiso. Esino odoo agayo

eyo nediliyo yo pepooko daga, nei yo Godeeye toowa dalaiso."

<sup>12</sup> Osoloso Yesuye see yo sibeye dee taka Pelisi odoo mapoo egeesee takaso, "No wo toowa nalame nee odoo sabolo osoloso nemei dio sabolo osoloso nee soosoo sabolo osoloso nee bi bei odoo sabolo na gilime. Bei, nayo diba gilimaga, nei diayo dibolo hodobo wo nalame no idileiso. Egeeseega no nei hee talaime.

<sup>13</sup> Esino no wo toowa nalame mopoodoo doloso wulo bi mauwe odoo sabolo, osoloso kido todobia odoo sabolo, osoloso su kakawa poogoo odoo sabolo, osoloso howo si odoo sabolo ee gilime.

<sup>14</sup> Bei, nayo goo hageesi moodooga, Godeeye namapoo nei tenelaiso. Bei, diayo nei namapoo egeesi pidilei tebile. Esiga Godeeyo howo woola tekepo debeli odoo oso wedia maga hogadilei biame omapoo Godeeye namapoo nei tenelaiso."

*Wo ne toowa eyo goo maga wudu taka*

*(Mat 22:1-10)*

<sup>15</sup> Yesubolo hodobo wo nolone debei odoo heeso to hagee duloso Yesu mapoo egeesee takaso, "Godeeye wiligi doloso badeli mi mapoo peleso hodobo wo nalai odoo diba diya goomogalaiso," diso.

<sup>16</sup> Esememe Yesuye yimapoo egeesee takaso, "Odoo heeso wo toowa nalame mopoodoo doloso odoo susuga gilimaso.

<sup>17</sup> Osoloso wo olo nalame o tou teli odoo hee mapoo dilesa yao gilimadoodoo odoo ee iyado sibe diso.

<sup>18</sup> Esememe o tou teli odoo oso diba gilimalame simi ogoloso diayo wo ne mapoo sibilei gowoolone goo abo maga gamenee goo takaso. Egeeseelone odoo heeso yimapoo egeesee takaso, 'A mi neiso epedee too. Esiga a dilesa mi egee agalaiso. Esiga nayo dilesa nee wiligi odoo mapoo takee, a wo ne mapoo sibileimego dee takee,' diso.

<sup>19</sup> Esemee see odoo heeso egeesee takaso, 'A bulumakau 10 neiso epedee too. Esiga bulumakau egee sabolo tou talai teiba beleso dibolo tou talame dileiso. Esiga nayo dileso nee wiligi odoo mapoo takee, a wo ne mapoo sibileimego dee takee,' diso.

<sup>20</sup> Osoloso see odoo heeso egeesee takaso, 'A sobo epedee hu. Esiga a wo ne mapoo sibileime,' diso.

<sup>21</sup> Odoo susuga oso egeesee takageme, to todili odoo oso see wedi dileso o wiligi odoo mapoo odoo susuga oso taka goo susuga ee yimapoo takaso. Esemee wo ne eyo wiligi odoo taba oso diya komonolone see o tou teli odoo mapoo egeesee takaso, 'No saga dileso mosobia domopoo bi mauwe odoo sabolo, osoloso kido todobia odoo sabolo, osoloso su kakawa poogoo odoo sabolo, osoloso howo si odoo sabolo iyado sibe,' diso.

<sup>22</sup> Esemee o tou teli odoo oso saga dileso odoo iyado sibileso o wiligi odoo mapoo egeesee takaso, 'Wiligi odoo, ayo odoo abo olo iyado simiso. Esino debi pooba abo odoo mauwe moloso,' diso.

<sup>23</sup> Esemee wiligi odoo oso see o tou teli odoo mapoo egeesee takaso, 'No see dileso odoo eli domopoo egee silesibo sabolo osoloso wadou moso mapoo debeli odoo ee hapoo sibilame to kitulugu sabolo takee, mo moso kulodu debi pooba ee edebeeyo tolo tebilame.

<sup>24</sup> Esiga ayo namapoo taka, wo ne hagee ma kulodu odoo daga ayo gilimome sibilei gowe odoo oso wo ayo mopoodoo doo nalaima,' diso."

*Yesu dadalai goo ee kaseeyo?  
(Mat 10:37-38)*

<sup>25</sup> Odoo susuga oso Yesu dedeme, Yesuye dimapoo bidi toboloso tobulolone egeesee takaso,

<sup>26</sup> "Odoo agayo ama sabolo, osoloso owee sabolo, osoloso osobo sabolo, osoloso owolo sabolo, osoloso o soosoo sabolo, osoloso o gie badeli sabolo mapoo diya goolone,

nei a goolee pepooko daga, yo ayo di hamamee deedee sibilei tebile.

<sup>27</sup> Osoloso odoo agayo talai sabolo dala toowa talai sabolo goo medee moodelega poogoloso ayo di hamamee dedelega poogooga, yo ayo di hamamee deedee sibilei tebile.

<sup>28</sup> Edebeeyo kulo moso tegelame gooleega, yo daga badolone yayo kulo moso tegelai molee teiba beleso agalame hesigileiso.

<sup>29-30</sup> Bei, yo daga molee hesigelega tou bei mooloogooga, molee hosudoga, tou hoo malaime. Egeesee odoo susuga oso moso ee togodelega poogoo ogoloso manolone yiligilone egeesee takalaiso, 'Odoo hagee moso tegelame bei mooloogooso. Esino hosudalai tebile,' dalaiso.

<sup>31</sup> Wudu taka hee hagoso. Mi bakadio oso ha talaiso. Egeesi ma kulodu mosodei heeso odoo 10,000 gilimado sibileiso. Osoloso mosodei heeso odoo 20,000 gilimado sibileiso. Esino odoo 10,000 gilimado ha teli wiligi odoo taba oso daga medee badolone, odoo 20,000 mapoo ha talai teiba beleso goo ee goolone badalaiso.

<sup>32</sup> Osoloso yayo o odoo sabolo odoo 20,000 mapoo ha talai ee koo tobuoga, yayo o odoo hee odoo 20,000 gilimado simi dia wiligi odoo taba mapoo to todi dalaiso, yibolo see mesilame.

<sup>33</sup> Esiga odoo agayo ama hamamee dadalame gooleega, yayo o bi susuga poogoloso a ka deedee sibe.

<sup>34</sup> Solu ee bi tekepo. Esino solu hadali me daga, nayo solu ee see hadalame kasee moodoolaiyo?

<sup>35</sup> Esiga solu egee goo mauwe mologa, odoo susuga oso solu egee togobigileiso.

Odoo niba dulubolo, esiga ayo hagee takoo medee hoodo dui."

## 15

*Yesuye sipi be osugoba maga wudu taka  
(Mat 18:12-24)*



<sup>1</sup> Tekisi molee misigeli odoo sabolo osoloso goo tokenee teli odoo sabolo Yesuwo to dulame sibilesa debeiso.

<sup>2</sup> Esino Pelisi odoo sabolo osoloso tei eligili odoo sabolo oso goo hagee ogoloso gowoolone egeesee takaga meleeso, “Odoos hagosos tokenee teli odoo ee gilimadoloso dibolo hodobo wo namo siliso,” diso.

<sup>3</sup> Esemee Yesuye wudu taka hagee dimapoo takaso,

<sup>4</sup> “Sipi be hu bali odoo oso o sipi 100 bameleeso. Egeesi ma kulodu hedebe osugobooga, yayo ogoos goo moodoolaisomo? Yayo go woolalowe poogoo mapoo o sipi be abo 99 omapoo holoogoloso, see hedebe osugoba ee esiamo dileiso.

<sup>5-6</sup> Yayo esiameloso ogoga, yo goomogolone sipi be ee mosopoo imado sibileiso. Osoloso o odoo abo ee gilimadoloso egeesee takalaiso, ‘Mo sipi be osugoba epedee olo egeiso. Esiga niba sibilesa abolo goomoga poude,’ dalaiso. <sup>7</sup> Esiga ayo nimapoo taka, Kei mi mapoo odoo 99 Godeeyo howo woola tekepo debeli dia goo mapoo goomoga goo oso osee moloso. Esino goo tokenee teli odoo hedebeso o goo tokenee maga miligi pialoso see Godee mapoo bididoobooga, Kei mi mapoo goomoga toowa oso malaiso.”

*Yesuye molee ko oso osugoba maga wudu taka*

<sup>8</sup> “Biame hee mapoo sobo hee o molee ko 10 ma kulodu hedebe osugobalaiso. Eseega yo ogoos goo moodoolaisomo? Yayo keme pudoloso esiamo silone, o moso kulodu goko oso kakabalaiso.

<sup>9</sup> Osoloso yayo o molee ko osugoba ee ogoga, yayo o odoo ee iyadoloso egeesee takalaiso, ‘Mo molee ko osugoba epedee olo egeiso. Esiga niba sibilesa abolo hodobo goomoga poude,’ dalaiso.

<sup>10</sup> Esiga ayo nimapoo taka. Goo tokenee teli odoo hedebeso o goo tokenee maga miligi pialoso see Godee mapoo bididoobooga,

Godeeyo momaiye susuga Kei mi ma dokodoo egee do oso goomoga toowa poudileiso.”

*Yesuye holaisoso peegoo dobudo di maga wudu taka*

<sup>11</sup> Yesuye see wudu taka hee hagee odoo mapoo egeesee oposusoso, “Odoos hee owolo giso holo bakadio debeiso.

<sup>12</sup> Esino biame heeso omoloye ama mapoo egeesee takaso, ‘No toga nee bi ayo talai malalo epedee amapoo tenee,’ diso. Esemee amaye owolo bakadio ee ma kulodu o bi abo puloso dimapoo piso.

<sup>13</sup> Esemee omoloye biame abo poogoloso hamamee amameeye yimapoo bi pi ee tolosos see odoo abo mapoo neisos tolosos see mi hee eli sage mapoo diso. Yo omapoo dileso tokenee goo ma kulodu badolone, o molee toowa hosudooso.

<sup>14</sup> Yayo o molee toowa hosudolosos melee biame omapoo mi kibiya oso mi omapoo hodia goo meleeso. Esemee yayo see gilibo holo masi badolone, hodia goo toowa egeliso.

<sup>15</sup> Esiga yayo molee tou talame mosobia odoo hee mapoo dileso peledabaso. Esemee mosodei odoo ogosos yo o go mapoo dileso o be bamelee diso.

<sup>16</sup> Esemee yo dileso be hu nei nolone besos nali nei ee ogolosos nalame gweliso. Esino odoo heeso beyo nei sabolos osolosos nei abo sabolos yayo nalame koo tosibili.

<sup>17</sup> Yayo egeesee badebei ma kulodu, biame heeso yimapoo goo goolee tekepo oso sibume, yayo egeesee gooleeso, ‘Mo mamos tou tolosos nei teli odoo susuga ee hodia sabolos koo debeli. Esino a hamapoo hodia sabolos badolone talame ka seeso.

<sup>18</sup> Esiga a see wedi dileso mos ma mapoo egeesee takalaiso: Ma, ayo Godee mapoo osolosos namapoo goo tokenee olo tooso.

<sup>19</sup> A tokenee odo. Esiga nayo see epedee amapoo mo holo dalai tekeponee. Esino tekepo, nayo a nee tou toloso nei teli odo hee dee takee,' diso.

<sup>20</sup> Osoloso yo amameeye badebei mi mapoo diso.

Esino yo eli sage abaga osee sibumolome, amaye ogoloso owolo diya sooloo dolone, yayo saga hoguo dileso owolo mapoo boolumaloso adaso.

<sup>21</sup> Esem e owoloye yimapoo egeese takaso, 'Ma, a Godee mapoo osoloso namapoo goo tokenee olo tooso. A tokenee odo. Esiga nayo amapoo mo holo dalai tekeponee,' diso.

<sup>22</sup> Esino amaye o tou teli odo mapoo egeese takaso, 'Dugo tekepo sabolo osoloso homo bi sabolo osoloso dee sesa mapoo kali ki bi sabolo saga tosibilesa yimapoo kadige.

<sup>23</sup> Osoloso mo gala hu ma kulodu bulumakau be hu kauwa wooloso si. Osoloso hodobo wo nolone goomogalaiso.

<sup>24</sup> Bei, mo holo hagee olo tano, see epedee gie badoso. Osoloso olo dobudo diso, esino epedee ogoso,' diso. Esiga diayo hodobo wo nolone goomoga poudoso.

<sup>25</sup> Diba egeeseelone doboome, emei o homolee ma kulodu tou temelesa sibulone, amayo moso kulodu odo susuga goomogolone hopolone kosaiya pegigamolome duso.

<sup>26</sup> Esem e yayo o tou teli odo hee idoloso yimapoo woosaso, 'Mo mamomo moso ma kulodu ogo goo tolo?' diso.

<sup>27</sup> Esem e o tou teli odo oso yimapoo egeese takaso, 'Nomolo epei simiso. Esiga namaye owolo yo medee tekepo wedi simi ogoloso, goomogolone bulumakau be hu kauwa wooloso siloso wo toowa ka nalagamoloso,' diso.

<sup>28</sup> Esem e emei goo hagee duloso komonolone wo ne mapoo dile. Es-

eme amaye sibilesa o daga holo yo wo ne mapoo gadilame giso.

<sup>29</sup> Esino yayo ama mapoo egeese takaso, 'Ayo dugo susuga ma kulodu nee tou teli odo masi silone nee to mapoo mesimo silone tou toowa temeleso. Esino nayo gout be hu pepooko wooloso amapoo takolone, nee odo sabolo neye, dee takele.

<sup>30</sup> Esino nowolo hagoso nee bi sabolo nee molee sabolo toloso domo sili sobo sabolo badolone hosudoloso sibume, nei nayo yimapoo goomogolone be kauwa wooloso wo toowa nolone ka dabala?' diso.

<sup>31</sup> Esino amaye owolo mapoo egeese takaso, 'Mo holo, nayo biame susuga abolo badebeiso. Esiga mo bi susuga ee nee.

<sup>32</sup> Esino epei iba goomogalalai tekepo. Bei, nomolo hagee olo tano, epedee yo see gie ka badoso. Osoloso yo osugobano, see epei yo ogoso,' diso."

## 16

### *Molee gibadeli odo maga wudu taka*

<sup>1</sup> Yesuye o hamamee dili odo mapoo egeese takaso, "Biame heeso bi bei odooso o molee gibadeli idoloso badebeiso. Egeesi ma kulodu bi bei odo o molee gibadeli odo oso o molee mada namelee goo ee yo duso.

<sup>2</sup> Osoloso yayo o molee gibadeli odo ee idoloso yimapoo egeese takaso, 'Nayo mo molee tokenee bameleena. Esiga no tekepo, nayo tou temelee goo susuga ee booka mapoo hoguguloso amapoo eligi. Bei, nayo see mo molee gibadalai tekeponee. Esiga no tou epedee pagalaiso,' diso.

<sup>3</sup> Esem e molee gibadeli odo oso egeese gooleeso, 'Mo wiligi odo oso mo tou ee olo peegoo magooso. Esiga a see ogo tou toomoba? A nei howo segelame mi gabalai a kitulugu mauwe. Osoloso ayo odo mapoo wulo hoowamo silei diya simileeyo.

<sup>4</sup> Esino ayo mo tou poogooga, mo odooso a dia mosopoo ido palame, ayo goo talai epedee olo gooleedoso.’

<sup>5</sup> Egeesee gooloso yayo o wiligi odoosoo mapoo bi wulayo temelee odoosoo ee gilimadooso. Osoloso daga odoosoo hee mapoo egeesee takaso, ‘Nayo mo wiligi odoosoo mapoo bi wulayo too eyo nei tenelega ka pagala? Nei kasolowo?’ diso.

<sup>6</sup> Esemee odoosoo ogoso nei egeesee takaso, ‘Ayo mo dalamoo 100 mapoo olipi i keedoo ee nei tenele,’ diso.

Esemee molee gibadeli odoosoo oso nei yimapoo egeesee takaso, ‘Wiligi odoosoo o booka hagosoo. Esiga no saga bulosoo booka hamapoo nayo dalamoo 100 mapoo olipi i keedomee hogugu ee tabugulosoo, see dalamoo 50 mapoo olipi i keedoo ono too dolosoo hogugi,’ diso.

<sup>7</sup> Osoloso molee gibadeli oso see odoosoo hee mapoo egeesee takaso, ‘Nayo mo wiligi odoosoo mapoo bi wulayo too eyo nei tenelega ka molosoo? Nei kasolowo?’ diso.

Esemee odoosoo ogoso nei egeesee takaso, ‘Ayo mo wogai 100 mapoo palawa wo soo too eyo nei tenele,’ diso.

Esemee molee gibadeli odoosoo oso yimapoo nei egeesee takaso, ‘Wiligi odoosoo o booka hagosoo. Esiga no saga bulosoo booka hamapoo nayo wogai 100 mapoo palawa wo soo too hogugu ee tabugulosoo, see wogai 80 mapoo palawa wo soo ono too dolosoo hogugi,’ diso.

<sup>8</sup> Esino o wiligi odoosoo oso goo hagee dulosoo o molee tokenee gibadeli odoosoo mapoo egeesee takaso, ‘Nayo odoosoo abo pidi goo oso see hamamee no pidileiso,’ diso.”

Esemee Yesuye see egeesee takaso, “O, mi odoosoo oso eyo nediliyo goolone emegei dimaga pidili goo susuga ee medee gooleedoosoo. Esino Godeeyo odoosoo oso goo egeesi moodoolai kibiya gooleedelee.

<sup>9</sup> Esiga ayo nimapoo taka, niyo mipoo toowa hamapoo dobolone, nibada molee sabolo osoloso nibada bi sabolo oso emegei pidi osoloso emegei dolone ka debee. Niyo egeeseega nei bi egee mauwe poogooga, Godeeye niba Kei mi ma dokodoo kookaiyo molosoo osee malai mosoo omapoo ido palaisoo.

<sup>10</sup> Esiga edebeeyo goo pepooko medee kibiya bamologa, yo see goo toowa balai tebileiso. Osoloso odoosoo agayo goo pepooko balai tebilega poogooga, yo goo toowa balai tebileime.

<sup>11</sup> Esiga niyo mi toowa eyo bi medee belega poogooga, see niyo Kei mi eyo goo ee medee kasee balaisoo?

<sup>12</sup> Osoloso see niyo nee odoosoo bi medee belega poogooga, odoosoo agayo nee bidee ee no balame namapoo ka tenelaiyo?

<sup>13</sup> Esiga edebeeyo wiligi odoosoo bakadio eyo to mapoo mesilosoo silone tou talai tebile. Bei, yo o wiligi odoosoo hee goomogolone hee gowoolaisoo. Egeeseelone yayo wiligi odoosoo heeyo to mapoo mesilosoo silone, see heeyo to mapoo mesileime. Esiga edebeeyo Godee mapoo mesimo silone molee toowa tolosoo badalai goo mapoo mesilei tebile.”

<sup>14</sup> Esemee Pelisi odoosoo oso Yesuye to taka hagee dulosoo manolone yiligasoo. Bei, Pelisi odoosoo hagee bia molee diya goomegeli.

<sup>15</sup> Esemee Yesuye dimapoo egeesee takaso, “Niba wulo edebeeyo tekepo odoosoo dalame, odoosoo howo woola gamenee goo tekepo moodeliso. Esino ee ma kulodu Godeeye niyo goo goolee olo gooleedoosoo. Esiga edebeeyo nibada goo ogolosoo tekepo deli ee nei Godeeye nibada goo ee diya tokenee deliso.

<sup>16</sup> Godeeye tei magoo Moses mapoo tenee ee hogugu sabolo osoloso Godee maga to tolosoo kokodo takomo sili odoosoo oso to hogugu

oso odoo abaga gilimado simino, Yoneeye badebei biame omapoo peledabaso. Osoloso Yoneeyo biame poogoloso hamamee mapoo to tekepo Godeeye wiligi doloso badeli goo ee odoo mapoo takaso. Esiga edebeeyo Godeeye wiligi doloso badeli goo mapoo gadilame diya ka kituluguso.

<sup>17</sup> Esiga mipoo sabolo kei sabolo oso me pagalai ee teiba. Esino Godeeye tei magoo hogugu ee ma kulodu hu bei pepuso hee peegoo pagalai tebile.

<sup>18</sup> Esiga edebeeyo osobo poogoloso, see sobo hee huga, yo sobo egee goo heli toso. Osoloso edebeeyo sobo omoye poogoo huga, yo odoo heeyo osobo ee peedee huso.”

*Bi bei odoo dio Lasales dio*

<sup>19</sup> “Biame heeso bi bei odoo badebeiso. Yo biame susuga dugo kali bi tekepo kaloso badolone nei medee tekepo nolone badebeiso.

<sup>20-21</sup> Biame domo mapoo bi mauwe odoo badebeiso, o hu Lasales. Yo o su susuga e buloso badebeiso. Esino yo biame susuga bi bei odoowo moso osulu miyopoo iboduloso badolone bi bei odoo oso nei ne kokou mou ee nalame goomegeliso. Osoloso soso sibilesa o e mapoo pieliso.

<sup>22</sup> Osoloso biame abo poogoloso hamamee bi mauwe odoo Lasales taso. Esem e Godeeyo momaiye oso yo todilesa Eibalahameeye badebei koola mapoo ibediso. Osoloso hamamee bi bei odoo taso. Esem odoo aboso o su midoosooso.

<sup>23</sup> Yo toloso abaga dino odoo wedia oso debeli mi mapoo dala ma kulodu badebeiso. Yo omapoo badolone, dokodoo egeino, Eibalaham eli sage badoboome ogoloso, yima koola mapoo Lasales badoboome egeiso.

<sup>24</sup> Esem e yo ilone egeese takaso, ‘Ma Eibalaham, nayo a sooloo dele. Osoloso Lasales amapoo sibeye dee, yayo sibilesa o dee wolugu oso howomoo olugudoloso, mo i mapoo sigoga, kekebie palame. Bei, a dou

hagee ma kulodu dala sabolo bado,’ diso.

<sup>25</sup> Esino Eibalahameeye nei egeese takaso, ‘Mo holo, no goolee. Nayo gie badebei biame omapoo bi medee tekepo ono temeleso. Esino Lasales yo bi mauwe gilibo holo masi badebeiso. Esiga epedee Lasaleseye hamapoo goomoga sabolo badoga, nei nayo dala ma kulodu ka badoso.

<sup>26</sup> Osoloso goo hee ee, niba ogo osoloso iba ogo doloso domo omapoo goodobia diya toowa edebeeyo hodiokoo dabagalai tebile moloso. Esiga iyo hagee do omaga niyo egee do mapoo dabagalai eli mauwe. Osoloso niyo egee do omaga edebeeyo iyo hagee do mapoo dabagalai onosee eli mauwe,’ diso.

<sup>27</sup> Esem e bi bei odoo oso nei egeese takaso, ‘Ma Eibalaham, ayo namapoo howaso, nayo Lasales mo mayo moso mapoo wedi diye dalame.

<sup>28</sup> Bei, mo mayo moso mapoo molo dio dee tiadoo omapoo doso. Esiga Lasaleseye see wedi dilesa dimapoo kokodo takalai tekepo, diba toga see dala mi hamapoo sibiya,’ diso.

<sup>29</sup> Esem e Eibalahameeye egeese takaso, ‘Dimapoo Moseseeye tei hogugu sabolo osoloso Godee maga to toloso kokodo takomo sili odoo oso Godeeyo to hogugu sabolo olo moloso. Esiga dia goo goolee tekepo palame, diayo kokodo taka to ee dulei tekepo,’ diso.

<sup>30</sup> Esem e bi bei odoo oso nei egeese takaso, ‘Haye, egeese se-laime. Esino odoo hee ta maga see hogado sibilesa dimapoo takooga, diayo dibada goo tokenee maga miligi pialoso Godee mapoo ka sibilei,’ diso.

<sup>31</sup> Esino Eibalahameeye see tobu yimapoo egeese takaso, ‘Diayo Moseseeye tei hogugu sabolo osoloso Godee maga to toloso kokodo takomo sili odoo oso Godeeyo to hogugu omapoo tei telega poogooga, diayo see kasi maga odoo hee ta maga



hogado sibilesa to takooga, omapoo tei ka talaiyo?' diso."

## 17

*Tokenee goo mapoo gido dili goo (Mat 18:6-7, 21-22; Maka 9:42)*

<sup>1</sup> Biame heeso Yesuye o hamamee dili odoos mapoo egeese takaso, "Edebeeyo goo tokenee mapoo gido dilei goo ee tei sibileiso. Esino goo egee bei mooloogoomo sili odoos mapoo, ayo yimapoo ka taka, ye-ee!

<sup>2</sup> Esiga odoos heeso tei too odoos hee goo tokenee mapoo gido duga, nei odoos heeso o mu mapoo yo toowa bagagoloso howo bou mapoo toosoolai ee dala haga toowanee. Bei, hamamee Godeeye odoos goo egeesi moodeli mapoo dala toowa tenelaiso.

<sup>3</sup> Esiga niba niso nediliyo medee bamelee.

Osoloso nee odoos tei too odoos oso goo tokenee toga, yimapoo takee. Osoloso yayo o goo tokenee mapoo goohela sabolo o tokenee mapoo miligi piaga, o tokenee egee boobado bigi.

<sup>4</sup> Osoloso yayo biame hedebe ma kulodu namapoo tokenee too ee 7 daga, osoloso namapoo sibilesa yayo emegei di to taka onosee 7 daga, nayo o tokenee goo ee boobado bigi."

*Tei too goo*

<sup>5</sup> Diye di odoos oso Lodee mapoo egeese takaso, "Iyo tei too goo ee toowa moodee," diso.

<sup>6</sup> Esemee Lodeeye nei egeese takaso, "Niyo tei too goo oso homokoko pepooko egeesi masi nimapoo mologa, niba teiba niyo molobei hamapoo takolone, 'No nee too sabolo tado dileso abei mapoo tebee,' daga egeese selaiso," diso.

*Wiligi odoos o tou teli odoos eyo goo*

<sup>7</sup> "Tou teli odoos oso o wiligi odoos homolee mapoo mi doomelee maga, o, sipi be hu

bamelee maga siboga, yo wulo sibilesa nei nalaiame, haye.

<sup>8</sup> Yo daga o wiligi odoos taba eyo nei siloso, dugo hapoo ee kaloso, nei si ee yimapoo tenelaiso. Osoloso o wiligi odoos taba oso nei naloso koodobuoga, see hamamee yayo wo sabolo howo sabolo nalaiso.

<sup>9</sup> Esino yayo tou egeesi tomo siloga, o wiligi odoos taba oso nei yimapoo goomoga to takalaiame. Bei, egee o tou.

<sup>10</sup> Esiga niba egeese selai tekepo. Ayo nimapoo tou teye daga, niyo goo egee tolosa egeese takalai tekepo, 'Iba wulo tou teli odoos. Esiga iyo tou hagee tomo silesibo goo hee talame koo seeso,' dee takee," diso.

*Yesuye odoos e bia 10 ee tekepo moodoo*

<sup>11</sup> Yesu Yelusalem mi mapoo dulone, Gelili mi ogo osoloso Samaliya mi ogo doloso domo abaga diso.

<sup>12</sup> Yo eli domo mapoo mi pepooko hee mapoo dumolome, odoos e bia 10 egeiso. Odoos e bia 10 oso Yesu ogoloso yima hegi sibadele. Esino wulo eli sage tebisamolone,

<sup>13</sup> toso neligidi yimapoo egeese takaso, "Yesu, wiligi odoos, nayo iba sooloo dolone pidi!" diso.

<sup>14</sup> Esemee yayo diba ogoloso egeese takaso, "Niba dileso Godee ogo odoos ogo doloso domo debeli odoos mapoo nibada su eligi," diso. Diba Yesuye egeese taka duloso dimelee omapoo, dia kolo see tekepo paso.

<sup>15</sup> Osoloso dima kulodu odoos hee o kolo tekepo pa ogoloso Yesu mapoo wedi sibulone, toso neligidi Godee mapoo goomoga poudoomo simiso.

<sup>16</sup> Egeeseemo sibilesa Yesuwo homo beiyopoo gasuwoloso badolone Yesu mapoo goomoga teneeso. Odoos hagee Samaliya odoos.

<sup>17</sup> Esemee Yesuye egeese takaso, "Ayo odoos 10 olo tekepo moodoos. Esino odoos abo egee bia kasomo?"

18 Bei kasi maga, Yu odoonee hedebe hagoso obusomo Godee mapoo goomoga tenelame ka wedi simiyo?" diso.

19 Osoloso Yesuye odo hamapoo egeese takaso, "Nayo amapoo tei too maga no olo tekepo paso. Esiga no toboloso di," diso.

*Godeeye wiligi doloso badeli goo oso sibilei*

*(Mat 24:23-28, 37-41)*

20 Biame heeso Pelisi odo oso Yesu mapoo egeese takaso, "Godeeye wiligi doloso badeli goo ee kopolone sibileiyo?" diso.

Eseme Yesuye nei dimapoo egeese takaso, "Godeeye wiligi doloso badeli goo ee woola sibo agalaime.

21 Osoloso edebeeyo Godeeye wiligi doloso badeli goo ee hamapoo hagee moloso, o, koogee moloso, dee takalaime. Bei, Godeeye wiligi doloso badeli goo ee nima kulodu moloso," diso.

22 Osoloso see o hamamee dili odo mapoo egeese takaso, "Odo Holo mo biame oso siboga niyo agalame goomogalai biame ee sibileiso. Esino niba agalaime.

23 Osoloso see edebeeyo nimapoo takolone, 'Odo Holo a koo badoso, o, hamapoo badoso,' dee takooga, dia to mapoo tei toloso omapoo na agala di.

24 Esino Odo Holo ayo sibilei biame ee, kei ebiedi buguga mi susuga egee gadeebugu egeese selaiso. Egeeseega odo susuga oso agalaiso.

25 Esino daga Odo Holo a dala toowa talaiso. Osoloso odo epedee hagee do oso a diya gowoolaiso.

26 Nowaye badebei biame omapoo goo peledaba, goo hedebe egeesi masi oso Odo Holo ayo sibilei biame omapoo peledabalaiso.

27 Nowaye badebei biame mapoo edebeeyo nei na howo na dolone dobolone, soboso giso obuo osoloso

gisoso sobo huya dolone debeiso. Egeese solone doboome, biame heeso Nowa du ma kulodu gadiso. Eseme howo toowa duwa oso sibileso odo susuga piliguso.

28 Osoloso goo hedebe egeesi masi oso Loteeye badebei biame mapoo peledabaso. Bei, Loteeye badebei biame mapoo edebeeyo nei na howo na dolone debeiso. Osoloso biso emegei nei pidi nei pidi dolone debeiso. Osoloso nei howo sogo, moso togo dolone debeiso.

29 Egeese solone doboome biame heeso, Loteeye Sodom mi poogoloso dime, kei ma dokodooga dou sabolo osoloso yo dei heliye oso sibileso odo Sodom mi mapoo debeli susuga piliguso.

30 Esiga Odo Holo ayo sibilei biame mapoo odo susuga oso goo egeesi tolone doga, ee ma kulodu a ka sibilei.

31 Esiga biame omapoo odo hau mapoo badebei oso see moso kulodu o bi talame gadilei tekeponee. Osoloso odo homolee mapoo nei howo sogomologa, yo see mosopoo wedi dilei tekeponee.

32 Esiga niba Loteeye osobowo goo ee goolee.

33 Esiga odo agayo o gie badeli eyo nediliyo pidilame wegegeega, o gie badeli egee osugobalaiso. Esino odo agayo mo goo maga o gie badeli peegoo magooga, yo bado-boso kookaiyo gie osee badalaiso.

34 Esiga ayo nimapoo taka, biame omapoo giso bakadio kida hedebe mapoo tileiso. Esino odo hee ido polone, odo heeno omapoo pagalaiso.

35 Osoloso biame omapoo sobo bakadio wo gamalaiso. Esino sobo hee ido polone, sobo heeno omapoo pagalaiso. [

36 Osoloso biame omapoo giso bakadio homolee ma kulodu tou tomo sileiso. Esino odo hee ido polone, heeno omapoo pagalaiso."]

<sup>37</sup> Yesuye to hageesee takoloso koodobume, o hamamee dili odoosoo yimapoo egeesee takaso, “Lodee, goo hagee kamapoo peledabalaiyo?” diso.

Eseme Lodeeye dimapoo nei egeesee takaso, “Mi hee mapoo gala ta eyo su hune mologa, kukodee susuga hune egee nalame omapoo busiliso,” diso.

## 18

### *Sobo bauwo goo maga wudu taka*

<sup>1</sup> Osoloso Yesuye see tobu wudu taka hamaga o hamamee dili odoosoo dimapoo eligiso, diayo biame susuga Godee mapoo takomo silone gowoolega pagalame.

<sup>2</sup> Egeeseelone yayo egeesee takaso, “Mi hee mapoo goo midili odoosoo badebeiso. Esino yo Godeebolo ebilega badolone, odoosoo koo gweli.

<sup>3</sup> Osoloso mi hedebe omapoo sobo bau hee badebeiso. Esino sobo hagoso biame susuga goo midili odoosoo hamapoo sibilesosoo howolone egeesee takeliso, ‘Nayo a pidilone odoosoo amapoo ha egee tomolo eyo goo midi,’ deliso.

<sup>4</sup> Esino goo midili odoosoo oso daga sobo hagee pidilei yo goomegele. Esino biame susuga sobo hagoso yimapoo sili sileeme ogoloso egeesee gooleeso, ‘A Godeebolo koo ebilosooloso a odoosoo koo gweli.

<sup>5</sup> Esino a sobo hageeyo to dumeleso diya gowoo. Esiga yayo see mosoo mapoo sibili ee pagalame yo pidileiso,’ diso.”

<sup>6</sup> Esiga Lodeeye egeesee takaso, “Goo medee koo midili odoosoo eyo goo hagee ogoloso goo goolee medee kibiya te. Bei, goo midili odoosoo hagoso daga sobo hagee pidilei gowoomeleso see hamamee yo pidiso.

<sup>7</sup> Esiga Godeeye hesiga odoosoo biame sabolosoo gesi sabolosoo yimapoo hoowa mologa ogoloso diba tei pidileiso. Osoloso yayo diayo

yimapoo taka to ee duloso nei tenelai koo dagili.

<sup>8</sup> Esiga ayo taka, Godee o odoosoo yimapoo hoowa duloso goomoga sabolosoo diba pidiliso. Esino Odoosoo Holo ayo see wedi sibilei biame mapoo, mipoo hamapoo tei too goo ee molo agalaisomo?”

### *Pelisi odoosoo sabolosoo osolosoo tekisimolee misigeli odoosoo sabolosoo*

<sup>9</sup> Odoosoo abo dieso nediliyo diba Godeeyo howo woola tekepo dolone, hee odoosoo abo tokenee deli odoosoo mapoo Yesuye wudu taka hageesee takaso,

<sup>10</sup> “Odoosoo bakadio, Pelisi odoosoo sabolosoo osolosoo tekisimolee misigeli odoosoo sabolosoo, Yu odoosoo tei mosoo mapoo Godee mapoo takalame palaso.

<sup>11</sup> Osolosoo Pelisi odoosoo osoo tobolosoo obusomoo tobudulone dokodoo hageesee takaso, ‘Godee, a namapoo goomoga to taka. Bei, a odoosoo abo egeesinee. Bei, diba adaba bi teliso, osolosoo goo tokenee teliso, osolosoo diba adaba sobo sabolosoo gisosabolosoo heli teliso. Osolosoo a see tobu namapoo goomoga to taka. Bei, a tekisimolee misigeli odoosoo keeseenee.

<sup>12</sup> Bei, a sadee hedebe ee ma kulodu biame bakadio nei nelega tei dolosoo badeliso. Osolosoo ayo bi too biame mapoo mo bi 10 ee ma kulodu hedebe namapoo teneliso,’ diso.

<sup>13</sup> Esino tekisimolee misigeli odoosoo osoo hamameedee hoogoo bia omaga tobolosoo o goo tokenee mapoo gooholone o su eyo nediliyo o budo mapoo kobugulosoo oo goobodosoolosoo tobudulone Godee mapoo egeesee takaso, ‘Godee, a tei medee diya tokenee odoosoo. Esiga nayo a sooloo dolone mo goo tokenee eyo nei na tenee,’ diso.

<sup>14</sup> Esiga ayo nimapoo taka, tekisimolee misigeli odoosoo hagoso o mosopoo wedi dulone, Godeeyo howo woola abaga tekepo odoosoo dolosoo diso. Esino Pelisi odoosoo

mapoo goo hageesi mauwe meleeso. Esiga odoo agayo eyo nediliyo yo toowa daga, nei yo Godeeye pepooko dalaiso. Esino odoo agayo eyo nediliyo yo pepooko daga, nei Godeeye yo toowa dalaiso.”

*Yesu sabolo holaiso sabolo  
(Mat 19:13-15; Maka 10:13-16)*

<sup>15</sup> Biame hedebeso odoo aboso holope Yesu mapoo ido sibadeeso, o deeso sigoloso pidilame. Esino o hamamee dili odoo oso goo egee ogoloso hamaga takaso.

<sup>16</sup> Esemé Yesuye holaiso gilimadoloso, o hamamee dili odoo dimapoo egeese takaso, “Holaiso amapoo sibilei soowa. Niyo na hamaga takee. Bei, edebeeyo holaiso hageesi masi poga, diba Godeeye wiligi doloso badeli mapoo gasibileiso.

<sup>17</sup> Ayo nimapoo taka, edebeeyo o goo holaiso masi amamo to mapoo mesimo sili, egeesi selega poogoloso, Godee mapoo mesilega poogooga, yo Godeeye wiligi doloso badeli mapoo gasibilei mauwe.”

*Bi bei odoo  
(Mat 19:16-30; Maka 10:17-31)*

<sup>18</sup> Wiligi odoo heeso sibileso Yesu mapoo egeese takaso, “Eligili odoo tekepo, ayo ogo goo toga kookaiyo badoboso gie badeli ka talaiyo?” diso.

<sup>19</sup> Esemé Yesuye nei yimapoo egeese takaso, “Bei kasalame nayo a tekepo odoo dee ka takala? Tekepo odoo hee koo badoso. Esino hedebe Godeeno tekepo.

<sup>20</sup> Esiga Godeeyo tei magoo no olo gooleedooso: adaba kooka sobo na peedee hui, osoloso odoo na wooloome, osoloso heli na te, osoloso odoo hee mapoo gamenee na gigidi, osoloso nama dio noowee dio oso taka to omapoo mesie.”

<sup>21</sup> Esemé odoo oso Yesu mapoo egeese takaso, “A holope pepooko maga simi tei magoo susuga hagee tubuloso tomo simiso,” diso.

<sup>22</sup> Esemé Yesuye o to duloso nei egeese takaso, “No goo hedebe dooboo dagadi moloso. No dileso nee bi susuga odoo abo mapoo tenee, nei molee talame. Osoloso bi too eyo nei molee ee bi mauwe odoo mapoo pi. Nayo egeese seega, Kei mi ma dokodoo bi tekepo nee hu sabolo mologa agalaiso. Esiga no a deede sibe,” diso.

<sup>23</sup> Odoo hagosu Yesuwo to duloso diya pupudasu. Bei, yimapoo bi bei meleega.

<sup>24</sup> Esemé Yesuye yimapoo bolone egeese takaso, “Bi bei odoo oso Godeeye wiligi doloso badeli mapoo gadilei diya kalawa.

<sup>25</sup> Esiga dugo duseli midole ou maga kemol be toowa oso gadilei kalawa. Esino bi bei odoo oso Godeeye wiligi doloso badeli mapoo gasibilei diya kalawa toowa.”

<sup>26</sup> Esemé o hamamee dili odoo oso eligi goo hagee duloso egeese takaso, “Esino kalawa egee odoo agayo gie badeli ka talaisomo?” diso.

<sup>27</sup> Esemé Yesuye dimapoo egeese takaso, “Edebeeyo eyo nediliyo o gie badeli pidilei tebile. Esino hedebe Godee yino teiba. Bei, yayo goo susuga ee moodolai yimapoo kalawa mauwe,” diso.

<sup>28</sup> Esemé Pitaye Yesu mapoo egeese takaso, “Iba ibada bi susuga poogoloso, no dodomo simiso,” diso.

<sup>29-30</sup> Esemé Yesuye dimapoo nei egeese takaso, “Ayo nimapoo taka, edebeeyo Godeeye wiligi doloso badeli goo maga o moso sabolo, osoloso osobo sabolo, osoloso emei dio sabolo omolo sabolo, osoloso ama dio owee dio sabolo, osoloso owolo dio sabolo poogoloso siboga, yayo epedee hamapoo nei toowa talaiso. Osoloso hamamee yo kookaiyo badoboso gie badeli talaiso,” diso.

*Yesuye see eyo talai goo ee taka  
(Mat 20:17-19; Maka 10:32-34)*

<sup>31</sup> Osoloso see Yesuye o hamamee dili odoo 12 gilimadoloso peegoo



gilimado dileso dobolone dimapoo egeesee takaso, “Iba epei Yelusalem mi mapoo poloso. Esiga Godee maga to toloso kokodo takomo sili odoo oso daga Odoo Holo mo goo hogugu susuga omapoo peledabalaiso.

<sup>32</sup> Osoloso a Yu odoonee mapoo tenelaiso. Osoloso diayo a man-alaiso, osoloso amapoo tokenee goo moodoolaiso, osoloso amapoo makawo pagalaiso.

<sup>33</sup> Osoloso a tiso dabalaiso, osoloso a wooloomalaiso. Esino a midoo ma kulodu tamoloso, biame bakadio hedebe di poogoloso see gie badeli toloso hogabileiso,” diso.

<sup>34</sup> Esino Yesu o hamamee dili odoo oso to hagee duloso goo eyo bei medee kibiya gooledele. Bei, goo eyo bei dimaga mada magooga.

*Yesuye odoo howo neliga tekepo moodoo*

*(Mat 20:29-34; Maka 10:46-52)*

<sup>35</sup> Yesu Yeliko mi koola mapoo sibumolome, odoo howo neliga oso Yesuye sibilei eli pee mapoo badolone molee howameleeso.

<sup>36</sup> Egeeseelone odoo mooloo-goodoo susuga oso to boowoomo sibume duloso odoo abo mapoo woosaso, ogoo goo oso peledaba beleso.

<sup>37</sup> Esemee odoo aboso yimapoo takolone egeesee takaso, “Yesu Nasalet odoo oso odoo abo sabolo ka diyadee,” diso.

<sup>38</sup> Yo to hagee duloso neligidi iso, “Yesu, Deibidiyo amawe, nayo a sooloo dolone a pidiye!” demeleeso.

<sup>39</sup> Esino odoo malalo diyadee oso yimapoo to kitulugu sabolo egeesee takaso, “No to mauwe badebee,” diso. Esino edebeeyo yimapoo egeesee takeme, yayo dia to mapoo dulega, to kitulugu sabolo neligidi egeesee takolone badebeiso, “Deibidiyo amawe, nayo a sooloo dolone a pidiye!” demeleeso.

<sup>40</sup> Esemee Yesu o to duloso omapoo kookoo toboloso tobudulone, odoo abo dimapoo egeesee takaso, “Odoo

egee hamapoo ido sibe,” diso. Osoloso odoo howo si olo Yesu mapoo ido sibileso badoboome, Yesuye yimapoo egeesee takaso,

<sup>41</sup> “No ayo namapoo ogoo goo moodoolai goomogodo?” diso.

Esemee howo neliga odoo oso nei yimapoo egeesee takaso, “Lodee, mo howo tekepo pe. A see agalai goomogo,” diso.

<sup>42</sup> Esemee Yesuye yimapoo egeesee takaso, “Esiga no epedee nee howo see ege. Bei, no tei tooga, no see olo tekepo paso,” diso.

<sup>43</sup> Esemee haga booloogelega o howo bakadio see tekepo paso. Esemee yayo Yesubolo dulone Godee mapoo goomoga poudoomo diso. Esemee goo peledaba hagee egei odoo susuga oso Godee mapoo goomoga poudoomo diyadeeso.

## 19

*Sekiyes tekisi molee misigeli odoo*

<sup>1</sup> Yesu Yeliko mi mapoo pele-doboloso, see mi domo abaga dimeleeso.

<sup>2</sup> Mi omapoo tekisi molee misigeli wiligi odoo taba badebeiso, o hu Sekiyes. Osoloso yo bi bei odoo.

<sup>3</sup> Yesu eli domo abaga dumolome, odoo susuga oso yo agalame diya mooloogoodooso. Sekiyes yo Yesu agalai goomogaso. Esino yo odoo diya deiyepoga, yayo Yesu agalai odoo mooloogoodoo oso yo gooloo-gooso.

<sup>4</sup> Esemee Sekiyes yo Yesu agalame Yesu diayo sibatemelee eli su mapoo malalo saga hoguo dileso homo ma dokodoo peleso badebeiso.

<sup>5</sup> Esemee Yesuye sibileso egeino, Sekiyes yo homo ma dokodoo peleso badoboome ogoloso yimapoo egeesee takaso, “Sekiyes, no saga miyomoo mei. A epei nobolo hodobo nee mosopoo dilei goomogo,” diso.

<sup>6</sup> Esemee yo saga miyomoo meilesa, goomoga sabolo Yesu o mosopoo ido diso.

<sup>7</sup> Osoloso odoo susuga oso goo hagee ogoloso diya gowoolone egeesee takaso, “Yesu tokenee teli odoowo mosopoo diso,” dee takaga meleeso.

<sup>8</sup> Osoloso diba dileso Sekiyeseeyo moso mapoo dobolone Sekiyeseeye toboloso egeesee takaso, “Lodee, a epei goo hageesi moodoolaiso: Ayo mo bi abo hodio ee bi mauwe odoo mapoo pileiso. Osoloso adaba molee ayo gamenee taka maga ayo hedebe too eyo nei see mawo dimapoo nei toowa bakadio bakadio di egeesi dimapoo tenelaiso,” diso.

<sup>9</sup> Esemee Yesuye Sekiyeseeyo to dulosoo yimapoo egeesee takaso, “Epei moso hageeyo kulodu debeli odoo mapoo gie badeli goo olo tosimiso. Bei, Sekiyes hagee nose Eibalahameeyo amawe.

<sup>10</sup> Bei, Odoo Holo ayo simi hagee tei tele poogoo odoo peegoo osugoba ee esiameloso ogoloso diba gilimadoloso dimapoo gie badeli tenelame ka simi,” diso.

*Wiligi odoo oso o tou teli odoo mapoo molee tenee*

*(Mat 25:14-30)*

<sup>11</sup> Edebeeyo Yesuwo to hagee dulone dobolone egeesee goolone debeiso, “Yesu Yelusalem koola mapoo sibilesos badoso. Esiga Godeeye wiligi doloso badeli goo onosee koola toooboo malaiso,” demeleeso. Egeesee gooloogamelee ogoloso, Yesuye wudu taka hagee takaso,

<sup>12-13</sup> “Osoloso wiligi odoo hee mi eli sage mapoo gibadeli hu tala dilame badolone, o tou teli odoo 10 gilimadoloso dimapoo molee ko mina\* deli hedebe tenee, hedebe tenee diso. Esiga yayo dimapoo egeesee takaso, ‘Niyo ayo see wedi sibilei ee bolone molee see toowa palame, biyo moso togoloso bei mooloogee,’ diso.

<sup>14</sup> Osoloso yo dime, o mosobia oso yo diya gowoolone, yima hamamee

odoo abo diye diso, yayo diba gibadalai goo maga diayo gowe goo ee takalame.

<sup>15</sup> Esino odoo egee gibadeli hu toowa tolosos see wedi simiso. Yo see wedi sibilesos odoo molee yayo pi ee gilimadooso, molee toowa mala beleso agalame.

<sup>16</sup> Osoloso daga odoo heeso malalo sibilesos egeesee takaso, ‘Nayo molee amapoo tenemeni oso biyo moso togoloso bei mooloogoloso see molee ko mina deli abo 10 egeesi tooso,’ diso.

<sup>17</sup> Esemee gibadeli odoo oso yimapoo goomogolone egeesee takaso, ‘No tou medee tekepo totoo. Esiga nayo goo pepooko hagee medee bameleega, see nayo mi 10 wiligi doloso bolone badalaiso,’ diso.

<sup>18</sup> Esemee see omapoo badeli tou teli odoo hee oso sibilesos egeesee takaso, ‘Nayo molee amapoo tenemeni oso biyo moso togoloso bei mooloogoloso see molee ko mina deli abo dee tiadoo egeesi tooso,’ diso.

<sup>19</sup> Esemee gibadeli odoo oso yimapoo egeesee takaso, ‘Nayo mi dee tiadoo wiligi doloso bolone badalaiso,’ diso.

<sup>20</sup> Osoloso see tou teli odoo hamameedee oso sibilesos egeesee takaso, ‘Wiligi odoo, nee molee hagoso. Nayo amapoo teneme, todilesos dugosos tiadolosos mada magooso.

<sup>21</sup> Bei, no diya kitulugu odoo. Esiga a nobolo diya ebiasos. Osoloso nayo kitulugu maga odoo abosos bi ma ee telisos. Osoloso odoo abosos nei segei nayo gebiselisos,’ diso.

<sup>22</sup> Esemee o wiligi odoo taba oso yimapoo egeesee takaso, ‘No tou tokenee teli odoo. Esiga no to egeesee taka goo omaga, ayo nee goo midileisos. Bei, nayo takolone a diya kitulugu odoo diso. Osoloso nayo amapoo takolone ayo kitulugu maga odoo abosos bi ma ee telisos diso.

**19:8:** Exo 22:1; Num 5:6-7    **19:9:** Diye 16:31; Luka 13:16    **19:10:** Luka 15:4-5; Yon 3:17; 1Tim 1:15    \* **19:12-13:** *Molee ko mina* deli hagee molee toowa. Esiga tou teli odoo oso tou tomo dimelesos biame 100 tugodoga, eyo nei molee ko mina deli hedebe telisos.    **19:17:** Luka 16:10

Osoloso odoo aboso nei segei nayo wulo gebiseliso.

<sup>23</sup> Egeesi ma kulodu bei kasi maga molee toowa palame molee gibadeli odoowo mosopoo magelega ka poo-goowo, ayo see wedi sibilesi molee toowa poloso mologa ka talai?’ diso.

<sup>24</sup> Yo egeese badolone odoo koola omapoo tebidi mapoo egeese takaso, ‘Niba yimapoo molee ko mina deli egee molo toloso see molee ko mina deli 10 too odoo mapoo tenee,’ diso.

<sup>25</sup> Esem diayo yimapoo egeese takaso, ‘Wiligi odoo, no ege, yo molee ko mina deli 10 olo toloso badoso,’ diso.

<sup>26</sup> Esino wiligi odoo oso dimapoo egeese takaso, ‘Ayo nimapoo taka, odoo agayo dimapoo bi tenee ee medee gibadoga, dimapoo see bei tenelaiso. Esino odoo agayo dimapoo tenee bi ee medee gibadelega poogooga, dimapoo bi pepuso abo egee molo toloso peegoo todileiso.

<sup>27</sup> Osoloso odoo agayo ayo diba gibadalame seme amapoo gowe, diba hamapoo iyado sibilesi mo howo woola piligi,’ diso.”

*Yesuye Yelusalem mi mapoo wiligi odoo masi toboloso gadi*

*(Mat 21:1-11; Maka 11:1-11; Yon 12:12-19)*

<sup>28</sup> Yesuye to taka hagee koodobuloso see Yelusalem mapoo dimeleeso.

<sup>29</sup> Yo Olipi mubi kuli mapoo mosodei bakadio, Betapage osoloso Betani koola mapoo peledabaso. Osoloso o hamamee dili odoo bakadio diye dolone dimapoo egeese takaso,

<sup>30</sup> “Mosodei koogee mapoo dileso omapoo ogoga, be hu gie kauwa donki edebeeyo wagi ma dokodoo buloso dilega poogoo ee, o mu mapoo ebigiso bagagoloso, omou mapoo bagagoo moloso. Esiga be ee niyo ebigi pidi poogoloso, hapoo hado sibe.

<sup>31</sup> Egeeseega odoo heeso sibilesi nimapoo takolone, ‘Bei kasalame be hu donki ebigi ka pidibagala’, dee takooga, niyo yimapoo to nei egeese takee, ‘Lodeeye be hagee talai goomogona,’ dee takee,” diso.

<sup>32</sup> Esem o hamamee dili odoo oso Yesuye taka to ee duloso mi omapoo diyadeeso. Diba dileso egeino, goo susuga Yesuye taka to sabolo tobuloso molome egeiso.

<sup>33</sup> Esem diba donki be hu ee ebigi pidimeleeno, be eyo amameeye dimapoo egeese takaso, “Niba kasalame be ebigi ka pidibagala?” diso.

<sup>34</sup> Esem nei diayo dimapoo egeese takaso, “Lodeeye be hagee talai goomogona,” diso.

<sup>35</sup> Esem diayo donki be ee Yesu mapoo hado simiso. Osoloso dibada kekeisili dugo tigadoloso donki be eyo wagi ma dokodoo maloso, Yesu dee mapoo toloso dokodoo bediso.

<sup>36</sup> Yo be ma dokodoo buloso dumolome, odoo susuga oso dibada kekeisu dugo susuga tigadoloso yayo dilei eli mapoo poomo diso.

<sup>37</sup> Osoloso Yesuye Olipi mubi ma dokodooga Yelusalem mapoo moumolome, o hamamee dedeli odoo susuga oso yayo goo opusomo di moodoomo silee goo maga Godee mapoo goomoga neligidi poudoomo mouso.

<sup>38</sup> Egeeseelone diayo egeese takaga meleeso,

“Wiligi odoo taba ee Godeeyo hu maga kitulugu sabolo egee sibo o hu dokodoo poude!

Osoloso Kei mi ma dokodoo mesie goo oso mele dee!

Osoloso Kei mi ma dokodoo badeli Godee mapoo goomoga poude!” dee takolone debeiso.

<sup>39</sup> Esino mooloogoodoo toowa ee ma kulodu Pelisi odoo abo omapoo debeiso. Diayo Yesu mapoo egeese takaso, “Eligili odoo, no nee hamamee dedeli odoo diba to koodobilame dimapoo to kitulugu sabolo takee,” diso.

<sup>40</sup> Esememe Yesuye nei dimapoo egeesee takaso, “Ayo nimapoo taka, odo hagee bia oso to mauwe duga, nei yo susuga hagoso to neligidi kesalaiso,” diso.

*Yesuye Yelusalem mi ogoloso pisa*

<sup>41</sup> Yesu Yelusalem koola mapoo dulone, Yelusalem mi ee malalo molo ogoloso pusulone egeesee takaso,

<sup>42</sup> “Yelusalem odo, niba kaseeyo? A diya goomogo, epedee niyo mesie goo toloso sibilei goo ono diya gooleedalame. Esino niba goo hagee medee ogoloso koo gooleedo. Bei, mesie goo ee nimaga mada magoo moloso.

<sup>43</sup> Esiga nimapoo ha teli odo oso nee mi beele pe mago sulo doboloso mi kukaloso omaga peleso mi edebeeyo bia ee ma kulodu gadilei biame oso nimapoo sibileiso.

<sup>44</sup> Osoloso diayo nibada moso guobuguloso odo susuga piligileiso. Osoloso nibada mi guobugu ee ma kulodu yo heeso yo hee ma tobudoo molo agalaime. Esiga goo hageesi oso nimapoo peledabalaiso. Bei, Godeeye niba pidilame simi ee niyo medee ogoloso koo gooleedo.”

*Yesuye Yu odoowo tei moso mapoo pala*

(*Mat 21:12-17; Maka 11:15-19; Yon 2:13-22*)

<sup>45</sup> Yesu Yelusalem mi mapoo gadileso Yu odoowo tei moso mapoo palaso. Yo moso ee ma kulodu gapeleso tobudulone egeino, odo susuga oso bi odo abo mapoo tenelo nei ka to domolome egeiso. Esememe yayo bi eyo ama dio susuga moso ee ma kuloduga peegoo hasiso bugulone egeesee takomo sileeso,

<sup>46</sup> “Niba goolee, Godeeyo to booka mapoo hogugu oso egeesee takooso, ‘Mo tei moso ee howo gisili moso oso,’ diso. Esino niyo Godeeyo moso hagee heli teli odo oso mada debeli moso paso,” diso.

<sup>47</sup> Yesu Yelusalem mi mapoo dileso badolone biame susuga Yu odoowo

tei moso ma gapeleso odo susuga mapoo Godeeyo to eligimeleeso. Esememe tei moso wiligi odo tebisa sabolo, osoloso tei eligili odo sabolo, osoloso Yu odoowo wiligi odo tebisa oso Yesu wooloomalame eli esiamo silesibiso.

<sup>48</sup> Esino diba Yesu wooloomalai eli egele. Bei, odo susuga oso Yesuye eligi goo ee hodu dileso diya goomoga sabolo duliso.

## 20

*Yesuye kitulugu maga woosa  
(Mat 21:23-27; Maka 11:27-33)*

<sup>1</sup> Biame hee mapoo Yesu Yu odoowo tei moso mapoo peleso odo susuga mapoo Godeeyo to eligimolome, tei moso wiligi odo tebisa sabolo, osoloso tei eligili odo sabolo, osoloso Yu odoowo wiligi odo oso Yesu mapoo sibilesi egeesee takaso,

<sup>2</sup> “No ogoso kitulugu maga goo hagee ka moodoomo silala? Odo agayo namapoo kitulugu hagee ka teneeyo?” diso.

<sup>3</sup> Esememe Yesuye dimapoo nei egeesee takaso, “Ayo woosali to hedebe nimapoo woosalaiso. Esiga niyo amapoo takee,

<sup>4</sup> Odo howo olugumo silame Yonee mapoo kitulugu odo agayo ka teneeyo? Godeeye teneeyo, o, edebeeyo teneeyo?” diso.

<sup>5</sup> Esememe diayo to hagee duloso, dieso nediliyo dima kulodu to moulone egeesee takaso, “Iyo kasee takalaiyo? Iyo Godee maga simi dee takooga, yayo imapoo egeesee takalaiso, ‘Bei kasi maga niyo Yoneeyo to mapoo tei telega ka poogoowo?’ dee takalaiso.

<sup>6</sup> Osoloso iyo see yayo kitulugu ee edebeeyo teneedo, dee takooga, see odo susuga oso imapoo komonolone iba wooloomalame yoso enigileiso. Bei, odo susuga oso Yonee yo tei Godee maga to toloso kokodo takomo sili odoowo, dee gweliso,” diso.



<sup>7</sup> Egeeseelone diayo nei Yesu mapoo egeese takaso, “Yoneeye kitulugu too eyo bei, iba gooleedele,” diso.

<sup>8</sup> Esemé Yesuye dimapoo egeese takaso, “Esiga ayo kitulugu tomo hagee sulo goo ee nimapoo takalaime,” diso.

*Tou tokenee gibadeli odoo eyo goo maga wudu taka*  
(Mat 21:33-46; Maka 12:1-12)

<sup>9</sup> Osoloso Yesuye see wudu taka hamaga odoo mapoo egeese takaso, “Biame heeso odoo hee o homolee ma kulodu geleipi howo segeiso. Yo geleipi howo sogoloso eyo nei odoo abo maga nei tamalame dimapoo bameleeye doloso, yo mi hee eli sage mapoo badalame diso.

<sup>10</sup> Yo omapoo dileso badoboome, homokokoso bi moodolai biame oso simiso. Osoloso yayo o tou teli odoo hee mapoo o homolee mapoo dileso homokoko abo diayo goolooga ee tala dileso tosibeye diso. Esino omapoo dileso peledoboome, homolee gibadeli odoo oso yo woomele poogoloso bi mauwe see wedi di diso.

<sup>11</sup> Egeese ogoloso amameeye tou teli odoo hee diye diso. Esino gibadeli odoo oso odoo hagee sabolo woolone yimapoo ebili goo teneloso bi mauwe see wedi diye diso.

<sup>12</sup> Esemé amameeye see tobu o tou teli odoo hee diye diso. Esino yinosee gibadeli odoo oso woomele poogoloso peegoo habuguso.

<sup>13</sup> Egeese see ogoloso amameeye eyo egeese gooleeso, ‘Ayo ogoo goo moodolaiyo? A see mo holo ayo gooma diye dalaiso. Egeese seega diayo o to mapoo mesilei malaiso,’ diso.

<sup>14</sup> Esino homolee gibadeli odoo oso homolee eyo amayo owoloye simi ogoloso dieso nediliyo egeese takaga meleeso, ‘Holo hagoso ama toga,

amamo bi gilibo susuga ee yayo talaiso. Esiga yo wooloomaloso homolee hagee iyo tomo,’ dee takaga meleeso.

<sup>15</sup> Egeeseelone diayo holo egee homolee peegoo ido dileso wooloomaso.”

Yesuye to hagee taka koodobuloso badolone o to dulone debei odoo mapoo egeese takaso, “Homolee eyo amameeye homolee gibadeli odoo mapoo ogoo goo moodolaiyo?

<sup>16</sup> Yo sibilesi diba piliguloso see odoo dia toloso o homolee gidebeeye dalaiso,” diso.

Esemé odoo susuga Yesuwo to dulone debei oso egeese takaso, “Goo hageesi oso peledabalai tekeponee,” dee takaga meleeso.

<sup>17</sup> Esino Yesuye dimapoo bolone egeese takaso, “Esino bei kasalame Godeeyo to booka mapoo hogugu oso egeese ka takoosomo?

‘Moso tegeli odooso omou gowoolone togobugu

oso see moso omu domo pupodoo ka moloso.’

<sup>18</sup> Esiga odoo agayo omou omapoo takodee buguloso homodobuoga, yo dala toowa talaiso. Osoloso omou oso odoo hee bulugu magooga, odoo ee ebidi bigileiso,” diso.

<sup>19</sup> Esemé tei eligili odoo sabolo osoloso tei moso wiligi odoo tebisa sabolo oso Yesuye wudu taka hagee gooleedoloso takolone, “Ibada goo ee takoo,” doloso, yo omapoo talame eli esiaso. Esino diba odoo mooloo-goodoo toowa ogoloso Yesu talai ebigasoo.

*Sisa mapoo tekisi molee tenelai goo*

(Mat 22:15-22; Maka 12:13-17)

<sup>20</sup> Egeesi ma kulodu tei eligili odoo sabolo, osoloso tei moso wiligi odoo tebisa sabolo oso Yesu wooloomalame eli esilone, diayo eli kweli odoo abo diye dolone egeese takaso, “Niba dileso gamenee odoo tekepo masi silesibulone, yimapoo woosali to oso woosamo silesibe. Egeesi ma

kulodu Yesuye nei to tokenee kasee takooga, iyo yo tolosa gamalee wiligi odo mapoo tenelaiya,” diso.

<sup>21</sup> Esem diayo Yesu mapoo dileso to hodolone egeese takaso, “Eligili odo, iba gooleedooso, nayo eligi ma kulodu no hedebe tekepo goo ono eligili. Osoloso no odo su mapoo koo egeli. Esino no tei Godeeyo goo ono ka eligimo sili.

<sup>22</sup> Esiga Loum gamalee wiligi odo Sisa mapoo tekisi molee tenelai tekepowo, o, tokeneeyo?” diso.

<sup>23</sup> Esino diayo Yesu yimapoo gamenee takalame si gooleedoloso dimapoo egeese takaso,

<sup>24</sup> “Amapoo molee ko hee eligi,” diso. Osoloso yayo molee ko tolosa tobudulone egeese takaso, “Molee hamapoo agamo mudu sabolo osoloso agamo hu sabolo mololo?” diso.

<sup>25</sup> Esem diayo nei yimapoo egeese takaso, “Sisayo mudu sabolo, osoloso o hu sabolo oso ka molo,” diso.

Esem Yesuye tobudulone dimapoo egeese takaso, “Niba Sisayo bi ee Sisa mapoo tenee, osoloso Godeeyo bi ee Godee mapoo tenee,” diso.

<sup>26</sup> Esem diayo Yesuye to nei tekepo taka duloso diya howogadolone to abo takele poogooso. Egeesi ma kulodu Yesuye odo howo woola to tokenee takel-ega poogoome, diayo yo talai eli egele poogooso.

*Ta maga see hogabili eyo goo maga Yesu mapoo woosa*

*(Mat 22:23-33; Maka 12:18-27)*

<sup>27</sup> Osoloso Sedisi odo aboso Yesuye badebei mapoo sibadeeso. Odo hagee biaso takolone odo wedia see hogogabileime deliso. Esem diayo sibilesa Yesu mapoo egeese takaso,

<sup>28</sup> “Eligili odo, Moseseeye imapoo kokodo takolone egeese hoguguso, ‘Gisoso sobo huloso holo soomagelega toga, see omoloye emei ta eyo

osobo bau huloso emeiyo hu maga holo soolooga magee,’ diso.

<sup>29</sup> Esiga odo heeso giso holo 7 soomagooso. Osoloso daga emeiye sobo huso. Osoloso yo holo soomagelega taso.

<sup>30</sup> Osoloso omoloye emei ta eyo osobo bau huso. Esino holo soomagel-ega taso.

<sup>31</sup> Osoloso omolo hee domo oso bau see huloso, holo soomagelega taso. Egeese semelee ososee omolo dio 7 susuga holo soolooga magelega wediaso.

<sup>32</sup> Osoloso hamameedee sobo bau yinosee taso.

<sup>33</sup> Esiga odo wedia maga see hogogadilei biame mapoo sobo egee tei odo agamo osobo dalaisomo? Bei, giso 7 oso sobo hedebe hagee huso,” diso.

<sup>34</sup> Esino Yesuye to nei dimapoo egeese takaso, “Epedee hagee do biame omapoo gisoso sobo huya, osoloso soboso giso obuo dolone ka doso.

<sup>35</sup> Esino Godeeye hesiga odo oso wedia maga hogabuloso daga, diba see giso sabolo sobo sabolo huleime.

<sup>36</sup> Bei, diba Godeeyo momaiye masi dobolone see wedileime. Osoloso diba Godeeyo owolo dio doloso dabalaiso. Bei, diba wedia maga hogogadi goo oso ka eligiso.

<sup>37</sup> Esiga Moseseeye daga hoogoo edebeeyo wedia maga hogogabilei goo ee o booka mapoo hoguguso. Bei, yayo homo du douso namolome, ogoloso goo ee hogugulone egeese takaso, ‘Lodee yo Eibalaham, Aisek, osoloso Yekob dibada Godeeso,’ diso.

<sup>38</sup> Esiga Godee hagee wedia odo dia Godeenee. Haye, odo gie egee do dia Godee. Bei, Godeeyo howo woola odo susuga gie doso.”

<sup>39</sup> Esem tei eligili odo abo oso Yesu mapoo nei egeese takaso, “Eligili odo, nayo egee takoo tekepo,” diso.

<sup>40</sup> Esem ee ma kulodu odo susuga oso see Yesu mapoo woosalai ebiaso.

*Keliso agamo owolowo?*

*(Mat 22:41-46; Maka 12:35-37)*

<sup>41</sup> Osoloso Yesuye see odoo susuga mapoo woosali to hagee takaso, “Bei kasi maga odoo aboso takolone Keliso ee Deibidiyo amawe dee ka take-liyo?”

<sup>42</sup> Esino Deibidi eyo Sam booka ma kulodu egeesee takaso, ‘Godeeye mo Lodee mapoo egeesee takaso:

No abolo wiligi doloso badalame mo dee deedee dokolo bie.

<sup>43</sup> Esiga nayo badolone namapoo ha teli odoo ee ayo dagadileiso.’

<sup>44</sup> Esiga Deibidiye Keliso o Lodee diso. Esino kasi maga Keliso ee Deibidiyo amawe dee ka takalaiyo?” diso.

*Yesuye tei eligili odoo eyo goo taka*  
*(Mat 23:1-36; Maka 12:38-40)*

<sup>45</sup> Odoo susuga oso to dulone osee doboome, Yesuye o hamamee dili odoo mapoo egeesee takaso,

<sup>46</sup> “Niba obeeyamo! Niyo tei eligili odoo mapoo medee ege. Diba dugo medee tekepo megigaloso silesibiliso, osoloso bi neiso teli mi mapoo debeli odoo oso diba ogoloso gauwuloso emegei di to takooga ee dulei onosee diya goomegeliso. Osoloso diba howo gisili moso ma kulodu wiligi odoo taba eyo debi mapoo bulumulame, osoloso wo toowa nolone odoo hu toowa too oso bili mapoo bulumulame goomegeliso.

<sup>47</sup> Esino diayo sobo bauwe ebilame gamenee takoloso, dia moso sabolo bi sabolo diayo toloso omapoo dobolone, dia goo gagaloso Godee mapoo taka diya sageliso, odoo aboso diba tekepo odoo dee goolame. Esiga goo egeesi maga diba nei dala toowa talaiso.”

## 21

*Sobo bauso emegei di bi tenee*  
*(Maka 12:41-44)*

<sup>1</sup> Yesu tei moso mapoo osee badolone egeino, bi bei odoo oso

emegei di molee tooseli ki bi oso moodoo mapoo soomolome egeiso.

<sup>2</sup> Osoloso biame omapoo sobo bau bi mauwe oso molee ko ta bakadio tosibilesa toosome egeiso.

<sup>3</sup> Esemee Yesuye goo hagee ogoloso egeesee takaso, “Ayo nimapoo taka, sobo bau bi mauwe hagosu tenee oso bi bei odoo oso tenee ee dagadiso.

<sup>4</sup> Bei, bi bei odoo dia molee toowa osee molome molee su pepooko teneeso. Esino sobo bau bi mauwe hagee yimapoo molee ko esiesibo meleeno teneeso. Esiga yo wo talai molee olo mauwe,” diso.

*Yesuye tei moso guobigilei goo sabolo osoloso mi hoo poogoo mapoo gooso peledabalai goo ee taka*  
*(Mat 24:1-14; Maka 13:1-13)*

<sup>5</sup> Biame omapoo odoo aboso tei moso yo tekeposo tegei sabolo osoloso odoo susuga oso Godee mapoo tenee bi tei moso ma kulodu ma molome ogoloso tekepo dee takaga meleeso. Esino Yesuye diayo takaga melee to ee duloso dimapoo egeesee takaso,

<sup>6</sup> “Niyo epedee moso sabolo osoloso bi sabolo ogoloso tekepo dee takemeni, ee hamamee guobigileiso. Egeesi ma kulodu yo heeso hee ma tobudoo malaime. Esino moso guobuguga, yo susuga oso mi mapoo misigeduboloso molo agalaiso,” diso.

<sup>7</sup> Esemee odoo aboso yimapoo egeesee takaso, “Eligili odoo, goo hagee kopolone ka peledabalaiyo? Osoloso goo hagosu peledabalame mologa, ogoo gooso imapoo ka eligileiyo?” diso.

<sup>8</sup> Esino Yesuye see dimapoo egeesee takaso, “Niba obeeyamo! Odoo heeso niba tei goo maga see peegoo gilimado diyaga. Bei, odoo aboso sibilesa gamenee takolone ayo diba diye di, dee takolone dieso nediliyo diba Kelisoso dalaiso. Egeesee lone diayo takolone Godeeye biame olo simiso dee takooga, dia too duloso omapoo tei na te.

<sup>9</sup> Esiga ha too goo sabolo osoloso galali goo sabolo oso peledoboomo duga, duloso niba haga na ebi. Bei, goo hageesi oso malalo peledabalaiso. Esino ee ma kulodu biame hamameedee saga sibileime.”

<sup>10</sup> Osoloso Yesuye see tobu dimapoo egeesee takaso, “Mi toowa heeso mi toowa hee mapoo ha talaiso.

<sup>11</sup> Osoloso biame omapoo mi abo mapoo mibia toowa sibileiso, osoloso hodia goo sibileiso. Osoloso paiye opusomo opusomo di oso mi abo mapoo sibileiso. Egeesee semelee mapoo goo opusomo di oso kei ma dokodoo peledaba ogoloso odoo susuga oso diya ebigileiso.

<sup>12</sup> Esino goo hagoso epedee peledobelega mologa, niyo mo goo maga dala toowa talaiso. Egeesi ma kulodu odoo susuga oso nibada goo midilame dibada howo gisili moso mapoo ido polo dolone dabalaiso. Osoloso diayo niba neliga moso mapoo huyaso dolone dabalaiso. Osoloso see diayo mo goo maga niba gamalee wiligi odoo toowa tebisa mapoo gilmado peleso nibada goo midileiso.

<sup>13</sup> Esino domo egee niyo mo goo ee dimapoo yilige bigilei biame tekepo ogoso.

<sup>14</sup> Esiga niba goo medee goolee. Bei, odoo susuga oso niba goo midilei mapoo ido duga, niyo to takalai goo mapoo haga na koude.

<sup>15</sup> Bei, domo omapoo ayo nimapoo goo goolee tekepo sabolo osoloso to tekepo takalai goo sabolo tenelaiso, nimapoo goweli odoo oso nibada to ee duloso to nei takelega pagalame.

<sup>16</sup> Osoloso biame omapoo nibada ama dio sabolo, osoloso noowee dio sabolo, osoloso nemei dio sabolo, osoloso nomolo dio sabolo, osoloso nee soosoo sabolo, osoloso nemegei odoo sabolo oso nimapoo dala teneli odoo mapoo tiasalaiso. Osoloso diayo nima kulodu odoo abo piligileiso.

<sup>17</sup> Esiga odoo susuga oso mo goo maga nimapoo heiga toowa malaiso.

<sup>18</sup> Esino goo hagoso niba Godee maga pileime.

<sup>19</sup> Esiga medee kibiya debree. Niba kibiya dogo, gie badeli talaiso.”

*Yesuye Yelusalem mi oso tokenee palai goo ee taka*

*(Mat 24:15-21; Maka 13:14-19)*

<sup>20</sup> “Esiga niba Yelusalem mi ee ha teli odoo oso moso silodoboloso tebisamelee ogoga, Yelusalem mi ee olo tokenee palame ka seeso doloso ogoloso niba gooleedalaiso.

<sup>21</sup> Egeeseega biame omapoo Yudiya mi mapoo debeli niba mubi dokodoo kukulo pele. Osoloso edebeeyo biame omapoo Yelusalem mi ma kulodu osee dogo, diba onosee saga kukulo di. Osoloso odoo agayo biame omapoo Yelusalem mi peegoo dogo, diba mi ee ma kulodu na gadi.

<sup>22</sup> Bei, biame omapoo Godeeyo to booka mapoo hogugu goo sabolo tubulone, nei dala tenelame ka selai.

<sup>23</sup> Osoloso biame omapoo sobo koowasi sabolo osoloso holope too nedili sobo oso dala toowa agalaiso. Bei, biame omapoo Godeeyo kamana goo oso siboga, goohele toowa sabolo osoloso dala toowa sabolo mi hamapoo sibileiso.

<sup>24</sup> Ee ma kulodu odoo abo ee ha teli odoo oso kaiyaso piligileiso. Osoloso odoo abo ee tiso tegisaloso tou nei mauwe talame mi abo mapoo iyado du dolone dabalaiso. Osoloso biame omapoo Yelusalem ee Yu odoonee oso gagalabuguloso homoso abalaiso. Diba osee tebisa mologa, diayo goo egeesee semelee oso hoo pagalai Godeeye biame ee tenelaiso.”

*Odoo Holo oso sibilei goo*

*(Mat 24:29-35; Maka 13:24-31)*

<sup>25</sup> “Esiga goo opusomo di oso oko mapoo, osoloso a mapoo, osoloso giwo mapoo peledabalaiso. Osoloso mi toowa hamapoo abei maga howo ki toowa oso goowa duleiso.



Egeeseega odoo susuga oso dimapoo ogoo goo oso peledaba beleso obulone goo tiadalaiso.

<sup>26</sup> Osoloso kei ma dokodoo kitulugu hi egee molo ee Godeeye halabigileiso. Egeeseega odoo susuga oso dimapoo ogoo goo oso peledaba beleso obugulone hoowama dalaiso.

<sup>27</sup> Esiga biame omapoo Odo Holo ayo kitulugu sabolo osoloso ayo toowa doloso badeli goo omaga mo gadeebugu sabolo osoloso kolobo sabolo siboga agalaiso.

<sup>28</sup> Esiga niba goo susuga hagosu bei mooloogoo ogoga, ebilega toboloso bolone ka debee. Bei, Godeeye niba gilimado dilei biame ee koola too-booso.”

#### *Sogai maga wudu taka*

*(Mat 24:32-35; Maka 13:28-31)*

<sup>29</sup> Yesuye see goo hamapoo wudu taka hamaga egeese takaso, “Niba sogai ogoloso homo abo mapoo egege.

<sup>30</sup> Sogai du pisigaga ogoloso, wau biame koola tooboo doloso gooleedeliso.

<sup>31</sup> Esiga hagonosee egeesi masi moloso. Niba goo ayo taka hagosu peledaba ogoga, Godeeye wiligi doloso badeli goo oso sibilei koola tooboo doloso gooleedalaiso.

<sup>32</sup> Ayo nimapoo taka, odoo biame omapoo dabalai ee osee dogo, goo susuga hagosu peledabalaiso.

<sup>33</sup> Esiga kei sabolo osoloso mi toowa sabolo mauwe pagalaiso. Esino mo to ee mauwe pagalaime.”

#### *Niso nediliyo medee be*

<sup>34</sup> “Esiga niba niso nediliyo medee be. Osoloso niba wo sabolo howo sabolo nolone dobolone mi toowa eyo goo mapoo haga na goolee. Bei, ti gama mapoo beso gaduga, tiso be egee bagagooga egee dio du egeesi masi ayo sibilei biame oso nimapoo dio di egeesi masi tenelai malaiso.

<sup>35</sup> Bei, biame ogoso odoo susuga mi toowa hamapoo egee do mapoo sibileiso.

<sup>36</sup> Esiga niba niso nediliyo medee bolone Godee mapoo takolone ka de-bee, niba biame oso peledabalai ee ma kuloduga kitulugu sabolo peegoo ka gadilame. Osoloso Odo Holo mo mudugiyopoo kitulugu sabolo dabalame.”

<sup>37</sup> Yesu biame susuga Yu odoowo tei moso mapoo peleso odoo susuga mapoo Godeeyo to eligimeleso koodobuloso, see tilame gesi Olipi mubi mapoo polo demeleeso.

<sup>38</sup> Esem odo susuga oso Yesuye eligi goo ee dulame gesikolodee tei moso mapoo sibilesu mooloogoo deliso.

## 22

### *Yudaseeye Yesu wiligi odoo tebisa mapoo tiasalame to magoo*

*(Mat 26:14-16; Maka 14:10-11)*

<sup>1</sup> Isipi mi maga peegoo di ee gooleebugu wo nalai biame ee koola tabaso. Wo nali hagee Yu odooso takolone Godeeye gababia wo nali deliso.

<sup>2</sup> Biame omapoo tei moso wiligi odoo tebisa sabolo osoloso tei eligili odoo sabolo oso odoo mooloogoodoo toowa ogoloso obugulone, mada Yesu wooloomalame eli esiaso.

<sup>3</sup> Biame omapoo Saitenso Yudas-Iskaliyot eyo kulodu gapalaso. Yudas hagee Yesuwo hamamee dili odoo 12 ma kulodu odoo hee yoso.

<sup>4</sup> Esiga Yudaseeye tei moso wiligi odoo tebisa sabolo osoloso tei moso pee mapoo gidebeli dia wiligi odoo tebisa mapoo dileso, yayo Yesu toloso dimapoo tenelame dibolo to mouso.

<sup>5</sup> Esem diayo goo hagee duloso tekepo doloso goomogolone Yudas mapoo molee tenelame takaso.

<sup>6</sup> Esem Yudaseeye yibolosee goo hamapoo tekepo dolone mada Yesu toloso dimapoo tenelame eli esiaso.

### *Godeeye gababia wo nalame mopoodoo doo*

*(Mat 26:17-25; Maka 14:12-21; Yon 13:21-30)*

<sup>7</sup> Isipi mi maga peegoo di goolee-  
bugu wo ne bei mooloogoo biame  
mapoo, Yu odooso Godeeye gababia  
wo nalame, sipi be hu weliso.

<sup>8</sup> Esemé Yesuye see Pita dio Yonee  
dio mapoo egeesee takaso, “Niba  
dilesó iyo gababia wo nalai ee  
mopoodoo dalame di,” diso.

<sup>9</sup> Esemé diayo nei yimapoo egeesee  
takaso, “Iyo kamapoo dilesó wo  
nalai ee ka mopoodoo dalaiyo?”  
diso.

<sup>10-11</sup> Esemé Yesuye dimapoo nei  
egeesee takaso, “Niba Yelusalem  
mapoo gadi. Niba omapoo gadilesó  
ogoga, odoó hee howo keedolosó  
dumologa tugodalaisó. Niba yo  
tugodolosó yo deedeé di. Niba  
yayo dilesó mosó kulodu gaduga  
omapoo dobolone, mosowo ama  
mapoo egeesee takee, ‘Eligili odoó  
oso o hamamee dili odoó saboló  
Godeeye gababia wo nalai debi ee  
kasomó?’ dee takee.

<sup>12</sup> Egeeseega yayo mosó doko-  
hodoo debi pooba toowa nimapoo  
eligileiso. Egeeseega niba iyo Gode-  
eye gababia wo nalai omapoo ka  
mopoodoo de,” diso.

<sup>13</sup> Esemé Pita dio Yonee dio to  
hagee duloso dilesó egeino, goo  
susuga ee Yesuye taka goo saboló  
tobulosó molome egeiso. Esemé  
diba gababia wo nalame omapoo  
mopoodoo dooso.

*Lodee gooleebugu wo ne*

(*Mat 26:26-29; Maka 14:22-25;*  
*1Kol 11:23-25)*

<sup>14</sup> Esemé diayo wo nalai biame ee  
sibume, Yesuye o hamamee dili odoó  
saboló wo nalame bulumasó.

<sup>15</sup> Yesu badolone o hamamee  
dili odoó mapoo egeesee takaso,  
“A goomoga toowa saboló bade-  
beiso, ayo dala ma kulodu gadi-  
lega badolone, ayo niboló Godeeye  
gababia wo nalai.

<sup>16</sup> Bei, ayo nimapoo taka, ayo  
Godeeye gababia wo nali hagee  
hamamee see saga nalaimé. Esino  
Godeeye wiligi doloso badeli mi oso

sibulone wo nali hageeyo goo bei  
woola yilige buguga, ayo wo nali  
hagee see nalaisó,” diso.

<sup>17</sup> Esemé Yesuye kapu wain  
i keesoo tolosó Godee mapoo  
goomoga takolosó koodobulosó  
dimapoo tenelone egeesee takaso,  
“Niba kapu wain i keesoo tolosó  
odoo heeso naloso koodobuoga see  
odoo hee mapoo ka teneé domo di.

<sup>18</sup> Bei, ayo nimapoo taka, a epedee  
wain i naloso hamamee see wain i  
saga nalaimé. Esino Godeeye wiligi  
doloso badeli mi oso siboga, ayo see  
wain i ee nalaisó,” diso.

<sup>19</sup> Yesu see wo tolosó Godee mapoo  
goomoga takolosó wo popeiso. Os-  
olosó o hamamee dili odoó mapoo  
pulone egeesee takaso, “Hagee mo  
susó, niba halo ka teneeso. Esiga  
niba a goolee saboló dobolone wo  
hagee nolone ka debee,” diso.

<sup>20</sup> Diba wo naloso koodobulosó  
Yesu see kapu wain i keesoo tolosó  
Godee mapoo goomoga takaso. Os-  
olosó o hamamee dili odoó mapoo  
tenelone egeesee takaso, “Kapu wain  
i keesoo hagee Godeeye mo sawo  
maga to kitulugu magoo dia hagosó.  
Mo sawo hagosó niba halo ka sologo  
bugusó.

<sup>21</sup> Esino niba ege. A ha teli odoó  
mapoo tiasalai odoó ee mooloo-  
goodoo hageeyo kulodu aboló  
badolone wo namolosó.

<sup>22</sup> Esiga Godeeye to magoo ee  
dodolone Odoó Holo a talaisó. Esino  
Odoó Holo a ha teli odoó mapoo  
tiaseli odoó yo, ye-ee! Bei, odoó yo  
dala talaisó.”

<sup>23</sup> Esemé o hamamee dili oso to  
hagee duloso dieso nediliyo dima  
kulodu egeesee takaga meleeso,  
“Agayo ima kulodu goo hageesi ka  
moodolaiyo?” diso.

*Toowa doloso badalai goo maga  
wegiga*

<sup>24</sup> Esemé Yesu o hamamee dili  
odoo oso dieso nediliyo dima ku-  
lodu odoó agayo toowa ka badosomó  
doloso wegigasó.

25 Osoloso Yesuye goo hagee ogoloso dimapoo egeesee takaso, “Yu odoonee dia wiligi odo tebisa oso dima hemi debeli odo ee diayo diya kitulugu sabolo gidebeliso. Esino diba dieso nediliyo odo susuga mapoo takolone diba odo susuga eyo odo deliso.

26 Esino niba nima kulodu egeesee selai tekeponee. Esiga nima kulodu odo agayo toowa ka badosomo? Yo daga malalo eyo nediliyo pepooko doloso badebee. Osoloso nima kulodu odo agayo gibadeli odo masi ka badosomo? Yo tou teli odo masi mesie sabolo tou tolone ka badebee.

27 Niba medee goolee, wo nalame badeli odo sabolo wo pili odo sabolo dima kulodu, odo agayo toowa doloso ka badosomo? Odo ee badolone wo nalame badeli oso toowa doloso ka badoso. Esino nima kulodu a wo pili odo masi badoso.

28 Niba ayo hegi goo ee ma kulodu sileeme, a koo poogoo dili.

29 Esiga mo Mameeye o odo gibadalame kitulugu amapoo tenee egeesi ayo nimapoo tenelaiso.

30 Esiga ayo wiligi doloso badeli mi oso siboga, ee ma kulodu niba abolo hodobo dobolone wo nalaiso. Osoloso niyo wiligi odo oso debeli debi mapoo dobolone Isalael odoowo bala 12 ee gidobolone dia goo ee midileiso,” diso.

*Pitaye Yesu boobado bigilei goo ee Yesuye taka*

*(Mat 26:31-35; Maka 14:27-31; Yon 13:36-38)*

31 Yesu badolone Saimon-Pita mapoo egeesee takaso, “Saimon, Saimon, Saitenso niba tei kibiya beleso kukulo agalame Godee mapoo woosome, Godeeye yimapoo kitulugu olo teneeso, yayo egeesee moodoolame.

32 Esino ayo no halo Godee mapoo dokodoo olo takaso, nayo tei too peegeeyaga. Osoloso nayo amapoo see wedi simi biame mapoo, mo

hamamee dili odo hagee bia oso tei too ma kulodu kibiya dabalame nayo diba pidi,” diso.

33 Esem Pitaye nei yimapoo egeesee takaso, “Lodee, a nobolo neliga moso ma kulodu osoloso teli mapoo dilei mopoodoo doloso ka siloso,” diso.

34 Esem Yesuye Pita mapoo nei egeesee takaso, “Pita, ayo namapoo taka, epei gesi kolokolo takelega mologa, nayo a gooleedele doloso puodalai ee bakadio hedebe dalaiso,” diso.

35 Yesuye see o hamamee dili odo mapoo egeesee takaso, “Ayo daga niyo to tekepo takomo silesibilame diye dolone molee sabolo, osoloso o sabolo, osoloso kali bi abo sabolo toloso na di diso. Esino niba ee ma kulodu silesibulone, hegi goo abo egeisomo?” diso.

Esem diayo nei egeesee takaso, “Haye, egele,” diso.

36 Esem Yesuye see dimapoo egeesee takaso, “Epedee hamapoo nimapoo molee sabolo o sabolo mologa, ee toloso di. Osoloso nimapoo kaiya mauwe daga, nibada kekeisu dugo odo hee mapoo teneloso nei molee toloso kaiya te.

37 Bei, Godeeyo to booka mapoo hogugu oso egeesee takooso, ‘Edebeeyo yo mesiya masi wooloomalaiso,’ diso. Esiga Godeeyo to booka mapoo hogugu oso taka goo oso amapoo peledabalaiso. O, tei takoo, Godeeyo to booka mapoo hogugu oso mo goo maga taka goo susuga oso peledabalame siboso,” diso.

38 Esem o hamamee dili odo oso yimapoo egeesee takaso, “Lodee, no ege. Iba kaiya bakadio moloso,” diso.

Esem Yesuye dimapoo egeesee takaso, “Bige oso,” diso.

*Yesuye Olipi mubi mapoo badolone Godee mapoo taka*  
*(Mat 26:36-46; Maka 14:32-42)*

<sup>39</sup> Yesu goo eyo moodeli egeesee moodoolone Yelusalem maga peegoo dilesu Olipi mubi mapoo palaso. Esememe o hamamee dili odoos yibolo diyadeeso.

<sup>40</sup> Osoloso diba dilesu omapoo dobolone, Yesuye dimapoo egeesee takaso, "Niba Godee mapoo takolone ka debee, goo tokenee mapoo gido duga homodobiyaaga."

<sup>41</sup> Yesu egeesee takoloso dimaga pepooko hoogoo dilesu ebiso miyomoo tugusaloso Godee mapoo takemeleeso.

<sup>42</sup> Yesuye Godee mapoo takolone egeesee takaso, "Ma, no goomogoga, amapoo dala hagee sibo peegoo magee. Esino no goomoga goo ee te, ayo goomoga goo ee na te," diso.

<sup>43</sup> Esememe Godeeyo momaiye oso Kei mi ma dokodooga sibilesu yo pidilone kitulugu teneeso.

<sup>44</sup> Egeesi ma kulodu Yesu dala talame hegi goo oso sibume, yo sooloo habasaga toowa sabolo Godee mapoo diya takaso. Esememe o debiaso sawo masi mi mapoo salagadibaso.

<sup>45</sup> Osoloso yo Godee mapoo taka koodobuloso dilesu egeino, o hamamee dili odoos goo halagameleso tiesamolome egeiso.

<sup>46</sup> Esememe Yesuye dimapoo egeesee takaso, "Niba kaseega ka tiesamalala? Niba hogogabuloso Godee mapoo takolone ka debee, goo tokenee mapoo gido duga homodobiyaaga," diso.

*Odoos susuga oso Yesu wooloomalame ido di*

*(Mat 26:47-56; Maka 14:43-50; Yon 18:3-11)*

<sup>47</sup> Yesu o hamamee dili odoos sabolo to osee komolome, o hamamee dili odoos hee Yudaseeye odoos mooloogoodoo gilimadoloso sibilesu omapoo peledabaso. Esememe Yudaseeye Yesu adalame simiso.

<sup>48</sup> Esino Yesuye yimapoo egeesee takaso, "Yudas, nayo Odoos Holo a ada sabolo ha teli odoos mapoo tiasalame ka sala?" diso.

<sup>49</sup> Esememe Yesu o hamamee dili odoos diayo odoos susuga oso Yesu talame simi ogoloso egeesee takaso, "Lodee, iyo kaiyaso ka biligileiyo?" diso.

<sup>50</sup> Egeeseeme Yesu o hamamee dili odoos heeso tei moso wiligi odoos taba eyo tou teli odoos hee kaiyaso o dulu deedeede dokolo ee kobuguso.

<sup>51</sup> Esino Yesuye o hamamee dili odoos mapoo egeesee takaso, "Omapoo koodobie! Goo egeesee na moodee!" diso. Osoloso Yesuye odoos o dulu mapoo sigime see tekepo paso.

<sup>52</sup> Yesu yo omapoo tobudulone yo talame sibadee, tei moso wiligi odoos tebisa sabolo, tei moso pee maga gidebeli dia wiligi odoos tebisa sabolo, Yu odoowo wiligi odoos tebisa sabolo mapoo egeesee takaso, "Niyo ogoga a mesiya daga a talame, kaiya sabolo wei sabolo toloso ka sibadeeyo?"

<sup>53</sup> Esino niba ayo biame susuga tei moso ma kulodu eligimo sili egeleso. Esino niyo kaseme a omapoo badoboome telega ka poogoowo? Esino epedee hamapoo nibada biame oso olo siboso. Bei, epedee hagee neliga wiligi odoos taba Saiteeneeyo biameso," diso.

*Pitaye Yesuwo goo puodoo*

*(Mat 26:69-75; Maka 14:66-72; Yon 18:15-18, 25-27)*

<sup>54</sup> Osoloso odoos susuga oso Yesu toloso tei moso wiligi odoos taba eyo mosopoo ido diso. Esememe Pitaye hamameedee toboloso deedeede diso.

<sup>55</sup> Yo deedeede dilesu, odoos susuga oso moso pee beelee ma kulodu dou tooloso dou halagamolome, yo dibolo hodobo omapoo badolone dou hameleeso.

<sup>56</sup> Pita omapoo dou holone badoboome, sobo obuo omapoo tou teli oso sibilesu Pita mapoo medee bolone egeesee takaso, "Odoos hagee Yesubolo sili hee yoso," diso.

<sup>57</sup> Esino Pitaye nei egeesee takaso, "Sobo, odoos egee a gooleedele," diso.



<sup>58</sup> Osoloso see hamamee odoo heeso sibilesa yo ogoloso yimapoo egeese takaso, “No Yesubolo sili odoo hee noso,” diso.

Eseme Pitaye nei egeese takaso, “Giso, asonee,” diso.

<sup>59</sup> Osoloso osoko howo hedebe poogoloso hamamee odoo heeso sibilesa to kitulugu sabolo egeese takaso, “Tei takoo, odoo hagee Yesubolo sili hee yoso. Bei, yinosee Gelili odooso,” diso.

<sup>60</sup> Eseme Pitaye nei egeese takaso, “Giso, nayo egee takoo goo ee tei a gooledele,” diso. Pita to osee komolome, kolokolo takaso.

<sup>61</sup> Eseme Lodeeye hamameegoo bidi toboloso Pita mapoo bameleeso. Eseme biame omapoo Yesuye taka to hagee Pitaye gooleebuguso, “No epei gesi kolokolo takelega mologa nayo a gooledele doloso puodalai ee bakadio hedebe dalaiso,” diso.

<sup>62</sup> Egeeseelone yo to hagee gooleebuguloso diya goohelime peegoo gadilesa pisaso.

*Yesu wiligi odoo tebisa oso to mou mapoo ido pala*

*(Mat 26:59-68; Maka 14:55-65; Yon 18:19-24)*

<sup>63</sup> Eseme Yesu yo gidebeli odoo oso yo manolone toloso weiso.

<sup>64</sup> Osoloso diayo o howo dugoso gagaloso wooloso egeese takaso, “Imapoo takee, no odoo agayo wala?” dee takaso.

<sup>65</sup> Egeeseelone to tokenee abo sabolo yimapoo takaso.

<sup>66</sup> Osoloso mi hadobume gesikolodee Yu odoowo wiligi odoo tebisa sabolo, osoloso tei moso wiligi odoo tebisa sabolo, osoloso tei eligili odoo sabolo hodobo mooloogoodooso. Osoloso diayo to moulone debei mapoo Yesu ido palaso.

<sup>67</sup> Eseme diayo dobolone Yesu mapoo egeese takaso, “Nayo imapoo takee, no tei Godeeye hudi magoo Keliso nosomo?” diso.

Eseme Yesuye dimapoo nei egeese takaso, “Ayo nimapoo

takooga, niyo ayo taka goo mapoo tei talaime.

<sup>68</sup> Ayo nimapoo woosaga, niyo amapoo to eyo nei takalaime.

<sup>69</sup> Esino epedee biame hamaga Odoo Holo a Godee kitulugu eyo dee deede dokolo mapoo yibolo wiligi doloso badalame bileiso,” diso.

<sup>70</sup> Eseme odoo susuga oso yimapoo egeese takaso, “Esiga no tei Godeeyo owolowo?” diso.

Eseme Yesuye nei dimapoo egeese takaso, “Niyo a Godeeyo owolo dee egee takoo ee tei goo takoo,” diso.

<sup>71</sup> Eseme diayo egeese takaso, “Esiga iba o goo midilei maga to abo dulei koo goomogo. Bei, yo eyo o goo ee olo yebugulone yo Godeeyo owolo diso. Esiga yo wooloomalai tekepo,” diso.

## 23

*Yesu yo Paillet sabolo osoloso Helodee mapoo ido di*

*(Mat 27:1-2, 11-26; Maka 15:1-15; Yon 18:28-19:16)*

<sup>1</sup> Osoloso wiligi odoo tebisa mooloogoodoo oso tebisaloso Yesu Paillet mapoo ido diso.

<sup>2</sup> Diayo dilesa Paillet mapoo Yesuwo goo maga takolone egeese takaso, “Odo hagosu ibada odoo eli tokenee mapoo gilimado di ogoloso ka too. Bei, yayo ibada odoo oso Sisa mapoo tekisi molee misigeli hamaga takoloso see eyo nediliyo yo wiligi odoo Keliso dee takemeleeso,” diso.

<sup>3</sup> Eseme Pailleteeye Yesu mapoo egeese takaso, “No tei Yu odoo dia wiligi odoowo?” diso.

Eseme Yesuye nei egeese takaso, “O, nayo olo egee takooso,” diso.

<sup>4</sup> Osoloso Pailleteeye Yu odoowo tei moso wiligi odoo tebisa sabolo osoloso odoo abo omapoo mooloogoodoloso debei mapoo egeese takaso, “Ayo yo talaino yimapoo goo tokenee hee koo ogo,” diso.

<sup>5</sup> Esino diba goo egee pagalalai gowoolone to kitulugu sabolo

egeesee takaso, “Edebeeyo Loum gamalee mapoo kamanalame, yayo Yudiya mi toowa mapoo silone odoo goo tiadili goo ee eligimo siliso. Osoloso yayo goo hagee Gelili mi maga bei mooloogooloso see hamapoo sibilesa ka eligimo siloso,” diso.

<sup>6</sup> Osoloso Pailteeyee goo hagee dulosoo, Yesu tei Gelili odoo beleso odoo mapoo woosaso.

<sup>7</sup> Egeesi ma kulodu yayo Yesu tei Gelili odoo dee taka goo ee dulosoo, Yesu Helodee mapoo ido di diso. Bei, Helodeeye Gelili mi mapoo wiligi odoo toboloso ka badebei. Biame omapoo Helodee Yelusalem mapoo sibilesa badebeiso.

<sup>8</sup> Ee ma kulodu Helodeeye Yesu ogoloso diya goomogaso. Bei, yo Yesuwo goo epedee eiyo dumelega, yo agalai goomegeliso. Osoloso Yesuye goo opusomo di o mudugiyo moodoolame diya goomogaso.

<sup>9</sup> Esem Helodeeye Yesu mapoo woosali to bei woosagaso. Esino ee ma kulodu Yesuye yimapoo to nei hee takele.

<sup>10</sup> Osoloso biame omapoo tei moso wiligi odoo tebisa sabolo osoloso tei eligili odoo tebisa sabolo oso to kitulugu sabolo takolone Yesu mapoo gigidiso.

<sup>11</sup> Esem Helodeeye o odoo sabolo Yesu manolone wiligi odooso kali dugo kadiso. Osoloso yo Paillet mapoo see ido di diso.

<sup>12</sup> Biame domo omapoo Paillet dio Helodee dio emegei diso. Esino daga debei ee ma kulodu dieso nediliyo nei heigo nei heigo dolone debeiso.

<sup>13</sup> Esem Yesu Paillet mapoo see ido di ogoloso, Pailteeyee tei moso wiligi odoo tebisa sabolo osoloso Yu odoowo wiligi odoo tebisa sabolo osoloso odoo susuga gilimadoloso egeesee takaso,

<sup>14</sup> “Niyo odoo hagoso Yu odoo oso Loum gamalee mapoo kamanalame, odoo goo tiadili goo ee eligimo silo doloso, amapoo ka ido simi. Esino

ayo nibada mudugiyo o goo midino, yimapoo goo tokenee hee molo egele.

<sup>15</sup> Osoloso Helodee nosee Yesu mapoo goo tokenee hee molo egele. Egeeseeme yayo yo see imapoo ido sibe dee takaso. Esiga niso ogoso, odoo hagee wooloomalai yimapoo goo tokenee hee mauwe.

<sup>16</sup> Esiga ayo yo wulo woomele poogoloso diye dalaiso.”

[  
<sup>17</sup> Esino Pailteeyee Yu odoo oso goomogalame diayo Godeeye gababia wo nali biame mapoo odoo hee neliga moso ma kuloduga peegoo diye deliso.]

<sup>18</sup> Osoloso odoo susuga oso to neligidi egeesee takaso, “Yesu wooloomolone, nei Balabas neliga moso ma kuloduga peegoo diye dee!” dee takaga meleeso.

<sup>19</sup> Balabas hagoso daga Loum gamalee mapoo ha temeleso odoo hee wooloomaso. Egeeseega yo neliga moso ma kulodu husooso.

<sup>20</sup> Pailteeyee Yesu peegoo tamagalame diya goomogolone, see tobu odoo mooloogoodoo mapoo woosaso.

<sup>21</sup> Esino odoo susuga oso to neligidi yimapoo nei egeesee takaso, “Yo homo bulubo magoo ma dokodoo yoguso enige! Yo homo bulubo magoo ma dokodoo yoguso enige!” dee takaga meleeso.

<sup>22</sup> Esem Pailteeyee see tobu odoo mooloogoodoo mapoo egeesee takaso, “Bei, niyo kasalame yo wooloomalame ka sala? Yayo goo tokenee kasee toowo? Ayo o goo midi mapoo ayo yo wooloomalame ido dino, yimapoo goo tokenee hee molo egele. Esiga ayo yo wulo woomele poogoloso diye dalaiso,” diso.

<sup>23</sup> Esino odoo susuga oso toso neligidi diya takaso, “Yesu homo bulubo magoo ma dokodoo yoguso enige!” dee takaga meleeso. Di-ayo egeesee takemelee Paillet to ee dulei diya gowoolone, bige dimapoo deedebeegee diso.

<sup>24</sup> Egeeseeme yayo dia to duloso odoo susuga oso goomoga goo ee tooso.

<sup>25</sup> Esiga Paileteeye Loum gamalee mapoo ha tolone odoo wooloomali Balabas ono neliga moso ma kuloduga peegoo diye diso. Esino Yesu homo bulubo magoo ma dokodoo talame yayo yo odoo susuga mapoo teneeso.

*Yesu homo bulubo magoo ma dokodoo yoguso eniga*

*(Mat 27:32-44; Maka 15:21-32; Yon 19:17-27)*

<sup>26</sup> Osoloso ha teli odoo oso Yesu tolosa mi ee ma kuloduga peegoo ido dumolome, Kulene odoo Saimon Yelusalem mi mapoo dumolome eli domopoo tugodooso. Osoloso diayo homo bulubo magoo tolosa see o ei mapoo imeduloso Yesu ma hamamee diye diso. <sup>27</sup> Osoloso biame omapoo, Yesu tolosa diyadaga molome odoo susuga hamamee diyadeeso. Osoloso ee ma kulodu sobo abo sabolo dulone Yesu halo gooholone hamamee dulone pupusigamo diyadeeso.

<sup>28</sup> Esemee Yesuye bidi toboloso dimapoo bolone egeese takaso, "Yelusalem sobo, niba a halo haga na pupusige. Esino niso nediliyo osoloso nibada holo halo ka pupusige.

<sup>29</sup> Bei, dala biame oso siboga, edebeeyo egeese takagalaiso, 'Sobo deme taba nibolo osoloso sobo holo soomagoloso too koo nedili niba diya goomege.'

<sup>30</sup> Bei, biame egeesi oso peledaba omapoo edebeeyo egeese takagalaiso,

'Mubi sabolo osoloso esia niyo goodobuloso iba togoode!'  
dee takalaiso.

<sup>31</sup> Esiga goo hageesi oso homo su gie mapoo peledobooga, see ogoo goo oso homo su sia mapoo ka peledabalaisomo?" diso.\*

<sup>32</sup> Osoloso biame omapoo ha teli odoo oso Yesu ido dulone, mesiya bakadio homo bulubo magoo ma dokodoo wooloomalame ido diso.

<sup>33</sup> Diba sibilesa mubi hee, eyo hu Wiligi ki mi deli mapoo, Yesu homo bulubo magoo ma dokodoo yoguso enigaloso tuluguso. Osoloso mesiya bakadio onosee homo bulubo magoo mapoo yoguso enigaloso, odoo hee Yesuwo deede dokolo tulugu, osoloso hee dobusu dokolo tulugu diso.

<sup>34</sup> Osoloso Yesuye homo bulubo magoo ma dokodoo telega molone egeese takaso, "Ma, odoo hagee bia oso goo tokenee amapoo egee moodoo ee nayo hapoloso boobado bigi. Bei, diayo goo egee moodoo eyo bei diba gooleede," diso. Osoloso ha teli odoo oso Yesuwo dugo talame diayo yo pepuso odoo hu ma ee kobuso.

<sup>35</sup> Odoo susuga oso peegooga tebisamolone balaga molome, Yu odoowo wiligi odoo tebisa oso manolone egeese takaga meleeso, "Yayo odoo abo pidimo siliso. Esiga yo tei Godeeye hudi magoo Keliso oso daga, o su eyo nediliyo pidilei tekepo," dee takaga meleeso.

<sup>36</sup> Osoloso ha teli odoo sabolo oso Yesu manolone, wain i mei nali keesoloso Yesuye nalame tenelone yimapoo egeese takaso,

<sup>37</sup> "No medee tei Yu odoo dia wiligi odoo taba daga, no telega pagalame, no nediliyo pidi," diso.

<sup>38</sup> Yesu o wiligi oo poogoo dokodooga to hageese hoguguloso kalamaso,

"Odo hagee Yu odoo dia wiligi odoo taba."

<sup>39</sup> Mesiya hee Yesuwo ho hodiokooga eniga oso Yesu mapoo tokenee sisilone yimapoo egeese takaso, "No medee tei Keliso daga, nee su no nediliyo pidilone, iba nose pidi," diso.

**23:29:** Luka 21:23    **23:30:** Hos 10:8; Yili 6:16    \* **23:31:** Esiga to hogugu hageeyo bei egeese moloso, "Niyo kasee gooleedo? Goo hagoso tokenee mauwe odoo mapoo peledabalai teiba daga, hee tokenee teli odoo dimapoo ogoo gooso peledabalaiyo?"    **23:34:** Psa 22:18    **23:35:** Psa 22:7-8  
**23:36:** Psa 69:21

<sup>40</sup> Esino mesiya hee oso o odoowo to su maga to kitulugu sabolo egeesee takaso, “No Godeebolo koo obudo? Bei, yayo dala egee to, no nose dala hedebe egeesi toso.

<sup>41</sup> Esiga iba asalo ibada tokenee eyo nei maga ka wodioso. Esino Yesu mapoo tokenee hee mauwe,” diso.

<sup>42</sup> Osoloso yayo see Yesu mapoo egeesee takaso, “Yesu, nayo wiligi doloso badebei mapoo, nayo a gooleebigi,” diso.

<sup>43</sup> Esemes Yesu nei yimapoo egeesee takaso, “Ayo namapoo tei goo taka, esiga epei no abolo hodobo goomoga mi Paladais mapoo badalaiso,” diso.

#### *Yesuye ta eyo goo*

(*Mat 27:45-56; Maka 15:33-41; Yon 19:28-30*)

<sup>44</sup> Osoloso osoko olo oo domo tooboome, mi susuga neligaso, mi neligamelee ososee osoko howo bakadio hedebe di poogooso.

<sup>45</sup> Bei, goo ogoso peledoboome, osoko pelega poogooso. Osoloso tei moso tegei ma kulodu dugo kodia oso kisimelee ee eyo mosoowe domo tologodooso. <sup>46</sup> Esemes Yesuye to neligidi egeesee takaso, “Ma, a mo dio nee dee mapoo maga,” diso. Yesu to hamamedee hageesee takoloso taso.

<sup>47</sup> Osoloso ha teli odoos gihadeli odoos oso Yesuwo homo bulubo magoo ma hemidu badolone Yesuye ta goo ee ogoloso, Godeeyo hu dokodoo poudoolone egeesee takaso, “Tei takoo, odoos hagee Godeeyo howo woola tekepo odoodoo,” diso.

<sup>48</sup> Osoloso odoos susuga oso gooso peledaba ee agalame omapoo dilesos balagamelee odoos oso goo hagee ogoloso dulone diya gooholone dia budo mapoo kobugumo see wedi diyadeeso.

<sup>49</sup> Osoloso Yesu o odoos sabolos osolos sobo abo Yesubolos Gelili abaga sibadee oso wulo eli sage abaga tebisamolone goo hagoso peledaba mapoo balaga meleeso.

*Yesu mi doosoo*  
(*Mat 27:57-61; Maka 15:42-47; Yon 19:38-42*)

<sup>50-51</sup> Dima kulodu odoos hee badebeiso, o hu Yosep. Yudiya mi toowa ee ma kulodu mi pepooko Alimatiya ee o midee. Yo Godeeyo howo woola tekepo badolone Godeeye wiligi dolosos badeli goo oso siba beleso bameleeso. Osolos yo Yu odoowo wiligi odoos tebisa oso mooloogoodos ee ma kulodu yo dibolos hodobos badebeiso. Esino Yu odoowo wiligi odoos tebisa oso Yesu Loum gamalee odoos oso wooloomalame dimapoo tiaseme, yo goo omapoo gowoolone yayo hamaga takaso.

<sup>52</sup> Osolos yo Yesu ta eyo su ee talame, Paillet mapoo dilesos woosaso.

<sup>53</sup> Osolos yo Yesuwo kou homo bulubo magoo ma dokodooga miyomoo to meilesos, dugosos tiadolosos yo ou madu magosos. Midos hagee dia. Esiga daga odoos hee teme omapoo magele.

<sup>54</sup> Esino biame domo egee Yu odoos diayos hasali biame bei mooloogoolai osoko howo koola tooboome ka see.

<sup>55</sup> Osolos sobos abos Yesubolos Gelili abaga sibadee oso Yosepeeye Yesuwo kou mi doos ma kulodulos magalame todime, diba yima hamamee diyadeeso. Diba omapoo dilesos Yosepeeye Yesuwo kou magos medee egeisos.

<sup>56</sup> Osolos diba see wedi dilesos sisi-gageli bi medee tekepo Yesuwo su mapoo hedilame mopoodos doosos. Esino diba Yu odoos diayos hasali biame olo bei mooloogoome, Moseseeye tei magos ee dodolone epedee koodobulosos hasasos.

## 24

*Yesu midos ma kuloduga hogabia*  
(*Mat 28:1-10; Maka 16:1-8; Yon 20:1-10*)

<sup>1</sup> Esiga Sadee toowa biame gesikolodee sobos hagee bia oso sisi-gageli bi medee tekepo mopoodos



doo ee toloso Yesuwo bi mapoo diyadeeso.

<sup>2</sup> Diba omapoo dileso egeino, yo toowa wulu ou miyopoo kisi ee pee-goo bidigamo dileso molome egeiso.

<sup>3</sup> Esemе diayo kulodu galagadileso egeino, Lodee Yesuwo su omapoo mauwe molo egeiso.

<sup>4</sup> Osoloso diayo kulodu galagadileso goo tiademe balaga meleeno, odoo bakadio dugo diya gadeebugu kalaga oso saga pele-doboloso soboso debei mapoo hodi-okooga tebisaso.

<sup>5</sup> Osoloso sobo diba diya dio dulone, ebia sabolo miyomoo gawuaso. Esemе odoo bakadio oso dimapoo nei egeese takaso, “Niyo kasalame odoo see gie badeli too ee midoo ma kulodu ka esiamo silesibala?”

<sup>6</sup> Yo kulo hadu mauwe. Esino yo see hogado dina. Esiga niba Yesubolo Gelili mapoo silone, yayo nimapoo taka goo ee gooleebigi.

<sup>7</sup> Bei, yayo egeese takaso, ‘Odoо Holo, a tokenee teli odoo dimapoo tiasalaiso, osoloso a homo bulubo magoo ma dokodoo yoguso enig-ileiso. Osoloso a biame bakadio midoo ma kulodu tamoloso, biame bakadio hedebe di mapoo midoo ma kuloduga see hogado dileiso,’ diso.”

<sup>8</sup> Esemе sobo diba to hagee duloso Yesuye takomo sili to ee gooleebuguso.

<sup>9</sup> Osoloso diba midoo maga see wedi dileso, diye di odoo 11 sabolo osoloso odoo susuga mapoo diayo egei goo susuga ee dimapoo opo-sususo.

<sup>10</sup> Esiga sobo hagee bia oso goo peledaba hagee ka egei, Meli-Magadalin osoloso Yowana osoloso Yemeseeyo owee Meli osoloso sobo abo.

<sup>11</sup> Esino sobo hagee bia oso sibilesi diye di odoo mapoo takeme diba duno, halabolone taka masi takeme to omapoo tei tele poogooso.

<sup>12</sup> Esino Pita toboloso midoo ee agalame hoguo diso. Yo dileso gasuwoloso wulu ma kulodu egeino,

dugo Yesuwo su tiadoloso magoo ee see mosoowe wulu ma kulodu molome egeiso. Esemе Pita goo hagee ogoloso howoodoomo wedi diso.

*Odoo bakadio oso Emaus mi mapoo dulone Yesu egei*

<sup>13</sup> Biame hedebe omapoo Yesuwo hamamee dili odoo bakadio oso Yelusalem mi poogoloso, see Emaus mi mapoo diyadaga meleeso. Emaus mi egee Yelusalem omaga haga hoo-goonee, wulo 11 kilomita egeesi masi.

<sup>14</sup> O bakadio dumo dulone goo susuga Yesu mapoo peledaba goo ee oposusumo diyadeeso.

<sup>15</sup> Osoloso o bakadio osee opo-susumo diyadaga molome, Yesu dima hamamee sibilesi diba tugodoloso dibolo hodobo diso.

<sup>16</sup> Esino odoo bakadio hagosо Yesu medee kibiya hoodo egele. Bei, diayo Yesu kibiya hoodo egeyaga, Godeeye diba gooloogooso.

<sup>17</sup> Esemе Yesuye dimapoo egeese takaso, “Niba ogoo goo oposusumo diyadaga malana?” diso.

Esemе diba eli domo omapoo kookoo toboloso goohele sabolo mudu olugodoloso tebisameleeso.

<sup>18</sup> Osoloso dima kulodu odoo hee, o hu Keleopas, yayo Yesu mapoo egeese takaso, “Yelusalem mi mapoo odoo soo sibadee ee ma kulodu mi omapoo goo peledaba ee, no dulega badosoba?” diso.

<sup>19</sup> Esemе Yesuye nei dimapoo egeese takaso, “Nayo egee takoo ogoo goo takala?” diso.

Esemе diayo nei yimapoo egeese takaso, “Iba Yesu Nasalet odoo eyo goo ee taka. Bei, yo Godee maga to toloso kokodo takomo sili odoo doloso badolone Godeeyo howo woola osoloso odoo susuga eyo mudugiyo Godeeyo to kitulugu sabolo takomo siliso. Osoloso yayo goo toowa opusomo di moodoomo siliso.

<sup>20</sup> Esino tei moso wiligi odo tebisa sabolo osoloso ibada wiligi odo tebisa oso Yesu Loum gamalee oso wooloomalame dimapoo teneeso. Esem e yo homo bulubo magoo ma dokodoo yoguso enigaloso taso.

<sup>21</sup> Esino iyo goolee, yayo Isalael odo iba Loum gamalee gidebeli omaga peegoo gilimado dileiso doloso dobolone balaga meleeso. Esiga goo hagoso peledaba ee biame bakadio olo poogooso.

<sup>22-23</sup> Osoloso ibada mooloogoodoo ee ma kulodu sobo abo oso epei gesikolodee dileso midoo mapoo egeino, Yesuwo su mauwe molo egeiso. Esem diayo sibilesi imapoo takolone, 'Ibada howo opusomo doloso Godeeyo momaiye egeiso,' diso. Esem momaiye oso Yesu ta maga hogado di goo ee dimapoo takaso. Esem goo susuga hagee takeme, iba diya dio diso.

<sup>24</sup> Osoloso ibada mooloogoodoo ma kulodu debeli odo abo diba nose dileso midoo egeino, soboso taka to sabolo tobulone, Yesuwo su midoo ma kulodu mauwe molo egeiso."

<sup>25</sup> Esem Yesu nei dimapoo egeese takaso, "Niba medee diya boobada odoodoo. Niba kasega Godee maga to toloso kokodo takomo sili odo dia to mapoo tei telega ka dosomo?"

<sup>26</sup> Bei, diayo egeese takaso, 'Godeeye hesia Kelisoye dala goo hageesi toloso see Godeeye egee bado mapoo peleso hu toowa toloso kitulugu sabolo badalaisy,' diso."

<sup>27</sup> Osoloso Yesu dimapoo Moses sabolo osoloso Godee maga to toloso kokodo takomo sili odo susuga oso Kelisowo goo hogugu goo eyo bei dimapoo medee eligiso.

<sup>28</sup> Osoloso diba Emaus mi olo koola toboome omapoo dulone Yesu dimapoo egeese takaso, "A hamapoo hasalaime. Esino a olo wulo duso," diso.

<sup>29</sup> Esem odo bakadio oso to kitulugu sabolo yimapoo egeese takaso, "Emegei, no epedee na di, no ibolo hodobo tiamo. Bei, olo nolugo," diso. Esem Yesu yo dibolo hodobo tilame diso.

<sup>30</sup> Osoloso diba moso kulodu peleso nei nalame dobolone, Yesuwo toloso goomoga to takoloso koodobuloso wo populoso dimapoo piso.

<sup>31</sup> Egeese semelee biame omapoo diayo Yesu medee kibiya hoodo egeiso. Omapoo diayo Yesu medee kibiya hoodo egeme, yo saga omapoo osugoboodooso.

<sup>32</sup> Esem obakadio dobolone dibusomo egeese takaga meleeso, "O. Tei takoo, iba eli domo abaga sibadaga molome, yayo Godeeyo to eyo bei imapoo takeme, ibada sooloo ma kulodu diya goomogaso," diso.

<sup>33</sup> Osoloso diba saga tebisaloso see Yelusalem mapoo wedi diyadeeso. Diba omapoo dileso egeino, diye di odo 11 sabolo osoloso Yesuwo di hamamee dedeli odo susuga oso diesono hodobo mooloogoodoloso doboome egeiso.

<sup>34</sup> Esem odo omapoo mooloogoodoloso debei oso dimapoo egeese takaso, "O. Tei takoo, Lodee yo ta maga see hogado didoo. Osoloso yo see Saimon-Pitaye badebei mapoo peledabadoo," dee takaga meleeso.

<sup>35</sup> Osoloso odo bakadio hagee bia oso Yesu eli domopoo diba tugodoloso di eyo goo sabolo osoloso Yesuwo dibolo hodobo nei nalame dobolone, wo toloso popume, diayo yo medee kibiya hoodo egei goo ee dimapoo oposususo.

*Yesuwo o hamamee dili odo dimapoo dileso peledaba*

*(Mat 28:16-20; Maka 16:14-18; Yon 20:19-23; Diye 1:6-8)*

<sup>36</sup> Diba goo hamapoo to osee kesamolome, haga booloogelega diayo debei domo omaga Yesu peledoboloso tobudulone dimapoo

**24:21:** Luka 19:11; Diye 1:6

**24:24:** Yon 20:3-10

**24:26:** Luka 9:22

**24:27:** Psa 22:1-21; Isa 53

**24:34:** 1Kol 15:4-5

egeesee takaso, “Emegei, mesie goo oso nibolo hodobo mele,” diso.

<sup>37</sup> Esino diayo goolee yo odoos dio bele dolone, dio dulone diya ebigaso.

<sup>38</sup> Esemes Yesuyes nei dimapoo egeesee takaso, “Niba kaseega ebia sabolo goo tiadoo sabolo nibada goo goolee ma kulodu ka malana?”

<sup>39</sup> Esiga niba mo dees sabolo osoloso mo homo sabolo ogoloso tei aso doloso gooleede. Osoloso mo su sige, niyo a tei su moloso doloso gooleedalame. Bei, odoos dio diba su mauwe,” diso.

<sup>40</sup> Yo to hagees takoloso o dees boowo sabolo osoloso o homo boowo sabolo dimapoo eligiso.

<sup>41</sup> Esino diayo medees tei telega goomoga sabolo osoloso dio dulone debei ogoloso Yesuyes dimapoo egeesee takaso, “Nimapoo nei nali hee molosomo?” diso.

<sup>42</sup> Esemes diayo yimapoo di si peepooko teneeso.

<sup>43</sup> Osoloso yayo dia howo woola di egees neso.

<sup>44</sup> Osoloso yayo dimapoo egeesee takaso, “Ayo nibolo hodobo silone nimapoo takeliso, ‘Mo goo maga Moseseeye hogugu sabolo, osoloso Godees maga to tolosos kokodos takomos sili odoos oso hogugu sabolo, osoloso Sam booka mapoo hogugu goo oso amapoo peledabalaiso,’ deliso. Esiga epees goo hagoso amapoo olo ka peledobooso,” diso.

<sup>45</sup> Osoloso Godeeyo to booka mapoo hogugu goo ees medees kibiya gooleedalame, Yesuyes dibada goo goolees medees hoodo magooso.

<sup>46</sup> Yesu egeesee solone tobudulone dimapoo egeesee takaso, “Esiga Godeeyo to booka mapoo hogugu ees egeesee molosos: Godeeye hesia Keliso, a dala tolosos biames bakadio midoo ma kulodu ta molosos see biames bakadio hedebe di mapoo hogabulolosos tobolosos dileiso.”

<sup>47</sup> Osoloso Yesuyes sees tobus dimapoo egeesee takaso, “Niba Yelusalems abaga bei mooloogolosos

mipoo toowa mapoo mo hu magas odoos mapoo hageesee eligimos silesibe, ‘Niba goo goolees su wudulosos nibada goo tokenees maga miligis pie. Eseegas nibada goo tokenees hapolosos boobados bigileiso,’ dees takomos silesibe.

<sup>48</sup> Esiga niyo mo goo hagees ogolosos takomos silesibileiso.

<sup>49</sup> Osoloso niba Yelusalems poogolosos epedees na di. Esino niba epedees hamapoo osee dogas, Kei mi ma dokodoo kitulugus sibogas talaisos. Bei, ayo mo Mayes taka to ees dodolones nimapoo Dio Tei tenelaisos,” diso.

*Yesu Kei mi ma dokodoo ido pala (Maka 16:19-20; Diye 1:9-11)*

<sup>50</sup> Osoloso Yesuyes o hamamees dili odoos gilimadolosos Betanis mi koolas mapoo diyadagas meleesos. Diba omapoo dilesos peledobolosos Yesuyes dees dokodoo poudolosos diba halos Godees mapoo takolones diba pidilames goomogas to takasos.

<sup>51</sup> Yo egeesee takomolomes, Yesu Kei mi ma dokodoo ido palasos.

<sup>52</sup> Esemes diayo Yesuwo hu dokodoo poudolosos, goomogas sabolos Yelusalems mi mapoo sees wedi diyadeesos.

<sup>53</sup> Osoloso biames susugas ees ma kulodu, diba Yu odoowo tei mosos mapoo dobolones, Godees mapoo goomogas poudoolones debeisos.

## Yonee To tekepo Yoneeye hogugu

### *Yonee booka goo eyo bei*

Yonee booka hagee Yesu o hamamee dili odoo hee Yoneeye hogugu. Yayo to hogugu ee ma kulodu goo toowa hagoso. Yesu yo Keliso\* osoloso yo tei Godeeyo Owolo. Esiga iyo Yesu mapoo tei toga, iba gie badeli talaiso.

### *Toso odoo su paso*

<sup>1</sup> Daga mipoo hagee moodelega molome, To\* olo badebeiso. To oso Godee sabolo badebeiso. Osoloso To ee Godee.

<sup>2</sup> Yo mipoo gie daga moodoo omapoo Godee sabolo badebeiso.

<sup>3</sup> Esiga bi hee yo mauwe moodele poogoo me. Esino bi susuga hedebe yimaga ka moodoo.

<sup>4</sup> Esiga gie badeli eyo bei hedebe yoso. Gie badeli oso odoo susuga mapoo gadeebugu tenemeleeso.

<sup>5</sup> Esiga gadeebugu oso neliga ma kulodu ka pounimoloso. Esiga gadeebugu egee neligasoo semidilei tebile.

<sup>6</sup> Esiga biame omapoo Godeeye odoo hee diye diso, o hu ee Yonee.

<sup>7</sup> Yayo odoo mapoo gadeebugu oso sibilei goo ee takalame simiso. Osoloso odoo susuga oso to yayo taka ee duloso tei ka talame.

<sup>8</sup> Yonee yo gadeebugunee, esino yayo gadeebugu eyo goo ee odoo mapoo takalame ka simi.

<sup>9</sup> Bei, tei gadeebugu oso odoo susuga mapoo pouni meli oso mipoo hamapoo sibilei ee olo koola tabaso.

<sup>10</sup> Esiga To ee mipoo hamapoo meleeso. Osoloso mipoo hagee yimaga moodooso. Esino mi odoo oso yo medee hoodo egele.

<sup>11</sup> Yo o odoo mapoo simiso. Esino o odoo oso yo idile.

<sup>12</sup> Esino edebeeyo yo idoloso yimapoo tei teme, yayo odoo egee bia dimapoo kitulugu teneeso, diayo Godeeyo owolo dio doloso dabalame.

<sup>13</sup> Esino edebeeyo owee dio ama dio eyo sawoso, o, suso gilee, o, odoo heeso gilee goo maga diba Godeeyo owolo dio dee ka sele. Esino Godeeye goomoga goo omaga diba Godeeyo owolo dio diso.

<sup>14</sup> Osoloso Toso odoo su poloso ima kulodu badebeiso. Yayo iba diya sooloo dolone pidiliso. Osoloso yayo tei goodee ee takeliso. Osoloso yayo hu toowa toloso badeli goo ee iyo egeiso. Esiga Ma Godee maga simi, Owolo hedebe yayo hu toowa egeesi toloso ka badoso.

<sup>15</sup> Yoneeye o goo maga takolone toso neligidi egeese takaso, "Ayo takolone, odoo hee ama hamamee sibileiso dee takomo silimenee, odoo ee hagoso. Yayo kitulugu oso ayo kitulugu ee dagadi. Bei, a soomagelega badoboome, yo daga olo badebeiso."

<sup>16</sup> Esiga sooloo dolone pidili goo toowa yimapoo egee molo maga biame susuga yayo iba ka pidimoloso.

<sup>17</sup> Tei magoo goo ee Godeeye Moses maga imapoo teneeso. Esino sooloo dolone pidili goo sabolo osoloso tei goodee ee Yesu Keliso maga simi.

<sup>18</sup> Egeesi ma kulodu odoo heeso Godee egele. Esino hedebe Godeeyo Owolo yayo imapoo Godeeyo goo ee yilige buguso. Bei, yayo Godee koola ogolone badolone yo tei Godee doloso ka badoso.

### *Yoneeye takolone a Kelisonee dee taka*

*(Mat 3:1-12; Maka 1:1-8; Luka 3:1-18)*

<sup>19</sup> Yelusalem mapoo debeli Yu odoo dia wiligi odoo oso Godee ogo

\* :: **Keliso** dee egee takoo hu eyo bei ee Godeeye hesia dolone ka takooso. **1:1:** Yon 17:5; 1Yon 1:1-2; Yili 19:13 \* **1:1:** To ee Yesu **1:3:** 1Kol 8:6; Kol 1:16-17; Hib 1:2 **1:4:** Yon 5:26 **1:5:** Yon 3:19 **1:6:** Mat 3:1; Luka 1:13-17, 76 **1:9:** Yon 8:12 **1:13:** Yon 3:3-6; 2:11; 1Pita 1:23 **1:14:** Pil 2:7 **1:17:** Exo 34:28; Loum 6:14 **1:18:** Exo 33:20; Yon 6:46; 1Tim 6:16



odoo ogo doloso debeli sabolo, osoloso odoo abo Libaiyo bala\* maga Yonee mapoo diye diso, diayo Yonee yo tei odoo ogumo doloso woosalame. Esemé diayo Yonee mapoo dileso egeesee woosaso, “No tei odoo ogumo?” diso.

<sup>20</sup> Esemé Yonee yo to nei takalai gowelee. Esino yayo nei dimapoo egeesee takaso, “A Kelisonee,” diso.

<sup>21</sup> Esemé diayo see yimapoo egeesee woosaso, “No odoo ogumo? No Ilayayo?” diso.

Esemé yayo nei egeesee takaso, “Haye, a Ilayanee,” diso.

Esemé see diayo yimapoo egeesee woosaso, “No Godee maga to tolosokokodo takomo sili odoo sibileigo neme bamelee,\* odoo ee nosomo?” dee takaso.

Esemé yayo nei dimapoo egeesee takaso, “Haye, asonee,” diso.

<sup>22</sup> Esemé see diayo yimapoo egeesee takaso, “No tei odoo ogumo? Iba goomogo, to nei nayo taka ee iyo todilesosibada wiligi odoo iba diye di mapoo takalaiya. Esiga no tei odoo ogumo?” diso.

<sup>23</sup> Esemé nei Yoneeye Godee maga to tolosokokodo takomo sili odoo Aisayaye taka to ee dimapoo egeesee takaso,

“A miwe poogoo mi maga idageli odoo ee aso,

Niba Lodeeye sibilei eli medee hoodo magee.”

<sup>24</sup> Esemé Pelisi odoo dia wiligi odoo oso diye di odoo oso dileso, nei Yonee mapoo egeesee takaso,

<sup>25</sup> “Nayo takolone, no Kelisonee, osoloso no Ilayanee, osoloso no Godee maga to tolosokokodo takomo sili odoo osonee, dee takooso. Esino

bei kasalame nayo odoo howo ka olugumo silala?” diso.

<sup>26</sup> Esemé nei Yoneeye dimapoo egeesee takaso, “Ayo wulo odoo howomoo oluguliso. Esino odoo hee nima kulodu badoso. Esino niba yo gooleedelee.

<sup>27</sup> Yo ama hamamee egee siboso. Esino a tekeponee, ayo o homo mapoo kali bi ee pidigilei.”

<sup>28</sup> Osoloso Yoden howo hodiokoo Yoneeye odoo howo olugumelee Betani mi mapoo goo ogoso peledabaso.

### *Yesu Godeeyo Lam be*

<sup>29</sup> Biame hee mapoo Yesu Yonee mapoo sibume ogoloso Yoneeye egeesee takaso, “Ege, hagee Godeeyo Lam beso.\* Yayo mipoo hamapoo debeli odoo dia goo tokenee susuga ee hapoloso boobado bigileiso.

<sup>30</sup> Ayo takolone, odoo sibileisogodoloso takomo sileemeni, odoo ee hagoso. Bei, ayo egeesee takomo sileeso, odoo hee ama hamamee sibileiso. Esino yayo kitulugu oso ayo kitulugu ee dagadi, dee takeliso. Bei, a soomagelega molome, yo daga olo badebeiso, dee takeliso.

<sup>31-33</sup> Esiga Isalael odooso Kelisowo goo ee medee gooleedalame ayo diba howo olugulame ka simi.”

Esiga Yonee eyo egei goo ee egeesee takaso, “Ayo daga Keliso odoo ugu bele dolone medee kibiya gooleedelee. Esino ayo odoo howomoo olugulame, Godeeye a diye dolone amapoo egeesee taka, ‘Nayo Keliso egeesee gooleedalaiso. Dio Tei sibilesosibole hodobo badoga agalaiso. Osoloso yayo odoo mapoo Dio Tei tenelaiso,’ diso. Godeeye egeesee taka duloso

\* **1:19: Libaiyo bala** eyo bei ee egeesi moloso. Eibalahameeyo amawe Yekobowo owolo hee eyo hu ee Libai. Osoloso Libaiyo bala ee ma kulodu debeli odoo oso Yu odoo dia tei moso ma kulodu tou opusomo opusomo di ee teliso. Esino Godee ogo odoo ogo doloso debeli odoo diba noseetei moso ma kulodu tou teliso. Diba Eloneeyo bala hedebe. **1:21:** Deut 18:15, 18; Mat 11:14 \* **1:21:** Yu odooso Godee maga to tolosokokodo takomo sili odoo Moses egeesi masi oso sibilei ee bameleeso. (Deut 18:18) **1:23:** Isa 40:3 **1:27:** Yon 1:15 **1:29:** Isa 53:6-7; 1Pita 1:18-19 \* **1:29: Lam be** dee egee takoo sipi be hu gie kauwa ee takooso. Bei, Isalael odoo oso tokenee goo hapalame sipi be gie kauwa wooloomaloso Godee mapoo teneliso. **1:30:** Yon 1:15 **1:31-33:** Mat 3:16

hamamee Dio Tei molo masi pusi-bilesa yimapoo pubalegeme egeiso.

<sup>34</sup> Esiga ayo goo hagee tei ogoloso yo tei Godeeyo Owolo dolone to hagee ayo nimapoo ka taka.”

*Yesuye o hamamee dili odo  
daga hudi magoo*

<sup>35</sup> Biame hee mapoo Yonee o hamamee dili odo bakadio dibolo hodobo mi hedebe omapoo tebisa meleeso.

<sup>36</sup> Egeesee semelee omapoo Yesuye di ee ogoloso dimapoo egeesee takaso, “Niso ege, odo ege Godeeyo Lam be ogoso,” diso.

<sup>37</sup> Esememe Yonee o hamamee dili odo oso to egee duloso Yesuye di hamamee diso.

<sup>38</sup> Esememe Yesuye bidi toboloso, odo bakadio oso yima hamamee simi ee ogoloso, yayo dimapoo egeesee takaso, “Niba ogoo goo tala sibala?” diso.

Esememe diayo nei yimapoo egeesee takaso, “Labai, no kapoo badeliyo?” diso. Labai hu eyo bei ee eligili odo dolone ka takooso.

<sup>39</sup> Esememe yayo nei egeesee takaso, “Niso sibilesa ege,” diso. Osoloso neli tigime, odo bakadio hagoso Yesubolo dileso yayo badeli mi ee egeiso. Esememe diba biame omapoo yibolo hodobo debeiso.

<sup>40</sup> Odo bakadio hagee bia dia kulodu odo hee o hu ee Endulu. Endulu yo Saimon-Pitayo omolo.

<sup>41</sup> Esiga Enduluye Yesu ogoloso emei Saimon esiaso. Yo ogoloso yimapoo egeesee takaso, “Iba Mesaya egeiso,” diso. Mesaya hu eyo bei ee Keliso dolone ka takooso.\*

<sup>42</sup> Osoloso Enduluye Saimon Yesu mapoo ido diso. Esememe Yesuye yo ogoloso yimapoo egeesee takaso, “Saimon, Yoneeyo owolo, nee hu see

Kepas hedileiso.” Kepas dee egee takoo ee Pita dolone ka takooso.\*

*Yesuye Pilipi dio  
Nataniyol dio gilimadoo*

<sup>43</sup> Osoloso biame hee mapoo Yesu yo see Gelili mi mapoo dilame goomogaso. Esino biame omapoo yo odo hee Pilipi tugodoloso yimapoo egeesee takaso, “No ama hamamee sibe,” diso.

<sup>44</sup> Pilipi hagee Betesaida odo. Betesaida mi hagee Endulu dio Pita dio dia midee.

<sup>45</sup> Osoloso Pilipiye dileso Nataniyol ogoloso yimapoo egeesee takaso, “Moses sabolo osoloso Godee maga to toloso kokodo takomo sili odo oso dia booka mapoo to hogugu oso takolone, odo hee hamamee sibilesisogo, dee takemelee odo ee iyo olo egeiso. Yo Yesu, Nasalet mi mapoo badeli, yo Yosepeeyo owolo,” dee takaso.

<sup>46</sup> Esino Nataniyoleeye Pilipi mapoo egeesee takaso, “Goo tekepo oso Nasalet mi maga kasee sibileiyo?” diso.\* Esememe Pilipiye nei yimapoo egeesee takaso, “No sibilesa ege,” diso.

<sup>47</sup> Esememe Nataniyoleeye Yesu yima hegi simi ee ogoloso Yesuye o goo maga egeesee takaso, “Niso ege, odo hagee tei Isalael odo. Yo medee tei goo takeli odo,” diso.

<sup>48</sup> Esememe Nataniyoleeye nei yimapoo egeesee takaso, “Nayo a kasee gooleedoowo?” diso. Esememe Yesuye nei yimapoo egeesee takaso, “No daga Pilipiye dileso egelega badoboome, no pigi homo bei mapoo badoboome, ayo no egeiso,” diso.

<sup>49</sup> Esememe Nataniyoleeye Yesu mapoo egeesee takaso, “Eligili odo, no Godeeyo Owolo. Osoloso no

**1:34:** Mat 3:17    **1:36:** Yon 1:29    **1:40:** Mat 4:18-20    \* **1:41:** Esiga Hibulu dia toso Mesaya dee egee takoo sabolo osoloso Guliki toso Keliso dee egee takoo goo eyo bei ee hedebe Godeeye hesia dolone ka takooso.    **1:42:** Mat 16:18    \* **1:42:** Esiga Hibulu toso Kepas dee egee takoo sabolo osoloso Guliki toso Pita dee egee takoo hu eyo bei ee yo dolone ka takooso.    **1:45:** Deut 18:18; Isa 7:14; 9:6; Jer 23:5; Ezek 34:23    \* **1:46:** Yu odooso goolee, Nasalet mi ee haga goo toowanee, dee gweliso. Esiga odo hu toowa too oso mi omaga sibileime, dee gweliso.    **1:49:** Mat 14:33; 16:16; Maka 3:11

Isalael odoo ibada wiligi odoo,” dee takaso.

<sup>50</sup> Esemé Yesuye nei Nataniyol mapoo egeesee takaso, “No homo bei mapoo badoboome, ayo egei goo maga nayo amapoo tei ka toowala? Esino goo hagee pepooko, no hamamee goo toowa agalaiso.

<sup>51</sup> Esiga ayo nimapoo tei goo taka. Niyo Kei mi osulu yamagoloso mologa, Godeeyo momaiye oso Odoo Holo\* amaga dokodoo polo osoloso amapoo sibo domologa agalaiso,” dee takaso.

## 2

*Yesuye howo ee wain i palame moodoo*

<sup>1</sup> Biame bakadio poogoloso hamamee Gelili mi toowa ee ma kulodu Kana mi pepooko mapoo odoo heeso sobo hu wo neso. Biame domo omapoo Yesuwo owee onosee omapoo badebeiso.

<sup>2</sup> Osoloso Yesu sabolo o hamamee dili odoo sabolo sobo hu wo ne ee agalame diba gilimadoloso debeiso.

<sup>3</sup> Wo ne biame domo mapoo wain i hosudoo ee ogoloso Yesuwo oweeye Yesu mapoo egeesee takaso, “Wain i olo hosudoona,” diso.

<sup>4</sup> Esemé Yesuye nei owee mapoo egeesee takaso, “Mo wee, ayo ogoo goo talame no amapoo ka simiyo? Mo biame tugodele,” dee takaso.

<sup>5</sup> Esemé oweeye nei odoo moso kulodu tou teli mapoo egeesee takaso, “Niba Yesuye to nimapoo takooga dulosoto egee te,” dee takaso.

<sup>6</sup> Egeesi ma kulodu sesepeni yugoso moodoo 6 omapoo bediga meleeso. Sesepeni 6 hedebe hedebe di egee howo 100 lita egeesi keeseli. Yu odooso dia adaga dia goo ee dodolone, sesepeni howo keesoo hamapoo dee sabolo, homo sabolo, osoloso bi abo hapeliso.

<sup>7</sup> Esemé Yesuye odoo moso kulodu tou teli dimapoo egeesee takaso, “Sesepeni susuga hagee howoso

metamagise,” diso. Esemé diayo sesepeni susuga egee howoso metamagisaso.

<sup>8</sup> Esemé yayo tou teli odoo mapoo egeesee takaso, “Niba sesepeni omapoo howo keesaloso todilesoto odoo sobo hu wo ne eyo wiligi odoo mapoo tenee,” diso. Esemé diayo egeesee moodooso.

<sup>9</sup> Esino howo eyo see wain i paso. Esemé wiligi odoo oso wain i egee wulo nalo egeiso. Egeesi ma kulodu wain i hagoso simi eyo bei yo gooleedele. Esino o tou teli odoo diba olo gooleedoo.

<sup>10</sup> Egeeseelone yayo sobo hulame simi giso ee idoloso yimapoo egeesee takaso, “Odoo susuga oso Yu odoo dia adaga dia goo ee dodolone, wo ne mapoo sibadee odoo mapoo daga wain i hadali keeneliso. Osoloso diba wain i toowa naloso halabolone dogo, see wain i haga koo hadali ee dimapoo keeneliso. Esino nayo wain i dooboo hadali ee magoo moloso, see epedee keedoloso ka teneeso,” diso.

<sup>11</sup> Esiga Gelili mi toowa ma kulodu Kana mi pepooko mapoo Yesuye daga malalo goo toowa opusomoto ee moodoo maga, yayo hu toowa tolosoto badeli goo ee eligiso. Esemé o hamamee dili odoo oso goo hagee ogoloso yimapoo tei tooso.

<sup>12</sup> Osoloso goo hagoso dileso koodobume, Yesuye owee sabolo, osoloso omolo dio sabolo, osoloso o hamamee dili odoo sabolo Kapeniyum mi mapoo diso. Osoloso diba omapoo dileso dobolone biame abo poogooso.

*Yesuye tei moso ma kuloduga odoo peegoo hasiso bugu*

*(Mat 21:12-13; Maka 11:15-17; Luka 19:45-46)*

<sup>13</sup> Osoloso Yu odoo dia Gababia wo nali biame ee olo koola tooboome, Yesu Yelusalem mi mapoo palaso.

<sup>14</sup> Osoloso yo omapoo pelesoto egeino, odoo susuga oso tei moso

**1:51:** Gen 28:12 \* **1:51: Odoo Holo** - Yesuye eyo nediliyo takolone, a Odoo Holo, dee taka hagee yo tei odoo dolone ka takomo silee. **2:4:** Yon 7:30; 8:20 **2:12:** Mat 4:13 **2:13:** Exo 12:1-27

beelee ma kulodu bulumakau be sabolo, osoloso sipi be sabolo, osoloso molo sabolo edebeeyo neiso talame, tosibilesa odoo mapoo tenee domolome egeiso. Osoloso odoo aboso molee opusomo opusomo di ee tei moso eyo molee piligeli debi pooba mapoo doboome egeiso.

<sup>15</sup> Osoloso Yesuye gowoolone tiso wei masi moodooloso wei oso sipi be sabolo, osoloso bulumakau be sabolo, osoloso odoo susuga peegoo hasiso buguso. Osoloso molee piligeli debi pooba bidige buguloso molee ko sabolo peegoo kugobuguso.

<sup>16</sup> Osoloso see molo neiso talame debei odoo mapoo egeese takaso, “Bi susuga hagee toloso moso hamaga peegoo diyadee. Niyo mo Mamo moso ee bi teli moso dee na see,” dee takaso.

<sup>17</sup> Esiga goo hagoso peledaba ogoloso Yesu o hamamee dili odoo oso Godeeyo to booka mapoo hogugu oso taka goo ee egeesee gooleebuguso,

“Ayo nee moso ee diya gooleeso.

Esiga edebeeyo a wooloomaliso.”

<sup>18</sup> Esem Yu odoo dia wiligi odoo tebisa oso bi susuga malosida gidebei odoo egee bia ee Yesuye tei moso ma kuloduga peegoo hasiso bugu goo ee ogoloso diayo yimapoo egeese takaso, “No ogoso kitulugu toloso goo hageese ka moodoowo? Esiga nayo kitulugu egee Godee maga too, dee takooga, nayo goo toowa opusomo di hee imapoo eligilei tekepo,” diso.

<sup>19</sup> Esem Yesuye dimapoo nei egeese takaso, “Niyo tei moso hagee guobigi. Egeeseega, ayo see tobu biame bakadio hedebe di ee ma kulodu tegelaiso,” dee takaso.

<sup>20</sup> Esem diayo yimapoo egeese takaso, “Iyo dugo 46 ee ma kulodu tei moso hagee tegeiso. Esiga biame bakadio hedebe di ee ma kulodu nayo saga kasee togo dalaiyo?” diso.

<sup>21</sup> Esino Yu odoowo wiligi odoo hagee biaso Yesuye taka goo ee medee kibiya gooleede. Bei, Yesuye tei moso eyo goo maga taka hagee, eyo nediliyo o su ee taka.

<sup>22</sup> Esiga Yesuye toloso hogado polome, hamamee Yesu o hamamee dili odoo oso Yesuye taka goo hagee gooleebuguso. Egeeseelone diayo Godeeyo to booka maga taka sabolo osoloso Yesuye taka to omapoo tei tooso.

<sup>23</sup> Yesuye Gababia wo ne biame omapoo Yelusalem mapoo peleso goo toowa opusomo di moodoo ogoloso odoo susuga oso yimapoo tei tooso.

<sup>24</sup> Esino Yesuye dimapoo haga tei dele. Bei, yo odoo susuga dia sooloo ma kulodu goo goolee ee yo olo gooleedoo.

<sup>25</sup> Esiga yimapoo odoo heeso odoo dibada goo goolee ee takalai ee bei me. Bei, goo goolee susuga dibada sooloo ma kulodu egee molo ee, yayo malalo olo gooleedooso.

### 3

#### *Nikodimaseeye Yesu mapoo simi*

<sup>1</sup> Esiga odoo hee badebeiso, o hu Nikodimas. Yo Pelisi odoo, osoloso Yu odoo dia wiligi odoo tebisa ee ma kulodu yinosee wiligi odoo hee yoso.

<sup>2</sup> Osoloso yayo gesi sibilesa Yesu mapoo egeese takaso, “Eligili odoo, iba gooleedoo, no eligili odoo Godeeye diye di ee noso. Bei, edebeeyo eyo goolee goo toowa opusomo di nayo egee moodoomo silo egeesi moodolai tebile. Esino Godee nobolo hodobo badoga, nayo goo toowa opusomo di hageesi moodolai tebileiso,” diso.

<sup>3</sup> Esem Yesuye nei yimapoo egeese takaso, “Ayo namapoo taka. Edebeeyo see soomagelega poogooga, yo Godeeye wiligi doloso badeli goo mapoo gadileime,” dee takaso.



<sup>4</sup> Esemé Nikodimaseeye nei yimapoo egeesee takaso, “Odoó kauwa ee oweeyo beliye maga see tobu kasee soomagalaiyo? Yo see holope poloso oweeye see tobu soomagalai tebile,” diso.

<sup>5</sup> Esino Yesuye see egeesee takaso, “Ayo namapoo taka. Edebeeyo howo maga osoloso Dio Tei maga see dia delega poogooga, yo Godeeye wiligi doloso badeli goo mapoo gadileime.

<sup>6</sup> Mi odoo oso holope soomagoloso mi hamapoo debeliso. Esino Dio Tei oso gie badeli egee tenemolo odoo ee, Godeeyo owolo dio doloso badoboso kookaiyo gie badalaiso.

<sup>7</sup> Esiga ayo namapoo takolone no see tobu soomagee dee hagee takoo duloso haga na dio di.

<sup>8</sup> No pooso eyo goomoga maga sibulone goowa ee duliso. Esino yayo sibili eli sabolo osoloso yayo dili eli ee no gooleedele. Esiga Dio Tei oso odoo mapoo gie badeli egee tenemolo edebeeyo ogoloso koo gooleedeli.”

<sup>9</sup> Esemé Nikodimaseeye egeesee takaso, “Ha? Goo hagoso kasee peledabalaiyo?” diso.

<sup>10</sup> Esemé Yesuye yimapoo egeesee takaso, “No Isalael odoo dia eligili odoo, esino no goo hagee koo gooleedolo?”

<sup>11</sup> Esiga ayo namapoo taka. Iyo gooleedoo sabolo osoloso iyo egei goo ee Yu odoo nimapoo ka takomo siloso. Esino niyo ibada to mapoo tei talai ee ka gowooso.

<sup>12</sup> Esiga ayo nimapoo mi goo maga takeme, niyo tei tele. Egeesi ma kulodu ayo see nimapoo Kei mi eyo goo maga takooga, niyo kasee tei talaisomo?

<sup>13</sup> Odoó heeso bi Kei mi ma dokodoo egee molo ee agalame pele. Haye. Hedebe Odoó Holo ayo Kei mi mapoo ka badebei. Osoloso ayo Kei

mi ma dokodooga mipoo hamapoo simiso.

<sup>14</sup> Esiga daga hoogoo Isalael odoo diba miwe poogoo mi mapoo do-boome, Moseseeye hebise ki biso moodoo ee homo sabolo poudooso.\* Goo hedebe egeesi masi, edebeeyo Odoó Holo anosee toloso egeesee poudileiso. <sup>15</sup> Goo egeesi maga edebeeyo amapoo tei toga, yo badoboso kookaiyo gie badeli talaiso.

<sup>16</sup> Godeeye mi odoo diya sooloo dolone Owolo hedebe a meiyé diso, ayo mi odoo ee halo talame. Esiga edebeeyo amapoo tei toga, diba Godee maga pileime, esino diba badoboso kookaiyo gie badeli talaiso.

<sup>17</sup> Esiga Godeeye Owolo a mipoo hamapoo meiyé dee taka hagee, mi odoo dia goo tokenee eyo nei tenelame ka meiyé dele. Esino mi odoo oso amaga gie badeli pidili talame ka simi.

<sup>18</sup> Osoloso edebeeyo Godeeyo Owolo amapoo tei toloso doga, dia goo tokenee eyo nei dimapoo dala tenelaime. Esino odoo agayo amapoo tei telega doga, diba dia goo tokenee eyo nei talame ka doso. Bei, diba Godeeyo Owolo hedebe amapoo tei telega.

<sup>19</sup> Gadeebugu mipoo hamapoo simiso. Esino mi odoo oso gadeebugu egee goomegele poogoloso see neliga ono diya goomogaso. Bei, diayo dia suso goo moodoo ee diya tokeneeega. Goo egeesi maga Godeeye dia goo tokenee eyo nei tenelaiso.

<sup>20</sup> Esiga goo tokenee teli odoo ee gadeebugu hegilone gadeebugu mapoo sibilei diya ebiliso. Bei, gadeebugu oso dia goo tokenee ee woola eligiyaga.

<sup>21</sup> Esino edebeeyo Godeeye goomoga goo ee tomo siloga, diba

**3:5:** Ezek 36:25-27    **3:6:** Yon 1:13    **3:14:** Num 21:9; Yon 8:28; 12:32    \* **3:14:** *hebise ki biso moodoo* - Daga hoogoo Isalael odooso Godee mapoo mesile poogoome, diba palame hebise diye diso. Esino Moseseeye hebise ki biso moodoo ee homo sabolo poudoome omapoo ogoloso diba hebiseso pa ee see weidooso.    **3:15:** Yon 20:31    **3:16:** Yon 3:36; 10:28; Loum 5:8; 8:32; 1Yon 4:9-10    **3:17:** Luka 19:10    **3:18:** Yon 5:24    **3:19:** Yon 1:5, 9; 8:12

gadeebugu mapoo sibilei ebileime. Bei, gadeebugu oso dia goo ee yilige buguga, goo susuga diayo moodoo ee Godeeye kitulugu maga ka moodoodoo doloso edebeeyo gooleedalaiso.”

*Yonee odoo howo oluguli oso  
Yesuwo goo taka*

<sup>22</sup> Osoloso goo hagoso dileso koodobume, Yesuye o hamamee dili odoo sabolo Yelusalem poogoloso see Yudiya mi toowa ee ma kulodu mi pepooko abo mapoo diso. Diba omapoo dileso dobolone odoo howo olugumeleeso.

<sup>23-24</sup> Esino Yonee yo neliga moso ma kulodu tooselega badolone, Salim mi koola mapoo Ainon mi mapoo yayo odoo howo oluguso. Bei, mi omapoo howo toowa meleega, odoo susuga diba Yoneeye howo olugulame yimapoo sibumeleeso.

<sup>25</sup> Egeesee semelee biame omapoo Yonee o hamamee dili odoo aboso Yu odoo dia adaga dia goo ee dodolone dee sabolo, homo sabolo, osoloso bi abo hapeli goo maga Yu odoo hee sabolo toso agadigaso.

<sup>26</sup> Osoloso diayo sibileso Yonee mapoo egeesee takaso, “Eligili odoo, daga Yoden howo hodiokoo odoo nobolo hodobo badebei ee no gooleedoo. Esiga nayo odoo egeeyo goo imapoo takemeni oso odoo howo ka olugumoloso. No ege, odoo susuga oso no poogoloso see yimapoo ka duso,” dee takaso.

<sup>27</sup> Esino Yoneeye egeesee takaso, “Edebeeyo eyo goolee goo hee moodoolai tebile. Esino Godeeye yimapoo kitulugu teneega, yo goo egee moodoolai ee tebileiso.

<sup>28</sup> Esiga ayo nimapoo takolone, a Kelisonee, dee taka goo ee niba olo duso. Esino a wulo o eli moodoolame malalo diye di odoo ee aso.

<sup>29</sup> Soboso giso obuoga, yo olo giso egeeyo. Odoo giso ido peli

ee omapoo tobudulone, giso siba-beleso bameliso. Osoloso gisoso peledoboloso to taka ee duloso yo diya goomegeliso. Egeesi ma kulodu odoo giso ido peli masi ee aso. Esiga a epedee diya goomoga sabolo ka badoso.

<sup>30</sup> Esiga Kelisoye toowa dolone, nei ayo pepooko dolone badalai tekepo.

<sup>31</sup> Esiga Kei mi ma dokodooga simi odoo oso odoo susuga dagadileso ka badoso. Esino mipoo hamapoo soomagoo ee mi odooso. Esiga yo wulo mipoo hageeyo goo ee takomo sili. Esino Kei mi ma dokodooga simi odoo yayo goo susuga diya dagadileso ka badoso.

<sup>32</sup> Osoloso yayo egei goo sabolo osoloso yayo du goo ee takeliso. Esino odoo heeso o to mapoo tei koo teli.

<sup>33</sup> Esino odoo agayo o to duloso tei too goo oso Godee yo tei goo takeli dolone ka eligiso.

<sup>34</sup> Esiga Godeeye diye di odoo oso Godee maga to toloso takomo siliso. Bei, Godeeye o Dio Tei su goodegel-ega yimapoo olo teneeso.

<sup>35</sup> Godeeye Owolo sooloo dolone goo susuga ee yayo wiligi doloso badalame kitulugu yimapoo olo teneeso.

<sup>36</sup> Esiga odoo agayo Owolo mapoo tei toga, yo badoboso kookaiyo gie badeli talaiso. Esino odoo agayo Owolo mapoo mesile poogooga, yo badoboso kookaiyo gie badeli talaime. Esino Godeeyo kamana goo oso yimapoo kookaiyo osee malaiso.”

## 4

*Yesu dio Samaliya sobo dio*

<sup>1</sup> Yesuye howo olugu odoo oso diya bei molone, yima hamamee deedeeso. Osoloso diayo Yoneeyo hamamee dili odoo ee dagadi goo ee, Pelisi odoo diba duso.

<sup>2</sup> Esino Yesuye odoo howo olugumo sile. Hedebe o hamamee

dili odoo oso odoo howo ka olugumo silee.

<sup>3</sup> Esino Yesu yo Pelisi odoo oso o goo gooleedoo goo ee yo olo duloso, Yudiya mi poogoloso see Gelili mi mapoo wedi diso.

<sup>4</sup> Osoloso yo Gelili mi mapoo wedi dulone, Samaliya mi domo abaga dili eli omaga diso.

<sup>5</sup> Yesuye Samaliya mi mapoo sibilesi mi edebeeyo bia Saika deli mapoo peledabaso. Esiga Saika mi edebeeyo bia hagee mi hee daga hoogoo Yekobeeye owolo Yosep mapoo tenee eyo koola omapoo moloso.

<sup>6</sup> Esiga Yekobeeyo howo ou omapoo osee meleeso. Egeesi ma kulodu Yesu yo mi eli sage simiga kwasime, howo ou koola ogolone omapoo badebeiso. Biame egee osoko olo oo domo taba mapoo egeesee ka see.

<sup>7-8</sup> Osoloso Yesu o hamamee dili odoo ee edebeeyo bia mi mapoo nei neiso talame dime, Samaliya sobo howo ou omapoo howo kalame simiso. Esemé Yesuye yimapoo egeesee takaso, “Nayo a howo keenee,” diso.

<sup>9</sup> Esino sobo egee yayo taka to ee duloso dio diso. Bei, Yu odooso Samaliya odoo maga peegooga booloogamo silesibiliso. Esemé sobo ogoso Yesu mapoo egeesee takaso, “Nayo kasi maga amapoo howo keenee dee ka takala? Bei, no Yu odoo. Esino a Samaliya sobo,” dee takaso.

<sup>10</sup> Esemé Yesuye nei yimapoo egeesee takaso, “Nayo Godeeye wulo egee tenemolo goo ee gooleedoloso, odoo namapoo howo hoowa mo goo ee, no gooleedoloso badebei diepi, nayo amapoo kookaiyo gie badeli teneli howo ee hoowali. Osoloso nayo amapoo hoowa diepi, ayo nei namapoo howo egee teneli,” diso.

<sup>11</sup> Esemé sobo ogoso nei Yesu mapoo egeesee takaso, “Wiligi

odoo, no gie badeli teneli howo ee kamapoo keelaiyo? Osoloso namapoo ou howo keli me. Osoloso howo ou hagonosee diya gooboodomou.

<sup>12</sup> Esiga ibada amawe Yekob pepooko dolone see nayo toowa dalame ka sala? Bei, ibada amawe Yekobeeye howo hagee ka ou, osoloso yayo owolo dio sabolo osoloso o be sabolo howo ou hedebe hagee naliso. Osoloso yayo howo ou hagee imapoo poogoo diso.”

<sup>13</sup> Esemé Yesuye nei yimapoo egeesee takaso, “Edebeeyo howo ou hamapoo howo naga, diba see howo nala pagalaiso.

<sup>14</sup> Esino odoo agayo howo ayo hagee keenee ee naga, yo see howo nala pagalaimé. Esiga kookaiyo gie badeli teneli howo ayo yimapoo tenelai oso yima kulodu howo ou masi molone, yimapoo badoboso kookaiyo gie badeli ee tenelaiso.”

<sup>15</sup> Esemé sobo ogoso nei yimapoo egeesee takaso, “Wiligi odoo, nayo egee takoo howo egee amapoo tenee, a hamamee see howo nala pegel-ega pagalame. Osoloso hamamee a hamapoo see howo kala sibilega pagalame,” dee takaso.

<sup>16</sup> Esemé Yesuye yimapoo egeesee takaso, “No dileso nomo ido sibe,” diso.

<sup>17</sup> Esemé sobo ogoso nei yimapoo egeesee takaso, “A giso me,” diso.

Esemé Yesuye nei egeesee takaso, “Nayo takolone, no giso me, dee egee takoo tei goo takoo.

<sup>18</sup> Bei, no daga giso dee tiadoo egeesi mapoo obiaso. Esino giso epedee nobolo hagee bado ee tei nomonee. Esiga nayo egee takoo, tei goo takoo,” dee takaso.

<sup>19</sup> Esemé sobo ogoso nei yimapoo egeesee takaso, “Wiligi odoo, a gooleedo, no Godee maga to toloso kokodo takomo sili odoo hee nosodoo.

20 Samaliya bia ibada amawe dio oso mubi hagee ma dokodoo Godeeyo hu dokodoo poudiliso. Esino Yu odoo niyo takolone hedebe Yelusalem mi mapoo Godeeyo hu dokodoo ka poudilei tekepo dee takeliso. Esiga nayo amapoo takee, mi tekepo kamapoo iyo Godeeyo hu dokodoo ka poudileiyo?" dee takaso.

21 Esemé Yesuye nei yimapoo egeesee takaso, "Emegei, no mo to mapoo tei te. Edebeeyo Ma Godeeyo hu dokodoo poudalame Yelusalem mapoo osoloso mubi hamapoo sibilega pagalai biame ee olo siboso.

22 Samaliya odoo niyo goomoga poudili goo ee niba gooleede. Esino Yu odoo iyo goomoga poudili goo ee iba gooleedooso. Bei, gie badeli pidili odoo ee hedebe Yu odoo imaga sibileiso.

23 Esiga biame olo siboso, esino biame ee olo simiso, tei yimapoo goomoga poudili odoo oso Dio Tei oso kitulugu maga, osoloso tei goo maga, Ma Godee mapoo goomoga poudalame. Bei, Ma Godeeye goo hageesi maga yimapoo goomoga poudili odoo omapoo diya goomegeliso.

24 Godee yo Dio. Osoloso yimapoo goomoga poudili odoo oso Dio Tei maga, osoloso tei goo maga yimapoo goomoga ka poudilei tekepo," dee takaso.

25 Esemé sobo ogoso nei yimapoo egeesee takaso, "A gooleedooso, Mesaya edebeeyo takolone Keliso deli ee sibileiso. Osoloso yayo sibilesio imapoo goo susuga medee eligileiso," diso.

26 Esemé Yesuye nei yimapoo egeesee takaso, "Odoe ee Mesaya aso, nobolo to egee komolo," dee takaso.

27 Egeesee semelee mapoo Yesuwo hamamee dili odoo oso edebeeyo bia

mi ee ma kuloduga wedi sibilesio egeino, Yesuye sobo sabolo to komolome, diya dio diso. Esino odoo heeso sobo omapoo woosolone, no ogoo goomogolo, dee takele. Osoloso odoo heeso Yesu mapoo woosolone, nayo kasalame sobo sabolo to ka kamalala, dee takele.

28 Osoloso sobo oso o ou howo keli omapoo magoloso see o moso bia takalame see wedi diso.

29 Sobo ogoso dileso egeesee takaso, "Niba odoo hee hagee agalame sibe. Yayo goo ayo moodoo susuga ee takaso. Esiga odoo egee Keliso malaiso."

30 Esemé moso bia susuga Yesu agalame diyadeeso.

31 Odoe susuga Yesu agalame sibadaga molome, Yesuwo hamamee dili odoo oso Yesu mapoo egeesee takaso, "Eligili odoo, no nei ne," diso.

32 Esino Yesuye dimapoo egeesee takaso, "A nei moloso. Esino nei ayo nali ee niba gooleede," dee takaso.

33 Esemé Yesu o hamamee dili odoo oso diesono egeesee takaso, "Odoe heeso yimapoo nei tenee bele?" dee takaga meleeso.

34 Esemé Yesuye dimapoo egeesee takaso, "Mo nei ee Godeeye goomoga goo talai goo oso. Osoloso yayo a diye diso, tou yayo amapoo tenee ee tomo dimeleso hoo poogoo mapoo hosudalame.

35 Niyo egeesee takeliso, 'a bakadio bakadio di poogoloso nei howo segei tala dileiso,' dee takeliso. Esino ayo nimapoo taka. Niba howo puo ogoloso nei howo segei\* mapoo ege. Bei, epedee hagee nei telegee ee talai biame hagos.

36 Esiga nei howo segei teli odoo oso dia tou eyo nei epedee hamapoo toso. Osoloso diayo odoo ee homokoko masi gooloogaloso tosibilesio kookaiyo gie badeli talai mi mapoo mooloogoo mageliso, nei

4:22: 2Ki 17:29-41; Isa 2:3; Loum 9:4-5 4:24: 2Kol 3:17; Loum 12:1; Pil 3:3 4:25: Yon 1:41 4:26:

Maka 14:61-62 4:34: Yon 6:38 4:35: Luka 10:2 \* 4:35: nei howo segei - Yesuye wudu taka hagee tei neidee eyo goo maga takele. Esino edebeeyo Godeeyo to tekepo takomo dilei goo sabolo, osoloso odoo Godee mapoo gilimado sibilei goo ee wudu taka.



howo segeli odoo sabolo, osoloso nei howo segei teli odoo sabolo hodobo goomogalame.

<sup>37</sup> Egeesi ma kulodu toso hagee takoo ee tei takooso, ‘Odoos heeso nei howo segeliso. Osoloso see odoo heeso nei howo segei ee teliso.’

<sup>38</sup> Esiga a niyo nei howo segele poogoo mi mapoo nei howo segei ee talame diye diso. Bei, mi omapoo odoo aboso daga tou toowa tooso. Esino see niyo dileso talaiso.”

### *Samaliya odooso tei too*

<sup>39</sup> Samaliya soboso dileso o odoo mapoo takolone, “Goo susuga ayo moodoo ee yayo amapoo taka,” dee takeme, Samaliya odoo susuga mi omapoo debeli oso to hagee duloso Yesu mapoo tei tooso.

<sup>40</sup> Osoloso diayo sibilesos Yesu mapoo egeesee takaso, “No epedee ibolo hodobo hamapoo badebee,” diso. Esemes Yesu yo biames bakadio dibolo hodobo omapoo badebeiso.

<sup>41</sup> Egeesi ma kulodu odoo susuga oso to yayo taka ee duloso yimapoo tei tooso.

<sup>42</sup> Esemes diayo sobo omapoo egeesee takaso, “Nayo daga Yesuwo goo ee imapoo takeme, nee to duloso tei tooso. Esino iba epedee yayo takooga iso duloso tei toso. Esiga iba gooleedooso, odoo hagee mi odoo susuga dia gie badeli pidili odoo osodoo,” diso.

<sup>43-44</sup> Egeesi ma kulodu Yesu eyo daga egeesee takaso, “Godee maga to tolosos kokodos takomos sili odoo ee tei o moso bia oso goweliso,” diso. Yesu biames bakadio Samaliya mi mapoo badobosos see Gelili mapoo diso.

<sup>45</sup> Osoloso yo Gelili mapoo sibilesos peledoboome, edebeeyo yo ido diso. Bei, diba nosees Yesuye Yelusalems mapoo Gababia wo ne biames mapoo goo susuga yayo moodoo ee diba egeiga.

### *Yesuye gamalee odoo eyo owolo tekepo pa*

<sup>46</sup> Osoloso Yesu Gelili mi toowa omapoo badolones see Kana mi pepooko mapoo diso. Daga mi omapoo howodee ee see yayo wain i palame moodooso.

Biames omapoo Kapeniyums mi mapoo gamalee odoo heeyo giso holo paiye badebeiso.

<sup>47</sup> Esino gamalee odoo ogoos Yesuye Yudiya mi maga see Gelili mi mapoo simi goo ee duloso Yesu mapoo diso. Yo dilesos howolones egeesee takasos, “Mo holo paiyesos talames badosos. Esiga nayo mo holo tekepo palame Kapeniyums mi mapoo abolos sibe,” dee takasos.

<sup>48</sup> Esino Yesuye yimapoo egeesee takasos, “Niyo ayo goo toowa opusomos di moodoo ee egelegas poogoogas, amapoo tei talaimes,” dee takasos.

<sup>49</sup> Esemes odoo ogoos nei Yesu mapoo egeesee takasos, “Wiligi odoo, mo holo teyagas, nayo sagas sibilesos yo tekepo palames moodee,” diso.

<sup>50</sup> Esino Yesuye yimapoo egeesee takasos, “No see wedi di. Nee holo wedileisos,” diso.

Esemes odoo yo Yesuwo to duloso tei tolosos see o mi mapoo wedi diso.

<sup>51</sup> Osoloso yo see eli domopoo osee dimolomes, o tou teli odoo oso sibilesos yimapoo egeesee takasos, “Nee holo olo weidilosos badosos,” dee takasos.

<sup>52</sup> Esemes odoo ogoos nei dimapoo egeesee takasos, “Osokos howo domos kamapoo molomes, yo kekebisas ka koododiala?” diso. Esemes diayo nei yimapoo egeesee takasos, “Eiyo osokos olo wudus magoo mapoo ka koododia,” diso.

<sup>53</sup> Esemes odoo yo gooleedolosos egeesee gooleebugusos, bei, eiyo osokos howo hedebe omapoo Yesuye yimapoo takolones, “nee holo weidileisos,” dee taka goo ee goolee bugusos. Esemes odoo susuga o moso kulodus debelis sabolos osolosos yibolos Yesu mapoo tei tooso.

<sup>54</sup> Esiga Yesuye Yudiya mi maga see Gelili mi mapoo sibilesu goo toowa opusomo di moodoo hagoso olo bakadio diso.

## 5

*Yesuye Betesada howo sauwili ou mapoo odoo hee tekepo moodoo*

<sup>1</sup> Osoloso goo hagoso dileso koodobume, Yu odooso wo nali hee nalame Yelusalem mapoo polome, Yesu yinosee omapoo palaso.

<sup>2</sup> Esiga Yelusalem mi beele mapoo osulu hee Sipi Be Osulu deli meleeso. Osoloso ee ma kulodu howo sauwili dadabayo ou toowa meleeso. Howo sauwili dadabayo ou o hu ee Yu odoo dia toso takolone Betesada deliso. Osoloso howo ou pee mapoo hau pooba dee tiadoo egeesi meleeso.

<sup>3-4</sup> Egeeseelone odoo paigiga sabolo, osoloso odoo howo neliga sabolo, osoloso odoo kido todobia sabolo, osoloso odoo su kakawa poogoo sabolo hau omapoo tieseliso. [Osoloso diba omapoo tiesamolone, biame abo mapoo Godeeyo momaiye heeso sibilesu howo egee wolabeleso bolone osee tiesameliso. Bei, momaiyeso howo wolomeleso koodobuoga, odoo daga malalo howo ee ma kulodu meili odoo ee tekepo peliso.]

<sup>5</sup> Egeeseelone giso hee dugo 38 ee ma kulodu paiye melee onosee hau omapoo badebeiso.

<sup>6</sup> Odoo daga yayo hoogoo pailoso badebei Yesuye ogoloso yimapoo egeese takaso, “No see weidilei goomogolo?” dee takaso.

<sup>7</sup> Esemé odoo ogoso yimapoo nei egeese takaso, “Wiligi odoo, howo weeleega, a pidilame ido meilei odoo hee me. Bei, a meilame seega, odoo heeso malalo meiliso,” dee takaso.

<sup>8</sup> Esemé Yesuye yimapoo egeese takaso, “No toboloso nee kida toloso di,” diso.

<sup>9</sup> Osoloso biame omapoo odoo egee see olo tekepo poloso o kida toloso diso. Esino goo hagoso peledaba ee

Yu odoo dia hasali biame omapoo ka peledaba.

<sup>10</sup> Esemé Yu odoo dia wiligi odoo tebisa oso odoo hagoso o kida toloso di ee ogoloso yimapoo egeese takaso, “Hasali biame hamapoo odoo heeso o kida toloso dilei tei,” dee takaso.

<sup>11</sup> Esemé odoo ogoso nei egeese takaso, “Odoo a tekepo pa oso amapoo takolone, mo kida toloso di, dee takeme a ka di,” diso.

<sup>12</sup> Esemé diayo yimapoo nei egeese takaso, “Odoo agayo namapoo takolone, nee kida toloso di, dee ka takala?” dee takaso.

<sup>13</sup> Esino odoo yo tekepo pa ee yo medee kibiya gooleede. Bei, odoo susuga oso diya mooloogoodeme, Yesu yo mooloogoodoo ee ma kulodu esigaboodooso.

<sup>14</sup> See hamamee Yesuye odoo egee tei moso tegei ma kulodu badebei ogoloso yimapoo egeese takaso, “No, no medee goolee, no epedee olo tekepo paso. Esiga no see goo tokenee na te. Nayo goo tokenee see tobu tomo siloga, goo tokenee toowa see namapoo peledabeyaga,” dee takaso.

<sup>15</sup> Esemé odoo ogoso dileso Yu odoo dia wiligi odoo dimapoo takolone egeese takaso, “Yesuye a tekepo ka pa,” diso.

<sup>16</sup> Egeesi ma kulodu Yesuye Yu odoo dia hasali biame mapoo goo hageese teme, Yu odoo dia wiligi odoo tebisa oso komonolone yimapoo hegi goo tenelame bei mooloogooso.

<sup>17</sup> Esino Yesuye dimapoo egeese takaso, “Mo Ma biame susuga tou tomoloso. Esiga anosee biame susuga tou ka tomoloso,” diso.

<sup>18</sup> Yesuye to egeese takeme, nei diayo yo wooloomalame diya goomogaso. Bei, yayo hedebe Yu odoo dia hasali biame ee gababile, esino yayo takolone, Godee yo tei Ama, dee taka

goo omaga, eyo nediliyo yo Godee sabolo hodobo teiba neme.

*Godeeye kitulugu Owolo Yesu mapoo tenee*

<sup>19</sup> Esiga Yesuye Yu odoo dia wiligi odoo tebisa mapoo egeesee takaso, "Ayo nimapoo taka. Owolo ayo mawo goomoga goo hee talai tebile. Esino Owolo ayo hedebe Maye teli goo ee ogoloso anosee goo ee teliso.

<sup>20</sup> Maye Owolo a diya sooloo dalaga, goo yayo teli susuga ee Owolo amapoo eligiliso. Esem niyo Owolo ayo goo moodoo ee ogoloso hoowoolame, Maye amapoo goo diya toowa moodolai eligileiso.

<sup>21</sup> Egeesi ma kulodu Maye odoo wedia hogogaduloso see gie badeli egee tenemolo, egeesee solone, Owolo ayo odoo mawo goomoga mapoo gie badeli ka tenemoloso.

<sup>22</sup> Esiga Maye odoo goo koo midili. Esino yayo Owolo amapoo kitulugu olo teneeso, ayo odoo susuga dia goo ee midilame.

<sup>23</sup> Egeesi ma kulodu Maye goo egee moodooso, odoo susuga oso Ma mapoo goomogolone o hu dokodoo poudalame. Osoloso diayo Owolo amapoo goomogolone mo hu onosee dokodoo ka poudalame. Esiga odoo agayo Owolo amapoo goomoga poudilega badoga, yo Ma Godee a diye di odoo mapoo goomoga koo poudoso.

<sup>24</sup> Esiga ayo nimapoo ka taka. Mo to duloso a diye di odoo mapoo tei teli odoo ee badoboso kookaiyo gie badeli olo tooso. Odoo egeesee seli ee o goo tokenee eyo nei talaime. Yo teli maga dagadilesi see gie badeli mapoo badoso.

<sup>25</sup> Esiga ayo nimapoo ka taka. Biame oso sibileiso, esino biame ee olo simiso, odoo tei telega wedia oso Godeeyo Owolo mo to dulei. Egeesi ma kulodu edebeeyo mo to duloso tei toga, yo badoboso kookaiyo gie badeli talaiso.

<sup>26</sup> Bei, Ma yo gie badeli eyo bei yoso. Esiga Owolo ayo gie badeli eyo bei doloso badalame, yayo kitulugu amapoo olo teneeso.

<sup>27</sup> Osoloso Maye Owolo amapoo kitulugu olo teneeso, ayo odoo susuga dia goo ee midilame. Bei, a Odoo Holo.

<sup>28</sup> Esiga ayo taka to hagee duloso niba haga na dio di. Bei, biame oso sibileiso, odoo wedia dia bi mapoo egee tiesamoloso oso Odoo Holo mo to duloso dia bi maga hogogadileiso.

<sup>29</sup> Egeesi ma kulodu goo tekepo tomo sili odoo diba badoboso gie badeli talame hogogadileiso. Esino goo tokenee tomo sili odoo diba dia goo tokenee eyo nei talame hogogadileiso.

<sup>30</sup> Ayo goo mawo goolee ee tomo silei tebile. Bei, Ma a diye di oso goo midilei goo amapoo takooga, ayo goo egeesi ka midili. Esiga ayo goo midili ee diya tekepo. Bei, ayo mawo goomoga goo koo tomo sili. Esino ayo hedebe odoo a diye di oso goomoga goo ee ka tomo siloso.

*Yesuwo goo taka*

<sup>31</sup> Esiga ayo hedebe mo goo maga takooga, edebeeyo mo to mapoo tei talai goo eyo bei mauwe dalaiso.

<sup>32</sup> Esino mo Maye mo goo maga takomoloso. Bei, a gooleedoo, yayo mo goo maga egee takoo, ee tei takooso.

<sup>33</sup> Esiga niyo odoo abo Yonee mapoo diye diso. Esem yayo dimapoo tei goo takaso.

<sup>34</sup> Esino edebeeyo mo goo maga tei goo egee takoo goo ee tei beleso, a medee koo gooleeso. Esino niyo gie badeli talame ayo goo susuga hagee nimapoo takaso.

<sup>35</sup> Yonee yo keme masi gadeebugu nimapoo teneeso. Esiga niyo biame deiyepo ee ma kulodu gadeebugu sabolo dabalame diya goomogaso.

<sup>36</sup> Esiga Yoneeye mo goo maga tei goo takomo siliso. Esino tou

ayo temeleso hosudalame Godeeye amapoo tenee oso Yoneeye mo goo takomo sili ee dagadiso. Bei, tou ayo tomo sili oso Maye a diye di goo ee ka eligiso.

<sup>37</sup> Osoloso mo Maye a diye di oso mo goo maga tei goo ka takooso. Esino niyo to yayo taka ee dule, osoloso o mudu egele.

<sup>38</sup> Esiga niba Godeeyo to duloso nibada sooloo ma kulodu tei koo teli. Bei, niyo Maye diye di odoo amapoo tei koo teli.

<sup>39</sup> Niyo Godeeyo to booka mapoo hogugu medee hesigaloso gooleedoloso dobolone, nei to oso nimapoo gie badeli tenelaiso doloso doso. Esino niyo to hesiga ee mo goo takeli.

<sup>40</sup> Esino ayo nimapoo gie badeli tenelame seega, niyo amapoo sibilei koo goomegeli.

<sup>41</sup> Osoloso niyo see mo hu dokodoo poudilei, ayo haga koo gooleeso.

<sup>42</sup> Bei, a gooleedooso, niyo nibada sooloo ma kulodu Godee goolee mauwe.

<sup>43</sup> Esiga ayo mo Ma Godeeyo hu maga simiso. Esino niyo a koo goomogoso. Esino edebeeyo eyo goolee o hu maga siboga, niyo odoo egee goomogolone yo idiliso.

<sup>44</sup> Esiga niyo wulo edebeeyo nibada hu dokodoo poudilei goomogolone debeliso. Esino Godee hedebe yayo nibada hu ono dokodoo poudalame, niyo ki koo kituluguli. Esiga niyo amapoo kasee tei talaiyo?

<sup>45</sup> Esiga ayo Mayo mudugiyopoo niba odoo tokenee dee takeeya dee na goolee. Niyo goolee, Moseseeye niba pidilei gooleeso. Esino yayo Mayo mudugiyopoo niba odoo toke-nee dalaiso.

<sup>46</sup> Egeesi ma kulodu niyo Moseseeye taka to mapoo tei too diepi, niba ayo taka to mapoo tei teliyo. Bei, Moseseeye mo goo ee Godeeyo to booka mapoo ka hogugu.

<sup>47</sup> Esino niyo Moseseeye to hogugu mapoo tei telega ka doso. Esiga niyo

to ayo hagee takoo mapoo kasee tei talaiyo?"

## 6

*Yesuye odoo 5,000 mapoo nei pi*  
(*Mat 14:13-21; Maka 6:30-44; Luka 9:10-17*)

<sup>1</sup> Esemee goo hagoso dileso koodobume, Yesu yo see Gelili abei hodiokoo du maga dalo soowaso. Gelili abei hageeyo hu hee ee Taibiliyes deliso.

<sup>2</sup> Egeeseelone Yesuye goo toowa opusomo di moodoolone, odoo paigiga susuga tekepo moodoo demelee maga, odoo mooloogoodoo toowa oso goo egee ogoloso yima hamamee mili diyadeeso.

<sup>3</sup> Esemee Yesuye o hamamee dili odoo sabolo mubi ma dokodoo peleso debeiso.

<sup>4</sup> Osoloso biame omapoo Yu odoo dia Gababia wo nali biame ee olo koola tabaso.

<sup>5</sup> Biame omapoo odoo mooloogoodoo toowa oso yimapoo sibadee ee ogoloso Yesuye Pilipi mapoo egeese takaso, "Iyo nei moleeso kamapoo toloso odoo susuga hamapoo ka pileiyo?" diso.

<sup>6</sup> Esiga Yesuye odoo hagee bia dimapoo moodolai goo ee yo olo gooleedoloso badolone, see wulo Pilipiye tei too ee agalame yimapoo egeese ka taka.

<sup>7</sup> Esemee Pilipiye nei egeese takaso, "Odoos susuga hagee bia dimapoo iyo nei toloso pilei ee, molee toowa kamapoo talaiyo? Bei, edebeeyo odoo susuga hagee bia nei pilame molee talame biame 200 ee ma kulodu tou toowa toga, molee oso odoo hedebe hedebe di mapoo wulo nei pepooko pilei tebileime," dee takaso.

<sup>8-9</sup> Esemee Yesu o hamamee dili odoo hee Saimon-Pitayo omolo Enduluye Yesu mapoo egeese takaso, "Hagee ma kulodu giso holo heeso wo si dee tiadoo sabolo osoloso di bakadio sabolo toloso badoso. Esino



nei pepooko hagoso odoo susuga ee pilei tebile,” diso.

<sup>10</sup> Esemé Yesuye o hamamee dili odoo dimapoo egeese takaso, “Odoosuga hagee bia bulume doloso takee,” diso. Mi omapoo obu bouwe meleeso. Esemé odoo susuga go domo omapoo bulumaso. Egeesi ma kulodu hedebe gisowe hesiga ee 5,000 egeesi tugodooso.

<sup>11</sup> Esemé Yesuye wo si toloso Godee mapoo goomoga to takoloso, wo si popeiloso odoo susuga mapoo piso. Osoloso di bakadio toloso goo hedebe o egeesi moodooso. Esemé odoo susuga oso nei egee naloso diya edigaso.

<sup>12</sup> Diba nei naloso oduguloso doboome, Yesuye o hamamee dili odoo dimapoo egeese takaso, “Nei abo poogoo susuga ee misigamo di. Nei abo wulo gamenee peegeeyaga,” diso.

<sup>13</sup> Esemé wo si dee tiadoo odoo susuga oso naloso abo poogoo ee, Yesu o hamamee dili odoo oso misigamo dileso bou tegei 12 egeesi metamagisaso.

<sup>14</sup> Odoosuga oso Yesuye goo toowa opusomo di moodoo hagee ogoloso egeese takaso, “Tei takoo, odoo hagee Godee maga to toloso kokodo takomo sili odoo iyo sibileiso doloso bolone debei odoo ee hagosodoo,” dee takaga meleeso.

<sup>15</sup> Esemé Yesuye dia wiligi odoo tabalame, Yesu mapoo sibileso seselame gooleemelee goo ee, yo olo gooleedooso. Esino Yesuye olo ogoloso diba poogoloso see obusomo mubi ma dokodoo palaso.

*Yesuye howo ma dokodooga di  
(Mat 14:22-33; Maka 6:45-52)*

<sup>16</sup> Olo habedee mapoo Yesu o hamamee dili odoo oso yo balame abei mapoo mouso.

<sup>17</sup> Esino Yesu sibilega molome olo neligaso. Esemé diba dia du mapoo toboloso Kapeniyum mi mapoo dalo soowaso.

<sup>18</sup> Diba sudaso olo sulugamo diyadaga molome, i toowa simi oso howo ki toowa simiso.

<sup>19</sup> Diba eli sage 5 kilomita egeesi diyadaga molome, Yesuye howo ma dokodooga dimapoo sibume egeiso. Esemé diba diya obulone dio diso.

<sup>20</sup> Esino Yesuye dimapoo egeese takaso, “Niba haga na ebi. Ayo siba,” diso.

<sup>21</sup> Esemé diayo goomoga sabolo yo dia du ma kulodu dabegeee diso. Egeese semelee mapoo haga booloogelega mi diayo di omapoo peledoboloso dia du omapoo oluguso.

*Yesu yo wo gie badeli teneli*

<sup>22</sup> Biame hee mapoo Yesuye nei pi odoo susuga oso du dali hedebe omapoo meilesu Yesu bameleeso, daga omapoo du hedebe meleega, diayo goolee Yesu omapoo badaba bele dolone. Bei, Yesu o hamamee dili odoo dibusomo daga malalo du egee toloso dime diayo egeiga.

<sup>23</sup> Esemé biame domo omapoo odoo du abo maga Taibiliyes mi maga sibileso odoo mooloogoodoo toowa oso debei mapoo peledabaso. Daga mi koola omapoo Yesuye Godee mapoo goomoga to takoloso odoo susuga mapoo nei piso.

<sup>24</sup> Esino diayo omapoo egeino, Yesu sabolo o hamamee dili odoo sabolo me neme, see diayo du omaga Yesu esilame Kapeniyum mi mapoo soowaso.

<sup>25</sup> Diayo abei daloso Kapeniyum mi mapoo peledoboloso Yesu ogoloso yimapoo egeese takaso, “Eligili odoo, no kopolone hamapoo ka simiyo?” dee takaso.

<sup>26</sup> Esemé Yesuye nei egeese takaso, “Ayo nimapoo taka. Niyo a esiamo simi egee, ayo goo toowa opusomo di moodoo ee egeiga, niyo a ka esiamo sibile. Esino niba ayo nei pime ne oso diya edigaga, niyo wulo a ka esiamo simidoo.

<sup>27</sup> Esiga niba nei saga me pegeli egeesi haga na esiamo silesibe. Esino

niba kookaiyo moloso osee meli nei ono ka esiamo silesibe. Odoos Holo ayo nei hagee nimapoo tenelaiso. Bei, Ma Godeeye Owolo ayo goo hagee talame amapoo kitulugu olo teneeso.”

<sup>28</sup> Esememe diayo nei egeese takaso, “Godeeye iyo ogoos goo talame diya ka goomogosomo?” dee takaso.

<sup>29</sup> Esememe Yesuye nei dimapoo egeese takaso, “Godee yo goomogosomo, yayo diye di odoos amapoo tei talame.”

<sup>30-31</sup> Esememe odoos mooloogoodoo oso yimapoo egeese takaso, “Iyo namapoo tei talame, nayo ogoos goo toowa opusomo di ka moodoolaiyo? Bei, Godeeye to booka mapoo hogugu oso takolone, ibada amawedio oso miwe poogoo mi mapoo silesibume, Moseseeye Kei mi ma dokodooga wo mana deli\* ee diayo nalame teneliso. Esiga Moseseeye ibada amawedio dimapoo goo hagee moodooso. Esino iyo namapoo tei talame, nayo imapoo ogoos goo moodoolaiyo?” dee takaso.

<sup>32</sup> Esememe Yesuye nei dimapoo egeese takaso, “Ayo nimapoo taka. Moseseeye nibada amawedio mapoo Kei mi wo ee tenele. Esino mo Maye dimapoo wo egee ka tenele. Goo hedebe egeesi masi, yayo Kei mi ma dokodooga tei wodee ee nimapoo ka tenemoloso.

<sup>33</sup> Esiga Godeeye wo Kei mi ma dokodooga mi hamapoo sibeye dee taka ee aso. Bei, ayo mi odoos mapoo gie badeli ka tenemoloso.”

<sup>34</sup> Esememe nei diayo yimapoo egeese takaso, “Wiligi odoos, biame susuga gie badeli wo egee nayo imapoo tenemelee,” dee takaso.

<sup>35</sup> Esememe Yesuye egeese takaso, “Gie badeli teneli wo aso. Esiga odoos agayo amapoo siboga, yo see hodileime. Osolosoo odoos agayo

amapoo tei toga, yo see howo nala pagalaime.

<sup>36</sup> Daga ayo nimapoo takolone, goo toowa opusomo di ayo moodoo ee niyo olo egeiso, dee takaso. Esino niba amapoo tei koo to.

<sup>37</sup> Odoos mo Maye amapoo tenele oso amapoo sibileiso. Esiga dima kulodu odoos hee ayo peegoo habigileime.

<sup>38</sup> Bei, ayo Kei mi ma dokodooga mi hamapoo simi egee, mawo goomoga goo ee talame ka sibile. Esino mo Ma, a diye di odoos oso goomoga goo ee talame ka simi.

<sup>39</sup> Egeesi ma kulodu yayo goomoga goo ee hagoso. Odoos yayo amapoo tenele dima kulodu ayo hedebe osugobalai, yo koo goomogosomo. Esino hamameedee biame mapoo ayo diba wedia maga see gie badeli talame hogogadileiso.

<sup>40</sup> Bei, mo Ma yo goomogosomo, odoos agayo Owolo a ogoloso amapoo tei toga, diba badoboso kookaiyo gie badeli talaiso. Osolosoo hamameedee biame mapoo ayo diba wedia maga see hogogadileiso.”

<sup>41</sup> Egeese semelee biame omapoo Yesuye takolone, “A Kei mi ma dokodooga simi wo aso,” dee takeme, Yu odoos oso duloso komonolone to boowaso.

<sup>42</sup> Esememe diayo egeese takaso, “Odoos hagee Yosepeeyo owolo Yesuso. Esiga ama dio owee dio, iba gooleedoo. Esino yayo takolone, yo Kei mi maga simi, diso. Yayo kasalame egeese ka takayo?” dee takaso.

<sup>43</sup> Esino Yesuye nei dimapoo egeese takaso, “Nima kulodu to boowa egee molo omapoo koodobie.

<sup>44</sup> Bei, edebeeyo eyo goolee amapoo sibileime. Esino Ma a diye di oso amapoo sibilame gi odoos oso amapoo sibileiso. Osolosoo

**6:29:** 1Yon 3:23    **6:30-31:** Exo 16:14-15; Num 11:7-9; Psa 78:24; Mat 16:1; Yon 2:18    \* **6:30-31:** *wo mana deli* - Yu odooso dugo 40 ee ma kulodu miwe poogoo mi mapoo silesibume, Godeeye wo mana deli hagee diayo nalame teneliso. Mana deli hagee, wo masi heliye pepooko dooboo hadali.  
**6:35:** Yon 4:14    **6:39:** Yon 10:28-29; 17:12    **6:42:** Mat 13:55    **6:44:** Yon 6:65    **6:45:** Isa 54:13

hamameedee biame mapoo ayo yo ta maga see hogadileiso.

<sup>45</sup> Osoloso Godee maga to toloso kokodo takomo sili odoo heeso egeesee hoguguso, ‘Godeeye odoo susuga eligileiso,’ diso. Esiga odoo agayo Mayo to duloso yimaga goo gooleedoga, diayo amapoo sibileiso.

<sup>46</sup> Odoo heeso Ma egele. Esino hedebe Ma Godee maga simi odoo ayo Ma egeiso.

<sup>47</sup> Esiga ayo nimapoo taka. Amapoo tei too odoo yo olo badoboso kookaiyo gie badeli tooso.

<sup>48</sup> Gie badeli teneli wo ee aso.

<sup>49</sup> Esino nibada amawe dio oso miwe poogoo mi mapoo dobolone, wo mana deli ee nolone debeiso. Esino wo mana deli ee nali odoo egee bia olo wediaso.

<sup>50</sup> Esino wo hagee Kei mi maga simi. Esiga wo hagee naga odoo egee bia wedileime.

<sup>51</sup> Kei mi ma dokodooga simi gie badeli teneli wo ee aso. Esiga edebeeyo wo hagee naga, yo badoboso kookaiyo gie badalaiso. Osoloso wo ayo tenelai egee molo ee mo hwei, mi odoo oso gie badeli talame.”

<sup>52</sup> Esem Yu odooso to hagee duloso dima kulodu to boowoolone egeesee takaso, “Odoo hagoso o hwei iyo nalame kasee tenelaiyo?” dee takaso.

<sup>53</sup> Esem Yesuye nei dimapoo egeesee takaso, “Ayo nimapoo taka. Niyo Odoo Holo mo sawo sabolo osoloso mo hwei sabolo nelega poogooga, niba gie badeli talame.

<sup>54</sup> Esiga mo hwei sabolo osoloso mo sawo sabolo nali odoo, diba badoboso kookaiyo gie badeli talaiso. Osoloso hamameedee biame mapoo ayo diba wedia maga see hogadileiso.

<sup>55</sup> Mo hwei sabolo osoloso mo sawo ee tei nei dee oso.

<sup>56</sup> Egeesi ma kulodu mo hwei sabolo osoloso mo sawo sabolo nali odoo oso abolo hedebe doloso ka badoso. Osoloso anosee dibolo hodobo badoso.

<sup>57</sup> Esiga Ma a diye di oso gie badoga anosee ka badoso. Esiga mo hwei sabolo osoloso mo sawo sabolo nali odoo oso amaga gie badeli talaiso.

<sup>58</sup> Egeesi ma kulodu a nibada amawe diayo namo silee wo egeesinee. Bei, diayo wo egee ne oso dimapoo gie badeli tenele. Esino a Kei mi ma dokodooga simi wo tei aso. Esiga edebeeyo wo hagee naga, diba badoboso kookaiyo gie badalaiso.”

<sup>59</sup> Yesuye Kapeniyum mapoo howo gisili moso ma kulodu odoo susuga mapoo eligilone goo susuga egeesee ka taka.

### *Yesuwo to ee gie badeli teneli*

<sup>60</sup> Esino Yesu yo deedee silesibili odoo oso Yesuye eligi goo ee duloso egeesee takaso, “Eligi goo hagee diya koudadoo. Odoo agayo to hagee talai ka teibayo?” dee takaso.

<sup>61</sup> Egeesi ma kulodu Yesu yo deedee silesibili odoo oso dima kulodu to boowoogamelee ee gooleedoloso dimapoo egeesee takaso, “Goo ayo hagee takoo oso nimapoo dala teneedo?”

<sup>62</sup> Goo hagoso nimapoo dala teneega, niyo Odoo Holo ayo see Kei mi ma dokodoo wedi pala ogoloso kasee goolaisomo?

<sup>63</sup> Dio Tei oso gie badeli ka tenemoloso. Esino suso goomoga goo oso gie badeli koo tenemoloso. To ayo nimapoo taka ee Dio Tei maga simi, esiga to oso gie badeli ka tenemoloso.”

<sup>64</sup> Yesu yo daga malalo olo gooleedooso, yimapoo tei telega pagalai odoo ee. Osoloso yo toloso ha teli odoo mapoo tiasalai odoo onosee yo olo gooleedooso. Esiga yayo dimapoo egeesee takaso, “Odoo abo nima kulodu egee do amapoo tei koo toso.

<sup>65</sup> Goo egeesi maga ayo to hagee nimapoo olo takaso, ‘Edebeeyo eyo goolee amapoo sibileime. Esino

Maye amapoo sibilame kitulugu te-nee odoo oso amapoo sibileiso,' dee takooso."

<sup>66</sup> Yesuye to hagee taka koodobume, yo deede silesibili odoo aboso yo deede silei gowoolone yo poogoo diso.

<sup>67</sup> Esem Yesuye o hamamee dili odoo 12 mapoo egeese takaso, "Niba nose a poogoo dilei goomogoso?" dee takaso.

<sup>68</sup> Esem Saimon-Pitaye nei egeese takaso, "Lodee, iba odoo ogu mapoo dileiyo? Hedebe nee to oso gie badeli ka tenemoloso.

<sup>69</sup> Esiga iyo namapoo tei toso. Osoloso iba gooleedooso, no tei odoo Godee maga simi oso," diso.

<sup>70</sup> Esem Yesuye nei dimapoo egeese takaso, "Ayo odoo 12 niba olo hudi magooso. Esino nima kulodu odoo hedebe Saiteneeyo tou teli odoo badoso."

<sup>71</sup> Esiga Yesuye to hageese taka egee, Saimon-Iskaliyot eyo owolo Yudas eyo goo ee taka. Bei, Yudas yinosee Yesuwo hamamee dili odoo 12 ee ma kulodu badeli. Esino yayo hamamee Yesu ha teli odoo mapoo tiasalaiso.

## 7

### *Yesuwo omolo dio oso yimapoo tei tele poogoo*

<sup>1</sup> Esiga goo hagoso dileso koodobume, Yesu yo Yudiya mi mapoo silei gowoolone, see Gelili mi mapoo dileso siliso. Bei, Yudiya mi omapoo Yu odoo dia wiligi odoo oso Yesu wooloomalame eli esiamo siliso.

<sup>2</sup> Osoloso Yu odoo dia Waseme moso maga wo nalai biame\* olo koola tabaso.

<sup>3</sup> Esem Yesuwo omolo dio oso yimapoo egeese takaso, "No mi hagee poogoloso see Yudiya mi mapoo di, no deede silesibili odoo

oso nayo goo toowa opusomo di moodooga ee agalame.

<sup>4</sup> Bei, edebeeyo o goo ee odoo susuga oso gooleedalai goomogoga, yo goo mada koo moodoomo siliya. Esiga no goo toowa opusomo di medee woola moodoomo sile, odoo susuga oso nee goo ee ogoloso gooleedalame," diso.

<sup>5</sup> Goo egeesi ma kulodu Yesuwo omolo dio oso yimapoo tei telega debeiso.

<sup>6</sup> Esem Yesuye nei dimapoo egeese takaso, "Ayo Yelusalem mapoo dilei biame koo tugodo. Esino niba dilei goomogoga, wulo biame hee mapoo dilei tekepo.

<sup>7</sup> Mi odoo oso niba hegilei eyo bei me. Esino diayo a hegiliso. Bei, ayo dia goo tokenee ee woola yilige buguga.

<sup>8</sup> Esiga niba wo ne mapoo diyadee. Esino a dileime. Bei, mo biame tugodelega."

<sup>9</sup> Yesuye egeese takoloso Gelili mi mapoo badebeiso.

### *Waseme moso maga wo ne biame mapoo Yesuye odoo mapoo eligi*

<sup>10</sup> Yesuwo omolo dio oso Waseme moso maga wo nalame Yelusalem mapoo paladee neme, Yesu yinosee hamamee palaso. Esino odoo howo woola palai gowoolone mada palaso.

<sup>11</sup> Osoloso wo ne ee ma kulodu Yu odoo dia wiligi odoo oso Yesu esilone egeese takaso, "Yesu kasomo?" dee takaso.

<sup>12</sup> Esem odoo mooloogoodoo toowa oso mada dima kulodu Yesuwo goo maga mada takomo silesibulone, odoo aboso egeese takaso, "Yesu odoo tekepo," dee takaso. Esino odoo aboso takolone, "Haye, yo wulo gamenee goo maga odoo peegoo ka gilimado du," dee takaso.

**6:68:** Mat 16:16    **7:1:** Yon 5:18    **7:2:** Lev 23:34    \* **7:2:** Yu odoo dia amawe diayo miwe poogoo mi mapoo dobolone, dugoso moso tegegaloso omapoo debeliso. Biame ee goolone, Yu odooso Waseme moso maga wo nali biame mapoo homo deeso waseme moso tegegaloso omapoo debeliso. Osoloso Yu odoo dia wo nali hagee sabolo osoloso abo ee Yelusalem mapoo naliso.    **7:5:** Diye 1:14



<sup>13</sup> Esino Yu odoo dia wiligi odoo bolo obulone, diayo Yesuwo goo maga to woola takele.

<sup>14</sup> Osoloso wo ne olo domo taba mapoo, Yesuye tei moso mapoo peleso Godeeyo to eligilame bei mooloogooso.

<sup>15</sup> Esemé Yu odoo oso yayo eligi goo ee duloso diya howoogadolone diayo egeesee takaso, “Odoó hagee kasi maga Godeeyo to susuga ka gooleedoowo? Bei, yo Godeeyo to gooleedeli sukulu mapoo dile,” dee takaso.

<sup>16</sup> Esemé Yesuye nei dimapoo egeesee takaso, “Ayo hagee eligi wulo mawo goolee koo eligili. Esino a diye di Godee maga simi goo ee eligili.

<sup>17</sup> Esiga Godeeye goomoga goo ee talame goomoga odoo oso ayo eligi goo hagee tei Godee maga simidoo doloso gooleedalaiso. Osoloso ayo mawo goolee koo eligili goo onosee gooleedalaiso.

<sup>18</sup> Edebeeyo eyo goolee eligimo siloga, yo o hu eyo nediliyo doko topoloso. Esino edebeeyo yo diye di odoo oso goolee ee eligimo siloga, yo diye di odoo eyo hu ee doko topoloso. Esiga yo tei goo takeli, osoloso yo gamenee koo takeli.

<sup>19</sup> Moseseeye nimapoo tei magoo hogugu ee teneeso. Esino niba susuga tei magoo hagee koo dedeli. Esiga kasi maga niyo a wooloomalame ka sala?”

<sup>20</sup> Esemé odoo mooloogoodoo oso nei yimapoo egeesee takaso, “Bo holoso nama kulodu palaga, no to egeesee ka takoo. Iba no wooloomalame koo seeso,” diso.

<sup>21</sup> Esino Yesuye dimapoo nei egeesee takaso, “Niyo hasali biame mapoo ayo goo toowa opusomo di hedebe moodoo ogoloso niba susuga dio diso.

<sup>22</sup> Egeesi ma kulodu niba noseé Moseseeye tei magoo ee dodolone

niyo hasali biame mapoo tou teliso. Bei, niyo Moseseeye tei magoo ee dodolone holope kolo kweliso. Esino holope kolo koolame tei magoo hagee Moseseeye magele. Esino nibada amawe diayo ka magoo.

<sup>23</sup> Esiga Moseseeye tei magoo gababiyaga hasali biame mapoo niyo holope kolo kweliso. Esino niyo kaseega ayo niyo hasali biame mapoo odoo paiye tekepo moodooga niyo amapoo ka komonowala?

<sup>24</sup> Esiga niyo wulo edebeeyo o suso goo moodoo ee ogoloso saga na midi. Esino tei goodee maga niyo o goo ka midi.”

### *Yesu tei Kelisowo?*

<sup>25</sup> Osoloso Yesuye to taka hagee duloso, Yelusalem odoo aboso dieso nediliyo egeesee takaso, “Odoó hagee ibada wiligi odoo oso wooloomalaigo dee takemeni osobe?”

<sup>26</sup> Niba ege, yayo odoo susuga eyo howo woola eligime, odoo heeso yimapoo to hee koo takooso. Esiga ibada wiligi odoo oso goolee yo tei Keliso goolee malaiso.

<sup>27</sup> Esiga Kelisoye siboga, mi yayo simi ee odoo heeso gooleedalaime. Esino mi Yesuye simi ee iba gooleedooso,” diso.

<sup>28</sup> Esemé Yesuye tei moso mapoo osee eligilone toso neligidi egeesee takaso, “O. Tei takoo. Mo goo sabolo osoloso ayo simi mi sabolo niba olo gooleedoodoo. Esino a mawo goolee maga sibilesa hamapoo koo badoso. Haye, a diye di odoo eyo goo ee tei, esino niba yo gooleedele.

<sup>29</sup> Esino hebebe ayo yo ka gooleedoo. Bei, a yimaga simi osoloso yayo a nimapoo sibeye diso.”

<sup>30</sup> Esemé biame omapoo wiligi odoo diba goomogaso, Yesu omapoo talame. Esino odoo heeso yimapoo goo hee moodele. Bei, o biame tu-godelega.

<sup>31</sup> Esino odoo mooloogoodoo ee ma kulodu odoo aboso Yesu mapoo tei tolone egeesee takaso, “Odoos heeso sibilesos goo toowa opusomos di moodooga, goo toowa opusomos di Yesuye moodoo hagee dagadileime. Esiga Yesu hagee tei iyo hagee bamolo Keliso oso,” dee takaso.

<sup>32</sup> Esiga odoo mooloogoodoo oso Yesuwo goo maga taka ee Pelisi odoo oso duso. Esiga Pelisi odoo egee bia sabolo osolosos tei moso wiligis odoo tebisa oso tei moso gidebeli odoo diye diso, diayo dilesos Yesu talame.

<sup>33</sup> Yesuye see odoo mapoo takolone egeesee takaso, “A biame deiyepo hamapoo nibolos hodobos badalaiso. Osolosos a diye di odoo mapoo see wedi dileisos.

<sup>34</sup> Niyo a esileisos. Esino niyo a agalaime. Bei, ayo badalai mi omapoo sibilei niba tebileime,” diso.

<sup>35</sup> Esemes Yu odoosos diesos nediliyos dima kulodus egeesee takaga meleesos, “Yo kamapoo dugas iyo yo egelegas ka pagalaiyo? Yo ibada odoo abo Gulikis odoosos debeli mi mapoo egee do mapoo dilesos Gulikis odoo mapoo Godeeyos to eligilame ka sabele.

<sup>36</sup> Osolosos yayos imapoo takolone, iyo yo esileisos, esino iyo yo agalaime. Osolosos, yayos badalai mi omapoo sibilei iba tebileime, dee taka eyos bei ogoobos?” dee takemeleesos.

### *Gie badeli teneli howo*

<sup>37</sup> Esiga Wasemes moso magas wo ne hamameedes biames egeesee goo toowa. Osolosos biames omapoo Yesuyes toholosos to neligidis egeesee takaso, “Odoos agayos howos ka na poogoo-somos, yo amapoo howos nala sibeyes dees.

<sup>38</sup> Osolosos Godeeyos to bookas mapoo hogugus osos egeesee takoosos, ‘Edebeeyos amapoo tei togas, gie badeli teneli howos osos yimas kulodugas gasibileisos.’”

<sup>39</sup> Esiga Yesuyes goo takas hagees, yimapoo tei too odoo mapoo Dios Tei tenelais gos ee takolone egeesee ka takas. Esino epedes omapoo Dios Tei dimapoo teneles. Bei, Yesu yo Amas mapoo pelegas.

<sup>40</sup> Esiga odoo mooloogoodoo ee ma kulodugas odoo abosos Yesuyes takas to ee dulosos egeesee takaso, “Odoos hagees tei Godees magas to tolosos kokodos takomos sili odoo sibabeleos iyo bamelees osodos,” dee takagas meleesos.

<sup>41</sup> Esemes odoo abosos egeesee takaso, “Yo Kelisos,” dee takemeleesos. Esino abosos egeesee takaso, “Hayes, yo Kelisonees. Bei, Kelisos yo Gelilis mi magas sibileime.

<sup>42</sup> Bei, Godeeyos to bookas mapoo hogugus osos egeesee takoosos, ‘Kelisos yo Deibidiyos amawes dios dima kulodugas sibileisos. Osolosos yo Deibidiyos badebeis mi Betilihem mapoo soomagalaisos,’ disos,” dee takaso.

<sup>43</sup> Egeeseelones Yesuwo goo magas odoo abos pulosos debeisos.

<sup>44</sup> Osolosos odoo abosos Yesu talames goomogagos. Esino odoo heesos yimapoo gos hees moodeles.

### *Yu odoo dia wiligis odoo tebisa oso tei tele poogoo*

<sup>45</sup> Esemes epedes omapoo tei mosos gidebeli odoo osos see mosoowes wedi simis ogolosos, tei mosos wiligis odoo tebisa sabolos, osolosos Pelisis odoo osos dimapoo egeesee takaso, “Beis kasemes niyos Yesu hamapoo idos sibilegas ka poogoowos?” disos.

<sup>46</sup> Esemes diayos neis egeesee takaso, “Dagas odoo heesos to Yesuyes kelis egeesee koo kelis,” dee takaso.

<sup>47</sup> Esemes Pelisis odoosos neis dimapoo egeesee takaso, “Niba nosees yayos eligis gos osos peegos gilimados disomos?”

<sup>48</sup> Esino Pelisis odoo imas kulodus osolosos ibadas wiligis odoo dima kulodus odoo heesos yimapoo tei too niyos egeisosos? Hayes.

<sup>49</sup> Esino odo moologoodoo hagee ma kulodu, odo aboso Moseseeye tei magoo goo ee kibiya gooleedega tei tooso. Esiga diba Godeeyo kamana ma hemidu doso.”

<sup>50</sup> Esiga dima kulodu Pelisi odo hee badebeiso, o hu Nikodimas. Daga yayo gesi Yesu agalame diso. Esiga yayo dimapoo egeesee takaso,

<sup>51</sup> “Moseseeye tei magoo ee dodolone iyo daga odo o goo midilega, wulo o tokenee eyo nei tenelai ee tekeponee,” diso.

<sup>52</sup> Esem Pelisi odo abo sabolo osoloso wiligi odo tebisa oso yimapoo egeesee takaso, “Nonosee Gelili odoowo? No Godeeyo to booka mapoo hogugu ee medee hesigaloso gooleede. Bei, Godeeyo toso egeesee takooso, Godee maga to toloso kokodo takomo sili odo ee Gelili mi maga sibileime.”

[<sup>53</sup> Osoloso to kesamelee omapoo koodobuloso odo susuga dia mosopoo diyadeeso.

## 8

*Kooka soboso adaba giso goo heli too*

*Yesu mapoo ido simi*

<sup>1</sup> Esino Yesu Olipi mubi ma dokodoo palaso.

<sup>2</sup> Osoloso gesikolodee Yesu yo tei moso mapoo wedi sibilesi bado-boome, odo susuga oso yimapoo simiso. Esem yayo omapoo badolone odo eligimeleeso.

<sup>3</sup> Esem domo omapoo tei eligili odo sabolo, osoloso Pelisi odo oso kooka sobo heeso adaba giso goo heli too ee ogoloso, diayo yo ido sibilesi odo howo woola tebediso.

<sup>4</sup> Esem diayo Yesu mapoo egeesee takaso, “Eligili odo, kooka sobo hagoso adaba giso goo heli tomo

sileeme ogoloso yo hamapoo ka ido simi.

<sup>5</sup> Moseseeye tei magoo hogugu oso egeesee takaso, ‘Sobo heeso goo hageesee toga, yo yoso enigameleso wooloome,’ dee takooso. Esiga nayo imapoo takee, iyo sobo hamapoo goo kasee moodoolaisomo?” dee takaso.

<sup>6</sup> Goo egeesi maga Yesuye to toke-nee takooga ka midilame, diayo yo kukolo egeiso.\*

Esino Yesu miyomoo gauwuloso dee woluguso mi mapoo hogugu meleeso.

<sup>7</sup> Esino diayo yimapoo osee woosa molome, Yesu yo toboloso dimapoo egeesee takaso, “Esiga nima kulodu odo hee goo tokenee koo teli daga, odo ogoso malalo sobo omapoo yoso ka enige,” diso.

<sup>8</sup> Osoloso Yesu see tobu miyomoo gauwuloso dee woluguso mi mapoo hogugu meleeso.

<sup>9</sup> Esem odo susuga sobo egee ido simi oso Yesuwo to duloso obulone, daga adaga dimaga bei mooloogoloso hedebe du, hedebe du diso. Osoloso odo susuga olo poogoo dulone, hedebe Yesu dio sobo egee dio omapoo poogooso.

<sup>10</sup> Esem Yesuye toboloso sobo mapoo egeesee takaso, “Sobo, no goweli odo hamapoo debei ee kaso-omo? Odo hee nee tokenee eyo nei namapoo dala tenelai hedebe badolo?” dee takaso.

<sup>11</sup> Esem sobo ogoso nei Yesu mapoo egeesee takaso, “Wiligi odo, haye, odo hee medoo,” diso.

Esem Yesuye yimapoo egeesee takaso, “Anosee nee tokenee eyo nei ayo namapoo dala tenelaime. Esiga no di. Esino no tokenee see tobu na te,” dee takaso.]

*Yesu mipoo hageeyo gadeebugu*

**7:50:** Yon 3:1-2 **7:52:** Yon 7:41-42 **8:5:** Lev 20:10; Deut 22:22-24 \* **8:6:** Biame omapoo Yu odo oso tei magoo bakadio ee dodolone debeiso. Moseseeye tei magoo hogugu oso egeesee takaso, “Sobo heeso goo hageesee toga, yo yoso enigameleso wooloome,” dee takooso. Esino Loum gamalee eyo tei magoo hogugu oso egeesee takaso, “Goo ee tei.” Yesuye takolone, sobo egee wooloome, dee takooga, yayo Loum gamalee eyo tei magoo ee gababileiso. Esino yayo takolone, sobo egee na wooloome, dee takooga, yayo Moseseeye tei magoo ee gababileiso. **8:7:** Deut 17:7 **8:11:** Yon 5:14 **8:12:** Isa 49:6; Yon 1:4-9; 9:5; 12:46

12 Esemee Yesuye odo mooloo-goodoo mapoo see egeesee takaso, “Mipoo hageeyo gadeebugu ee aso. Esiga a dodomo sili odo yo neliga ma kulodu sileime. Esino yo gie badeli talai eligili gadeebugu ee talaiso,” dee takaso.

13 Esemee odo mooloogoodoo ee ma kuloduga Pelisi odoosi nei egeesee takaso, “No wulo nee goo ee takomolo. Esiga nayo egee takoo goo ee iba tei koo toso,” dee takaso.

14 Esemee Yesuye nei dimapoo egeesee takaso, “O. Tei takoo. A mo goo ee takooso. Esino ayo hagee takoo tei goo taka. Bei, ayo simi mi ee a gooleedoo. Osoloso ayo dileso badalai mi onosee a gooleedoo. Esino ayo simi mi sabolo, osoloso ayo dileso badalai mi ee, niba gooleedele.

15 Esiga mi odo dia goo ee dodolone, niyo emegei dia goo ee midiliso. Esino ayo emegei dia goo ee koo midili.

16 Esino ayo emegei dia goo midilei gooleega, ayo medee tei goo maga dia goo midileiso. Bei, ayo mobusomo koo midili. Esino mo Ma a diye di sabolo goo ka midili.

17 Esiga Moseeeye tei magoo hogugu oso egeesee takooso, ‘Goo hedebe mapoo odo bakadio oso to hedebe onosee takooga, diayo egee takoo ee tei goo takooso,’ deliso.

18 Esiga anosee tei magoo egee dodolone mawo nediliyo mo goo maga tei goo takooso. Osoloso mo Ma a diye di oso mo goo maga tei goo takeliso.”

19 Esemee Pelisi odoosi nei yimapoo egeesee takaso, “Nama kasomo?” diso. Esino Yesuye dimapoo egeesee takaso, “Mo Ma sabolo osoloso a, niba gooleedele. Niba a gooleedoo diepi, mo Ma nose niba gooleedeliyo,” dee takaso.

20 Yesuye tei moso ma kulodu emegei di molee tenee mageli koola

omapoo tobodulone, goo susuga hagee eligimeleeso. Esino odo heeso yo tele. Bei, o biame tugodel-ega.

### *Yesu eyo o goo taka*

21 Esemee Yesuye see dimapoo egeesee takaso, “Ayo peegoo duga, niyo a esileiso. Esino niba goo tokenee ma kulodu dobolone, nibada goo tokenee hapelega poogoloso wedileiso. Osoloso ayo badalai mi omapoo sibilei, niba tebileime,” dee takaso.

22 Esino Yu odo oso egeesee takaso, “Bei kasi maga Yesuye takolone, yayo badalai mi omapoo sibilei, iba tebileime, dee ka takayo? Iba gooleedele, Yesu eyo nediliyo wooloomalame ka sabele,” diso.

23 Esemee Yesuye dia to duloso nei egeesee takaso, “Niba mipoo hamapoo debeli odo. Esino a Kei mi ma dokodooga simi. Esiga niba mi odo. Esino a mi odoonee.

24 Goo egeesi maga ayo nimapoo takolone, nibada goo tokenee hapel-ega poogoloso wedileiso, dee ka taka. Bei, ayo mo goo\* maga taka mapoo niyo tei telega poogooga, niba nibada goo tokenee hapelega poogoloso wedileiso.”

25 Esemee diayo nei egeesee takaso, “No odo ogumo?” diso. Esemee Yesuye nei dimapoo egeesee takaso, “Ayo nimapoo eligi bei mooloogooloso abaga simino epedee hamapoo mo goo nimapoo olo eligiso.

26 Esiga ayo nimapoo tokenee odo dee takalai goo bei moloso. Esino a diye di odo oso takeme du goo ono ayo odo mapoo ka takomo sili. Bei, yo tei goo takeli.”

27 Egeesi ma kulodu Yesuye amamo goo takano, Yu odoosi duloso medee kibiya gooleedele.

28 Esemee Yesuye see dimapoo egeesee takaso, “Niyo Odo Holo a

**8:14:** Yon 5:31-32; 7:28    **8:15:** Yon 12:47    **8:16:** Yon 5:30; 8:29    **8:17:** Deut 19:15    **8:18:** 1Yon 5:9    **8:20:** Yon 7:30    **8:21:** Yon 7:34; 13:33    **8:23:** Yon 3:31    \* **8:24:** *ayo mo goo* - Godeeyo to Guliki odo dia toso hogugu mapoo Yesuye takolone, yo aso, dee taka egee yo Keliso, Godeeye hesia dolone ka taka.    **8:28:** Yon 3:14



toloso dokodoo poudoga,\* omapoo niyo mo goo ee medee kibiya gooleedalaiso. Osoloso ayo mawo goomoga goo koo tomo sili goo onosee niba gooleedalaiso. Bei, mo Maye amapoo taka goo hedebe ee ayo ka eligimo sili.

<sup>29</sup> Esiga a diye di odoo ee abolo hodobo badoso. Yo a koo poogoo dili. Bei, ayo hedebe yo goomogalai goo ono tomo sili.”

<sup>30</sup> Esiga Yesuye goo hagee takeme, odoo susuga yimapoo tei tooso.

*Tei goo oso odoo tokenee ma kuloduga  
peegoo gilimado dili*

<sup>31</sup> Esemé Yesuye Yu odoo yimapoo tei telaga odoo mapoo egeesee takaso, “Niyo ayo eligi goo hamapoo medee kibiya kookoodoloso dodomo silesiboga, niba tei mo hamamee dili odoo dalaiso.

<sup>32</sup> Esiga niba tei goo ee gooleedalaiso. Osoloso tei goo oso niba nei mauwe tou teli goo maga peegoo gilimado dileiso.”

<sup>33</sup> Esemé diayo Yesu mapoo egeesee takaso, “Eibalahameeyo amawe dio ibaso. Esiga iba odoo heeso wiligi doloso badoboome, hegi goo ma kulodu nei mauwe o tou tolone ka debele. Bei kasi maga nayo imapoo takolone, ‘hegi goo ma kuloduga puo pagalaiso,’ dee ka takala?”

<sup>34</sup> Esemé Yesuye nei dimapoo egeesee takaso, “Ayo nimapoo taka. Edebeeyo goo tokenee tolone badoga, yo goo tokeneeso wiligi doloso ka badoso.

<sup>35</sup> Esiga nei mauwe tou teli odoo ee o wiligi odoo eyo soosoo sabolo kookaiyo osee koo badeli. Esino owoloye o soosoo sabolo kookaiyo osee badeliso.

<sup>36</sup> Esiga Owolo ayo niba tokenee goo ma kuloduga puo poogooga, niba tokenee goo ma kuloduga tei olo puo pagalaiso.

<sup>37</sup> A gooleedooso, niba Eibalahameeyo amawe dio. Esino niyo a wooloomalame ka goomogoso. Bei, ayo eligi goo ee nima kulodu malai, niba koo goomogoso.

<sup>38</sup> Mo Maye goo amapoo eligi ee ayo nimapoo ka takomo siloso. Esino niba nose nibada amaye takeme du goo ee tomo silesiboso.”

<sup>39</sup> Esemé diayo nei Yesu mapoo egeesee takaso, “Ibada ama ee Eibalaham,” diso.

Esemé Yesuye nei dimapoo egeesee takaso, “Niba tei Eibalahameeyo owolo dio diepi, niyo goo Eibalahameeyo moodoo egeesee moodoolone debeli.

<sup>40</sup> Esino tei goo Godeeye amapoo tenee ee ayo takomo sileeme, niyo a wooloomalame seeso. Esino Eibalaham goo egeesi moodele.

<sup>41</sup> Esiga goo nibada amaye moodoo hedebe onosee niyo ka moodoomo siloso.”

Esemé diayo Yesu mapoo egeesee takaso, “Iba giba holonee. Esino ibada Amadee ee hedebe Godeeso,” dee takaso.

<sup>42</sup> Esemé Yesuye nei dimapoo egeesee takaso, “Godee tei nibada Ama diepi, a niyo diya goolee sabolo debeliyo. Bei, a Godee maga sibiles hamapoo ka badoso. Yayo a diye diso. Esiga a mawo goolee sibiles hamapoo koo badoso.

<sup>43</sup> Niba kasi maga goo ayo taka ee duloso gooleedelega ka dabala? Niba goo ayo eligi ee dulei gowoolone ka seeso.

<sup>44</sup> Esiga nibada ama ee Saiten. Esiga niyo o goo ogoloso yayo goomoga goo ee talame diya goomegeliso. Bei, bei mooloogoo biame maga epedee hamapoo sibulone yo odoo wooloomali doloso badebeiso. Osoloso yo gamenee takeli odoo. Bei, yima kulodu tei goo takeli me. Osoloso yayo gamenee takooga, yayo wulo o goo ee takeli. Bei, yo gamenee

\* **8:28:** a *toloso dokodoo poudoga* - Yesuye taka hageeyo bei ee, yo homo bulubo magoo ma dokodoo yoguso enigaloso pouduloso tulugilei ee taka. **8:33:** Mat 3:9 **8:34:** Loum 6:16, 20 **8:39:** Mat 3:9 **8:41:** Isa 63:16 **8:44:** 1Yon 3:8

takeli odo. Osoloso gamenee takeli eyo bei yoso.

<sup>45</sup> Esiga ayo nimapoo tei goo take-liso. Goo egeesi maga niyo mo to mapoo tei koo teli.

<sup>46</sup> Esiga goo tokenee ayo moodoo ee niyo egeisomo? Haye, me. Ayo tei goo takomo silino, niyo kaseega mo to mapoo tei tele ka pagala?

<sup>47</sup> Godeeyo odo oso o to duloso omapoo mesimo silesibiliso. Esino niba Godeeyo odoonee. Esiga goo egeesi maga niba o to duloso omapoo mesilega ka poogooso.”

### *Yesuye Eibalaham dagadi*

<sup>48</sup> Esemé Yu odooso nei Yesu mapoo egeese takaso, “Iyo namapoo takolone no Samaliya odo bo holo pala, dee takemeni ee tei taka.”

<sup>49</sup> Esemé Yesuye nei dimapoo egeese takaso, “Mo kulodu bo holo koo badoso. Esino ayo mo Mayo hu dokodoo poudiliso. Esino niyo abolo takolone mo hu dokodoo poudilega pegeliso.

<sup>50</sup> Esiga edebeeyo mo hu dokodoo poudalame ayo goo hagee koo tomo siloso. Esino odo heeso diya goomogoso, edebeeyo mo hu dokodoo poudalame. Yo goo midili odo.

<sup>51</sup> Esiga ayo nimapoo tei goo taka. Odo agayo mo to mapoo mesimo siloga, yo talaime.”

<sup>52</sup> Esemé Yu odooso Yesu mapoo egeese takaso, “Iba epedee olo gooleedo, no tei nee kulodu bo holo bado. Bei, nayo daga egeese takaso, ‘odo agayo nee to mapoo mesimo siloga, yo talaime,’ diso. Esino ibada amawe Eibalaham dio osoloso Godee maga to toloso kokodo takomo silesibili odo diba olo wediaso.

<sup>53</sup> Esiga ibada amawe Eibalaham ee nayo dagadi doloso ka takala? Bei, ibada amawe Eibalaham olo taso, osoloso Godee maga to toloso kokodo

takomo silesibili odo onosee olo wediaso. Egeesi ma kulodu nayo goolee no odo ogu gweliyo?” dee takaso.

<sup>54</sup> Esemé Yesuye nei dimapoo egeese takaso, “Ayo goo tomo sili hagee mo hu dokodoo poudalame ka tomo sili diepi, goo hagee bei mauwe meliyo. Esino mo Maye mo hu dokodoo ka poudomoloso. Yo niyo takolone nibada Godee deliso.

<sup>55</sup> Esino niba yo gooleede. Esino ayo yo ka gooleedo. Esino ayo takolone, ‘a o goo gooleede,’ dee takeli diepi, a gamenee takeli odo niba egeesi masi badeliyo. Esino a o goo gooleedo, osoloso a to yayo taka mapoo mesimo siliso.

<sup>56</sup> Esiga nibada amawe Eibalaham goomogaso, ayo mipoo hamapoo simi ee agalame. Osoloso a olo sibume, yayo ogoloso diya goomogaso.”

<sup>57</sup> Esemé Yu odooso nei yimapoo egeese takaso, “No dugo 50 tugodele. Esino nayo takolone, no Eibalaham olo egeiso, dee ka takala?”

<sup>58</sup> Esemé Yesuye nei dimapoo egeese takaso, “Ayo tei goo nimapoo ka taka. Bei, Eibalaham soomagelega badoboome, daga a olo badebeiso.”

<sup>59</sup> Yesuye egeese taka duloso di-ayo komonolone, yo toloso enigilame sino poogooso. Esemé Yesu mada wua moloso tei moso ma kuloduga peego diso.

## 9

### *Yesuye odo howo neliga osee soomagoo ee tekepo pa*

<sup>1</sup> Esiga Yesu yo dulone odo hee egeiso. Odo egee oweeye soomagolone howo neliga o egeesi soomagoona.

<sup>2</sup> Esemé Yesu o hamamee dili odo oso Yesu mapoo egeese takaso, “Eligili odo, odo agamo goo tokenee oso yo howo neliga egeese ka soomagoowo? O goo tokenee oso

egeesee ka soomagoowo, o owee dio ama dio eyo goo tokenee maga howo neliga egeesee ka soomagoowo?" dee takaso.

<sup>3</sup> Esemme Yesuye egeesee takaso, "Odoos howo neliga hagee o goo tokenee oso egeesee ka sele, osolosoo ama dio owee dio eyo goo tokenee oso egeesee ka sele. Esino odoos howo neliga soomagoos goo eyo bei ee egeesi moloso. Godeeye kitulugoo goo ee yimaga woola yilige bigilame, yo howo neliga egeesee ka soomagoosoo.

<sup>4</sup> Esiga biame osee mologa, iba odoos a diye di eyo tou ee tomo. Esino gesi olo siboga, odoos heeso tou hee talai tebileime.

<sup>5</sup> Esiga ayo mipoo hamapoo osee hagee bado oso mipoo hamapoo keme masi gadeebugoo ka moloso."

<sup>6</sup> Yesu to hagee takoloso mi mapoo magawoo pagamagoloso, deeso deeseegoloso omapoo beesee doloso odoos howo neliga eyo howo mapoo hediso. <sup>7</sup> Osolosoo odoos omapoo egeesee takaso, "No Sailowam howo ou mapoo nee howo hapalame di," diso. Esiga Sailowam hu eyo bei ee diye dolone takeli. Esemme odoos egee dileso o howo hapoomoo tekepo paso. Esemme yo see wedi sibulone medee ogomoo simiso.

<sup>8</sup> Egeesi ma kulodu odoos koola mapoo debeli sabolo osolosoo odoos aboso yo daga eli domopoo bi howolone badoboome egei oso egeesee takaso, "Odoos hagee eli palaga bi howolone badoboome oso bele," diso.

<sup>9</sup> Esemme odoos aboso egeesee takaso, "O. Odoos hedebe ogosoo," dee takemeleeso. Esino odoos aboso egeesee takaso, "Haye, odoos ogosonee, odoos hee yo masi molodoo," dee takemeleeso. Esemme odoos eyo egeesee takaso, "Odoos egee tei asoo," dee takemeleeso.

<sup>10</sup> Esemme diayo yimapoo egeesee takaso, "Nee howo kaseme tekepo ka payoo?" diso.

<sup>11</sup> Esemme yayo egeesee takaso, "Edebeeyoo takolone Yesu deli oso mi mapoo magawoo pagamagoloso, deeso deeseegoloso omapoo beesee doloso mo howo mapoo basago hediloso amapoo egeesee taka, a Sailowam howo ou mapoo mo howo hapalame diyena. Esemme a dileso mo howo keesee hapoonoo tekepo ka poowa," diso.

<sup>12</sup> Esemme diayo yimapoo egeesee takaso, "Odoos egee kasomoo?" Esemme yayo dimapoo egeesee takaso, "A gooleedelee," dee takaso.

### *Pelisi odoosoo odoos howo neliga tekepo pa mapoo woosoo*

<sup>13-14</sup> Yesuye odoos howo neliga tekepo pa hagee, Yu odoosoo hasali biame mapoo tekepo ka pa. Esiga odoos aboso odoos howo neliga Yesuye tekepo pa ee Pelisi odoos mapoo ido diso.

<sup>15</sup> Esemme Pelisi odoosoo yimapoo egeesee takaso, "Nee howo kaseme tekepo ka payoo?" diso. Esemme nei yayo dimapoo egeesee takaso, "Yesuye basago beesee doloso mo howo mapoo hedime, mo howo howomoo keesee hapoonoo, see tekepo ka pa," dee takaso.

<sup>16</sup> Egeesee taka duloso Pelisi odoos aboso egeesee takaso, "Yesu hagee Godee maga sibile. Bei, yo Godee maga simi diepi, ibada hasali biame mapoo tou tolone tei magoo ee gababile pegeliyo," diso.

Esino odoos aboso egeesee takaso, "Kaseme maga goo tokenee teli odoos oso goo toowa opusomoo di hageesee ka moodoomoo silosomoo?" dee takemeleeso. Goo egeesi maga Pelisi odoosoo Yesuwo goo maga diesoo dima kulodu domoo pi meleeso.

<sup>17</sup> Osolosoo Pelisi odoosoo odoos howo neliga tekepo pa mapoo see tobu egeesee woosoo, "Odoos nee howo tekepo pa ee odoos ogoo gooleesomoo?" diso. Esemme odoos ogosoo nei egeesee takaso, "Ayo goolee, yo Godee maga

to toloso kokodo takomo sili odoo gooleeso,” dee takaso.

<sup>18</sup> Esino odoo hagee daga tei howo noluguloso badebei goo omapoo Yu odoo dia wiligi odoo diba tei dele. Esiga tei goo beleso gooleedalame, diayo owee dio ama dio idooso.

<sup>19</sup> Osoloso diba olo sibilesa tebisamolome, wiligi odooso dimapoo egeesee takaso, “Niyo takolone, nowolo howo neliga osee soomagoogo, dee takemeni ee hagosomo? Esiga kasi maga epedee o howo olo tekepo poloso ka badosomo?” dee takaso.

<sup>20</sup> Esemee owee dio ama dio oso nei egeesee takaso, “O. Hagee tei ibada owolo howo neliga osee soomagoo oso, goo ee iba gooleedooso.

<sup>21</sup> Esino o howo kasee tekepo payo? Iba gooleedele. Osoloso odoo yo tekepo pa onosee, iba gooleedele. Esiga niso ibada owolo mapoo woosalo ege. Bei, yo olo kauwudooga, yayo o goo ee nimapoo takalai teiba,” dee takaso.

<sup>22</sup> Diayo dia wiligi odoo tebisa ogoloso obulone wulo dimapoo to hageesee ka taka. Bei, Yu odoo dia wiligi odoo oso goomoga goo hageesee olo magooso, “Edebeeyo takolone Yesu ee Keliso dee takooga, yo Yu odoo dia howo gisili moso ma kuloduga hu taloso peegoo magoo damalaiso,” dee takaso.

<sup>23</sup> Goo egeesi maga owee dio ama dio oso takolone, “Yo olo kauwudooga, yayo o goo ee nimapoo takalai teiba,” dee ka taka.

<sup>24</sup> Esiga Yu odoo dia wiligi odoo oso see tobu odoo howo neliga tekepo pa ee idoloso yimapoo egeesee takaso, “Godeeyo howo woola nayo imapoo tei goo takee. Bei, odoo no tekepo pa egee goo tokenee teli odoo, iba gooleedoo.”

<sup>25</sup> Esemee odoo ogoso nei egeesee takaso, “A gooleedele, yo goo tokenee teli odoo bele, o, goo tekepo teli odoowo. Egeesi ma kulodu goo hagee a gooleedoo, a daga howo

neliga badebeiso. Esino epedee hamapoo mo howo olo tekepo poloso see ka ogomo siloso.”

<sup>26</sup> Esemee diayo nei yimapoo egeesee takaso, “Odoo hagoso namapoo kasee moodoome, nee howo see tekepo ka payo?” dee takaso.

<sup>27</sup> Esemee odoo ogoso nei egeesee takaso, “Ayo nimapoo goo susuga olo takaso. Esino niyo mo to medee dule. Esiga niyo bei kasalame goo egee see dulame ka sala? Esiga niba nosee yayo di hamamee dilei goomogolone ka sala?” dee takaso.

<sup>28</sup> Esemee diayo yo manolone yimapoo egeesee takaso, “No o hamamee dili odoo. Esino iba Moseseyo hamamee dili odoo.

<sup>29</sup> Bei, Godeeye Moses mapoo to taka ee, iba gooleedooso. Esino odoo no tekepo pa ee, iba gooleedele.”

<sup>30</sup> Esemee odoo ogoso nei egeesee takaso, “Goo hagee kaseeyo? Yayo mo howo tekepo paso. Esino niba o goo gooleedelega ka dosomo?”

<sup>31</sup> Bei, iba gooleedoo, Godee yo goo tokenee teli odoo eyo to koo duli. Esino yayo o to mapoo mesiloso yayo goomoga goo tomo silesibili odoo eyo to ee duli.

<sup>32</sup> Esiga mipoo hagee bei mooloo-goo maga simino epedee hamapoo, odoo heeso odoo howo neliga soomagoogo ee tekepo paso dee taka goo ee iba dule.

<sup>33</sup> Esino Yesuye mo howo tekepo ka pa. Esiga yo Godee maga sibile diepi, yayo goo hee moodoolai tebile pegeliyo.”

<sup>34</sup> Esemee diayo gowoolone nei yimapoo egeesee takaso, “No gie daga soomagoo biame maga simino epedee hamapoo, no goo tokenee teli odoo doloso badebeiso. Esiga nayo kasalame imapoo goo eligilame ka sala?” dee takaso. Esemee diayo yo toloso howo gisili moso ma kuloduga peegoo ido diso.

*Diowo howo seme*



<sup>35</sup> Esino Yu odoo dia wiligi odoo tebisa oso odoo howo neliga tekepo pa ee howo gisili moso maga peegoo ido di goo ee Yesu yo duso. Esiga yayo odoo egee ogoloso yimapoo egeesee takaso, “No Odoo Holo mapoo tei tosomo?” dee takaso.

<sup>36</sup> Esemé odoo ogoso nei egeesee takaso, “Odoo Holo ee odoo ogumo? Amapoo takee, eseega ayo yimapoo tei ka talaiya,” dee takaso.

<sup>37</sup> Esemé Yesuye yimapoo egeesee takaso, “No yo olo egeiso. Esiga yayo epedee nobolo to egee komoloso,” diso.

<sup>38</sup> Esemé odoo ogoso nei egeesee takaso, “Lodee, a namapoo tei toso.” Osoloso yo gasuwoloso badolone Yesuwo hu dokodoo poudooso.

<sup>39</sup> Esemé Yesuye egeesee takaso, “Ayo mipoo hamapoo goo midilame simiso. Goo ee odoo howo neliga oso see medee agalame, osoloso odoo howo tekepo ee see howo neligalame,” dee takaso.

<sup>40</sup> Esemé Pelisi odoo abo koola omapoo tebisamelee oso Yesuye to egeesee taka ee duloso yimapoo egeesee takaso, “Nayo goolee, iba howo neliga goolone, egeesee ka takala?” dee takaso.

<sup>41</sup> Esemé Yesuye nei dimapoo egeesee takaso, “Niba howo neliga odoo diepi, niba goo tokenee teli odoo dele pegeliyo. Esino niyo takolone, niba howo neliga odoonee dee egee takoo oso niba goo tokenee teli odoo doloso osee ka doso.”

## 10

### *Sipi be bali odoo eyo goo maga wudu taka*

<sup>1</sup> Yesuye see egeesee takaso, “Ayo nimapoo taka. Edebeeyo sipi be beelee ma kulodu osulu maga gadilega, see eli hee maga sibilesi kulodu gaduga, yo heli teli odooso.

<sup>2</sup> Esino osulu maga gadili odoo ee tei sipi be bali odoo oso.

<sup>3</sup> Esiga osulu gibadeli odoo oso osulu yadeliso, sipi be bali odoo oso kulodu gadilame. Osoloso sipi beso dia bali odoo eyo to duliso. Osoloso dia bali odooso dia hu hesigaloso, beelee ma kuloduga peegoo gilimado diliso.

<sup>4</sup> Osoloso yayo o sipi be susuga peegoo gilimado dileso, daga yayo malalo duga, diba yima hamamee diliso. Bei, diba o to gooleedooga.

<sup>5</sup> Esino diba odoo heeso di hamamee koo dili. Esino ee ma kulodu odoo heeso diba sibilame haga, diayo yimaga kukulo dileiso. Bei, diba odoo egeeyo to gooleedelega.”

<sup>6</sup> Yesuye wudu takolone odoo mapoo hageesee eligiso. Esino wudu taka goo eyo bei ee diba medee kibiya gooleedele.

### *Yesu yo osulu*

<sup>7</sup> Osoloso Yesuye dimapoo see egeesee takaso, “Ayo nimapoo taka. Sipipi be beelee eyo osulu ee aso.\*

<sup>8</sup> Esino a sibilega badoboome, odoo susuga daga malalo sibadee egee bia ee heli teli odooso. Esiga sipi beso dibada to duloso mesile.

<sup>9</sup> Osulu aso. Edebeeyo amaga gaduga, yo Godeeye wiligi doloso badeli goo mapoo gadileso, kookaiyo badoboso gie badeli talaiso. Osoloso yo siloga, Yesuye medee bamalaiso.

<sup>10</sup> Esiga heli teli odoo ee wulo heli talame, osoloso odoo wooloomalame, osoloso tokenee palame ka sibili. Esino ayo simi hagee, niyo gie badeli toloso, goo tekepo susuga ee tolone dabalame ka simi.”

### *Yesu sipi be medee bali odoo*

<sup>11</sup> “Esiga sipi be medee bali odoo ee aso. Egeesi ma kulodu sipi be medee bali odoo oso o sipi be ee goologalame o gie badeli teli mapoo mageliso.

<sup>12</sup> Esino nei talame tou teli odoo oso sipi be medee belega pegeliso.

**9:40:** Mat 15:14 \* **10:7:** Edebeeyo Godeeye wiligi doloso badeli goo mapoo gadili ee Yesu maga ka gadili. **10:8:** Jer 23:1-2; Ezek 34:2-3 **10:11:** Psa 23:1; Yili 7:17 **10:12:** Diye 20:29

Bei, yo sipi be bali odoonee, osoloso sipi be hagee tei onee. Esiga dobu so simi ogoloso sipi be omapoo poogoloso yo pulo diliso. Esiega dobu soso sibilesi sipi be abo wooloomaga, abo kukulo diliso.

<sup>13</sup> Bei, nei talame tou teli odoososo sipi be medee goolega, wulo pulo diliso.

<sup>14-15</sup> Esiga sipi be medee bali odoososo ee aso. Egeesi ma kulodu mo Maye mo goo ee gooleedoloso ka badoso. Osoloso ayo mo Mayo goo onosee gooleedoloso ka badoso. Goo egeesi masi mo sipi beso a gooleedoloso ka doso, osoloso ayo diba gooleedoloso ka badoso. Esiga mo sipi be ee goologalame ayo mo gie badeli teli mapoo magalaiso.

<sup>16</sup> Osoloso mo sipi be abo\* dono, diba mooloogoodoo hagee ma kulodu mauwe. Esiga a goomogoso, diba nosee gilimado sibilame. Osoloso diayo mo to duleiso. Osoloso diba soosoo hedebe doloso doga, bali odoososo hedebeeso bamalaiso.

<sup>17</sup> Esiga mo Maye a diya gweliso. Bei, ayo mo gie badeli ee teli mapoo magalaiso, osoloso see ka talame.

<sup>18</sup> Esiga odoososo heeso mo gie badeli ee amaga peedee dalaime. Esino mawo goomoga goo ee dodolone, ayo mo gie badeli ee wulo wulayo tenelaiso. Esiga ee ma kulodu, ayo mo gie badeli ee odoososo halo teli mapoo magalai amapoo kitulugu moloso, osoloso see peedee dalai amapoo kitulugu moloso. Bei, goo hagee mo Maye ayo moodoolame amapoo kitulugu sabolo olo takaso.”

<sup>19</sup> Esememe Yu odoososo Yesuwo to dulososo dieso dima kulodu toso agadigilone abo piso.

<sup>20</sup> Egeeseelone odoososo abososo egeeseetakaso, “Yo bo holo peleso badolone

ka halaboomo silo. Esiga o to na dui,” dee takaga meleeso.

<sup>21</sup> Esino odoososo abososo egeeseetakaso, “Odoososo bo holo pala oso goo tekepo hageesi kasee takomo sileiyo? Osoloso bo holoso odoososo howo neliga tekepo palai teibayo?” dee takaga meleeso.

*Yu odoososo Yesu mapoo tei tele poogoo*

<sup>22</sup> Esiga wau biame mapoo Yelusalem mi mapoo Yu odoososo dia tei moso osulu ya ee gooleebugulone wo neso.\*

<sup>23</sup> Osoloso wo ne biame omapoo Yesuye tei moso tegei beelee ee ma kulodu Solomonowo hau mapoo sileeso.

<sup>24</sup> Esememe Yu odoososo yo ogoloso sibilesi tobolo sidiboloso yimapoo egeeseetakaso, “Iba biame susuganee goo mapoo diya goolone ka doso. Esiga nayo imapoo woola takee, no tei Kelisowo?” dee takaso.

<sup>25</sup> Esememe Yesuye nei dimapoo egeeseetakaso, “Ayo nimapoo olo takaso. Esino niyo mo to mapoo tei tele. Esiga goo toowa opusomo di ayo mo Mayo hu maga moodeli oso nimapoo mo goo ee eligiso.

<sup>26</sup> Esino niyo tei koo toso. Bei, niba mo sipi benee.

<sup>27</sup> Mo sipi beso mo to duliso. Osoloso a diba gooleedoo. Osoloso diayo ama hamamee dedeliso.

<sup>28</sup> Osoloso ayo dimapoo kookaiyo badoboso gie badeli teneliso. Osoloso diba Godee maga pileime. Osoloso diba mo dee maga odoososo heeso peedee dalaime.

<sup>29</sup> Mo Maye mo sipi be hagee amapoo olo teneeso. Osoloso yayo kitulugu oso odoososo susuga oso kitulugu ee dagadi. Esiga odoososo heeso mo Mayo dee maga peedee dalai tebile.

**10:14-15:** Mat 11:27; 1Yon 3:16 **10:16:** Isa 56:8; Ezek 34:23 \* **10:16: sipi be abo** - odoososo hagee Yu odoososo ee takoososo. Osoloso mooloogoodoo hagee Yu odoososo ee takoososo. **10:17:** Pil 2:8-9 \* **10:22:** Daga hoogoo Siliya biaso Yu odoososo sabolo ha temeleso Yelusalem peedee buguso. Osoloso diayo tei moso mapoo be wooloso, siloso dia godee mapoo teneeso. Esiga tei moso ee Godeeyo howo woola tokenee paso. Osoloso see hamamee Yu odoososo Siliya bia habuguloso Yelusalem see dieso peedee doososo. Osoloso see tobu tei moso ee Godeeyo dalame peegoo magoloso see osulu yaso. **10:28:** Yon 3:16; 6:39

<sup>30</sup> A mo Ma sabolo hedebe.”

<sup>31</sup> Esemе Yu odooso Yesu enigilame yo see tobu misigaso.

<sup>32</sup> Esemе Yesuye nei dimapoo egeesee takaso, “Mo Maye amapoo kitulugu teneme, ayo nibada howo woola goo tekepo moodoomo sileeso. Esino goo tekepo susuga ayo moodoo ee ma kulodu goo hee kaso tokenee daga, niyo a wooloomalame ka sala?” dee takaso.

<sup>33</sup> Esemе see Yu odoо dia wiligi odoо tebisa oso egeesee takaso, “Nayo goo tekepo moodoo maga iyo no wooloomalame koo seeso. Esino nayo Godeeyo goo maga to tokenee taka ee duloso no wooloomalame ka seeso. Bei, no wulo odoо wuluge, esino see nayo takolone, no Godee, dee takeliso.”

<sup>34</sup> Esemе Yesuye nei dimapoo egeesee takaso, “Nibada tei magoo ee ma kulodu Godeeye egeesee takooso, ‘Niba godee,’ deliso.

<sup>35</sup> Egeesi ma kulodu iba gooleedoo, Godeeyo to booka mapoo hogugu oso tei goo takooso. Esiga Godeeye o to mapoo tei teli odoо mapoo takolone, diba godee, deliso.

<sup>36</sup> Esiga ayo takolone, a Godeeyo Owolo doloso ka takano, bei kasi maga niyo takolone, ayo Godeeyo goo maga to tokenee takoo, dee ka takala? Bei, mo Maye a hesialoso mipoo hamapoo sibeye diso.

<sup>37</sup> Esiga ayo mo Maye goomoga goo ee moodelega badoga, niyo to ayo taka mapoo tei tele ka peegee.

<sup>38</sup> Esino niyo to ayo taka mapoo tei tele poogolone, wulo goo ayo hagee tomo silo ee ogoloso to ayo taka mapoo tei ka te. Bei, niyo egeesee seega, mo Ma asalo hedebe doloso hagee do goo ee niba gooleedalaiso.”

<sup>39</sup> Esemе odoо susuga oso to hagee duloso Yesu see talame seme, Yesu dimaga peegoo diso.

<sup>40</sup> Osoloso Yesu see Yoden howo dalo sooweleso, Yoneeye daga odoо howo olugumelee mi omapoo badebeiso.

<sup>41</sup> Esemе odoо susuga oso yimapoo sibilesо egeesee takaso, “Yoneeye goo toowa opusomo di moodoomo sile. Esino yayo Yesuwo goo maga taka goo susuga ee tei goodoo,” dee takaga meleeso.

<sup>42</sup> Esemе odoо susuga omapoo debeli oso Yesu mapoo tei tooso.

## 11

### *Lasaleseeeye ta*

<sup>1</sup> Betani mi mapoo badeli odoо hee paiye badebeiso, o hu Lasales. Osoloso omoo Meli dio Mata dio onosee Betani mi omapoo debeli.

<sup>2</sup> Meli hagoso hamamee Lodeeyo homo mapoo mopoodoosoo sooloso o wuduso talaiso.

<sup>3</sup> Esiga Meli dio Mata dio odoо hee mapoo dia to takaso, yayo dileso Yesu mapoo takalame. Esemе yayo dileso Yesu mapoo egeesee takaso, “Lodee, odoо no gooma ee paiyega badoso,” dee takaso.

<sup>4</sup> Esino Yesu to hagee duloso egeesee takaso, “Paiye ogoso yo talaime. Esiga goo hagoso peledabalaiso, edebeeyo goo hagee ogoloso Godeeye kitulugu sabolo osoloso Owolo ayo kitulugu ee gooleedalame,” dee takaso.

<sup>5</sup> Esiga ee ma kulodu Yesuye Mata dio, omolo Meli dio, osoloso Lasales diya gweliso.

<sup>6</sup> Esino yo Lasaleseeeye paiye goo ee duloso saga dilega, biame bakadio omapoo badebeiso.

<sup>7</sup> Biame bakadio poogoloso Yesuye o hamamee dili odoо mapoo egeesee takaso, “Iba see Yudiya mi mapoo wedi dimo,” dee takaso.

<sup>8</sup> Esemе o hamamee dili odoо oso yimapoo egeesee takaso, “Eligili odoо, no omapoo badoboome, Yu odooso no yoso wooloomalame sino poogooso. Esiga no see kasalame mi omapoo wedi dilame ka sala?” dee takaso.

<sup>9</sup> Esemе Yesuye egeesee takaso, “Biame hedebe ma kulodu osoko

howo 12 moloso. Esiga edebeeyo biame siloga, yo takodee bigileime. Bei, yo gadeebugu ma kulodu siloga.\*

10 Esino edebeeyo gesi siloga, yo takodee bigileiso. Bei, yimapoo gadeebugu mega.”

11 Yesuye to hagee takoloso see egeesee takaso, “Ibada odoo Lasales yo tiamoloso. Esiga ayo yo tidibigileiso,” dee takaso.

12 Esemé o hamamee dili odoo oso egeesee takaso, “Lodee, yo wulo tiaga, see weidileiso,” dee takaso.

13 Esino Yesuye taka goo ee ma kulodu Lasales yo tei olo ta neme ka taka. Esino Yesu o hamamee dili odoo oso goolee Lasales wulo tiamolo gooleeso.

14 Esemé Yesuye dimapoo woola egeesee takaso, “Lasales olo ta moloso.

15 Esiga a goomogoso, ayo niba halo yo agalame dile. Esino ayo yimapoo goo moodoo ee niso ogoloso amapoo tei talaiso. Esiga yimapoo dimo.”

16 Esemé Tomas, o hu hee Didimas deli, oso Yesu o hamamee dili odoo abo mapoo egeesee takaso, “Iba nose Yudiya mi mapoo dimo, Yesu bolo hodobo talame,” dee takaso.

*Odoo wedia hogogaduloso see gie badeli teneli ee Yesu yoso*

17 Yesuye sibilesi Betani mi mapoo peledoboloso egeino, Lasales bi ma kulodu tamelee biame bakadio bakadio di poogoloso molome egeiso.

18 Betani mi hagee Yelusalem mi maga haga hoogonee, wulo kilomita bakadio hedebe di egeesi.

19 Osoloso Meli dio Mata dio omolo Lasalesee ta maga goohele sabolo doboome, Yu odoo aboso dibolo hodobo dabalame, Yelusalem maga sibadeeso.

20 Esemé Mataye Yesuye simi goo ee duloso, yo eli domopoo tugodalame diso. Esino Meli yo mosopoo badebeiso.

21 Esemé Mataye Yesu tugodoloso yimapoo egeesee takaso, “Lodee, no hamapoo badebei diepi, molo telega pegeliyo.

22 Esino a gooleedoo, goo hagee ma kulodu, nayo ogoo goo ee Godee mapoo woosaga, Godeeye goo egee namapoo tenelaiso,” dee takaso.

23 Esemé Yesuye yimapoo egeesee takaso, “Nomolo see hogabileiso,” diso.

24 Esemé Mataye nei yimapoo egeesee takaso, “A gooleedoo, yo biame hamameedee mapoo odoo wedia oso hogogabuoga, yinosee omapoo hogadileiso,” dee takaso.

25 Esemé Yesuye yimapoo egeesee takaso, “Odoowedia magahogogaduloso see gie badeli teneli ee aso. Esiga edebeeyo amapoo tei tolosobadobosotoga, yokookaiyogie badalaiso.

26 Osoloso edebeeyo amapoo tei toga, o dio talaime, esino yokookaiyogie badalaiso. Esiga Mata no goohamapoo tei tosomo?”

27 Esemé Mataye nei yimapoo egeesee takaso, “O, Lodee, a goohamapoo tei toso. Bei, no Keliso, Godeeyo Owolo, mipoo hamapoo sibileigo dee takemelee ee noso,” dee takaso.

28 Mataye to hagee taka koodobuloso see wedi dilesi omolo Meli mapoo mada egeesee takaso, “Eligili odoo olo sibilesi bado. Esiga yayo no agalai goomogona,” dee takaso.

29 Meli to hagee duloso toboloso Yesu agalame saga diso.

30 Yesu mosopoo peledobelega, Mataye dilesi yo tugodoo mi omapoo osee badebeiso.

31 Esemé Yu odooso Meli pidilone diba yibolo hodobo mosopoo debeiso. Esino yayo saga toboloso di

\* 11:9: To hageeyo bei ee egeesi moloso. Yesu yo gadeebugu. Yayo o hamamee dili odoo dibolo hodobo egee bado goo maga, diayo goo kodilei bei mauwe. Bei, Godeeye goomoga goo ee talame yayo biame teiba dimapoo teneeso. 11:16: Maka 14:31 11:24: Yon 6:40 11:27: Yon 6:69



ogoloso yima hamamee diso. Diayo goolee Meli bi mapoo dileso pisilei gooleeso.

<sup>32</sup> Esino Meliye Yesuye badebei mapoo dileso o homo beiyopoo gauwuloso badolone egeesee takaso, “Lodee, no hamapoo badebei diepi, molo telega pegeliyo,” dee takaso.

<sup>33</sup> Yesuye Meli dio osoloso Yu odoo abo Melibolo sibadee oso hodobo pupusiga molome ogoloso su hegi sabolo badolone diya gooheselo.

<sup>34</sup> Osoloso yayo dimapoo egeesee takaso, “Niyo yo kapoo magooba?” diso. Esemé diayo nei egeesee takaso, “Lodee, no agalame ibolo hodobo sibe,” dee takaso.

<sup>35</sup> Esemé Yesu yinosee pisaso.

<sup>36</sup> Esemé Yu odooso goo egee ogoloso egeesee takaso, “Yesuye Lasales diya gweli goo ee niso ege,” diso.

<sup>37</sup> Esino odoo aboso egeesee takaso, “Odoó hagosó odoo howo neliga ee tekepo paso. Esiga bei kasi maga yayo Lasales telega pagalame pidile ka poogoowo?” dee takaso.

*Yesuye Lasales ta maga see hogadi*

<sup>38</sup> Yesu su hegi osee molone, Lasales magoo wulu ou miyopoo simiso. Osoloso wulu ou ee yo toowaso kisiso.

<sup>39</sup> Osoloso Yesuye egeesee takaso, “Yo egee peegoo bidibigi,” diso.

Esemé Lasaleséeyo omoo Mataye egeesee takaso, “Lodee, o kou ee wulu ma kulodu melee biame bakadio bakadio di egeesi poogooga, olo hune koko,” dee takaso.

<sup>40</sup> Esemé Yesuye nei yimapoo egeesee takaso, “Ayo namapoo daga takolone egeesee takaso, nayo tei toga, no Godeeye kitulugu ee agalaiso,” diso.

<sup>41</sup> Esemé odoo aboso yo toowa wulu ou kisi ee peegoo bidibuguso. Esemé Yesuye dokodoo bolone egeesee takaso, “Ma, ayo namapoo goomoga to ka taka. Bei, ayo namapoo taka goo ee nayo duga.

<sup>42</sup> Osoloso a gooleedoo, nayo biame susuga ayo namapoo taka goo ee nayo duliso. Esino odoo hamapoo egee tebisamoloso oso nayo a diye di goo mapoo tei talame, goo hagee ayo ka taka.”

<sup>43</sup> Yesuye egeesee takoloso to neligidi egeesee takaso, “Lasales, no wulu ma kuloduga peegoo gasibe,” dee takaso.

<sup>44</sup> Esemé Lasales o dee sabolo, osoloso o homo bodo sabolo, osoloso o mudu ee dugo semeso tiegisa sabolo wulu ma kuloduga peegoo gasibileso tobudume egeiso. Esemé Yesuye dimapoo egeesee takaso, “Dugo egee puobigi, osoloso yo diye dee,” dee takaso.

*Yesu wooloomalame eli esia*  
(*Mat 26:1-5; Maka 14:1-2; Luka 22:1-2*)

<sup>45</sup> Esiga Yu odoo susuga Meli agalame sibadee oso goo Yesuye moodoo ee ogoloso yimapoo tei tooso.

<sup>46</sup> Esino odoo aboso dileso goo Yesuye moodoo ee Pelisi odoo mapoo takaso.

<sup>47</sup> Esiga tei moso wiligi odoo tebisa sabolo osoloso Pelisi odoo oso Yu odoo dia wiligi odoo mooloogoodoo Sanhedelin deli ee gilimadoloso dimapoo egeesee takaso, “Iyo kasee selaisomo? Bei, odoo hagosó goo toowa mudu opusomo di bei moodoogamo siliso.

<sup>48</sup> Iyo wulo бага, odoo susuga oso yimapoo tei talaiso. Osoloso Loum gamalee odoo oso ibada tei moso ee guobuguloso ibada odoo tokenee palaiso,” dee takaso.

<sup>49</sup> Esemé dima kulodu odoo hee badebeiso, o hu Kayapas. Dugo omapoo yayo tei moso wiligi odoo toboloso badolone, odoo mooloogoodoo mapoo egeesee takaso, “Niba goo goolee mauwe odoo.

<sup>50</sup> Esiga niba koo gooleedolo? Odoó hedebeeso odoo susuga ee halo talai tekepo. Egeeséega, Yu odoo susuga iba tokenee palaime,” diso.

<sup>51</sup> Esiga Kayapaseeye taka goo hagee, wulo eyo goolee takele. Esino yayo dugo omapoo tei moso wiligi odoo toboloso badoboome, Yesuye Yu odoo halo talai goo ee Godeeye yimapoo eligime, yayo egeese ka taka.

<sup>52</sup> Esino hedebe Yu odoo halo talai. Esino Godeeyo odoo mi opusomo opusomo di mapoo egee do ee see hedebe dalame ka talai.

<sup>53</sup> Esiga biame omaga bei mooloogoloso dulone Yu odoo dia wiligi odoo tebisa oso Yesu wooloomalame eli esiameleeso.

<sup>54</sup> Goo egeesi maga Yesu see Yu odoo dia howo woola koo sili. Esino yayo o hamamee dili odoo sabolo mi egee poogoloso, see miwe poogoo mi koola mapoo mi hee, Epelaim deli, mapoo dilesa debeiso.

<sup>55</sup> Osoloso Godeeye Gababia wo nalai biame olo koola tooboome, Yu odoo dia mi pepuso maga Yelusalem mapoo palaso, Godeeyo howo woola diba medee mopoodoo doloso tekepo dabalame.\*

<sup>56</sup> Osoloso diayo Yelusalem mapoo dobolone Yesu esiamo silesibiso. Egeeseelone tei moso ma kulodu mooloogodoloso dieso nei woosa nei woosa demeleeso, “Niyo kasee gooleedo? Yesu wo ne hamapoo sibileisomo?” dee takaga meleeso.

<sup>57</sup> Esino tei moso wiligi odoo tebisa sabolo osoloso Pelisi odoo oso to kitulugu sabolo odoo susuga mapoo egeese takaso, “Odo heeso Yesuye badebei egei daga, imapoo takee, egeeseega iyo dilesa yo ka talaiya,” dee takaso.

## 12

*Meliye Yesuwo homo mapoo mopoodoo soo soo*  
(Mat 26:6-13; Maka 14:3-9)

<sup>1</sup> Gababia wo nalai ee biame 6 malalo hoogoo molome, Yesu yo

Lasalesee yo mi Betani mapoo see wedi diso. Lasales hagee daga Yesuye ta maga hogadi ee yoso.

<sup>2</sup> Osoloso habe mi omapoo diayo Yesuwo nei toowa mopoodoo dooso. Osoloso Mataye nei piso. Osoloso Lasales yinosee ee ma kulodu dibolo hodobo dobolone Yesubolo nei nameleeso.

<sup>3</sup> Esemeliye mopoodoo soo tekepo nad deli i salama soo lita botoloo gegelee egeesi toloso Yesuwo homo mapoo sooso. Osoloso o homo o wuduso taso. Esemeliye mopoodoo soo oso sisigage oso moso kulodu tiadooso. Mopoodoo soo tekepo hagee molee toowaso teli.

<sup>4</sup> Esino domo omapoo Yesu o hamamee dili odoo hee badebeiso, o hu ee Yudas-Iskaliyot. Odo hagos hamamee Yesu ha teli odoo mapoo tiasalaso. Osoloso yayo egeese takaso,

<sup>5</sup> “Mopoodoo soo tekepo hagee molee ko\* 300 oso teli. Esino bei kasi maga mopoodoo soo tekepo hagee, iyo odoo mapoo teneloso nei molee toloso bi mauwe odoo mapoo tenele ka poogoowo?” dee takaso.

<sup>6</sup> Esino Yudaseeye to hageese taka egee, yo bi mauwe odoo ee sooloo dolone to hagee ka takele. Esino yo heli teli odooga to hageese ka taka. Bei, yayo Yesu o hamamee dili odoo dia molee ee gibadolone abo mada heli temeleso.

<sup>7</sup> Esemeliye Yesuye egeese takaso, “Meliye goo egee moodoo ogoloso yimapoo goo hee na moodee. Bei, yayo goo egeesi moodoo egee a toga mi doosalai ee gooleebugulone ka moodoo.

<sup>8</sup> Osoloso bi mauwe odoo oso biame susuga nibolo dabalaso. Esino a biame susuga nibolo badalaime,” dee takaso.

*Wiligi odoo oso Lasales wooloomalame to mou*

**11:52:** Yon 10:16    **11:53:** Yon 5:18    \* **11:55:** Biame omapoo Yu odoo diba Godeeyo howo woola subugo mauwe dabalame, dia adaga dia goo ee dodolone, dia su medee hapoloso gala wooloso, siloso Godee mapoo teneliso.    **12:1:** Yon 11:1, 43    **12:2:** Luka 10:40    **12:3:** Luka 7:37-38    \* **12:5:** *molee ko* hagee denaliyus deli ee, biame hedebe mapoo tou too eyo nei hedebe hageese teliso. **12:8:** Deut 15:11

<sup>9</sup> Esiga biame domo omapoo Yu odo moologoodoo toowa oso Yesuye Betani mi mapoo sibilesi badebei goo ee duloso Yesu agalame dulone, Lasales yinosee agalame diyadeeso. Bei, Yesuye yo ta maga see hogadiso.

<sup>10</sup> Goo egeesi maga tei moso wiligi odo tebisa oso Lasales onosee wooloomalame to mouso.

<sup>11</sup> Bei, Lasales see hogadi eyo goo maga Yu odo aboso dia wiligi odo ee poogoloso see Yesu mapoo tei tooso.

*Yesuye Yelusalem mi mapoo gadi (Mat 21:1-11; Maka 11:1-11; Luka 19:28-40)*

<sup>12</sup> Osoloso biame hee mapoo odo moologoodoo toowa Yelusalem mapoo Gababia wo ne mapoo di odo oso Yesu sibosogo di goo ee duso.

<sup>13</sup> Osoloso diayo weiyo kookoloso Yesu tugodalame dulone to neligidi egeese takomo diyadeeso, "Iba Godeeyo hu dokodoo poudoomo.

Odo Godeeyo hu maga kitulugu sabolo egee sibo, yo wiligi odo Godeeye pidiye dee.

Osoloso Isalael odo dia wiligi odo, yo Godeeye pidiye dee," dee takomo diyadeeso.

<sup>14</sup> Biame domo omapoo Yesuye donki be gie kauwa ogoloso o wagi ma dokodoo biaso. Goo peledaba hagee Godeeyo to booka mapoo hogugu sabolo tebilame ka seeso. Bei, Godeeyo toso egeese takooso,

<sup>15</sup> "Yelusalem odo, niba haga na ebi. Nibada wiligi odo donki be pe eyo wagi ma dokodoo buloso siboso," diso.

<sup>16</sup> Esino biame omapoo Yesuwo hamamee dili odo oso goo hagee medee kibiya gooledele. Esino Yesu ta maga hogaduloso hamamee goo susuga Yesu mapoo moodoo oso Godeeyo to booka mapoo hogugu

sabolo tobume, goo ee ogoloso gooleedooso.

<sup>17</sup> Esiga Yesuye Lasales ta maga hogaduloso see wulu ou ma kuloduga peegoo gasibilame i goo ee egei odo moologoodoo hagee biaso odo abo mapoo takalame diyadeeso.

<sup>18</sup> Esem odo susuga oso goo toowa opusomo di Yesuye moodoo ee duga, diba Yesu tugodalame diso.

<sup>19</sup> Esem Pelisi odoos dieso dima kulodu egeese takaso, "Niso ege. Iba kitulugu olo me poogoo. Bei, odo susuga oso yima hamamee deedeeso," dee takemeleeso.

*Yesuye eyo talai goo ee edidi taka*

<sup>20</sup> Osoloso Guliki odo aboso odo Yelusalem mapoo Gababia wo ne mapoo paladee sabolo palaso, Godeeyo hu dokodoo poudalame.

<sup>21</sup> Osoloso diba dileso Gelili mi ma kulodu mi pepooko Betesaida mapoo badeli odo hee Pilipi mapoo egeese takaso, "Emegei, iba Yesu agalai goomogo," dee takaso.

<sup>22</sup> Esem Pilipiye Endulu takala dileso obakadio Yesu takalame diso.

<sup>23</sup> Esem Yesuye nei dimapoo egeese takaso, "Odo Holo ayo toowa doloso badalai biame ee olo siboso.

<sup>24</sup> Esiga ayo nimapoo ka taka. Edebeeyo ko mi mapoo segele poogooga, ko egee see opusomo dalaime. Esino ko hedebe onosee osee malaiso. Esino ko mi mapoo sogoloso opusomo doloso pologa, bou dia gasibilesi kauwuloso ko okopolo palaiso.\*

<sup>25</sup> Esiga edebeeyo o gie badeli ee eyo diya goodogoga, o gie badeli ee osugobalaiso. Esino edebeeyo mipoo hamapoo badolone o gie badeli goodogelega badoga, odo egee o gie badeli osugobalaime. Esino yo badoboso kookaiyo gie badeli talaiso.

**12:11:** Yon 11:45    **12:13:** Psa 118:25-26; Yon 1:49    **12:15:** Zec 9:9    **12:16:** Yon 2:22    **12:23:** Yon 13:31-32; 17:1    **12:24:** 1Kol 15:36    \* **12:24:** Yesuye wudu taka hagee, eyo toloso see hogadilei goo sabolo, osoloso edebeeyo yimapoo tei talai goo maga ka taka.    **12:25:** Mat 16:25

26 Esiga edebeeyo mo tou talai goomogoga, yo a deede sibe. Es-eega, yo ayo egee bado mi omapoo yayo abolo hodobo badalaiso. Esiga mo tou teli odoo ee mo Maye o hu dokodoo poudileiso.

27 Epedee hamapoo a su diya hegi moodoo. Esiga ayo mo Ma mapoo takolone, 'Ma, dala amapoo egee sibo nayo peegoo magee,' dee takalai tekepowa? Haye, tekeponee. Bei, a dala egee talame mipoo hamapoo ka simi.

28 Esiga Ma, nayo toowa doloso egee bado goo ee odoo mapoo eligi."

Eseme toso Kei mi ma dokodooga egeesee taka, "Ayo toowa doloso egee bado goo ee odoo mapoo olo eligiso. Osoloso ayo dimapoo see eligileiso," dee takaso.

29 Esino odoo mooloogoodoo omapoo tebisamelee oso to hagee duloso egeesee takaso, "Kei woo," diso. Osoloso odoo aboso takolone, momaiyeso Yesu mapoo to takoo, dee takaso.

30 Osoloso Yesuye see egeesee takaso, "To taka hagee a pidilame ka takele. Esino niba pidilame ka taka.

31 Esiga Godeeye mi odoo dia goo midilei biame ee hagoso. Osoloso mipoo hageeyo wiligi odoo Saiten ee Godeeye daga dileiso.

32 Esiga edebeeyo a toloso mi hamaga dokodoo poudoga,\* ayo odoo susuga amapoo gido sibileiso."

33 Yesuye taka hagee, eyo talai goo ee kasee tomoba dolone ka taka.

34 Eseme odoo mooloogoodoo oso egeesee takaso, "Ibada tei magoo oso egeesee taka duliso, Keliso yo badoboso kookaiyo badalaiso, dee takeliso. Esino bei kasi maga nayo takolone, Odoo Holo yo toloso mi hamaga dokodoo poudileiso, dee ka takeliyo? Osoloso Odoo Holo hagee odoo ogumo?" dee takemeleeso.

35 Eseme Yesuye dimapoo egeesee takaso, "Gadeebugu oso biame deiyepo nibolo malaiso. Esiga gadeebugu nimapoo mologa, niba gadeebugu ee ma kulodu silesibe, neligaso niba gooloogeyaga. Egeesi ma kulodu niba neliga ma kulodu silesiboga, niba niso egee du eli ee medee ogoloso gooleedalaime.

36 Esiga gadeebugu nimapoo osee egee molo mapoo tei te. Niyo egeesee seega, niba gadeebugu eyo owolo dio dalaiso." Yesu to hagee takoloso koodobuloso peegoo dileso dimaga mada wuaso.

*Yu odooso Yesu mapoo tei tele poogoo*

37 Yesuye goo toowa opusomo di susuga odoo howo woola moodoogaso. Esino edebeeyo yimapoo tei tele.

38 Esiga Godee maga to toloso kokodo takomo sili odoo Aisayaye taka goo sabolo tebilame, goo hagoso peledabaso. Aisayaye egeesee takaso,

"Lodee, odoo agayo iyo taka goo ee tei ka toba?

Osoloso Lodeeye kitulugu ee odoo ugu bia dimapoo ka yilige buguba?" dee takaso.

39 Esiga edebeeyo Yesu mapoo tei talai tebile. Bei, Aisayaye see egeesee takaso,

40 "Godeeye odoo susuga dia howo gooloogooso.

Osoloso yayo diba goo goole pagalame moodooso,

dia howoso kibiya egelega pagalame,

osoloso diayo medee kibiya gooledelega pagalame,

osoloso see Godee mapoo wedi sibileso tekepo pelega pagalame."

41 Aisayaye Yesuye toowa doloso badeli goo ee ogoloso o goo maga egeesee ka taka.

12:27: Psa 6:3; 42:5; Mat 26:38    12:32: Yon 3:14    \* 12:32: Yesuye taka hageeyo bei ee, yo homo bulubo magoo ma dokodoo yoguso enigaloso pouduloso tulugilei ee taka.    12:33: Yon 19:6    12:34: Psa 110:4; Isa 9:7; Dan 7:14    12:35: Yon 8:12    12:36: Epe 5:8    12:38: Isa 53:1    12:40: Isa 6:10  
12:41: Isa 6:1    12:42: Yon 9:22



<sup>42</sup> Esino odoo abo sabolo osoloso Yu odoo dia wiligi odoo abo oso Yesu mapoo tei tooso. Esino diba Pelisi odoobolo obulone, diayo tei too goo ee woola yilige bigile. Bei, Pelisi odooso dia hu howo gisili moso ma kulodu magoo ee tabigiyaga.

<sup>43</sup> Osoloso diayo Godee maga goomoga talai haga goole poogoloso, hee odoo maga goomoga talai ono diya gweliso.

<sup>44</sup> Esemé Yesuye to neligidi egeesee takaso, “Edebeeyo amapoo tei toga, yo hedebe amapoo tei koo toso. Esino a diye di odoo omapoo nose tei toso.

<sup>45</sup> Osoloso edebeeyo a ogoga, yo a diye di odoo onosee ogoso.

<sup>46</sup> Esiga ayo mipoo hamapoo neliga ma kulodu keme masi poudo simiso. Egeesi ma kulodu edebeeyo amapoo tei toga, yo neliga ma kulodu osee badalaime.

<sup>47</sup> Esiga edebeeyo mo to duloso mesilega poogooga, ayo o goo midileime. Bei, ayo mipoo hamapoo simi hagee, odoo goo midilame ka sibile. Esino odoo dia gie badeli ee pidilame ka simi.

<sup>48</sup> Esino edebeeyo a gowoolone mo to telega poogooga, Godeeye goo midilei biame mapoo to ayo taka oso nei dia goo ee midileiso.

<sup>49</sup> Bei, a mawo gooleeso to hagee ka takele. Esino mo Ma, a diye di oso to ayo takalai sabolo osoloso ayo kasee takalai goo ee, yayo amapoo takaga, ayo egeesee ka taka.

<sup>50</sup> Esiga Godeeye taka to hagoso odoo mapoo gie badeli tosibiliso. Goo egeesi maga mo Maye amapoo taka goo ee see nimapoo ka takomoloso.”

## 13

*Yesuye o hamamee dili odoo dia homo howo hapoo*

<sup>1</sup> Yu odooso Gababia wo nali biame olo koola tooboome, Yesu yo mipoo hagee poogoloso see Ama mapoo palai biame ee olo koola too-boo, doloso gooleedooso. Esiga yayo mipoo hamapoo gie badolone, o hamamee dili odoo ee sooloo deliso. Esino yayo diba diya sooloo deli goo ee epedee dimapoo eligiso.

<sup>2</sup> Osoloso Yesuye o hamamee dili odoo sabolo habe nei nolone debeiso. Esino ee ma kulodu Saimon-Iskalyoteeyo owolo Yudas mapoo Saitenso goo goolee olo teneeso, yayo Yesu ha teli odoo\* mapoo tiasalame.

<sup>3</sup> Osoloso Amaye goo susuga ee balame kitulugu Yesu mapoo tenee goo ee yo olo gooleedooso. Osoloso yo Godee maga simi, esiga yo see Godee mapoo wedi palai goo ee yo olo gooleedooso.

<sup>4</sup> Osoloso nei nolone debei maga toboloso o dugo sage tamagoloso see dugo howo i tali ee toloso o bagi mapoo booso.

<sup>5</sup> Osoloso katolo mapoo howo salama soloso o hamamee dili odoo hedebe hedebe di eyo homo hapoloso, dugo howo i tali o bagi mapoo boo oso howo i ka ta domo dilame bei mooloogooso.

<sup>6</sup> Egeeseelone Saimon-Pitayo homo hapalame seme, yayo egeesee takaso, “Lodee, nayo mo homo hapalame ka sala?” dee takaso.\*

<sup>7</sup> Esemé Yesuye egeesee takaso, “Goo ayo hagee moodoo eyo bei no epedee koo gooleedoso. Esino no hamamee gooleedalaiso,” diso.

<sup>8</sup> Esemé Pitaye egeesee takaso, “Nayo mo homo hapalaime,” diso. Esemé Yesuye nei yimapoo egeesee takaso, “Ayo nee homo hapelega poogooga, no mo hamamee dili odoonee,” dee takaso.

<sup>9</sup> Esemé Saimon-Pitaye see egeesee takaso, “Lodee, nayo hedebe mo homowe ono na hapee. Esino mo

**12:43:** Yon 5:44    **12:45:** Yon 14:9    **12:47:** Yon 3:17    **13:2:** Luka 22:3; Yon 13:27    \* **13:2:** **Yesu mapoo ha teli odoo** ee Yu odoo dia wiligi odoo tebisa ee takooso.    **13:3:** Yon 3:35; 16:28    \* **13:6:** **Homo hapeli** ee nei mauwe tou teli odoo dia tou. Esiga Yesuye o hamamee dili odoo dia homo hapoo ee ogoloso diya dio diso. Bei, Yesu yo dia wiligi odooga.

dee sabolo osoloso wiligi sabolosee hapee,” diso.

<sup>10</sup> Esemee Yesuye egeesee takaso, “Odoe howo sauwe ee o su mapoo subugo me meleeya. Esiga hedebe o homowe hapalai tekepo. Esiga niba olo subugo mauwe. Esino nima kulodu odoe hee subugo sabolo badoso.”

<sup>11</sup> Osoloso Yesu yo ha teli odoe mapoo tiasalai odoe ee, yo olo gooleedooso. Esiga yayo egeesee ka taka, “Odoe hee nima kulodu subugo sabolo badoso,” dee ka taka.

<sup>12</sup> Yesuye o hamamee dili odoe dia homo hapaga koodobuloso o dugo sage kaloso wedi sibilesa bulone egeesee takaso, “Niba goo ayo epedee nimapoo moodoo eyo bei gooleedoosomo?”

<sup>13</sup> Esiga niyo amapoo takolone, ‘eligili odoe,’ osoloso ‘Lodee,’ deliso. Niyo amapoo egeesee takeli ee tei goo. Ee aso.

<sup>14</sup> Esiga nibada eligili odoe osoloso nibada Lodee ayo nibada homo ka hapooso. Esiga niyo nee odoowo homo nei hapoo nei hapoo dolone ka debee.

<sup>15</sup> Goo ayo nimapoo hagee edidi ee peedee.

<sup>16</sup> Esiga ayo nimapoo taka. Odoe tou nei mauwe teli oso o wiligi odoe dagadilesa koo badoso. Osoloso to tosili odoe oso yo diye di odoe ee dagadilesa koo badoso.

<sup>17</sup> Egeesi ma kulodu niyo goo hagee gooledoloso peedeega, Godeeye goo hagee ogoloso nimapoo goomogalaiso.

<sup>18</sup> Esiga goo ayo hagee takoo, haga odoe susuga nimapoo koo takooso. Bei, odoe ayo hesiga ee, a olo gooleedooso. Esino Godeeyo to booka mapoo hogugu oso egeesee takooso, ‘Odoe abolo wo nolone badebei oso amapoo ha talaiso.’ To hagoso gooso peledabalai sabolo tebilame ka hogugu.

<sup>19</sup> Esiga goo hagee peledebelega mologa, ayo nimapoo malalo ka taka. Goo hagoso tei peledobooga, niyo a tei Kelisodoo doloso tei ka talame.

<sup>20</sup> Esiga ayo nimapoo taka. Edebeeyo odoe ayo diye di ee idoga, yayo a idoso. Osoloso edebeeyo a idoga, mo Ma a diye di ee idoso.”

*Yesu yo tiasalai odoe eyo goo taka (Mat 26:20-25; Maka 14:17-21; Luka 22:21-23)*

<sup>21</sup> Yesuye to hagee taka koodobuloso su hegi sabolo badolone, o hamamee dili odoe mapoo egeesee takaso, “Ayo nimapoo taka. Odoe heeso nima kuloduga a ha teli odoe mapoo tiasalaiso,” dee takaso.

<sup>22</sup> Esemee o hamamee dili odoe oso dieso dima kulodu nei ogo nei ogo dolone egeesee gooleeso, “goo hagee odoe ugu mapoo takabele,” dee gooleeso.

<sup>23</sup> Osoloso Yesu o hamamee dili odoe dima kulodu odoe hee Yesuye diya gooma ee\* yima koola ogolone badebeiso.

<sup>24</sup> Esemee Saimon-Pitaye odoe omapoo howo gisolooogoso, Yesuye odoe ugu taka beleso yayo yimapoo woosalame.

<sup>25</sup> Esemee yayo Yesu mapoo bouwa molone yimapoo egeesee takaso, “Lodee, odoe agayo no ha teli odoe mapoo ka tiasalaiyo?” dee takaso.

<sup>26</sup> Esemee Yesuye nei egeesee takaso, “Ayo wo i mapoo oluguloso teneega, odoe oso a ha teli odoe mapoo tiasalaiso.” Osoloso Yesuye wo toloso i mapoo oluguloso Saimon-Iskaliyoteeyo owolo Yudas mapoo teneeso.

<sup>27</sup> Yudaseeye wo teme, Saitenso o kulodu palaso. Esemee Yesuye yimapoo egeesee takaso, “Nayo goo talame egee gooleemolo goo ee saga moodde,” diso.

<sup>28</sup> Egeesi ma kulodu Yesuye Yudas mapoo egeesee taka goo eyo bei ee

**13:10:** Yon 15:3; 6:64, 70-71    **13:14:** Mat 20:28; Luka 22:27    **13:15:** Pil 2:5; Kol 3:13; 1Pita 2:21

**13:16:** Mat 10:24    **13:18:** Psa 41:9    **13:19:** Yon 14:29; 16:4    **13:20:** Mat 10:40    \* **13:23:** Yonee eyo nediliyo o hu dokodoo poudilei goomegele. Esiga o hu woola hesile.    **13:27:** Yon 13:2

o hamamee dili odoo diba medee kibiya gooleedele.

<sup>29</sup> Esiga odoo aboso goolee, Yudaseeye Gababia wo nalame bi abo talame di, dee takoo gooleeso. Osoloso odoo aboso goolee, ee molee odoo bi mauwe mapoo tenelame di, dee takoo gooleeso. Bei, Yesu o hamamee dili odoo dia molee ee Yudaseeye gibelidaga.

<sup>30</sup> Osoloso gesi Yudaseeye wo Yesuye tenee ee toloso peegoo gadiso.

### *Kokodo takeli to dia*

<sup>31</sup> Yudas olo peegoo dime, Yesuye egeesee takaso, "Epedee Odoo Holo ayo toowa doloso badeli goo ee woola yilige bigileiso. Osoloso Godeeye toowa doloso badeli goo ee amaga woola yilige bigileiso.

<sup>32</sup> Esiga Godeeye toowa doloso badeli goo ee amaga woola yilige buguga, nei Godee eyo Odoo Holo ayo toowa doloso badeli goo onosee woola yilige bigileiso. Esiga goo hagee saga moodoolaiso.

<sup>33</sup> Esiga mo odoo, ayo biame deiyepo nibolo hodobo badalaiso. Osoloso a duga, niyo a esileiso. Esino niyo a agalaime. Esiga ayo Yu odoo dimapoo taka goo ee see tobu nimapoo ka taka. Niba mi ayo hagee du mapoo dilei tebile.

<sup>34</sup> Esiga kokodo takeli to dia hagee ayo nimapoo ka taka. Niyo nee odoo nei sooloo dolo, nei sooloo dolo dolone ka dabalame. Ayo niba goolee sabolo egee bado egeesee masi, nee odoo nei sooloo dolo, nei sooloo dolo dolone ka debee.

<sup>35</sup> Egeesi ma kulodu niyo emegei nei sooloo dolo, nei sooloo dolo dolone dogo, odoo susuga oso niba tei mo hamamee dili odoodoo doloso gooleedalaiso."

*Pitaye Yesuwo goo gagadilei goo ee Yesuye taka*

(Mat 26:31-35; Maka 14:27-31; Luka 22:31-34)

<sup>36</sup> Esino Saimon-Pitaye egeesee takaso, "Lodee, no kapoo dilame ka sala?" diso. Esemee Yesuye nei egeesee takaso, "No epedee ayo hagee du mapoo sibilei tebile. Esino no see hamamee sibileiso," dee takaso.

<sup>37</sup> Esemee Pitaye see egeesee takaso, "Lodee, bei kaseega ayo epedee nobolo sibilei tebile ka molosomo? Ayo no halo talame olo mopoodoo doloso ka badoso," dee takaso.

<sup>38</sup> Esemee Yesuye nei egeesee takaso, "No tei a halo talame mopoodoo doloso ka badosomo? Esiga ayo namapoo tei goo taka. Kolokolo takelega mologa, nayo mo goo gagadilei ee bakadio hedebe dalaiso," dee takaso.

## 14

### *Eli hedebe Yesuso Ma Godee mapoo palai*

<sup>1</sup> Esemee Yesuye egeesee takaso, "Niba goo haga koudulone na debee. Esino niba Godee mapoo tei tolone amapoossee tei te.

<sup>2</sup> Bei, mo Mayo moso mapoo debi bei moloso. Esiga goo hagee tei goonee diepi, ayo goo hagee nimapoo takele pegeliyo. Esiga ayo omapoo niyo dabalai debi ee moodoolame dileiso.

<sup>3</sup> Osoloso ayo omapoo dilesos debi mopoodoo doloso see sibilesos niba gilimadoloso abolo hodobo palaiso. Osoloso niba mi omapoo abolo hodobo dabalaiso.

<sup>4</sup> Esiga ayo hagee du eli ee niba olo gooleedooso."

<sup>5</sup> Esemee Tomaseeye Yesu mapoo egeesee takaso, "Lodee, mi nayo egee du, iba gooleedele. Nayo egee du eli ee iyo kasee gooleedalaiyo?" dee takaso.

<sup>6</sup> Esemee Yesuye egeesee takaso, "Eli aso. Osoloso tei goo takeli eyo bei aso. Osoloso gie badeli eyo bei aso. Esiga odoo heeso eli hee maga

Ma Godee mapoo palaime. Esino yo hedebe amaga Ma mapoo ka palai.

<sup>7</sup> Niyo mo goo gooleedoo diepi, niba mo Ma nose see gooleedeliyo. Esino epedee domo hamaga niyo yo olo gooleedooso. Osoloso yo olo egeiso.”

<sup>8</sup> Esem e Pilipiye egeese takaso, “Lodee, nayo Ma imapoo eligi, iba hemisileiya,” dee takaso.

<sup>9</sup> Esem e Yesuye nei Pilipi mapoo egeese takaso, “Pilipi, ayo biame susuga nibolo hodobo badebeiso. Esino egeesi ma kulodu nayo a gooleedelega osee ka badosoba? Esiga edebeeyo a ogoga, yo Ma olo egeiso. Esiga bei kasi maga nayo amapoo takolone, ‘Ma imapoo eligi,’ dee ka takala?”

<sup>10</sup> Ayo mo Ma sabolo hedebe doloso egee bado sabolo, osoloso mo Maye abolo hedebe doloso egee bado goo mapoo no tei telega ka badosoba? Esiga to ayo nimapoo hagee takomo silo mawo goolee koo takomo siloso. Esino Maye abolo badolone yayo amaga o goo ee ka tomoloso.

<sup>11</sup> Esiga ayo takolone, ayo mo Ma sabolo hedebe doloso egee bado sabolo, osoloso mo Maye abolo hedebe doloso badoso, dee egee takoo goo omapoo tei te. Esino niyo to ayo taka mapoo tei telega poogooga, goo toowa opusomo di ayo moodoo ee ogoloso to ayo taka mapoo tei dee.

<sup>12</sup> Esiga ayo nimapoo taka. Edebeeyo amapoo tei toga, goo toowa opusomo di ayo moodeli egeesi masi yayo moodoolaiso. Osoloso goo toowa opusomo di abo yayo moodooga, oso ayo moodeli ee dagadileiso. Bei, a mo Ma mapoo duso.

<sup>13</sup> Osoloso niyo mo hu maga ogoo goo ee woosaga, ayo goo egee moodoolaiso, Maye toowa doloso

egee bado goo ee Owolo amaga ka yilige bigilame.

<sup>14</sup> Esiga niyo amapoo mo hu maga ogoo goo talame woosaga, ayo goo egee moodoolaiso.”

*Yesuye Dio Teiso sibilei goo ee taka*

<sup>15</sup> “Niyo a gooleega, niyo ayo kokodo taka goo mapoo mesimo sibileiso.

<sup>16</sup> Osoloso ayo Ma mapoo woosalaiso, yayo pidili odoo hee nimapoo tenelame. Pidili odoo hagoso kookaiyo nibolo hodobo osee badalaiso.

<sup>17</sup> Pidili odoo egee Dio Tei ee takooso. Yayo tei goodee ee eligiliso. Esino mi odooso yo talai tebile. Bei, diayo yo ogoloso koo gooleedeli. Esino niba o goo olo gooleedooso. Bei, yo nibolo hodobo badoso. Osoloso nima kulodu badalaiso.

<sup>18</sup> Esiga ayo niba gilibo holo masi wulo domopoo poogoloso badalaime. Esino a see tobu nimapoo wedi sibileiso.

<sup>19</sup> Osoloso biame deiyepo poogoloso mi odoo oso a see agalaime. Esino niyo a see agalaiso. Egeesi ma kulodu a gie badeliga, niba nose see dabalaiso.

<sup>20</sup> Egeesi ma kulodu a ta maga see hogadiga, ayo mo Ma sabolo hedebe doloso egee bado goo ee, niba gooleedalaiso. Osoloso niyo abolo hedebe doloso egee do goo sabolo, osoloso ayo nibolo hedebe doloso egee bado goo ee gooleedalaiso.

<sup>21</sup> Esiga edebeeyo ayo kokodo taka to ee duloso mesimo siloga, odoo egee a diya goolee sabolo badoso. Osoloso odoo a diya goolee sabolo badeli mapoo mo Maye yo sooloo dolone ka badoso. Osoloso anosee odoo egee diya sooloo dolone ka badoso. Osoloso ayo mo goo ee yimapoo yilige bigileiso.”

<sup>22</sup> Esem e Yudas-Iskaliyot nee, esino Yudas heeso egeese takaso, “Lodee, bei kasi maga nayo nee

**14:9:** Yon 12:45; Kol 1:15; Hib 1:3    **14:10:** Yon 12:49    **14:11:** Yon 10:38    **14:12:** Maka 16:19-20

**14:13:** Mat 7:7; Yon 15:16    **14:15:** Yon 15:10; 1Yon 5:3    **14:16:** Yon 14:26; 15:26; 16:7    **14:17:**

Yon 16:13    **14:20:** Yon 17:21-23



goo ee mi odoo mapoo yilige bigile poogoloso, see imapoo ka yilige bigileiyo?" dee takaso.

<sup>23</sup> Eseme Yesuye nei egeesee takaso, "Edebeeyo a diya gooleega, yayo goo ayo eligi mapoo mesimo sileiso. Osoloso mo Maye yo diya sooloo dalaiso. Osoloso mo Ma asalo sibilesos yibolo hodobo badalaiso.

<sup>24</sup> Esino edebeeyo a goolega badoga, yo goo ayo eligi mapoo mesilosoo koo siloso. Egeesi ma kulodu goo ayo eligime niyo du ee, ayo mawo goolee eligimo sile. Esino eligi hagee mo Ma, a diye di oso taka ee eligi.

<sup>25</sup> Esiga ayo nibolo hodobo osee badolone, goo susuga hagee nimapoo olo takaso.

<sup>26</sup> Esino mo Maye mo hu maga Dio Tei ee nimapoo meiyee dalaiso. Osoloso yayo niba pidilone badolone goo susuga nimapoo eligileiso. Osoloso goo susuga ayo nimapoo taka ee see niyo goolee sabolo dabalame, yayo nibada goo goolee pileiso.

<sup>27</sup> Esiga mesili goo ayo nimapoo ka tonowa. Mo mesili goo ayo nimapoo hagee tenee ee mi odooso mesili goo egeesinee. Esiga niba goo diya koudulone ebia sabolo na debee.

<sup>28</sup> Esiga ayo nimapoo takolone, 'a mo Ma mapoo peleso badoboso see nimapoo ka wedi sibileisogo,' dee taka goo ee, niba olo duso. Esiga niyo a tei diya goolee sabolo debee diepi, ayo mo Ma mapoo pologa niba goomegeliyo. Bei, yayo toowa doloso badolone, a dagadileso ka badoga.

<sup>29</sup> Egeesi ma kulodu goo egee peledebelega molome, ayo goo susuga hagee nimapoo olo takaso, goo ogoso hamamee peledobooga ogoloso niyo tei ka talame.

<sup>30</sup> Esiga ayo niba eligi ee koodobilei olo koola toobooso. Bei, mi odoo dia wiligi odoo Saiten olo sibo. Yayo a dagadilei yimapoo kitulugu mauwe.

<sup>31</sup> Esino ayo mo Ma diya goolee sabolo egee bado goo ee mi odoo oso

ogoloso gooleedalame, to mo Maye amapoo taka ee ayo tobuloso mood-eliso.

Esiga niba tebise, iba dimo."

## 15

### *Yesu tei homokoko su*

<sup>1</sup> "Esiga tei homokoko sudee aso. Osoloso mo Maye homo su ee ka gibadoso.

<sup>2</sup> Osoloso homo dee amaga agaga oso ko pelega mologa, yayo kookooloso peegoo togobiseliso. Esino homo dee ko peli eyo dee abo ee kookeliso, oso see homokoko okopolo palame.

<sup>3</sup> Egeesi ma kulodu goo ayo nimapoo eligi oso niba homo dee abo egeesi masi olo kookooloso subugo mauwe ka doso.

<sup>4</sup> Esiga niba amapoo oluguloso ka debee. Eseega ayo nimapoo oluguloso badalaiso. Esiga dee obusomo molone ko palai mauwe. Esino dee oso homo su mapoo oluguloso mologa, ko palaiso. Goo egeesi maga, niba amapoo olugulega dogo, homokoko palaime. Esino niyo amapoo oluguloso dogo, homokoko okopolo palaiso.

<sup>5</sup> Esiga homokoko su aso. Osoloso homo dee ee nibaso. Egeesi ma kulodu edebeeyo amapoo sibilesos oluguloso badoga, ayo yimapoo oluguloso badalaiso. Eseega yo homokoko okopolo palaiso. Esino niba a mauwe dogo, niyo goo hee moodoolai tebileime.

<sup>6</sup> Esiga edebeeyo amapoo sibilesos olugulega dogo, yo homo dee ko koo peli koodoloso peegoo togobugu egeesi masi moloso. Esiga homo dee egee sioga misiga magoloso dou mapoo toodeliso.

<sup>7</sup> Goo egeesi maga niyo amapoo oluguloso dobolone, ayo eligi goo omapoo mesimo silesibilone, niyo ogoo goo talame amapoo woosaga, niba goo egee talaiso.

<sup>8</sup> Esiga niyo homokoko okopolo poloso mologa, oso mo Mayo hu dokodoo poudiliso, osoloso niba mo hamamee dili odoo doloso egee do goo ee yilige bigiliso.

<sup>9</sup> Esiga mo Maye a diya sooloo dolone egee bado egeesi masi ayo niba diya sooloo dolone ka badoso. Esiga niba ayo sooloo deli goo ee ma kulodu debee.

<sup>10</sup> Egeesi ma kulodu ayo mo Maye kokodo taka to omapoo mesimo silone, yayo sooloo deli ma kulodu ka badoso. Osoloso hedebe egeesi masi niyo ayo kokodo taka to omapoo mesimo silesiboga, niba nosee ayo sooloo deli goo ee ma kulodu dabalaiso.

<sup>11</sup> Esiga goo hagee ayo nimapoo olo takaso, goomoga goo amapoo egee molo niyo talame. Osoloso nimapoo goomoga goo oso kauwuloso ka malame.

<sup>12</sup> Esiga ayo kokodo taka to hagoso. Ayo niba sooloo deli egeesi masi niyo nee odoo nei sooloo dolo, nei sooloo dolo dolone ka debee.

<sup>13</sup> Egeesi ma kulodu edebeeyo o odoo diya sooloo dolone, yo halo o su teli mapoo magalai, goo oso toowa ka moloso.

<sup>14</sup> Esiga niyo ayo kokodo taka to mapoo mesimo siloga, niba tei mo odoo.

<sup>15</sup> Esiga niba ayo wulo mo tou teli odoo dee koo takooso. Bei, tou teli odoo ee o wiligi odoo eyo goo ee yo gooleedele. Esino niba tei mo odoo deeso. Bei, mo Maye amapoo taka goo susuga ee ayo nimapoo olo eligiso.

<sup>16</sup> Egeesi ma kulodu niyo a ka hesile. Esino ayo niba ka hesiga, niyo homokoko okopolo palame. Homokoko egee kookaiyo moloso osee malaiso. Niyo egeesee solone, ogoo goo talame mo hu maga mo Ma mapoo woosaga, yayo nimapoo tenelaiso.

<sup>17</sup> Esiga ayo nimapoo kokodo taka to ee hagoso. Niyo nee odoo nei sooloo dolo, nei sooloo dolo dolone ka debee.”

### *Mi odoo oso heiga goo*

<sup>18</sup> “Mi odoo oso niba heigoga, daga diayo a heigoso doloso gooleede.

<sup>19</sup> Esiga niba mi odoo sabolo hedebe doloso ka debei diepi, diayo niba dia odoo dolone diya goolee sabolo debeliyo. Esino ayo niba mi odoo dima kuloduga olo hesiaso, niyo dibolo hedebe doloso debelega pagalame. Goo egeesi maga diayo nimapoo heiga ka moloso.

<sup>20</sup> Esiga to ayo nimapoo taka ee medee goolee. Bei, ayo egeesee takaso. Wulo tou teli odoo oso o wiligi odoo ee dagadilesio koo badoso. Egeesi ma kulodu edebeeyo amapoo dala olo teneega, diayo niba nosee dala tenelaiso. Osoloso diayo ayo eligi goo mapoo mesiega, diba nosee niyo eligi goo mapoo mesileiso.

<sup>21</sup> Esino niba mo odooga, diayo goo susuga hagee nimapoo moodoolaiso. Bei, a diye di odoo ee diba gooleedele.

<sup>22</sup> Egeesi ma kulodu ayo sibilesio dimapoo to takele diepi, Godeeye dia goo tokenee midilei ee pegeliyo. Esino epedee hamapoo ayo sibilesio olo takaso. Goo egeesi maga goo tokenee diayo moodoo ee Godeeye midileiso. Esino diayo to nei takalai tebileime.

<sup>23</sup> Edebeeyo a heigoga, yo mo Ma nosee heigoso.

<sup>24</sup> Esiga goo toowa opusomo di ayo moodoomo silee egeesi odoo heeso moodoomo sile. Osoloso ayo dima kulodu goo hageesee moodele diepi, Godeeye dia goo tokenee midilei ee pegeliyo. Esino diayo goo toowa ayo moodoo ee egeliso. Esino diayo mo Ma asalo imapoo heiga ka moloso.

<sup>25</sup> Esiga goo hagee olo peledabaso, Godeeye to booka mapoo hogugu oso

**15:10:** Yon 14:15; 1Yon 2:5    **15:12:** Yon 13:34    **15:13:** Yon 10:11; 1Yon 3:16    **15:14:** Mat 12:50

**15:17:** Yon 13:34    **15:19:** Yon 17:14    **15:20:** Yon 13:16    **15:23:** Luka 10:16    **15:25:** Psa 35:19;

taka sabolo tebilame. Bei, Godeeyo toso egeesee takooso,

‘Diayo wulo goo mauwe amapoo heiga ka moloso,’ deliso.

<sup>26</sup> Ayo niba pidilame Dio Tei nimapoo diye dalaiso. Dio Tei oso mo Ma maga sibiliso, osoloso tei goodee eligiliso. Osoloso Dio Tei oso sibilesa, mo goo ee woola yilige bigileiso.

<sup>27</sup> Osoloso niba nose niyo mo goo odoo mapoo yilige bigi. Bei, niba daga bei mooloogoo biame omaga abolo hodobo sileeso.”

## 16

<sup>1</sup> “Esiga niyo tei too goo maga pee-goo diyaga, ayo goo susuga hagee nimapoo olo takaso.

<sup>2</sup> Bei, odoo aboso nibada hu howo gisili moso ma kulodu egee molo taloso niba peegoo hasiso bigileiso. Osoloso odoo aboso tei too odoo ee piliguga, diayo goolee Godeeyo tou to dee goolai, biame ee sibileiso.

<sup>3</sup> Esiga diayo goo hageesee nimapoo moodoolaiso. Bei, mo goo sabolo osoloso mo Mayo goo ee diba gooleedelega.

<sup>4</sup> Esiga goo hagee ayo nimapoo olo takaso. Egeesi ma kulodu goo hagoso tei peledobooga, niba to ayo taka ee gooleebigileiso.”

### *Dio Tei oso sibilei eyo goo taka*

“Esiga ayo daga Godeeyo tou bei mooloogolone a nibolo hodobo badebeiso. Goo egeesi maga, ayo goo hagee nimapoo takele.

<sup>5</sup> Esino a epei odoo a diye di mapoo duso. Esino nima kulodu odoo heeso amapoo takolone, a kapoo diala, doloso koo woosa.

<sup>6</sup> Esiga ayo takolone, a epei dileiso, dee taka goo ee niyo duloso niba diya ka gooholoso.

<sup>7</sup> Esino ayo tei goo nimapoo ka taka. Ayo niba poogoloso duga, goo oso niba pidileiso. Bei, a duga, nei ayo Dio Tei nimapoo diye dalaiso,

yayo niba pidilame. Esino a dilega poogooga, Dio Tei ee nimapoo sibileime.

<sup>8</sup> Egeesi ma kulodu Dio Tei siboga, yayo mi odoo mapoo goo tokenee eyo goo maga tei goo takalaiso. Osoloso odoo Godeeyo howo woola tekepo dabalai goo onosee takalaiso. Osoloso Godeeye goo midilei goo eyo bei onosee takalaiso.

<sup>9</sup> Esiga Dio Tei oso goo tokenee eyo goo maga tei goo takolone, amapoo tei tele pagalai goo ee mi odoo dia goo tokenee toowa ka moloso, dee takalaiso.

<sup>10</sup> Osoloso a mo Ma mapoo hagee polo see niyo a agalaime. Goo ogoso Godeeyo howo woola tekepo badalai goo ee yilige bigileiso.

<sup>11</sup> Osoloso Dio Tei oso Godeeye goo midili goo ee tei goo takolone, mi odoo dia goo ee midileiso, dee takalaiso. Bei, mi odoo dia wiligi odoo Saiteneeyo goo ee olo midiso.

<sup>12</sup> Esiga amapoo goo bei moloso, ayo nimapoo takalai. Esino epedee niyo goo bei egee gooleedalai tebile. Esiga ayo goo egee nimapoo takalaime.

<sup>13</sup> Esino Dio Tei oso nimapoo siboga, yayo niba tei goo susuga mapoo gilimado dileiso. Yayo eyo goolee takalaime. Esino yayo to ayo takeme du goo ee takomo sileiso. Osoloso hamamee goo ogoso peledabalai ee yayo nimapoo eligileiso.

<sup>14</sup> Esiga Dio Tei oso to ayo yimapoo takalai ee see nimapoo takalaiso. Goo egeesi maga yayo mo hu dokodoo poudileiso.

<sup>15</sup> Esiga goo susuga mo Maye toloso hagee molo ee mo. Goo egeesi maga ayo takolone, Dio Tei oso to ayo taka ee nimapoo takalaiso, dee ka taka.”

### *Goohela goo oso goomoga goo tosibileiso*

<sup>16</sup> “Biame deiyepo badoboso hamamee niyo a agalaime. Esino see biame deiyepo poogoloso hamamee niyo a see agalaiso.”

15:26: Yon 14:26

16:2: Mat 24:9; Luka 6:22; Yon 9:22

16:3: Yon 15:21

16:7: Yon 14:16

16:11: Yon 12:31

16:12: 1Kol 3:1-2

16:16: Yon 14:19

17 Esiga Yesuwo hamamee dili odoo aboso dieso nediliyo egeesee takaso, “Yayo imapoo takolone, biame deiyepo badoboso hamamee iyo yo agalaime, doloso see, biame deiyepo poogoloso hamamee iyo yo see ka agalai, dee taka goo eyo bei ee ogoobo? Osoloso yayo takolone, yo Ama mapoo dia, dee taka goo eyo bei ee ogoobo?”

18 Osoloso yayo imapoo takolone, biame deiyepo, dee taka goo eyo bei ogoobo? Iba to yayo taka eyo bei medee koo gooleedo,” dee takemeleeso.

19 Yesuye o hamamee dili odoo oso yimapoo woosalo agalame debei goo ee, yo olo gooleedoloso dimapoo egeesee takaso, “Ayo nimapoo takolone, ‘biame deiyepo badoboso hamamee niyo a agalaime,’ dee taka sabolo osoloso, ‘see biame deiyepo poogoloso hamamee niyo a see ka agalai,’ dee taka goo omaga niyo amapoo woosalame ka dabala?”

20 Egeesi ma kulodu ayo nimapoo taka. Niba gooholone pisileiso. Esino mi odoo ee goomogalaiso. O, tei takoo, niba goohalaiso. Esino goohele goo oso nimapoo goomoga goo tosilileiso.

21 Esiga niba medee goolee, soboso holo soomagoo biame omapoo yo dala teliso. Esino yo holo soomagoloso hamamee eyo dala too goo ee boobado bigiliso. Bei, yayo holope soomagoo goo maga diya goomogolone.

22 Esiga niba egeesi masi doso. Bei, niba epedee goohele sabolo doso. Esino a see wedi sibilesi niba agalaiso. Eseega domo omapoo niba diya goomogalaiso. Goomoga goo hagee odoo heeso nimaga peedee dalaime.

23 Biame omapoo niyo goo hee talame amapoo woosalaime. Esino ayo nimapoo tei taka. Niyo ogoogo talame mo hu maga Ma mapoo woosaga, yayo nimapoo tenelaiso.

24 Esiga niyo daga goo abo talame mo hu maga woosalo egele. Esino epedee hamaga dulone niyo ogoogo talame mo hu maga woosaga, niyo goo egee talaiso. Eseega goomoga goo nimapoo egee molo ee kauwuleiso.”

*Yesuye mi odoo dia wiligi odoo ee dagadi*

25 “Esiga ayo goo susuga hagee takomo silone, wulo wudu takomo sileeso. Esino biame siboga, ayo goo susuga ee see nimapoo wulo wudu takomo sileime. Esino ayo Mayo goo ee nimapoo woola takomo sileiso.

26 Esiga biame omapoo nibada goo ee ayo Ma mapoo woosalaime. Bei, niyo nibada goo ee mo hu maga Ma mapoo woosamalaiso.

27 Bei, niyo tei tolone, a tei Ma maga simi doloso, a diya goolee sabolo egee do goo maga Maye niba diya sooloo dolone ka badoso.

28 Esiga ayo Maye badeli mi maga mipoo hamapoo simiso. Osoloso see epedee mipoo hagee poogoloso Maye badeli mi mapoo ka wedi poloso,” dee takaso.

29 Esem o hamamee dili odoo oso yimapoo egeesee takaso, “Epedee nayo goo hagee imapoo wulo koo wudu takoo. Esino nayo goo susuga hagee imapoo woola yilige buguso.

30 Esiga iba tei toso, no tei Godee maga simiga. Bei, goo susuga ee no diya gooleedo. Osoloso odoo heeso namapoo woosalame gooleemelee ee ogoloso daga nayo yimapoo nei takeliso,” dee takaso.

31 Esem Yesuye nei egeesee takaso, “Niba epedee tei toso?”

32 Esino niba medee dui. Biame olo sibileiso, osoloso olo simiso, niyo a poogoloso nibada mosopoo kukulo dilei. Esino a mobusomo koo badeli. Bei, mo Maye abolo hodobo badeliso.

33 Niyo amapoo tei too goo maga nimapoo mesie goo oso malame, ayo goo susuga hagee nimapoo olo takaso. Niba mipoo hamapoo dala



ma kulodu dabalaiso. Esino niba ebi-  
lega medee kibiya debee. Bei, mipoo  
hagoso kitulugu ee ayo dagadilesa ka  
badoso.”

## 17

*Yesuye o su halo Godee mapoo  
taka*

<sup>1</sup> Yesu to hagee taka koodobu-  
loso, Kei mi ma dokodoo bolone  
egeesee takaso, “Ma, mo biame olo  
siboso. Esiga Nowolo ayo toowa  
doloso badeli goo ee odoosusuga  
mapoo eligi, Nowolo ayo nei nayo  
toowa doloso badeli goo ee odoosusuga  
mapoo eligilame.

<sup>2</sup> Bei, odoosusuga ee balame nayo  
Nowolo amapoo kitulugu olo te-  
neeso, see ayo odoosusuga nayo amapoo  
teneesee dimapoo kookaiyo badoboso  
gie badeli tenelame.

<sup>3</sup> Osoloso kookaiyo badoboso gie  
badeli goo ee, tei Godee hedebe  
no gooleedalai sabolo, osoloso  
nayo diye di odoosusuga, Yesu Keliso a  
gooleedalai ee takooso.

<sup>4</sup> Tou nayo amapoo teneesee ee ayo  
hosudoo maga, ayo mipoo hamapoo  
badolone, nayo toowa doloso badeli  
goo ee odoosusuga mapoo eligiso.

<sup>5</sup> Esiga Ma, mipoo hagee moodel-  
ega molome, ayo nobolo badolone  
ayo toowa doloso badebeiso. Esiga  
goo egee see epedee amapoo teneesee.”

*Yesuye o hamamee dili odoosusuga  
halo Godee mapoo taka*

<sup>6</sup> “Ma, mipoo hagee ma kuloduga  
odoo nayo amapoo teneesee mapoo ayo  
nee goo olo eligiso. Hagee nee odoosusuga,  
nayo amapoo teneesee. Osoloso diayo  
nee to mapoo mesimo silesibiliso.

<sup>7</sup> Esiga goo susuga nayo amapoo  
teneesee ee, namaga siboso doloso diba  
epedee olo gooleedooso.

<sup>8</sup> Osoloso eligi goo nayo amapoo  
teneesee ee, see ayo dimapoo teneme,  
see diayo eligi goo omapoo tei tooso.  
Osoloso ayo namaga simi goo ee,  
diba olo gooleedooso. Osoloso diba

nosee nayo a diye di goo mapoo tei  
tooso.

<sup>9</sup> Esiga ayo namapoo hagee takoo  
mi odoosusuga halo koo takooso. Esino  
odoo nayo amapoo teneesee ee halo  
namapoo ka taka. Bei, odoosusuga hagee  
nee odoosusuga.

<sup>10</sup> Egeesi ma kulodu odoosusuga hagee  
bia ee ibada odoosusuga. Diba mo odoosusuga  
osoloso diba nosee nee odoosusuga oso.  
Osoloso ayo toowa doloso badeli goo  
ee dimaga woola yilige bigiliso.

<sup>11</sup> Esiga a mipoo hagee poogoo  
dileiso. Bei, a namapoo olo siboso.  
Esino mo hamamee dili odoosusuga oso  
mipoo hamapoo osee dabalaiso. Ma,  
no tei. Nee hu oso kitulugu amapoo  
teneesee oso odoosusuga hagee bia medee  
bamelee, nayo abolo hedebe doloso  
egeebado egeesee solone, diba nosee  
dieso hedebe doloso dabalame.

<sup>12</sup> Egeesi ma kulodu ayo dibolo  
hodobo badolone, nee hu oso kitulugu  
nayo amapoo teneesee goo oso  
ayo diba medee bameleeso. Esemee  
odoo hee osugobele. Esino odoosusuga  
hee Godee maga pileigo dee taka  
hedebe ono osugobaso, Ma Godee  
nee to booka mapoo hogugu oso taka  
sabolo tebilame.

<sup>13</sup> Esiga a namapoo olo siboso.  
Esino a mipoo hamapoo osee  
badolone, goo hagee ayo namapoo  
ka taka, goomoga goo amapoo egee  
molo oso mo hamamee dili odoosusuga  
dima kulodu toowa doloso malame.

<sup>14</sup> Esiga ayo nee to dimapoo  
olo takaso. Esino mi odoosusuga oso  
diba heigaso. Bei, a mi odoosusuga  
egeeseeone diba nosee mi odoosusuga  
doloso koo doso.

<sup>15</sup> Esiga Ma, ayo namapoo hagee  
takoo, nayo mo hamamee dili odoosusuga  
mi hamaga peegoo gilimado dilame  
koo takooso. Esino diba Saitenso to-  
kenee peeyaga nayo medee balame  
ka taka.

<sup>16</sup> Esiga a mi odoosusuga, egeeseeone  
diba nosee mi odoosusuga doloso koo doso.

<sup>17</sup> Nee to ee tei goo. Esiga nayo  
nee to omaga diba nee odoosusuga dalame  
peegoo pi magee.

<sup>18</sup> Esiga nayo a diye di egeesee solone, ayo diba nosee mipoo hagee ma kulodu diye deeso.

<sup>19</sup> Osoloso ayo diba halo a namapoo teneeso, diba nosee tei nee odoo doloso peegoo pi magoloso ka dabalame.”

*Yesuye tei telaga odoo halo  
Godee mapoo taka*

<sup>20</sup> “Esiga ayo hedebe mo hamamee dili odoo ee halo namapoo koo takooso. Esino diayo eligi goo ee dulosu edebeeyo amapoo tei talai odoo sabolosee diba halo ka takooso.

<sup>21</sup> Osoloso Ma, ayo namapoo to egeesee ka taka. Ayo nobolo hedebe doloso egee bado, egeesee solone nei nayo abolo hedebe doloso ka badoso. Egeesee solone diba nosee hedebe doloso dabalame ka taka. Osoloso diba nosee ibolo hedebe doloso dabalame ka taka. Egeeseega mi odoo oso a tei nayo diye di goo mapoo tei ka talame.

<sup>22</sup> Esiga toowa doloso badeli goo nayo amapoo tenee ee, see ayo dimapoo teneeso, diba dieso hedebe doloso dabalame. Egeesi ma kulodu iba nosee hedebe doloso egeesee ka doso.

<sup>23</sup> Esiga ayo dibolo hodobo badoso, osoloso nayo abolo hodobo badoso. Iyo egee do egeesi masi diba nosee hedebe doloso dabalai a goomogo. Eseega mi odoo oso goo egee ogoloso a tei nayo diye di goo ee gooleedalaiso. Osoloso nayo a diya sooloo dolone egee bado, egeesee solone nayo tei telaga odoo diya sooloo dolone egee bado goo sabolo mi odoo gooleedalaiso.

<sup>24</sup> Esiga Ma, tei telaga odoo nayo amapoo tenee hagee bia ee ayo badalai mi mapoo abolo hodobo dabalai, a goomogoso. Osoloso toowa doloso badeli goo ee nayo amapoo tenee ee diayo agalai, a goomogo. Mipoo moodelega molome, nayo a sooloo dolone, toowa doloso badeli goo egee nayo amapoo teneeso.

<sup>25</sup> Esiga Ma, hedebe no tekepo. Mi odoo oso no gooleede. Esino ayo no

ka gooleedoo. Osoloso nayo a diye di goo ee tei telaga odoo diba olo gooleedooso.

<sup>26</sup> Ayo nee goo dimapoo olo yilige buguso, osoloso see yilige bigileiso, nayo a sooloo dolone egee bado goo egeesi masi oso dima kulodu ka malame. Osoloso anosee dibolo hodobo badalame.”

## 18

*Edebeeyo Yesu too  
(Mat 26:47-56; Maka 14:43-50;  
Luka 22:47-53)*

<sup>1</sup> Yesuye Godee mapoo taka koodobuloso, see o hamamee dili odoo sabolo Kidilon howo tolobo dalo diso. Osoloso mi omapoo olipi segei homolee meleeso. Esem Yesuye o hamamee dili odoo sabolo omapoo gadiso.

<sup>2</sup> Egeesi ma kulodu Yudas, Yesu ha teli odoo mapoo tiaseli odoo onosee homolee ee yo gooleedoo. Bei, biame abo mapoo Yesuye o hamamee dili odoo sabolo omapoo dilesu mooloo-goodeliso.

<sup>3</sup> Esiga Yudaseeye Loum ha teli odoo mooloogoodoo sabolo osoloso tei moso gidebeli odoo gilimado simiso. Tei moso gidebeli odoo hagee bia ee tei moso eyo wiligi odoo tebisa sabolo osoloso Pelisi odoo oso ka diye di. Diayo sibulone keme sabolo, egime sabolo, osoloso ha teli bi tolosu sibilesu peledabaso.

<sup>4</sup> Esem Yesuye goo susuga yimapoo peledabalai ee yo olo gooleedolosu malalo toboloso dimapoo egeesee takaso, “Niba odoo ugu esiamo silala?” diso.

<sup>5</sup> Esem diayo nei yimapoo egeesee takaso, “Iba Nasalet odoo Yesu ee esiamo sila,” diso. Esem Yesuye nei dimapoo egeesee takaso, “Niyo egee esiamo silo odoo ee aso,” diso. Epedee egeesee semelee mapoo Yesu ha teli odoo mapoo tiaseli odoo Yudas yinosee omapoo dibolo hodobo tebidiso.

<sup>6</sup> Esem Yesuye dimapoo takolone, odoo egee aso, dee taka dulosu diba

badayo dilesa miyomoo misiged-ibaso.

<sup>7</sup> Esemé Yesúye see tobu dimapoo egeesee woosaso, “Niba odoo ogu esiamo silala?” Esemé see diayo nei yimapoo egeesee takaso, “Iba Nasalet odoo Yesu ee esiamo sila,” dee takaso.

<sup>8</sup> Esemé Yesúye nei egeesee takaso, “Odoó egee aso doloso ayo nimapoo olo takaso. Esiga niyo tei a esiamo silesiboga, odoo abolo hagee silesibo diba noseé diye dalai tekepo.”

<sup>9</sup> Esiga goo hagoso egeesee peled-abaso. Bei, Yesúye daga o hamamee dili odoo sabolo silesibulone taka to sabolo tebilame. Bei, yayo egeesee ka taka, “Ma, odoo nayo amapoo tenee ee ayo diba medee bameleeso, odoo hee peegoo osugobeles,” dee takaso.

<sup>10</sup> Esemé Saimon-Pitaye o kaiya tadoloso tei moso wiligi odoo taba eyo tou teli odoo hee Malakuseeyo dulu deedeé dokolo ee kobuguso.

<sup>11</sup> Esemé Yesúye Pita mapoo egeesee takaso, “Nee kaiya egee o moso mapoo toose. Maye dala amapoo tenelame egee molo, ayo talai tekepo,” dee takaso.

<sup>12</sup> Esemé Loum ha teli odoo mooloogoodoo toowa sabolo, osoloso dia wiligi odoo taba sabolo, osoloso Yu odoo dia tei moso gidebeli odoo oso Yesu toloso dee tiaso.

<sup>13</sup> Osoloso diayo yo Kayapaseeyo nalobo Anas mapoo ido diso. Kayapas hagoso dugo omapoo tei moso wiligi odoo toboloso badebeiso.

<sup>14</sup> Kayapas hedebe hagoso daga Yesuwo goo maga Yu odoo dia wiligi odoo mapoo takolone, “Odoó hedebeeso odoo susuga ee halo talai tekepo,” dee ka taka.

*Pitaye Yesuwo goo gagadi*

*(Mat 26:69-70; Maka 14:66-68; Luka 22:54-57)*

<sup>15</sup> Edebeeyo Yesu toloso ido dime, Saimon-Pita dio osoloso Yesu o hamamee dili odoo hee dio hamamee diso. Esino tei moso wiligi odoo taba oso odoo Pitabolo di ee\* yo olo gooleedooso. Esemé yayo Yesúye di hamamee deedeé dilesa, tei moso wiligi odoo taba eyo moso\* beelee ee ma kulodu gadiso.

<sup>16</sup> Esino Pita yo beelee osulu miyopoo tebidiso. Esemé odoo Pitabolo simi oso see osulu miyopoo wedi dilesa, sobo osulu gibadeli mapoo takoloso, Pita kulodu ido diso.

<sup>17</sup> Esemé sobo ogoso Pita ogoloso yimapoo egeesee woosaso, “No noseé, Yesu o hamamee dili odoo hee nosomo?” dee takaso. Esemé Pitaye nei egeesee takaso, “Haye, asonee,” diso.

<sup>18</sup> Biame omapoo tei moso wiligi odoo taba eyo tou teli odoo abo sabolo osoloso tei moso gidebeli odoo diba diya kekeisime, dou toloso dou halagameleeso. Esemé Pita yinosee dilesa dibolo hodobo tobudulone dou hameleeso.

*Tei moso wiligi odoo taba oso  
Yesu mapoo woosa*

*(Mat 26:59-66; Maka 14:55-64; Luka 22:66-71)*

<sup>19</sup> Biame omapoo tei moso wiligi odoo taba oso Yesu yayo eligi goo sabolo, osoloso o hamamee dili odoo dia goo ee yimapoo woosaso.

<sup>20</sup> Esemé Yesúye nei yimapoo egeesee takaso, “Odoó susuga eyo howo woola ayo goo susuga hagee takomo sileeso. Osoloso ayo ibada howo gisili moso mapoo osoloso tei moso ma kulodu peleso odoo mapoo eligimo siliso. Bei, Yu odoo susuga oso sibilesa omapoo mooloogoo deliso. Egeesi ma kulodu ayo goo hee mada takele.

<sup>21</sup> Esiga bei kasi maga nayo amapoo ka woosowala? Nayo odoo

**18:9:** Yon 17:12    **18:11:** Mat 26:39    **18:14:** Yon 11:49-51    \* **18:15:** Odoó Pitabolo di ee Yonee.

\* **18:15:** *tei moso wiligi odoo taba eyo moso* hagee Anaseeyo moso. Daga yayo tei moso wiligi odoo toboloso badoboome, see hamamee Kayapaseeye o debi tooso. Esino edebeeyo takolone, Anas yo tei moso eyo wiligi odoo taba doloso osee takeliso.

ayo eligime du mapoo woose. Bei, to ayo taka ee, diba gooleedooga.”

<sup>22</sup> Yesuye goo hagee takeme, tei moso gibadeli odoo hee koola omapoo tebidi oso Yesuwo mudu mapoo kobugulone egeesee takaso, “Nayo ibada tei moso wiligi odoo taba mapoo to nei egeesee takalai tekeponee,” diso.

<sup>23</sup> Esemé Yesuye odoo yo kobugu mapoo nei egeesee takaso, “To ayo taka ee ma kulodu to tokenee hee taka daga, nayo goo egee woala odoo susuga hamapoo yebigi. Esino ayo tei goo takano, bei kasalame nayo a ka kobuguwo?” dee takaso.

<sup>24</sup> Esemé Yesu o dee tia sabolo osee tobudume, Anaseeye tei moso wiligi odoo taba Kayapas mapoo ido diye diso.

*Pitaye Yesuwo goo see tobu gagadi*  
(*Mat 26:71-75; Maka 14:69-72; Luka 22:58-62*)

<sup>25</sup> Saimon-Pita dou holone osee tobudume, odoo aboso yo ogoloso yimapoo egeesee takaso, “No Yesu o hamamee dili odoo hee nosomo?” diso. Esemé Pitaye egeesee takaso, “Haye, asonee,” diso.

<sup>26</sup> Esemé tei moso wiligi odoo taba eyo tou teli odoo hee omapoo tebidiso, yo odoo Pitaye dulu kobugu sabolo soosoo hedebe. Osoloso yayo Pita mapoo egeesee takaso, “Ayo no Yesubolo olipi segei homolee ma kulodu sileeme egeiso,” diso.

<sup>27</sup> Esemé Pitaye see tobu egeesee takaso, “Odoo egee asonee,” diso. Esemé epedee omapoo kolokolo takaso.

*Yesu Paillet mapoo ido di*  
(*Mat 27:1-2, 11-14; Maka 15:1-5; Luka 23:1-5*)

<sup>28</sup> Gesikolodee Yu odoo dia wiligi odoo oso Yesu Kayapaseeyo moso abaga see Loum gamalee odoo Paillet mapoo ido diso. Esino diba moso ee ma kulodu gadilega peegoo de-beiso. Bei, diba goomegele, diayo Yu

odoonee dia moso ma kulodu gaduga goo oso diba subugo kauwe dolone Gababia wo nelega peegeeyaga.\*

<sup>29</sup> Esemé Paillet peegoo dileso tobudulone dimapoo egeesee takaso, “Odoo hagoso goo kasi moodoowo, esiga niyo yo hamapoo ka ido simiyo?” dee takaso.

<sup>30</sup> Esemé diayo nei yimapoo egeesee takaso, “Odoo hagee goo hee tele diepi, iyo yo namapoo ido sibile pegeliyo,” diso.

<sup>31</sup> Esemé Pailleteeye dimapoo egeesee takaso, “Niso yo ido dileso nibada tei magoo sabolo tebilame o goo midi,” dee takaso.

Esemé Yu odoo dia wiligi odoo oso nei egeesee takaso, “Iyo yo wooloomalai goomogo. Esino iyo odoo wooloomalai Loum gamalee odooso imapoo kitulugu tenele,”

<sup>32</sup> Esiga goo hagoso olo peledabaso, Yesuye eyo talai goo ee takomo silee sabolo tebilame.

<sup>33</sup> Yayo egeesee taka duloso Paillet yo see moso kulodu gadileso badolone, Yesu idoloso yimapoo egeesee takaso, “No tei Yu odoo dia wiligi odoo taba nosomo?” dee takaso.

<sup>34</sup> Esemé Yesuye nei egeesee takaso, “Nayo amapoo egee woosa ee no goolee takala, o, odoo heeso mo goo ee namapoo takaga ka takala?” diso.

<sup>35</sup> Esemé Pailleteeye nei egeesee takaso, “Hagee mo goonee. Bei, a Yu odoonee. Teiyo? Esino nee odoo sabolo, osoloso tei moso wiligi odoo tebisa oso no amapoo ido simiso. Esiga no goo kasi moodoowo?”

<sup>36</sup> Esemé Yesuye nei egeesee takaso, “Ayo wiligi doloso badeli goo ee mipoo hamaga koo siboso. Egeesi ma kulodu ayo wiligi doloso badeli goo ee mipoo hamapoo meli diepi, Yu odooso a teyaga, mo tou teli odooso a galalo biligeliyo. Esino

<sup>18:27:</sup> Yon 13:38 \* <sup>18:28:</sup> Yu odoo dia tei magoo oso egeesee takooso, “Yu odoo oso Yu odoonee dia moso ma kulodu gaduga, yo subugo kauwe badalaiso.” <sup>18:31:</sup> Yon 19:6-7 <sup>18:32:</sup> Yon 3:14; 12:33 <sup>18:35:</sup> Yon 1:11



ayo wiligi doloso badeli goo ee mipoo hamaga koo siboso,” dee takaso.

<sup>37</sup> Esem Pailteeye see egeesee takaso, “Esiga no tei wiligi odoo. Teiyo, ha?” diso.

Esem Yesuye nei egeesee takaso, “Nayo amapoo takolone, a tei wiligi odoo, dee takemeni, ee tei taka. A mipoo hamapoo soomagooso, ayo odoo mapoo tei goodee takomo silame. Esiga edebeeyo tei goo ma kulodu dogo, diba mo to dulone ka doso.”

<sup>38</sup> Esem Pailteeye nei egeesee takaso, “Tei goo ee ogoobo?” diso.

### *Pailteeye Yesu wooloomalame kitulugu tenee*

*(Mat 27:15-31; Maka 15:6-20; Luka 23:13-25)*

Paillet see peegoo gadilesu tobuludone Yu odoo dia wiligi odoo tebisa mapoo egeesee takaso, “Ayo odoo hamapoo goo hee koo ogo.”

<sup>39</sup> Esino ayo nibada adaga dia goo ee dodolone, niyo Gababia wo ne biame mapoo, ayo odoo hee neliga moso ma kuloduga peegoo tamageliso. Esiga ayo Yu odoo nibada wiligi odoo hagee peegoo tamagalai, niba goomogosomo?” dee takaso.

<sup>40</sup> Esem diayo toso neligidi nei egeesee takaso, “Haye, odoo egee peegoo tamagalai, iba koo goomogo. Esino nayo Balabas ono peegoo ka tamagee,” dee takaga meleeso. Esino Balabas hagoso Loum odoo dia wiligi odoo tebisa mapoo ha temeleso.

## 19

<sup>1</sup> Osoloso Pailteeye o ha teli odoo mapoo takolone, Yesu toloso we tiso weeye, diso.

<sup>2</sup> Esem diayo yo wooloso we ti sidoloso, o wiligi mapoo mediso, osoloso wiligi odoo tebisa oso kali dugo bige sage yimapoo kadiso.

<sup>3</sup> Osoloso diayo yo manolone yimapoo takolone, “Yu odoo dia wiligi odoo taba, iyo nee hu dokodoo

poudoso,” dolone o mudu mapoo kobugu demeleso.

<sup>4</sup> Esem Pailteeye see o moso kuloduga peegoo gadilesu tobuludone odoo mooloogoodoo mapoo egeesee takaso, “Niso be, ayo Yesu nimapoo ido sibileiso, ayo yimapoo goo hee egele poogoo goo nimapoo ee eligileiya,” dee takaso.

<sup>5</sup> Yayo egeesee takeme, Yesu we ti sidoo o wiligi mapoo mediloso dugo bige sage ka sabolo peegoo gasimiso. Esem Pailteeye dimapoo egeesee takaso, “Niso ege, odoo hagoso,” diso.

<sup>6</sup> Esem epedee omapoo tei moso wiligi odoo tebisa sabolo, osoloso tei moso gidebeli odoo oso yo ogoloso toso neligidi egeesee takaso, “Yo homo bulubo magoo ma dokodoo yoguso enige. Yo homo bulubo magoo ma dokodoo yoguso enige,” dee takemeleso.

Esem Pailteeye dimapoo egeesee takaso, “Niso yo homo bulubo magoo ma dokodoo yoguso enigilame ido di. Bei, ayo yimapoo goo hee koo ogo,” diso.

<sup>7</sup> Esem Yu odoo dia wiligi odoo tebisa oso nei yimapoo egeesee takaso, “Ibada tei magoo oso egeesee takooso, yo talai tekepo. Bei, yayo takolone, yo Godeeyo Owolo, dee takeliso,” diso.

<sup>8-9</sup> Esino Paillet goo hagee duloso diya obulone, see moso kulodu gadilesu tobuludone, Yesu mapoo egeesee takaso, “No odoo ogu bi-ayo?” dee takaso. Esem Yesuye Pailteeye taka to eyo su nei takele.

<sup>10</sup> Esem Pailteeye yimapoo egeesee takaso, “Nayo amapoo to nei takele poogoosoba? Bei, no gooledeleyo, ayo no peegoo tamagee dee takalai, osoloso no homo bulubo magoo ma dokodoo yoguso enige dee takalai, amapoo kitulugu moloso?” dee takaso.

<sup>11</sup> Esem Yesuye nei yimapoo egeesee takaso, “Kitulugu epedee

namapoo egee molo ee no goolee tele. Esino kitulugu hagee Godeeye namapoo ka tenee. Esiga odoo a toloso namapoo tenee eyo goo tokenee oso nee goo tokenee ee dagadilesa ka moloso,” diso.

<sup>12</sup> Pailteeye to hagee duloso, Yesu peegoo tamagalai yo goomogaso. Esino Yu odoo dia wiligi odoo tebisa oso to neligidi egeesee takaso, “Odo agayo eyo nediliyo takolone yo wiligi odoo, dee takomo siloga, yo Loum wiligi odoo Sisa mapoo ha toso. Osoloso nayo odoo hagee peegoo tamagooga, no Sisayo odoonee,” dee takaga meleeso.

<sup>13</sup> Pailteeye to hagee duloso, Yesu peegoo ido sibilesa, yo goo midili odoo oso bili mapoo biaso. Bili mi egee takolone, yopoo mi, deliso. Osoloso Hibulu toso takolone, Gabata, deliso.

<sup>14</sup> Esiga goo hagee diayo Gababia wo nali sadee ee ma kulodu dia hasali biame ee mopoodoo dalai biame mapoo ka peledaba. Epedee omapoo osoko howo olo oo domo talai koola tabaso. Esem Pailteeye Yu odoo mapoo egeesee takaso, “Niso ege. Nibada wiligi odoo hagoso,” dee takaso.

<sup>15</sup> Esem diayo toso neligidi egeesee takaso, “Yo wooloome. Yo wooloome. Yo homo bulubo magoo ma dokodoo yoguso enige,” dee takemeleeso.

Esem Pailteeye dimapoo egeesee takaso, “Niba goomogosomo, ayo nibada wiligi odoo ee homo bulubo magoo ma dokodoo yoguso enigilei?” dee takaso.

Esem tei moso wiligi odoo tebisa oso nei yimapoo egeesee takaso, “Ibada wiligi odoo hedebe Sisaso, odoo hee me,” diso.

<sup>16</sup> Esem Yesu homo bulubo magoo ma dokodoo yoguso enigilame, Pailteeye yo dimapoo teneeso. Esem o ha teli odoo oso Yesu toloso ido diso.

*Yesu homo bulubo magoo ma dokodoo yoguso eniga*

*(Mat 27:32-44; Maka 15:21-32; Luka 23:26-43)*

<sup>17</sup> Ha teli odoo oso Yesu toloso ido dulone, o homo bulubo magoo ee eyo eimaloso mi hee eyo hu wiligi ki mi deli mapoo ido diso. Mi hagee Hibulu toso takolone Gologota deli.

<sup>18</sup> Osoloso mi omapoo diayo Yesu homo bulubo magoo ma dokodoo yoguso enigaloso tuluguso. Osoloso odoo bakadio onosee homo bulubo magoo mapoo yoguso enigaloso, odoo hee Yesuwo deede dokolo tulugu, osoloso hee dobusu dokolo tulugu diso.

<sup>19</sup> Osoloso Pailteeye o odoo mapoo takolone, to hogugiye dee takeme, diayo to hageesee hoguguloso Yesuwo oo poogoo ma dokodooga kalamaso,

“Yesu Nasalet odoo, Yu odoo dia wiligi odoo taba.”

<sup>20</sup> Esiga to hogugu hagee Yu odoo dia to sabolo, osoloso Loum odoo dia to sabolo, osoloso Guliki odoo dia to oso hogugu. Esiga odoo susuga to hogugu egee ogoloso hesigaso. Bei, Yesu homo bulubo magoo ma dokodoo yoguso eniga mi ee Yelusalem maga haga hoogonee.

<sup>21</sup> Egeesi ma kulodu tei moso wiligi odoo tebisa oso sibilesa Pailteeye mapoo egeesee takaso, “Nayo to hogugulone, yo Yu odoo dia wiligi odoo taba doloso na hogugi. Esino hageesee hogugi, ‘Odo hagoso takolone, yo Yu odoo dia wiligi odoo taba, dee takomo siliso,’ dee,” dee takaso.

<sup>22</sup> Esem Pailteeye nei dimapoo egeesee takaso, “To ayo hogugu hagee osee hogugu malaiso,” dee takaso.

<sup>23</sup> Ha teli odoo bakadio bakadio di oso Yesu homo bulubo magoo ma dokodoo yoguso enigaloso, o dugo diesono domo puloso tooso. Osoloso o sedi sage edebeeyo dusele poogoo sabolo diayo tooso.

24 Osoloso ha teli odoo dieso nei takoo nei takoo dolone egeesee takaso, “Iba dugo hagee wulo domo na didamo. Esino dugo hagee odoo agayo toowa beleso yoso dasigeli hee dasigalo ogomo,” diso. Osoloso goo hagoso olo peledabaso, Godeeyo to booka mapoo hogugu sabolo tebilame. Bei, Godeeyo to oso egeesee takooso, “Diayo mo dugo diesono puloso tooso.

Osoloso mo dugo sage ee talame yoso dasigeli hee dasigaso,” diso.

Esiga ha teli odoo oso goo egee moodooso.

25 Egeesee somolome, Yesuwo owee sabolo, osoloso oweeyo omolo sabolo, osoloso Kolopaseeyo osobo Meli sabolo, osoloso Meli-Magadalin oso Yesu homo bulubo magoo ma dokodoo molome, koola omaga tebisamolone balaga meleeso.

26 Esemé Yesuye owee sabolo osoloso o hamamee dili odoo yayo diya gweli diba koola mapoo tebisamolome ogoloso owee mapoo egeesee takaso, “Mo wee, odoo hagee nowoloso,” dee takaso.

27 Osoloso see o hamamee dili odoo hedebe omapoo egeesee takaso, “No ege, noowee hagoso,” diso. Biame domo omaga Yesuwo hamamee dili odoo hagoso o moso mapoo Meli ido dileso medee bameleeso.

*Yesuye ta*

(*Mat 27:45-56; Maka 15:33-41; Luka 23:44-49*)

28 Esiga goo hagoso dileso koodobume, tou susuga Godeeye Yesu mapoo tenee ee yayo olo hosudooso doloso gooleedooso. Egeeseelone Godeeyo to booka mapoo hogugu sabolo tebilame egeesee takaso, “A howo na poogoo,” diso.

29 Mi omapoo wain i koo hadali\* katolo mapoo keeso ee magoo meleeso. Esemé odoo heeso homo sage toloso su mapoo dugo tialogoloso, wain i omapoo olugu doloso yayo nalame, Yesuwo maga mapoo heligiso.

30 Esemé Yesuye wain i egee olo naloso egeesee takaso, “Goo susuga olo hosudooso,” dee takaso. Osoloso oo goobodo buloso taso.

31 Esiga biame egee Yu odooso hasali biame ee mopoodoo deli biame oso. Esino dia hasali biame egee goo diya toowa. Bei, Godeeye Gababia goo ee Yu odooso gooleebigili sadee ee ma kulodu hasali biame egee meleeso.\* Goo egeesi maga Yu odoo dia wiligi odoo tebisa oso dia hasali biame mapoo odoo ta eyo kou ee homo bulubo magoo ma dokodoo osee malai, diba goomegele. Esiga diayo Paillet mapoo egeesee takaso, “Odoos homo bulubo magoo ma dokodoo egee molo saga wedilame, dibada homo gebisa poogoloso, dia kou miyomoo tomeilesa peegoo todi,” dee takaso.

32 Esemé ha teli odoo oso dileso odoo hee Yesuwo dee deede dokolo eniga eyo homo gebisa poogooso. Osoloso see odoo hee Yesuwo dee dobusu dokolo eniga eyo homo onosee gebisa poogooso.

33 Esino diayo sibilesa egeino, Yesu olo taneme, o homo gebisa pegele.

34 Esino ha teli odoo heeso o molo toloso Yesuwo ho hodio mapoo guso. Esemé haga booloogelega, sawo sabolo osoloso howo sabolo moloso gu omaga sooso.

35 Esiga goo hagoso peledaba egee odoo\* oso goo hamaga tei goo takaso. Osoloso yo gooleedoo, yo tei goo takeli. Egeesi ma kulodu goo yayo taka hamapoo niyo tei talame ka taka.

19:25: Mat 27:55-56    19:26: Yon 13:23    19:28: Psa 22:15    19:29: Psa 69:21    \* 19:29: **wain i koo hadali** - bi mauwe odoo sabolo osoloso ha teli odoo oso wain i koo hadali naliso, howo nala pegelega pagalame.    19:31: Deut 21:22-23    \* 19:31: Godeeye Gababia goo ee Yu odooso gooleebigili sadee ee ma kulodu, diayo Tasdee biame gesi mapoo Gababia wo naliso.    19:35: Yon 21:24    \* 19:35: Odoos hagee Yonee    19:36: Psa 34:20; Exo 12:46; Num 9:12

<sup>36</sup> Esiga goo hagoso tei peledabaso, Godeeyo to booka mapoo hogugu oso taka sabolo tebilame. Bei, Godeeyo to oso egeesee takooso, “O ki hee gebisa pagalaime,” dee takooso.

<sup>37</sup> Osoloso Godeeyo to hogugu heeso see egeesee takooso, “Edebeeyo odoo dieso moloso gu mapoo balaga malaiso,” dee takooso.

*Yesu mi doosoo*  
(*Mat 27:57-61; Maka 15:42-47; Luka 23:50-56*)

<sup>38</sup> Osoloso hamamee, odoo hee Alimatiya mi mapoo badeli, o hu Yosep, yayo Yesuwo kou talame Paillet mapoo dilesos woosaso. Yosep hagee Yesu o hamamee dili odoo hee yoso. Esino yo Yu odoo dia wiligi odoo tebisa ee bolo obulone, mada Yesuye di hamamee diliso. Esememe Pailleteeye yimapoo kitulugu teneeso, yayo Yesuwo kou talame. Esememe Yosepeeye dilesos Yesuwo kou ee homo bulubo magoo ma dokodooga miyomoo tomeilesos peegoo todiso.

<sup>39</sup> Esememe Nikodimaseeye yo pidimo diso. Nikodimas hagee daga gesi Yesu agalame di odoo oso. Yayo sisigageli bi medee tekepo Yesuwo kou mapoo hedilame todiso. Sisigageli bi medee tekepo hagoso hegi ee 30 kilo egeesi masi.

<sup>40</sup> Osoloso odoo bakadio oso Yesuwo kou tolosos, Yu odoosos odoo toga mi dooseli goo ee dodolone, sisigageli bi medee tekepo oso Yesuwo kou mapoo hedilosos dugo semesos tiegisasos.

<sup>41</sup> Egeesi ma kulodu Yesu homo bulubo magoo ma dokodoo eniga mi eyo koola omapoo homolee meleesos. Homolee ee ma kulodu bi dia yo ou poogoo mapoo daga odoo tayo kou magele poogoo meleesos.

<sup>42</sup> Esiga dia hasali biame bei mooloogalai koola tooboome, diayo Yesuwo kou tolosos saga yo ou poogoo ee ma kulodu magoosos. Bei, yo ou poogoo egee haga hoogooneega.

## 20

*Bi mosoowe molo egei*  
(*Mat 28:1-8; Maka 16:1-8; Luka 24:1-12*)

<sup>1</sup> Sadee toowa gesikolo mi hadobilega molome, Meli-Magadalineeye Yesuwo bi agalame diso. Yayo sibilesos egeinos, yo toowasos wulu ou kisi ee peegoo bidigamos dilesos molome egeisos.

<sup>2</sup> Esememe Meliye see hoguos dilesos Saimon-Pita dios osolosos Yesuwo hamamee dili odoo yayo diya gweli mapoo egeesee takasos, “Lodeeyo kou peegoo todina. Osolosos diayos o kou todilesos magoo mi ee, iba gooleedeles,” dee takasos.

<sup>3</sup> Esememe Pita dios osolosos o hamamee dili odoo hee egee dios bi mapoo agalame diso.

<sup>4</sup> Diba hoguos diyadagas molome, o hamamee dili odoo heesos Pita dagadilesos bi mapoo peledabaso.

<sup>5</sup> Osolosos yo gauwulosos yo ou poogoo ma kulodu keesee egeinos, hedebe dugos semes Yesuwo kou tiegisa onos molome egeisos. Esino yo yo ou poogoo ma kulodu gadile.

<sup>6</sup> Esememe Saimon-Pitaye hamamee sibilesos peledobolosos, yo ou poogoo ma kulodu gadilesos egeinos, dugos Yesuwo kou tiadoss hedebe onos omapoo molome egeisos.

<sup>7</sup> Osolosos dugos Yesuwo wiligi tiadoss ee medee tiadolosos obusomos peegoo magoo molome egeisos.

<sup>8</sup> Esememe o hamamee dili odoo hee bi mapoo daga malalos peledabasos osos yo ou poogoo ma kulodu gadisos. Yo gadilesos goo hagee ogolosos tei toosos.

<sup>9</sup> Egeesi ma kulodu Godeeyo to booka mapoo hogugu oso takolone, yo ta maga hogadulosos gie badalaisos, dee taka goo eyo bei ee, diba medee kibiya gooleedelegas osee debeisos.

<sup>10</sup> Osolosos o bakadio see mosopoo wedi disos.

*Yesuye Meli-Magadalin*  
*mapoo peledaba*  
(*Mat 28:9-10; Maka 16:9-11*)



11-12 Esino Meli-Magadalin bi ma peegoo tobudulone pusumeleeso. Yo omapoo pusulone gauwuloso, yo ou poogoo ma kulodu keesee egeino, Godeeyo momaiye bakadio dugo heliye kalagaloso doboome egeiso. Momaiye heeso Yesuwo wiligi poogoo dokolo buo, osoloso heeso kai poogoo dokolo buo doloso doboome egeiso.

13 Esememe momaiye bakadio oso yimapoo egeesee takaso, "Sobo no, bei kaseega ka pusumalala?" dee takaso.

Esememe Meliye dimapoo egeesee takaso, "Diayo mo Lodeeyo kou ee peegoo todina. Esino diayo o kou magoo ee a gooleedele," diso.

14 Meliye to egeesee takoloso bidi toboloso keesee egeino, Yesu tobudo egeiso. Esino yayo goolee, Yesu odo hee gooleeso.

15 Esememe Yesuye yimapoo egeesee takaso, "Sobo no, bei kaseega ka pusumalala? Osoloso no odo ogu esiamo silala?" dee takaso.

Esememe Meliye goolee yo homolee mapoo tou teli odo oso bele dolone yimapoo egeesee takaso, "Emegei, nayo Yesuwo kou peegoo todilesa ka magoo daga, mi egee amapoo takee. Eseege ayo dilesa o kou egee ka talaiya," dee takaso.

16 Esememe Yesuye yimapoo egeesee takaso, "Meli," diso.

Esememe Meliye bidi toboloso yimapoo Hibulu toso egeesee takaso, "Laboni." To hageeyo bei ee eligili odo dolone ka takooso.

17 Esememe Yesuye yimapoo egeesee takaso, "A nayo na gide. Bei, a mo Ma mapoo wedi pele. Esino nayo dilesa mo hamamee dili odo mapoo takee, 'A mo Ma Godee mapoo palame ka seeso. Ma Godee hedebe onosee dibada Godee osoloso nibada Godee,' dee takee," diso.

18 Esememe Meli-Magadalinsee see wedi sibilesa Yesu o hamamee dili odo mapoo egeesee takaso, "Ayo

Yesu olo egeiso," diso. Osoloso goo susuga Yesuye yimapoo taka ee see yayo dimapoo takaso.

*Yesuye o hamamee dili odo mapoo peledaba*

(Mat 28:16-20; Maka 16:14-18; Luka 24:36-49)

19 Sadee toowa habe omapoo Yesu o hamamee dili odo oso Yu odo dia wiligi odo tebisa ee bolo obulone, hodobo mooloogoo doloso moso osulu medee kisigaloso debeiso. Esememe omapoo Yesuye sibilesa peledoboloso tobudulone dimapoo egeesee takaso, "Mesie goo oso nibolo osee mele dee," dee takaso.

20 Yayo to egeesee takoloso tobudulone, o dee boowo sabolo, osoloso o ho hodio mapoo moloso gu eyo boowo ee dimapoo eligiso. Esememe Yesu o hamamee dili odooso yo ogoloso diya goomogaso.

21 Osoloso Yesuye see tobu dimapoo egeesee takaso, "Mesie goo oso nibolo osee mele dee. Esiga Maye a diye diga, ayo niba nose diye deeso," dee takaso.

22 Yesuye goo hagee takoloso see dimapoo magaso hologoo nilone egeesee takaso, "Niba Dio Tei te," diso.

23 Osoloso see dimapoo egeesee takaso, "Niyo odo heeyo goo tokenee boobado buguga, odo egee bia dia goo tokenee ee hapoloso boobado bigileiso. Esino niyo odo heeyo goo tokenee boobado bigilega poogooga, odo egee bia dia goo tokenee ee hapoloso boobado bigileime," dee takaso.

*Tomaseeye Yesu ogoloso tei too*

24 Esino Yesu o hamamee dili odo hee Tomas, o hu hee Didimas\* deli, yo Yesuye o hamamee dili odo mapoo dilesa peledaba biame mapoo yo omapoo badele.

25 Esememe Yesu o hamamee dili odo oso yimapoo egeesee takaso,

20:14: Luka 24:16; Yon 21:4 20:17: Loum 8:29; Hib 2:11-12 20:20: Yon 16:22; 1Yon 1:1 20:23:

Mat 16:19 \* 20:24: *Didimas* hu eyo bei ee biame hedebe mapoo bakadio soomagoo dolone ka takooso.

“Iba Lodee olo egeiso,” dee takaga meleeso. Esino Tomaseeye dimapoo egeesee takaso, “A niyo egee takoo duloso epedee tei talaime. Esino a mawo o dee boowo ogoloso mo dee woluguso omapoo sigo, osoloso o ho hodio mapoo moloso gu eyo boowo ee ogo doloso mo deeso omapoo sigoga, a tei ka talai,” dee takaso.

<sup>26</sup> Osoloso sadee hedebe poogoloso hamamee, Yesu o hamamee dili odoososo moso hedebe mapoo mooloogoo doloso debeiso. Biame omapoo Tomas yinosee dibolo hodobo omapoo badebeiso. Esino diba osulu susuga kisigaloso doboome, Yesuye diayo debei domo mapoo peledoboloso tobudulone egeesee takaso, “Mesie goo oso nibolo osee mele dee,” diso.

<sup>27</sup> Osoloso tobudulone Tomas mapoo egeesee takaso, “Nee dee wolugu oso mo dee boowo hamapoo sigolo ege. Osoloso mo ho hodio mapoo moloso gu eyo boowo mapoo nee deeso sige. No goo haga na egege, esino amapoo tei te,” dee takaso.

<sup>28</sup> Esem Tomaseeye nei yimapoo egeesee takaso, “Mo Lodee osoloso mo Godee,” diso.

<sup>29</sup> Esem Yesuye yimapoo egeesee takaso, “Nayo a egeiga, amapoo tei ka toso. Esino edebeeyo a egelega poogoloso wulo amapoo tei toga, Godeeye nei dimapoo diya goomagalaiso,” dee takaso.

### *Yoneeye to booka hamapoo hogugu goo eyo bei*

<sup>30</sup> Esiga Yesuye o hamamee dili odoososo dia howo woola goo toowa opusomo di abo hee moodoogamo siliso. Esino goo egee hagee ma kulodu hogugule.

<sup>31</sup> Esino to hagee hoguguso, niyo Yesu yo tei Kelisodoo doloso goo omapoo tei talame. Osoloso niyo yo tei Godeeyo Owolodoo doloso goo

omapoo tei talame. Osoloso yimapoo tei too goo maga gie badeli ka talame.

## 21

### *Yesuye Gelili abei mapoo o hamamee dili odoososo mapoo peledaba*

<sup>1</sup> Osoloso see hamamee Yesu o hamamee dili odoososo oso Gelili abei\* palaga mapoo doboome, yayo omapoo peledabaso. Goo hagoso egeesee peledabaso.

<sup>2</sup> Biame omapoo Yesu o hamamee dili odoososo hagee biaso hodobo debeiso. Saimon-Pita, osoloso Tomas (o hu hee Didimas), osoloso Gelili mi toowa ee ma kulodu mi pepooko Kana mapoo badeli odoososo hee Nataniyol, osoloso Sebediyo owolo bakadio, osoloso Yesu o hamamee dili odoososo bakadio omapoo debeiso.

<sup>3</sup> Esem Saimon-Pitaye o odoososo mapoo egeesee takaso, “A pei olugulei dia,” diso. Esem odoososo aboso egeesee takaso, “Iba nobolo hodobo siba,” dee takaso. Esem diba du mapoo hodobo tebisaso. Esino diba gesi di kobumo sileeno, di hedebe gile.

<sup>4</sup> Egeeseelone gesikolodee Yesuye abei palaga mapoo tobudume egeiso. Esino Yesu o hamamee dili odoososo du ma kulodu tebisamolone Yesu ogoloso, diayo goolee yo odoososo hee gooleeso.

<sup>5</sup> Esem Yesuye abei palaga maga tobudulone dimapoo egeesee idagaso, “Emegei, niba di giligasomo?” diso. Esem diayo nei egeesee takaso, “Haye, iba di hedebe gile,” dee takaso.

<sup>6</sup> Esem Yesuye dimapoo egeesee takaso, “Nibada pei tolososo see deede dokolo mapoo olugi, egeeseega niba di giligileiso,” diso. Esem diba Yesuwo to duloso goo egeesi moodooso. Esem di bei dia pei ma kulodu galagadiso. Esem diayo dia pei pouduloso du ma kulodu magalai tebile poogooso.

**20:29:** 1Pita 1:8    **20:31:** Yon 3:15; Loum 1:17; 1Yon 5:13  
**21:3:** Luka 5:4-7    **21:7:** Yon 13:23; Mat 14:29

\* **21:1:** *Gelili abei* eyo hu hee ee

<sup>7</sup> Esemé Yesu o hamamee dili odoo hee yayo diya gweli oso Pita mapoo egeesee takaso, “Egee yo Lodeedoo,” diso. Pitaye to egeesee taka duloso o dugo tigamagoo see kaloso Yesu mapoo tabuo dilame howomoo bologobuguso.

<sup>8</sup> Esino Yesu o hamamee dili odoo aboso du sumo dulone, dia pei ee di sabolo howo kulomooga abei pee mapoo gisibamo diso. Bei, diayo pei olugu omaga widi pee ee haga hoogoonee, wulo 100 mita egeesi.

<sup>9</sup> Osoloso diba sibilesa dia du gimagoloso mubi mapoo daboogoloso egeino, dou hoo mapoo di sabolo wo sabolo si molome egeiso.

<sup>10</sup> Esemé Yesuye dimapoo egeesee takaso, “Di niyo epedee giliga egee abo hamapoo tosibe,” dee takaso.

<sup>11</sup> Esemé Saimon-Pitaye du ma kulodu daboogoloso pei di sabolo widi pee mapoo gisibamo dileso booboosee mapoo gisibu magooso. Pei ee ma kulodu di toowa bei, 153 egeesi molome egeiso. Esino pei ma kulodu di bei galaga dino dia pei tologu bigile.

<sup>12</sup> Esemé Yesuye dimapoo egeesee takaso, “Niba nei nalame sibadee,” diso. Esino Yesu o hamamee dili odoo dima kulodu odoo heeso Yesu mapoo takolone, “no odoo ogumo?” dee takele. Bei, diba olo gooleedoo, yo tei Lodee.

<sup>13</sup> Esemé Yesuye di sabolo wo sabolo tolosa dimapoo teneeso.

<sup>14</sup> Esiga Yesu ta maga hogaduloso hamamee, o hamamee dili odoo mapoo peledaba hagosu bakadio hedebe diso.

#### *Yesu dio Pita dio*

<sup>15</sup> Osoloso diba nei naloso koodobuloso, Yesuye Saimon-Pita mapoo egeesee takaso, “Saimon, Yoneeyo owolo, nayo a gweli oso odoo hagee biaso a gweli ee dagadusomo?” dee takaso.

Esemé Pitaye nei egeesee takaso, “O, Lodee. Ayo no diya goolee sabolo

hagee bado goo ee, no gooleedoo,” diso.

Esemé Yesuye nei yimapoo egeesee takaso, “Mo sipi be ee nayo medee poopomelee,” dee takaso.

<sup>16</sup> Osoloso Yesuye see tobu egeesee takaso, “Saimon, Yoneeyo owolo, nayo a diya goolee sabolo bado-somo?” diso.

Esemé yayo nei Yesu mapoo egeesee takaso, “O, Lodee. Ayo no diya goolee sabolo hagee bado goo ee, no olo gooleedoo,” dee takaso.

Esemé Yesuye yimapoo egeesee takaso, “Mo sipi be nayo medee bamelee,” diso.

<sup>17</sup> Osoloso see bakadio hedebe di mapoo Saimon-Pita mapoo egeesee takaso, “Saimon, Yoneeyo owolo, nayo a diya goolee sabolo bado-somo?” dee takaso.

Esemé Pita to hedebe hagonosee Yesuye bakadio hedebe di taka ee duloso diya gooheselo. Esiga yayo nei egeesee takaso, “Lodee, goo susuga no gooleedooso. Osoloso ayo no diya goolee sabolo hagee bado goo ee, no olo gooleedooso,” diso.

Esemé Yesuye yimapoo egeesee takaso, “Mo sipi be nayo medee poopomelee.

<sup>18</sup> Esiga ayo namapoo tei taka. No gie kauwa mapoo bi medee mopoodoo doloso no goomoga mi mapoo diliso. Esino no adaga poloso badoga, odoo heeso nee dee mapoo tiso bagagoloso, no mi nayo goweli mapoo gisibado dileiso.”

<sup>19</sup> Yesuye Pita mapoo taka hagee, Pitaye dooboo kasee talai goo ee taka. Esiga Pitaye ta maga Godeeyo hu dokodoo poudileiso. Osoloso Yesuye yimapoo mapoo egeesee takaso, “No a deede,” diso.

<sup>20</sup> Esemé Pitaye bidi toboloso egeino, o hamamee dili odoo Yesuye diya gweli oso dima miligiyoopoga sibume egeiso. Yesuwo hamamee dili odoo hagee biaso daga o hamamee dili odoo sabolo

nei nolone dobolone, Yesu mapoo bouwa melee oso, yimapoo egeesee ka woosa, “Lodee, odo agayo no ha teli odo mapoo ka tiasalaiyo?” dee taka odo ee hagoso.

<sup>21</sup> Esemee odo ogoso dima hamamee simi ee ogoloso, Pitaye Yesu mapoo egeesee takaso, “Lodee, odo hamapoo kasee moodoolai-somo?” dee takaso.

<sup>22</sup> Esemee Yesuye yimapoo egeesee takaso, “Yo osee badoga, ayo see wedi sibilesyo yo agalai, a goomogoga, egeesee selaiso. Esino egee nee goonee. No wulo a deede,” dee takaso.

<sup>23</sup> Esemee Yesu o hamamee dili odo egee talaime, dee taka goo ee tei telaga odo abo mapoo dudobuguso. Esino Yesuye takolone odo egee talaime, dee takele. Yo wulo egeesee taka, “Yo osee badoga, ayo see wedi sibilesyo yo agalai, a goomogoga, egeesee selaiso. Esino egee nee goonee,” dee ka taka.

<sup>24</sup> Esiga Yesu o hamamee dili odo hagoso goo susuga yayo egei ee booka hamapoo hoguguso. Iba gooleedooso, goo susuga yayo hogugu ee tei goo.

<sup>25</sup> Esiga Yesuye goo hagee sabolo osoloso goo abo sabolo olo moodooso. Esino goo susuga egee booka hamapoo hogugule. Esino goo susuga egee booka abo mapoo hogugu diepi, mipoo hamapoo booka bei meliyo. Egeeseelone booka magalai debi me meliyo.



## Diye Di Odoo

*Diye di odoo booka goo eyo bei*

Lukaye daga malalo o booka mapoo to tekepo Yesu Kelisowo goo hoguguloso, see Diye di odoo booka hagee hoguguso.

Odoo Luka yo daga melesenee neli odoo badolone, o odoo Poloye Godeeyo to takomo sileeme, yibolo sileeso.

Booka hagosu Yesuye toloso see hogabuloso kei mi ma dokodoo polome, hamamee sosee bei mooloo-goo goo ee takooso. Diye di odoo booka hageeyo kuloduga taka goo ee dugo 30 egeesi ee ma kulodu sibulone peledoboomo simiso.

Esiga sapta 1 abaga dino sapta 7 omaga takooso, daga malalo Yelusalem mapoo to tekepo Yu odoowe dibusomo toloso debei goo ee. Esino sapta 8 abaga dino sapta 12 omaga takooso, to tekepo Yu odoo abo Yelusalem peegoo debeli odoo mapoo takomo di goo ee. Osoloso see sapta 10 maga takooso, Yu odoonee oso daga malalo to tekepo duloso tei too goo ee. Osoloso hamamee sapta 13 abaga dino hoo poogoo maga takooso, Poloye mi opusomo opusomo di susuga mapoo Yu odoo sabolo, osoloso Yu odoonee sabolo dimapoo to tekepo takomo di goo ee.

Lukaye Diye di odoo booka hageeyo kulodu hogugu goo toowa bakadio hagosu. Malalo goo hagosu. To tekepo hagee mi opusomo opusomo di mapoo debeli odoo susuga dibada. Bei, Godeeyo to tekepo tenee hagee hedebe Yu odoo mapoo tenele. Haye, Yu odoonee diba nose to tekepo dimapoo teneeso.

Osoloso goo hee hagosu. Diye di odoo booka oso daga malalo Dio Tei oso tei telaga odoo mapoo meledaba goo ee eligiso. Osoloso omaga bei mooloogoloso abaga simino epedee

hamapoo Dio Tei oso tei telaga odoo susuga pidilone kitulugu ka ten-emoloso.

*Yesu kei mi ma dokodoo ido pala goo*

<sup>1-2</sup> Tiyo poles emegei,

Ayo daga namapoo booka hoguguloso tenee omapoo, Yesuye goo tomo sili sabolo yayo eligi goo sabolo hoguguso. Osoloso yo kei mi mapoo ido palai goo sabolo hoguguso. Osoloso yo kei mi mapoo ido pelega badolone, Dio Tei oso kitulugu maga diye di odoo yayo gilimadoo odoo dimapoo kokodo takaso.

<sup>3</sup> Osoloso Yesu toloso midoo maga hogabuloso biame 40 eyo kulodu yayo tei hogabia goo ee diayo ogoloso tei talame yayo silone, o hamamee dili odoo mapoo peledoboo demeleeso. Osoloso dibolo silone, Godeeye wiligi doloso badeli goo dimapoo takomo siliso.

<sup>4</sup> Osoloso biame hedebeeso Yesu o hamamee dili odoo gilimadoloso nei nolone badolone, Yesuye to kitulugu sabolo takaso, “Niba Yelusalem poogoloso na di! Esino mo Maye taka Dio Tei oso sibilei omapoo dulone bolone ka debee, bei mo Maye to hagee nimapoo olo takaso.

<sup>5</sup> Esiga Yoneeye niba howodeeso ogusigaso, esino biame koola mapoo Dio Tei oso sibileso nimapoo kitulugu tenelaiso,” diso.

<sup>6</sup> Esem diye di odoo Yesubolo Olipi mubi mapoo mooloogoodoloso dobolone, diayo yimapoo woosaso, “Lodee, nayo epedee hamapoo Isael odoo oso ibada mi gidabalame kitulugu see imapoo tenelaisomo?” diso.

<sup>7</sup> Esem Yesuye dimapoo nei egeese takaso, “Hedebe Maye biame hageesi yayo kitulugu sabolo mageliso. Esiga biame egeesi niyo gooleedalai nibada goonee.

**1:1-2:** Maka 16:19; Luka 1:3; 24:49-51    **1:3:** Luka 24:36-49; Diye 10:41    **1:4:** Luka 24:49; Yon 14:16-17; Diye 2:33    **1:5:** Mat 3:11    **1:6:** Luka 24:21    **1:7:** Maka 13:32    **1:8:** Mat 28:19; Luka 24:48

<sup>8</sup> Esino Dio Tei nimapoo meledo-booga, niba kitulugu talaiso. Osoloso niyo mo goo mi toowa mapoo takomo dileiso, Yelusalem abaga bei mooloogoloso abaga dino, Yudiya mi toowa mapoo, osoloso Samaliya abaga dino mi toowa hoopoo mapoo takomo dileiso.”

<sup>9</sup> Yesuye to hagee takoloso tobudulone, diayo balaga molome, Godeeyo kitulugu oso kei mi mapoo yo ido palaso. Esememe kei ma dokodooga kolobo oso sibilesa Yesu gooloogoo bugume diayo egele poogooso.

<sup>10</sup> Diba Yesuye kei ma dokodoo pala mapoo osee balaga molome, odoos bakadio dugo heliye megiga oso dima koola omapoo saga sibilesa, tebisa meleeso.

<sup>11</sup> Diayo egeese takaso, “Gelili odoos, niba bei kasi maga kei ma dokodoo ka balaga malala? Nibada howo woola Godeeye Yesu kei mapoo ido palaso. Esiga Yesu kei ma dokodoo poolome niso egemenee, yayo hamamee kolobo ma dokodooga, see egeese siboga agalaiso,” diso.

*Diye di odoos hee, Matiyas hesiagoo*

<sup>12</sup> Diye di odoos oso Yesu kei mi ma dokodoo pala ogoloso, Olipi mubi maga Yelusalem mapoo wedi diyadeeso. Yelusalem ee Olipi mubi abaga hoogoonee.

<sup>13</sup> Diba Yelusalem mapoo peledoboloso, diso debeli moso mapoo paladeeso. Odoos abo hagoso moso eyo kulodu debeiso: Pita, Yonee, Yemes, Endulu, Pilipi, Tomas, Batolome, Matiyu, Alpiyeseeyo owolo Yemes, Saimon (daga Loum gamalee maga ha teli odoos), osoloso Yemeeseeyo owolo Yudas.

<sup>14</sup> Diye di odoos, sobo abo sabolo, osoloso Yesuwo owee Meli sabolo, osoloso Yesuwo omolo dio sabolo hagee hodobo mooloogoodoloso biame susuga Godee mapoo takeliso.

<sup>15</sup> Biame hedebe mapoo tei telaga odoos susuga 120 oso hodobo mooloogoodoloso doboome, Pitaye toboloso dimapoo egeese takaso,

<sup>16-20</sup> “Mo odoos, ayo Yudaseeyo goo nimapoo taka. Yo ibada mooloogoodoo ma kulodu Godeeyo tou hodobo tomo siliso. Esino yayo Yesu ha teli odoos mapoo tiasooso.”

(Esememe tei moso wiligi odoos tebisa oso Yudas yimapoo molee teneme, yayo molee oso mi su neiso tooso. Osoloso yo mi omapoo dileso, miyomoo homodobuloso, beliye tologonuloso, kakobo gwadobuloso taso. Esememe Yelusalem mapoo debeli odoos susuga oso goo hagee duloso, mi egee dibada toso hu egeese hediso, “Akeledama.” Hu hageeyo bei, “sawo go.”)

Esememe Pitaye see egeese takaso, “Esiga Godeeyo to booka mapoo hogugu oso tei diso. Bei, Dio Tei oso Deibidi mapoo eligi maga yayo Yudaseeyo goo daga hoogoo Godeeyo to hogugu Sam booka mapoo egeese hoguguso,

‘O mi mapoo odoos mauwe pagalaiso. Odoos heeso omapoo badalaime.’

Osoloso see egeese hoguguso,

‘O tou su see odoos heeso talaiso,’” diso.

<sup>21-22</sup> Pitaye see egeese takaso, “Esiga Yudaseeye tou teli ee see odoos heeso talame odoos hee hesiamo. Yayo ibolo silone Yesuye toloso hogabia goo ee takomo silame. Osoloso odoos yayo biame susuga ibolo hodobo silone, Yonee odoos howo ogusiga molome egei sabolo, osoloso abaga simino Yesuye kei ma dokodoo polome egei odoos ee hesileiso,” diso.

<sup>23</sup> Esememe tei telaga odoos susuga oso Yosep dio Matiyas dio hesiaso. Yosep hagee hu bakadio hedebe di (Balasabas osoloso Yustus).

<sup>24-25</sup> Diayo odoos bakadio hagee hesialoso dobolone Yesu mapoo egeese takaso, “Lodee, no odoos

susuga oso goo goolee no goolee-dooso. Esiga odoo bakadio hamapoo nayo hesia imapoo eligi, yayo Yudaseeyo debi omapoo badolone, diye di odoo eyo tou su ee talame. Bei, Yudas yo tokenee tooga, eyo nei yo dou mi mapoo diso,” diso.

<sup>26</sup> Diayo Yesu mapoo taka koodobuloso, diye di odoo heeso yo bakadio toloso hee mapoo Matiyaseeyo hu magoo, osoloso hee mapoo Yosepeeyo hu magoo doloso toloso halabume, yo hedebe miyomoo homodobiaso, diayo odoo bakadio hesia ma kulodu Godeeye hesia odoo ee talame. Diayo egeesee moodooloso, odoo hedebe Matiyas tooso. Esemme yo diye di tou ee talame diye di odoo 11 sabolo hedebe diso.

## 2

### *Dio Tei oso meledaba*

<sup>1</sup> Pentikos biame omapoo, tei telaga odoo susuga moso hedebe mapoo mooloogoodoloso debeiso.

<sup>2</sup> Esemme haga booloogelega kei ma dokodooga iso goowa masi oso diayo mooloogoodoloso debei moso omapoo tooso.

<sup>3</sup> Esemme dou paiya masi oso odoo susuga moso kulodu mooloogoodoloso debei, dimapoo tugusume egeiso.

<sup>4</sup> Esemme Dio Tei oso dibada kulodu meledoboloso molome, Dio Tei oso kitulugu maga to opusomo opusomo di kesaso.

<sup>5</sup> Biame omapoo Godeeyo goo diya gooleedoo Yu odoo mi susuga maga sibilesa, Yelusalem mapoo debeiso.

<sup>6</sup> Esino diba iso goowa masi goowa ee duloso, goo ee agalame sibadeeso. Diba sibilesa egeino, tei telaga odoo susuga oso to opusomo opusomo di kesamolome duso. Diayo to opusomo opusomo di kesamelee ma kulodu diayo dibada to kei duloso, diya howoogadooso.

<sup>7</sup> Esemme diba howoogadoloso goo tiadoo sabolo dobolone egeesee

takaso, “Odoo to egee kesa, Gelili odoo oso kesa.

<sup>8</sup> Bei kasi maga diayo ibada to kesa iyo ka dusomo?

<sup>9</sup> Bei, iba mi opusomo opusomo di hamaga sibadee odoo: Patiya abaga, osoloso Mediya, Elam, Mesopotamiya, Yudiya, Kapadokiya, Pontus, Asiya,

<sup>10-11</sup> Piligiya, Pampiliya, Isipi, Li-biya mi toowa ma kulodu mi pepooko Kulene abaga sibadee. Osoloso odoo abo Loum mi abaga sibadee. Osoloso Yu odoonee abo Loum mi abaga sibadee oso, Yu odoowo Godee mapoo tei too maga, Yu odoowo hu too odoo oso. Osoloso odoo abo Kiliti sabolo Alabiya mi abaga sibadee odoo oso. Iba mi opusomo opusomo di omaga sibadee oso. Esino diayo ibada to keseme duso. Esiga diayo to hagee boowoo Godeeye goo toowa moodoo maga ka boowoo,” diso.

<sup>12</sup> Diba howooga sabolo, goo tiadoo sabolo, dobolone dieso nediliyo egeesee takaso, “Hagee ogoo goowo?” diso.

<sup>13</sup> Esino odoo abo Yelusalem mapoo sibadee oso tei telaga odoo dimapoo manolone dieso nediliyo egeesee takaso, “Odoo hagee yugune naloso ka halabaga,” diso.

### *Pitaye to taka goo*

<sup>14</sup> Esemme Pitaye goo hagee duloso, diye di odoo sabolo tebisaloso to neligidi takolone, odoo mooloogoodoo mapoo egeesee takaso, “Yu odoo Yelusalem mapoo debeli sabolo, osoloso odoo soo sibadee, niba mo to hagee medee dui!

<sup>15</sup> Odoo abo niyo imapoo takolone, iba yugune naloso ka halabaga, diso. Esino iba egeesee koo seeso. Bei, gesikolo osoko simi domo taba mapoo, edebeeyo yugune naloso koo halabagali.

<sup>16</sup> Esino to niyo du sabolo, osoloso goo niyo egei sabolo egee, Godee maga to toloso kokodo takomo sili

odoo Yoweliye to taka goo sabolo olo teibaso:

17 ‘Godeeye egeesee takaso,

“Biame hamameedee omapoo ayo Dio Tei odoo susuga mapoo tenelaiso.

Osoloso nibada giso holaiso sabolo, sobo holaiso sabolo, oso to Godeeye taka goo ee takalaiso.

Nibada holaiso gie kakauwa oso howo opusomo doloso, Godee maga simi goo ee agalaiso.

Osoloso nibada adaga oso Godee maga simi goo ee sapootileiso.”

18 Osoloso Godeeye see egeesee takaso,

“Biame hamameedee omapoo mo tou teli odoo susuga, giso sabolo, sobo sabolo, dimapoo Dio Tei tenelaiso.

Osoloso diayo Godeeye taka to ee duloso odoo mapoo takalaiso.

19 Osoloso kei ma dokodoo osoloso mi hamapoo goo mudu opusomo di moodolaiso.

Biame omapoo mi toowa hamapoo niyo ha too sabolo, dou sabolo, osoloso dei i toowa sabolo agalaiso.

20 Osoloso kei ma dokodoo osoko neligidi bigileiso.

Osoloso a see sawo masi bigileiso.

Goo egeesi oso peledobooga, Lodeeyo biame goo toowa oso sibilei koola toobooga ka selai.

21 Osoloso edebeeyo Lodeeye pidilame yimapoo woosaga, nei yayo yimapoo gie badeli tenelaiso.”

22 Esiga Isalael odoo, niba to hagee dui! Yesu, Nasalet odoo, Godeeye niba gooleebugulone hesiaso. Osoloso Yesuye nima kulodu goo mudu opusomo opusomo di moodoomo silone, Godeeye yo hesia goo ee woola yilige buguso. Esiga goo oso peledaba niba gooleedooso.

23 Esino Godee eyo goomoga maga daga hoogoo Yesu toloso nimapoo tenelame to takoloso magooso. Egeesi maga yayo Yesu toloso nimapoo teneme, Yu odoo niyo osoloso Godeeye tei magoo mapoo koo mesili odoo sabolo oso yo homo bulubo magoo ma dokodoo yoguso eniga maga yo wooloomaso.

24 Esino Godeeye Yesu dala teli goo maga peegoo tamagalame, Godeeye yo ta maga hogabidiso. Bei, teli oso yo talai tebile.

25 Esiga ibada amawe wiligi odoo taba Deibidiye Yesuwo goo Godeeyo to booka mapoo hogugu maga egeesee takooso,

‘A biame susuga Godeeye mo mudugiyopoo tobudo doloso gooleedeliso.

Yo koola mapoo tobudoso. Esiga a ebileime.

26 Esiga mo sooloo ma kulodu goomoga toowaso molone, goomoga goo hagee ka taka.

A tei toso, mo su see gie badalaiso.

27 Bei, Godee nayo a toga mo gie badeli ee odoo wedia eyo dio oso debeli mi mapoo a pagalaime.

Nayo hesia odoo eyo su midoo ma kulodu hunulame pagalaime.

28 Osoloso gie badeli eli nayo amapoo eligiso.

Esiga ayo nobolo badolone, diya goomogalaiso,’ diso.

29 Emegei, Deibidiye goo taka hagee, yayo o goo eyo nediliyo takele. Bei, yo teme midoosooso. Osoloso midoo ibolo moloso.

30 Esiga Godee maga to toloso kokodo takomo sili odoo daga malalo badebeiso. Esiga Godeeye to takoloso magoo ee gooleemeleeso. Bei, Godeeye yimapoo to magolone egeesee takaso, ‘Deibidiyo amawe heeso Deibidiye wiligi doloso badeli



mi omapoo, see yayo wiligi doloso badalaiso,' diso.

<sup>31</sup> Esiga Deibidiye malalo hoogoo peledabalai goo ee ogoloso, Godeeye hesia Kelisoye midoo maga hogabilei maga egeesee takaso, 'Godeeye yo midoo mapoo pagalaime, osoloso o su hunuleime,' diso.

<sup>32</sup> Esiga Godeeye Yesu ta maga see gie badeli mapoo hogabidiso. Goo ee iyo susuga ogoloso ka takomo siloso.

<sup>33</sup> Osoloso Godeeye Yesu kei ma dokodoo ido peleso, o dee deede dokolo badoso, yayo yimapoo hu toowa tenelame. Osoloso yayo to magoo ee dodolone, o Dio Tei Yesu mapoo teneme, see Yesuye imapoo teneeso. Goo hagee niyo epedee hamapoo ogolone dulone ka badoso.

<sup>34</sup> Esiga Deibidi yo kei ma dokodoo pele. Haye! Yayo taka egee Yesuwo goo ee taka,

'Godeeye mo Lodee mapoo takaso:

No abolo wiligi doloso badalame mo dee deede dokolo bie.

<sup>35</sup> Esiga nayo badolone namapoo ha teli odoo ee ayo dagadileiso.'

<sup>36</sup> Esiga Isalael odoo, niba goo hagee medee goolee! Niyo Yesu homo bulubo magoo ma dokodoo yoguso eniga ee, Godeeye yo Lodee wiligi toowa taba doloso hudi magoo Keliso," diso.

<sup>37</sup> Esem e odoo mooloogoodoo oso to hagee duloso, dieso nediliyo dibada goo tokenee gooleedoloso, sooloo dala sabolo, ebia sabolo, Pita diye di odoo abo sabolo mapoo egeesee takaso, "Emegei, iyo ogoo goo moodolaiyo?" diso.

<sup>38</sup> Esem e Pitaye dimapoo nei egeesee takaso, "Niba susuga nibada goo tokenee maga miligi pialoso, Yesu Kelisowo hu maga howo ogusige. Egeeseega nibada goo tokenee hapoloso boobado bigileiso. Egeeseega niba Godeeye Dio Tei wulayo egee tenemolo niyo talaiso.

<sup>39</sup> Bei, Godeeye to magoo ee dodolone, yayo Dio Tei nimapoo, osoloso nowolo dimapoo, osoloso eli sage debeli odoo dimapoo tenelaiso. Osoloso odoo susuga Godeeye gilimadalai goo ee dimapoo tenelaiso."

<sup>40</sup> Esem e Pitaye to sage takolone kokodo takaso, "Goo tokenee teli odoo epedee hamapoo egee do dala talaiso. Esiga niba dala teyaga, goo tokenee ee pagalame Godeeye pidilame yimapoo takee."

<sup>41</sup> Esem e odoo Pitayo to duloso, tei too odoo diba howo ogusigaso. Esiga biame omapoo 3,000 odoo oso howo ogusigaloso, tei telaga odoo sabolo hedebe doloso mooloogoodooso.

<sup>42</sup> Osoloso diba howo ogusigaloso, biame susuga eyo kulodu diesono mooloogoodoloso, diye di odoo oso eligime, medee duluga meleeso. Osoloso diba Lodee gooleebugu wo nalagamo silesibulone, biame susuga Godee mapoo takeliso.

### *Tei telaga odoo oso mooloogoodoloso debei goo*

<sup>43</sup> Diye di odoo diayo Godeeyo kitulugu sabolo goo mudu opusomo opusomo di moodoogamo silesibume, odoo susuga oso ogoloso diya ebia sabolo howoogadooso.

<sup>44</sup> Osoloso tei telaga odoo susuga oso biame susuga hodobo mooloogoodoloso, bi nei pidi, nei pidi deliso.

<sup>45</sup> Egeeseemo silesibulone, dibada mi sabolo, bi sabolo, odoo mapoo teneloso, nei molee tooso. Osoloso molee oso tei telaga odoo abo bi mauwe odoo ee pidigamo siliso.

<sup>46-47</sup> Osoloso biame susuga diayo howo gisilame, Yu odoowo tei moso beele ma kulodu hodobo mooloogoo deliso. Osoloso diayo Yesu gooleebugu wo nolone, diba moso opusomo opusomo di mapoo nalagaliso. Osoloso diayo silesibulone, dibada sooloo ma kulodu goo goolee hedebe doloso, goomoga goo Godee mapoo poudiliso. Esem e Yelusalem

odoo susuga oso dibada goo ogoloso tekepo deliso. Osoloso Lodeeye biame susuga odoo abo mapoo gie badeli teneliso. Egeeseelone tei telaga odoo bei deliso.

### 3

#### *Pitaye odoo kido todobia tekepo moodoo goo*

<sup>1</sup> Biame heeso habe Yu odooso Godee mapoo takeli osoko howo teme, Pita dio Yonee dio Yu odoowo tei moso mapoo palaso.

<sup>2</sup> Diba omapoo peleso egeino, odoo kido todobia osulu mi eyo hu Osulu Medee Tekepo deli omapoo badoboome egeiso. Odoos hagee soomagolone kido todobia sabolo soomagooso. Esiga biame susuga o odoo abo oso yo sa mapoo magoloso imado peleso, osulu mi hamapoo ka ibedi deliso. Osoloso yo omapoo badolone, odoo tei moso mapoo pala ogoga, yayo dimapoo molee howaliso.

<sup>3</sup> Yo omapoo howolone badolone egeino, Pita dio Yonee dio moso kulodu gadime, dimapoo molee howaso.

<sup>4</sup> Esem Pitaye dio Yonee dio yimapoo bolone, Pitaye yimapoo egeese takaso, "Imapoo ege!" diso.

<sup>5</sup> Esem yayo goolee, yimapoo molee tenelame kasabele dolone dimapoo egeiso.

<sup>6</sup> Esem Pitaye yimapoo egeese takaso, "Amapoo molee tei mauwe. Esino goo hagee amapoo egee molo wulo namapoo tenelaiso. Esiga ayo Yesu Keliso Nasalet odoowo hu maga namapoo ka taka, no toboloso di," diso.

<sup>7</sup> Yayo egeese takoloso, odoo kido todobia o dee deede mapoo toloso tebidime, o kido see tekepo paso.

<sup>8</sup> Yo o kido tekepo poloso silone, Pita dibolo tei moso ma kulodu galaga diso. Yo tei moso ma kulodu gadilesos

pupulodomo silone, Godee mapoo goomoga poudooso.

<sup>9-10</sup> Odoos susuga oso odoo kido todobia yayo Godee mapoo goomoga poudoomo sili ogoloso howoogadooso. Osoloso dieso nediliyo egeese takaga meleeso, "Odoos hagee kido todobia Osulu Medee Tekepo deli eyo osulu miyopoo badolone molee howali hagoso. Esino yo kasee toboloso silone, goo hageesi ka tomo silosomo?" diso.

#### *Pitaye Yu odoowo tei moso mapoo to taka*

<sup>11</sup> Odoos daga kido todobia oso Pita dio Yonee dio dee mapoo toloso, Solomonowo hau\* mapoo silesibi ogoloso, odoo susuga oso howoogadoloso, diayo debei omapoo hoguga sibadeeso.

<sup>12</sup> Esem Pitaye odoo susuga ogoloso, dimapoo egeese takaso, "Isalael odoo, niba bei kasi maga ka howoogowala? Osoloso bei kasi maga niyo imapoo bologolone, goo diya ka tiadowala? Bei, odoo hagee ibada kitulugu sabolo osoloso iyo tekepo doloso debei maga tekepo poloso koo siloso.

<sup>13</sup> Esino Eibalaham, Aisek, Yekob, osoloso ibada amawe dibada Godeeye o tou teli odoo Yesu mapoo kitulugu toowa olo teneloso, o hu dokodoo poudooso. Esino diayo yo wooloomalame, niyo yo Yu odoowo wiligi odoo tebisa mapoo teneeso. Osoloso yo goo midilame Paillet mapoo ido dime, Pailleteeye egeese takaso, 'Ayo yimapoo goo tokenee koo ogo,' dee takeme, niyo yo goweso.

<sup>14</sup> Esino Yesu tekepo, tokenee mauwe odoo oso. Esino niyo yo gowoolone, Balabas odoo wooloomali odoo ee Pailleteeye neliga moso ma kuloduga peegoo di diso.

**3:4:** Diye 14:9    **3:6:** Diye 4:10; 16:18    \* **3:11:** *Solomonowo hau* - Solomonowo yo daga hoogoo Yu odoowo wiligi odoo taba Deibidiyo owolo oso. Yelusalem mi mapoo Yu odoowo tei moso tegei mapoo hau meleeso, hau eyo hu Solomonowo hau.    **3:13:** Exo 3:6, 15; Luka 23:13-25; Diye 2:23

<sup>15</sup> Esino niyo Yesu gie badeli teneli wooloomaso. Esino Godeeye yo ta maga see hogadiso. Esiga yo ta maga see hogabuloso silime, iyo egei goo ee ka takomo siloso.

<sup>16</sup> Esiga odoo kido todobia oso Yesu mapoo tei too maga yo tekepo paso. Esiga niba odoo hagee gooleedooso, yo daga kido todobuloso badebeiso. Esino yayo Yesuwo kitulugu mapoo tei too maga odoo susuga oso balaga molome, yo tekepo paso.”

<sup>17</sup> Osoloso Pitaye odoo mooloo-goodoo mapoo see egeesee takaso, “Emegei, a gooleedooso, nibada wiligi odoo tebisa sabolo oso Yesu boobadolone, yimapoo goo moodoo eyo bei niba gooleedele.

<sup>18</sup> Esino daga hoogoo Godeeye o odoo yimaga to toloso kokodo takomo silesibili odoo dimaga Kelisoye dala talai goo ee malalo olo takaso. Esiga goo hagee peledabalame Godeeye moodooso.

<sup>19</sup> Esiga nibada goo su wuduloso, goo tokenee maga miligi pialoso, Godee mapoo bidiga debee. Egeeseega Godeeye nibada tokenee hapoloso boobado bigileiso. Nibada goo su wuduloso, goo tokenee maga miligi pialoso, Godee mapoo bidiga dobooga, Godeeye nimapoo kitulugu dia tenelaiso.

<sup>20</sup> Osoloso owolo Yesu, Godee yayo hesia Keliso nimapoo di dalaiso.

<sup>21</sup> Esiga epedee biame hamapoo Yesu kei ma dokodoo badoso. Yo kei ma dokodoo badolone Godeeye goo susuga dia daga, omapoo sibileiso. Esiga Godeeye o odoo yimaga to toloso kokodo takomo silesibili hesia odoo daga hoogoo debei dimaga goo hagee olo takaso.

<sup>22</sup> Esiga Godee maga to toloso kokodo takomo sili odoo hee Moseseeye Godeeyo to booka mapoo egeesee takaso,

‘Godeeye niba gooleebugulone, nima kuloduga o odoo yimaga to toloso kokodo takomo sili

odoo hee a egeesi masi hesileiso.

Esiga goo susuga yayo taka mapoo medee dui.

<sup>23</sup> Osoloso edebeeyo o to duloso, tei telega poogooga, odoo ee Godeeyo mooloo-goodoo ma kuloduga peegoo peledoboloso, talaiso,’ diso.

<sup>24</sup> Godee maga to toloso kokodo takomo sili odoo hee Semuweleeyo hamamee tebisa sabolo oso epedee biame hamapoo peledabalai goo ee takaso.

<sup>25</sup> Esiga Godeeye nibada amawe sabolo, osoloso o odoo yimaga to toloso kokodo takomo silesibili odoo daga hoogoo debei sabolo, oso to magoo ee nibada. Bei, yayo Eibalaham mapoo egeesee takaso, ‘Namawe hee maga ayo odoo susuga mi toowa mapoo hagee do ee pidileiso,’ diso.

<sup>26</sup> Esiga Godeeye hesia tou teli odoo Yesu ee nimapoo di diso, niyo malalo to tekepo dulame. Esiga yayo niba pidi maga nibada goo goolee mudu opusomo doloso, nibada tokenee maga miligi pilame,” diso.

## 4

### *Pita dio Yonee dio goo midilame ido pala*

<sup>1-4</sup> Pita dio Yonee dio odoo mooloo-goodoo mapoo to takolone Yesuye ta maga hogabia eyo goo takaga meleeso. Esiga diayo egeesee takaso, “Yesu ta maga hogabia maga niba ta maga see hogabileiso,” diso. Esememapoo Pitaye to taka duloso tei telaga odoo sabolo, osoloso daga tei telaga odoo sabolo, hodobo mooloo-goodeme 5,000 tugodooso. Esemetei moso wiligi odoo tebisa sabolo, tei moso gidebeli odoo dia wiligi odoo taba sabolo, Sedisi odoo sabolo sibileso, Pitaye Godeeyo to takolone, ta maga see hogabilei goo maga taka duloso, diya kamaso. Osoloso diayo Pita dio Yonee dio tooso. Osoloso olo neligime diba epedee neliga

moso tegei ma kulodu toosooso, osoloso see gesikolo Yu odoowo wiligi odoo tebisa mapoo ka ido dilame.

<sup>5</sup> Osoloso gesikolo Yu odoowo tei moso wiligi odoo tebisa sabolo, osoloso Yu odoowo wiligi tebisa adaga susuga sabolo, osoloso Godeeye tei magoo ee eligili odoo susuga sabolo, Yelusalem mapoo mooloogoodooso.

<sup>6</sup> Dibada mooloogoodoo ma kulodu tei moso wiligi odoo taba Anas sabolo, o soosoo Kayapas sabolo, Yonee sabolo, Alesanda sabolo, osoloso o soosoo abo sabolo mooloogoodooso.

<sup>7</sup> Esiga wiligi odoo tebisa susuga oso omapoo mooloogoodoloso dobolone, diayo odoo abo oso Pita dio Yonee dio ido sibe, diso. Esem Pita dio Yonee dio omapoo doboome, wiligi odoo tebisa oso dimapoo egeesee woosaso, “Niyo odoo kido todobia tekepo kasee moodoowo? Niba agamo kitulugu osoloso agamo hu maga yo tekepo ka payo?” diso.

<sup>8</sup> Pita Dio Tei oso kitulugu toloso badolone Dio Tei maga dimapoo to nei egeesee takaso, “Wiligi odoo tebisa sabolo, Yu odoowo wiligi tebisa adaga sabolo, niba mo to dui.

<sup>9</sup> Niba iyo odoo kido todobia yo pidilone tekepo moodoome niyo ogoloso, ibada goo midilame ka ido diala? Niba yo tekepo pa eyo bei gooleedalai goomogosomo?

<sup>10</sup> Esino nibolo Yu odoo susuga sabolo goo hagee gooleedalai tekepo. Bei, Yesu Keliso, Nasalet odoo, niyo woolooma Godeeye ta maga hogadi eyo kitulugu maga, iyo epedee niyo egee ogo odoo hagee olo tekepo paso.

<sup>11</sup> Esiga Yesuwo goo maga Godeeyo to booka mapoo hogugu oso egeesee takooso,

‘Moso tegeli odoo diayo omou gowoolone togobugu oso epedee hamapoo moso omu domo pupodoo ka moloso.’

<sup>12</sup> Esiga Yesu mapoo gie badeli teneli ka moloso. Esiga mi toowa

hamapoo odoo hee mauwe edebeeyo badoboso gie badeli talai, hedebe Yesu yimapoo moloso.”

<sup>13</sup> Esem Yu wiligi odoo tebisa oso Pita dio Yonee dio dimapoo ebilega, diayo dimapoo to nei tekepo taka dulo, diba diya howoogadooso. Pita dio Yonee dio sukulu tele osoloso wulo mosoowe odoo. Esem wiligi odoo tebisa oso egeesee gooleedooso, odoo bakadio hagee Yesubolo sili-doo, diso.

<sup>14</sup> Osoloso diayo Pita dio Yonee dio odoo kido todobia tekepo moodooloso, Pita dibolo tebisa melee ogoloso, wiligi odoo tebisa oso to nei takele poogooso.

<sup>15</sup> Diayo to nei takalai mauwe poogome, Pita dio Yonee dio moso kuloduga peegoo galaga diye doloso, balaga melee diso. Osoloso wiligi odoo tebisa diesono to mouso.

<sup>16</sup> Esem diesono to moulone egeesee takaso, “Iyo dimapoo ogo goo moodoolaisomo? Bei, Yelusalem odoo susuga oso diayo mudu opusomo di goo toowa moodoo egee egeiso. Esiga iyo goo hamapoo gamenee takalai tekeponee.

<sup>17</sup> Esiga goo hageesi oso toowa diyaga, odoo bakadio hagee toloso, see Yesuwo hu maga odoo susuga mapoo na eligimo silesibe, kitulugu sabolo egeesee takalaiso,” diso.

<sup>18</sup> Esiga wiligi odoo tebisa oso Pita dio Yonee dio gilimadoloso dimapoo egeesee takaso, “Niyo silesibulone, Yesuwo hu maga goo abo na eligi,” diso.

<sup>19</sup> Esem Pita diayo dimapoo to nei egeesee takaso, “Esiga niba niso nediliyo goo hagee medee goolee. Godeeyo howo woola abaga, nibada to mapoo iyo mesilone, nei iyo Godeeyo to mapoo mesilega pagalai tekepodo?

<sup>20</sup> Bei, iyo Yesuye goo tomo silime egei goo sabolo osoloso Yesuye takeme du goo ee takalai pagalaime,” diso.



21 Esemе wiligi odoo tebisa oso dimapoo to kitulugu sabolo takolone, “Yesuwo hu maga niyo see eligimo silesiboga, iyo nimapoo dala tenelaiso,” dee takoloso, goo midili moso maga peegoo diye diso. Bei, odoo susuga oso odoo kido todobia tekepo pa maga Godee mapoo diya goomogome. Esemе wiligi odoo tebisa oso Pita dimapoo dala tenelai biame egele poogooso.

22 Esiga odoo kido todobuloso badebei dugo 40 poogooso.

*Tei telaga odoo oso  
Godee mapoo takeli goo*

23 Pita dio Yonee dio goo midili moso maga peegoo galaga dileso, tei telaga odoo sabolo mooloogoodoloso tei moso wiligi odoo tebisa sabolo, osoloso Yu odoowo wiligi odoo tebisa diayo taka goo ee dimapoo takaso.

24 Esemе tei telaga odoo oso to hagee duloso, diesono mooloogoodoloso Godee mapoo takolone egeese takaso, “Kitulugu Godee, nayo mi sabolo, kei sabolo, osoloso abei sabolo, osoloso bi susuga ee ma kulodu egee molo moodooso.

25 Esiga nayo Dio Tei maga nee tou teli odoo ibada amawe Deibidiye egeese takaso,

‘Bei kasi maga Yu odoonee oso diya ka kamanaliyo?

Osoloso goo bei mauwe maga to wulo ka moumo siliyo?

26 Mi toowa eyo wiligi odoo tebisa oso diesono hodobo mooloogoodoloso kitulugu Godee sabolo, osoloso yayo hesia Keliso sabolo, mapoo ha talame mopoodoo doloso doso,’ diso.

27 Deibidiye tei goo takaso, bei Yu odoowo wiligi odoo taba Helodee sabolo, Loum gamalee odoo Pontiyus-Paillet sabolo, osoloso Isalael odoo sabolo, Yu odoonee sabolo, diesono Yelusalem omapoo mooloogoodoloso Yesu nayo hesia

tou teli odoo Keliso wooloomalame to mouso.

28 Esino diayo goo moodoo hagee, daga hoogoo nayo gooleedoloso, goo hagoso peledabalame, nayo kitulugu sabolo goomoga magooso.

29 Esiga kitulugu Godee, wiligi odoo tebisa hagoso epedee nee tou teli odoo imapoo ebili to taka ee nayo duso. Esiga imapoo kitulugu tenee, iyo nee to takomo silesibulone, ebia goo mauwe pagalame.

30 Esiga nayo kitulugu eligilone, odoo paigiga tekepo pe. Osoloso nee tou teli odoo nayo hesia Yesuwo hu maga goo toowa mudu opusomo di moodee,” diso.

31 Esino diayo Godee mapoo taka koodobuloso, diayo debei moso ee halabume egeiso. Esemе Dio Tei oso dimapoo meledoboloso, diba Dio Tei oso kitulugu toloso dobolone, ebia goo mauwe poogoloso, Godeeyo to takomo silesibilame bei mooloogoooso.

*Tei telaga odoo oso debei goo*

32 Esiga tei telaga odoo mooloogoodoo oso dibada sooloo ma kulodu goo goolee hedebe doloso dobolone, odoo heeso bi koo goodegeli, diba diso biso nei pidi, nei pidi deliso.

33 Egeeseelone diye di odoo oso kitulugu toowa sabolo silesibulone, Yesuye toloso hogabia eyo goo takomo silesibiliso. Osoloso Godeeye tei telaga odoo susuga dimapoo goo tekepo moodeliso.

34-35 Esiga tei telaga odoo oso dibada mi sabolo moso sabolo odoo mapoo teneloso, nei molee toloso diye di odoo mapoo teneliso. Egeeseega diye di odoo oso molee egee papisaloso, tei telaga odoo abo bi tebile poogoo mapoo teneliso. Osoloso dibada kulodu odoo heeso bi mauwe koo sili.

36-37 Osoloso tei too odoo hee Yosepeeye o mi odoo abo mapoo teneloso nei molee tooso. Osoloso yayo sibilesos, molee ee diye di odoo

dimapoo teneeso. (Yosep hagee Saiples mi te omapoo badeli, yo o bala Libai. Esino diye di odoo oso yimapoo hu hee teneeso, Banabas, hu eyo bei emegei pidili odoo.)

## 5

### *Ananayas dio osobo Sapila dio dibada goo*

<sup>1</sup> Osoloso odoo hee badebeiso, o hu Ananayas, osoloso osobowo hu Sapila, diayo dibada mi su pepooko odoo mapoo teneloso nei molee tooso.

<sup>2</sup> Osoloso mosopoo sibilesi, obakadio to mouloso, molee abo mada magoloso, Ananayaseeye diye di odoo dimapoo molee abo tosibilesi teneeso.

<sup>3</sup> Esem Pitaye Ananayas mapoo egeese takaso, "Bei kasi maga nayo Saitenso gamenee taka to mapoo mesilone, Godeeyo Dio Tei mapoo gamenee takolone, mi molee too abo mada ka magoowo?"

<sup>4</sup> Mi hagee odoo mapoo tenel-ega melee omapoo nee mi diso. Esino nayo odoo mapoo mi teneloso, nei molee too egee neeso. Esiga nee molee oso, no goomoga goo ee talai tekepo. Bei kasi maga, nayo molee abo nee mosopoo mada magoo egee imapoo takele, esino nayo gamenee takolone, ayo molee susuga tosimi hagosu, dee ka takayo? Esino nayo hedebe imapoo game-nee takele, esino nayo Godee mapoo gamenee takaso," diso.

<sup>5-6</sup> Esem Ananayaseeye to hagee duloso, yo toloso homodobiaso. Esem odoo gie kakauwa oso dugoso o su tiadoloso midoosooso. Esem goo hagee takeme duluga, odoo susuga oso diya ebigaso.

<sup>7</sup> Esino Ananayaseeye osobo goo hagee dule. Esino yo osoko howo bakadio hedebe di poogoloso, hamamee Pita diayo debei mapoo simiso.

<sup>8</sup> Esem Pitaye yimapoo egeese takaso, "Amapoo takee, niyo mi su

odoo mapoo teneme molee too ee hagosomo?"

Esem Ananayaseeye osoboye nei egeese takaso, "O, molee iyo too olo ogoso."

<sup>9</sup> Esino Pitaye yimapoo egeese takaso, "Bei kasi maga nee bakadio Godeeyo Dio Tei mapoo gamenee takalame goomoga ka magoowo? No ege, gie kakauwa odoo oso nomo midooso odoo, osulu miyopoo tebisa moloso. Osoloso no toga, diayo no midoosolaiso," diso.

<sup>10</sup> Osoloso yo to kemelee biame omapoo Ananayaseeye osobo toloso, Pitayo homo beiyomoo homodobiaso. Esem odoo gie kakauwa odoo oso sibilesi ogoloso yo ta molome, diayo o su toloso, omowo midoo hodiokooga midoosooso.

<sup>11</sup> Esem tei telaga odoo susuga sabolo, osoloso goo hagee du odoo susuga sabolo oso diya ebigaso.

### *Diye di odoo oso odoo paigiga susuga tekepo moodoo*

<sup>12</sup> Diye di odoo oso goo toowa mudu opusomo opusomo di odoo ma kulodu moodoogamo silesibiliso. Osoloso tei telaga odoo susuga oso tei moso tegei Solomonowo hau mapoo diesono mooloogoodeliso.

<sup>13</sup> Esem tei tele poogoo odoo oso, diye di odoowo goo ee tekepo dee takeliso. Esino diayo dibolo hodobo mooloogoodoloso hedebe dalai diya ebigeliso.

<sup>14</sup> Esino biame susuga ma kulodu, sobo sabolo, giso sabolo, Lodee mapoo tei toloso, tei telaga odoo mooloogoodoo sabolo hedebe deliso.

<sup>15</sup> Diye di odoo oso goo mudu opusomo opusomo di moodoogamo silesimi ogoloso, odoo susuga oso odoo paigiga iyado sibilesi, eli domopoo kida palagaloso, kida mapoo tiedigeliso. Bei, Pitaye osoko pa maga dulone, o dio taba oso gooloo-googa, diba ka wedilame.

<sup>16</sup> Eseme Yelusalem koola omapoo mosobia pepooko oso odoo paigiga sabolo, odoo bo holo paladee oso dala temelee sabolo, iyado sibiladiliso. Egeeseega diye di odoo oso diba tekepo peliso.

*Diye di odoo oso  
Yesuwo goo maga dala too*

<sup>17</sup> Diye di odoo oso goo mudu opusomo opusomo di hagee moodoogamo silesibume, tei moso wiligi odoo taba sabolo, osoloso o emegei Sedisi odoo sabolo, goo hagee ogoloso, diye di odoo dimapoo diya kooloogaso.

<sup>18</sup> Eseme diayo diye di odoo toloso neliga moso tegei ma kulodu toosooso.

<sup>19</sup> Esino gesi mapoo Lodeeyo mo-maiye oso sibiliso neliga moso eyo osulu kisi yamagooso. Eseme diye di odoo neliga moso ma kuloduga peegoo iyado dilesi, dimapoo egeesee takaso,

<sup>20</sup> “Niba tei moso tegei mapoo dilesi odoo mapoo gie badeli goo dia hagee takee,” diso.

<sup>21</sup> Eseme diye di odoo oso o to mapoo mesiloso, gesikolodee osoko gie sibume, tei moso ma kulodu galaga dilesi, Yesuwo goo ee eligilame bei mooloogoso.

Eseme tei moso wiligi odoo taba sabolo, osoloso Sedisi odoo sabolo, oso diye di odoo eyo goo mapoo to meilame, Yu odoowo wiligi odoo tebisa susuga gilimadooso. Osoloso diayo neliga moso gibadeli odoo dimapoo to takaso, diayo diye di odoo susuga iyado sibilame.

<sup>22</sup> Eseme gibadeli odoo oso neliga moso tegei mapoo dilesi egeino, diye di odoo me molo egeiso. Eseme diba see wedi dilesi, wiligi odoo tebisa mapoo egeesee takaso,

<sup>23</sup> “Iyo dilesi neliga moso mapoo egeino, osulu diya kisina, osoloso gibadeli odoo oso pee maga gidoboom egeiso. Eseme iyo osulu yamagoloso, moso kulodu galaga dilesi

egeino, diye di odoo mauwena,” diso.

<sup>24</sup> Eseme tei moso wiligi odoo tebisa sabolo, osoloso tei moso gidebeli odoo dia wiligi odoo taba oso goo hagee duloso, goo diya gooleeso, ogoo goo oso hamamee ka peledoboombelee doloso.

<sup>25</sup> Eseme odoo heeso dimapoo sibiliso egeesee takaso, “Dui! Niyo odoo neliga moso tegei mapoo tooso ee, see dilesi tei moso mapoo odoo eligi moloso,” diso.

<sup>26</sup> Eseme to ee duloso, tei moso gibadeli dibada wiligi odoo taba oso o odoo sabolo diye di odoo ee see iyadalame, diso. Esino diayo diba iyadoloso wele. Bei, edebeeyo gibadeli odoo mapoo gowoolone, yoso diba piligiyaga.

<sup>27</sup> Esino diayo diye di odoo wiligi odoo tebisa dibada mudugiyopoo iyado simiso. Eseme tei moso wiligi odoo taba oso dimapoo egeesee takaso,

<sup>28</sup> “Iyo to kitulugu sabolo nimapoo egeesee takaso, ‘Niyo Yesuwo goo eligimo na silesibe,’ diso. Esino niyo ibada to mapoo mesile. Esiga niba ege! Niyo eligi goo oso Yelusalem mi toowa ee tooso. Osoloso Yesuye ta goo ee see niyo imapoo gigidilame ka see,” diso.

<sup>29</sup> Esino Pitaye diye di odoo abo sabolo to nei egeesee takaso, “Iba Godee mapoo mesimo silesibiliso. Esino edebeeyo goomoga goo ee talaima.

<sup>30</sup> O, tei takoo, niyo Yesu homo bulubo magoo mapoo yoguso eniga oso wooloomaso. Esino ibada amaweyo Godeeye Yesu niyo woolooma ta maga see hogadiso.

<sup>31</sup> Osoloso Godeeye Yesu ta maga hogadiloso o dee deede dokolo mapoo ibediso, yayo wiligi doloso badolone gie badeli ee pidili odoo dalame. Esiga epedee hamapoo yimapoo kitulugu moloso, Yu odoo

susuga oso dibada goo goolee opusomo doloso, dibada goo tokenee mapoo miligi piaga, goo tokenee hapoloso boobado bigileiso.

<sup>32</sup> Esiga goo susuga hagee Yesuye moodoomo sili goo sabolo, osoloso yimapoo peledaba goo sabolo, ee iyo ogoloso, see odoo mapoo takomo silesibiliso. Osoloso Dio Tei ima kulodu egee molo oso goo hamapoo tei takoo, deeso. Bei, Godeeyo to mapoo mesimo silesibili odoo mapoo Dio Tei teneliso,” diso.

<sup>33</sup> Esemee Yu odoowo wiligi odoo tebisa oso goo hagee duloso komonolone, diye di odoo piligilame goomogaso.

<sup>34</sup> Esino dima kulodu Pelisi odoo hee, o hu Gamaliyoye tabaso, odoo hagee Godeeye tei magoo ee eligili odoo. Osoloso odoo susuga oso yo tekepo odoo dolone, yo dokodoo maluguso. Esino yayo tobudulone, diye di ee epedee biame deiyepo pee-goo gilimadoo di, diso.

<sup>35</sup> Esemee wiligi odoo tebisa mapoo egeesee takaso, “Isalael odoo, niyo odoo hagee dimapoo goo moodoolame medee gooleemeleso ka moodee.

<sup>36</sup> Bei, niba goolee, daga odoo hee Tudaseeye goo hageesi moodoolone o su toowa diso. Osoloso 400 odoo oso yibolo silesibiliso. Esino edebeeyo yo wooloomome, yibolo silesibili odoo 400 diba kukulo diyadeeso. Egeesi maga goo mauwe poogooso.

<sup>37</sup> Esemee yima hamamee, gamalee odoo oso odoo susugayo hu tomo silesimi biame omapoo odoo hee Yudas Gelili odoo oso peledabaso. Yibolosee o su toowa doloso, odoo gilimado sileeso. Esemee edebeeyo yo wooloomome, yibolo silesibili odoo ee kukulo diyadeeso.

<sup>38</sup> Esiga ayo goo hagee gooleebuguloso, nimapoo ka kokodo taka, odoo hagee dimapoo goo hee na moodee. Bei, diayo goo moodoogamo egee silesibo, odoo maga simi daga, goo hagoso mauwe pagalaiso.

<sup>39</sup> Esino goo egee Godee maga siboga, niyo diba hamaga takooga tebileime. Esino wulo niyo Godee mapoo ha talame ka selai,” diso.

<sup>40</sup> Esemee wiligi odoo tebisa oso Gamaliyowo to mapoo tei takoo diso. Osoloso diayo diye di odoo see iyado sibe diso. Osoloso diye di odoo diba sibilesi doboome, edebeeyo diba woolooge, diso. Osoloso diba wooloogaloso, wiligi odoo tebisa oso diba diye dolone to kitulugu sabolo egeesee takaso, “Niba see Yesuwo goo ee takolone eligimo na silesibe!” diso.

<sup>41</sup> Diye di odoo oso wiligi odoo tebisa diba poogoloso dulone, diya goomogaso. Bei, diayo Yesu mapoo tei too maga dala teme, Godeeye diba dokodoo poudooso.

<sup>42</sup> Osoloso diba biame susuga tei moso tegei ma kulodu, osoloso odoo abo dia moso ma kulodu odoo mapoo to hagee eligimo silesibilone, “Yesu Godeeye hudi magoo Keliso oso,” dee taka koodobile.

## 6

### *Pidili odoo 7 daga hesia goo*

<sup>1</sup> Biame omapoo tei telaga odoo oso bei moodooso. Esino tei telaga odoo susuga ma kulodu, Guliki to kesali odoo oso Hibulu to kesali odoo sabolo toso agadigaso. Bei, diayo mooloogoodoo ma kulodu, Guliki to kesali dibada sobo bau mapoo nei koo teneme.

<sup>2</sup> Esemee diye di odoo oso tei telaga odoo susuga gilimadoloso egeesee takaso, “Iyo Godeeyo to takomo sili poogoloso see sobo bau mapoo nei pilei ee tekeponee.

<sup>3</sup> Esiga emegei, nima kulodu pidili odoo giso 7 hesie. Niyo diba hesi-aga, odoo goo goolee medee tekepo, osoloso Godeeyo Dio Tei oso kitulugu toloso debeli giso ee hesie. Egeeseega diba iyo emegei pidili tou dimapoo tenelaiso.



<sup>4</sup> Esino iba wulo Godeeyo to takomo silesibulone, yimapoo takomo silesibileiso,” diso.

<sup>5</sup> Esiga tei telaga odoo susuga oso to hagee duloso tekepo doloso, odoo 7 hagee hesiaso: Sitiben (odoo hagee tei too kibiloso badolone Dio Tei oso kitulugu toloso badeli), osoloso Pilipi, osoloso Polokolus, osoloso Nikanolo, osoloso Timono, osoloso Palemenas, osoloso Antiyoka odoo, Nikolas. Odoo hagee Yu odoonee, esino yayo Yu odoowo Godee mapoo tei too maga Yu odoo dia hu ka too.

<sup>6</sup> Diba odoo 7 hagee hesialoso diye di odoo mapoo iyado sibadeeso. Esememe diye di odoo oso dimapoo deeso sigolone Godee mapoo takaso, bei diba tou hageesee teli odoo dalame.

<sup>7</sup> Esememe tei telaga odoo oso odoo susuga mapoo Godeeyo to takomo sileeme, tei telaga odoo oso Yelusalem mi ee ma kulodu bei moodooso. Osoloso tei moso wiligi odoo tebisa bei oso Yesu mapoo tei toooso.

#### *Tei moso wiligi odoo tebisa oso Sitiben too*

<sup>8</sup> Godeeye Sitiben tei pidilone kitulugu teneeso, yayo odoo ma kulodu goo toowa mudu opusomo opusomo di moodoolame.

<sup>9</sup> Esino Yu odoo abo Libetini howo gisili moso ma debeli odoo oso yimapoo toso agadigaso.\* Odoo hagee Kulene mi mapoo debeli, osoloso odoo abo Alesandiliya mi mapoo debeli, osoloso Kilikiya mi mapoo debeli, osoloso odoo abo Asiya mi mapoo debeli. Diayo sibilesi Sitiben mapoo toso agadigaso.

<sup>10</sup> Esino diayo toso agadiga ma kulodu, Sitibeneeye Dio Tei oso kitulugu maga to takeme, odoo susuga oso to takalai eli egele poogooso.

<sup>11</sup> Esememe Sitibenbolo toso agadiga melee odoo oso Sitiben maga gameene takalame, odoo abo mapoo mada sibilesi toso pupume, diayo egeesee takaso, “Sitibeneeye Godeeyo hu sabolo, osoloso Moseseeyo hu mapoo duwa takeme duso,” diso.

<sup>12</sup> Esememe odoo susuga sabolo, osoloso Yu odoowo wiligi odoo tebisa sabolo, osoloso Godeeye tei magoo ee eligili odoo sabolo oso to hagee duloso, diya komonolone Sitiben toooso. Osoloso diayo Sitiben toloso wiligi odoo tebisa oso to kesamelee mapoo ido palaso.

<sup>13</sup> Diba omapoo peleso dobolone, Sitibeneeyo goo maga gamenee takeli odoo oso gamenee egeesee takaso, “Odoo hagoso ibada tei moso maga tokenee goo takeliso, osoloso Moseseeye eligi goo hogugu goo maga tokenee goo takeliso.

<sup>14</sup> Osoloso iba yayo egeesee takeme duso, ‘Yesu Nasalet odoo oso ibada tei moso tegei guobuguloso, see Moseseeye tei magoo hogugu ee abo poogoloso, see tei dia abo magalaiso,’” diso.

<sup>15</sup> Esememe wiligi odoo tebisa susuga dobolone Sitiben mapoo bolone egeino, Sitibeneeyo mudu Godeeyo momaiye eyo mudu masi poloso tobudume egeiso.

## 7

### *Sitibeneeye to toowa taka goo*

<sup>1</sup> Esememe tei moso wiligi odoo taba oso Sitiben mapoo egeesee woosaso, “Odoo susuga oso nee goo maga egee takoo teiyo?” diso.

<sup>2</sup> Esememe Sitibeneeye tei moso wiligi odoo tebisa dimapoo to nei takolone egeesee takaso, “Mo ei dio osoloso mo ma dio, niba mo to hagee medee dui. Ibada amawe Eibalaham yo Halan mi mapoo dilega, Mesopotamiya

**6:7:** Diye 2:41; 16:5 \* **6:9:** *Libetini howo gisili moso ma debeli odoo* - Odoo hagee dibada goo egeesi: Daga hoogoo Loum odoo oso gibamelee biame omapoo, diba iyado dilesi neliga moso tegei ma kulodu toooso. Osoloso odoo abo nei mauwe tou talagamo silesibe, diso. Osoloso hamamee Loum odoo oso dibada mi mapoo wedi diyadee, diso. **6:10:** Luka 21:15 **7:2:** Gen 11:31; 12:1

mi mapoo badoboome, ibada Godee kitulugu toowa oso yimapoo peled-abaso.

<sup>3</sup> Esemе Godeeye Eibalaham mapoo egeesee takaso, 'Nee mi sabolo nee odoo sabolo poogoloso ayo namapoo eligilei mi mapoo di,' diso.

<sup>4</sup> Esiga Eibalaham Mesopotamiya mi poogoloso see Halan mi mapoo badalame diso. Esino Eibalaham yo mi omapoo badoboso, ama teme, Godeeye yo see epedee niyo egee do mi hamapoo sibe, diso.

<sup>5</sup> Esemе Godeeye mi hamapoo Eibalaham mapoo mi su pepooko tenele. Esino Godeeye Eibalaham bolo osoloso amawe dibolo oso hamamee mi hagee talai maga to takoloso magooso. Biame omapoo Eibalaham yo holo soomagelega badebeiso.

<sup>6</sup> Osoloso Godeeye yimapoo egeesee takaso, 'Namawe dio oso mi hee mapoo dilesa odoo soo masi dabalaiso. Egeeseega mosobia odoo oso namawe dimapoo tou nei mauwe wulayo talaiso. Osoloso diayo dala ma kulodu dobolone dugo 400 pagalaiso.

<sup>7</sup> Esino namawe dimapoo dala egee tenemolo odoo dimapoo ayo nei dala tenelaiso. Egeeseega namawe diayo mi egee poogoloso see hamapoo sibilesa, amapoo goomoga tenelone mo hu dokodoo poudileiso,' diso.

<sup>8</sup> Osoloso Godeeye Eibalaham dio to takoloso magolone egeesee takaso, 'Ayo nobolo osoloso namawe dio eyo Godee doloso badolone, nima koola hamapoo badalaiso. Osoloso niyo amapoo tei too goo ee eligilone nibolo, osoloso nowolo dibolo, osoloso namawe dio susuga hamamee soolooga magalai sabolo, kolo kookoolone dabalaiso,' diso. Esemе Eibalahameeye giso holo Aisek soomageme, biame 8 poogoloso kolo

kooso. Osoloso hamamee Aiseke-eye giso holo Yekob soomageme, kolo kooso. Osoloso Yekob sabolo owolo giso holo 12 susuga kolo kookooso. Esiga Yekobowo owolo 12 odoo hagoso ibada bala 12 eyo bei ka moloso.

<sup>9</sup> Esino Yekobowo owolo susuga hagoso dibada omolo Yosep mapoo diya kweliso. Egeeseelone dibada omolo Yosep yo Isipi odoo mapoo ido dilesa neiso talame teneeso. Yayo mi omapoo dilesa, nei mauwe tou toowa wulayo tolone badalame. Esino Godee yibolo badolone,

<sup>10</sup> dala goo ma kuloduga yo medee pidiliso. Osoloso Godeeye Yosep mapoo goo goolee tekepo teneeso. Esemе Isipi odoowo wiligi odoo taba oso goo hagee ogoloso, Yosep mapoo diya goomogaso. Esemе Yosep mapoo egeesee takaso, 'Nayo ama hemi tou tolone badolone, Isipi mi toowa nayo gibadalaiso. Osoloso mo moso sabolo nayo gibadalaiso,' diso.

<sup>11</sup> Osoloso hamamee Isipi mi sabolo, ibada amawe diayo debei Keinen mi sabolo, mapoo osoko pa toowa biame oso nei mauwe poogooso. Esemе odoo omapoo debeli oso dala ma kulodu debeiso. Osoloso ibada amawe sabolo nei mauwe debeiso.

<sup>12</sup> Esino Yekobeeye Isipi mi mapoo nei melee goo ee duloso, owolo diayo nei ee neiso talame diye diso. Esemе diayo dilesa nei tolosa sibadeeso.

<sup>13</sup> Nei diayo tosi badee mauwe poo-goome, see Isipi mi mapoo nei abo talame diyadeeso. Diba dilesa nei talame doboome, Yosep yimapoo peled-bada goo ee yayo emei dimapoo woola takaso. Esemе Isipi wiligi odoo taba oso Yosepeeye soosoo eyo goo gooleedooso.

<sup>14</sup> Esemе Yosepeeye ama sabolo, o soosoo sabolo, Isipi mi mapoo sibilesa dabalame to teneeso. Esemе

**7:5:** Gen 12:7; 15:18; 17:8    **7:6:** Gen 15:13-14; Exo 12:40    **7:7:** Exo 3:12    **7:8:** Gen 17:9-14; 21:4

**7:9:** Gen 37:11, 26-28; 39:1-3, 21-23    **7:10:** Gen 41:37-44    **7:11:** Gen 41:54; 42:1-2    **7:13:** Gen

45:1-4, 16    **7:14:** Gen 45:9-11; 46:27    **7:15:** Gen 46:1-7; 49:33

diba Yosepeeye to egeesee taka dulo, diba susuga 75 odoo oso Isipi mi mapoo sibadeeso.

<sup>15</sup> Esem Yekobowo owolo dio Isipi mi mapoo dileso dobolone, yibolo, osoloso owolo dibolo mi omapoo wediaso.

<sup>16</sup> Hamamee diba wedime, dibada su Sekem mi mapoo midoosalame todiyadeeso. Midoo wulu ou hagee daga hoogoo Eibalahameeye Hamolowo owolo mapoo neiso tooso.

<sup>17</sup> Dugo bei poogoloso hamamee ibada amawe dio oso Isipi mi mapoo bei moodooso. Esem biame omapoo Godeeye Keinen mi Eibalaham mapoo, osoloso amawe dimapoo tenelaiso, doloso to takoloso magoo biame oso koola simiso.

<sup>18</sup> Esiga wiligi odoo taba dia, Yosepeeyo goo gooleedele poogoo odoo oso Isipi mi ee gibadebeiso.

<sup>19</sup> Wiligi odoo taba hagoso ibada amawe dio diya gowoolone, dimapoo kukulone dala tenelone badebeiso. Osoloso yayo to kitulugu sabolo pupulone, ibada amawe dia holope gie soolooga magoo susuga ee wedilame, peegoo maloso peegee diso.

<sup>20</sup> Egeeseelone debei biame omapoo, Isalael sobo hedebe oso giso holo mudu medee tekepo soomagooso, o hu Moses. Osoloso a bakadio hedebe di ma kulodu ama dio owee dio oso dibada moso kulodu mada gibadebeiso.

<sup>21</sup> Osoloso a bakadio hedebe di poogoloso holope peegoo magooso. Esem Isipi wiligi odoo taba eyo owolo sobo holo oso holope ogoloso, yayo maduloso, owolo doloso mosopoo madio dileso poopoo.

<sup>22</sup> Esem Moses kauwume, Isipi odoo oso yimapoo sukulu goo goolee tekepo eligiso. Osoloso yayo to taka sabolo, tou too sabolo, kitulugu toowa tomo sileeso.

<sup>23</sup> Osoloso Moses dugo 40 poogoloso badolone, yayo o odoo Isalael odoo ee agalame dilame gooleeso.

<sup>24</sup> Yayo dulone egeino Isipi odoo heeso Isalael odoo hee woomelee ogoloso, yayo nei Isipi odoo hee wooloomaso.

<sup>25</sup> Osoloso Moseseeye egeesee gooleeso, 'Isalael odoo oso goolee, ayo diba dala ma kuloduga peegoo gilimado dilame, Godeeye a dimapoo ka sibeye di doo,' dee gooleeso. Esino Isalael odoo oso goo ee gooleedele.

<sup>26</sup> Biame hee mapoo Moseseeye Isalael odoo bakadio biliga molome egeiso. Esem yayo diba biliga melee hamaga takalame hodu dileso, egeesee takaso, 'Emegei, niba kasi maga ka biliga malala? Niba sooso hedebe,' diso.

<sup>27</sup> Esem odoo hee emegei woomelee oso Moses halaga buguloso egeesee takaso, 'No ibada wiligi tabayo, osoloso goo midili odoowo?'

<sup>28</sup> Nayo eiyo Isipi odoo hee wooloomaso. Esiga nayo a wooloomalame ka sala?' diso.

<sup>29</sup> Esem Moseseeye to ee dulo obulone, Isipi mi maga see Midiyan mi mapoo pulo diso. Osoloso Midiyan mi omapoo odoo soo masi badolone sobo huloso, giso holo bakadio soolooga magooso.

<sup>30-31</sup> Moses Midiyan mi mapoo dileso dugo 40 poogoloso badolone, see Sainai mubi esia kumoo miwe poogoo mi mapoo silone egeino, homo su deiyepo o du douso nadelega dou omapoo paiya molome ogoloso howoodooso. Esino dou paiya oma kulodu Godeeyo mamaiye oso tebidi egeiso. Esem Moses yo dou paiya mapoo agalame hodu dimeleeno, Godeeye yimapoo egeesee takaso,

<sup>32</sup> 'A namawe dio Eibalaham, Aisek, osoloso Yekob dibada Godee oso,' diso. Esem Moses ebia sabolo kikiligolone see tobu egele poogooso.

<sup>33</sup> Esiga kitulugu Godeeye see yimapoo egeese takaso, 'Mi nayo taba egee molo tei mi. Esiga nee homo bi ka egee tiga magee.

<sup>34</sup> Ayo mo odoo susuga oso Isipi mi mapoo dobolone dala egee to-molo, ayo egeiso. Osoloso diayo dala ma kulodu dobolone pupusiga melee ayo duso. Esiga ayo diba Isipi mi maga gilimadoloso peegoo dilame ka simi. Esiga no epedee Isipi mi mapoo see wedi di,' diso.

<sup>35</sup> Esiga Moses hagee daga Isalael odoo oso gowoolone egeese takaso, 'No ibada wiligi tabayo, osoloso goo midili odoowo?' diso. Esino Godeeye Moses hedebe yo hesiaso, yayo Isalael odoowo wiligi odoo toboloso badolone, diba dala ma kuloduga gilimadoloso peegoo dilame. Esiga homo deiyepo o du douso nadelega paiya molone, Godeeyo momaiye oso goo hagee takaso.

<sup>36</sup> Osoloso Moseseeye o odoo Isipi mi maga gilimadoloso peegoo dilame, yayo goo toowa mudu opusomo opusomo di Isipi mi mapoo, osoloso Abei Bige mapoo moodoogaso. Esem yayo o odoo Isalael odoo gilimadoloso Isipi mi maga peegoo diso. Osoloso yayo miwe poogoo mi mapoo o odoo gilimadoloso dugo 40 ma kulodu silone goo mudu opusomo opusomo di moodoogamo sileeso.

<sup>37</sup> Osoloso Moses hedebe hagoso o odoo Isalael odoo dimapoo egeese takaso, 'Godeeye niba ee gooleebugulone, nima kuloduga o odoo yimaga to toloso kokodo takomo sili odoo a egeesi masi hesileiso,' diso.

<sup>38</sup> Esiga Moses hedebe hagoso ibada amawe dio Isalael odoo sabolo, miwe poogoo mi mapoo silone, yayo Sainai mubi dokodoo peleso badoboome, Godeeyo momaiye oso yibolo to kolone yimapoo gie badeli to imapoo tenelame teneeso.

<sup>39</sup> Esino ibada amawe dio oso Moseseeye to mapoo gowoolone, o to

mapoo mesile. Esem diba Isipi mi mapoo wedi dilame goomogaso.

<sup>40</sup> Osoloso Moses Sainai mubi dokodoo osee badoboome, odoo susuga oso Moseseeye emei Elon mapoo egeese takaso, 'Moseseeye iba Isipi mi maga gilimado simiso. Esino Moseseeye di, iba gooleedele. Esiga iba ee gilimado dilei godee masi deeso moodee,' diso.

<sup>41</sup> Esem biame omapoo Isalael odoo oso gamenee godee bulumakau pe be masi dadabayoo moodooso. Osoloso diayo gamenee godee omapoo goomogolone, o hu dokodoo poudalame gala hu wooloogaso.

<sup>42</sup> Esiga Godeeye goo hagee ogoloso dimapoo miligi piaso. Esem diba kei ma dokodoo bi egee molo, a, osoko, osoloso giwo, omapoo godee masi goomogolone doboome, Godeeye diba hamaga takele. Esiga goo hagee Godeeyo to oso booka mapoo taka Godee maga to toloso kokodo takomo sili odoo heeso booka maga egeese hoguguso:

'Isalael odoo, niba dui!

Niyo miwe poogoo mi mapoo dugo 40 ma kulodu silesibilone, amapoo emegei di bi sabolo gala hu sabolo wooloso teneliso?

Haye! Esino niyo gamenee godee mapoo teneliso.

<sup>43</sup> Esiga niba tei moso dugoso tegei ee imadoloso silesibiliso.

Osoloso niyo moso oma kulodu goomoga poudili ee amapoo goomoga koo poudili.

Esino niyo deeso moodoo gamenee godee Moloko sabolo Lapan godeeyo giwo sabolo omapoo goomoga poudiliso.

Esiga niba ayo nibada midee hamaga see mi eli sage Babilon mi hodiokoo hasiso bigileiso,' diso.

<sup>44</sup> Esiga tei moso dugoso tegei hagee Godeeye Moses mapoo eligilone egeese tege diso. Esem edebeyo Godeeyo to ee dodolone, moso



hagee tegeiso. Osoloso ibada amawe diayo miwe poogoo mi mapoo moso hagee imado silesibulone, 'Godeeye ibolo badoso,' deliso.

<sup>45</sup> Esemе dugo abo poogoloso hamamee see Yosuwaye ibada amawe dio gilimadoloso mi hagee talame silone, tei moso hagee sabolo imado sibadeeso. Esemе Godeeye ibada amawe dio ee pidilone, mibia odoo susuga ee mi hamaga peegoo hasiso buguso. Osoloso diayo mi hamapoo tei moso dugoso tegei ee toloso dobolone, wiligi odoo taba Deibidiyo biame mapoo peledabaso.

<sup>46</sup> Esemе Godeeye Deibidi mapoo goomogaso. Esemе Deibidiye tei moso Godee eyo badalame tei moso dia tegelame woosaso.

<sup>47</sup> Esino tei moso dia egee yayo tegele. Owolo Solomonoye tegei.

<sup>48</sup> Esino ibada Godee kitulugu toowa edebeeyo deeso tegei moso oma kulodu koo badeli. Esiga Godee maga to toloso kokodo takomo sili odoo oso Godeeyo goo maga egeesee takaso,

<sup>49</sup> 'Godeeye egeesee takooso:

Kei mi mapoo ayo badolone ka gibadoso.

Osoloso mi toowa hagee ayo mo homoso kokusoloso ka tobudoso.

Esiga niyo moso togoga, ayo moso omapoo badalai koo tebili.

Osoloso niyo ayo badeli moso ee tegelai koo tebili.

<sup>50</sup> Ayo mi toowa sabolo, kei mi sabolo, osoloso bi susuga sabolo moodooso,' diso."

<sup>51</sup> Osoloso Sitibeneeye o to hamameede see wiligi odoo tebisa mapoo egeesee takaso, "Niba koo mesili odoo. Osoloso nibada sooloo ma kulodu tei too goo mauwe. Esiga niba Godeeyo to mapoo koo duli. Osoloso namawe dio Dio Tei oso eligi goo ee gowoolone poogooso. Esiga niyo see egeeseeone, Dio Tei oso eligi goo ee gowoolone poogooso.

<sup>52</sup> Osoloso namawe diayo Dio Tei oso eligi gowoolone, Godee maga to toloso kokodo takomo silesibili odoo susuga mapoo dala teneeso. Esiga Godee maga to toloso kokodo takomo silesibili odoo aboso egeesee takaso, 'Odo tekepo Keliso hamamee sibileiso,' diso. Esemе namawe dio oso diba piliguso. Egeesi ma kulodu odoo tekepo Keliso simiso. Esino niyo gowoolone yo tiasoloso wooloomaso.

<sup>53</sup> Osoloso daga hoogoo Godeeyo momaiye oso Godeeyo tei magoo nimapoo olo teneme, niyo omapoo mesilega poogooso," diso.

### *Sitiben woolooma goo*

<sup>54</sup> Esemе wiligi odoo tebisa oso Sitibeneeyo to duloso, diya komonolone, dibada mei diya kumudooso.

<sup>55</sup> Esemе Sitibeneeye Dio Tei oso kitulugu toloso badolone, kei mi ma dokodoo egeino, Godeeyo gadeebugu kitulugu toowa ma kulodu Yesu Godeeyo dee deede dokolo mapoo tobudume egeiso.

<sup>56</sup> Esemе yayo wiligi odoo tebisa mapoo egeesee takaso, "Ege! A kei mi yamagoloso Odo Holo Godeeyo dee deede dokolo mapoo tobudo ogoso," diso.

<sup>57</sup> Esemе odoo susuga oso Sitibeneeyo to ee dulei gowoolone neligidi agadiga sabolo, dibada dulu too-booga doloso sibileso Sitiben tooso.

<sup>58</sup> Osoloso diayo Sitiben mosobia oma kuloduga peegoo ido dileso badoboome, yoso enigilame bei mooloogooso. Osoloso Sitibeneeyo goo mapoo gamenee takeli odoo abo oso dibada kekeisu dugo tigadoloso, odoo giekauwa, Solowo homo beiyomoo tigamagooso.

<sup>59</sup> Odo susuga oso yimapoo yoso enigime, Sitibeneeye Godee mapoo takolone egeesee takaso, "Lodee Yesu, mo dio nayo te," diso.

<sup>60</sup> Diayo yoso enigime, yo mi mapoo ebiso tugusaloso badolone, toso neligidi takolone egeesee takaso, “Lodee, dibada goo tokenee hagee hapoloso boobado bigi!” diso. Sitiben to hagee takoloso taso.

## 8

<sup>1-3</sup> Solo omapoo tobudulone Sitiben yoso enigaloso woolooma-lame odoo dimapoo goomoga goo takeme, yo wooloomaso. Esememe tei telaga odoo abo oso sibilesio Sitibeneeyo su midoosoloso diya pupusigaso.

### *Edebeeyo tei telaga odoo dimapoo gowe*

Esememe Sitiben woolooma biame omapoo Yelusalem mapoo debeli tei telaga odoo mapoo odoo susuga oso gowoolone, dimapoo dala tenelame bei mooloogooso. Esememe Soloye moso susuga mapoo peleso tei telaga odoo, giso sabolo, sobo sabolo, toloso neliga moso mapoo huyaseliso. Esememe tei telaga odoo susuga oso Yelusalem maga kukulo dulone, mi pepooko abo susuga mapoo Yudiya mi mapoo osoloso Samaliya mi ma kulodu diyadeeso. Esino hedebe diye di odoo susuga Yelusalem mapoo debeiso.

### *Pilipiye Samaliya mi mapoo Godeeyo to taka*

<sup>4</sup> Esiga tei telaga odoo susuga oso Yelusalem maga kukulo dileso, mi pepooko opusomo opusomo di mapoo to tekepo takolone, Kelisowo goo takagamo silesibiliso.

<sup>5</sup> Osoloso Pilipiye Samaliya mi toowa ee ma kulodu Sebasete mi mapoo dileso peledoboloso, Kelisowo goo odoo susuga mapoo takaso.

<sup>6</sup> Esememe Pilipiye to tekepo Kelisowo goo takolone, goo opusomo opusomo di moodoogamo silee diayo ogoloso, odoo susuga oso o to medee duso.

<sup>7</sup> Osoloso odoo susuga mooloo-goodoo oma kulodu bo holo odoo ma kulodu paladee, Pilipiye peegoo hasiso buguso. Esememe bo holo oso neligidi googa sabolo peegoo galagadiso. Osoloso odoo su kakawa poogoo sabolo, kido tigidiba sabolo, tekepo moodoogaso.

<sup>8</sup> Esememe Sebasete mi oma kulodu odoo susuga oso goomoga toowa meleeso.

<sup>9-11</sup> Esino Sebasete mi ma kulodu odoo googoo gooleedoo badebeiso, o hu Saimon. Esiga yayo biame susuga o googoo oso goo toowa opusomo opusomo di moodoogamo siloga, Samaliya mi toowa mapoo debeli odoo susuga oso ogoloso howoogadeliso. Egeeseelone yayo goolee, eyo nediliyo yo tekepo doloso, suwa peliso. Osoloso odoo susuga, hu toowa too odoo sabolo osoloso goo mauwe odoo sabolo oso, yayo goo opusomo opusomo di moodoo ogoloso, o to mapoo medee duloso tei tooso. Osoloso diayo egeesee takaso, “Odoo hagee Godee masi osoloso o hu Kitulugu Toowa,” diso.

<sup>12</sup> Esino Pilipiye to tekepo takolone, Godeeye wiligi doloso badeli eyo goo sabolo, Yesu Kelisowo goo sabolo, taka duloso, to omapoo tei teme, giso sabolo, sobo sabolo, howo ogusigaso.

<sup>13</sup> Osoloso Saimoneeye Pilipiyo to mapoo tei toloso howo oluguloso, Pilipi bolo sileeso. Osoloso yayo yibolo silone, Pilipiye goo toowa opusomo opusomo di moodoogamo silee ogoloso, diya howoodooso.

<sup>14</sup> Esememe Yelusalem mi mapoo diye di odoo oso Samaliya odoo oso Godeeyo to duloso tei too goo ee duloso, Pita dio Yonee dio Samaliya tei telaga odoo dimapoo diye, diso.

<sup>15-17</sup> Esino Samaliya mi toowa ee ma kulodu Sebasete mi mapoo debeli tei telaga odoo oso Lodee Yesuwo hu maga howo ogusigaloso, debei odoo omapoo Dio Tei oso

dimapoo meledebelega debeiso. Esem Pita dio Yonee dio Sebasete mi mapoo sibilesa, tei telaga odoo mapoo dibada deeso sigolone, Godee mapoo takeme, Dio Tei oso dimapoo meledabaso.

<sup>18</sup> Esem Saimoneeye goo hagee ogoloso, diye di odoo dimapoo molee ayo tosimi ee tenelame goolone,

<sup>19</sup> egeesee takaso, “A goomogo, mo deeso odoo mapoo sigolone, Godee mapoo takooga, Dio Tei oso dimapoo ka meledoboo dalame. Niyo kitulugu egee tomo silesibo amapoo tenee,” diso.

<sup>20</sup> Esino Pitaye yimapoo egeesee takaso, “No nee molee sabolo Dou mi mapoo dileiso. Bei, Godeeye emegei di bi maga Dio Tei wulayo hagee tenemolo, nayo see moleeso talai diso.

<sup>21</sup> Osoloso no ibolo Godeeyo tou hodobo talai koo tobuo. Bei, Godeeyo howo woola nee goo goolee egee diya tokenee.

<sup>22</sup> Esiga no epedee nayo tokenee goolee omaga mudu opusomo doloso Godee mapoo takee. Egeeseega nayo tokenee egee goolee molo, yayo hapoloso boobado bigilei malaiso,” diso.

<sup>23</sup> Esem Pitaye Saimon mapoo see egeesee takaso, “Ayo ogoso, nee sooloo ma kulodu emegei heiga toowa molone, goo tokenee mapoo hamamee dodomosiliso,” diso.

<sup>24</sup> Esiga Saimoneeye obulone see Pita dio Yonee dio dimapoo egeesee takaso, “A goomogo, niyo a Godee mapoo takee, bei niyo taka goo oso amapoo peledbelega pagalame,” diso.

<sup>25</sup> Osoloso hamamee Pita dio Yonee dio oso Yesu sabolo silee goo ee odoo susuga mapoo takoloso, see Yelusalem mapoo dulone, Samaliya ma kulodu mibia pepooko abo mapoo to tekepo takomo diso.

### *Itiyopiya odoo Pilipiye howo olugu goo*

\* **8:27-28:** *Kandake* to eyo bei egeesi moloso. Itiyopiya odoo dia toso wiligi taba sobo dolone ka takeli. **8:32:** Isa 53:7-8

<sup>26</sup> Biame heeso Godeeyo momaiye oso Pilipi mapoo egeesee takaso, “No toboloso Yelusalem maga Gasa mi mapoo dili eli omapoo di. Eli egee osoko sibili deede dokolo mapoo miwe poogoo mi mapoo moloso,” diso.

<sup>27-28</sup> Esem Pilipiye toboloso dulone eli domopoo egeino, Itiyopiya wiligi odoo hee, Itiyopiya mi eyo wiligi taba sobo Kandake\* eyo molee gibadeli odoo egeiso. Yo Yelusalem mapoo Godeeyo hu dokodoo poudalame di oso see wedi sibulone, talaka masi, esino hosee be omapoo bagagoloso, hosee be oso gisibamo dimolome mapoo buloso, Godee maga to toloso kokodo takomo sili odoo Aisayaye hogugu booka hesigamo sibumeleeso.

<sup>29</sup> Esem Dio Tei oso Pilipi mapoo egeesee takaso, “No dileso odoo koola omapoo tebee,” diso.

<sup>30</sup> Esem Pilipiye odoo hee yima koola omapoo hoguo sibilesa to budulone duno, odoo yayo Godee maga to toloso kokodo takomo sili odoo Aisayaye hogugu booka hesigamelee duso. Esem Pilipiye yimapoo egeesee woosaso, “Nayo egee hesigamolo goo eyo bei no gooleedoosomo?”

<sup>31</sup> Esino odoo yayo yimapoo nei egeesee takaso, “Haye, oposusu eyo bei a gooleede. Bei, edebeeyo oposusu hagee eyo bei amapoo koo eligili.” Osoloso yayo Pilipi mapoo egeesee takaso, “No talaka masi ma dokodoo peledoboloso ama hodiokooga bilei sibe,” diso. Esem yo peledoboloso biaso.

<sup>32</sup> Esiga odoo yayo badolone Godeeyo to hogugu hesigamelee hagoso:

“Yo sipi be hu wooloomalame ido dili egeesi masi ido diso.

Yo sipi be hu masi o too edebeeyo kooga, to mauwe

tabameli egeesi masi, ede-beeyo yimapoo dala teneme, dimapoo hamaga takele.

<sup>33</sup> Edebeeyo yo manolone yo pepooko dolone, o goo medee hooda midile.

Edebeeyo o amawe dio eyo goo opossileime.

Bei, yo amawe dio mauwe.

Osoloso edebeeyo yo wooloomaso, esiga yo mi toowa hamapoo holo soomagele,” diso.

<sup>34</sup> Esem e Itiyopiya odoos oso Pilipi mapoo egeese woosaso, “Amapoo takee, Godee maga to toloso kokodo takomo sili odoos hagoso agamo goo takoolo? Eyo nediliyo o goo takoolo, o odoos heeyo goo takoolo?” diso.

<sup>35</sup> Osoloso Pilipiye, odoos yayo Godeeyo to hesigamelee eyo bei yimapoo takolone bei mooloo-goolone, to tekepo Yesuwo goo sabolo takaso.

<sup>36</sup> Osoloso obakadio eli domopooga dulone, howo tolobo mapoo peledabaso. Esem e Itiyopiya odoos oso Pilipi mapoo egeese takaso, “No ege! Howo tolobo bou hagoso. Nayo a howo olugulei soowayo?” diso.

<sup>37</sup> [Esem e Pilipiye nei egeese takaso, “Nee sooloo ma kulodu tei too mologa, no howo olugulei soowa,” diso. Osoloso Itiyopiya odoos oso Pilipi mapoo nei egeese takaso, “Ayo Yesu Keliso ee Godeeyo owolo doloso yimapoo tei toso,” diso.]\*

<sup>38</sup> Esem e Itiyopiya odoos oso talaka masi hosee be mapoo bagagoloso ido dili odoos mapoo egeese takaso, “Talaka masi omapoo kookodebee,” diso. Esem e obakadio howo tolobo omapoo meilesa, Pilipiye Itiyopiya odoos howo oluguso.

<sup>39-40</sup> Osoloso diba howo tolobo maga mubi dokodoo peledoboome, Dio Tei oso Pilipi toloso mi eli sage Asotus mapoo holoogoos. Esem e Itiyopiya odoos oso yo see egele poo-goos. Esem e yo Godee mapoo tei

tooga, yayo dulone goomoga sabolo o mi mapoo diso. Esino Pilipiye Asotus mi mapoo peledoboloso, to tekepo Yesuwo goo takoloso, see Kasaliya mi mapoo dulone, mi pepooko abo mapoo takomo diso.

## 9

### *Yesuye Solo mapoo peledaba goo*

<sup>1-2</sup> Osoloso biame omapoo Soloye Yelusalem mapoo badolone, tei telaga odoos dimapoo komonolone heiga toowa molone, “diba pilig-ileiso”, diso. Egeeseelone yayo Damasko mi mapoo tei telaga odoos, giso sabolo, sobo sabolo, diba dee tiso tegisaloso Yelusalem mapoo iyado sibilame tei moso wiligi odoos taba agalame diso. Esem e tei moso wiligi odoos taba oso peipa mapoo to hogugulone egeese hoguguso, “To hogugu hagee namapoo kitulugu teneeso, nayo Damasko mi mapoo dileso, Yesu mapoo tei telaga odoos susuga talame. Esiga no Damasko mi mapoo dileso, Yu odoos howo gisili moso wiligi odoos tebisa dimapoo to hogugu peipa hagee tenee,” diso.

<sup>3</sup> Esem e Soloye odoos abo oso kitulugu toloso Damasko mi mapoo debeli tei telaga odoos susuga talame diso. Esem e diba Damasko mi koola mapoo peledabalame dimeleeno, kei ma dokodooga gadeebugu oso sibilesa Solo tooso.

<sup>4</sup> Esem e Solo yo mi mapoo homod-obuloso molone, to taka duno, to oso yimapoo egeese takaso, “Solo, Solo, bei kasi maga nayo amapoo dala ka tenemalala?” diso.

<sup>5</sup> Esem e Soloye woosaso, “Wiligi odoos, no ogumo?” diso.

Esem e to oso Solo mapoo egeese takaso, “A Yesu, nayo tei telaga odoos dimapoo dala egee tenemolo amapoo tenemoloso.

<sup>6</sup> Esiga no toboloso Damasko mi toowa ma kulodu di. Egeeseega mi

**8:36:** Diye 10:47 \* **8:37:** To hagee odoos abo oso taka Lukaye hogugu, dee takeliso. Esino odoos bei oso taka Lukaye hogugule, dee takeliso. **8:39-40:** Diye 21:8 **9:1-2:** Diye 8:3



omapoo badeli odoos hee oso nayo goo talai namapoo eligileiso,” diso.

<sup>7</sup> Esemee odoos abo Solobolo diyadee oso goo hagee ogoloso, ebiga sabolo tebisamolone to takele poogooso. Bei, to taka diba duso, esino odoos tei egele poogooso.

<sup>8</sup> Solo homodobia maga hogabuloso howo puo egeino, howo bakadio siliwe meleeso. Esemee yibolo diyadee odoos abo oso Damasko mi mapoo dulone, o dee mapoo toloso ido diso.

<sup>9</sup> Solo howo bakadio siliwe molone Damasko mi mapoo dileso badolone, biame bakadio hedebe di eyo kulodu nei sabolo howo sabolo nelega badebeiso.

<sup>10</sup> Esemee Damasko mi toowa ma kulodu tei too odoos hee badebeiso, o hu Ananayas. Biame omapoo Lodeeye Ananayaseeyo howo opusomo doloso yimapoo egeesee takaso, “Ananayas!”

Esemee Ananayaseeyo nei egeesee takaso, “Lodee, nayo egee takoo a duso,” diso.

<sup>11</sup> Esemee Lodeeye yimapoo egeesee takaso, “No toboloso eli hee, o hu Hooda omaga Yudaseeyo moso ma kulodu peleso, Talesas odoos, o hu Solo, yo agalame woose, bei yo amapoo takolone badoso.

<sup>12</sup> Bei, ayo o howo opusomo doloso, Ananayas nayo sibilesa nee deeso yo sigoga, o howo tekepo palame ka eliga,” diso.

<sup>13</sup> Esemee Ananayaseeyo egeesee takaso, “Esino Lodee, odoos susuga oso odoos hagee eyo o goo amapoo oposususo. Osoloso a gooleedooso, yayo Yelusalem mapoo Godeeyo odoos mapoo dala teneli.

<sup>14</sup> Esiga tei moso wiligi odoos tebisa oso yimapoo kitulugu teneme, Damasko mi hamapoo dobolone, Yesu namapoo tei telagali odoos susuga iyadoloso see Yelusalem mapoo iyado diyadeeso,” diso.

<sup>15</sup> Esino Lodeeye Ananayas mapoo egeesee takaso, “Di, bei ayo Solo yo

mo tou talame yo hesiaso. Osoloso Yu odoonee susuga sabolo, osoloso dibada wiligi odoos tebisa sabolo, osoloso Yu odoos susuga mapoo mo goo woola yilige bigileiso.

<sup>16</sup> Osoloso yayo amapoo tei too maga dala toowa talai goo ee ayo yimapoo eligileiso,” diso.

<sup>17</sup> Esemee Ananayaseeyo dileso Yudaseeyo moso kulodu peleso, Solo mapoo o deeso sigolone egeesee takaso, “Mo odoos, Solo, nayo eli domopooga sibulone, Lodee Yesu egei yayo a diye diso. Osoloso yayo nee howo tekepo poloso Dio Tei namapoo meledabalaiso,” diso.

<sup>18</sup> Biame omapoo di bee masi oso Solowo howo maga homodobume, o howo tekepo paso. Esemee Ananayaseeyo yo howomoo ido meilesa, howo oluguso.

<sup>19</sup> Osoloso Solo nei naloso kitulugu toooso.

Esemee biame abo ma kulodu Soloye tei telaga odoos abo sabolo Damasko mi mapoo debeiso.

### *Soloye Damasko mi mapoo to tekepo Yesuwo goo taka*

<sup>20</sup> Biame olo omapoo yayo Yu odoowo howo gisili moso tegei ma kulodu gapeleso, to tekepo Yesuwo goo takolone bei mooloogoolone egeesee takaso, “Yesu Godeeyo owolo oso,” diso.

<sup>21</sup> Esiga odoos susuga to hagee dulgaloos howoodolone egeesee takaso, “Odoos hagoso daga Yelusalem mapoo badolone, odoos susuga oso Yesu mapoo tei telagaga, yayo dimapoo dala teneloso piligiliso. Esiga tei moso wiligi odoos tebisa oso yo diye deme, tei telaga odoos susuga ee yayo iyadoloso Yelusalem mapoo dilame ka simidoo,” diso.

<sup>22</sup> Esemee Soloye Godeeyo to takalame, Godeeye yimapoo kitulugu tenee oso diya toowa diso. Esemee yayo Yesu Godeeye hudi magoo Keliso oso doloso dimapoo eligiga, Yu odoos susuga Damasko

mi mapoo debeli oso to nei takalai gooleedele pegeliso.

<sup>23</sup> Osoloso biame bei poogoloso hamamee, Yu odoo oso Solo wooloomalame to mouso.

<sup>24</sup> Osoloso diayo mosobia pee beele eye osulu miyopoo tebisamolone, Solo toloso wooloomalame biame susuga sabolo gesi susuga sabolo gidebeiso. Esino edebeeyo yimapoo sibilesu goo hagee takeme, yo duso.

<sup>25</sup> Esem Solo o odoo abo oso yo pidilame yo pulo dilame, gesi hee mapoo yo wogai toowa ma kulodu husoloso beele dokodooga peegoo tooso.

<sup>26</sup> Esem Solo Yelusalem mapoo pulo sibilesu, tei telaga odoo omapoo debei sabolo hedebe dalame seme, diayo yibolo ebiaso. Bei, Soloye Lodee mapoo tei too goo ee duloso, medee tei tele.

<sup>27</sup> Esino Banabaseeye yo pidilone diye di odoo mapoo Solo ido dileso egeese takaso, "Solo Damasko eli domopooga dimolome omapoo Lodeeye peledoboloso yimapoo to keiso. Esem Soloye yimapoo tei toloso Damasko mi mapoo kitulugu sabolo Godeeyo to Yesu Kelisowo goo takalai ebile," diso.

<sup>28</sup> Esem Soloye tei telaga odoo sabolo Yelusalem mapoo badolone, odoobolo ebilega, Lodee Yesuwo goo diya kitulugu sabolo mi ee ma kulodu takomo sileeso.

<sup>29</sup> Egeeseelone, Guliki dia to keli Yu odoo sabolo Yesuwo goo maga Soloye dimapoo toso agadigeliso. Eseega diayo yo wooloomalame gweliso.

<sup>30</sup> Osoloso tei telaga odoo oso goo hagee duloso, Solo ido dileso Kasaliya mi mapoo peledabaso. Osoloso see abaga o midee Talesas mapoo diye diso.

<sup>31</sup> Esem Yudiya, Gelili, osoloso Samaliya mi bakadio hedebe di hageeyo kulodu mi susuga mapoo tei tele poogoo odoo oso tei telaga odoo

mapoo dala teneli goo oso mauwe poogoome, dibada tei too toowa diso. Egeeseelone diba Lodee Yesu mapoo mesilone Dio Tei oso pidi goo sabolo badolone tei too odoo bei moodoso.

### *Pitaye Ainiyas tekepo moodoo goo*

<sup>32</sup> Pitaye Yu odoowo mi susuga mapoo silone, Godeeyo odoo mapoo Godeeyo to oso pidimo siliso. Egeeseemo silone, Godeeyo odoo abo Lida mi mapoo debeli odoo mapoo dileso peledabaso.

<sup>33</sup> Osoloso mi omapoo egeino, odoo su kakawa poogoo, o hu Ainiyas, o kida mapoo teleme egeiso. Yo su kakawoloso dugo 8 ma kulodu biame susuga tiameliso.

<sup>34</sup> Esino Pitaye yo ogoloso yimapoo egeese takaso, "Ainiyas, Yesu Kelisoye no epedee tekepo poso. Esiga no toboloso nee kida boologee," diso. Esem biame omapoo Ainiyas tekepo poloso tabaso.

<sup>35</sup> Osoloso Lida mi mapoo debeli odoo sabolo Salon mi kubo mapoo debeli odoo sabolo oso odoo su kakawa poogoo tekepo poloso sile ogoloso, diayo Lodee Yesu mapoo tei telagasu.

### *Pitaye Tabita tekepo moodoo*

<sup>36</sup> Esino Yopa mi mapoo tei too sobo badebeiso, o hu Tabita (o hu hee Guliki toso hedi Dokas). Yayo odoo abo pidimo silone, emegei bi mauwe odoo sabolo diya pidimo siliso.

<sup>37</sup> Esino Pita Lida mi mapoo osee badoboome, Tabita paiye toloso taso. Esem o odoo oso o su howo sauwudoloso moso egi doko tegei ma kulodu debi pooba goopoogoo mapoo magooso.

<sup>38</sup> Esino Lida mi egee Yopa mi maga haga hoogoonee. Esem tei telaga odoo Yopa mi mapoo debeli odoo oso Pita Lida mi mapoo badoso doloso odoo bakadio oso Pita takalame diye diso. Esem diayo Pita sibilame egeese takaso, "Pita, no ibada mi mapoo saga sibe!" diso.

<sup>39</sup> Esemе Pita dibolo diso. Osoloso yo Yopa mi mapoo peledoboome, diayo Pita yo soboso tamelee debi dokodoo pooba mapoo ido palaso. Moso oma kulodu sobo bau susuga pupusiga melee oso, Pita ogoloso yimapoo Tabitaye telega silone dugo dusa eligiso.

<sup>40</sup> Esino Pitaye sobo bau sabolo, osoloso odo abo sabolo peegoo di doloso, ebiso miyomoo tugusaloso badolone Godee mapoo takaso. Yayo takoloso, sobo ta mapoo bidibuguloso yimapoo bolone egeesee takaso, “Tabita, no tebee,” diso. Esemе Tabita howo puo ogoloso, Pita ogoloso hogabiaso.

<sup>41</sup> Esemе Pitaye yo pidilone, o dee mapoo toloso tebidiso. Osoloso tei telaga odo sobo bau sabolo, osoloso odo abo sabolo gilimadoloso, Tabita tekepo poloso badebei dimapoo eligiso.

<sup>42</sup> Esemе Yopa mi mapoo debeli odo oso goo hagee duloso, Lodee mapoo tei telagasoo.

<sup>43</sup> Esemе Pitaye Yopa mi mapoo biame susuga badolone, gala kolo sabolo tou teli odo Saimonobolo o mosopoo badebeiso.

## 10

*Godeeye Yu odoonee Konelias mapoo to taka goo*

<sup>1</sup> Kasaliya mi mapoo Loum ha teli odo mooloogoodoo meleeso. Mooloogoodoo hagee Itali mi toowa eyo mooloogoodoo oso. Esino Konelias mooloogoodoo egee gibadeliso.

<sup>2</sup> Odo Konelias hagee Godeeye goomoga goo tomo silame goomegeliso. Osoloso Konelias yibolo osoloso o moso kulodu debeli odo susuga oso Godee mapoo mesiliso. Osoloso yayo bi mauwe odo mapoo biso pidilone, biame susuga ma kulodu Godee mapoo takolone badebeiso.

<sup>3</sup> Osoloso biame hee habe mapoo Godeeye Koneliassee yo howo opusomo doloso, yayo Godeeye momaiye tei egeiso. Osoloso momaiye oso sibilesi yimapoo egeesee takaso, “Konelias!”

<sup>4</sup> Esemе Koneliassee Godeeye momaiye mapoo ebia sabolo bolone egeesee takaso, “Wiligi odo, nayo ogo goomogolo?” diso.

Esemе Godeeye momaiye oso yimapoo egeesee takaso, “Nayo Godee mapoo takemelee goo ee yayo duso. Osoloso nayo bi mauwe odo pidimelee Godeeye ogoloso goomogoso.

<sup>5</sup> Esiga nayo epedee odo abo Yopa mi mapoo diye, dee takee, diayo Saimon-Pita namapoo ido sibilame.

<sup>6</sup> Yo gala kolo sabolo tou teli odo Saimonobolo o mosopoo badoso. O moso ee abei toowa palaga mapoo tegei moloso,” diso.

<sup>7</sup> Osoloso Godeeye momaiye oso yibolo to kemeleso dime, o tou teli odo bakadio sabolo, osoloso ha teli odo hee Godee mapoo tei teli odo sabolo gilimadooso. Ha teli odo hagee Konelias pidili.

<sup>8</sup> Osoloso Koneliassee Godeeye momaiye oso yimapoo taka goo ee dimapoo takoloso see diba Yopa mi mapoo diyadee diso.

*Pitaye howo opusomo di goo*

<sup>9</sup> Esemе diba Yopa mi mapoo dulone eli domopoo tiesaso. Osoloso mi hadobume dulone, osoko oo domo toboome, Yopa mi koola mapoo peledabalame dimeleeso. Osoloso biame omapoo Pitaye Godee mapoo takalame moso omu ma dokodoo palaso.

<sup>10</sup> Esemе yayo Godee mapoo takolone badoboome, hodiaso. Esemе odo abo oso o nei simolome, Godeeye o howo opusomo diso.

<sup>11</sup> Esemе yayo egeino, kei mi yamagoloso molome egeiso. Esemе kei ma dokodooga dugo masi eyo pee mapoo tiso bagagisaloso o mudugiyopaga mi mapoo kukoosoo molome egeiso.

<sup>12</sup> Dugo ee ma kulodu gala opusomo opusomo di susuga, homo bakadio bakadio di oso dili sabolo, osoloso beliyeso kolo dili sabolo, osoloso só egeiso.

<sup>13</sup> Esemee kei ma dokodooga toso yimapoo egeesee takaso, “Pita, no gala susuga hagee ma kulodu nayo abo wooloso ne,” diso.

<sup>14</sup> Esino Pitaye nei egeesee takaso, “Haye, Lodee, a gala egeesi koo nali. Bei, nayo gala egeesi na ne doloso daga hoogoo tei magooso. Esiga ayo gala abo wooloso nalaime,” diso.

<sup>15</sup> Esemee toso see nei egeesee takaso, “Godee, ayo bi susuga tekepo di, bi egee see nayo tokenee dee na takee,” diso.

<sup>16</sup> Godeeye Pita mapoo gala susuga nalai tekepo doloso taka goo ee bakadio hedebe di takoloso dugo masi ee see kei ma dokodoo topeleso osugob-oodooso.

<sup>17</sup> Esemee Pitaye o howo opusomo doloso egei goo eyo bei ee goolone badoboome, Koneliyaseeye diye di odoo oso sibilesi, Saimonowo moso beele osulu miyopoo tobudulone bameleeso.

<sup>18</sup> Osoloso diayo egeesee takaso, “Odoo hee Saimon-Pita yo moso kulodu badolo?” diso.

<sup>19</sup> Esino Pita yayo egei goo ee eyo bei goolone osee badoboome, Dio Tei oso yimapoo egeesee takaso, “Pita, odoo bakadio hedebe di oso no esigamoloso.

<sup>20</sup> Esiga no toboloso miyomoo meilesi dibolo di, bei ayo diba no hamapoo esiamo sibe,” diso.

<sup>21</sup> Esemee Pitaye miyomoo meilesi dimapoo egeesee takaso, “Niyo odoo egee esigamo silesibo odoo ee aso. Esiga niba hamapoo ogo talame ka sibadeeyo?” diso.

<sup>22</sup> Esemee diayo Pita mapoo nei egeesee takaso, “Ibada wiligi odoo taba Koneliyas Loum ha teli odoo gibadeli odoo oso iba diye diso. Koneliyas yo Godeeye goomoga goo tomo silame goomegeliso, osoloso yo

Godee mapoo mesiliso. Osoloso Yu odoo susuga oso yo tekepo deliso. Esiga Godeeyo momaiye oso sibilesi Koneliyas mapoo takolone, Pita nayo Koneliyas mapoo Godeeyo to takee, diso. Esiga iyo no Koneliyas mapoo ido dilame ka simi,” diso.

<sup>23</sup> Osoloso diayo goo hagee taka koodobuloso, Pitaye diba o mosopoo gesi hedebe omapoo tilame ido palaso.

Osoloso diba omapoo tiesaloso, mi biamome Koneliyaseeye diye di odoo sabolo, tei telaga odoo abo Yopa mi mapoo debeli odoo sabolo Pita idoloso Yopa mi maga Kasaliya mi mapoo diyadeeso.

*Pitaye Koneliyaseeyo moso kulodu Yu odoonee dimapoo Godeeyo to taka*

<sup>24</sup> Diayo dilesi eli domopoo tiesaloso biame hee oso Kasaliya mi mapoo dilesi peledabaso. Koneliyas yo biame omapoo bolone, o sooso susuga sabolo, o odoo susuga sabolo, gilimadoloso balaga meleeso.

<sup>25</sup> Esemee Pitaye Koneliyaseeyo moso kulodu gasibume, Koneliyaseeye Pitayo homo beiyomoo ebiso miyomoo tugusaloso yimapoo goomogalame balaboo tiaso.

<sup>26</sup> Esino Pitaye Koneliyaseeyo dee mapoo toloso yo tobudulone egeesee takaso, “No tebee, nayo a toowa doloso amapoo na gauwe. Bei, a mosoowe odoo,” diso.

<sup>27</sup> Osoloso Pita dio Koneliyas dio to komo moso kulodu gadulone egeino, odoo bei mooloogoodoo egeiso.

<sup>28</sup> Esemee Pitaye Yu odoonee oso mooloogoodoloso debei ogoloso dimapoo egeesee takaso, “Niba Yu odoowo tei gooleedooso. Esiga Yu odoo oso Yu odoonee sabolo hedebe doloso goo tomo silei tei. Osoloso Yu odoo oso Yu odoonee dibada moso kulodu palai tei deliso. Esino Godeeye mo howo opusomo doloso amapoo egeesee eligiso, ‘Yu odoo ibolo osoloso Yu odoonee nibolo Godeeyo howo woola hedebe.’ Esiga



ayo Yu odoonee maga Godeeyo howo woola odo hee tokenee dee takalai koo tobuo.

<sup>29</sup> Esiga niyo a ime, ayo nimapoo sibilei gowelee. Esiga niyo a hamapoo sibe dee taka goo eyo bei amapoo takee," diso.

<sup>30</sup> Esemee Koneliyaseeye yimapoo nei egeesee takaso, "A biame bakadio hedebe di poogoloso biame hee habe mapoo moso kulodu Godee mapoo takolone badebeiso. Esemee haga booloogelega, odo hee dugo heliye hohodi kaloso mo mudugiyopoo sibilesa tobudume egeiso.

<sup>31</sup> Esemee yayo amapoo egeesee takaso, 'Konelias nayo Godee mapoo takemelee goo ee yayo duso. Osoloso nayo bi mauwe odo pidimelee Godeeye ogoloso goomogoso.

<sup>32</sup> Esiga nayo epedee odo abo Yopa mi mapoo diye, dee takee, diayo Saimon-Pita namapoo ido sibilame. Yo gala kolo sabolo tou teli odo Saimonowo mosopoo badoso. O moso ee abei toowa palaga mapoo tegei moloso,' diso.

<sup>33</sup> Esemee biame omapoo ayo odo abo oso no hamapoo ido sibilame diye diso. Osoloso nayo hamapoo simi ogoloso a goomogo. Esiga iba hamapoo Godeeyo mudugiyopoo sibilesa mooloogoodoo hagee, to susuga Godeeye namapoo tenee goo ee imapoo takee dee taka, goo ee dulame ka sibadee," diso.

<sup>34</sup> Esemee Pitaye to taka bei mooloogoolone egeesee takaso, "A epedee gooleedoso, Godeeye egei maga odo susuga ma kulodu odo heeso, odo hee dagadi molo koo ogoso.

<sup>35</sup> Osoloso mi toowa hamapoo mi opusomo opusomo di ma kulodu edebeeyo Godeeye goomoga goo tomo silone, Godee mapoo mesimo silesibili odo mapoo Godeeye goomegeliso.

<sup>36</sup> Esiga niba Godeeye Isalael odo dimapoo to tekepo tenee goo ee niba

duso. To tekepo ee hagoso, Yesu Kelisoye odo susuga ma kulodu wiligi odo toowa taba doloso badoso. Esiga Yesu Keliso maga Godeebolo hedebe doloso mesiloso badeli goo ee imapoo teneeso.

<sup>37</sup> Osoloso Yonee odo howo oluguli oso to takolone, odo susuga dibada goo tokenee maga miligi pialoso howo ogusige, dee takoloso koodobume, Gelili maga bei mooloogooloso Yudiya mi toowa mapoo peledaba goo ee, niba olo gooleedooso.

<sup>38</sup> Osoloso Godeeye Yesu Nasalet odo hesialoso yimapoo Dio Tei sabolo osoloso kitulugu sabolo tenee, niba gooleedooso. Bei, Godeeye biame susuga yo pidilone yibolo badolone, yayo Yu odoowo mi susuga mapoo silone, tekepo goo susuga moodoogamo sileeso. Osoloso Saiten oso gibadelo odo susuga ee tekepo moodoogamo sileeso.

<sup>39</sup> Esiga diye di odo, iba Yesuye Yelusalem mapoo osoloso Yu odoowo mi abo mapoo goo susuga hagee tomo silee, iyo egeiso. Osoloso Yelusalem mapoo debeli odo oso Yesu homo bulubo magoo ma dokodoo yoguso enigaloso woolooma, iyo egeiso.

<sup>40-41</sup> Esino biame bakadio poogoloso see biame hee mapoo Godeeye Yesu ta maga hogadiso. Osoloso Yesu yo ta maga hogabuloso silone odo susuga mapoo peledoboo dele. Esino hedebe Godeeye daga hoogoo iba hesialoso diye di odo imapoo Yesuye ta maga hogabuloso peledoboo demeleeso. Esemee yayo hogabuloso silee ogoloso, iyo yibolo silesibilone, wo sabolo howo sabolo nolone silesibiso.

<sup>42</sup> Esiga Yesuye imapoo to kitulugu sabolo egeesee takaso, 'Niyo odo susuga mapoo Godeeyo to tekepo takomo silesibe diso. Osoloso Godeeye Yesu ayo odo susuga wedia

sabolo, osoloso mi toowa hamapoo hagee do sabolo, goo midileiso,' diso.

<sup>43</sup> Osoloso daga hoogoo Godee maga to tolosa kokodo takomo sile-sibili odoo susuga oso goo hamapoo tei takoo diso. Edebeeyo Yesu mapoo tei toga, Godeeye Yesu maga o goo to-kenee hapoloso boobado bigileiso," diso.

### *Dio Tei oso Yu odoonee dimapoo daga meledaba goo*

<sup>44</sup> Pita to osee takomolome, Dio Tei oso meilesa Pitaye to takomolome dulugamelee odoo mapoo meled-abaso.

<sup>45-46</sup> Esemé Dio Tei oso kitulugu maga diayo to opusomo opusomo di ee keselone Godeeyo hu dokodoo poudooso. Esemé Yu odoo tei telaga Pitabolo sibadee oso goo hagee ogoloso diya howogadooso. Bei, Godeeye Dio Tei Yu odoonee sabolo dimapoo teneeso.

Esemé Pitaye dimapoo egeesee takaso,

<sup>47</sup> "Bei, Godeeye Dio Tei imapoo tenee egee egeesi masi dimapoo ka teneeso. Esiga diayo howo olugulei edebeeyo hamaga takalaime," diso.

<sup>48</sup> Esemé Pitaye see egeesee takaso, "Niyo Yesu Keliso mapoo tei too goo ee eligilame, niba howo ogusige," diso. Osoloso diba howo ogusigaloso, diayo Pita biame abo mapoo dibolo hodobo badoboso dilame goomogaso. Esemé Pitaye Yopa mapoo tei telaga odoo sabolo omapoo debeiso.

## 11

### *Pitaye Yu odoonee dia goo ee Yelusalem mapoo taka*

<sup>1</sup> Diye di odoo sabolo, tei telaga odoo Yudiya mapoo debeli sabolo, oso Yu odoonee oso Godeeyo to dulo-oso tei too goo ee duso.

<sup>2</sup> Esiga Pitaye Yu odoonee sabolo badoboso, see Yelusalem mi mapoo wedi sibume, Yu odoo tei telaga odoo

oso toso kitulugu sabolo yimapoo diya takolone egeesee takaso,

<sup>3</sup> "Bei kasi maga no Yu odoonee dia mosopoo dilesa dibolo badolone wo ka nameleeyo? Goo egee teke-ponee," diso.

<sup>4</sup> Esemé Pitaye goo susuga eyo bei medee dimapoo takolone bei mooloogolone egeesee takaso,

<sup>5-6</sup> "A Yopa mi mapoo badolone Godee mapoo takolone badoboome, Godeeye mo howo opusomo diso. Goo egeesi ma kulodu egeino, dugo masi eyo pee mapoo tiso bagagisa-losa kei ma dokodooga holomo sibumolome egeiso. Bi oso holomo sibumolome, ayo koola mapoo tobudulone egeino, dugo masi eyo kulodu gala opusomo opusomo di susuga, homo bakadio bakadio di oso dili sabolo, osoloso beliyeso kolo dili sabolo, gala seebee sabolo, osoloso só egeiso.

<sup>7</sup> Esemé biame omapoo kei ma dokodooga toso amapoo egeesee takaso, 'Pita nayo gala susuga hagee ma kulodu abo wooloso ne,' diso.

<sup>8</sup> Esemé ayo yimapoo nei egeesee takaso, 'Haye, Lodee, a gala egeesi koo nali. Bei, nayo gala egeesi na ne doloso daga hoogoo tei magooso. Esiga ayo gala abo wooloso nalaimé,' diso.

<sup>9</sup> Esemé toso see nei egeesee taka, 'Godee, ayo bi susuga tekepo di, bi egee see nayo tokenee dee na takee,' diso.

<sup>10</sup> Goo hagoso peledaba bakadio hedebe doloso see kei ma dokodoo peleso osugobodooso.

<sup>11</sup> Esemé haga booloogelega odoo bakadio hedebe di oso Kasaliya mi maga a agalame diye di odoo oso ayo tieli moso mapoo sibilesa peled-abaso.

<sup>12</sup> Egeesi ma kulodu Dio Tei oso a Kasaliya mi mapoo dibolo dilei na ebi, dee takaso. Esemé tei telaga odoo 6 hamapoo buluma hagee molo oso abolo diso. Osoloso iba dilesa

Koneliyaseeyo moso kulodu hodobo paladeeso.

<sup>13</sup> Esem e Koneliyaseeye Godeeyo momaiye oso moso kulodu peledoboome egei goo ee imapoo opusususo. Godeeyo momaiye oso yimapoo egeese takabu, 'Nayo odoo abo Yopa mi mapoo diyadee dee takee. Diayo dileso Yopa mi mapoo Saimon-Pita, a Konelias namapoo ido sibenabu.

<sup>14</sup> Pita, ayo namapoo sibiles nobolo, osoloso nee moso kulodu debeli odoo mapoo Godee maga gie badeli teli goo ee takalaiso,' dee takeme duso.

<sup>15</sup> Esem ayo dimapoo dileso to tekepo takalame bei mooloogoome, Dio Tei daga Pentikos biame mapoo imapoo meledaba egeesi masi oso dimapoo meledabaso.

<sup>16</sup> Esem ayo Lodeeye to taka hagee gooleebuguso, yayo egeese takaso, 'Yoneeye niba howodeeso oluguso, esino niba hamamee Godeeyo Dio Tei oso sibileso nimapoo kitulugu tenelaiso,' diso.

<sup>17</sup> Esem iyo daga Yesu Keliso mapoo tei teme, Godeeye Dio Tei imapoo teneeso. Egeesi masi diayo Yesu Keliso mapoo tei teme, Godeeye dimapoo Dio Tei ka tenee. Esiga ayo Godeeyo goo ee hamaga takalaime," diso.

<sup>18</sup> Esino Yu odoo tei telaga oso Pitaye to taka duloso diayo kamamelee omapoo poogooso. Esem diayo Godeeyo hu dokodoo poudoolone egeese takaso, "Godeeye Yu odoonee mapoo osulu yamagooso, diayo dibada goo tokenee maga miligi pialoso Godee mapoo bidiga toboloso gie badeli talame," diso.

*Yu odoonee Antiyoka mi mapoo debeli odoo oso Lodee Yesu mapoo tei too goo*

<sup>19</sup> Sitiben woolooma biame omapoo tei tele poogoo odoo oso tei telaga odoo mapoo dala teneli

goo oso toowa moodoome, tei telaga odoo susuga Yelusalem mi maga mi opusomo opusomo di mapoo kukulo diyadeeso. Diayo kukulo dulone odoo abo oso mi eli sage Ponesiya mi toowa mapoo kukulo diyadeeso. Osoloso odoo abo Saiples mi te mapoo kukulo diyadeeso. Osoloso odoo abo Antiyoka mi mapoo kukulo diyadeeso. Osoloso diba mi omapoo kukulo dileso dobolone, to tekepo Yesu Kelisowo goo hedebe Yu odoo dimapoo takomo silesibiso.

<sup>20</sup> Esino Yelusalem maga kukulo diyadee odoo ee ma kulodu Kulene odoo abo sabolo, Saiples odoo abo sabolo, Antiyoka mi mapoo sibileso, Yu odoonee dimapoo Lodee Yesuwo goo takomo silesibiso.

<sup>21</sup> Godeeyo kitulugu dimapoo molone, Yu odoonee oso dibada to mapoo tei toloso, dibada goo tokenee maga miligi pialoso Lodee Yesu mapoo bidiga dabaso.

<sup>22</sup> Esem tei telaga odoo Yelusalem mapoo debeli odoo oso Yu odoonee oso tei too goo ee duloso, Antiyoka mi mapoo Banabas diye diso.

<sup>23-24</sup> Esiga Banabas odoo tekepo doloso badebeiso, yo tei too kibiya Dio Tei oso kitulugu toloso badebeiso. Osoloso yo Antiyoka mi mapoo dileso badoboome, odoo susuga Godeeye pidi ogoloso, yo diya goomogaso. Esem diba Lodee Yesu mapoo hedebe doloso dobolone, tei too kibiloso badalame, yayo dimapoo kokodo takaso. Esem Banabaseeye to takomo silee diayo duloso to omapoo tei teme, tei too odoo bei moodooso.

<sup>25</sup> Esem Banabas Talesas mi mapoo Solo esiamo diso.

<sup>26</sup> Yayo Solo ogoloso see Antiyoka mi mapoo ido simiso. Osoloso dugo hedebe ma kulodu obakadio tei telaga odoo sabolo badolone, Godeeyo goo eligimeleeso. Esiga Antiyoka mi mapoo odoo susuga oso

daga malalo takolone tei telaga odoo ee Kelisowo odoo deliso.

<sup>27</sup> Esemé Banabas dío Solo dío Antiyoka mi omapoo osee doboome, Godee maga to toloso kokodo takomo silesibili odoo abo oso Yelusalem mi maga mi hamapoo sibadeeso.

<sup>28</sup> Esiga dima kulodu odoo hee, o hu Agabus, yayo dibolo sileeso. Esiga yayo Dio Tei oso kitulugu maga egeese takaso, “Mi susuga mapoo dala goo oso siboga, nei nali bi mauwe pagalaiso,” diso. (Esiga daga hoogoo goo hagoso Sisa-Kolodiyaseeye Loum mi toowa wiligi doloso badebei biame omapoo hodia goo toowa hageesi oso peledabaso.)

<sup>29</sup> Esemé Antiyoka mi mapoo debeli tei telaga odoo oso emegei Yudiya mi toowa mapoo debeli odoo ee pidilame molee mooloogooso. Egeesi ma kulodu bi bei odoo oso molee toowaso pidiso. Osoloso bi pepooko melee odoo oso molee pepookoso pidiso.

<sup>30</sup> Osoloso diayo molee ee toloso Banabas dío Solo dío dimapoo teneeso. Esemé diayo Yelusalem mi mapoo tei telaga wiligi odoo tebisa mapoo todiso.

## 12

### *Helodeeye tei telaga odoo dimapoo dala tenee goo*

<sup>1</sup> Biame omapoo Yu odoowo wiligi odoo taba Helodee-Agilipaye tei telaga odoo abo toloso dimapoo dala tenelone badebeiso.

<sup>2</sup> Egeeseelone yayo diye di odoo hee Yoneeyo emei Yemes toloso odoo mapoo tenelone, kaiya sage oso wooloomo diso. Esemé diayo Yemes wooloomaso.

<sup>3</sup> Esemé Yu odoo oso goo hagee ogoloso goomogolone tekepo dee takeme, Helodeeye odoo mapoo Pita onosee wooloomalame te doloso takeme, diayo Pita tooso. Goo moodoo hagee Isipi mi maga peegoo

di ee gooleebugu wo nali biame mapoo ka moodoo.

<sup>4</sup> Helodeeye goomogaso, Godeeye gababia wo nali biame ee daga dilesi, odoo howo woola mapoo goo midiloso ka wooloomalame, Pita yo epedee neliga moso mapoo toosooso. Osoloso o ha teli odoo 16 gili-madoloso diayo Pita medee gibadebee, diso.

<sup>5</sup> Esino Pita yo neliga moso ma kulodu badoboome, tei telaga odoo oso yo Godee mapoo takolone debeiso.

<sup>6</sup> Helodeeye Pita neliga moso tegei ma kuloduga peegoo tamagoloso, odoo susuga eyo howo woola goo midilei biame godigi molome gesi omapoo, ha teli odoo bakadio oso Pita gitilone, Pitayo dee hodio sabolo, ha teli odoo eyo dee hodio sabolo, ki ti oso tialogoo, osoloso ha teli odoo hee eyo dee sabolo, Pitayo dee sabolo, ki ti oso tialogoo doloso tiesaso. Osoloso ha teli odoo abo oso osulu miyopoo gidebeiso.

<sup>7</sup> Esemé epedee omapoo Godeeyo momaiye oso Pita mapoo sibilesi peledabaso. Esemé gadeebugu oso neliga moso eyo kulodu gadee magoo meleeso. Osoloso Godeeyo momaiye oso Pita tidilone egeese takaso, “Pita, no saga tebee,” diso. Esemé ki ti oso o dee sabolo ha teli odoo dibada dee sabolo tiegisamelee eyo mosoowe pidiga poogooso.

<sup>8</sup> Esemé Godeeyo momaiye oso Pita mapoo egeese takaso, “No toboloso nee dugo kolaiyoga gidili ee boolooma doloso nee homo mapoo kali bi ke,” diso. Esemé Pitaye bi egee kalagaso. Osoloso momaiye oso Pita mapoo see egeese takaso, “Nee dugo sage kaloso abolo sibe,” diso.

<sup>9</sup> Esemé Pitaye Godeeyo momaiye sabolo neliga moso tegei debi gooboo ma kuloduga peegoo dulone, Pitaye goo hagee ogoloso gooleeso, Godeeye o howo opusomo doloso goo hagee ka ogo diso.

<sup>10</sup> Diayo egeeseelone, Godeeyo momaiye sabolo osulu gidebeli



odoo bakadio oso gidoboome, diba galagadiso. Esino diayo diba egele. Osoloso diba see ki biso moodoo osulu oso kisi hamameedee omapoo dilesos tebisa molome, osulu egee eyo mosoowe yamagooso. Esem dib neliga moso ma kuloduga peegoo galagadilesos dumolome, Godeeyo momaiye omapoo osugoboodooso.

<sup>11</sup> Esem hamamee Pitaye goo omapoo ogoloso gooleedolosos eyo nediliyo egeesee takaso, “O, goo hagee teidoo. Esiga a epedee gooleedosos, Godeeye o momaiye ee amapoo sibe diso, yayo a Helodeeyo dee maga idolosos peegoo peledabalame. Esiga epedee Helodeeye Yu odoowo mudugiyopoo a wooloomalame,” diso.

<sup>12</sup> Esem yayo egeesee goolee sabolo Yonee-Makayo owee Meliyo mosopoo dilesos palaso. Moso egee ma kulodu odoo susuga osos mooloogoodolosos dobolone Godee mapoo takemeleeso.

<sup>13</sup> Esem Pitaye dilesos osulu mapoo kalamadime, moso ee ma kulodu tou teli sobo obuo, o hu Loda, yayo osulu mapoo odoo agayo kalamadia belesos agalame diso.

<sup>14</sup> Yayo osulu yilame dulone duno, Pitayo to dulosos gooleedolosos diya goomogolone, osulu yilega see moso kulodu gasibilesos, odoo susuga mapoo egeesee takaso, “Pita osulu miyopoo tobudo!” diso.

<sup>15</sup> Esino odoo susuga osos to ee dulosos nei yimapoo egeesee takaso, “No boobadolone ka takoo,” diso. Esino yayo goo egee taka koodobillega osee takemeleeso. Esem diayo egeesee takaso, “Egee Pitanee, esino egee Godeeyo momaiye Pita yo bali osos malaiso,” diso.

<sup>16</sup> Pita yo peegoo osee tobudulone osulu mapoo osee kalamadimeleeso. Esem odoo susuga sibilesos, osulu yimagolosos egeinos, Pita ogolosos diya howoogadooso.

<sup>17</sup> Esem Pitaye diba to kesamelee koodobilame deeso wabisasos. Os-

olosos Godeeye yo neliga moso maga idolosos peegoo di goo ee dimapoo oposusos. Osolosos yayos see egeesee takasos, “Tei telaga odoowo wiligi odoo taba Yemes sabolos, tei telaga odoo abo sabolos mapoo goo hagee takee,” diso. Esem Pitaye to hagee takolosos see mi hee mapoo diso.

<sup>18</sup> Gesikolodee mapoo ha teli odoo Pita gidebei osos Pita mauwe molo ogolosos goo diya tiadolone ebigasos.

<sup>19</sup> Esem Helodeeye o odoo sabolos Pita diya esiasos. Esino diayo Pita egele poogoome, see wedige dilesos, Pita gidebei odoo mapoo woosasos. Esem yayo odoo abo mapoo takolone Pita gidebei odoo ee piligi diso. Goo osos dilesos koodobumes, Helodeeye Yudiya mi poogolosos see Kasaliya mi mapoo badalame diso.

#### *Helodee-Agilipaye ta*

<sup>20</sup> Esino Helodee yayo Kasaliya mi mapoo badolone, Taya mosobia odoo sabolos, osolosos Saidon mosobia odoo sabolos, mapoo diya komonolone badebeisos. Esem Taya mosobia odoo sabolos, Saidon mosobia odoo sabolos, mesilosos badalame Helodee sabolos to meilame, Helodee mapoo diso. Bei, diba Helodeeyo mi toowa mapoo nei nali ka teli. Bei, Helodeeye dimapoo kamana sabolos osee badogas, diayo nei talai hamaga takeeyagas, Helodeebolos to meilame sibadeesos. Osolosos diayo sibilesos Helodeeyo mosos gibadeli odoo, o hu Balastus, sabolos emegei diso. Yo dibolos tobolosos dibada goo ee Helodee sabolos to tekepo ka moodoolame.

<sup>21</sup> Esem Helodeeye dibolos to meilame biame magoosos. Osolosos biame omapoo Helodeeye dibolos to meilame, yayo wiligi odoo taba osos kali dugo tekepo kalosos, wiligi odoo taba osos badeli debi mapoo biasos. Osolosos yayos badolone odoo susuga mapoo to takasos.

<sup>22</sup> Yayo to taka koodobumes, odoo susuga osos goomogolone to neligidi takolone, diso dimapoo egeesee

takaso, “Odoos hagee Godeeye to kei masi keliso, yo edebeeयो to kei masi koo keli!” diso.

<sup>23</sup> Esino goo hamaga Helodeeye Godeeyo hu dokodoo poudile. Hedebe o hu ee dokodoo poudooso. Esemee Godeeyo momaiye oso yimapoo paiye saga teneeso. Esemee seeso o su nadoloso taso.

<sup>24</sup> Esino tei telaga odoos oso Godeeyo to mi susuga mapoo takomo dime, odoos susuga oso to ee dulosoo to mapoo tei teme, tei telaga odoos bei moodooso.

<sup>25</sup> Esemee Banabas dio Solo dio Antiyoka mi mapoo tei telaga odoos oso molee mooloogoo ee tosibileso, Yelusalem mi mapoo tei telaga wiligi odoos tebisa dimapoo teneloso, see Antiyoka mi mapoo wedi dulone diayo Yonee-Maka ido diso.

## 13

### *Banabas dio Solo dio diye di goo*

<sup>1</sup> Antiyoka mi mapoo tei telaga odoos oso mooloogoodoloso, debee ma kulodu Godee maga to tolosoo kokodo takomo silesibili odoos sabolo Godeeyo goo ee eligili odoos ee dibada hu hagoso: Banabas, osoloso Simiyon (o hu hee Nigele), osoloso Kulene odoos Lukiyas, osoloso Manayen (wiligi odoos taba Helodee dio hodobo kauwa), osoloso Solo.

<sup>2</sup> Diba nei teyuloso, Godeeyo hu dokodoo poudoolone doboome, Dio Tei oso dimapoo egeesee takaso, “Banabas dio Solo dio idoloso tou ayo hesia ee talame diba diye dee takee,” diso.

<sup>3</sup> Esemee diayo nei teyuloso dobolone, Godee mapoo takemelee koodobuloso, Banabas dio Solo dio mapoo dibada deeso sigeso. Bei, diayo Godeeye kitulugu tolosoo o tou talame. Osoloso diba Godeeyo tou talame diye diso.

### *Banabas dio Solo dio Saiples mi te mapoo diye di goo*

<sup>4-5</sup> Banabas dio Solo dio Dio Tei oso diye dee takeme, Selukiya mi omaga du toowa tolosoo Saiples mi te mapoo dulone, diba pidili odoos Yonee-Maka idoloso diso. Diba sibileso Saiples mi te mapoo mi hee eyo hu Salami mi mapoo du oluguso. Osoloso diayo mi omapoo dobolone, Yu odoowo howo gisili moso mapoo peleso Godeeyo to takoo demeleso.

<sup>6-8</sup> Osoloso mi te omapoo osee silesibulone, mi hee Papos mapoo dileso peledabaso. Diba mi omapoo egeino, Yu odoos hee googoo sabolo badoboome egeiso. O hu Bale-Yesu (o hu hee Guliki dia toso hedi Elimas). Yayo mi omapoo gameenee goo eligili odoos badebeiso. Mi te eyo wiligi odoos taba Selegiyas-Polus eyo odoos. Mi te eyo wiligi odoos taba yo goo goolee medee tekepo. Esiga yayo Godeeyo to dulame goomogolone, Banabas dio Solo dio ime simiso. Esino googoo gooleedoo odoos Elimas yayo gowoolone, wiligi odoos taba oso Godeeyo to dulosoo, Yesu mapoo tei talai goomegele. Esemee yayo Banabas dio Solo dio Godeeyo to takeeyaga gowoolone hamaga takaso.

<sup>9</sup> Esino biame omapoo Solo, o hu hee Polo, Dio Tei oso kitulugu tolosoo badolone, googoo gooleedoo odoos Elimas yimapoo howo hooda tulugu bolone

<sup>10</sup> egeesee takaso, “No Saiteneeyo owolo! Nayo goo tekepo susuga mapoo ha teliso. Nayo biame susuga ma kulodu odoos susuga mapoo wulo kukuliso. Esiga nayo Godeeyo goo maga tei goodee, ee see opusomo dee na see.

<sup>11</sup> Esiga epedee Godeeye no dala tenelaiso. Epedee no howo bakadio siloso molone, biame abo ma kulodu bi susuga agalaime,” diso. Esemee biame omapoo neliga oso o howo mapoo gidiseme, o howo siso. Esemee yo odoos heeso eli eligilame odoos esiamo sileeso.

<sup>12</sup> Esemee wiligi odoos taba oso Eli-

mas mapoo goo moodoo ee ogoloso, yayo Lodee Yesu mapoo tei tooso. Bei, yayo Polo dio Banabas dio Lodee Yesuwo goo kitulugu sabolo eligi ogoloso howoodooso.

*Poloye Pisidiya mi Antiyoka mapoo Godeeyo to taka*

<sup>13</sup> Osoloso Polo sabolo, odo yibolo sibadee sabolo, Papos mi maga du toowa toloso abei toowa daloso see Pampiliya mi toowa mapoo sibilesi peledabaso. Mi toowa ma kulodu mi hu Pelega mapoo dibada du oluguso. Esem biame omapoo Yonee-Maka diba poogoloso see Yelusalem mapoo wedi diso.

<sup>14</sup> Osoloso Polo dio Banabas dio Pelega mi maga see mili Pisidiya mi Antiyoka mapoo dileso peledabaso. Diba omapoo dileso dobolone, Yu odoowo hasali biame omapoo, diba howo gisilame, Yu odoowo howo gisili moso ma kulodu peleso bulumaso.

<sup>15</sup> Esem howo gisili moso wiligi odo tebisa oso Moseeeye eligi goo hogugu sabolo, osoloso Godee maga to toloso kokodo takomo silesibili odo oso hogugu goo sabolo, odo susuga mapoo hesigaso. Osoloso see Polo dio Banabas dio mapoo egeese takaso, "Emegei, niyo imapoo pidi to takalai mologa, takee," diso.

<sup>16</sup> Osoloso Polo toboloso diayo to kesamelee ee koodobilame o deeso wabisulone egeese takaso, "Emegei, Isalael odo sabolo, Yu odoonee Godee mapoo mesili odo sabolo, niba mo to hagee dui!

<sup>17</sup> Isalael odo ibada Godeeye ibada amawe dio hesiaso. Osoloso diba Isipi mi mapoo doboome, Godeeye diba medee gibadebeiso. Esem Isalael odo oso bei moodooso, Esem Godeeye kitulugu sabolo Isipi mi maga diba gilimadoloso peegoo diso.

<sup>18</sup> Osoloso diba dugo 40 ma kulodu miwe poogoo mapoo silesibulone, Godee mapoo diayo gowooloso yimaga miligi pialoso silesibiso, esino Godeeye diba pegele.

<sup>19</sup> Esem Godeeye Keinen mi ma kulodu to opusomo opusomo di ke-sali 7 mosobia odo susuga peegoo hasiso buguloso, dibada mi peedee buguloso, see o odo Isalael odo imapoo teneeso.

<sup>20-21</sup> Esem ibada amawe dio oso Isipi mi mapoo dobooso see mi hagee talame sibadee, dugo 450 poogooso. Osoloso ibada amawe dio oso omapoo osee doboome, Godeeye goo midili odo hesiaso, diba gibadalame. Esino hamamee Godee maga to toloso kokodo takomo sili odo Semuweleeye badebei biame omapoo Isalael odo see goomogaso, diba gibadalai wiligi odo taba talame. Esem Godeeye Benjamin eyo bala ma kulodu odo hee Kiseeyo owolo Solo wiligi odo tabalame hesiaso. Esem Soloye dugo 40 ma kulodu Isalael odoowo wiligi odo toboloso badebeiso.

<sup>22</sup> Esem Godeeye Solo gowoolone peegoo poogooso. Osoloso see Yesiyo owolo Deibidiye dibada wiligi odo tabalame hesiaso. Esem Godeeye Deibidiyo goo maga egeese takaso, 'Ayo Yesiyo owolo Deibidi mapoo ogoloso goomogoso. Bei, yayo ayo goomoga goo susuga ee talaiso.'

<sup>23</sup> Esiga Godeeye daga hoogoo to takoloso magolone egeese takaso, 'Deibidiyo amawe dima kuloduga Isalael odo dibada gie badeli pidili odo sibileiso.' Esiga odo ee olo simiso. Yo Yesu.

<sup>24</sup> Esino Yesu sibilega molome, daga Yoneeye sibilesi Isalael odo susuga mapoo Godeeyo to takomo silone egeese takaso, 'Niba goo su wuduloso nibada goo tokenee maga miligi pialoso howo ogusige,' diso.

<sup>25</sup> Osoloso Yoneeye o tou hoo pagalame dulone egeesee takomo sileeso, 'Niyo a odoo ogu deliyo? Godeeye hesia Keliso asonee. Esino yo ama hamamee sibileiso. Yayo kitulugu toowa ayo kitulugu yayo dagadi. Esiga a tekeponee, o homo bei mapoo gauwuloso o homo bi tiga-magalai,' diso."

<sup>26</sup> Poloye see egeesee takaso, "Emegei, Eibalaham eyo amawe dio (Yu odoo) nibolo, osoloso Yu odoonee Godee mapoo mesili odoo, niba mo to dui! Gie badeli pidili goo hamaga to ee imapoo teneeso.

<sup>27-28</sup> Esino Yelusalem mi mapoo debeli Yu odoo sabolo, dia wiligi odoo tebisa sabolo oso Yesu yo kibiya hoodo egele. Esiga diayo Yesu yo wooloomalame goomogaso. Osoloso diayo goo mauwe dileso Paillet mapoo Yesu wooloom-eye doloso tiasooso. Diayo goo hagee tomo silee ee Godee maga to toloso kokodo takomo silesibili odoo oso daga hogugu sabolo teibaso. O, esiga goolee, Yu odoowo hasali biame susuga mapoo wiligi odoo tebisa oso, Yu odoowo howo gisili moso kulodu to hogugu ee hesigeliso. Esino diayo goo eyo bei kibiya gooleedele.

<sup>29</sup> Esiga Godee maga to toloso kokodo takomo silesibili odoo oso Yesuwo goo mapoo taka goo susuga oso dileso hosudoloso, diayo Yesu yo homo bulubo magoo dokodooga tomeileso wulu ma kulodu magooso.

<sup>30</sup> Esino Godeeye yo ta maga see hogadiso.

<sup>31</sup> Osoloso hamamee biame bei ee ma kulodu Yesu yo telega Gelili mi maga Yelusalem mi mapoo yibolo sibadee odoo dimapoo o su eligimo sileeso. Osoloso odoo egee bia oso diayo Yesu ta maga hogabuloso silee ogoloso goo ee, ibada odoo Yu bia odoo mapoo takomo ka siloso.

<sup>32-33</sup> Esiga iyo to tekepo nimapoo tosimiso. Osoloso daga Godeeye ibada amawe dio sabolo to magoo

goo oso yayo owolo Yesu ta maga see hogadi eyo goo maga epedee dibada amawe dio imapoo peled-abaso. Esiga Sam booka ma kulodu, Sam bakadio mapoo Godeeye Yesuwo goo maga egeesee takooso, 'No mo holo deeso.

Epei ayo no moma deeso.'

<sup>34</sup> Osoloso Godeeye Yesu ta maga hogadiso. Esiga Godeeyo owolo Yesu see talaime. Goo hamaga Godeeye egeesee takaso,

'Ayo daga Deibidi mapoo to magoo sabolo tei pidili goo ee nimapoo tenelaiso,' diso.

<sup>35</sup> Osoloso Godeeye Sam hee mapoo egeesee takaso,

'Nayo hesia odoo eyo su midoo ma kulodu hunuleime,' diso.

<sup>36</sup> Esino Godeeyo to hagee Deibidiyo goo takele. Bei, Deibidiye Godeeyo tou susuga tomo siloso hosudoloso taso. Esememe o su ee amawe dio midoosoo pee mapoo midoosoo. Osoloso o su omapoo huneso.

<sup>37</sup> Esino Yesu o su ee midoo ma kulodu molone hunule. Bei, Godeeye yo ta maga hogadiso.

<sup>38-39</sup> Esiga emegei, niba iyo to hagee taka medee dui! Bei, Yesuye ta maga nibada goo tokenee hapoloso boobado bigileiso. Esino Moseseeye eligi goo oso nibada goo tokenee susuga hapalaime. Esino edebeeyo Yesu mapoo tei toga, yo o goo tokenee susuga hapoloso, Godeeyo howo woola yo tekepo palaiso.

<sup>40</sup> Esiga niba mo to medee kibiya toloso tei too ma kulodu debee. Niyo mo to medee tele poogooga, Godee maga to toloso kokodo takomo silesibili odoo oso taka goo hagoso nimapoo sibileiso. Bei, diayo Godeeyo booka mapoo hageesee hoguguso,

<sup>41</sup> Godeeye egeesee takooso,

'Niyo debei domo omapoo ayo goo toowa moodoolaiso.



Esino niyo goo hagee ogoloso tei talaime.

Osoloso odoo heeso goo hageeyo bei nimapoo takooga,  
niyo medee tei talaime.

Esiga mo to mapoo manali odoo niba goo hagee ogoloso howoogadalaiso.

Esino niba wedileiso, 'diso.'

<sup>42</sup> Osoloso Poloye to takoloso koodobume, Polo dio Banabas dio howo gisili moso maga meiyadaga molome, odoo aboso sibilesa dimapoo egeesee takaso, "Niba see hasali biame heeso niyo to taka goo hagee see medee takalame sibadee!" diso.

<sup>43</sup> Gooloogoo oso dilesa koodobume, odoo susuga oso dia moso mapoo diyadeeso. Esem Yu odoo abo sabolo, osoloso Yu odoonee oso, Yu odoowo Godee mapoo tei teli odoo abo sabolo, Polo dio Banabas dio diyadaga molome hamamee diyadeeso. Esem Polo dio Banabas dio dimapoo egeesee takaso, "Niba Godeeye sooloo dolone pidili ee ma kulodu debee," diso.

<sup>44</sup> Osoloso hasali biame heeso mosobia odoo susuga oso Godeeyo to Yesuwo goo maga taka ee dulame sibadeeso.

<sup>45</sup> Esem Yu bia oso odoo gooloo-goo toowa ogoloso Polo dio Banabas dio mapoo diya kooso. Osoloso Poloye Godeeyo to takomolome, diayo tebisaloso, Polowo to su maga gamenee goo takoo doloso, diayo Polowo goo maga to tokenee takaso.

<sup>46</sup> Esino Polo dio Banabas dio ebi-lega to nei dimapoo egeesee takaso, "Godeeye to kitulugu sabolo imapoo taka, malalo nimapoo Godeeyo to Yesuwo goo ee takalaiso. Esino niyo gie badeli talai gowooso. Esiga iyo niba poogoloso see Yu odoonee mapoo Godeeyo to takomo silesibileiso.

<sup>47</sup> Bei, Godeeye o odoo yimaga to toloso kokodo takomo sili odoo hee maga Isalael odoo imapoo to kitulugu sabolo hageesee takaso,

'Ayo niba Yu odoonee dima kulodu gadeebugu masi badalame hesiaso.

Esiga niyo gie badeli goo ee mipoo toowa hamapoo debeli odoo susuga mapoo takomo dilame.'

<sup>48</sup> Esem Yu odoonee oso Poloye to taka duloso goomogolone, Lodeeyo goo taka ee tekepo diso. Osoloso dima kulodu Godeeye gie badalame hesia odoo susuga oso tei tooso.

<sup>49</sup> Esem mi omapoo odoo susuga oso Godeeyo to ee dulugamo diso.

<sup>50</sup> Esino Yu odoo oso Polo dio Banabas dio dimapoo heiga toowa molone, diayo dilesa Godee mapoo mesili Yu sobonee hu toowa too sabolo, osoloso mosobia eyo wiligi odoo tebisa sabolo, oso kamanalame Polo dia goo maga dimapoo gamenee takaso. Esem diayo Polo dimapoo dala teneloso mi omaga peegoo hasiso buguso.

<sup>51</sup> Egeeseme Polo dio Banabas dio see Ikoniyum mi mapoo dilame dobolone, diayo wudu taka eligilone, Godeeye diba poogolone dimapoo dala tenelaiso dolone, dia homo mapoo basago tidadoo Yu odoowo howo woola mapoo taso.

<sup>52</sup> Esino tei telaga odoo diba Dio Tei oso kitulugu toloso dobolone, diya goomogaso.

## 14

### *Polo dio Banabas dio Ikoniyome mi mapoo debei*

<sup>1</sup> Ikoniyum mi mapoo Polo dio Banabas dio Yu odoowo howo gisili moso mapoo Godeeyo to takalame palaso. Omapoo diayo to kitulugu sabolo Yesuwo goo taka duloso, Yu odoo susuga sabolo, osoloso Guliki odoo susuga oso, Lodee mapoo tei tooso.

<sup>2</sup> Esino Yu odoo abo oso Poloye Yesuwo goo taka talai gowoolone, Yu odoonee dimapoo Polowo goo ee gamenee takomo silesibiso, Yu

odoonee oso tei telaga odoo mapoo kamanalame.

<sup>3</sup> Esino ee ma kulodu, Polo dio Banabas dio Ikoniyome mapoo biame kolopo sage debeiso. Diba omapoo dobolone ebilega, Godeeye sooloo dolone pidili eyo goo ee odoo mapoo takolone debeiso. Esem eedebeeyo dibada to mapoo tei talame, Lodeeye Polo dio Banabas dio mapoo goo toowa opusomo opusomo di talame kitulugu teneeso.

<sup>4</sup> Egeeseeme mosobia ma kulodu odoo abo oso domo pee toowa meleeso. Odo abo oso diye di odoo Polo dibolo tooboo, osoloso odoo abo oso Yu odoo sabolo tooboo diso.

<sup>5</sup> Osoloso ee ma kulodu Yu odoo sabolo tebisa, Yu odoonee sabolo, osoloso Yu odoo sabolo, osoloso dibada wiligi odoo tebisa sabolo, Polo dimapoo yoso enigaloso wooloomalame to tekepo moodoso.

<sup>6-7</sup> Esem Polo dio Banabas dio to hagee duloso Likaoniya mi toowa mapoo kukulo diso. Osoloso omapoo kukulo dileso dobolone, Listala mi sabolo, osoloso Delebe mi sabolo, osoloso mi pepuso abo sabolo omapoo Yesuwo goo maga to tekepo takomo silesibiso.

*Polo dio Banabas dio see Listala mapoo dileso debei*

<sup>8</sup> Osoloso Listala mi ee ma kulodu odoo hee oweeye soomagolone homo bidiga magoo sabolo sooma-gooso. Esiga yo koo sili.

<sup>9</sup> Esino yo badolone Poloye Godeeyo to takomolome medee dulone badebeiso. Poloye odoo homo bidiga magoo mapoo bolone gooleeso, yayo tei toso, Godeeye yo tekepo palame, diso.

<sup>10</sup> Osoloso Poloye yimapoo to neligidi egeese takaso, “No tebee!” diso. Esem yo toboloso sileeso.

<sup>11</sup> Esino odoo mooloogoodoo oso Poloye odoo tekepo moodoo ogoloso to neligidi takolone Likaoniya toso egeese takemeleeso, “Ibada godeeye odoo masi poloso kei ma

dokodooga imapoo ka simidoo,” diso.

<sup>12</sup> Egeeseelone diayo Banabas yo dibada gamenee godee toowa Sus hu hediso. Osoloso Polo yo gameenee godee hee Sus o to tosili odoo Helemes hu hediso. Bei, Poloye biame susuga to takomo sileeso.

<sup>13</sup> Esino mosobia odoo dia godee Sus eyo tei moso ee mosobia beele peegoo eyo tegei meleeso. Esiga Sus godeeyo tei moso wiligi odoo taba oso bulumakau be hu sabolo, palapalawa sabolo, toloso sibileso beele osulu mapoo maso. Bei, yibolo osoloso mosobia odoo sabolo goomogaso, Polo dio Banabas dio mapoo goomogolone, be hu woolame. Bei, diayo goolee Polo diba godee bele dolone.

<sup>14</sup> Esino Polo dio Banabas dio goo hagee duloso diayo gowe goo ee odoo mapoo eligilone dibada dugo tologo buguso. Osoloso odoo ma kulodu hoguo silesibulone to neligidi egeese takomo silesibiso,

<sup>15</sup> “Emegei, niyo kasi maga goo hageesi imapoo ka moodala? Bei, iba mi odoo, niba egeesi masiso. Esiga iyo nimapoo to tekepo teneeso, niyo gamenee godee ee poogoloso see gie badeli Godee mapoo tei talame. Bei, yayo kei sabolo, osoloso mipoo sabolo, osoloso abei sabolo, osoloso bi susuga ee ma kulodu egee molo sabolo moodoso.

<sup>16</sup> Osoloso Godeeye daga edebeeyo diso goomoga goo tomo silesibume, ogoloso hamaga takele.

<sup>17</sup> Esino niyo ee ma kulodu do-boome, Godeeye yayo sooloo dala goo ee eligilone, kei ma dokodooga howo teneliso, osoloso nei nali bi segei oso tekepo palame pidiliso. Osoloso nimapoo nei nali bi toowa teneloso, see nimapoo goomoga teneliso. Esiga Godeeye eyo nediliyo o goo yilige bugulone goo susuga hagee nimapoo teneliso,” diso.

<sup>18</sup> Polo dio Banabas dio to hagee

takeme, mosobia odo oso bu-lumakau be hu wooloso goomoga dimapoo tenelame seme, Polo diayo hamaga takeme, diba hegi moodooso. Esino dimapoo tenele.

<sup>19</sup> Esino Yu bia odo abo Pisidiya mi Antiyoka maga, osoloso Ikoniyum maga sibadeeso. Diayo sibilesos mosobia odo oso kamanalame, Polowo goo maga gamenee takaso. Esem odo aboso kamanaloso, Polo yo yoso enigaloso, mosobia peegoo gisibado dileso magooso. Esem diayo Polo yo olo woolooma gooleeso.

<sup>20</sup> Esino tei telaga odo oso Poloye tiamelee mapoo dileso mooloogoo doloso doboome, Polo yo hogabuloso tabaso. Esem hodobo mosobia ma kulodu wedi sibadeeso. Osoloso biame hee mapoo Polo dio Banabas dio Delebe mi mapoo diyadeeso.

*Polo dio Banabas dio see Siliya mi Antiyoka mapoo wedi di*

<sup>21-22</sup> Polo dio Banabas dio see Delebe mi mapoo to tekepo takomo silesibume, odo susuga oso tei tooso. Osoloso diba see Delebe mi maga see mi abo Listala sabolo, osoloso Ikoniyum sabolo, osoloso Pisidiya mi Antiyoka mapoo tei telaga odo see tobu Godeeyo to sabolo pidimo silesibilame diso, diayo tei too ma kulodu dobolone kibiya dabalame. Egeeseelone diayo egeese takomo silesibiso, “Tei toloso badalai goo ee diya kodia. Esiga tei telaga odo oso dala ma kuloduga Godeeye wiligi doloso badeli mapoo gasibileiso,” diso.

<sup>23</sup> Osoloso Polo dio Banabas dio oso sosee susuga mapoo wiligi odo tebisalame hesigamo diyadeeso. Osoloso nei teyuloso dobolone, diba Lodeeyo dee mapoo magalame Godee mapoo takeliso. Bei, diba Lodee mapoo tei tooso.

<sup>24-25</sup> Osoloso diba Pisidiya mi maga see Pampiliya mi Pelega mapoo sibadeeso. Omapoo Godeeyo to

takoloso koodobuloso see Ataliya mi mapoo mouso.

<sup>26</sup> Osoloso Ataliya mi maga du toloso see Siliya mi Antiyoka mapoo soowaso. Osoloso mi hamapoo daga tei telaga odo oso Polo dio Banabas dio diba toloso, mi abo mapoo Godeeyo to takomo diye dolone egeese takaso, “Godeeye niba sooloo dolone pidiye dee,” diso. Esem diayo Godeeyo to olo toloso mi abo mapoo dileso siloso tou hosudoome, see wedi sibilesos dibada mi Antiyoka mapoo peledabaso.

<sup>27</sup> Osoloso Polo dio Banabas dio sibilesos Antiyoka mapoo peledoboloso tei telaga odo susuga gilimadoloso hodobo gooloogoooso. Osoloso diayo Godeeyo to toloso mi susuga mapoo takomo silone, diayo goo tomo sileeme, Godeeye diba pidi goo ee odo mapoo oposusoso. Osoloso Godeeye Yu odoonee oso tei talai osulu yamagoo goo sabolo oposusoso.

<sup>28</sup> Osoloso koodobuloso Polo dio Banabas dio tei telaga odo sabolo mi omapoo biame kolopo sage debeiso.

## 15

*Yelusalem mapoo Yu odoonee dia goo maga to mou*

<sup>1</sup> Osoloso egeesi ma kulodu, odo abo oso Yudiya mi maga Antiyoka mi mapoo sibilesos, Yu odoonee tei telaga odo mapoo eligilone egeese takaso, “Niba Moseseeye imapoo kolo koolai goo eligi, ee dedelega poogooga, niba gie badeli talaime,” diso.

<sup>2</sup> Esem Polo dio Banabas dio eligi hagee duloso gowoolone dibolo toso diya agadigaso. Egeeseeme sosee odo oso Polo dio Banabas dio, osoloso tei telaga odo abo sabolo, toloso Yelusalem mapoo diye diso, diayo dileso diye di odo sabolo, osoloso Yelusalem sosee eyo wiligi

odoo tebisa sabolo, goo hamaga to medee meilame.

<sup>3</sup> Diba sosee odoo oso diye deme diyadulone, Ponesiya mi maga osoloso Samaliya mi maga diyadeeso. Omapoo diyadulone, sosee odoo susuga mapoo Yu odoonee oso dibada gamenee godee poogoloso, see Yesu mapoo tei too goo ee oposususo. Esememe tei telaga odoo susuga oso goo hagee duloso diya goomogaso.

<sup>4</sup> Esiga diayo sibilesa Yelusalem mapoo peledoboome, soseeyo wiligi odoo tebisa sabolo, osoloso tei telaga odoo susuga oso diba ogoloso diya goomogaso. Esememe Polo dio Banabas dio Godeeye dimaga tou too goo ee oposususo.

<sup>5</sup> Esino tei telaga odoo abo Pelisi odoo gooloogoo ma kuloduga tebisaloso egeesee takaso, “Niyo Yu odoonee tei telaga odoo mapoo to kitulugu sabolo takee, ‘Diba odoo heeso dibada kolo kooloso Moseeeye eligi goo ee deede,’ dee takee,” diso.

<sup>6</sup> Egeeseeme diye di odoo sabolo, sosee wiligi odoo tebisa sabolo, to hagee eyo bei medee to meilame hodobo mooloogoodooso.

<sup>7</sup> Biame sage ma kulodu goo hagee to moumeleso Pitaye toboloso egeesee takaso, “Emegei niba goolee! Daga Godeeye nima kuloduga, ayo Yu odoonee mapoo to tekepo takomo dilame, a hesiaso. Esememe diayo amaga Godeeyo to duloso tei tooso.

<sup>8</sup> Esememe Godee, odoo sooloo ma kulodu egeli oso Yu odoonee oso tei too goo hagee ogoloso, tekepo diso. Bei, yayo goo hagee tei dolone, Dio Tei ee imapoo tenee egeesi masi dimapoo teneeso.

<sup>9</sup> Esiga Godeeyo howo woola mapoo iba Yu odoo sabolo, osoloso Yu odoonee sabolo opusomonee. Esiga diayo tei teme, Godeeye dibada goo tokenee hapoloso boobado buguso.

<sup>10</sup> Niyo Yu odoonee oso Moseeeye eligi goo ee dadalame pupu maga niyo Godeeye kamanalai goomogolo? Niyo egeeseega, niyo dimapoo hegi bi masi kadalame teneeso. Osoloso ibolo ibada amawe dio sabolo hegi bi masi ee kadalai tebilena.

<sup>11</sup> Esino iba tei toso, ibada Lodee Yesuye imapoo sooloo dolone pidi maga gie badeli tenee ee. Egeesi maga Yu odoonee sabolo eli hedebe omaga gie badeli ka toso,” diso.

<sup>12</sup> Esememe gooloogoo toowa oso Pitayo to duloso to mauwe bulumaso. Osoloso diayo to mauwe bulumume, Polo dio Banabas dio Yu odoonee ma kulodu silone, Godeeye dimaga goo toowa opusomo opusomo di moodoo goo ee dimapoo oposususo.

<sup>13</sup> Diayo oposusu koodobume, see Yemeseeye toboloso egeesee takaso, “Emegei, mo to dui!

<sup>14</sup> Saimon-Pitaye imapoo olo takaso, Godeeye daga malalo yayo sooloo dala goo Yu odoonee mapoo eligiso. Esiga Godeeye Yu odoonee dima kuloduga odoo abo yayo owolo dalame hesiaso.

<sup>15</sup> Esiga goo hagoso Godee maga to toloso kokodo takomo silesibili odoo oso taka to sabolo tobuoso. Bei, Godeeyo to booka mapoo Godeeye to taka hogugu egeesee moloso,

<sup>16</sup> ‘Goo hagee koodobuoga, a see wedi sibileiso.

Bei, wiligi odoo Deibidiye gibadebei mi goo ee moso egeesi masi guodobuloso moloso.

Esino ayo sibilesa moodooloso see tobu tegelaiso.

<sup>17</sup> Egeeseega odoo susuga sabolo, osoloso Yu odoonee ayo hesia sabolo, oso Godee amapoo sibileiso.

<sup>18</sup> Esiga odoo abo oso goo hagee gooleedalame Godeeye daga hoogoo takaso.’



<sup>19</sup> Esiga Yu odoonee Godee mapoo gie tei too odoo oso, Moseseeeye eligi goo ee dadalame pupu maga iyo hegi goo dimapoo tenelai, a koo goomogoso.

<sup>20</sup> Esino iyo wulo to hogugu ono Yu odoonee dimapoo tenelone egeesee takalaiso, 'Niba gamenee godee mapoo nali bi tenee toloso na ne. Bei, nali bi egee Godeeyo howo woola olo tokenee paso. Osoloso odoo hee mapoo goo heli na te. Osoloso sawo na ne, osoloso hwei sawo sabolo mologa na ne,' diso.

<sup>21</sup> Esiga Yu odoonee diba kibiya goo hagee dodolone dabalai tekepo. Bei, daga hoogoo Yu odoo oso mi susuga ma kulodu diayo howo gisili moso mapoo goo egeesi na teye dolone woola olo takaso. Bei, diayo Moseseeeye tei hogugu ee hasali biame susuga mapoo odoo mapoo olo hesigaloso eligiliso," diso.

*Yu odoonee tei telaga odoo mapoo to hogugu tenee*

<sup>22</sup> Osoloso diye di odoo sabolo, osoloso sosee wiligi odoo tebisa sabolo, osoloso tei telaga odoo susuga oso goomoga magoloso odoo abo toloso, Polo dio Banabas dio see Antiyoka mapoo diye diso. Egeeseelone diayo wiligi odoo mooloogoodoo ma kuloduga odoo bakadio Yudas-Balasabas dio osoloso Sailesi dio hagee hesigaso.

<sup>23</sup> Esem diayo hodobo Antiyoka mapoo diyadulone to hogugu hagee toloso diyadeeso:

Esiga emegei, iba diye di odoo sabolo, osoloso sosee wiligi odoo tebisa sabolo, to hagee ka hoguga. Esiga iyo to hagee Yu odoonee tei telaga odoo susuga Antiyoka mapoo, osoloso Siliya mapoo, osoloso Kilikiya mapoo debeli odoo nimapoo ka hoguga.

<sup>24</sup> Esiga ibada mooloogoodoo ma kuloduga odoo abo oso dileso nimapoo to abo takeme, niyo goo

tiadoo goo ee iba duso. Esino iyo dimapoo to takeme ka moodele.

<sup>25-27</sup> Esiga iba see Polo dio Banabas dio see nimapoo wedi diye deeso. Bei, odoo hagee bia Lodee Yesu Kelisowo goo mapoo dibada su tenelai koo goweli. Egeesi ma kulodu iyo goomoga maga ibada mooloogoodoo ma kulodu Yudas sabolo, Sailesi sabolo, Polo dio Banabas dio dibolo diye dalame, iyo diba hesiaso. Esiga diayo nimapoo sibilesa to hedebe iyo hogugu hagee takalaiso.

<sup>28</sup> Bei, iba Dio Tei sabolo goo goolee olo hedebe doloso magooso. Esiga iyo nimapoo hegi hee tenelaime. Esino niba wulo goo hedebe hagono deede.

<sup>29</sup> Niba gamenee godee mapoo nali bi tenee toloso na ne. Osoloso sawo na ne, osoloso hwei sawo sabolo mologa na ne. Osoloso odoo hee mapoo goo heli na te.

Niba goo hagee telega doga, niba tekepo dabalaiso. Epe-ee emegei, ibada to oso.

<sup>30</sup> Esiga odoo hagee bia oso to hogugu hagee toloso, Yelusalem maga see Antiyoka mi mapoo diyadeeso. Osoloso diba Antiyoka mapoo dileso peledoboloso, tei telaga odoo susuga gilimadoloso, to hogugu ee dimapoo teneeso.

<sup>31</sup> Esem Antiyoka tei telaga odoo oso pidi to hogugu hagee hesigaloso diya goomogaso.

<sup>32</sup> Osoloso Godee maga to toloso kokodo takomo silesibili odoo Yudas dio Sailesi dio oso, tei telaga odoo mapoo diayo tei too kibilame pidi to takaso.

<sup>33</sup> Osoloso biame abo Antiyoka mapoo dooso, tei telaga odoo oso Yudas dio Sailesi dio see Yelusalem mapoo medee obeeyamo wedi diyadeeye diso.

<sup>34</sup> [Esino Sailesi yo Yudas bolo Yelusalem mapoo wedi dile, esino yo Antiyoka mapoo badebeiso.]\*

**15:20:** Exo 34:15-17; Lev 17:10-16 **15:28:** Mat 23:4 \* **15:34:** To hagee odoo abo oso taka, "Lukaye hogugu," dee takeliso. Esino odoo abo oso taka, "Lukaye hogugule, odoo heeso hamamee hogugu," dee takeliso.

<sup>35</sup> Esem Polo dio Banabas dio An-tiyoka mi mapoo osee dobolone odoo abo sabolo, Godeeyo to Yesuwo goo maga takolone debeiso.

*Polo dio Banabas dio domo pee*

<sup>36</sup> Hamamee biame heeso Poloye Banabas mapoo egeese takaso, “Iba see wedi dilesa, iyo daga Lodeeyo to takomo di mi pepuso susuga ee ogogomo dimo. Bei, tei telaga odoo mi omapoo egee do ee ayo diya gooleega, iyo dilesa diba agalai, a goomogo,” diso.

<sup>37</sup> Esino Banabaseeye Yonee-Maka dibolo ido dilame goomogaso.

<sup>38</sup> Esino Polo yo Yonee-Maka diayo ido dilei tekeponee diso. Bei, diayo daga di ma kulodu Yonee Maka hesiano, yayo o tou dibolo tele poogooso. Bei, Yonee Makaye diba poogoloso Pampiliya mi maga diso.

<sup>39</sup> Esem Polo dio Banabas dio toso diya agadigameleso, hodobo silesibi maga domo puloso diyadeeso. Esem Banabaseeye Yonee-Maka idoloso du toowa maga Saiples mi te mapoo soowaso.

<sup>40</sup> Esem tei telaga odoo oso Poloye Sailesi ido dilame hesime egeese takaso, “Diye, Lodeeye niba sooloo dolone pidiye dee,” diso.

<sup>41</sup> Esem diayo dilesa Siliya mi sabolo, osoloso Kilikiya mi sabolo, omapoo tei telaga odoo mapoo Godeeyo to takomo silesibume, diayo to ee duloso, diayo tei too kibiyaso.

## 16

*Timotiye Polo dio Sailesi dibolo di goo*

<sup>1</sup> Polo dio Sailesi dio Delebe mi mapoo dilesa peledoboloso, see Listala mi mapoo dilesa egeino, tei too odoo hee badoboome egeiso, o hu Timoti. Timotiyo owee ee tei too Yu sobo. Esino ama ee Guliki odoo.

<sup>2</sup> Osoloso tei telaga odoo oso Listala mi mapoo debeli sabolo, Ikoniyum mi mapoo debeli sabolo, oso takolone Timoti yo odoo medee tekepo dee takeliso.

<sup>3</sup> Egeesi ma kulodu Poloye Timotibolo silame goomogaso. Esino Yu odoo susuga omapoo debei oso, Timotiyo ama ee Guliki odoo doloso gooleedooso. Esiga Poloye Yu odoo goomogalame, Yu odoowo adaga dia goo ee dodolone Timoti idoloso kolo kooso.\*

<sup>4</sup> Esem Polo diayo diye di odoo sabolo, osoloso sosee wiligi odoo tebisa sabolo, oso Yelusalem mapoo to hogugu ee odoo susuga oso dadalame mi susuga mapoo to hogugu hagee takomo silesibiso.

<sup>5</sup> Esem biame susuga ee ma kulodu odoo aboso tei teme, tei telaga odoo bei moodoolone, sosee susuga ma kulodu odoo susuga oso tei too kitulugu sabolo debeiso.

*Godeeye Polo Makedoniya mi mapoo diye di*

<sup>6</sup> Poloye o odoo abo sabolo dilesa Asiya mi toowa mapoo Godeeyo to takalai, Dio Tei oso hamaga takaso. Esiga diayo dulone Piligiya mi ogo, osoloso Galesia mi ogo doloso domo omaga diyadaga meleeso.

<sup>7</sup> Osoloso diayo Misiya mi koola mapoo sibilesa peledoboloso, see Bituniya mi mapoo dilame seme, Yesuwo dio oso hamaga takaso.

<sup>8</sup> Esiga diba Misiya mi dagadilesa see Tolowasee mi mapoo mousa.

<sup>9</sup> Diba Tolowasee mi mapoo sibilesa, gesi domopoo Polowo howo opusomo doloso, Makedoniya mapoo badeli odoo egeiso. Odoo oso yimapoo howolone egeese takaso, “No abei daloso Makedoniya mi hamapoo sibilesa iba pidi,” diso.

<sup>10</sup> Polowo howo opusomo doloso melee koodobuloso hamamee, iba Makedoniya mi omapoo dilame

**15:37:** Diye 12:12, 25    **15:38:** Diye 13:13; Kol 4:10    **16:1:** Diye 14:6; 2Tim 1:5    **16:2:** Pil 2:19-22

\* **16:3:** Yu odoowo howo woola mapoo, Timoti yo Yu odoo. Bei, owee Yu sobo. Esiga Yu odoowo adaga dia goo ee dodolone, Timoti o kolo koolai tekepo diso.    **16:4:** Diye 15:23-29    **16:6:** Diye 18:23

mopoodoo dooso. Egeesi ma kulodu, Godeeye iba Makedoniya odoo dimapoo to tekepo takomo diye doloso taka goo ee iba gooleedooso.\*

### *Lidiyaye tei too goo*

<sup>11</sup> Iba du toowa toloso Tolowasee mi poogoloso, Samoteleisee mi te mapoo dalo soowaso. Osoloso omapoo tialoso, biame hee mapoo Neyapolisi mi mapoo soowaso.

<sup>12</sup> Osoloso iba see abaga mili Pili-pai mi mapoo diso. Mi hagee Makedoniya mi eyo kulodu mi toowa hee hagoso. Loum odoo sabolo mi hamapoo debeliso. Osoloso iba biame abo mi hamapoo debeiso.

<sup>13</sup> Osoloso iba Yu odoowo hasali biame mapoo mosobia beele peegoo dileso howo palaga omapoo meiyadeeso. Bei, Yu odoo omapoo howo gisilei malaiso doloso, iba gooleedooso. Esem eiba omapoo meilesosobo abo sabolo mooloogoodoloso omapoo dobolone dimapoo to takemeleeso.

<sup>14</sup> Diayo to ee dulone debei ma kulodu Tayatila mi mapoo badeli sobo hedebe badebeiso, o hu Lidiya. Sobo yo o dugo tia bige odoo abo mapoo nei sabolo teliso. Osoloso yayo Yu odoowo Godee mapoo tei toloso mesiliso. Osoloso Poloye to takomolome, Godeeye sobo hagoso Polowo to mapoo medee tei talame pidiso.

<sup>15</sup> Osoloso yibolo o moso kulodu mapoo debeli odoo sabolo howo ogusigaso. Osoloso yayo iba o moso ma kulodu gilimadolone egeesee takaso, "Niyo a Lodee mapoo tei too sobo daga, niba dileso mo moso ma kulodu debee," diso. Esem yayo egeesee takeme, iba o moso ma kulodu peleso debeiso.

### *Polo dio Sailesi dio neliga moso mapoo toosoo goo*

<sup>16</sup> Biame heeso iba howo gisilame howo palaga maga diyadaga meleen, odoo heeyo tou teli sobo oso iba eli domo tugodooso. Osoloso sobo hagoso sa holo oso yimapoo polome, goo peledabalai odoo mapoo olo malalo takomo siliso. Yayo egeeseemo silone, o gibadeli odoo tebisa eyo molee toowa teliso.

<sup>17</sup> Osoloso sobo hagoso ima hamamee sibulone, to neligidi egeesee takomo sileeso, "Odoo hagee bia dokodoo badeli Godeeyo tou teli odoo oso, esiga diayo epei gie badeli talame ka takomo siloso," diso.

<sup>18</sup> Yayo biame susuga ma kulodu osee takomo siliso. Osoloso yayo osee takomo sileeme, Poloye diya gowoolone, bidi ogolone sa holo o kulodu pala omapoo egeesee takaso, "Ayo Yesu Kelisowo hu maga namapoo ka taka, no yimaga peegoo gadi!" diso. Esem epedee omapoo sa holo oso yimaga peegoo gadiso.

<sup>19-20</sup> Esem sobo ee gibadeli oso diayo molee teli eli pee ogoloso, sibilesi, Polo dio Sailesi dio toloso gamalee odoo mapoo iyado diso. Diayo Polo dio Sailesi dio iyado dileso mosobia domo woola mapoo holoogoloso Loum gamalee odoo dimapoo egeesee takaso, "Odoo hagee bia Yu odoo. Esiga diayo ibada mi hamapoo goo tiadili goo eligimo silesibo.

<sup>21</sup> Esiga diayo eligi goo oso Loum odoo ibada adaga dia tei goo sabolo koo tobuo. Esiga Loum odoo iyo diayo eligi goo ee talai tekeponee," diso.

<sup>22</sup> Egeeseelone mosobia odoo susuga oso Polo dio Sailesi dio diya goweso. Esem gamalee odoo oso dibada odoo mapoo Polo dio Sailesi dio dia dugo ee tologo buguloso, tigamagoloso homosos weeye, diso.

<sup>23</sup> Osoloso gamaleeyo odoo oso diba neligidi wooloogaloso, neliga moso ma kulodu huyasooso. Os-

\* **16:10:** Polobolo Makedoniya mi mapoo diyadee odoo hagoso: Sailesi, Timoti, osoloso Luka (Lukaye Diye Di Odoo booka hagee hoguguso). **16:17:** Maka 1:24 **16:19-20:** Maka 13:9 **16:22:** 2Kol 11:25; 1Tes 2:2

oloso diayo neliga moso gibadeli odoo mapoo egeesee takaso, “Medee gibadebee,” diso.

<sup>24</sup> Esemе yayo egeesee taka duloso, neliga moso gibadeli odoo oso moso kulo hodu osulu kisi ee yamagoloso, Polo dio Sailesi dio moso kulodu iyado dilesos, dibada homo homo ou soduga ma kulodu galaga dilesos kiso kisiso.

<sup>25</sup> Esemе gesi domo mapoo Polo dio Sailesi dio oso Godee mapoo takolone dobolone, yimapoo goomogolone kosaiya poulone debeiso. Esemе mesiya neliga moso tegei ma kulodu debeli odoo abo oso duso.

<sup>26</sup> Esemе epedee omapoo mibia toowa saga simi oso neliga moso hal-abuso. Egeeseme neliga moso osulu susuga yiliga magooso. Osoloso ki ti oso neliga moso ma kulodu debeli odoo tiegisa ee eyo pidiga poogoloso mouso.

<sup>27</sup> Egeesi ma kulodu neliga moso gibadeli odoo oso toboloso egeino, neliga moso osulu susuga yiliga magoloso molome egeiso. Egeesi ogoloso yayo goolee, neliga moso ma kulodu debeli odoo susuga kukulo didoo doloso, kaiya tolosos eyo nediliyo wooloomalame siso.

<sup>28</sup> Esino Poloye neligidi takolone egeesee takaso, “No nediliyo na wooloome! Iba susuga hagee doso!” diso.

<sup>29</sup> Esemе neliga moso gibadeli odoo oso o odoo yimapoo keme tosibe, diso. Esemе yayo keme tolosos neliga moso kulodu hoguo dilesos, obulone kikiliga sabolo Polo dio Sailesi dio dibada homo beiyomoo ebisomiyomoo tugusalosos balaboo tiasos.

<sup>30</sup> Osoloso yayo Polo dio Sailesi dio peegoo iyado dilesos dimapoo egeesee takaso, “Wiligi odoo, ayo ogoo goo toga, gie badeli ka talaiyo?” diso.

<sup>31</sup> Esemе Polo dio Sailesi dio yimapoo egeesee takaso, “No Lodee Yesu mapoo tei te! Egeeseega no gie badeli talaisos. Esiga nobolos osolosos

nee moso kulodus debeli odoo oso Lodee Yesu mapoo tei toga, niba gie badeli talaisos,” diso.

<sup>32</sup> Esemе yayo Polo dio Sailesi dio o mosopoo ido diso. Esemе diayo yibolos osolosos o moso kulodus debeli odoo sabolos mapoo to tekepo Lodeeyo goo mago takaso.

<sup>33</sup> Esemе gesi omapoo neliga moso gibadeli odoo oso Polo dio edebeeyo wei oso kolo koogoo ee howo hapoosos. Osolosos omapoo Polo diayo neliga moso gibadeli odoo sabolos, osolosos o moso kulodus debeli odoo sabolos, howo ogusigasos.

<sup>34</sup> Diba howo ogusime, neliga moso gibadeli odoo oso Polo dio Sailesi dio o mosopoo iyado dilesos nei teneesos. Osolosos yibolos, osolosos o moso kulodus debeli odoo sabolos, diayo Godee mapoo tei too goo mago diya goomogaso.

<sup>35</sup> Osolosos gesikolos gamalee odoo oso dibada odoo ee neliga moso gibadeli odoo mapoo diye dolone egeesee takaso, “Polo dio see peegoo tamagee,” diso. Esemе diayo dilesos neliga moso gibadeli odoo mapoo Polo dio peegoo tamagalame, gamalee odoo oso taka to ee yimapoo takaso.

<sup>36</sup> Esemе neliga moso gibadeli odoo oso to hagee dulosos dilesos, Polo mapoo egeesee takaso, “Gamalee odoo oso takolone niba diyenas, esiga niba medee diyadee,” diso.

<sup>37</sup> Esino Poloye gamalee odoo oso diye di odoo mapoo dilesos egeesee takaso, “Nibada wiligi odoo tebisa oso ibada goo ee medee midile. Egeeseelone diayo nimapoo kitulugu teneme, niyo iba odoo howo woola mapoo woologasos. Esiga diba Loum mi toowa mapoo debeli odoo mapoo goo egeesi moodoolai tekeponee. Bei, Sailesi asalos iba Loum mi toowa mapoo debeli odoo. Esino niyo iba woologasos. Osolosos nibada wiligi odoo tebisa oso iba neliga moso ma kulodus toososos. Osolosos see diayo iba neliga moso



maga mada peegoo iyado dilame ka sala? Egeese selai tekeponee. Esiga dieso sibilesa iba neliga moso hamaga iyadoloso peegoo dilei tekepo,” diso.

<sup>38</sup> Esem gamalee odo oso diye di odo ee see wedi dileso, Poloye to taka ee gamalee odo dimapoo takaso. Esem gamalee odo oso Polo dio ee tei Loum mi toowa odo, dee taka duloso, diya dio dulone ebigo.

<sup>39</sup> Esem gamalee odo oso dieso sibilesa Polo dimapoo emegei di to takaso. Osoloso diba neliga moso ma kuloduga peegoo iyado dileso howolone egeese takaso, “Niba epei mi hamaga peegoo diyadee,” diso.

<sup>40</sup> Esem Polo diba neliga moso ma kuloduga peegoo dileso, Lidiyayo mosopoo diyadeeso. Omapoo dileso tei telaga odo mapoo pidi to takoloso diyadeeso.

## 17

### *Polo dio Sailesi dio Tesalonika mi mapoo di*

<sup>1</sup> Polo diba Tesalonika mi mapoo diyadolone, Ampipolis mi sabolo, osoloso Apoloniya mi sabolo, ma kuloduga diyadeeso. Egeesi ma kuloduga Yu odoowo howo gisili moso ee Tesalonika mi mapoo meleeso.

<sup>2</sup> Polo see mi omapoo eyo goo moodeli egeesi moodoolone, Yu odoowo howo gisili moso mapoo palaso. Osoloso Yu odoowo hasali biame bakadio hedebe di ma kulodu, Poloye Godeeyo to booka ma kuloduga, Kelisowo goo ee Yu odo mapoo medee eligi meleeso.

<sup>3</sup> Yayo odo mapoo Godeeyo to eligilone goo eyo bei woola egeese takaso, “Godeeye to takoloso magooso, yayo hesia Kelisoye dala toloso, toloso ta maga see hoga-bileiso. Esiga ayo nimapoo Yesuwo goo hagee takoo odo ee Godeeye hudi magoo Keliso oso,” diso.

<sup>4</sup> Esem Yu odo abo oso Polo dio Sailesi dio dibada to duloso tei

toloso dibada mooloogoodoo sabolo hedebe diso. Osoloso Godee mapoo mesili Guliki odo susuga sabolo, osoloso sobo hu toowa too abo sabolo, tei toloso dibada mooloogoodoo sabolo hedebe diso.

<sup>5</sup> Esino Yu odo Polowo to mapoo tei tele poogoo odo oso Polo dimapoo diya kooso. Egeeseelone diayo tokenee teli odo mi domo silesibili, diba gilimadoloso mooloogoodoloso diba diya kamanalame toso diya pupuso. Esem odo susuga oso diya komonolone, Yasoneyo mosopoo toso agadigamo hoguga dileso, Polo dio Sailesi dio toloso, odo howo woola mapoo dibada goo midilame esiamo diso.

<sup>6</sup> Esino diayo Polo dio koo egeme, Yason sabolo tei telaga odo abo sabolo toloso, mi wiligi odo tebisa mapoo iyado diso. Esem kamanalame bei mooloogoo odo oso wiligi odo tebisa dimapoo to neligidi takolone, Polo dibada goo maga egeese takaso, “Odo hagee bia oso mi susuga mapoo goo tokenee talame pupugamo silesibo. Esiga epedee hamapoo diba ibada mi hamapoo simiso.

<sup>7</sup> Esem Yason hagosu diba toloso o moso mapoo gilimado peleso doso. Esiga odo hagee bia oso ibada wiligi odo taba Sisaye tei goo ma ee gabagamo silesibo. Bei, diayo takolone, Sisa ee ibada wiligi odo toowa taba osonee, esino odo hee Yesu ono ibada wiligi odo deliso,” diso.

<sup>8</sup> Esem mosobia odo sabolo, wiligi odo tebisa sabolo, to hagee duloso, kamana sabolo diya to boowoogaso.

<sup>9</sup> Osoloso wiligi odo tebisa oso molee nei meye deme, Yason diayo wiligi odo tebisa dimapoo molee maloso peegoo diyadeeso.

### *Polo dio Sailesi dio Beleya mi mapoo di*

<sup>10</sup> Osoloso gesi domo omapoo tei telaga odo oso Polo dio Sailesi dio

Beleya mi mapoo diye diso. E-eme diayo Beleya mi mapoo pele-doboloso, Yu odoowo howo gisili moso mapoo palaso.

<sup>11</sup> Osoloso egeesi ma kulodu, Poloye Tesalonika mapoo badebei domo omapoo Yu odo omapoo debeli oso o to dulei goweso. Esino Beleya mi hamapoo Yu odo oso Poloye Godeeyo to takeme goomoga sabolo o to duloso, to eyo goo bei esieliso. Osoloso diayo Poloye eligi tei beleso, biame susuga Godeeyo to booka mapoo hogugu medee hesigeliso.

<sup>12</sup> Esiga Yu odo bei sabolo, osoloso Guliki sobo hu toowa too abo sabolo, osoloso giso abo sabolo oso tei tooso.

<sup>13</sup> Esino Tesalonika mapoo debeli Yu odo oso Polo diayo Beleya mapoo Godeeyo to takomolosogo di duloso, diba see Beleya mapoo sibadeeso. Diba Beleya mapoo sibilesa, diayo mosobia odo oso Polo dibada goo maga kamanalame toso diya pupuso.

<sup>14-15</sup> Esem Saailesi dio Timoti dio Beleya mi omapoo osee doboome, tei telaga odo oso Polo ono du dali mapoo saga ido mouso, yayo omaga du toloso Atene mi mapoo dilame. Osoloso diba Atene mi mapoo dileso peledoboome, Polo yo ido di odo dimapoo egeese takaso, “Niba wedi dileso Timoti dio Saailesi dio dimapoo takee, diba see ayo bado mapoo saga sibeye,” diso.

### *Poloye Atene mi mapoo Godeeyo to taka*

<sup>16</sup> Polo Atene mapoo Saailesi dio Timoti dio bameleeso. Yo omapoo diba bolone badolone egeino, mosobia ma kulodu edebeeyo deeso dadabayoo moodoo gamenee godee bei molo egeiso. Egeesi ogoloso yo sooloo ma kulodu hegi toowa molone diya gooleeso.

<sup>17</sup> Osoloso Yu odoowo howo gisili moso mapoo Yu odo abo sabolo, osoloso Godee mapoo mesili Guliki

odoo sabolo to meliso. Osoloso biame susuga ma kulodu mi domopoo gamenee silesibili odo sabolo to takomo silesibiliso.

<sup>18</sup> Esem goo goolee toowa odo, Epikuliya mooloogoodoo mapoo debeli odo sabolo, osoloso Sitoiki mooloogoodoo mapoo debeli odo sabolo, oso sibilesa Polobolo to moulone toso agadigaso. Osoloso Poloye Yesuwo goo sabolo, osoloso odo wedia see ta maga hogabilei goo ee takeme, goo goolee toowa odo abo oso egeese takemeleeso, “Odo hagee yayo taka goo eyo bei yo gooleede. Yo ogo goo eligilame ka silabele?” diso. Osoloso odo abo oso egeese takemeleeso, “Yayo imapoo mi abo dibada godeeyo goo ee eligilame ka sulo,” deliso.

<sup>19</sup> Osoloso diayo Polo yayo eligimo silee goo ee medee takalame, Aleopagi esia dokodoo wiligi odo tebisa oso to moumelee mapoo ido diso. Omapoo ido dileso diayo Polo mapoo egeese takaso, “Nayo eligi goo dia ege takomo sulo imapoo medee takee.

<sup>20</sup> Bei, nayo eligimo silee iba gooleede. Esiga iba nayo eligi goo eyo bei gooleedalai goomogoso,” diso.

<sup>21</sup> (Osoloso goo ee ma kulodu Atene mapoo debeli odo sabolo, osoloso mi abo maga sibadee odo sabolo, biame susuga diayo goomoga goo talai biame ee poogoloso, see gamenee eligi goo maga to dia meliso.)

<sup>22</sup> Osoloso Poloye mooloogoodoo ma kuloduga toboloso egeese takaso,

“Atene bia odo, niba mo to dui! Niba eli bei maga godee susuga mapoo goomoga tenelai gooleedoona.

<sup>23</sup> Bei, ayo nibada mi ma kulodu ogogomo silone egeino, niyo goomegeli godee opusomo opusomo di egeiso. Osoloso ee ma kulodu, godee heeyo goo maga to egeese hogugu yo mapoo molo egeiso, ‘Mi

hamapoo edebeeyo gooleedelee poogoo godee o hu dokodoo poudiliso,' ee egeiso. Esiga niyo gooleedelee poogoo godee mapoo goomoga goo teneliso. Esino ayo nimapoo Godeeyo goo hagee takalaiso.

<sup>24</sup> Esiga niba goolee, Godee hagoso mipoo toowa sabolo, kei dokodoo sabolo eyo wiligi doloso badoso. Bei, mipoo toowa sabolo, osoloso kei dokodoo sabolo, osoloso ee ma kulodu bi susuga egee molo sabolo, yayo moodooso. Esiga yo moso edebeeyo tegei mapoo koo badeli.

<sup>25</sup> Esiga Godee hagoso gie badeli sabolo, bi susuga sabolo, odoo mapoo teneliso. Esiga iyo yo pidilei eli mauwe. Bei, yimapoo bi susuga yibolo tobuloso badoso.

<sup>26</sup> Esiga Godeeye daga hoogoo odoo hedebe moodooso. Osoloso odoo hedebe yimaga odoo opusomo opusomo di susuga oso mipoo susuga mapoo diayo dabalame moodooso. Osoloso Godeeye mi diayo dabalai sabolo biame diayo dabalai oso hoo pagalai magooso.

<sup>27</sup> Bei, Godeeye odoo howo si masi oso esiameliso yo agalame goomogaso. Esino yo imaga hoogoo koo badoso.

<sup>28</sup> Bei, yayo imapoo gie badeli te-neeso. Osoloso iba yayo kitulugu maga silone ka doso. Esiga to hagee nibada odoo oso taka to sabolo teiba. Bei, daga nima kulodu badebei odoo heeso egeese takaso, 'Iba nose Godeeyo owolo dio,' diso."

<sup>29</sup> "Iba Godeeyo owolo dio doloso dobolone egeese na goolee, 'Godee yo edebeeyo dadabayoso, osoloso bi abo sabolo oso deeso moodoona,' dee na goolee.

<sup>30</sup> Godeeye daga hoogoo odoo ee egeesi goo ma kulodu osee doboome dimapoo takele. Bei kasi magayo, diba Godee gooleedelega debeiso. Esino epedee hamapoo Godeeye egeese takooso, 'Odoo susuga

mi susuga ma kulodu nibada goo tokenee maga miligi pie!' diso.

<sup>31</sup> Bei, yayo mi odoo susuga dibada goo ee midilei biame olo magooso. Esiga yayo medee midileiso. Egee yayo daga hesia odoo oso ka selai. Esiga Godeeye to hamapoo tei dolone, yayo hesia odoo ee ta maga hogadiso," diso.

<sup>32</sup> Poloye eligi goo maga odoo oso Yesuye ta maga hogabia duloso odoo abo oso maneso. Esino odoo abo oso Polo mapoo egeese takaso, "Iba goo hagee biame hee mapoo see tobu dulei goomogo," diso.

<sup>33</sup> Osoloso Polo to takoloso koodobuloso diba poogoo diso.

<sup>34</sup> Esino ee ma kulodu, odoo abo oso Polowo to duloso Yesu mapoo tei tolone, yibolo hedebe diso. Polowo to mapoo tei telaga odoo eyo kulodu odoo hee Dionisiyas, Aleopagi mooloogoodoo ma kulodu badeli odoo. Osoloso sobo hee Damalis, osoloso odoo abo sabolo tei tooso.

## 18

### *Poloye Kolin mi mapoo badebei*

<sup>1</sup> Hamamee Polo Atene mi mapoo badoboso see Kolin mi mapoo diso.

<sup>2</sup> Yo mi omapoo dileso Yu odoo hee tugodooso, o hu Akwila, o midee Pontus. Odoo hageeyo osobo Plisila dio, epedee Itali mi toowa ee ma kulodu Loum mi maga Kolin mi mapoo sibadeeso. Bei, Sisa-Kolodiyaseeye Yu odoo susuga ee Loum mi maga peegoo hasiso buguso.

<sup>3</sup> Esino Poloye dileso Akwila dio osobo Plisila dio dibada moso mapoo hodobo debeiso. Bei, diba hodobo dugoso moso tegegeli tou temeliso.

<sup>4</sup> Yu odoowo hasali biame susuga mapoo Poloye Yu odoo sabolo, Guliki odoo sabolo, Yesu mapoo tei talame, Yu odoowo howo gisili moso mapoo Yesuwo goo ee to meliso.

<sup>5</sup> Esemе Sailesi dio Timoti dio Makedoniya maga Poloye badebei mapoo sibume, Poloye o tou poogoloso biame susuga mapoo hedebe Godeeyo to takalai bei mooloogoloso sileeso. Egeeseelone yayo Yu odoo dimapoo, Yesuwo goo woola mapoo eligimo silone, Yesu yo Godeeye hudi magoo Kelisoso deliso.

<sup>6</sup> Esino diayo Poloye eligi to talai gowoolone, see Polo mapoo duwa takemeleeso. Esemе Poloye Godeeye kamanali goo ee dimapoo eligilone, o dugo megegu pilidibuguloso dimapoo egeesee takaso, “Ayo niba goolone tou toowa tooso. Esino niyogie badeli tele poogooga, ee nibada goo. Esiga a epedee domo hamaga see Yu odoonee mapoo Godeeyo to takomo dileiso,” diso.

<sup>7</sup> Osoloso Polo Yu odoowo howo gisili moso poogoloso, see koola mapoo Yu odoonee Titiyus-Yustus eyo moso mapoo badalame diso. Odoo hagee Yu odoowo Godee mapoo mesili odooso.

<sup>8</sup> Osoloso howo gisili moso wiligi odoo taba Klispas sabolo, osoloso o moso kulodu debeli odoo sabolo, Lodee Yesu mapoo tei tooso. Osoloso Kolin mi mapoo debeli odoo abo sabolo Polowo to duloso tei teme, diba howo ogusigaso.

<sup>9</sup> Osoloso gesi heeso Lodeeye Polo howo opusomo doloso yimapoo egeesee takaso, “No haga na ebi! Osoloso nayo to takomo sili ee na koodobie!

<sup>10</sup> Bei, a nobolo badalaiso. Esiga odoo heeso namapoo dala tenelaime. Bei, Kolin mi toowa hama kulodu ayo hesiga odoo susuga doso,” diso.

<sup>11</sup> Esemе Poloye Kolin mi mapoo Godeeyo to eligilone, dugo hedebe poogoloso, osoloso see dugo hee bei mooloogoloso dulone a 6 badebeiso.

*Yu odoo oso Polo yo gamalee odoo Galiyo mapoo ido di*

<sup>12</sup> Loum odoo Galiyoye Kolin mi mapoo badolone, Akaya mi toowa gibadebeiso. Esino Poloye Kolin mi ee ma kulodu Godeeyo to eligimo silime, Yu odoo susuga oso gowoolone goo goolee hedebe doloso, Polowo goo midilame, yo Galiyo mapoo ido simiso.

<sup>13</sup> Egeeseelone, diayo Polo ido sibilesi Galiyo mapoo egeesee takaso, “Odoo hagosо eli hee maga Godee mapoo goomogalai eligimo silone, ibada tei magoo goo sabolo koo tobuo,” diso.

<sup>14</sup> Osoloso Poloye epedee to hee takalame molome, Galiyoye Yu odoo dimapoo egeesee takaso, “Yu odoo, edebeeyo goo tokenee toowa too diepi o, Loum gamaleeyo tei gababia diepi, ayo o goo medee midiliyo.

<sup>15</sup> Esino nibada tei goo maga goo pepooko tosimiga, niso midilei tekepo! Esiga a goo egeesi midilei gowoo,” diso.

<sup>16</sup> Esemе yo to hagee dimapoo takoloso goo midili moso maga diye diso.

<sup>17</sup> Esemе goo midili moso ma kulodu odoo susuga oso howo gisili moso wiligi odoo Sostenes tolosoweiso. Esino Galiyoye goo hagee ogoloso yimapoo goonee diso.

*Poloye Antiyoka mapoo see wedi di*

<sup>18</sup> Polo Kolin mi mapoo tei telaga odoo sabolo biame bei badebeiso. Osoloso yo Siliya mi mapoo wedi dilame badolone, Akwila sabolo Plisila sabolo hodobo Kenekeleya mi mapoo sibadeeso. Omapoo Polo yayo Godee sabolo to magoo dodolone, o wudu waso.\*

<sup>19</sup> Osoloso diba du tolososo see Epeses mi mapoo soowaso. Epeses mapoo dileso peledoboloso, Plisila dio Akwila dio omapoo holoogooso. Polo Epeses mapoo osee badolone, Yu odoowo howo gisili moso mapoo

**18:6:** Diye 13:46, 51; 20:26    **18:10:** Josh 1:9; Isa 41:10    **18:18:** Num 6:18; Diye 21:24    \* **18:18:** Yu odoo oso wudu wali eyo goo bei hagosо. Yu odooso Godee sabolo to magolone biame hesieliso, yayo biame hesia ee ma kulodu Godeeyo tou tolone o wudu woolega badalame. Osoloso hamamee o tou oso dileso koodobuoga o wudu waliso.



peleso, Yesuwo goo maga Yu odoo sabolo to moumeleeso.

<sup>20</sup> Esemee tei telaga odoo oso Polo mapoo egeesee takaso, “No biame sage ibolo badalai tekepo,” diso. Esino Polo yo mi omapoo badalai goomegele goo takoloso see egeesee takaso,

<sup>21</sup> “Godeeye goomogoga, a see nimapoo wedi sibileiso,” diso. Osoloso yo du toowa toloso Epeses mi maga Kasaliya mi mapoo diso.

<sup>22</sup> Polo Kasaliya mapoo sibileiso du oluguloso see Yelusalem mapoo palaso, tei telaga odoo mapoo emegei di to takalame. Poloye Yelusalem tei telaga odoo dimapoo emegei di to takoloso, see Antiyoka mapoo wedi diso.

<sup>23</sup> Osoloso Antiyoka mapoo biame deiyepo badoboso, see Galesia mi sabolo osoloso Piligiya mi sabolo mapoo silone, tei telaga odoo diayo tei too kibilame pidimo sileeso.

### *Apoloseeye Epeses mi mapoo to taka*

<sup>24</sup> Domo omapoo Yu odoo Apolos, Alesandiliya mapoo badeli odoo ee Epeses mapoo simiso. Yo Godeeyo to booka mapoo hogugu diya gooleedoo. Esiga yayo Godeeyo to taka domo mapoo medee tekepo takeli.

<sup>25</sup> Odoo hagee Lodee Yesuwo goo ee odoo heeso eligiso. Esiga yayo Yesuwo goo ee kitulugu sabolo tekepo eligiliso. Esino yo odoo Yesuwo hu maga howo oluguli goo ee gooleedelega badolone, wulo Yoneeye odoo susuga howo ogusiga goo ono gooleedoloso badebeiso.

<sup>26</sup> Osoloso Apoloseeye Yu odoowo howo gisili moso mapoo peleso, ebi-lega, Godeeyo to ee kitulugu sabolo takemeleeso. Esemee Plisila dio Akwila dio o to dulone dobolone, yo dibada moso mapoo ido dilesa, Godeeye odoo mapoo gie badeli teneli eyo goo maga yimapoo medee eligiso.

<sup>27</sup> Osoloso hamamee Apolosee Akaya mapoo dilei goomogaso. Esemee tei telaga odoo oso tekepo dolone, to hogugu ee Akaya tei telaga odoo mapoo teneeso, yo sibileso dibolo badolone diba pidilame siboga, diayo yimapoo goomoga to tenelame. Esemee yayo omapoo dilesa tei telaga odoo medee pidimeleeso. Osoloso odoo hagee diayo Yesu mapoo Godeeye mesilone wulayo pidi goo maga olo tei tooso.

<sup>28</sup> Bei, yayo Yu odoo sabolo Yesuwo goo ee odoo howo woola mapoo o toso kitulugulone Yu odoo oso to kookeliso. Egeeseelone yayo Godeeyo to booka maga eligilone, Yesu tei Godeeye hudi magoo Keliso doloso bado goo ee dimapoo woola eligiliso.

## 19

### *Poloye Epeses mi mapoo di*

<sup>1-2</sup> Apolos Kolin mi mapoo bado-boome, Polo mili dilesa Epeses mi mapoo peledabaso. Polo omapoo dilesa tei telaga odoo abo tugodoloso dimapoo egeesee takaso, “Niba tei teme, Dio Tei oso nimapoo meled-abasomo?” diso.

Esemee diayo nei egeesee takaso, “Nayo ogoo goo imapoo ka takala? Iba Dio Tei eyo goo ee gooleedele,” diso.

<sup>3</sup> Esemee Poloye dimapoo egeesee takaso, “Niba odoo agayo eligi maga howo ka ogusigayo?”

Esino odoo abo oso Polo mapoo egeesee takaso, “Iba Yonee odoo howo oluguli oso eligi dodolone howo ogusigaso.”

<sup>4</sup> Esemee Poloye dimapoo egeesee takaso, “Yonee odoo howo oluguli oso eligi goo ee egeesee moloso. Ede-beeyo Kelisoye sibilei goo mapoo moodoolone, diayo dibada goo to-kenee maga miligi pume, howo ogusigaso. Esino yayo egeeseelone egeesee takeliso, ‘Ama hamamee

egee sibo odoo omapoo tei te,' dee takeliso. Odoos ee Yesu," diso.

<sup>5</sup> Esemee diayo goo ee duloso Yesuwo hu maga howo ogusigaso.

<sup>6</sup> Osoloso Poloye dimapoo o deeso sigolone Godee mapoo takeme, Dio Tei oso dimapoo meledabaso. Esemee diayo to opusomo opusomo di kesameleeso. Osoloso diayo Godeeye taka duloso odoo mapoo takemeleeso.

<sup>7</sup> Esino mooloogoodoo hagee ma kulodu odoo 12 oso goo hagee ka moodoo.

<sup>8</sup> Egeesi ma kulodu Yu odoo oso tei talame, Poloye dibada howo gisili moso mapoo peleso, a bakadio hedebe di ma kulodu ebilega, Godeeye wiligi doloso badeli eyo goo maga takemeleeso.

<sup>9</sup> Esino Yu odoo abo oso tei talai goo mapoo mesilega dobolone, odoo howo woola mapoo Yesuwo goo maga to tokenee takaso. Esemee Poloye diba poogoloso tei telaga odoo gilimadoloso, Tilano sukulu moso mapoo diso.

<sup>10</sup> Osoloso omapoo Poloye dugo bakadio ma kulodu biame susuga Lodeeyo goo ee takeliso. Egeesi ma kulodu Asiya mi toowa mapoo debeli Yu odoo susuga sabolo, osoloso Guliki odoo susuga sabolo, Godeeyo to Yesuwo goo maga taka dulugaso.

<sup>11</sup> Godeeye Polo maga goo toowa opusomo opusomo di moodoogaso.

<sup>12</sup> Esemee edebeeyo Poloye debia tali dugo sabolo, osoloso tou tolone kali dugo abo sabolo, tolosa dileso odoo paigiga ma dokodoo mome, odoo paigiga susuga wegigadooso. Egeeseelone bo holo odoo ma kulodu paladee sabolo peegoo hasiso buguso.

<sup>13</sup> Esino Yu odoo abo wulo domo silesibili odoo oso bo holo odoo ma kuloduga peegoo hasiso bigiliso. Diayo Poloye Yesuwo goo taka duloso, see Lodee Yesuwo hu sabolo bo holo

peegoo hasiso bugulone silesibilame bei mooloogooso. Egeeseelone diayo bo holo mapoo egeese takeliso, "Iba Poloye egee eligidi silo Yesuwo hu maga nimapoo ka taka, niba peegoo gasibe!" deliso.

<sup>14</sup> Goo egeesee tomo silee ee Yu odoowo tei moso wiligi odoo taba Sikibayo owolo dio 7 oso egeesee ka moodoomo silesibiso.

<sup>15</sup> Egeesee moodoogamo silesibi ma kulodu, biame hee mapoo diayo bo holo peegoo hasisa molome, bo holo oso nei dimapoo egeesee takaso, "A Yesu gooleedooso, osoloso a Polo gooleedooso. Esino niba odoo ogumo?" diso.

<sup>16</sup> Esemee odoo bo holo pala oso diba tolosa neligidi kitulugu sabolo diba wooloogaso. Esemee diayo o moso maga sawo sabolo bododidiwe kukulo diyadeeso.

<sup>17</sup> Esemee Epeses mapoo debeli Guliki odoo sabolo, Yu odoo sabolo goo hagee duloso diya obulone hedebe Lodee Yesuwo hu dokodoo poudooso.

<sup>18</sup> Osoloso tei telaga odoo susuga oso dibada goo tokenee ee woola yilige buguso.

<sup>19</sup> Esemee dima kulodu googoo gooleedoo odoo oso goo moodoomo silee odoo egeesi masi oso dibada googoo hogugu booka ee howo woola mapoo hodobo mooloogoo magoloso dou gigaloogooso. Diayo googoo booka susuga hagee odoo mapoo tenee diepi, eyo nei molee ko toowa 50,000\* egeesi teliyo.

<sup>20</sup> Egeesi ma kulodu Godeeyo to Lodeeyo goo maga mi toowa mapoo diayo kitulugu sabolo takomo diyadeeso.

<sup>21</sup> Goo hagoso dileso hoo poogoome, Polo yo Makedoniya mi sabolo Akaya mi sabolo mapoo dileso see omaga Yelusalem mapoo dilame goomogaso. Egeeseelone

**19:6:** Diye 8:17; 10:44, 46    **19:11:** Diye 14:3    **19:12:** Diye 5:15    **19:17:** Diye 5:11    \* **19:19:** molee ko toowa 50,000 - Molee ko toowa hageeyo hu dalakamas. Edebeeyo biame hedebe mapoo tou toga, yo nei molee ko toowa hagee hedebe nei teliso.    **19:21:** Diye 23:11; Loum 1:13

yayo see egeese takaso, “A Yelusalem mapoo dileso see Loum mapoo dileiso,” diso.

<sup>22</sup> Osoloso Polo yo pidili odo baka-dio Timoti dio Elastus dio Makedoniya mi mapoo diba malalo diye doloso, yo Asiya mi mapoo epedee badebeiso.

*Epeses mi mapoo odo susuga oso kamanali goo toowa poudoo*

<sup>23</sup> Polo Epeses mi mapoo epedee badoboome, odo susuga oso Yesuwo goo maga kamanali goo toowa poudooso.

<sup>24</sup> Bei, Epeses mi mapoo gamee-godee Artemis mapoo goomegeli moso tegei meleeso. Esem odo hee Demetiliyuseeye o odo gili-madoloso, yoso gamenee godee masi moodoo egeesi masi dia dee oso pepuso moodoogaloso, odo mapoo tenelone nei diayo molee toowa teliso.

<sup>25</sup> Osoloso Demetiliyuseeye o odo sabolo, osoloso odo abo dibolo tou hodobo teli odo egeesi sabolo, gilimadoloso to mouso. Osoloso Demetiliyuseeye to moulone dimapoo egeese takaso, “Mo odo, niba dui! Iyo tou hagee tolone badolone molee toowa teliso.

<sup>26</sup> Esino niba odo Poloye goo tomo egee silo, niba gooleedooso. Yayo takolone edebeeyo deeso moodoo godee ee tei godeenee, dee takomo silime, odo susuga Asiya mi mapoo debeli sabolo, osoloso Epeses mapoo debeli sabolo, oso yima hamamee dadagamo silesibiso.

<sup>27</sup> Esiga iba obeeyamo! Odo susuga oso Poloye eligi goo omapoo hamamee dodolone, iba gowooga, iyo tou too maga molee toowa hagee tomolo pagalai malaiso. Osoloso goo hee hagoso, odo susuga Asiya mi hamapoo debeli odo sabolo, osoloso mi abo mapoo debeli odo sabolo, oso ibada godee hedebe Artemis mapoo tei tolone goomegeli. Esino odo susuga oso Poloye eligi mapoo tei toga, see diayo ibada

godee Atames ee gamenee godee dalaiso. Osoloso yimapoo goomegeli moso ee gowoolaiso,” diso.

<sup>28</sup> Demetiliyuseeye goo hagee takomolome, o to dulone debei odo oso kamanaloso toso diya agadilone egeese takaso, “Epeses odo ibada godee Artemis hedebe yayo toowa ka badoso!” diso.

<sup>29</sup> Goo hagoso Epeses mi toowa ma kulodu debeli odo susuga oso diya kamaso. Egeeseelone odo susuga oso mi ee ma kulodu to neligidi agadilone, edebeeyo goologoo doloso debeli mi omapoo hoguga diyadeeso. Diayo hoguga dulone, Polowo odo Makedoniya mi mapoo debeli Gaiyus dio Alistakus dio iyadoloso diyadeeso.

<sup>30</sup> Esem Polo yayo odo goologoodoo mapoo dileso to takalame goomogaso. Esino tei telaga odo oso yo hamaga takaso.

<sup>31</sup> Osoloso Polowo odo abo Asiya mi mapoo wiligi odo tebisa oso yo dilame goomegele. Egeeseelone Poloye mi omapoo dilega pagalame, yo diyaga to teneeso.

<sup>32</sup> Egeeseeme goologoodoo ee ma kulodu odo aboso toso agadilone, goo opusomo takoo, osoloso odo aboso goo opusomo takoo, diso. Egeeseelone odo susuga oso diayo goologoodoo goo eyo bei kibiya gooleedele.

<sup>33</sup> Esiga Yu odo oso odo hee, Alesanda yo malalo mapoo pupumo dileso holoogooso, yayo odo goologoodoo mapoo to takolone, goo hagee Yu odo dibada goo tokenee nee, dee takalame. Esem yayo odo susuga oso to kesamelee omapoo koodobilame, o dee wabisaso.

<sup>34</sup> Esino goologoodoo oso Alesanda yo Yu odo doloso gooleedoloso, gowoolone to agadi sabolo see tobu egeese takaso, “Epeses odo ibada godee Artemis hedebe yayo toowa ka badoso!” diso. Diayo toso agadigamelee ososee,

osoko howo bakadio poogooso.

<sup>35</sup> Esem mi omapoo gamaleeyo tou teli odo heeso keese tabano, gooloogoodoo toowa oso to kesamelee omapoo koodobiaso. Egeeseeme yayo egeese takaso, "Epeses odo, niba dui! Odo susuga ibada godee toowa Artemis mapoo goomegeli moso ee iyo gibadeli, diba gooleedooso. Osoloso kei ma dokodooga Artemis egeesi masi imapoo homodobia, diba gooleedooso.

<sup>36</sup> Esiga edebeeyo goo hamaga gamenee takalai tebile. Esiga niba kamanaga epedee hamapoo koodobie, osoloso goo tokenee hee na te.

<sup>37</sup> Osoloso niyo odo hagee bia ee goo mauwe hamapoo iyado sibadeeso. Esino diayo ibada godee mapoo to tokenee takele. Osoloso diayo ibada godee mapoo goomegeli moso ma kulodu bi hee heli tele.

<sup>38</sup> Esiga Demetiliyus nobolo, osoloso nayo gowe odo sabolo, goo midili moso mapoo dileso nibada goo midilei tekepo. Bei, goo midili odo osee doso.

<sup>39</sup> Esino nimapoo goo hee maga to kalai mologa, mosobia oso to keli biame omapoo tosibilei tekepo.

<sup>40</sup> Esiga iba susuga obeeyamo. Epei iyo goo moodoo hamapoo Loum odo oso imapoo tokenee nei te neeyaga. Esiga Loum odo oso imapoo goo egeesi moodooga, iba iso nediliyo pidilei eli agalaime. Bei, epei iyo kamana goo eyo bei mauwe," diso.

<sup>41</sup> Osoloso mosobia gamaleeyo tou teli odo oso to hagee takoloso koodobuloso mosobia odo diba diyadee diso.

## 20

### *Poloye Makedoniya mi sabolo Akaya mi sabolo mapoo di*

<sup>1</sup> Epeses mi mapoo kamanali goo toowa poudoo oso koodobume, Poloye tei telaga odo susuga gili-madooso. Poloye diba gilimadoloso

dimapoo pidi to takoloso see Makedoniya mi mapoo dulone emegei di to takaso.

<sup>2-3</sup> Yayo Makedoniya mi toowa ma kulodu silone, mi omapoo tei telaga odo oso debei mapoo dibada tei too kibilame dimapoo pidi to takaso. Osoloso see Akaya mi mapoo dileso badolone a bakadio hedebe di poogooso. Osoloso Polo a bakadio hedebe di Akaya mi mapoo poogoloso, see Siliya mi mapoo dalo soowoolame badoboome, Yu odo oso yo wooloomalame to mou duso. Esino yo goo egee duloso Akaya mi maga du toloso dilega, see Makedoniya mi mapoo wedi dileso du toloso Siliya mi mapoo dilei diso.

<sup>4</sup> Esiga odo hagee bia oso Polobolo diyadeeso, Pilusuwo owolo Sopata, yo Beleya mi mapoo badeli. Osoloso Tesalonika odo, Alistakus dio Sekundus, osoloso Delebe odo Gaiyus, osoloso Timoti. Osoloso Asiya mi toowa odo Tikikus dio Tolopimus dio.

<sup>5</sup> Esiga odo hagee bia oso malalo dileso Tolowasee mi mapoo iba balaga meleeso.

<sup>6</sup> Esem iba mili dileso Pilipai mi mapoo dobolone, Isipi mi maga peegoo peledaba biame gooleebugu wo nali omapoo debeiso. Osoloso wo ne biame ee poogoloso, Pilipai mi maga du toowa toloso Tolowasee mi mapoo dalo soowoolone, abei domo mapoo biame dee tiadoo poogooso. Osoloso Tolowasee mi mapoo dileso odo hagee bia tugodoloso mi omapoo dobolone biame 7 poogooso.

### *Poloye Tolowasee mosobia odo mapoo Godeeyo to hamameedee taka*

<sup>7</sup> Iba Tolowasee mi mapoo dobolone, Sadee toowa biame mapoo Yesu gooleebugu wo nalame tei telaga odo susuga sabolo hodobo mooloogoodooso. Esem Poloye mooloogoodoo mapoo Godeeyo to takaso. Esino Polo yo mi beeamoga mi hee mapoo dilame badolone, gesi



omapoo Godeeyo to sage taka gesi domo mapoo koodobiaso.

<sup>8</sup> Esem e iba moso egi doko tegei debi pooba gooboogoo ma kulodu keme bei pegiga magoloso dobolone, Polowo to duluga meleeso.

<sup>9</sup> Moso ee ma kulodu giso kadiga hee Yutikus, poo osulu mapoo dokodoo badebeiso. Yo Poloye Godeeyo to sage takeme ee dulone badolone, tilasapoo meleeso. Yo egeesee tilasapoolone moso dokodooga miyomoo homodobiaso. Yo miyomoo homodobume, edebeeyo meilesa yo tolosa egeino, yo olo tana. Bei, moso egee diya egi doko tegei.

<sup>10</sup> Osoloso Polo yo miyomoo meilesa ebiso miyomoo tugusaloso, yo tolosa badolone egeesee takaso, "Goo haga na koude. Yo see gie badeli toso," diso.

<sup>11</sup> Osoloso Polo see moso dokodoo peleso nei naloso,\* see tobu Godeeyo to takemelee ososee mi biameso. Osoloso see gesikolodee mapoo mi egee poogoloso diso.

<sup>12</sup> Esem odoo susuga oso giso kadiga Yutikus ee gie badeli teme, goomoga sabolo o mosopoo ido diso.

*Poloye Epeses sosee wiligi odoo tebisa sabolo to kei*

<sup>13</sup> Osoloso iba Tolowasee mi maga Asos mi mapoo dilame doboome, Poloye egeesee takaso, "Niba malalo du toowa tolosa Asos mi mapoo dalo soowee. A mili dileso Asos mi mapoo nibada du mapoo ka dabagalaiya," diso.

<sup>14</sup> Esem e iba du maga soowooleso Asos mi mapoo yo tugodoloso, yo see du ma kulodu dabagaso. Osoloso see omaga Mitilene mi mapoo dalo soowaso.

<sup>15</sup> Osoloso see mi beeamome, Mitilene mi maga see Kiyos mi te mapoo dalo soowaso. Osoloso omapoo tialoso, see mi beeamome, du toowa tolosa Samos mi te mapoo dalo

soowaso. Osoloso omapoo tialoso, mi beeamome, see du tolosa Miletus mi mapoo dalo soowaso.

<sup>16</sup> Esino Polo yo see Epeses mi mapoo dilei goomegele. Bei, yo Asiya mi ee saga poogoo dileso, Yelusalem mapoo Pentikos wo ne biame mapoo badalame goomogaso.

*Poloye Epeses sosee wiligi odoo tebisa sabolo to kei*

<sup>17</sup> Esiga Polo Miletus mi mapoo badolone, Epeses sosee wiligi odoo tebisa oso yo agalame sibilame to teneeso.

<sup>18</sup> Osoloso Epeses sosee wiligi odoo tebisa oso yayo badebei mapoo sibademe, yayo dimapoo egeesee takaso, "Niba ayo biame susuga nibola Asiya mi mapoo badolone goo tomo silee gooleedooso.

<sup>19</sup> A biame susuga ma kulodu Godeeyo tou talai mapoo koo goweli. Egeeseelone mawo nediliyo dokodoo koo poudoomo sili. Osoloso Yu odoo oso a wooloomalame dala teneme, ee ma kulodu didawo sabolo Godeeyo tou tomo sileeso.

<sup>20</sup> Esiga ayo niba pidilame ebilega Godeeyo goo susuga nimapoo woola taka, niba gooleedooso. Egeeseelone ayo goo hee mada koo mageli. Esino odoo susuga goologoodoo toowa ma kulodu, osoloso nibada moso ma kulodu, Godeeyo goo susuga ee nimapoo takeliso.

<sup>21</sup> Esiga a Guliki odoo sabolo, Yu odoo sabolo, oso goo goolee su wuduloso Godee mapoo bidiga doboloso ibada Lodee Yesu mapoo tei talame to takaso.

<sup>22</sup> Esiga a Dio Tei eyo to mapoo mesiloso Yelusalem mapoo dileiso. Esino omapoo dileso badoga, amapoo goo peledabalai, a gooleedele.

<sup>23</sup> Esino goo hedebe hagono a gooleedooso. Ayo mi susuga mapoo siloga, Dio Tei oso ayo dala talai

\* **20:11:** Odoo aboso egeesee takeliso, "Biame omapoo Polo diayo Yesu gooleebugu wo neso," diso.

**20:17:** Diye 18:21    **20:18:** Diye 18:19–19:10    **20:23:** Diye 9:16; 21:11    **20:24:** Diye 21:13; 2Tim 4:7

goo sabolo, neliga moso ma kulodu husalai goo sabolo, amapoo eligiliso.

<sup>24</sup> Esiga mo gie badeli haga koo gooleeso. Esino a hedebe Lodee Yesuye amapoo tou tenee susuga ee temeleso hosudalai diya gooleeso. Tou hagee to tekepo Godeeye mesilone wulayo pidi goo odoo mapoo takalai oso.

<sup>25</sup> Esiga a nima kulodu Godeeye wiligi doloso badeli goo ee takomo sileeso. Esino nima kulodu odoo heeso a see agalaime.

<sup>26</sup> Esiga epedee ayo nimapoo taka, nima kulodu odoo heeso gie badeli telega, dou mi mapoo duga, mo goo tokenee nee.

<sup>27</sup> Bei, ayo goo susuga Godeeye taka goo ee niyo gooleedalame olo takaso.

<sup>28</sup> Esiga niba niso nediliyo medee bamelee. Egeeseelone Dio Tei oso nimapoo tenee sipi be hu masi medee bamelee. Esiga niba sipi be hu bali odoo masi dobolone, Godeeyo sosee ma kulodu debeli odoo medee bamelee. Bei, Godeeyo owolo Yesuye ta maga o sosee ma kulodu debeli odoo ee tooso.

<sup>29</sup> A gooleedooso, a di mapoo hamamee, gamenee eligili odoo oso nimapoo sibilesi tei telaga odoo mapoo dala tenelaiso. Gamenee eligili odoo hagoso dobu so masi sibilesi sipi be hu masi wooloomaloso nalaiso.

<sup>30</sup> Osoloso nima kulodu nibada odoo abo oso tebisaloso tei goo ee see bidigaloso gamenee goo ee takomo silesibileiso. Egeeseelone diayo niba domo puloso tei telaga odoo abo ee peegoo gilimado dileiso.

<sup>31</sup> Esiga niba to hagee goolee sabolo dobolone, medee bolone debee. Bei, ayo dugo bakadio hedebe di ma kulodu biame susuga, osoloso gesi susuga mapoo goo hamapoo nimapoo pisa sabolo eligimo sileeso. Esiga ayo eligi goo hagee na boobado bigi!

<sup>32</sup> Esiga epedee ayo niba Godeeyo dee mapoo ibedileiso. Osoloso Godee yayo sooloo dolone pidili to tekepo maga nibada tei too kibilame kitulugu tenelaiso. Osoloso to oso nibolo, osoloso Godeeye hesiga odoo susuga mapoo gie badeli tenelaiso.

<sup>33</sup> Esiga niba goolee, ayo nibolo silee mapoo, a odoo abo dia bi sabolo, molee sabolo, osoloso dugo tekepo kali bi sabolo ogoloso bi ee talame koo gweli.

<sup>34</sup> Esino niba olo gooleedooso, ayo goomoga goo sabolo, osoloso abolo silesibi odoo oso goomoga goo sabolo tebilame tou kitulugu sabolo teliso.

<sup>35</sup> Esiga a biame susuga ma kulodu egeesi goo maga niba see eligimo sileeso. Egeesi maga niyo tou tolone dobolone, odoo kitulugu mauwe pidimo silesibilame. Bei, Lodee Yesuye to egeese takaso, "Teneli biame omapoo goomoga toowa oso moloso, esino teli biame omapoo goomoga pepooko oso moloso," diso.

<sup>36</sup> Poloye to hagee takoloso koodobuloso dibolo ebiso miyomoo tugusaloso dobolone Godee mapoo takaso.

<sup>37-38</sup> Osoloso diba susuga pupisigaso. Bei, Poloye dimapoo taka, "Niba see a agalaime," deme. Osoloso hamamee Polo bolomaloso adameleso, diba yibolo du dali mapoo mouso.

## 21

### *Poloye Yelusalem mapoo di*

<sup>1</sup> Iba Miletus mi maga dilame du dali mapoo meilesi, du toowa mapoo tebisaloso, dila poogolone, Epeses sosee wiligi odoo dimapoo emegei di to takaso. Osoloso Kos mi te mapoo dalo soowaso. Omapoo tialoso biame hee mapoo see Lodes mi te mapoo dilesi peledoboloso, see abaga Patala mi mapoo diso.

<sup>2</sup> Iba Patala mapoo dilesi egeino, du toowa Ponesiya mapoo dilame

molo egeiso. Esemme iba du omapoo daboogoloso diso.

<sup>3</sup> Osoloso iba Saiples mi te dobusu dokolo poogoloso, see Siliya mi Taya mapoo diso. Bei, du toowa eyo kulodu bi ma mubiyodoo malame.

<sup>4</sup> Iba omapoo dilesos tei telaga odoo abo ogoloso, dibolo biame 7 debeiso. Iba dibolo omapoo doboome, Dio Tei oso eligi maga diayo Polo mapoo Yelusalem mapoo na diye, dee takemeleeso.

<sup>5</sup> Esino iba Taya mi mapoo dobosos see dilame bei mooloogooso. Esemme tei telaga odoo susuga sobo sabolo, holaiso sabolo, iba du dali mapoo gilimado mousos. Osoloso omapoo iba hodobo ebisos miyomoo tugusalosos dobolone Godee mapoo takasos.

<sup>6</sup> Iba takolosos du ma kulodu tebisalosos dulone emegei di to takeme, diba see dia mosos wedi diyadeesos.

<sup>7</sup> Iba Taya mi omagas see Tolemais mi mapoo disos. Mi omapoo tei telaga odoo abo tugodolosos, dibolo biame hedebe badebeisos.

<sup>8</sup> Osoloso biame hee mapoo iba Tolemais mi poogolosos see Kasaliya mapoo disos. Iba omapoo odoo to tekepo takeli Pilipiyo mosos mapoo dabalame disos. Pilipi yo daga odoo pidili dikonos odoo 7 hesia eyo kulodu hee yosos.

<sup>9</sup> Egeesos ma kulodu Pilipiyo owolos sobos obuos bakadio bakadio di, diba Godee maga to tolosos kokodos takomos silesibilis odoo debeisos.

<sup>10</sup> Biame abos omapoo doboome, Godee maga to tolosos kokodos takomos sili odoo Agabus Yudiya magas simisos.

<sup>11</sup> Yayos sibilisos Polowos gudu tamagosos see eyo nediliyo o dee sabolos o homos sabolos tialogolosos egeesee takasos, “Dio Tei oso egeesee takosos, ‘Yelusalem mapoo debeli Yu odoo oso gudu sodu ti oso amas hageesos tialogolosos magolosos Yu odoonee mapoo tenelaisos,’ disos.”

<sup>12</sup> Ibolos osolosos omapoo debelis odoo abos sabolos goos hagee dulolosos, Polos mapoo howolone egeesee takasos, “No Yelusalem mapoo na diye,” dee takemeleesos.

<sup>13</sup> Esinos Poloyes imapoo egeesee takasos, “Bei kasis magas niyo pupusigas sabolos amapoo goohelis ka tonowala? A Yelusalem mapoo tiso tialogolosos magalais goos hedebe mapoo mopoodos dele. Esinos Yesuwos goos magas talais sabolos mopoodos doosos,” disos.

<sup>14</sup> Osolosos ee mas kulodus iba yayos Yelusalem mapoo dileis hamagas takaelis egeelis. Esigas hagas nas goolees dolosos egeesee takasos, “Hagee Lodeeye goomogas goos dagas, goos hagosos peledabalais tekepos,” disos.

<sup>15</sup> Iba goos hagees koodobulosos, ibadas bis tolosos Yelusalem mapoo disos.

<sup>16</sup> Iba Yelusalem mapoo sibilisos peledoboome, tei telaga odoo abos osos ibolos iba Kasaliyas magas sibatees odoo osos iba Nasoneeyos mosopoo iyados disos. Yo Saiples mi te mapoo badelis. Osolosos yo dagas hoogoo tei tolosos badebeisos.

<sup>17</sup> Iba Yelusalem mapoo dilesos peledoboome, tei telaga odoo osos iba ogolosos diyas goomogasos.

<sup>18</sup> Osolosos omapoo tialosos biames hee mapoo Polobolos hodobos Yemes agalame disos. Esemme ibas omapoo dilesos egeinos, sosees wiligis odoo susugas osos yibolos badoboome egeisos.

<sup>19</sup> Osolosos Poloyes dibas ogolosos, dimapoo emegei di to takolosos, Godeeyes yimagas Yus odoonee mapoo goos toowa moodos susugas ee medees oposusos.

<sup>20</sup> Osolosos diayos goos hagee dulolosos Godee mapoo diyas goomogasos. Esemme diayos Polos mapoo egeesee takasos, “Emegei, nayos mi hagee ege. Yu odoo susugas osos olo tei telagasos. Esinos diba see Moseseeyes eligis goos ee dadalais onos goos toowa delisos.

21 Osoloso odoo aboso dimapoo nee goo maga gamenee takolone egeesee takaso, 'Poloye Yu odoo mi abo mapoo debeli dimapoo takolone: Moseseeye eligi goo sabolo, osoloso holaiso kolo koolai goo sabolo, osoloso Yu odoo ibada adaga dia goo abo sabolo na deede, dee takomo silo,' diso.

22 Esiga goo diayo du hagee tei goonee daga, iyo kasee moodolaisomo? Bei, diayo no hamapoo peledaba duga, namapoo kamanalaiso.

23 Esiga no iyo goo takooga, no goo hagee medee te. Goo ee ma kulodu sosee eyo kulodu odoo bakadio bakadio di oso tou hee talame Godee mapoo to magooso.

24 Esino diayo Godeeyo tou tomo silee biame oso koodobilei koola tooooso. Esiga no diayo tei moso mapoo wudu walame mopoodoo dalame duga, no dibolo diye. Osoloso diayo mopoodoo doo oso koodobuoga, niba susuga Moseseeye eligi goo ee dodolone, Godee mapoo emegei di bi tenee. Esino nayo diayo emegei di bi tenee ee eyo nei molee tenee. Osoloso goo susuga hagee koodobuoga, diayo wudu walai tekepo. Esiga nayo goo hagee medee deedeega, Yu odoo susuga oso ogoloso, diayo no Moseseeye eligi goo ee dodomo silo dee gooleedalaiso. Osoloso diayo nee goo maga taka du ee tei goonee dee gooleedalaiso.

25 Esino goo hagee Yu odoonee tei too odoo dibada goonee. Bei, iyo dimapoo to hogugu olo teneeso. Osoloso iyo to hogugu ee ma kulodu egeesee hoguguso, 'Niba gamenee godee mapoo nali bi tenee toloso na ne. Osoloso sawo na ne, osoloso hwei sawo sabolo mologa na ne, osoloso odoo hee mapoo goo heli na te,' diso."

26 Osoloso biame hee mapoo Poloye odoo bakadio bakadio di gilimadoloso wudu walame mopoodoo dalai biame bei mooloogooso.

Eseme Poloye tei moso mapoo peleso wiligi odoo taba mapoo egeesee takaso, "Iba biame 7 ee ma kulodu mopoodoo koodobuloso, hamamee Godee mapoo emegei di bi tenelaiso," diso.

*Polo neliga moso mapoo todilame too*

27 Osoloso biame 7 hagee koodobilei koola toooome, Yu odoo abo Asiya mi maga sibadee odoo oso Polo tei moso kulodu badoboome egeiso. Osoloso diayo mosobia ee ma kulodu kamanali goo toowa poudoloso Polo tooso.

28 Osoloso diayo toso agadigilone egeesee takaso, "Isalael odoo, niyo iba pidi! Odoos hagoso mi susuga mapoo silone, Moseseeye eligi goo sabolo, Isalael odoowo goo sabolo, osoloso ibada tei moso sabolo maga gamenee takeliso. Osoloso epei Guliki odoo ee ibada tei moso mapoo ido pala oso ibada tei moso Godeeyo howo woola tokenee paso," diso.

29 (Yu odoo hagee bia oso Yu odoonee Epeses mapoo badeli, Tolopimus, Polo dio Yelusalem mapoo silee ogoloso, diayo goolee, Poloye yo dibada tei moso mapoo ido palabele dolone egeesee taka.)

30 Osoloso Yelusalem odoo susuga oso diya komonolone, hodobo hoguo sibilesa Polo tei moso maga peegoo pupumo dilesa, tei moso osulu saga kisiso.

31-32 Osoloso diayo Polo wooloomalame debeiso. Esino Loum ha teli wiligi odoo taba Yelusalem mapoo kamana goo ee duloso, ha teli odoo sabolo, osoloso dia gibadeli odoo sabolo gilimadoloso, odoo mooloogoodoo mapoo saga hoguga sibadeeso. Eseme odoo Polo woomelee ha teli odoo oso sibadee ogoloso, omapoo koodobiaso.

33 Osoloso ha teli wiligi odoo taba oso Polo toloso, o odoo oso ki ti bakadio oso tialeegee doloso, yayo Yu odoo mapoo egeesee takaso, "Odoos



hagee ogumo? Osoloso yo goo toke-nee kasee toga ka woolaiyo?" diso.

<sup>34</sup> Osoloso odoo susuga oso goo opusomo opusomo di takolone to neligidi takaso. Egeeseelone ha teli wiligi odoo taba oso dia to medee tele. Esiga o odoo mapoo Polo toloso, Polo yo ha teli odoowo mosopoo ido di, diso.

<sup>35-36</sup> Ha teli odoo oso Polo dia moso mapoo todime, odoo abo oso hamamee sibulone, to neligidi egeesee takomo sibadeeso, "Yo wooloome! Yo wooloome!" diso. Osoloso Polo yo bo maga palame tobudume, ha teli odoo oso yo imado palaso. Bei, edebeeyo Polo wooloomalame diya alabume.

<sup>37-38</sup> Esino ha teli odoo oso Polo dia moso kulodu ido dilame doboome, Poloye ha teli wiligi odoo taba mapoo egeesee takaso, "Ayo namapoo to takalai tekepowa?" diso.

Ha teli wiligi odoo taba oso Poloye yimapoo Guliki toso taka duloso egeesee takaso, "No Guliki to kasee gooleedoowo? Ayo goolee, no Isipi odoo biame hee hamamee hagoo ibada gamalee odoo sabolo ha tomo silone odoo wooloomali odoo 4,000 gilimadoloso miwe poogoo mapoo gilimadodi odoo oso beledee."

<sup>39</sup> Esino Poloye egeesee takaso, "Odo egee anee. A Yu odoo Kilikiya mi toowa ee ma kulodu Talesas mi mapoo badeli. Mo mi hu toowa moloso. Esiga ayo odoo susuga hagee bia mapoo to takalai tekepowa?"

<sup>40</sup> Esememe ha teli wiligi odoo taba oso Poloye to takalai soowa, dee takeme, yo toboloso bo mapoo tobudulone, odoo to koodobilame odoo mapoo dee wabisaso. Osoloso odoo susuga oso to koodobuloso doboome, yayo Hibulu toso dimapoo to takalai bei mooloogooso.

## 22

### *Poloye Yu odoo mapoo o goo taka*

<sup>1</sup> Poloye to takalai bei mooloogolone egeesee takaso, "Ma dio, ei dio, osoloso molo dio, niba ayo mawo pidi to takooga, medee dui!" diso.

<sup>2</sup> Osoloso Yu odoo Poloye dia Hibulu toso taka duloso, to koodobuloso medee dobolone dumeleeso.

<sup>3-4</sup> Poloye egeesee takaso, "A Yu odoo Kilikiya mi toowa ee ma kulodu Talesas mi mapoo soomagoo. Esino Yelusalem mi hamapoo badolone kauwudooso. Osoloso Gamaliyoye a eligime, ayo ibada amawe diayo tei magoo medee gooleedooso. Esino epei niyo goolee Godeeyo tou bele dolone, komonolone a wooloomalame ka seeso. Osoloso daga a see goo ee Godeeyo tou bele dolone, ayo kitulugu toowa magolone, Yesu mapoo tei telaga odoo wooloomalame dimapoo dala toowa teneliso. Osoloso ayo giso sabolo, sobo sabolo, toloso neliga moso ma kulodu huyaseliso.

<sup>5</sup> Osoloso tei moso wiligi odoo taba sabolo, Yu odoowo wiligi odoo tebisa sabolo, oso mo goo hagee diba gooleedooso. Bei, diayo tei telaga odoo Damasko mapoo debeli toloso neliga moso mapoo toosoolame, amapoo to hogugu tenelone egeesee takaso, 'Niba dilesa Damasko wiligi odoo tebisa mapoo to hogugu tenelone, tei telaga odoo toloso Yelusalem mapoo iyado sibadee, diba dala toowa talame,' diso.

<sup>6</sup> Ayo egeeseemo silone, biame heeso Damasko mi mapoo tei telaga odoo talame diso. Domo mapoo osoko oo domo mapoo Damasko mi koola mapoo dimeleeno, kei ma dokodooga gadeebugu sibilesa a tooso.

<sup>7</sup> Esememe a mi mapoo homodobuloso tiamolome, toso egeesee takeme duso, 'Solo, Solo, nayo kasi maga amapoo dala ka tonowala?' diso.

<sup>8</sup> Esememe ayo nei yimapoo egeesee takaso, 'Wiligi odoo, no ogumo?' Yayo nei egeesee takaso, 'A Nasalet odoo, Yesu. Nayo tei telaga odoo

dimapoo dala egee tenemolo ee nayo amapoo tenemoloso,' diso.

<sup>9</sup> Ee ma kulodu odoo abolo diyadee diba gadeebugu egeiso, esino to yayo taka medee dule.

<sup>10</sup> Esemee ayo egeesee takaso, 'Lodee, ayo ogo goo talaisomo?' diso.

Esemee Lodeeye amapoo nei egeesee taka, 'No toboloso Damasko mi mapoo di. Mi omapoo ayo goomoga goo nayo talai ee takalaiso,' diso.

<sup>11</sup> Esino gadeebugu oso mo howo sime, odoo abolo diyadee oso Damasko mi mapoo dulone, mo dee mapoo toloso ido diso.

<sup>12</sup> A Damasko mapoo dileso pele-doboome, odoo hee Ananayaseeye a agala simiso. Yo Moseseeye eligi goo ee medee dodomo sili odoo. Osoloso Yu odoo Damasko mi omapoo debeli oso yo tekepo odoo, dee takeliso.

<sup>13</sup> Osoloso yayo sibilesa ama koola hapoosee tobudulone egeesee takaso, 'Solo, emegei, no see tobu ege!' diso. Esemee epedee omapoo mo howo see tekepo poome, ayo yo egeiso.

<sup>14</sup> Esemee yayo amapoo egeesee takaso, 'Ibada amawe dia Godeeye goomoga goo ee gooleedalame, yayo no olo hesiaso. Osoloso nayo odoo tekepo Keliso ogoloso o to medee dulame.

<sup>15</sup> Esiga nayo o goo ee odoo susuga mapoo nayo du sabolo, osoloso nayo egei sabolo, yiligamo sileiso.

<sup>16</sup> Esiga no ogo bamalala? No saga toboloso howo olugi. Osoloso Yesu mapoo takee, yayo nee tokenee hapoloso boobado bigilame,' diso.

<sup>17</sup> Hamamee a Yelusalem mapoo wedi dileso tei moso mapoo Godee mapoo takomolome, Lodeeye mo howo opusomo diso.

<sup>18</sup> Mo howo opusomo deme, Lodeeye amapoo to takomolome egeiso. Egeeseelone yayo amapoo egeesee takaso, 'No saga toboloso Yelusalem

poogoo di! Bei, odoo hamapoo egee do oso, nayo mo goo takemelee dulo, tei talai megona,' diso.

<sup>19</sup> Esino ayo Lodee mapoo nei egeesee takaso, 'Odoo susuga, diba gooleedooso, ayo howo gisili moso susuga mapoo silone, tei telaga odoo toloso neliga moso kulodu tooseli, osoloso diba wooloogali goo ee.

<sup>20</sup> Osoloso diba gooleedooso, nee tou teli odoo, Sitiben, woolooma bi-ame mapoo a badebeiso. A dibolo goo goolee hedebe diso. Osoloso dibada kekeisu dugo tigadoo ayo bameleeso.'

<sup>21</sup> Esino Lodeeye amapoo egeesee taka, 'No epedee di. Bei, no ayo mi hamaga eli sage Yu odoonee oso debeli mi mapoo diye dalaiso,' diso."

<sup>22</sup> Osoloso Polo daga o to bei mooloogoloso takomo silee domo mapoo odoo mooloogoodoo oso o to medee dulone debeiso. Esino see yayo Yu odoonee eyo goo takomolome, diayo duloso komonolone to neligidi egeesee takaso, "Wooloome! Wooloome! Yo mipoo hamapoo badalai tekeponee!"

<sup>23</sup> Egeeseelone diayo to neligidi takolone, kamana goo eligilone, dia kekeisu dugo tigadoloso mogoukee deeso keesee doloso dokodoo togobuguso.

<sup>24</sup> Esemee ha teli wiligi odoo taba oso Polo dibada mosopoo ido dileso woosolone, yo ka woolame o odoo mapoo takaso. Bei, odoo mooloogoodoo oso Polo mapoo komonolone, to neligidi taka goo eyo bei Poloye yimapoo takalame yo goomogaso.

<sup>25</sup> Osoloso ha teli odoo oso Polo woolame, ki tiso o dee homo mapoo tialogo molome, Poloye ha teli odoo ee gibadeli hee koola mapoo tobudume, yimapoo egeesee takaso, "Esiga nibada tei magoo oso takolone, niyo tei Loum odoo goo mauwe mosoowe weeye, dee taka molosomo? Haye! Mauwe. Bei, niyo mo goo medee midile," diso.

<sup>26</sup> Esem ha teli odoos ee giba deli oso to hagee duloso, dileso o wiligi odoos mapoo egeese takaso, "Nayo goo tomo silee gooleedoso? Bei, odoos hagee tei Loum mi mapoo badeli. Esiga ibada teiso egeese takoso, 'Loum mi mapoo badeli odoos ee mosoowe goo mauwe woolai tei,' deliso, diso."

<sup>27</sup> Esem diba wiligi odoos taba yo dio dulone, yayo Polo mapoo dileso egeese takaso, "Nayo amapoo takee, no tei Loum odoos?"

Poloye nei egeese takaso, "O, a tei Loum odoos," diso.

<sup>28</sup> Egeese ha teli wiligi odoos taba oso nei yimapoo egeese takaso, "A tei Loum odoos dalame, nei molee toowa magoos."

Esino Poloye yimapoo egeese takaso, "A tei Loum odoos dalame nei molee toowa ka magele. Bei, a soomagoo biame mapoo a tei Loum odoos paso," diso.

<sup>29</sup> Esem ha teli odoos oso Polo woolame dobolone, to hagee duloso peegoo diyadeeso. Osoloso diba wiligi odoos sabolo diya ebigaso. Bei, diayo tei Loum odoos ki tiso tialogoloso woolame seme.

### *Poloye odoos midilame Yu odoos oso to mou mapoo ido pala*

<sup>30</sup> Osoloso biame hee mapoo ha teli wiligi odoos taba oso Polowoo goo medee gooleedalame, tei moso wiligi odoos tebisa sabolo, osoloso Yu odoos wiligi odoos tebisa sabolo, to meilame gilimaso. Osoloso diayo Polo ki tiso tialogoo puobuguloso, odoos mooloogoodoo dia mudugiyopoo tebidiso.

## 23

<sup>1</sup> Osoloso Poloye wiligi odoos tebisa oso mooloogoodoo mapoo bolone egeese takaso, "Emegei, ayo badebei biame susuga mapoo, a Godeeyo howo woola silone, mo sooloo ma kuloduga goo goolee oso goolee ayo

tomo sili goo ee tekepo gooleeso," diso.

<sup>2</sup> Esem tei moso wiligi odoos taba Ananayaseeye to hagee duloso, odoos abo Polo koola ogolone debei dimapoo egeese takaso, "Polo maga mapoo wee!" diso. Esem odoos heeso Polo maga mapoo weiso.

<sup>3</sup> Esino Poloye Ananayas mapoo egeese takaso, "Nayo a wei eyo nei Godeeye no woolaiso. Esiga no goo goolee bakadio gweli odoos. Bei, nayo Moseseeye tei magoo sabolo mo goo midiliso. Esino epedee nayo a wei oso no tei magoo gababiaso," diso.

<sup>4</sup> Esem Poloye tei moso wiligi odoos taba mapoo egeese takeme, odoos Polo koola ogolone tebisa melee oso nei egeese takaso, "Nayo Godeeyo tei moso wiligi odoos taba mapoo to egeese na takee!" diso.

<sup>5</sup> Poloye nei egeese takaso, "Emegei, odoos hagee tei moso wiligi odoos tobagodi, a gooleede. Godeeyo to booka mapoo hogugu hagoso, 'Nibada odoos wiligi odoos taba mapoo to tokenee na takee,' diso."

<sup>6</sup> Osoloso mooloogoodoo ee ma kulodu Poloye Sedisi odoos abo sabolo, osoloso Pelisi odoos abo sabolo egeiso. Esem yayo to neligidi egeese takaso, "Emegei, a Pelisi odoos, osoloso mo ma nose Pelisi odoos. Esino ayo odoos wedia maga hogogabilei goo mapoo tei teme, goo midili mapoo todilesos hagee badoso," diso.

<sup>7</sup> Esem Poloye egeese takeme, mooloogoodoo abo puloso toso agadigasos.

<sup>8</sup> Bei, Sedisi odoos diba tolosos hogaabilei goo mapoo tei koo teli. Osoloso diayo tei tolone, Godeeyo momaiye sabolo dio sabolo mauwe, dee take-liso. Esino Pelisi odoos susuga goo hamapoo tei teliso.

<sup>9</sup> Esem ee ma kulodu wiligi odoos oso mooloogoodoo abo puloso toso diya agadigasos. Osoloso Godeeye tei

magoo ee eligili odoo abo Pelisi odoo dia mooloogoodoo ee ma kulodu badeli oso toboloso kitulugu sabolo egeesee takaso, "Iba odoo hamapoo goo tokenee koo ogo. Iba gooleedele, dioso o, Godeeyo momaiye oso yimapoo to taka molodoo," diso.

<sup>10</sup> Esememe toso agadiga toowa deme, Pelisi odoo sabolo Sedisi odoo sabolo abo puloso, biliga toowa bei mooloogooso. Osoloso ha teli wiligi odoo taba oso o odoo mapoo Polo wooloomeyaga, dibada mosopoo ido diye diso.

<sup>11</sup> Osoloso gesi mapoo Lodee sibilesa, Polo koola ogolone tobudulone egeesee takaso, "No haga na ebi! Nayo Yelusalem mapoo mo goo taka egeesi masi Loum mapoo mo goo takalaiso," diso.

#### *Yu odooso Polo wooloomalame to magoo*

<sup>12</sup> Osoloso gesikolo Yu odoo aboso Polo wooloomalame to kitulugu magolone egeesee takaso, "Iyo Polo wooloomelega dogaa, nei sabolo howo sabolo nalai. Esino iyo yo wooloomaloso, nei sabolo howo sabolo ka nalai," diso.

<sup>13</sup> Mooloogoodoo ee ma kulodu, Yu odoo 40 egeesi masi oso to egee ka magoo.

<sup>14</sup> Osoloso diayo dileso tei moso wiligi odoo tebisa sabolo, Yu odoowo wiligi odoo tebisa sabolo, dimapoo egeesee takaso, "Iyo Polo wooloomalame to kitulugu olo magooso. Esiga iba nei sabolo howo sabolo nelega doso. Osoloso Polo wooloomaloso hamamee nei sabolo howo sabolo ka nalai.

<sup>15</sup> Esiga niyo ha teli wiligi odoo taba mapoo to hagee todilei, iba goomogoso. Niyo yimapoo egeesee takee, 'Nayo Polo toloso hamapoo ido sibe, iyo yimapoo woosalaiya,' diso. Esino iba eli domopoo bameleso Polo sibaga, yo wooloomalaiso," diso.

<sup>16</sup> Esino Polo o besiga oso to hagee duloso, ha teli odoowo moso mapoo

dileso, Polo ogoloso yo wooloomalame to magoo yimapoo takaso.

<sup>17</sup> Osoloso Poloye ha teli odoo gibadeli gilimadoloso yimapoo egeesee takaso, "Mo besiga hagos nibada wiligi odoo taba mapoo to toodagalame simina, esiga yimapoo ido di," diso.

<sup>18</sup> Esememe ha teli gibadeli odoo oso Polowo besiga ido dileso, o wiligi odoo mapoo egeesee takaso, "Neliga moso ma kulodu badeli Poloye a idoloso o besiga hagee namapoo ido sibena. Bei, yayo namapoo to toodagalama simigona," diso.

<sup>19</sup> Osoloso wiligi odoo taba oso Polowo besiga dee mapoo toloso, obusomo peegoo ido dileso dobolone, yimapoo egeesee takaso, "Nayo amapoo ogo goo takalame ka simiyo?" diso.

<sup>20</sup> Esememe Polo besigaye nei egeesee takaso, "Yu odoo abo diba goomogogona, godigi dibada wiligi odoo tebisa oso to mou mapoo nayo Polo ido dilame. Osoloso omapoo diayo Polo mapoo see woosalai doloso gamenee takalaiso.

<sup>21</sup> Esino no dia to mapoo tei dee na see! Egeeseelone, no Polo omapoo na ido di. Bei, odoo bei, 40 egeesi eli domopoo yo wooloomalame dabalaiso. Esiga odoo hagee bia to kitulugu magoloso Polo wooloomalame nei sabolo howo sabolo nalai teyuloso doso. Esiga diba olo mopoodoo doloso nayo to nei taka dulame doso," diso.

<sup>22</sup> Osoloso wiligi odoo taba oso Polowo besiga diye dolone, yimapoo egeesee takaso, "Nayo dileso odoo mapoo takolone, nayo amapoo taka goo ee ayo takago, dee na takee," diso.

#### *Polo Kasaliya mapoo todi*

<sup>23-24</sup> Osoloso ha teli wiligi odoo taba oso ha teli odoo gibadeli bakadio gilimadoloso dimapoo egeesee takaso, "Niba epedee Polo Kasaliya mapoo ido di. Omapoo dulone,



odoo 200 kaiya talaga sabolo, osoloso odoo 200 tio talaga sabolo, osoloso odoo 70 be hosee maga dilei toloso, Kasaliya mapoo dilame mopoodee. Niba egeesee mopoodoo doloso, epei gesi odoo susuga tiesaga, Kasaliya mapoo ka dilei. Niyo egeeseelone, Polo mapoo be hosee hee yimapoo tenee, yo gamalee odoo Peliks mapoo medee ido dilesa peledabalame,” diso.

<sup>25</sup> Egeeseelone yayo gamalee odoo Peliks mapoo to hageesee hoguguso:

<sup>26</sup> Emegei, gamalee odoo Peliks hu toowa too, a Kolodiyas-Lusiyas,

<sup>27</sup> Yu odoo oso odoo hagee toloso wooloomalame seeso. Esino yo tei Loum odoogo di duloso, ayo mo odoo sabolo yo toloso mada peegoo ido diso.

<sup>28</sup> Osoloso ayo o goo dulame, Yu odoowo wiligi odoo tebisa diayo to mou mapoo ido diso.

<sup>29</sup> Yu odoo oso taka Poloye dibada tei magoo gababiaso, diso. Esino yayo Loum odoowo tei toowa magoo gababile. Esiga yo wooloomalai o, neliga moso ma kulodu husilei yimapoo goo hee mauwe.

<sup>30</sup> Esino Yu odoo abo oso Polo wooloomalame mopoodoo doo duloso, yo namapoo ido diye, diso. Osoloso ayo Yu odoo abo sabolo namapoo diye diso, diayo yo gowe goo ee takalame. Mo to oso.

<sup>31</sup> Osoloso gesi ha teli odoo oso dia wiligi odoowo to duloso, Polo Kasaliya mi mapoo ido dulone, eli domopoo Antipatilis mi mapoo sibilesa peledabaso.

<sup>32</sup> Biame hee mapoo be hosee maga dili odoo oso Polo Kasaliya mi mapoo ido dumolome, ha teli odoo abo Yelusalem mapoo wedi diyadeeso.

<sup>33</sup> Odo be hosee maga dili oso Kasaliya mapoo sibilesa peledoboloso, gamalee odoo Peliks mapoo dia wiligi odoo taba oso

to hogugu teneeso. Osoloso Polo yimapoo teneeso.

<sup>34-35</sup> Esem gamalee odoo oso to hogugu hagee hesigaloso, Polo mapoo egeesee takaso, “No mi kamapoo badeliyo?” Esino Poloye yimapoo egeesee takaso, “A Kilikiya mi toowa mapoo badeli,” dee takeme, yayo nei egeesee takaso, “Odo namapoo kamanali hamapoo peledobooga, ayo nee goo midileiso,” diso. Esem yayo o odoo mapoo Polo Helodeeye moso toowa tegei mapoo ido dilesa, medee bamelee, diso.

## 24

### *Yu odooso Polowo goo ee Peliksiyo howo woola taka*

<sup>1</sup> Biame dee tiadoo poogoloso hamamee, tei moso wiligi odoo taba Ananayas sabolo, osoloso Yu odoowo wiligi odoo tebisa abo sabolo, Kasaliya mapoo gamalee odoo Peliksiyo howo woola Polowo goo midilame sibadeeso. Diayo sibulone, goo midilei mapoo Polowo goo takalame, odoo hee Loumowo tei magoo gooleedoo odoo Teletulus ido simiso.

<sup>2</sup> Osoloso diayo goo midili moso mapoo polomologa, Peliksiye Polo hamapoo sibeye, diso. Esem Poloye goo midili moso mapoo sibilesa badoboome, Teletuluseeye Polowo goo takalame bei mooloogolone egeesee takaso, “Peliks, no ibada wiligi odoo hu toowa too. Bei, nayo ibada mi toowa bamologa, mesie ka doso. Osoloso goo tokenee susuga ee nayo pidi maga medee tekepo moodeliso.

<sup>3</sup> Esiga iyo goo susuga ogoloso, namapoo emegei di sabolo goomoga to sabolo ka takooso.

<sup>4</sup> Esiga iyo namapoo hegi goo teneeyaga biame sage nobolo to kalai koo goomogo. Esino ayo namapoo howolone ka taka, no wulo biame deiyepo mapoo to hagee dui,” diso.

<sup>5</sup> Osoloso Teletuluseeye egeesee takaso, “Odoos hagee tokenee goo eligimo sili. Bei, yayo mi toowa susuga mapoo goo eligimo sili maga Yu odoos oso kamanaliso. Osoloso yinosee Nasalet odoos Yesu dedeli dia wiligi odoos taba.

<sup>6</sup> Osoloso yayo goo hee moodoos. Esino yayo ibada tei moso Godeeyo howo woola tokenee palame seme, iyo yo toosoo. [Osoloso iyo ibada teiso o goo midilame goomogaso.

<sup>7</sup> Esino ha teli wiligi odoos taba, Lusiyaseeye kitulugu sabolo sibilesos Polo imaga ido diso.

<sup>8</sup> Osoloso Lusiyaseeye Peliks namapoo sibilesos Polowo goo midiye dolosoo imapoo egeesee takaso.]\* Esiga no nosee Polo mapoo woosaloo ogoga, to nei yayo taka dulosoo, nayo tei goo iyo Polowo goo taka dulosoo gooleedalaisoo,” diso.

<sup>9</sup> Osoloso Yu odoos abo Teletulusboloo sibadee oso Peliks mapoo takolone egeesee takaso, “O, Teletuluseeye egee takoo tei takoo,” diso.

### *Goo midi mapoo Poloye o goo eyo nediliyo taka*

<sup>10</sup> Osoloso gamalee odoos oso Polo no to takee neme, nei Poloye egeesee takaso, “Peliks, a gooleedoosoo, no dugo susuga ee ma kulodu ibada mi hamapoo badolone goo midiliso. Esiga ayo to nei namapoo takalai, a goomogoo.

<sup>11</sup> Nayo medee dui. Nayo goo hagee odoos abo mapoo takooga, diayo namapoo goo hedebe hagonosee takalaisoo. Goo ee ayo Godeeyo hu poudalame, Yelusaleem mapoo di biame 12 poogolosoo ka badosoo.

<sup>12</sup> Esiga a Yelusaleem mapoo badolone, Yu odoowo tei moso mapoo odoos hee saboloo koo agadigeli. Osoloso howo gisili moso ma kulodu, osoloso Yelusaleem mi mapoo silone, odoos kamanalame koo moodeli.

<sup>13</sup> Esiga Yu odoos hamapoo egee doos oso mo goo namapoo fo opusomoo opusomoo di taka goo susuga ee tei goonee.

<sup>14</sup> Esino diayo taka eyo kulodu, goo heeno tei goo. Ee, ibada amawe dia Godeeyo hu poudalame, ayo Yesu mapoo tei telisoo. Esino Yu odoosoo takeliso, Yesuwo goo eligi saboloo diayo eligi saboloo hedebeenee. Esino a Moseseeye eligi goo saboloo, osoloso Godee maga to tolosoo kokodoo takomoo silesibili odoos oso to hogugu mapoo tei telisoo.

<sup>15</sup> Esiga Godeeye tekepo odoos saboloo tokenee odoos saboloo ta maga see hogabidilei goo mapoo Yu odoosoo tei tolosoo egee do, goo hedebe mapoo anosee tei telisoo.

<sup>16</sup> Esiga goo hageesi maga, a Godeeyo howo woola osoloso odoos howo woola goo tekepo talai goomegelisoo.

<sup>17</sup> A Yelusaleem poogoo dilesoo mi abo mapoo silone dugo abo poogoo. Omapoo silosoo, see Yelusaleem mapoo wedi simisoo, bi mauwe odoos mapoo emegei di bi molee tenelame, osoloso Godee mapoo emegei di bi tenelame.

<sup>18-19</sup> Esino a tei moso mapoo badolone, Godee mapoo emegei di bi tenelai ee mopoodoo dolone badebeisoo. Omapoo badolone, odoos susuga badele, osoloso kemenele. Osoloso ee ma kulodu Yu odoos oso sibilesos a egeisoo. Esino dima kulodu, Asiya mi maga sibadee Yu odoos oso mo goo maga diya kamasoo. Esiga bei kasi maga odoos hagee bia hamapoo mauwe ka dosomoo? Odoos hagee bia oso sibilesos mo goo namapoo takalai tekepo.

<sup>20</sup> Esino odoos egee bia hamapoo mauwe. Esiga Peliks, nayo Yu odoos hagee do mapoo woosalai tekepo, diayo a Yelusaleem mapoo dibada wiligi odoos tebisa oso to mou mapoo ido pelesoo dogaa, mo goo tokenee edebeeyo egei ee takalai tekepo.

**24:6:** Diye 21:28-30 \* **24:8:** To hagee odoos abosoo taka, Lukaye hogugu, delisoo. Esino odoos abosoo taka, Lukaye hogugule, odoos heesoo hamamee hoguguna, dee takeli. **24:15:** Yon 5:28-29 **24:18-19:** Diye 21:17-28 **24:21:** Diye 23:6

<sup>21</sup> Esino ayo goo hedebe hagee di-ayo to mou ma kulodu to kitulugu sabolo egeesee taka, 'Esino niyo we-dia maga see hogogabilei mapoo tei teme goo ka midiso,' diso."

<sup>22</sup> Esino Peliks yo Lodeeyo goo ee olo duloso badebeiso. Osoloso odoo mooloogoodoo mapoo egeesee takaso, "Iba Polowo goo midilei epedee hamapoo koodobileiso. Esiga see ha teli wiligi odoo taba Lusiyas siboga, Polowo goo see midileiso," diso.

<sup>23</sup> Osoloso Peliksiye ha teli gibadeli odoo hee mapoo egeesee takaso, "Niba Polo medee bolone, yimapoo hegi goo hee na tenee. Osoloso emegei odoo heeso yo pidilei na hamaga takee," diso.

<sup>24</sup> Osoloso biame abo poogoloso, Peliksiye osobo Dulusila dio Polo agalame sibadeeso. Peliksiyo osobo Dulusila ee Yu sobo. Osoloso di-ayo sibilesa egeesee takaso, "Polo yo hamapoo ido sibe," diso. Esem Poloye sibilesa Yesu Keliso mapoo tei talai goo ee takomolome, Peliksiye medee dumeleeso.

<sup>25</sup> Yayo dulone badolone, Poloye yimapoo tekepo badalai goo sabolo, osoloso tokenee goo teyaga su kookoodalai goo sabolo, osoloso Godeeye biame hamameedee mapoo goo midilei goo sabolo takaso. Esem Peliksiye to hagee duloso obulone, yimapoo egeesee takaso, "Oso, omapoo koodobie! Amapoo biame hee mologa, no see sibe dalaiso," diso.

<sup>26</sup> Egeesi ma kulodu Peliksiye mada egeesee gweliso, "Poloye amapoo molee teneega, molee oso ayo nei Polo ee neliga moso ma kuloduga peegoo ido dileiso," diso. Yayo egeesee goolone badolone, biame abo mapoo Polo sabolo to kalame yo iliso.

<sup>27</sup> Esino dugo bakadio poogoloso hamamee Peliksiye o gamalee tou teli maga peegoo dime, see odoo

heeso badebeiso, o hu Posiyus-Pestus. Esino Yu odoo oso goomogalame, Peliks o tou teli maga peegoo dilega badolone, yayo Polo neliga moso mapoo osee badebee, diso.

## 25

### *Polo o goo Sisaye midilame taka*

<sup>1</sup> Pestuseeye gamalee hu tolosa biame bakadio hedebe di poogoloso, see Kasaliya mi maga Yelusalem mapoo simiso.

<sup>2-3</sup> Yayo omapoo simi biame mapoo, tei moso wiligi odoo tebisa sabolo, osoloso Yu odoowo wiligi odoo tebisa abo sibilesa yimapoo Polowo goo egeesee takaso, "Polo yo goo tokenee tooso. Esiga no iyo goomoga goo ee moodee. Egeeseelone Polo see Yelusalem mapoo ido sibeye, dee takee," diso. Bei, diba Polo Yelusalem mapoo sibumologa, mada eli domopoo wooloomalame goomogaso.

<sup>4</sup> Esino Pestuseeye egeesee takaso, "Haye, Polo yo Kasaliya omapoo osee badalaiso. Yelusalem mapoo ido sibileime. Esino a biame abo poogoloso hamamee see Kasaliya mapoo wedi dileiso.

<sup>5</sup> Esiga nibada wiligi odoo tebisa see abolo dilei tekepo, diayo tei Poloye goo tokenee too egei omapoo takalame," diso.

<sup>6</sup> Pestus biame 10 egeesi Yelusalem mapoo poogoloso, see Kasaliya mapoo wedi diso. Yo Kasaliya mapoo dileso, tialoso biame hee mapoo goo midili moso mapoo peleso, yayo badeli debi mapoo badolone, Polo yo sibeye doloso odoo abo mapoo to teneeso.

<sup>7</sup> Esem edebeeyo Polo yo goo midili moso mapoo ido polome, Yelusalem maga sibadee Yu odoowo wiligi odoo tebisa oso Polo to-budume, pee maga tebisaloso silodoboloso, Polowo goo mapoo to opusomo opusomo di takolone, Polo yo diya tokenee odoo dee takaga

meleeso. Esino diayo to opusomo opusomo di taka ma kulodu, Pestuseeye tei goo egele.

<sup>8</sup> Esem Poloye eyo nediliyo pidilei to takolone egeese takaso, “A Yu odoowo tei hee gababile. Osoloso ayo ibada tei moso eyo hu mapoo tokenee goo takele. Osoloso Loum mi toowa wiligi odo taba Sisayo goo mapoo tokenee goo takele,” diso.

<sup>9</sup> Esino Yu odo oso goomogalame, Pestuseeye Polo mapoo egeese takaso, “Iba susuga oso Yelusalem mapoo dileso nee goo omapoo midilei tekepowo?” diso.

<sup>10</sup> Esem Poloye nei egeese takaso, “A Yelusalem mapoo dileime. Bei, a Loum odoowo goo midili moso mapoo olo badoso. Esiga hamapoo mo goo midilei tekepo. Esino Pestus, no olo gooleedooso, ayo Yu odo mapoo tokenee goo hee moodele.

<sup>11</sup> Egeesi ma kulodu ayo goo tokenee too diepi, tei ee dodolone, a talai tekepo. Esino Yu odo oso mo goo wulo gamenee taka maga, odo heeso a Yu odoowo dee mapoo tenelai tekeponee. Esiga a Loum mi wiligi odo taba Sisaye mo goo midilei goomogo!” diso.

<sup>12</sup> Esem Pestuseeye yimapoo kokodo takeli odo sabolo goo hamapoo to mouloso, Polo mapoo egeese takaso, “No Sisaye nee goo midilei goomoga magooga, no Sisa mapoo ido dileiso,” diso.

### *Pestuseeye Agilipa mapoo Polowo goo taka*

<sup>13</sup> Biame abo poogoloso hamamee Yu odoowo wiligi odo taba Agilipaye omolo sobo holo, Benis sabolo Pestus mapoo emegei di to takalame Kasaliya mapoo sibadeeso.

<sup>14</sup> Osoloso biame bei diba Pestus sabolo omapoo debeiso. Osoloso omapoo osee doboome, Pestuseeye Polowo goo ee Agilipa mapoo opusususo. Yayo oposusulone egeese takaso, “Odo hee, Polo ee Peliksiye

neliga moso mapoo tooso osee badoso.

<sup>15</sup> Esino a Yelusalem mapoo dileso peledoboome, Yu odoowo tei moso wiligi odo tebisa sabolo, osoloso wiligi odo tebisa abo sabolo, sibilesa amapoo Polowo goo egeese taka, ‘Polo ee tokenee odo, esiga yo wooloome,’ diso.

<sup>16</sup> Esino ayo dimapoo egeese takaso, ‘Loum odo iyo odo hee goo mauwe koo wooloomali. Esino iba Loum odo oso goo midili ee egeesi. Odo hee ee goo midilei mapoo yimapoo goweli odo oso o goo takoloso koodobuoga, nei odo o goo eyo nediliyo takeliso. Osoloso hamamee goo midili odo oso yimapoo goo tokenee melee ogoga, yo wooloome, dee takeliso,’ diso.

<sup>17</sup> Esiga Yelusalem wiligi odo tebisa abo abolo hodobo hamapoo ka simi. Biame omapoo mo goo midilei boolooge. Esino a sibilesa, tialoso biame hee mapoo goo midilei moso mapoo peleso badolone, Polo yo hamapoo ido sibeye, diso.

<sup>18-19</sup> Ee ma kulodu ayo goolee, Polo yo tokenee goo toowa toobeele, diso. Esino Yu odo oso gamenee dibada howo gisili tei goo sabolo, osoloso odo hee Yesu, diayo olo taso deli, see Poloye odo ee see gie badoso, dee taka goo omapoo toso agadigaloso o goo midilame ido pala egeiso.

<sup>20</sup> Esino a goo hagee medee gooleedelega badolone, Polo mapoo egeese woosaso, ‘No Yelusalem mapoo dileso nee goo midilei soowayo?’ diso.

<sup>21</sup> Esino yo Yelusalem mapoo dilei goomegele. Esem yo Sisaye o goo midilame goomogaso. Esiga yo wulo epedee hamapoo badaliso. Osoloso ayo biame tekepo ogoga, yo Sisa mapoo o goo midilame ido diye dalaiso,” diso.

<sup>22</sup> Esem Agilipaye Pestus mapoo egeese takaso, “A odo hagoso taka goo mawo duleiyasa,” diso.



Eseme Pestuseeye yimapoo egeesee takaso, “No godigi yayo takooga duleiso,” diso.

*Polo yo Agilipa dio Benis dio mapoo ido simi*

<sup>23</sup> Osoloso biame hee mapoo Agilipa dio, Benis dio, hu toowa too odoos masi, dugo medee tekepo kalagaloso, goo midili moso mapoo paladeeso. Diba goo midili moso mapoo galaga dulone, ha teli odoowo wiligi odoos tebisa sabolo, osoloso Kasaliya mi wiligi odoos tebisa sabolo galaga diso. Osoloso diba susuga goo midili moso mapoo mooloogoodoloso doboome, Pestuseeye Polo ido sibe, diso.

<sup>24</sup> Eseme Poloye goo midili moso mapoo sibilesos tobudume, Pestuseeye egeesee takaso, “Wiligi odoos taba Agilipa nobolo, osoloso odoos susuga sabolo, odoos hagee ege! Yu odoos hamapoo egee do sabolo, osoloso Yu odoos Yelusalem mapoo debeli sabolo, oso odoos hamapoo diya gowoolone, amapoo to neligidi takolone, yo wooloomalai tekepo, dee takeliso.

<sup>25</sup> Esino ayo yo teli mapoo magalai o goo tokenee hee mauwena. Esino yo eyo goomoga oso Sisaye o goo midi diga, ayo yo Sisa mapoo ido di, diso.

<sup>26</sup> Esino goo hamapoo ayo ibada wiligi odoos taba Sisa mapoo Polowo goo maga to hogugulosos tenelai to mauwe. Esiga ayo yo nibada howo woola mapoo ka ido simi. Esiga Agilipa nayo yimapoo woose. Egeeseega to yayo nei taka ee ayo hogugulosos Sisa mapoo ka tenelaiya.

<sup>27</sup> Bei, neliga ma kulodu badeli odoos oso moodoo goo ee hogugule mosoowe sabolo Loum wiligi odoos taba Sisa mapoo diye dalai tekeponee,” diso.

## 26

*Poloye wiligi odoos taba Agilipayo howo woola mapoo o goo taka*

<sup>1</sup> Agilipaye Polo mapoo egeesee takaso, “Ayo epedee no nediliyo pidi to takalame namapoo biame teneeso.”

Eseme Poloye dee dokodoo poudoloso, to takalai bei mooloogoolone egeesee takaso,

<sup>2</sup> “Wiligi taba Agilipa, a epei Yu odoosoo mo goo mapoo goo opusomos opusomos di taka mapoo nei ayo mawo a pidi to namapoo takalai goomogo.

<sup>3</sup> Bei, no Yu odoos ibada adaga dia goo susuga sabolo, osoloso ima kulodu to agadigeli goo sabolo no gooleedoosos. Esiga ayo namapoo howasos, mo to hagee takoo medee dui.

<sup>4</sup> Egeesi ma kulodu, Yu odoos susuga oso ayo daga Yu odoos sabolo Yelusalem mapoo badebei goo ee, diba olo gooleedoosos.

<sup>5</sup> Esiga Yelusalem odoos susuga oso mo goo diba gooleedoosos. Esiga diayo namapoo mo goo takalai dee takooga, diayo ayo Pelisi odoos tobolosos badebei goo ee takalaisos. Egeesee mapoo Yu odoos ma kulodu Pelisi odoos oso Moseseeye eligi goo hogugu medee dedeliso.

<sup>6</sup> Esino Godeeye mawe dimapoo to takolosos magoo mapoo ayo tei teme, a epedee goo midi mapoo ka badosos.

<sup>7</sup> Osoloso ibada Yu odoos bala 12 susuga oso biame susuga Godeeyo hu poudoolone dobolone, diba to magoo hedebe ee bamolosos. Esiga mo wiligi odoos taba Agilipa, abolo epedee to magoo hedebe omapoo tei teme, Yu odoos oso a wooloomalame goomogoso.

<sup>8</sup> Egeesi ma kulodu, Yu odoos niba bei kasi maga Godeeye wedia odoos ee see hogogabileiso dee taka goo mapoo tei telega ka pegeliyo?

<sup>9</sup> Esiga a niyo egee gooloomolos egeesi masi goolone, ayo Yesu Nasalet odoos mapoo tei telaga odoos

mapoo heiga toowa molone, ayo dimapoo dala tenelame goomogo meleeso.

<sup>10</sup>Egeeseelone tei moso wiligi odoo tebisa oso amapoo kitulugu teneme, ayo Godee o odoo esialoso toloso neliga moso ma kulodu tooseliso. Osoloso tei telaga odoo abo ee olo piligume, ayo goo omapoo tekepo doloso, goomegeliso.

<sup>11</sup>Osoloso a Yu odoowo howo gisili moso susuga mapoo silone, tei telaga odoo mapoo dala tenelone, ayo dimapoo toso pupulone, to tokenee takoloso Yesuwo goo mapoo miligi pie, dee takeliso. Osoloso ayo dimapoo diya komonolone, mi abo mapoo dileso, tei telaga odoo toloso dala teneliso.

<sup>12</sup>Ayo egeeseemo silone, biame heeso tei moso wiligi odoo tebisa oso amapoo kitulugu teneme, Damasko mi mapoo tei telaga odoo talame diso.

<sup>13</sup>Esino osoko oo domo taba mapoo a eli domopoo dimeleeno, kei ma dokodooga gadeebugu oso pouneme egeiso. Gadeebugu ee diya toowa, osokoso gadeebugu egeesinee. Esiga odoo abolo hodobo di gadeebugu oso tooso.

<sup>14</sup>Osoloso iba susuga miyomoo misigedubuloso tiesamolome, kei ma dokodooga ibada Hibulu toso amapoo egeesee takeme duso, 'Solo, Solo, nayo bei kasi maga amapoo dala ka tenemalala? Esiga no medee goolee. Nayo egeeseemo siloga, no Godee sabolo ha taso. Esiga eyo nei no dala talaiso,' diso.

<sup>15</sup>Eseme ayo egeesee takaso, 'Wiligi odoo, no ogumo?' diso.

Eseme Lodeeye amapoo nei egeesee taka, 'A Yesuso. Nayo tei telaga odoo mapoo dala egee tenemolo, amapoo tenemoloso.

<sup>16</sup>Esiga no tebee! Ayo namapoo sibilesa peledobooso. Bei, ayo no olo hesiaso, nayo mo tou teli odoo doloso badolone, ayo namapoo eligi

sabolo, osoloso eligilei goo sabolo, odoo mapoo eligilame.

<sup>17-18</sup>Esiga nayo Yu odoo sabolo, osoloso Yu odoonee sabolo ma kulodu mo to takomo siloga, ayo no medee balaiso. Egeesi ma kulodu diayo no dala teneega, ayo no pidileiso. Esiga diayo tei goo ee gooleedoga, diayo neliga maga miligi pialoso, gadeebugu mapoo bidiga dabalame, osoloso Saiten oso gibadolone debei poogoloso, see Godee mapoo bidiga dabalame, ayo no dimapoo diye deeso. Egeeseega ayo dibada goo tokenee hapoloso boobado bigileiso. Egeeseega diayo amapoo tei too goo maga, Godeeye hesia odoo oso egee do sabolo hodobo dabalaiso,' diso.

<sup>19</sup>Eseme wiligi odoo taba Agilipa, mo howo opusomo doloso, kei ma dokodooga to taka duloso, to omapoo mesieso.

<sup>20</sup>Osoloso ayo Damasko mapoo, osoloso Yelusalem mapoo, osoloso Yudiya mi toowa ma kulodu, osoloso Yu odoonee dia mi susuga mapoo, Godeeyo to egeesee takomo sileeso, 'Nibada goo goolee su wuduloso, nibada goo tokenee maga miligi pialoso Godee mapoo sibadee! Osoloso niyo Godee mapoo sibadee goo ee eligilone, odoo susuga eyo howo woola tekepo goo ee tomo silesibe,' dee takeliso.

<sup>21</sup>Esiga ayo goo hagee tomo silime, Yu odoo oso ayo dibada tei moso ma kulodu badoboome, diayo a wooloomalame keliso.

<sup>22</sup>Esino Godeeye pidi toowa maga, a see epedee nibada howo woola mapoo tobudulone, wiligi odoo tebisa nimapoo, osoloso odoo abo susuga nimapoo, Godeeyo to takolone ka badoso. Esino ayo taka to susuga ee Moses sabolo Godee maga to toloso takomo silesibili odoo sabolo oso Godeeye hudi magoo Keliso mapoo peledabalai goo taka sabolo hedebe.

<sup>23</sup>Esiga to hagee eyo bei hagoso, Keliso dala toloso talaiso. Osoloso

yayo daga malalo ta maga hogabuloso, gadeebugu ee Yu odoos sabolo, osoloso Yu odoonee sabolo mapoo toosibileiso,” diso.

<sup>24</sup> Esino Polo to osee takomolome, Pestuseeye to neligidi yimapoo egeese takaso, “Polo, no boobadolone wulo halaboo! Nayo diya goolee oso no ka boobadoo,” diso.

<sup>25</sup> Esem Poloye to nei Pestus mapoo egeese takaso, “Wiligi odoos taba Pestus, a wulo koo halabooso. Bei, ayo to taka susuga hagee tei goo. Esiga goo eyo bei moloso.

<sup>26</sup> Esiga wiligi odoos taba Agilipaye goo susuga hagee yo gooleedoos. Ayo goo susuga hagee yimapoo takooga, ayo to takalai koo obuso. Bei, goo susuga hagee mada mood-ele. Haye! Odoos susuga eyo howo woola ka moodoo,” diso.

<sup>27</sup> Esem Poloye wiligi odoos taba Agilipa mapoo egeese takaso, “Agilipa, no Godee maga to tolosokokodo takomo silesibili odoos susuga oso to hogugu mapoo tei telisomo? O. A gooleedoso, no tei teliso,” diso.

<sup>28</sup> Esino wiligi odoos taba Agilipaye egeese takaso, “No biame deiyepo hamapoo ayo Keliso mapoo tei talame amapoo to egeesi masi ka takamalala?” diso.

<sup>29</sup> Poloye to nei egeese takaso, “A nayo tei talai biame deiyepo o, biame sage koo magooso. Esiga ayo nobolo osoloso epedee hamapoo mo to dulone hagee do odoos susuga oso Godeeyo to mapoo tei tolosa ayo hagee bado egeesi masi badalame dokodoo ka takooso. Esino nibada dee mapoo ki ti oso tialagalaima,” diso.

<sup>30</sup> Esem wiligi odoos taba Agilipa sabolo, osoloso Pestus sabolo, osoloso Benis sabolo, osoloso odoos susuga Polowo to dulone debee ee tebisaloso diyadeeso.

<sup>31</sup> Diayo diyadulone dieso dimapoo egeese takaso, “Odoos hagee goo tokenee hee tele. Esiga

iyo yo neliga moso mapoo toosooloso wooloomalai tekeponee,” diso.

<sup>32</sup> Esem Agilipaye Pestus mapoo egeese takaso, “Iyo odoos hagee goo midili maga diye dalai tekepo. Esino yo Sisaye o goo midilei goomogaga, yo Sisa mapoo ido diye, dee takee,” diso.

## 27

### *Poloye du maga Itali mi mapoo dilame bei mooloogoo*

<sup>1</sup> Pestuseeye Polo Sisaye badebei mapoo ido dilame goomoga magoloso, yayo Loum ha teli gibadeli odoos hee Yuliyes iso. Osoloso yimapoo egeese takaso, “Polo sabolo, osoloso neliga moso ma kulodu debeli odoos abo sabolo, du maga Itali mi mapoo Sisaye badebei mapoo iyado di,” diso. Yuliyes hagee ha teli odoos mooloogoodoo hee, o hu Sisayo mooloogoodoo dee takeli eyo kulodu badeli.

<sup>2</sup> Esem iba Adalamatiya odoos dia du toowa ee Kasaliya mi maga see Asiya mi ma kulodu mi opusomo opusomo di mapoo dilame molome egeiso. Esem Yuliyeseeye iba du omapoo dalaga peegeena. Osoloso Makedoniya mi ma kulodu Tesalonika mapoo badeli odoos hee, Alis-takus du omapoo ibolo hodobo bulumaloso, see Saidon mi mapoo dulone domopoo tiesaso.

<sup>3</sup> Osoloso biame hee mapoo Saidon mi mapoo sibilesa peledabaso. Esino iba Saidon mi mapoo sibilesa peledoboome, Yuliyeseeye Polo yo diya goolone yimapoo egeese takaso, “Nee odoos oso biso pidilame, no pee-goo di,” diso.

<sup>4-5</sup> Osoloso iba see Mila mi mapoo dalo soowoolone, Saiples mi te koola mapoo poo toowa meneme abaga daso. Bei, abei toowa woola mapoo poo toowa oso sibulone, howo ki toowa siba. Esem iba osee Saiples mi te maga gulugumo sibilesa, Kilikiya sabolo Pampiliya sabolo daga

dileso, Lisiya mi Mila mapoo sibilesa peledabaso.

<sup>6</sup> Iba omapoo dileso doboome, ha teli gibadeli odo Yuliyeseeye Alessandiliya odo dia du toowa Itali mapoo dilame molome egeiso. Esememe yayo iba du omapoo dalaga peegeena.

<sup>7-8</sup> Esememe iba du omapoo dalaga poogoloso, Nidus mi mapoo obeeyamo dulone, biame bei abei domopoo poogooso. Iba Nidus mi ee daga dime, poo toowa simi oso, howo ki toowa sibume, see Kiliti mi te mapoo dalo soowaso. Bei, omapoo poo toowa meneme. Osoloso iba Kiliti mi te su Salomone koola abaga obeeyamo gulugumo dulone, Lasiya mi koola mapoo du dali omapoo oluguso. Du dali eyo hu Du Oluguli Medee Tekepo deli.

<sup>9</sup> Iba du oluguli omapoo dobolone, egeesee goolone debeiso, "Iba biame toowa olo hosudooso. Osoloso Yu odo oso nei teyuloso badeli biame olo dagadilesa badoso. Esino dugo biame olo bei mooloogooso. Egeesi ma kulodu iyo dugo biame mapoo abei toowa maga dilei tekeponee. Bei, howo ki toowa oso sibulone, iba tokenee peya," diso. Esememe Poloye odo susuga mapoo egeesee taka,

<sup>10</sup> "Emegei, dugo biame mapoo abei toowa maga duga, ibolo osoloso ibada bi sabolo, osoloso ibada du sabolo tokenee palai, a gooleedooso. Esiga iba hamapoo osee dabalai tekepo," diso.

<sup>11</sup> Esino du wiligi taba sabolo osoloso duwo ama sabolo diba egeesee selai goomegele. Esememe ha teli gibadeli odo oso Polowo to mapoo tei telega poogoloso, odo bakadio hageeyo to mapoo deedeeso.

<sup>12</sup> Esememe odo susuga oso egeesee takaso, "Iba dugo biame mapoo hamapoo dobolone du oluguloso dabalai du oluguli tokenee," diso. Egeeseelone diba saga Poiniks mi mapoo dileso doga, dugo biame ee koodobilame goomogaso. Kiliti mi te mapoo Poiniks hagee du oluguli

tekepo hee oso. Bei, du oluguli omapoo poo toowa haga koo sibili.

*Poo toowa sabolo howo ki toowa sabolo ma kulodu di*

<sup>13</sup> Osoloso biame heeso poo toowa koodobume, see poo pepooko oso abei toowa domo abaga pee maga sibilame bei mooloogooso. Esememe du toowa tosilesibili odo oso egee ogoloso tekepo dolone, hegi biso du gidoloso howo kulomoo melee giligadoloso du ma kulodu maso. Osoloso iba Kiliti mi te mapoo soowooleso widi pee maga gulugumo diso.

<sup>14</sup> Iba mi te widi pee maga obeeyamo gulugumo dumolome, haga booloogelega mi te abaga poo toowa simi oso ibada du ee see abei toowa domopoo todiso.

<sup>15</sup> Egeeseeme iba du balamelega, ibada du pooso todime, wulo balaga meleeso.

<sup>16-17</sup> Esino pooso ibada du ee Kauda mi te mapoo poo toowa meneme hodiokooga todi molome, du tosilesibili odo oso du toowa tokenee poga pidili du pepooko, du toowa eyo osio mapoo bagagoloso melee ee diya kitulugu sabolo toloso du toowa ma kulodu magooso. Osoloso howo ki oso sibilesa ibada du mapoo woolone du toowa gadilega pagalame, diayo du ee tiso tialoogooso. Osoloso du tosilesibili odo ee Libiya mi hodio abaga dulone, howo soo mapoo du doguyaga diya ebigaso. Egeeseelone, diba pooso sibilesa weli dugo du ma dokohodoo bagagoo ee du medee dilame miyomoo bagagooso. Esememe pooso ibada du ee abei domopoo wulo todimeleeso.

<sup>18</sup> Osoloso biame hee mapoo poo toowa oso see diya sibume, du tosilesibili odo oso du poopeeya dalame, bi abo du toowa ma kulodu melee toloso howomoo sooso.

<sup>19</sup> Osoloso see biame hee mapoo, bi abo egeesi masi du ma kulodu melee howomoo sooso. Pooso sibilesa weli dugo sabolo, osoloso homo tialoogo sabolo, osoloso dugo bagagili ti



sabolo, osoloso bi abo egeesi masi sabolo howomoo sooso.

<sup>20</sup> Iba poo toowa oso simi ma kulodu, osoloso howo ki toowa simi ee ma kulodu biame bei poogoomo dulone, osoko sabolo giwo sabolo egele. Egeesi ma kulodu dulone, iba dabalai goole. Esino wulo wedilei gooleeso.

<sup>21</sup> Esino iba biame bei ma kulodu nei nelega sibulone, Poloye toboloso imapoo egeese takaso, “Emegei, niba kasi maga mo to dulega Kiliti mi te poogoloso ka simiyo? Iba omapoo debei diepi, goo hageese imapoo sibile pegeliyo.

<sup>22</sup> Esino niba goo hamapoo haga na ebi. Bei, odo susuga nima kulodu odo hee talaime. Esino hedebe ibada du ee tokenee palaiso.

<sup>23</sup> Bei, mo Godee ayo o hu dokodoo poudili o momaiye oso amapoo sibeye dee takeme, eiyo gesi amapoo sibiles egeese takas,

<sup>24</sup> ‘Polo, no haga na ebi, bei no wulo gamenee dile, wiligi odo taba Sisayo mudugiyopoo nee goo midilame duso. Esiga Godeeye nimapoo mesie maga nobolo hodobo egee du odo sabolo, abei domo hamapoo wedileime,’ diso.

<sup>25</sup> Esiga odo susuga, niba to hagee duloso na ebi. Bei, Godeeye o momaiye oso goo taka goo ee tei moodolai doloso, a tei toso.

<sup>26</sup> Esino iba omapoo dulone, mi te hee koola mapoo dileso, yo mapoo godee bigileiso,” diso.

<sup>27</sup> Iba Adiliyati abei domopoo sile-sibulone, biame 14 poogoloso see gesi hee mapoo gesi domopoo du tosilesibili odo oso goolee widi pee koolabelee, diso.

<sup>28</sup> Egeeseelone diayo howo kasee boubeleso howo bou tebili ti toloso teibaso. Osoloso egeino, howo bou ee teiba ibada bagi sabolo teiba 40 egeesi masi mala. Osoloso hoogoo pepooko dileso, see tobu teibaso. Osoloso egeino, howo bou ee teiba ibada bagi sabolo teiba 30 egeesi

masi mala. Esem diayo goolee widi pee olo koola tooboo, diso.

<sup>29</sup> Esem diba gesi dulone, du howo soo maga duga, yo mapoo godee bigiyaga diya ebigaso. Egeeseelone du dilega omapoo malame, diayo hegi bi bakadio bakadio di du osio mapoo bagagoloso howomoo toosooso. Osoloso gesi omapoo dobolone, du tosilesibili odo oso saga mi beeama beleso ee bolone debeiso.

<sup>30</sup> Egeeseelone dobolone, diayo du toowa maga mada kukolo dilame, du toowa tokenee poga pidili du pepooko ee howomoo ti sabolo gisibasoloso olugu molone imapoo egeese taka, “Iba du wiligi maga hegi bi abo howomoo tosoowagona,” diso.

<sup>31</sup> Esino Poloye ha teli gibadeli odo sabolo, o odo sabolo mapoo egeese takaso, “Du tosilesibili odo oso kukulo duga, iba susuga wedileiso,” diso.

<sup>32</sup> Esem ha teli odo oso du toowa tokenee poga pidili du pepooko ee ti koo poogoomo, pooso todiso.

<sup>33</sup> Osoloso olo mi beemalai koola toboome, Poloye diba nei nalame howolone odo susuga mapoo egeese takaso, “Niba biame 14 ma kulodu ebia sabolo sibulone nei medee nele.

<sup>34</sup> Esiga niba wedilega pagalame, epedee hamapoo nei medee ne. Osoloso niba goolee, nima kulodu odo hee dala talaime,” diso.

<sup>35</sup> Osoloso Poloye to hagee takoloso, wo toloso goomoga to Godee mapoo takoloso, odo susuga eyo howo woola mapoo wo po doloso neso.

<sup>36</sup> Esem Poloye nei namelee ogoloso, odo susuga oso yibolo nei nalame goomogaso.

<sup>37-38</sup> Diba nei ne koodobuloso, du poopeya dalame, nei abo susuga howomoo togobiaso. Esiga iba 276 odo oso du ee ma kulodu debeiso.

*Duso dileso yo mapoo godee buguloso gagabugu goo*

<sup>39</sup> Osoloso gesi mi beeamome egeino, du tosilesibili odoo oso widi pee egeiso. Osoloso diayo widi pee ee medee ogoloso gooleede. Esino omapoo dilesos du olugumo, diso. Bei, diayo widi pee ee du olugulei tekepo goolee.

<sup>40</sup> Egeeseelone, diba widi pee mapoo dilame hegi bi du ma bagagisaloso melee, ee howomoo kookoo sooso. Osoloso du osio mali suda masi howomoo wusuloso, pooso du todilame, du wiligi mapoo dugo bagagoloso meli hee poudoloso bagagooso. Osoloso iyo widi pee egei mapoo diso.

<sup>41</sup> Esino iba widi pee mapoo dilone, du wiligi oso dilesos howo soo mapoo dougaso. Esemee howo ki oso sibileso, du osio mapoo woome, du gagabuguso.

<sup>42</sup> Egeesi ma kulodu ha teli odoo oso neliga ma kulodu debeli odoo ee howo tabuloso kukulo diyaga, diya gooleeso. Egeeseeyaga neliga ma kulodu debeli odoo ee diayo du ma kulodu wooloomalame goomogaso.

<sup>43</sup> Esino ha teli gibadeli odoo Yuliyes yo Polo wooloomalai goomegele. Esiga yayo ha teli odoo dimapoo egeese takaso, "Niyo neliga ma kulodu debeli odoo ee na wooloome," diso. Esemee yayo egeese takaso, "Niba howo tabili gooleedoo daga, niba widi pee mapoo howo tigebie!"

<sup>44</sup> Osoloso odoo howo koo tabili daga, niba du gagabugu mapoo tolosos deeso widi pee mapoo sumo di," diso. Egeese see maga odoo susuga medee tigebulosos widi pee mapoo daboogolosos gie badeli tooso.

## 28

### *Poloye Malata mi te mapoo sibileso peledaba*

<sup>1</sup> Osoloso iba howo tigamos dilesos, mi te mapoo dalaga poogolosos dobolone duno, mi te eyo hu Malatagona.

<sup>2</sup> Iba omapoo sibileso peledoboome, mi te mapoo debeli odoo oso iba medee pida. Esiga biame omapoo howo toowa simi oso kekebie meelega, mi te mapoo debeli odoo oso iyo dou halame, dou toowa toolosos ka daba.

<sup>3</sup> Osoloso Polo nosee dou kaka tosibileso, dou toomeleeno, hebise sa masi dou ma mapoo kulodu tiamelee ee diya dei moodoome, dou kaka ma ma kuloduga gasibileso Polo dee mapoo paso. <sup>4</sup> Esemee mi te mapoo debeli odoo oso Polo hebisesos dee mapoo polosos sooloogoosos melee ogolosos diba diesonos egeese takaso, "Odoo hagee odoo wooloomali odoo osobe. Bei, yo abei domopooga simi oso yo tele. Esiga epedee nei dala teneli godee oso Polowo goo tokenee maga nei ka teneeso. Esiga hebisesos yo dee mapoo ka pana", diso.

<sup>5</sup> Esino Polo hebisesos o dee mapoo pome, o dee keese heyadige buguno hebise dou mapoo toodosos. Ee ma kulodu goo hee yimapoo peledebele.

<sup>6</sup> Esino mi te mapoo debeli odoo oso egeesee goolone debeiso, "Polowo dee papolosos, miyomoo homodobulosos talaisos," dee gooleeso. Esino biame sage ma kulodu goo heeso Polo mapoo peledebele. Esemee mi te mapoo debeli odoo oso goo hagee ogolosos, Polo yo godee hee molodoo, dee takaso.

<sup>7</sup> Osoloso ee ma kulodu iyo dou halaga melee mi maga Malata mi te mapoo debeli odoowo wiligi odoo taba, Pubiliyeseeyo mi haga hoo-gonee. Esiga yayo iba ogolosos, o moso mapoo ido dilesos, biame bakadio hedebe di omapoo doboome, yayo iba medee pidiso.

<sup>8</sup> Moso ee ma kulodu Pubiliyeseeyo ama kolo dei sabolos osolosos su paiye sabolos tiameleeso. Esemee Poloye yayo tiamelee mapoo gadilesos, Godee mapoo takolosos, o deeso yimapoo sigime, paiye wei-doso.

<sup>9</sup> Hamamee odoo paigiga mi te mapoo debeli odoo oso goo hagee duloso sibademe, Poloye diba tekepo moodoo demeleeso.

<sup>10-11</sup> Egeesi ma kulodu iyo mi omapoo doboome, mi te mapoo debeli odoo oso imapoo hu toowa tenelone emegei di bi tenemeleeso. Osoloso a bakadio hedebe di omapoo dobooso, see dilame doboome, mi te mapoo debeli odoo oso iyo eli domo dulone nalai, nei sabolo osoloso bi abo sabolo imapoo tosibadeeso.

### *Poloye Loum mi mapoo dileso peledaba*

Osoloso iba Alesandiliya odoo dia du toowa dugo biame mapoo Malata mi te mapoo melee mapoo dabagaso. Du ee tosilesibili odoo oso dadabayo gamenee godee masi bakadio moodooloso du wiligi mapoo tugusa molome egeiso.

<sup>12</sup> Iba du omaga dileso Silakusa mi mapoo du oluguloso, biame bakadio hedebe di omapoo debeiso.

<sup>13</sup> Osoloso see abaga Legiyum mi mapoo dalo soowaso. Omapoo tialoso biame hee mapoo poo iyo simi hamamee abaga sibilame bei mooloogooso. Esemee pooso ibada du saga todilame pupu buguso. Osoloso biame heeso Putiyoli mi mapoo dileso peledabaso.

<sup>14</sup> Iba dileso Putiyoli mapoo du oluguloso, tei telaga odoo abo egeiso. Esemee diayo iba biame 7 dibolo de-beeyena. Osoloso omapoo dobooso see mili Loum mapoo diso.

<sup>15</sup> Osoloso tei telaga odoo Loum mapoo debeli oso iba sibogo di duloso, eli domopoo iba tugodalame simina. Ee ma kulodu odoo abo sibilesos, iba Apiyus Polum mi mapoo tugodooso. Osoloso aboso mi hee, o hu Odoos Soowo Moso Bakadio Hedebe deli mapoo sibilesos tugodooso. Esemee Poloye diba ogoloso diya goomogolone, Godee mapoo goomoga toowa poudooso.

<sup>16</sup> Esemee iba Loum mi mapoo sibilesos peledoboome, ha teli gibadeli odoo oso Polo mapoo egeesee takaso, “No neliga moso mapoo dileime. Esino no wulo moso hee mapoo badoga, ha teli odoo hedebe oso no ka gibadalaigona,” diso.

<sup>17</sup> Osoloso biame bakadio hedebe di poogoloso hamamee, Poloye Yu odoowo wiligi odoo tebisa Loum mi ee ma kulodu debeli susuga yimapoo sibilame to teneeso. Diba olo sibilesos doboome, Poloye dimapoo egeesee takaso, “Emegei, ayo goo tokenee hee Yu odoo mapoo moodele. Osoloso ibada adaga dia tei hee gababile. Esino Yelusalem mapoo Yu odooso a goo mauwe tolosos Loum odoo mapoo teneeso.

<sup>18</sup> Osoloso nei diayo amapoo woosali to bei woosano, amapoo goo tokenee hee egele. Esiga diayo a teli mapoo magalai goomegele. Esino diayo a neliga moso maga peegoo tamagalame goomogaso.

<sup>19</sup> Esino Yu odoo oso a neliga moso maga peegoo tamagalai tekeponee, dee takeme, ayo mo goo Sisaye midilei a goomogo, dee takaso. Esino ayo mo odoo, Yu odoo mapoo gigidilei goo mauwe.

<sup>20</sup> Esiga ayo goo hagee nibolo medee to meilame ka gilimadoo. Osoloso a epedee ki tiso tialogoloso moloso. Bei, ayo Isalael odoo oso dulone egee bamolo, odoo yimapoo tei too goo maga,” diso.

<sup>21</sup> Esemee wiligi odoo tebisa oso Polo mapoo nei egeesee takaso, “Iyo Yudiya maga nee goo maga to hogugu teneme tele. Osoloso Yu odoo abo omaga sibadee oso nee goo maga tokenee goo taka, iba dule.

<sup>22</sup> Esino goo nayo egee eligimo silo imapoo takalai goomogo. Bei, mi susuga eyo kulodu, edebeeyo Yesuwo goo eligili goweli,” diso.

<sup>23</sup> Osoloso Polo sabolo Yu odoo sabolo biame hedebe magooso, diayo see tobu Polobolo Yesuwo goo

maga to kalame. Osoloso diayo biame hedebe magoo mapoo Yu odoo susuga Yesuwo goo maga to kalame Polo mapoo sibadeeso. Esem Poloye gesikolo bei mooloogoloso abaga dino habe mapoo Godeeye wiligi doloso badeli eyo goo ee eligilone, Moseseeye eligi goo sabolo, osoloso Godee maga to toloso kokodo takomo silesibili odoo oso to hogugu maga Yesuwo goo eligiso, diayo Yesu mapoo tei talame.

<sup>24</sup> Esem odoo abo oso Polowo to duloso tei tooso. Esino odoo abo tei tele.

<sup>25</sup> Egeesi ma kulodu diesono abo puloso toso agadigaso. Osoloso diba dilame doboome, Poloye tei tele poo-goo odoo mapoo to hedebe hagee takaso, “Dio Tei oso tei goo Godee maga to toloso kokodo takomo sili odoo Aisaya maga nibada amawe dio mapoo egeesee takaso,

<sup>26</sup> ‘Nayo dilesa odoo hagee bia dimapoo egeesee takee,  
“Niyo medee hodu dilesa to taka duleiso.

Esino goo eyo bei niyo medee gooleedalaime.

Osoloso niyo medee hodu dilesa agalaiso, esino goo eyo bei niyo ogoloso gooleedalaime.”

<sup>27</sup> Bei, diba goo eyo bei gooleedalai koo goomogo.

Osoloso diba dulu tabagado, osoloso howo gisiga diga.

Esino diayo ogoloso, osoloso duloso goo goolee tekepo toloso, amapoo wedi simi diepi, ayo dibada tokenee hapoloso boobado bigiliyo,’ diso.

<sup>28</sup> Esiga niba medee goolee, Godeeye gie badeli hedebe Yu odoo mapoo tenele. Haye, yayo Yu odoonee sabolo mapoo teneeso. Esiga diayo goomoga sabolo Godeeyo to medee duleiso,” diso.

<sup>29</sup> [Osoloso Yu odooso Polowo to duloso, dibada mooloogoodoo ma

kulodu diesono toso diya agadigamo diso.]\*

<sup>30</sup> Osoloso Polo dugo bakadio ee ma kulodu moso nei molee magoloso tieli mapoo badoboome, odoo abo yo agalame simi, yayo o mosopoo goomoga sabolo ido palaso.

<sup>31</sup> Osoloso yayo dimapoo Godeeye wiligi doloso badeli goo ee eligilone, Lodee Yesu Kelisowo goo takalai ebile. Osoloso ee ma kulodu odoo heeso yimapoo hamaga takele.

<sup>28:26</sup> Isa 6:9-10; Diye 25:13; 26:2, 6; 27:24; Loum 1:5 \* <sup>28:29</sup> To hagee odoo aboso taka, Lukaye hogugu, deliso. Esino odoo aboso taka, Lukaye hogugule, odoo heeso hamamee hoguguna, dee takeli.



## Loum Poloye Loum sosee mapoo to hogugu tenee

### *Loum booka goo eyo bei*

Poloye Loum mi mapoo dilega badolone to hagee hoguguloso Loum odoo mapoo teneeso. Hogugu hagee ma kulodu tei talai goo eyo bei hoguguso. Egeeseelone yayo Kelisoye tou too goo sabolo, osoloso Godeeye sooloo deli goo sabolo, osoloso tei talai goo sabolo, osoloso gie badeli talai goo sabolo hoguguso. Osoloso goo tokenee maga hoguguso. Osoloso tei Yu odoo sabolo osoloso Yu odoonee sabolo oso tei too goo maga hedebe doloso egee do eyo goo onosee hoguguso.

<sup>1</sup> A Polo, Yesu Kelisowo tou teli odoo. Godeeye a hesialoso amapoo diye di odoo hu teneeso, Godeeyo to tekepo ee takomo silame.

<sup>2</sup> Daga hoogoo Godeeye to tekepo hagee odoo susuga mapoo tenelame to edidi magooso. Esem Godee maga to toloso kokodo takomo silesibili odoo oso to edidi magoo hagee Godeeyo booka mapoo hoguguso.

<sup>3-4</sup> To tekepo hagee Owolo Yesu Kelisowo goo ee takooso. Yesu Keliso ibada wiligi odoo. Yo mipoo hamapoo soomagooso, osoloso yo wiligi odoo taba Deibidiyo amawe. Esino Godeeye Dio Tei oso kitulugu maga yo ta maga hogadi goo oso yo tei Godeeyo Owolo doloso woola yilige buguso.

<sup>5</sup> Esiga Godeeye a sooloo dolone Keliso maga diye di tou tekepo amapoo teneeso, mipoo hamapoo debeli odoo susuga oso amaga Keliso mapoo tei toloso o to mapoo mesimo silesibilame. Goo egeesi maga ayo Keliso halo o tou hagee ka toso.

<sup>6</sup> Osoloso Godeeye Loum odoo niba nosee Yesu Kelisowo dalame olo hesigaso.

<sup>7</sup> Esiga ayo to hogugu hagee Godeeye sooloo deli odoo Loum mi mapoo debeli nimapoo ka tonowa. Godeeye niba o odoo doloso dabalame olo hesigaso. Esiga ayo Godee mapoo takooso, ibada Ama Godeeye, osoloso ibada Lodee Yesu Kelisoye niba sooloo dolone pidilame, osoloso mesie goo nimapoo tenelame.

### *Poloye Loum odoo ee agala dilame goomoga*

<sup>8</sup> Malalo ayo nimapoo ka takooso. Mi susuga ma kulodu odoo susuga oso niyo tei too goo ee olo dudobuguso. Esiga ayo Yesu Keliso maga niba halo Godee mapoo goomoga to takeliso.

<sup>9</sup> Ayo mo sooloo ma kuloduga goomoga sabolo Godeeyo tou tolone badolone, to tekepo Owolowo goo ee ka takomo siloso. Esiga Godee yo gooleedooso, ayo niba halo yimapoo egee takomolo goo ee tei goo.

<sup>10</sup> Esiga ayo niba agalame sibilei goo maga Godee mapoo takolone ka badoso. Esino goo egee Godeeye goomogoga, ayo niba agalame sibileiso.

<sup>11</sup> Bei, niyo tei too ma kulodu kibilame, Dio Tei maga goo tekepo oso niba pidilame, ayo niba agalame sibilei, a diya goomogo.

<sup>12</sup> Esiga to ayo taka eyo bei ee egeesee moloso. Ayo tei too goo oso niba pidilei, a goomogoso. Osoloso nei niyo tei too goo oso a pidilei onosee goomogoso.

<sup>13</sup> Esiga emegei, niba goolee, a diya goomegeliso, niba agala sibilame. Esino ayo niba agalame sibilei ee goo heeso eli peliso. Egeesi ma kulodu ayo Yu odoonee abo pidi egeesi masi pidilame, a diya goomegeliso, niyo tei too goo ee kauwulame.

<sup>14</sup> Esiga Godeeye amapoo odoo susuga ee pidilame tou teneega, amapoo goomoga goo toowa moloso,

mi toowa ma kulodu debeli odo mapoo osoloso doobudu debeli odo mapoo to tekepo takalame. Osoloso goo gooleedoo odo mapoo osoloso goo gooleedele poogoo odo mapoo to tekepo takalai onosee a goomegeliso.

<sup>15</sup> Goo egeesi maga ayo Loum mi mapoo sibilesa to tekepo nimapoo takalai a diya goomegeliso.

<sup>16</sup> Esiga to tekepo hagee ayo dokodoo ka poudoso. Bei, to hamapoo Godeeyo kitulugu mologa. Esiga to hagoso yimapoo tei too odo dia gie badeli ee ka pidimoloso. Egeeseelone yayo daga Yu odo pidiloso see Yu odoonee sabolo ka pidimoloso.

<sup>17</sup> Esiga to tekepo hagoso Godeeyo howo woola tekepo badalai goo ee ka yilige bugu moloso. Egeesi ma kulodu tekepo badalai goo hagee hedebe tei tolosa badalai goo omaga ka moloso. Bei, Godeeyo to booka mapoo hogugu oso egeesee takooso, “Godeeye tekepo odo deli odo diba ee dieso tei too goo maga gie badeli tolone ka doso.”

### *Godeeyo kamana goo*

<sup>18</sup> Esiga Godeeye kamana goo ee Kei mi ma dokodooga yimapoo miligi pieli odo susuga mapoo, osoloso goo tokenee teli odo susuga mapoo ka eligimoloso. Bei, odo hagee biaso goo tokenee tolone tei goo ee mada mageliso.

<sup>19</sup> Esino odo susuga oso Godeeyo goo ee medee gooleedalai tebiliso. Bei, Godeeye o goo dimapoo eligiso.

<sup>20</sup> Edebeeyo Godee koo egeli. Esino mipoo hagee bei mooloogoloso abaga simino epedee hamapoo, bi susuga Godeeye moodoo ee ogolone, yayo kitulugu kookaiyo osee meli sabolo, osoloso o goo ee ka gooleedoso. Esiga edebeeyo dieso nediliyo diba Godee gooleedelee dee takalai koo tebili.

<sup>21</sup> Esiga diba Godeeyo goo gooleedoo, diayo o hu dokodoo koo poudili. Osoloso diayo yimapoo goomoga to koo takeli. Esino dibada goo goolee ee diya tokenee, osoloso dibada sooloo ma kulodu tokenee poloso diya neliga moloso.

<sup>22</sup> Osoloso diba dieso nediliyo takolone diba goo medee gweli odo deliso. Esino diba goo medee koo gweli odo.

<sup>23</sup> Esiga diayo kookaiyo gie badeli Godeeyo hu dokodoo poudoolone yimapoo goomoga tenelai goo ee poogoloso, see gamenee godee dadabayo moodoo mapoo goomogolone debeliso. Gamenee godee dadabayo moodoo ee odo mudu too, osoloso sówo mudu too, osoloso galayo mudu too, osoloso hebiseyo mudu too.

<sup>24</sup> Esiga dieso dima kulodu goo hageesi tolone doboome, Godeeye diba goo tokenee mapoo hologooso. Osoloso ee ma kulodu odo susuga oso dieso goomoga goo ee dodolone, dibada suso goo tokenee tolone debeliso.

<sup>25</sup> Osoloso diayo tei Godeeyo goodee mapoo tei talai ee poogoloso, see gamenee goo mapoo tei tolosa ee dodolone debeiso. Egeeseelone diayo bi susuga moodeli Godee mapoo tei telega poogooso. Esino bi yayo moodoo mapoo tei tolosa ee dodolone, dia hu dokodoo poudoolone debeiso. Esino hedebe Godeeyo hu dokodoo kookaiyo osee poudoolone dabalai tekepo. Goo hagee tei goo.

<sup>26</sup> Esiga odo hagee biaso goo hageesi tolone debee ee ogoloso, Godeeye diba dia goo tokenee ma kulodu dabalame hologooso. Goo egeesi maga soboso omo dio poogoloso see emegei sobo sabolo goo heli tolone debeliso.

<sup>27</sup> Egeeseelone giso nose osee dio poogoloso see emegei giso sabolo goo heli tolone debeliso. Esiga diba

goo tokenee hageesi tolone debeiga, goo tokenee eyo nei dia suso teliso.

<sup>28</sup> Esemee odoo hagee biaso Godeeyo goo ee diya boobado bugume, nei Godeeye diba goo tokenee talame gweli goo ma kulodu dabalame hologooso. Goo egeesi maga Godeeye takolone, goo egeesi na moodeeye dino, diayo goo egee moodoolone debeliso.

<sup>29</sup> Esiga dima kulodu goo tokenee hageesi oso bei ka moloso. Goo ee goo tokenee, osoloso bi diya goomegeli goo, osoloso kweli goo, osoloso emegei wooloomali goo, osoloso emegei sabolo toso agadigeli goo, osoloso gamenee takeli goo, osoloso emegei dimapoo tokenee gweli goo, osoloso emegei dia goo takeli goo,

<sup>30</sup> osoloso emegei miligi galo takeli goo, osoloso Godee mapoo hegili goo, osoloso manali goo, osoloso eyo nediliyo yo tekepo dolone si howeli goo, osoloso goo tokenee dia talame moodeli goo, osoloso ama dio owee dio eyo to mapoo mesilega pegeli goo oso.

<sup>31</sup> Osoloso diba goo medee koo gweli odoo. Osoloso diba dieso to edidi magoo koo dedeli odoo. Osoloso diba dia soosoo koo gweli odoo. Osoloso diba emegei koo sooloo deli odoo.

<sup>32</sup> Esiga Godeeye goo hageesi tolone debeli odoo ee dia tokenee eyo nei toloso wedileiso dee takeli goo ee, diba gooleedooso. Esino diba goo tokenee egeesi tolone dobolone, see o odoo oso goo egeesi moodoo ee ogoloso dimapoo takolone, niba goo medee tekepo tolone do, dee takeliso.

## 2

### *Godee yo goo medee midili odoo*

<sup>1</sup> Nee odooso goo tokenee too ee ogoloso nayo wulo goo gooleeso o goo midiliso. Esino nayo takolone, Godeeye amapoo mo goo tokenee eyo nei tenalai eyo bei me, dee

takalai tebile. Bei, nayo takolone, Godeeye nee odoowo goo tokenee eyo nei tenelai tekepo, dee takeliso. Esino goo egeesi taka maga, Godeeye nee goo tokenee eyo nei tenelai tekepo deliso. Bei, nonosee goo tokenee hedebe egeesee teliga.

<sup>2</sup> Esino Godeeye tokenee teli odoo eyo goo medee midili goo ee, iba gooleedooso.

<sup>3</sup> Esiga nayo emegei dia goo midilone badolone, see nayo goo tokenee hedebe egeesi masi tomo siloga, no Godeeye kamana maga kasee pia dabalaisomo?

<sup>4</sup> Esino Godeeye nee goo goolee su wudulame no sooloo dolone mesie sabolo bamoloso. Esino no yayo sooloo deli goo ee goo mauwe deliso. Bei, Godeeye sooloo deli goo oso nayo goo tokenee teli ee pagalame egee ido du goo ee, no gooleedeleyo?

<sup>5</sup> Esino nee sooloo ma kulodu koo mesili goo sabolo, osoloso goo goolee su wudulega pegeli goo oso Godee kamanalame ka moodooso. Esiga Godeeye kamana goo oso sibilei biame mapoo, yayo namapoo nei dala toowa tenelaiso. Goo egeesi maga biame omapoo yayo goo medee teiba midili goo ee woola yilige bigileiso.

<sup>6</sup> Esiga Godeeye edebeeyo goo moodoo eyo nei ee medee tobuloso pileiso.

<sup>7</sup> Esiga edebeeyo mesie sabolo goo tekepo tolone dobolone, Godeeye diba o howo woola odoo tekepo dalai goo sabolo, osoloso yayo gie badeli teneli goo ee esilone doga, nei Godeeye dimapoo kookaiyo badoboso gie badeli tenelaiso.

<sup>8-9</sup> Esino edebeeyo dieso goomoga goo ee tolone tei goodee ee gowooloso see goo tokenee tolone doga, nei Godeeye komonolone dimapoo dala tenelaiso. Egeeseelone yayo daga Yu odoo mapoo dala teneloso, see hamamee Yu odoonee mapoo dala tenelaiso.

<sup>10</sup> Esino Godeeye odoo goo

**2:1:** Mat 7:1-2; Yon 8:7 **2:4:** Epe 1:7; 2Pita 3:15  
**2:8-9:** 2Tes 1:8

**2:6:** Psa 62:12; Prov 24:12; Mat 16:27; 2Kol 5:10

tekepo teli ee dokodoo poudoolone dimapoo mesie goo tenelaiso. Egeeseelone yayo daga Yu odoo mapoo egeesee moodooloso, osoloso see hamamee Yu odoonee mapoo egeesee moodoolaiso.

<sup>11</sup> Bei, Godeeye odoo susuga dia goo ee medee midileiso. Yayo wulo goo hediliwe midileime.

<sup>12</sup> Esiga Yu odoonee odoo agayo Moseseeye tei magoo goo ee gooleedelega dobolone goo tokenee tolone doga, diba nosee dia goo tokenee eyo nei talaiso.\* Osoloso Yu odoo onosee, odoo agayo Moseseeye tei magoo goo ee gooleedoloso dobolone see goo tokenee tolone doga, Godeeye tei magoo goo sabolo tobulone dia goo tokenee eyo nei dimapoo tenelaiso.

<sup>13</sup> Bei, wulo tei magoo goo ee duloso debeli odoo diba Godeeyo howo woola tekepo koo doso. Esino odoo agayo tei magoo goo ee duloso mesimo silesibili odoo ee Godeeyo howo woola tekepo doso.

<sup>14</sup> Esiga Yu odoonee ee Moseseeye tei magoo goo ee diba gooleedele. Esino diayo goo tolone dobolone Moseseeye tei magoo goo oso taka sabolo tobuloso tolone doga, goo oso dia goo tokenee sabolo osoloso goo tekepo gooleedoloso egee do goo ee eligiliso.

<sup>15</sup> Goo egeesi maga iba ogoso, tei magoo goo ee dibada sooloo ma kulodu olo hoguguloso ka doso. Bei, diayo goo tokenee toga, dia goo goolee oso dimapoo ebili goo teneliso. Osoloso nei diayo goo tekepo toga, dimapoo goomoga goo teneliso.

<sup>16</sup> Goo hagee goo midilei biame mapoo woola yilige bigileiso. Bei, biame omapoo Godeeye Yesu Keliso maga odoo susuga dia goo ee midilone, dia mada goo ee woola yilige bigileiso. To tekepo ayo hagee takoo oso goo hagee ka takooso.

### *Yu odoo sabolo osoloso tei magoo goo sabolo*

<sup>17</sup> Esiga ayo Yu odoo nimapoo taka. Niba niso nediliyo tei Yu odoo dolone, Moseseeye tei magoo mapoo kibiloso debeli odoo deliso. Osoloso niba niso nediliyo Godee koola ogolone debeli odoo dolone si howeliso.

<sup>18</sup> Osoloso Godeeye goomoga goo ee, niba olo gooleedooso. Bei, niba tei magoo ee hesigaloso goo tekepo sabolo, osoloso goo tokenee ogoloso gooleedalai ee niba olo gooleedooso.

<sup>19</sup> Osoloso niso nediliyo takolone niba odoo howo neliga ee eli eligili odoo, dee gweliso. Osoloso neliga ma kulodu debeli odoo dia gadeebugu masi, dee gweliso.

<sup>20</sup> Osoloso niba nosee goo medee koo gweli odoo sabolo, osoloso Godeeyo goo gooleedele poogoo odoo ee eligilei teiba, dee gweliso. Bei, niyo takolone, “tei magoo ee nimapoo teneeso doloso see tei goodee susuga ee niba olo gooleedooso,” deliso.

<sup>21</sup> Esino niba kasi maga odoo abono eligilone see nisono eligilega ka pegeliyo? Bei, niso takolone, “Emegei dia bi heli na te,” dee takeliso. Esino niba see adaba bi heli tolone ka doso.

<sup>22</sup> Osoloso niyo takolone, “Adaba sobo sabolo osoloso giso sabolo goo heli na te,” dee takeliso. Esino niso goo egeesi tolone ka doso. Osoloso see gamenee godee dadabaya moodoo mapoo diya gowoolone debeliso. Esino niba see gamenee godeeyo moso mapoo dilesi bi heli tolone ka doso.

<sup>23</sup> Esiga niba niso nediliyo si hoowolone tei magoo goo ee gooleedoo, dee takeliso. Esino niyo tei magoo goo ee gababia maga Godeeyo hu tokenee peliso.

<sup>24</sup> Godeeyo to booka mapoo hogugu oso egeesee takooso,

\* **2:12:** Godeeye Yu odoonee dia goo midiga, yayo Moseseeye tei magoo oso midileime. Esino diayo goo tekepo talame gooleedoo goo oso dia goo yayo midileiso. **2:14:** Diye 10:35 **2:20:** 2Tim 3:5 **2:21:** Mat 23:3-4 **2:24:** Isa 52:5



“Yu odoo niyo goo tokenee tolone debei ee ogoloso nei Yu odoonee oso Godee maga to tokenee take-liso,” dee takaso.

<sup>25</sup> Tei takoo, no tei magoo goo ee dodolone badoga, kolo kweli goo\* oso no pidileiso. Esino nayo tei magoo ee gababuoga, no Godeeyo howo woola kolo koole poogoo odoo masi badalaiso.

<sup>26</sup> Esiga kolo koole poogoo odoo oso tei magoo ee medee dodolone badoga, yo Godeeyo howo woola kolo koo odoo masi badalaiso.

<sup>27</sup> Esiga Yu odoo nimapoo tei magoo goo sabolo osoloso kolo kookeli goo sabolo osee moloso. Esino niba tei magoo gababiliso. Goo egeesi maga edebeeyo kolo koolega poogoloso tei magoo ee dodolone badoga, odoo egee biaso niba odoo tokenee dalaiso.

<sup>28</sup> Nayo kolo kooloso egee bado goo oso no tei Yu odoo dee koo seeso. Bei, tei Yu odoo doloso badalai goo ee wulo kolo ma dokodoo koo moloso. Osoloso tei kolo koolai goo sabolo wulo kolo ma dokodoo koo moloso.

<sup>29</sup> Esino tei Yu odoo dalai goo ee egeesi moloso. Edebeeyo Godeeyo howo woola tekepo badoga, goo oso yo tei Yu odoo doloso ka badoso. Osoloso tei kolo kweli goo ee wulo kolo ma dokodoo koo moloso, esino Dio Tei oso odoo sooloo ma kulodu opusomo dee ka seli. Esiga odoo egeesee seli ee odoo maga goomoga tolone koo doso, esino Godee maga goomoga tolone ka doso.

### 3

<sup>1</sup> Esiga Yu odoo doloso badalai goo mapoo, goo tekepo kasi molosomo? Osoloso kolo kooloso badalai goo mapoo, goo tekepo kasi molosomo?

<sup>2</sup> O. Goo tekepo bei moloso. Goo daga malalo hagoso. Godeeye o to ee Yu odoo mapoo teneeso, diayo medee balame.

<sup>3</sup> Esino Yu odoo aboso Godeeyo to mapoo dedele poogooso. Esino Godeeye nei yayo to edidi magoo goo ee poogoloso, see dimaga miligi pileisomo?

<sup>4</sup> Haye, egeesee selaime. Bei, hedebe Godee yino tei goodee takeli. Esino mi odoo susuga iba wulo gamenee takeli odoo. Bei, Godeeyo to booka mapoo hogugu oso egeesee takooso,

“Godee, nayo to takooga, edebeeyo duloso nayo tei goodee takeli deliso.

Osoloso edebeeyo nee goo midiga, nayo dagadileiso,” deliso.

<sup>5</sup> Esiga iyo goo tokenee egee tomolo oso Godeeye tei goo egee tomolo goo ee woola yebuguga, iyo kasee takalaisomo? Godeeye ibada goo tokenee eyo nei tenelai tekeponee, dee takalaisomo? (Goo tokenee gweli egee mi odooso gweliso.)

<sup>6</sup> Haye, Godeeye ibada goo tokenee eyo nei tenelai tekepo. Bei, Godeeye Yu odoo ibada goo tokenee eyo nei tenele poogooga, yayo odoo susuga dia goo midilei tebileime.

<sup>7</sup> Esiga edebeeyo egeesee takalai malaiso, “Ayo gamenee takeli goo oso Godeeye tei goodee egee takomolo goo ee woola yilige bigiliso. Esiga goo tokenee ayo teli oso Godeeyo goo tekepo sabolo, osoloso Godee yo toowa doloso egee bado goo ee eligiga, nei mo goo tokenee eyo nei amapoo tenelai tekeponee,” dee takalai malaiso. Esino goo hageesi goolai tekeponee.

<sup>8</sup> Osoloso see edebeeyo egeesee takalai malaiso, “Iba goo tokenee tolone dobomo. Egeesee seega, goo tekepo peledabalaiso,” dee takalai malaiso. Esino goo egeesee goolai ee diya tokenee. Esino odoo aboso takolone, goo hagee ayo eligi dolone, mo hu sabolo gamenee takeliso. Esiga odoo hagee bia dimapoo Gode-

\* **2:25: kolo kweli goo** - Yu odooso diba Godeeyo odoo doloso debeli goo ee eligilame dia kolo ka kweli. **2:26:** Gal 5:6 **2:29:** Deut 30:6; Kol 2:11 **3:4:** Psa 51:4

eye dia goo tokenee eyo nei tenelai tekepo.

*Odoo heeso Godeeyo howo woola tekepo koo badoso*

<sup>9</sup> Esiga Yu odoo ibano tekepo odoo doloso dobolone, Yu odoonee ee tokenee odoo dolone ka dosomo? Haye, egeesinee. Egeesi ma kulodu ayo nimapoo olo takaso, Yu odoo sabolo osoloso Yu odoonee iba susuga hodobo goo tokenee ma kulodu osee doso.

<sup>10</sup> Bei, Godeeyo to booka mapoo hogugu oso egeesee takooso, “Odoo heeso Godeeyo howo woola tekepo koo badoso.

Tei takoo, odoo hee mauwe.

<sup>11</sup> Osoloso tei takoo, Godeeyo goo gooleedoo odoo hee mauwe.

Osoloso tei takoo, Godee esieli odoo hee mauwe.

<sup>12</sup> Bei, odoo susuga oso Godee maga miligi pialoso diya tokenee poloso ka doso.

Egeesi ma kulodu tei, tekepo badeli odoo hee mauwe.

<sup>13</sup> Osoloso diayo to keli goo ee odoo bi ma kuloduga hune kokeli egeesi masi moloso.

Osoloso diayo to kei omapoo wulo gamenee goo takolone debeliso.

Osoloso dia to ee saso odoo peli masi moloso, esiga to oso odoo mapoo dala teneliso.

<sup>14</sup> Osoloso diba biame susuga emegei dimapoo heiga sabolo dobolone

to tokenee takolone debeliso.

<sup>15</sup> Osoloso diba emegei wooloomalame mopoodoo doloso silesibiliso.

<sup>16</sup> Egeesi ma kulodu diayo dulone, dala goo sabolo hegi goo sabolo emegei dimapoo teneliso.

<sup>17</sup> Esiga emegei sabolo mesie dabalai goo ee diba gooleedele.

<sup>18</sup> Esiga tei Godeebolo ebili goo ee dimapoo mauwe.”

<sup>19</sup> Iba gooleedooso, Moseseeye Godeeyo tei magoo ee Yu odooso tei magoo goo omapoo mesimo silame dimapoo teneeso. Bei, tei magoo hagoso odoo susuga mipoo hamapoo debeli dia goo tokenee ee ogoloso gooleedoloso, see Godeeye kamana ma hemidu dabalame ka tenee. Esiga goo midilei biame mapoo iba iso nediliyo pidilame, Godee mapoo to nei takalai tebileime.

<sup>20</sup> Bei, iyo wulo tei magoo goo ee deedeega, goo oso iba Godeeyo howo woola odoo tekepo dalame. Esino tei magoo oso ibada goo tokenee ee imapoo woola yilige bigiliso.

*Godeeyo howo woola tekepo badalai  
goo ee tei too goo maga siboso*

<sup>21</sup> Esiga iyo tei magoo ee dodolone debei maga Godeeyo howo woola odoo tekepo doloso koo doso. Esino Godeeye eli hee maga imapoo yebuguso, iyo o howo woola tekepo doloso badalai goo ee. Eli hee egeeyo goo maga Godeeye To Magoo Booka Nape mapoo hogugu moloso.

<sup>22</sup> Esiga iyo Lodee Yesu Keliso mapoo tei teli goo maga, nei Godeeye iba o howo woola odoo tekepo deliso. Esiga Yu odoo sabolo osoloso Yu odoonee sabolo iba susuga eli hedebe hamaga gie badeli talaiso.

<sup>23</sup> Bei, odoo susuga iba goo tokenee olo tooso. Esiga Godeeye toowa doloso egee bado goo sabolo koo tobuoso.

<sup>24</sup> Esino Godeeye iba sooloo dolone wulayo pidili goo maga, Owolo Yesu Kelisoye iba gilimadoloso ibada goo tokenee eyo nei yayo tooso. Goo egeesi maga nei Godeeye iba o howo woola odoo tekepo deliso.

<sup>25</sup> Esiga Godeeye Owolo Yesu Kelisoye ibada goo tokenee eyo nei mapoo talame meiyee diso, iba Godeeye kamana maga peegoo peledabalame. Egeesi ma kulodu Yesu Kelisoye ibada goo tokenee eyo nei

talame, yayo taso. Esiga iyo goo omapoo tei toga, nei Godeeye iba o howo woola odoo tekepo dalaiso. Esiga goo hagoso Godeeye goo medee teiba midili goo ee ka eligiso. Bei, daga hoogoo edebeeyo goo tokenee tolone doboome, Godeeye diba diya sooloo dolone dia goo tokenee eyo nei dimapoo tenele.

<sup>26</sup> Esino epedee hamapoo Godee eyo goo medee teiba midili goo ee ka eligiso. Osoloso yayo takolone, odoo Yesu mapoo tei teli ee o howo woola tekepo deliso.

<sup>27-28</sup> Esiga iso nediliyo si howalai eyo bei molosomo? Haye, mauwe. Bei, hedebe tei too maga iba Godeeyo howo woola tekepo ka doso. Esino iyo tei magoo ee dodolone debei maga koo seeso.

<sup>29</sup> Egeesi ma kulodu iba tei toso, Godee yo hedebe Yu odoo dia Godeene. Esino Godee yo Yu odoonee sabolosee dia Godee doloso ka badoso.

<sup>30</sup> Egeesi ma kulodu Godee hedebe. Osoloso iba o howo woola tekepo dabalai eli hedebe hagoso. Yu odoo sabolo, osoloso Yu odoonee oso hedebe Yesu mapoo tei too maga Godeeye diba o howo woola odoo tekepo dalaiso.

<sup>31</sup> Esiga tei too goo maga Godeeyo howo woola tekepo dabalame eligi goo oso tei magoo ee goonee deesomo? Haye, egeesee koo seeso. Esino goo ayo eligi oso tei magoo ee goo toowa doloso eligiliso.

## 4

### *Eibalahameeye tei too goo ogoloso Godeeye yo odoo tekepo diso*

<sup>1</sup> Esiga ibada amawe Eibalahameeyo goo maga kasee takalaisomo? Yo mi odoo iba egeesi masi. Esino kasee maga yo Godeeyo howo woola odoo tekepo dee ka siyo?

<sup>2</sup> Goo yayo moodoomo silee oso yo Godeeyo howo woola tekepo badebei diepi, goo oso eyo nediliyo

si howalai bei meliyo. Esino yo Godeeyo howo woola eyo nediliyo si koo howeli. Bei, yo eyo goo moodoo maga tekepo doloso ka badele.

<sup>3</sup> Esino bei, Godeeyo to booka mapoo hogugu oso egeesee takooso, “Eibalahameeye Godee mapoo tei teme, Godeeye yayo tei too ee ogoloso o howo woola yo odoo tekepo diso.”

<sup>4</sup> Egeesi ma kulodu edebeeyo o tou too eyo nei egee to ee emegei di binee. Esino yayo o tou too eyo nei oso.

<sup>5</sup> Esino edebeeyo goo tekepo tomo sili maga Godeeyo howo woola yo odoo tekepo dalaime. Esino hedebe tei too goo maga Godeeye odoo egee o howo woola odoo tekepo dee ka somoloso.

<sup>6</sup> Esiga Godeeye edebeeyo goo tekepo tomo sili ee hesigelega poogoloso yimapoo goomogolone yo odoo tekepo deli goo ee, Deibidiye Godeeyo to booka mapoo hogugu oso egeesee takooso,

<sup>7</sup> “Edebeeyo o goo tokenee ee Lodeeye hapoloso boobado buguga, yo goomoga sabolo badalaiso.

<sup>8</sup> Osoloso edebeeyo o goo tokenee ee Lodeeye hesigelega poogooga, yo goomoga sabolo badalaiso.”

<sup>9</sup> Egeesi ma kulodu goomoga goo hagee hedebe Yu odoo mapoo ka molosomo? Haye. Yu odoonee sabolosee mapoo ka moloso. Bei, iyo daga olo takaso, Godeeye Eibalahameeye tei too ee ogoloso o howo woola yo odoo tekepo diso.

<sup>10</sup> Esino kopolone Godeeye Eibalaham yo o howo woola odoo tekepo dee ka takayo? Yo kolo kooloso badoboome ka takayo? O kolo koolega badoboome ka takayo? Esino ee ma kulodu yo kolo koolega badoboome, Godeeye daga yo o howo woola olo odoo tekepo diso.

<sup>11</sup> Esiga Eibalaham yo kolo koolega badolone Godee mapoo tei teme, yo olo odo tekepo diso. Osoloso hamamee o kolo kooso, yayo Godeeyo howo woola odo tekepo doloso badebei goo ee eligilame. Goo egeesi maga edebeeyo kolo koolega dobolone, diayo tei too goo omaga odo tekepo doloso doga, odo egee bia dia ama ee Eibalahamso.

<sup>12</sup> Osoloso edebeeyo kolo kookooloso dobolone, Eibalaham masi Godee mapoo tei toloso doga, odo egee bia nose Eibalahameeyo owolo dio doloso ka doso. Egeesi ma kulodu Eibalaham yo kolo koolega badolone, Godee mapoo tei tooso. Goo egeesi maga yo dibada amawe doloso ka badoso.

*Godeeye to edidi magoo goo ee Eibalahameeyo tei too maga tooso*

<sup>13</sup> Esiga Godeeye Eibalaham mapoo osoloso amawe dio mapoo to edidi magolone, mipoo hagee dimapoo tenelaiso, dee takaso. Egeesi ma kulodu goo hagee Eibalahameeyo tei magoo deede ee ogoloso ka takele. Esino Eibalahameeyo Godee mapoo tei too goo ee ogoloso, yo odo tekepo diso. Esiga Godeeye to edidi magoo hagee yimapoo ka taka.

<sup>14</sup> Esiga edebeeyo Godeeye to magoo hagee wulo tei magoo goo ee deede maga ka too diepi, nei tei teli goo ee goo mauwe meliyo. Osoloso Godeeye Eibalaham mapoo to edidi magoo goo onosee goo mauwe meliyo.

<sup>15</sup> Bei, tei magoo oso tei magoo gababili odo mapoo Godeeye komonolone nei teneliso. Esino tei magoo mauwe daga, edebeeyo tei magoo ee gababileime.

<sup>16</sup> Goo egeesi maga tei teli goo oso goo toowa ka moloso. Bei, Godeeye iyo tei too goo ee ogoloso yayo to edidi magoo goo ee imapoo wulo wulayo tenelaiso. Egeeseega Moseseeye

tei magoo dedeli Yu odo sabolo, osoloso Yu odoonee dima kulodu edebeeyo Eibalahameeyo tei toloso badebei egeesi masi doga, to edidi magoo hagee dia. Bei, Eibalaham yo tei telaga odo susuga ibada ama yoso.

<sup>17</sup> Bei, Godeeyo to booka mapoo hogugu oso Eibalahameeyo goo maga egeesee takooso,

“Ayo no mi odo susuga dia ama doloso badalame olo hesiaso,” diso.

Esiga Eibalahameeyo Godee mapoo tei too maga goo hagee olo peledabaso. Esiga Godee hagee odo wedia hogaduloso gie badeli teneli yoso. Osoloso bi dia peledabalame moodeli Godee hedebe yoso.

<sup>18</sup> Egeesi ma kulodu Godeeye Eibalaham mapoo to edidi magolone egeesee takaso, “Nayo mi odo susuga dia ama doloso badalaiso,” dee takeme, nei Eibalahameeyo goo omapoo goo goolee bakadio delega, wulo tei toloso bameleeso. Bei, Godeeye see yimapoo egeesee takaso,

“Namawe dio oso diya baloga ee hesigilei tebileime,” dee takaso.

Eseme Eibalaham yo holo soomagel-ega adaga poloso badolone, to Godeeye taka mapoo tei tooso.

<sup>19</sup> Egeesi ma kulodu Eibalaham yo adaga poloso badebei ee dugo 100 tugodalai koola tabaso. Yo ki me poogoloso ta masi badebeiso. Osoloso osobo Sela yo holo soomagel-ega deme toboloso olo adaga poloso badebeiso. Esino Eibalahameeyo to Godeeye taka mapoo tei too goo ee pegelega medee kibiya osee meleeso.

<sup>20</sup> Osoloso Godeeye yimapoo to edidi magoo goo mapoo tei toloso badolone, yo goo goolee bakadio del-ega badebeiso. Osoloso yayo tei too oso yimapoo kitulugu teneme, yayo Godee mapoo goomoga poudooso.



<sup>21</sup> Osoloso yayo egeesee gooleeso, “Godee eyo amapoo to edidi magoo goo ee moodoolai yo teiba,” deliso.

<sup>22</sup> Esiga Godeeye Eibalahameeye tei too goo ee ogoloso yo o howo woola odoo tekepo deliso.

<sup>23</sup> Esiga to hagee hedebe Eibalaham mapoo takele.

<sup>24</sup> Esino goo hagonosee imapoo takaso. Bei, ibolosee Godeeyo howo woola odoo tekepo diso, iyo ibada Lodee Yesu Keliso ta maga hogadi Godee yimapoo tei teme.

<sup>25</sup> Esiga Godeeye Yesu ibada goo tokenee maga talame teneeso, yayo toloso see hogadi goo omaga iba Godeeyo howo woola odoo tekepo dalame.

## 5

### *Godeeyo howo woola odoo tekepo doloso badalai*

<sup>1</sup> Esiga iyo Godee mapoo tei too goo maga iba Godeeyo howo woola odoo tekepo doloso ka doso. Esiga ibada Lodee Yesu Kelisoye goo moodoo maga iba Godeebolo mesie sabolo ka doso.

<sup>2</sup> Bei, iyo tei too goo maga Kelisoye iba Godeeye sooloo dolone pidili goo mapoo gilimado simiso. Esiga iba Godeeye sooloo dolone pidi goo ee ma kulodu dobolone, Godeeye toowa doloso badeli mapoo yibolo hodobo medee tekepo dabalai goo omapoo, iba goomoga sabolo dulone bolone ka doso.

<sup>3</sup> Iba goo hedebe omapoo goomogolone koo doso. Esino dala goo imapoo siboga, goo omapoo onosee iba goomegeliso. Bei, dala goo hagoso iba kibiloso dabalaiso.

<sup>4</sup> Osoloso medee kibiya badeli goo oso Godeeye iba teiba dolone imapoo goomegeliso. Osoloso Godeeye iba teiba dolone imapoo goomogoga, goo oso gie badeli pidilei oso sibilei goo mapoo dulone goomoga sabolo bolone dabalame seliso.

<sup>5</sup> Osoloso dulone bolone dabalai goo hagoso goo mauwe malaime. Esiga goo omaga iba goohele sabolo dabalame. Bei, Godeeye o Dio Tei imapoo tenee maga, yayo diya sooloo deli goo ee ibada sooloo ma kulodu teneega.

<sup>6</sup> Egeesi ma kulodu iba iso nediliyo pidilei tebile neme, Kelisoye iba pidilame Godeeye biame magoo mapoo simiso, yayo goo tokenee temelee odoo iba halo talame.

<sup>7</sup> Odoo heeso odoo medee teedee badeli eyo gie badeli pidilame talai ee kalawa toowa. Esino a gooleedele, odoo heeso odoo tekepowa gie badeli ee pidilame talai malaiso.

<sup>8</sup> Esino Godeeye yayo sooloo deli goo toowa ee eligilone, Owolo Yesu Keliso meiyee diso, iba goo tokenee ma kulodu osee doboome iba halo talame.

<sup>9</sup> Esiga Kelisowo ta maga iba Godeeyo howo woola odoo tekepo diga, Kelisoye iba Godeeye kamana maga gilimadoloso peegoo dilei goo ee iba diya gooleedooso.

<sup>10</sup> Esiga iba Godee mapoo ha tolone osee doboome, Owolo Yesu Kelisoye ta maga yayo iba see o odoo diso. Esiga iba tei o odoo dolone Kelisoye ta maga hogaduloso gie badeli too omaga see ibada gie badeli pidilei goo ee, iba diya gooleedooso.

<sup>11</sup> Osoloso goo hedebe ogoso koo moloso. Esino iba noseepedee Godee mapoo diya goomogoso. Bei, Godeeye ibada Lodee Yesu Keliso maga iba tei olo o odoo diso.

### *Adameeye teli goo tosibume, Kelisoye gie badeli tosimi*

<sup>12</sup> Esiga odoo hedebe Adameeye goo tokenee too maga goo tokenee susuga mipoo hamapoo simiso. Osoloso goo tokenee oso teli goo tosimito. Goo egeesi maga odoo susuga oso dia goo tokenee eyo nei ee tolone wediliso. Bei, odoo susuga oso goo tokenee olo tooga.

<sup>13</sup> Esiga Moseseeye tei magoo goo ee peledbelega molome, odoosusuga oso goo tokenee tolone debeiso. Esino egeesi ma kulodu Godeeye dibada goo tokenee ee hesigele. Bei, biame omapoo tei magoo goo ee mauwega.

<sup>14</sup> Esino Adam maga bei mooloogoloso abaga sibulone, Moseseeye badebei biame omapoo odoosusuga oso Adameeye goo moodoo maga wediaso. Egeesi ma kulodu Adameeye Godeeye tei magoo gababia egeesi masi hee diayo gababile. Esino diba susuga wedimo simiso.

Adameeye eli abo maga Kelisoye hamamee simi egeesi masi badebeiso.

<sup>15</sup> Esino Godeeye wulayo emegei dolone tenee sabolo, osoloso Adameeye goo tokenee too sabolo hedebeene. Bei, odoosusuga oso Adameeye goo tokenee maga teli goo oso odoosusuga mapoo simiso. Esemenei Godeeye wulayo emegei dolone tenee sabolo, osoloso o howo woola tekepo badeli goo ee odoosusuga mapoo simiso. Odoosusuga mapoo simiso. Odoosusuga mapoo simiso. Odoosusuga mapoo simiso. Odoosusuga mapoo simiso. Odoosusuga mapoo simiso.

<sup>16</sup> Esiga Godeeye wulayo emegei dolone tenee goo sabolo, osoloso Adameeye goo tokenee sabolo hedebeene. Bei, Adameeye goo tokenee hedebe too maga, odoosusuga oso Dou mi mapoo dili eli omapoo debeiso. Esino Godeeye wulayo emegei dolone tenee maga, iba susuga goo tokenee ma kulodu debei biame mapoo, yayo iba o howo woola odoosusuga mapoo simiso.

<sup>17</sup> Esiga odoosusuga mapoo simiso. Odoosusuga mapoo simiso. Odoosusuga mapoo simiso. Odoosusuga mapoo simiso. Odoosusuga mapoo simiso. Odoosusuga mapoo simiso. Odoosusuga mapoo simiso. Odoosusuga mapoo simiso. Odoosusuga mapoo simiso. Odoosusuga mapoo simiso.

yibolo hodobo bamalaiso.

<sup>18</sup> Egeesi ma kulodu odoosusuga mapoo simiso. Esino Kelisoye goo tekepo moodoo maga odoosusuga ee Godeeye howo woola odoosusuga mapoo simiso. Esino Kelisoye goo tekepo moodoo maga odoosusuga ee Godeeye howo woola odoosusuga mapoo simiso. Esino Kelisoye goo tekepo moodoo maga odoosusuga ee Godeeye howo woola odoosusuga mapoo simiso.

<sup>19</sup> Esiga odoosusuga mapoo simiso. Esino Kelisoye goo tekepo moodoo maga odoosusuga ee Godeeye howo woola odoosusuga mapoo simiso. Esino Kelisoye goo tekepo moodoo maga odoosusuga ee Godeeye howo woola odoosusuga mapoo simiso.

<sup>20</sup> Esiga Godeeye odoosusuga mapoo simiso. Esino Kelisoye goo tekepo moodoo maga odoosusuga ee Godeeye howo woola odoosusuga mapoo simiso. Esino Kelisoye goo tekepo moodoo maga odoosusuga ee Godeeye howo woola odoosusuga mapoo simiso.

<sup>21</sup> Esiga goo tokenee oso odoosusuga ee wiligi doloso molone, odoosusuga mapoo teli goo oso meleeso. Esino epedee hamapoo Godeeye sooloo dolone pidi goo oso wiligi doloso badolone, iba badoboso kookaiyo gie badeli talame ka ido duso. Bei, ibada Lodee Yesu Kelisoye goo moodoo maga iyo Godeeye howo woola tekepo dabalai goo ee olo tooso.

## 6

*Goo tokeneeso kitulugu ee woolooma*

<sup>1</sup> Esiga iba goo tokenee osee tamalaisomo, Godeeye sooloo dolone pidili oso kauwulame?

<sup>2</sup> Haye, iba egeesee selaima. Bei, iba Keliso sabolo taso. Esiga goo tokenee oso iba wiligi doloso koo doso. Esiga iba see kasalame goo tokenee ma kulodu osee ka dabalaiyo?

<sup>3</sup> Egeesi ma kulodu niba gooledeleyo, iyo Yesu Keliso sabolo hedebe dalame howo olugu goo oso iba yibolo hodobo wedia goo ee ka eligiso?

<sup>4</sup> Esiga iba howo olugu biame omapoo iba Keliso sabolo wediloso yibolo hodobo midoosooso. Osoloso Ma Godeeye o kitulugu toowa oso Keliso ta maga see hogadiso. Esiga iba nosee gie badeli dia ee ma kulodu ka silesibe.

<sup>5</sup> Esiga iba howo olugu goo maga Keliso sabolo wediaga, yo ta maga hogadi egeesi masi iba nosee gie badeli dia mapoo hogadileiso.

<sup>6</sup> Osoloso iba olo gooleedooso, ibada goo nape ee Kelisobolo homo bulubo magoo mapoo olo enigaso, goo tokenee oso kitulugu ima kulodu egee molo ee me pagalame. Osoloso tokenee oso iba wiligi delega pagalame.

<sup>7</sup> Bei, iyo Keliso sabolo wedia biame omapoo goo tokenee oso kitulugu maga iba gilimadoloso peegoo peledabaso.

<sup>8</sup> Esiga iba tei toso, iyo Keliso sabolo wedia goo maga iba see gie badeli dia toloso yibolo hodobo dabalaiso.

<sup>9</sup> Bei, Kelisoye toloso see hogadi goo ee, iba olo gooleedooso. Esiga yo see talaima. Bei, teli goo oso see yo dagadilei ee kitulugu mauwe.

<sup>10</sup> Esiga Kelisoye hedebe ta goo omaga goo tokenee oso kitulugu ee wooloomaloso peegoo togobuguso. Osoloso yo epedee hamapoo gie badolone, Godeeyo goo ee dodolone ka badoso.

<sup>11</sup> Esiga niba nosee egeesee goolee. Niba wediloso goo tokenee oso niba wiligi doloso koo debeli. Osoloso Yesu Kelisoye nimapoo gie badeli teneeso, niyo Godeeyo goo ee dodolone dabalame.

<sup>12</sup> Esiga niba suso goomoga goo ee deedeeyaga, nibada su teli hagee tokenee oso wiligi doloso na debeeye dee.

<sup>13</sup> Osoloso goo tokenee oso niba wiligi diyaga, nibada su ee goo tokenee mapoo na tenee. Esino nibada su oso goo tekepo talame Godee mapoo

tenee. Bei, Godeeye niba wedia maga see gie badeli talai mapoo ido simiso.

<sup>14</sup> Esiga goo tokenee oso niba wiligi doloso na debeeye dee. Bei, tei magoo Godeeye Moses mapoo tenee oso niba wiligi doloso koo doso. Esino Godeeye sooloo dolone pidi goo oso epedee niba wiligi doloso ka doso.

*Goo tokenee poogoloso see goo tekepo mapoo mesimo silei*

<sup>15</sup> Egeesi ma kulodu tei magoo goo oso iba wiligi doloso koo doso. Esino epedee hamapoo Godeeye sooloo dolone pidili goo oso iba wiligi doloso ka doso. Esiga iyo goo tokenee osee tamalai tekepowa? Haye, iba egeesee selaima.

<sup>16</sup> Bei, niyo mesiloso egee deede du goo oso niba wiligi doloso egee do goo ee, niba gooleedeleyo? Egeesi ma kulodu niba goo tokenee mapoo mesiloso omapoo hamamee deedeega, niba wedileiso. Esino niyo Godeeyo to mapoo mesiloso omapoo hamamee deedeega, niba Godeeyo howo woola odoo tekepo dabalaiso.

<sup>17</sup> Esiga niba daga goo tokenee mapoo mesiloso deede siliso. Esino ayo Godee mapoo goomoga to taka. Bei, to tekepo oso nimapoo sibume, niyo medee kookoodoloso dobolone to omapoo mesilone debeliso.

<sup>18</sup> Esiga niba epedee goo tokenee oso kitulugu maga peegoo peledoboloso see Godeeye niba wiligi doloso dobolone, yayo goomoga goo ee tolone ka doso.

<sup>19</sup> Esiga to ayo nimapoo taka ee niba medee gooleedelega, ayo goo iyo gooleedo maga ka wudu takooso. Esiga niba daga nei mauwe tou teli odoo masi dobolone, nibada su ee goo tokenee opusomo opusomo di ee talame teneliso. Esino niba nei mauwe tou teli odoo masi dobolone, epedee nibada su ee goo tekepo talame Godee mapoo tenee, niba tei o odoo doloso egee do goo ee woola yilige bigilame.

<sup>20</sup> Esiga niyo daga goo tokenee oso niba wiligi doloso gilimado di biame omapoo goo tekepo oso niba wiligi doloso gilimado dile.

<sup>21</sup> Osoloso niyo goo tokenee too oso nei ogoo goo tekepo nimapoo ka tosi-boba? Mauwe. Esino wulo nimapoo teli goo ono tosibiliso. Esiga goo daga niyo temelee oso epedee hamapoo nimapoo ebili goo ka teneeso.

<sup>22</sup> Esino epedee hamapoo Godeeye niba tokenee oso kitulugu maga gilimadoloso peegoo peledabaso. Egeesi maga niba Godeeyo nei mauwe tou teli odoos doloso dobolone, o to mapoo mesimo silesiboso. Goo hagoso niba tei Godeeyo odoos doloso dobolone, badoboso kookaiyo gie badeli goo mapoo egee gilimado du goo ee woola yilige bigiliso.

<sup>23</sup> Esiga goo tokenee eyo nei ee teli.\* Esino Godeeye emegei di bi ee kookaiyo badoboso gie badeli ibada Lodee Yesu Keliso maga imapoo wulayo ka tenemoloso.

## 7

### *Tei magoo goo oso iba wiligi doloso koo bamoloso*

<sup>1</sup> Esiga tei magoo goo gooleedoo odoos emegei, niba olo gooleedoos, bei, odoos epedee gie hagee do ee tei magoo goo oso wiligi doloso bamoloso. Esino diba wedioga, tei magoo goo oso diba wiligi doloso balaime.

<sup>2</sup> Egeesi ma kulodu dio masi hagoso. Soboso giso obuloso badoga, yo tei magoo ee dodolone hedebe omo dio badalaiso. Esino omo toga, giso huli eyo tei oso yo wiligi doloso koo badoso.

<sup>3</sup> Esino egeesi ma kulodu omo gie badolone see yayo giso hee mapoo obuoga, yo giso egee goo heli tooso. Esino yo omo toga, tei ogoos yo koo wiligi deeso. Esiga yo see giso hee mapoo obuoga, yo giso egee goo heli koo toso.

<sup>4</sup> Esiga tei telaga odoos emegei, niba nosee egeesi masi doso. Bei, Keliso ye ta maga niba nosee odoos wedia masi doso. Goo egeesi maga tei magoo oso niba wiligi doloso koo doso. Bei, tei magoo oso egee takoo goo ee odoos wedia mapoo koo takoosoo. Esino ta maga hogadi Keliso ye niba olo o odoos doloso ka badoso, niyo Godeeyo tou tolone dobolone homokoko masi ko palame.

<sup>5</sup> Egeesi ma kulodu iyo daga suso goomoga goo ee dodolone silesibume, tei magoo oso iyo goo tokenee talame see abaga hoogoo goomoga toowa meleeso. Esiga tokenee goomegeli goo oso iba teli mapoo gilimado diliso.

<sup>6</sup> Esino iyo Keliso sabolo wedia goo maga iba epedee tei magoo ma kuloduga peegoo peledoboloso ka doso. Esiga tei magoo kitulugu oso iba wiligi doloso koo doso. Osoloso iyo daga tei magoo goo ee dodomo sili maga Godee mapoo mesiloso silesibiso. Esino iba epedee Dio Tei oso kitulugu maga Godee mapoo mesimo ka silesiboso.

### *Godeeye tei magoo goo oso ibada goo tokenee ee woola eligiliso*

<sup>7</sup> Esiga iyo tei magoo goo omapoo kasee takalaisomo? Tei magoo goo ee tokenee goowo? Haye, tokenee goonee. Esino tei magoo hogugu hagoso mo goo tokenee ee amapoo woola eligiliso. Egeesi ma kulodu tei magoo hee oso egeesee takoosoo, “Nayo emegei dia bi ee haga na goomege,” dee takoosoo. Esiga to hagee ayo hesigaloso gooleedoos, emegei dia bi goomegeli goo ee goo tokenee.

<sup>8</sup> Esino goo tokenee oso tei magoo ma kulodu eli ogoloso goo tokenee talame sooloo hapsageli goo ee amapoo teneeso. Esino tei magoo goo ee mauwe diepi, goo tokenee onosee kitulugu mauwe meliyo.

**6:23:** Loum 5:12, 15 \* **6:23:** *teli* eyo bei ee suso talai ee koo takoosoo. Esino dioso Godee maga puloso Dou mi mapoo toodalai goo ee takoosoo. **7:4:** Loum 6:2, 11 **7:6:** Loum 8:2; 6:4 **7:7:** Exo 20:17; Deut 5:21



<sup>9</sup> Esiga ayo daga tei magoo goo ee gooleedelega badebei biame omapoo a goomoga sabolo badebeiso. Esino ayo tei magoo goo ee gooleedoloso badebei biame omapoo, ayo goo tokenee talame gilee goo ee bei mooloogooso.

<sup>10</sup> Esiga ayo goolee tei magoo goo oso amapoo gie badeli tenelai gooleeso, esino oso amapoo wulo teli goo tosimiso.

<sup>11</sup> Egeesi ma kulodu tokenee oso tei magoo ee ma kulodu eli ogoloso amapoo gamenee takoloso a teli mapoo ido diso.

<sup>12</sup> Esino tei magoo goo hagee medee tekepo, osoloso ee ma kulodu tokenee mauwe. Bei, tei magoo goo hagee Godee maga simi.

<sup>13</sup> Esiga tei magoo ee ayo takolone tekepo deli ososee amapoo teli goo tosimisomo? Haye, tei magoo hagoso amapoo teli goo tosimibile. Esino goo tokenee oso amapoo teli goo tosimiso. Bei, goo tokenee oso tei magoo ee ma kulodu tou tolone a tokenee mapoo gido diso. Esiga a epedee ogoso, goo tokenee ee diya tokenee.

### *Ibada sooloo ma kulodu ha egee tomolo eyo goo*

<sup>14</sup> Esiga iba gooleedooso, tei magoo goo ee Dio Tei maga siboso. Esino a mi odoo. Esiga goo tokenee talame goomegeli oso a wiligi doloso ka ido siloso.

<sup>15</sup> Goo ayo teli eyo bei ee, a koo gooleedeli. Bei, ayo goo tekepo talame goomegeli goo ee koo teli. Esino goo tokenee ayo talame koo goomegeli ee teliso.

<sup>16</sup> Osoloso goo ayo koo goomegeli ee moodeli oso, ayo tei magoo goo ee goo tekepo deeso.

<sup>17</sup> Egeesi ma kulodu ayo goo tokenee tolone koo badoso. Esino tokenee ama kulodu egee molo oso goo tokenee ka tomoloso.

<sup>18</sup> Esiga a gooleedooso, ama kulodu goo tekepo hee mauwe. Ayo suso

goomegeli goo ee takooso. A goo tekepo talai ee goomegeliso, esino goo hagee talai a koo tebili.

<sup>19</sup> Bei, ayo goo tekepo talai doloso goomegeli goo ee telega, see goo tokenee ayo goweli ee teliso.

<sup>20</sup> Esiga ayo koo goomegeli goo ee toga, egee tei ayo koo toso. Esino tokenee ama kulodu egee molo oso ka toso.

<sup>21</sup> Esiga a ogoso, ama kulodu goo hageesi moloso. Ayo goo tekepo tomo silei ee a goomogoga, goo tokenee oso a hamaga takeliso.

<sup>22</sup> Esino egeesi ma kulodu a goomogolone, mo sooloo ma kuloduga Godeeye tei magoo goo ee tekepo deliso.

<sup>23</sup> Esino mo sooloo ma kulodu ha teli goo osee moloso. Bei, suso goomoga goo oso ayo goo tekepo talai doloso goomegeli goo mapoo ha ka tomoloso. Goo egeesi maga goo tokenee oso a neliga moso ma kulodu toosooloso badebei masi ka badoso.

<sup>24</sup> Esiga ye-ee, a diya gooholoso, a su hegi sabolo badoga. Mo suso a teli mapoo egee ido du, ee ma kuloduga odoo agayo a peegoo ka tamagalaisomo?

<sup>25</sup> Esino ayo Godee mapoo goomoga to taka. Bei, ibada Lodee Yesu Kelisoye a pidiliso.

Egeesi ma kulodu mo gooso Godeeye tei magoo goo ee dodomo silame goomegeliso. Esino suso goomoga goo amapoo egee molo oso a tokenee mapoo gido diliso.

## 8

### *Dio Tei oso wiligi doloso badalai goo*

<sup>1</sup> Esiga edebeeyo Yesu Keliso sabolo hedebe doloso doga, Godeeye dimapoo dibada goo tokenee eyo nei tenelaime.

<sup>2</sup> Bei, tokeneeso kitulugu oso iba teli mapoo gilimado diso. Esino epedee Yesu Kelisoye kitulugu maga

gie badeli teneli Dio Tei oso iba pee-goo gilimado diso.

<sup>3</sup> Egeesi ma kulodu tei magoo goo oso iba goo tokenee maga peegoo gilimado dilei tebile. Bei, suso goomoga goo oso tei magoo goo omapoo ki mauwe pegeli goo teneliso. Esino hedebe Godee yo teiba. Esiga yayo Owolo mipoo hamapoo meiyee diso. Esemee yo goo tokenee teli mi odoo iba egeesi paso. Osoloso yayo ibada goo tokenee eyo nei ee toloso taso. Esiga Godeeye goo tokenee oso kitulugu ee guobuguso.

<sup>4</sup> Esiga Godeeye goo hagee moodooso, iso goomoga goo ee telega dobolone, Dio Tei mapoo mesilone iyo tei magoo oso takolone tekepo dee takeli goo ee talame.

<sup>5</sup> Esiga suso goomoga goo mapoo dodomo sili odoo ee hedebe suso goomoga goo ee talai ono goolee sabolo silesibiliso. Esino Dio Tei mapoo dodomo silesibili odoo ee hedebe Dio Tei oso goomoga goo ee talame goolee sabolo silesibiliso.

<sup>6</sup> Egeesi ma kulodu edebeeyo suso goomoga goo ee talame goolomo siloga, yo talaiso. Esino Dio Tei oso goomoga goo ee talame goolomo siloga, yo gie badeli sabolo osoloso mesie goo talaiso.

<sup>7</sup> Esiga suso goomoga goo tomo silesibili odoo oso Godee mapoo ha tomoloso. Bei, odoo egeesi oso Godeeye tei magoo mapoo dodomo silesibilei diya gowoolone, tei magoo ee dadalai koo tobuoso.

<sup>8</sup> Goo egeesi maga suso goomoga goo mapoo dodomo silesibili odoo maga Godeeye goomoga goo talai koo tobuoso.

<sup>9</sup> Esino egeesi ma kulodu suso goomoga goo oso niba wiligi doloso koo gilimado silesiboso. Esino Godeeyo Dio Tei nima kulodu egee bado oso niba wiligi doloso ka gilimado silesiboso. Esiga edebeeyo

Kelisowo Dio Tei me badoga, yo tei Kelisowo odoonee.

<sup>10</sup> Goo tokenee eyo nei oso nibada su mapoo teli goo tosibileiso. Esino Kelisoye nima kulodu tei badoso. Esiga nibada dio ee gie badoso. Bei, Godeeye niba o howo woola odoo tekepo diso.

<sup>11</sup> Esino nibada su ee wedioga, Godeeye o Dio Tei maga nibada su wedia mapoo see gie badeli tenelaiso. Bei, Yesu Keliso ta maga see hogadi Godee o Dio Tei ee nima kulodu badoga.

<sup>12</sup> Esiga tei telaga odoo emegei, goo tokenee ibada suso goomegeli goo oso iba wiligi doloso koo bamoloso. Esiga iyo goo tokenee talai goo eyo bei mauwe.

<sup>13</sup> Bei, niyo goo hageesi tomo silesiboga, niba talaiso.\* Esino niba Dio Tei oso kitulugu maga goo tokenee niyo goomegeli goo nima kulodu egee molo ee wooloomaga, niba badoboso kookaiyo gie badalaiso.

<sup>14</sup> Bei, odoo Godeeyo Dio Tei oso wiligi doloso ido duga, odoo egee bia ee tei Godeeyo owolo dio doloso ka doso.

<sup>15</sup> Esiga Godeeye imapoo Dio Tei tenee oso iba nei mauwe tou teli odoo dolone Godeebolo obulone dabalame ka tenele. Esino yayo imapoo Dio Tei tenee ogoso pidi maga iba owolo dio dolone yimapoo “Ma, mo Ma,” dolone ka doso.

<sup>16</sup> Osoloso Godeeyo Dio Tei oso iba Godeeyo owolo dio doloso egee do goo ee ibada sooloo ma kulodu takoomoloso.

<sup>17</sup> Esiga iba Godeeyo owolo dio doloso hagee do goo maga, goo susuga Godeeye imapoo tenelame to edidi magoo ee iyo hamamee talaiso, Kelisoye too egeesi masi iyo talaiso. Bei, iba Kelisoye dala too eyo su ee iyo toga, iba noseeyo yibolo hodobo toowa doloso Kei mi mapoo dabalaiso.

**8:4:** Gal 5:16, 25    **8:9:** 1Kol 3:16; 12:3    **8:10:** Gal 2:20    **8:13:** Gal 6:8; Kol 3:5    \* **8:13: talaiso** eyo bei ee suso talai ee koo takooso. Esino dioso Godee maga puloso Dou mi mapoo toodalai goo ee takooso.    **8:15:** 2Tim 1:7; Maka 14:36; Gal 4:5-7; Yili 21:7    **8:16:** 2Kol 1:22

*Hamamee toowa doloso dabalai goo*

<sup>18</sup> Esiga a tei toso, iyo epedee biame hamapoo dala hagee tomolo ee haga goo toowanee. Esino Godeeye toowa doloso badeli mapoo iyo yibolo hodobo dabalai goo ono diya toowa.

<sup>19</sup> Esiga bi susuga Godeeye moodoo oso Godeeyo owolo dio ee gilimadoloso woola peledabalai goo ee dulone goomoga sabolo bolone ka doso.

<sup>20-21</sup> Egeesi ma kulodu Godeeye goomoga goo maga bi susuga yayo moodoo ee teliso kitulugu sabolo, osoloso hunili gooso kitulugu ee ma kulodu meleeso. Esino Godeeye tei owolo dio ee gilimadoloso woola peledabalai biame omapoo, bi susuga Godeeye moodoo ee goo hagee ma kuloduga gilimadoloso peegoo peledabalaiso. Esiga biame omapoo bi susuga yayo moodoo oso Godeeyo owolo dio ibolo hodobo toowa doloso dabalaiso. Esino epedee hamapoo goo susuga oso peledabalai biame ee bolone, bi susuga Godeeye moodoo oso goomoga sabolo ka bamoloso.

<sup>22</sup> Esiga iba gooleedooso, soboso holo soomagalame dala teli egeesi masi, bi susuga Godeeye moodoo oso toowa doloso dabalai biame ee bolone, googa sabolo abaga simino epedee hamapoo dala ma kulodu ka doso.

<sup>23</sup> Esino hedebe bi yayo moodoo oso peledabalai biame ee koo baso. Esino Dio Tei telaga odoosoo iba nose dala ma kulodu googa sabolo dobolone, biame oso peledabalai ee bolone ka doso. Bei, goo susuga Godeeye imapoo tenelame to edidi magoo ee daga malalo Dio Tei teneeso. Esiga biame omapoo Godeeye iba owolo dio doloso hagee do goo ee woola yiligebuguloso, see yayo imapoo su dia tenelaiso.

<sup>24</sup> Esiga Godeeye ibada gie badeli olo pidiga, iba epedee goo susuga

imapoo tenelame yayo to edidi magoo ee talame dulone bolone ka doso. Esino goo egee iyo olo too daga, iyo goo egee balai eyo bei me.

<sup>25</sup> Esino iyo duloso bolone hagee do goo ee iyo koo ogoso. Esiga iba mesie sabolo bolone ka doso.

*Dio Tei oso iba pidilone Godee mapoo takeli*

<sup>26</sup> Osoloso iyo ki me poogoo ee ogoloso Dio Tei oso iba pidiliso. Bei, Godee mapoo medee tekepo takeli ee, iba gooleedele. Esiga Dio Tei oso ibada sooloo ma kuloduga iba halo Godee mapoo takeliso. Esino yayo iba halo Godee mapoo takeli to eyo bei ee iyo takalai koo tebili.

<sup>27</sup> Esino odoosoo sooloo ma kulodu gooleedoosoo Godeeye Dio Tei oso takeli goo ee yo gooleedoosoo. Bei, Dio Tei oso Godeeyo odoosoo halo yimapoo takolone, Godeeye goomoga goo sabolo tobuloso takeliso.

*Godeeye o odoosoo hesigeli goo*

<sup>28</sup> Esiga iba gooleedoosoo, goo susuga ma kulodu Godeeye yo diya gweli sabolo debeli odoosoo mapoo goo tekepo moodoolone ka badoso. Bei, Godee eyo to edidi magoo ee dodolone, yayo iba hesigaloso olo owolo dio diso.

<sup>29</sup> Esiga Godee eyo hesiga odoosoo ee daga hoogoo yo olo gooleedolosoo badebeiso. Osoloso yayo diba olo hesigaso, diayo see Owolo Yesu masi dabalame. Egeesi ma kulodu iba ogoso, Yesuye Godeeyo odoosoo susuga ee ma kulodu yayo daga holo masi ka badoso.

<sup>30</sup> Esiga Godeeye hesiga odoosoo ee eyo olo gilimadoosoo. Osoloso yayo gilimadoosoo odoosoo ee olo odoosoo tekepo diso. Esiga o howo woola odoosoo tekepo deli mapoo yibolo toowa doloso badeli goo ee yayo dimapoo teneeso.

*Goo heeso iba Godeeye sooloo deli maga domo pileime*

<sup>31</sup> Esiga iyo goo hamaga kasee takalaisomo? Godeeye iba dokolo badoso. Esiga odoo heeso imapoo ha toga, yayo iba daga dileisomo? Haye.

<sup>32</sup> Esino Godeeye tei Owolodee ee goodegele. Bei, yayo Owolo ee ibada goo tokenee eyo nei talame imapoo wulo wulayo teneeso. Godeeye goo egeesi moodooga, see yayo bi susuga imapoo wulayo tei tenelaiso.

<sup>33</sup> Esiga Godeeye hesiga odoo ee see odoo agayo takolone odoo tokenee dee ka takalaiyo? Odoo mauwe. Bei, Godeeye diba olo odoo tekepo diso.

<sup>34</sup> Osoloso Godeeye hesiga odoo ee see odoo agayo takolone Dou Mi mapoo dileiso, dee ka takalaiyo? Odoo mauwe. Bei, Yesu Kelisoye toloso see hogadiloso Amayo dee deede dokolo mapoo badolone iba halo Godee mapoo ka takomoloso.

<sup>35</sup> Esiga ogoo gooso iba Kelisoye sooloo deli goo maga domo ka pileiyo? Hegi goo sabolo osoloso dala goo sabolo oso iba Kelisoye sooloo deli goo maga domo pileisomo? Haye. Osoloso hodia goo sabolo osoloso bi mauwe dabalai goo sabolo oso iba Kelisoye sooloo deli goo maga domo pileisomo? Haye. Osoloso dala teneli goo sabolo, osoloso odoo heeso iba wooloomaga, goo oso iba Kelisoye sooloo deli goo maga domo pileisomo? Haye, egeesee selaimo.

<sup>36</sup> Esiga Godeeyo to booka mapoo hogugu oso egeesee takooso, “Godee, nee goo maga edebeeyo biame susuga iba piligilame seliso.

Osoloso nee goo maga iba sipi be masi gilimadoloso piligilame ka duso.”

<sup>37</sup> Esino hegi goo toowa susuga hagee ma kulodu iba sooloo deli Godeeye kitulugu maga iyo olo dagadileso ka doso.

<sup>38</sup> Bei, a gooleedooso, goo heeso iba Godeeye sooloo deli goo maga domo pileime. Egeesi ma kulodu teli goo

sabolo, osoloso gie badeli goo oso iba Godeeye sooloo deli goo maga domo pileime. Osoloso Godeeyo momaiye sabolo, osoloso bo holo oso iba Godeeye sooloo deli goo maga domo pileime. Osoloso biame epedee hamapoo goo egee peledoboomo du sabolo, osoloso hamamee peledabalai goo oso iba Godeeye sooloo deli goo maga domo pileime. Osoloso goo opusomo opusomo di oso kitulugu oso iba Godeeye sooloo deli goo maga domo pileime.

<sup>39</sup> Osoloso bi susuga kei ma dokodoo egee molo sabolo, osoloso bi susuga mipoo hamapoo egee molo oso iba Godeeye sooloo deli goo maga domo pileime. Osoloso bi susuga Godeeye moodoo ee ma kulodu bi heeso iba Godeeye sooloo deli goo maga domo pileime. Esiga Godeeye sooloo deli goo hagee ibada Lodee Yesu Keliso maga imapoo ka yilige bugu moloso.

## 9

### *Godeeye Isalael odoo ee tei o odoo doloso hesiga*

<sup>1-3</sup> Esiga a Keliso sabolo hedebe doloso badolone, tei goodee hagee nimapoo ka taka. Osoloso ayo wulo gamenee koo takooso. Dio Tei oso mo sooloo ma kuloduga gweli goo ee ka bamoloso. Esiga mo sooloo ma kuloduga gweli goo ee epedee nimapoo tei goo taka goo ee, a gooleedooso. To ee hagoso, ayo nimapoo takolone mo odoo Isalael bia ee halo diya gooholone, a su hegi sabolo ka badoso. Bei, diayo Godeeye goomoga goo ee koo dedeliga. Esiga a teiba daga, a goomogoso, mo odoo oso mo debi ee toloso Keliso sabolo hedebe doloso dabalai. Osoloso ayo dia debi ee toloso Godeeye kamana ee toloso a Keliso maga puloso badalai. Esino ayo egeesee selai, a tebile.

<sup>4</sup> Egeesi ma kulodu Isalael odoo hagee bia Godeeye tei owolo dio diso. Osoloso dimapoo yayo toowa



doloso badeli goo ee eligiso. Osoloso yayo Isalael odo sabolo to magooso. Osoloso yayo tei magoo ee dimapoo teneeso. Osoloso o hu dokodoo poudoolone yimapoo goomoga teneli goo ee dimapoo olo eligiso. Osoloso yayo dimapoo to abo edidi magooso.

<sup>5</sup> Egeesi ma kulodu dibada amawedio ee Eibalaham, Aisek osoloso Yekob. Osoloso Keliso onosee mipoo hamapoo sibilesi odo hagee bia dia soosoo ma kuloduga odo su paso. Esiga Keliso ee Godeeso. Esiga odo susuga oso yimapoo goomoga poudoolone kookaiyo osee dabalai tekepo. Bei, bi susuga Godeeye wiligi doloso ka badoso. Goo hagee tei goo.

<sup>6</sup> Esiga Godeeye Isalael odo mapoo to edidi magoo ee gababiasomo? Hagee, gababile. Bei, Isalael odo susuga ma kulodu odo abo ee tei Isalael odoonee.

<sup>7</sup> Osoloso Eibalahameeyo amawe dima kulodu odo abo ee tei Eibalahameeyo amawe dionee. Bei, Godeeye Eibalaham mapoo egeesee takaso, “Tei namawe dio ee hedebe nowolo Aisek maga balaiso,” diso.

<sup>8</sup> Goo hagoso egeesee eligiso, Eibalahameeyo amawe dima kulodu, odo abo ee tei Godeeyo owolo dionee. Esino Godeeye to edidi magoo goo mapoo tei too goo maga sooloo magoo ee, tei Godeeyo owolo dio oso.

<sup>9</sup> Bei, Godeeye Eibalaham mapoo to edidi magolone egeesee takaso, “Ayo dugo hedebe poogoloso see wedi siboga, nosobo Sela giso holo soomagoo molo agalaiso,” dee takaso.

<sup>10</sup> Esiga holope hagee ibada amawe Aisek. Yo kauwuloso Lebeka huso. Osoloso osobo Lebeka koowasi moodooloso, giso holo bakadio biame hedebe mapoo soomagooso.

<sup>11-12</sup> Egeesi ma kulodu giso holo bakadio hagee soomagelega bado-boome, Godeeye Lebeka mapoo

egeesee takaso, “Nowolo daga holo oso omolowo to mapoo mesimo sileiso,” diso. Esiga o bakadio oso goo moodoolai ee gooleedelega do-boome, Godeeye to hagee malalo olo takaso. Esiga Godeeye o odo egee hesigamolo ee yayo goo moodoo ogoloso koo hesieli. Esino yo wulo eyo goomoga goo ee dodolone ka hesieli.

<sup>13</sup> Esiga Godeeyo to booka mapoo hogugu oso egeesee takooso,

“Ayo Yekob ono diya goomegeliso. Esino Iso haga koo goomegeli,” dee takooso.

<sup>14</sup> Egeesi ma kulodu iyo kasee takalaiyo? Godee yo hedebe hediliwe pidili Godeeyo? Hagee, yo egeesee koo seli.

<sup>15</sup> Bei, Godeeye Moses mapoo egeesee takaso,

“Ayo sooloo deli goo ee odo hee mapoo eligilei goomogoga, ayo yimapoo eligileiso. Osoloso ayo odo hee pidilame goomogoga, ayo yo pidileiso,” diso.

<sup>16</sup> Esiga Godeeye hesiga goo ee edebeeyo goomoga goo maga, osoloso diayo goo moodeli ee ogoloso koo hesigeli. Esino Godeeye wulo eyo sooloo dala maga odo ka hesigamoloso.

<sup>17</sup> Esiga o booka mapoo Godeeye Isipi odo dia wiligi odo taba mapoo egeesee takaso,

“Ayo namapoo wiligi odo tabalame hu teneeso,

wulo namaga ayo kitulugu odo susuga mapoo yilige bigilame. Osoloso mo goo dudobuguloso mipoo hamapoo debeli odo susuga oso dulame,” dee takaso.

<sup>18</sup> Esiga iba gooleedooso, Godeeye odo hee pidilame goomogoga, yayo yo pidileiso. Osoloso yayo koo mesili goo ee odo hee mapoo tenelame goomogoga, yayo tenelaiso.

*Godeeye kamana goo sabolo  
osoloso sooloo deli goo sabolo*

19 Esiga odoo heeso amapoo egeese woosalai malaiso, “Godee eyo odoo abo mapoo koo mesili goo ee ka tenemolo daga, yayo see kasi maga odoo egee bia odoo tokenee dee ka takalaiyo? Bei, odoo agayo Godeeye goomoga goo ee hamaga takalai ka teibayo?”

20 Esino emegei, nayo Godee mapoo hageese woosalai tekeponee. Bei, no wulo mi odoo. Esiga wudu taka to hagoso. Katolo bogoso moodoo oso yo moodeli odoo mapoo takolone, “Nayo kasalame a egeese ka moodoowo?” dee takalai tekeponee.

21 Bei, katolo moodeli odoo yayo bogo hedebe egee toloso, katolo hee mapoo wulo biame susuga nei magalalai sabolo, osoloso goo toowa biame mapoo katolo hee mapoo nei magalalai ee moodolai, yimapoo kitulugu moloso.\*

22 Egeesi ma kulodu Godee yo egeeseelone badoso. Yimapoo kitulugu moloso, yayo kamana sabolo osoloso yayo kitulugu ee odoo mapoo eligilei. Esino odoo yayo kamanali oso teli mapoo diyadeega, yayo ogoloso dia goo tokenee eyo nei saga tenelega mesie sabolo ka bamoloso.

23 Osoloso yimapoo kitulugu moloso, yayo sooloo deli odoo mapoo yayo toowa doloso egee bado goo ee eligilei. Bei, odoo egee bia eyo olo hesigaso, yayo toowa doloso egee bado mapoo gasibe dalame.

24 Esiga odoo Godee yayo toowa doloso egee bado mapoo gasibe dalame, hedebe Yu odoo ee hesile. Esino yayo Yu odoonee sabolosee hesiaso. Esiga odoo yayo hesia ee ibaso.

25 Godeeye Yu odoonee dia goo maga Hoseya booka mapoo hogugu oso egeese takooso,

“Odo daga ayo mo odoo dele poogoo egee bia ee see epedee mo odoo dalaiso.

Osoloso ayo sooloo delega debei odoo egee bia ee, see epedee ayo sooloo dalaiso,” diso.

26 Daga Godeeye dimapoo takolone, “Niba tei mo odoonee,” diso.

Esino see yayo dimapoo takolone, “Niba gie badeli Godeeyo owolo dio dalaiso.”

27 Osoloso Aisayaye Isalael odoo dia goo maga takolone egeese takaso, “Isalael odoo oso diya balone booboose masi malaiso.

Esino dima kulodu wulo aboso gie badeli talaiso.

28 Bei, Lodeeye mipoo hamapoo debeli odoo dia goo tokenee eyo nei saga teneloso hosudalaiso.”

29 Osoloso Aisayaye see tobu Isalael odoo dia goo maga egeese takaso, “Kitulugu Godeeye ima kulodu odoo abo pidilega poogoo diepi,

Sodom mi sabolo osoloso Gomola mi sabolo\* douso nadolone odoo susuga piligu egeesi masi iba nose piligiliyo,” dee takaso.

*Isalael odooso to tekepo mapoo  
tei tele poogoo goo*

30 Esiga to ayo taka goo eyo bei ee egeesi moloso. Yu odoonee oso Godeeyo howo woola tekepo doloso badalai goo ee esile. Esino dieso tei too goo maga Godeeye o howo woola diba odoo tekepo diso.

31 Esino Isalael odoo oso Godeeyo howo woola tekepo doloso dabalai goo ee esilone, dibada tei magoo ono medee dodolone debeiso. Esino goo oso diba odoo tekepo dele.

9:20: Isa 29:16; 45:9    9:21: Jer 18:6    \* 9:21: To hageeyo bei ee egeesi moloso. Godee eyo goomoga goo ee dodolone, odoo heeso goo toowa talame, osoloso odoo heeso goo pepooko talame hesilei, yimapoo kitulugu moloso. Bei, Godeeye odoo susuga ka moodooga.    9:25: Hos 2:23    9:26: Hos 1:10    9:27: Isa 10:22-23    9:29: Isa 1:9    \* 9:29: **Sodom mi sabolo osoloso Gomola mi sabolo** - Eibalahameeye badebei biame mapoo, Godeeye mi bakadio hagee dou gigaloogooso. Bei, odoo egee biaso goo tokenee tolone doboome.    9:32: Isa 8:14

<sup>32</sup> Bei, diayo tei tele poogoloso, wulo dieso kitulugu maga Godeeyo howo woola odoo tekepo dalame seeso. Goo egeesi maga diba yo odoo tagodibigili mapoo tagodibuguloso ka misigedibuo demeleeso.

<sup>33</sup> Bei, Godeeyo to booka mapoo hogugu oso egeesee takooso,

“Ayo Sayon mi mapoo yo magalaiso.\*

Yo omapoo odoo tagodibuguloso ka misigedibuo demalaiso.

Esino edebeeyo yimapoo tei toga, goo omaga goohele sabolo badalaime. Bei, goo hagoso goo mauwe malaime.”

## 10

<sup>1</sup> Esiga tei telaga odoo emegei, ayo mo sooloo ma kuloduga Isalael odoo halo Godee mapoo takolone badeliso, dia gie badeli pidilame.

<sup>2</sup> A gooleedooso, Isalael odoo diba Godeeye goomoga goo ee dadalame diya goomegeliso. Esino Godeeye goomoga goo ee, diba medee kibiya gooleedele.

<sup>3</sup> Osoloso Godeeye o howo woola odoo tekepo dolone egee do goo onosee, diba gooleedele. Esino dieso nediliyo kitulugu maga Godeeyo howo woola odoo tekepo dalame, dibada tei magoo ee dodolone egee do oso diba koo pidili. Goo egeesi maga diayo Godeeyo goo maga o howo woola tekepo dabalai goo ee talai, diba gowooso.

<sup>4</sup> Esino Kelisoye goo moodoo maga, edebeeyo Godeeyo howo woola tekepo doloso badalame, tei magoo Godeeye Moses mapoo tenee diayo ee dadalai ee bei mauwe. Bei, edebeeyo Keliso mapoo tei toga, nei Godeeye o howo woola yo odoo tekepo dalaiso.

### *To tekepo oso gie badeli pidili goo ee tosimiso*

<sup>5</sup> Tei magoo ee deedee maga edebeeyo Godeeyo howo woola tekepo badeli goo maga Moseseeye egeesee hoguguso, “Edebeeyo gie badeli talai goomogoga, yo tei magoo susuga ee dodolone ka badebee,” diso.

<sup>6</sup> Esino tei too goo maga Godeeyo howo woola tekepo badeli odoo oso egeesee takalaime, “Odoo agayo Keliso ido meilame Kei mi mapoo ka palaisomo?” diso.

<sup>7</sup> Osoloso odoo ogooso see egeesee takalaime, “Odoo agayo Keliso ta maga hogadilame, odoo wediayo dioso debeli mi mapoo ka meileisomo?” dee takalaime.\*

<sup>8</sup> Esino hedebe Keliso mapoo tei teli goo oso gie badeli pidili goo ee ka tosibili. Bei, Keliso mapoo tei telaga odoo oso Moseseeye taka egeesee takalai teiba,

“Godee o to ee nama koolapoo moloso.

Osoloso to egee nee maga mapoo, osoloso nee sooloo ma kulodu moloso.”

To hagoso Keliso mapoo tei toloso badeli goo ee eligiliso. Egeesi ma kulodu to hebebe hagonosee iyo odoo abo mapoo ka takomo silesiboso.

<sup>9</sup> Esiga nayo takolone, Yesu yo Wiligi Odoo doloso yiligebuguloso, see yo Godeeye ta maga hogadi goo mapoo nee sooloo ma kulodu tei toga, nee gie badeli pidileiso.

<sup>10</sup> Bei, nee sooloo ma kuloduga tei too goo maga, Godeeye o howo woola no odoo tekepo dolone ka badoso. Osoloso nee magaso takolone Yesu yo Wiligi Odoo doloso yilige bugu goo maga nee gie badeli pidileiso.

<sup>11</sup> Bei, Godeeyo to booka mapoo hogugu oso egeesee takooso,

**9:33:** Isa 28:16; 1Pita 2:6 \* **9:33:** To hageeyo bei ee Godeeye odoo eyo hudi magoo Keliso ee Isalael odoo mapoo diye dalaiso. **10:5:** Lev 18:5 **10:6:** Deut 30:12-14 \* **10:7:** To hageeyo bei ee egeesi moloso. Godeeyo howo woola tekepo badeli odoo oso egeesee takalaime. Bei, diayo tei too goo maga, Keliso yo dibolo hodobo olo badoga. Osoloso Keliso yo ta maga hogadi goo ee, diayo tei too goo maga diba gooleedooso. **10:11:** Isa 28:16

“Edebeeyo Keliso mapoo tei toga, goo omaga goohele sabolo badalaime. Bei, goo hagoso goo mauwe malaime,” deeso.

<sup>12</sup> Goo egeesi ma kulodu iyo ogoso, Yu odoo sabolo osoloso Yu odoonee sabolo hedebe. Bei, Lodee hedebe yo odoo susuga dia wiligi odoo. Goo egeesi maga odoo susuga oso diba pidilame yimapoo woosolone egee do mapoo, yayo goo tekepo susuga ka tenemoloso.

<sup>13</sup> Bei, Godeeyo to booka mapoo hogugu oso egeesee takooso, “Edebeeyo yo Lodeeye pidilame yimapoo takooga, o gie badeli pidileiso.”

<sup>14</sup> Esiga edebeeyo Lodee mapoo tei telega doga, diba pidilame yimapoo kasee woosalaisomo? Osoloso o goo ee dulega doga, diayo yimapoo kasee tei talaisomo? Osoloso odoo heeso to tekepo dimapoo takelega poogooga, diba kasee duleisomo?

<sup>15</sup> Osoloso to tekepo hagee takalame diye dilega poogooga, diba to hagee kasee takalaisomo? Godeeyo to booka mapoo hogugu oso egeesee takooso,

“To tekepo takomo silesibili odoo oso to tosiboga ogoloso odoo susuga diya goomegeliso.”

<sup>16</sup> Esino ee ma kulodu haga odoo susuga oso tei tele. To hamaga Aisayaye Godeeyo to booka mapoo egeesee hoguguso,

“Lodee, ibada to mapoo odoo agayo ka tei toowo?”

<sup>17</sup> Esiga edebeeyo Kelisowo goo ee takomo silesibi goo maga, odoo aboso o goo duliso. Osoloso diayo o goo du maga, yimapoo tei teliso.

<sup>18</sup> Egeesi ma kulodu ayo Isalael odoo dia goo maga ka woosowa. Diba to tekepo olo dusomo? O. Diba olo dulugaso. Bei, Godeeyo to booka mapoo hogugu oso egeesee takooso,

“Dia to\* mi susuga mapoo dudobuguso.

Esiga odoo susuga oso to hagee duso.”

<sup>19</sup> Esino Isalael odoo oso to tekepo hagee duloso gooleedoosomo? O. Diba gooleedooso, esino medee kibiya tei tele. Osoloso Moseseeye egeesee hoguguso,

“Godeeye egeesee takaso,

‘Ayo mo tei magoo gooleedele poogoo Yu odoonee ee pidiga, nei Isalael odoo niyo dimapoo koolone kamana sabolo dabalaiso.’”

<sup>20</sup> Osoloso Aisayaye Godeeye taka to hagee ebilega egeesee takaso,

“Odoo a esilega poogoo oso a egeiso. Osoloso odoo amaga woosele poogoo mapoo ayo mo goo ee dimapoo yilige buguso.”

<sup>21</sup> Esino Godeeye Isalael odoo dia goo maga egeesee takaso,

“Ayo biame susuga diba gilimalame mopoodoo doloso badebeiso. Esino diba gowoolone mo to duloso mesile poogooso.”

## 11

### *Isalael odoo ee Godeeye pegele*

<sup>1</sup> Esiga goo ayo hagee takoo ee, Godeeye Isalael odoo gowoolone tei peegoo poogoosomo? Haye, pegele. Bei, anosee Isalael odoo. Osoloso anosee Eibalahameeyo amawe, Benyamineeyo bala ma kulodu badeli.

<sup>2</sup> Osoloso Godeeye daga hesia odoo ee gowoolone peegoo pegele. Egeesi ma kulodu Godeeye to booka mapoo hogugu oso Ilayaye taka ee medee goolee. Bei, Isalael odoo ee gowoolone Godee mapoo egeesee takaso,

<sup>3</sup> “Wiligi odoo Godee, Isalael odoo hagee biaso to namaga toloso kokodo takomo silesibili odoo ee piliguloso, see namapoo emegei di

**10:12:** Diye 15:9 **10:13:** Joel 2:32 **10:15:** Isa 52:7 **10:16:** Isa 53:1 **10:18:** Psa 19:4 \* **10:18:** *Dia to* ee odoo agamo towo? Osoko, giwo, osoloso a oso Godeeye kitulugu ee woola yilige bigiliso. Esiga dia to masi oso mi susuga mapoo dudobuguso. **10:19:** Deut 32:21 **10:20:** Isa 65:1 **10:21:** Isa 65:2 **11:1:** 1Sam 12:22; Psa 94:14; Pil 3:5 **11:3:** 1Ki 19:10, 14



bi tenelame sili dousulu susuga sabolo guobuguso. Osoloso namaga to toloso kokodo takomo sili odo hedebe ano badoso. Esino diayo anosee wooloomalame ka seeso," dee takaso.

<sup>4</sup> Esino Godeeye Ilayayo to su mapoo kasee takasomo? Yayo Ilaya mapoo egeese takaso, "Amapoo tei teli odo hedebe nayo koo badoso. Bei, mo odo 7,000 doso, diba game-nee godee Bal deli eyo hu dokodoo koo poudili," diso.

<sup>5</sup> Esiga epedee hamapoo osee moloso, Isalael odo haga susuga oso Godee maga peegoo kukulo dile. Esino Isalael odo abo yayo sooloo dolone pidi maga yimapoo tei talame diba olo hesiaso.

<sup>6</sup> Esiga Godeeye sooloo dolone pidili maga o odo hesieliso. Egeesi ma kulodu diayo goo tekepo tolone dogo koo seli. Bei, Godeeye odo hesieli goo ee wulo edebeeyo goo tekepo tolone dogo ka hesieli diepi, nei yayo sooloo dolone pidili goo ee goo mauwe meliyo.

<sup>7</sup> Esiga Isalael odo oso dieso nediliyo Godeeyo howo woola tekepo dabalame diya kitulugiliso. Esino diba goo hagee tele. Esino hedebe Godeeye hesia ono yayo o howo woola olo odo tekepo diso. Esino odo aboso Godeeyo to dulei gowoolone mesile poogooso.

<sup>8</sup> Bei, Godeeyo to booka mapoo hogugu oso Isalael odo dia goo maga egeese takaso,

"Godeeye dimapoo goo tiadili goo teneeso,  
diayo gooleedele pagalame.

Osoloso Godeeye dia howo gagaso,  
diayo egele pagalame.

Osoloso yayo dibada dulu tabagaso,  
diayo see dule pagalame.

Esiga goo hageesi oso osee molone epedee hamapoo osee ka moloso."

<sup>9</sup> Egeesi ma kulodu Deibidiye dia goo maga egeese takaso,

"Wo toowa nalame mooloo-goodoloso egee do goo oso dieso nediliyo bagagalame ti gama masi meleye dee.

Osoloso diayo omapoo ti gama oso bagagisaloso misige duboloso dobolone,

dibada goo tokenee eyo nei tolone debeeye dee.

<sup>10</sup> Osoloso diayo egele pagalame,  
dia howo neliga peye dee.

Osoloso diayo gauwuloso kookaiyo osee silesibilame,  
dimapoo hegi goo kadadiye dee."\*

### *Yu odoonee oso gie badeli talai*

<sup>11</sup> Esiga ayo see tobu hageese ka takooso, Isalael odooso Keliso gowe goo maga diba olo tokenee pasomo? Haye, egeese sele. Esino dia goo tokenee maga Yu odoonee dia gie badeli pidiliso, Yu odooso goo egee ogoloso see Yu odoonee mapoo koolone dogo, see diayo Yesu mapoo tei ka talame.

<sup>12</sup> Esiga Yu odooso eli dooboo dagadi goo maga Yu odoonee pidiso. Esino Yu odooso dieso eli dooboo dagadi maga see Godee mapoo siboga, biame omapoo nei Yu odoonee dia gie badeli diya pidileiso.

<sup>13</sup> Esiga ayo see tobu epedee hamapoo Yu odoonee nimapoo taka, Yu odoonee niba halo diye di odo ee aso. Esiga tou Godeeye amapoo tenee hagee ayo goomoga sabolo ka tomo siloso.

<sup>14</sup> Esiga a gooleedele, ayo Yu odoonee halo tou too ee ogoloso, tei mo odo Yu odooso koolone Godee mapoo sibadalai malaiso. Egeeseega, yayo dia gie badeli pidileiso.

<sup>15</sup> Esiga niba olo gooleedooso, Godeeye Yu odo dimapoo miligi piaso. Goo egeesi maga Godeeye

**11:4:** 1Ki 19:18    **11:6:** Gal 3:18    **11:8:** Deut 29:4; Isa 29:10    **11:9:** Psa 69:22-23    \* **11:10:** To hageeyo bei ee egeesi moloso. Odo hagee biaso Keliso mapoo tei tele poogoo maga, diba Godeeyo howo woola tekepo doloso koo doso. Goo egeesi maga dia howo neliga poga, diba Kelisowo to tekepo ee ogoloso gooleedalame. Osoloso diba hegi goo ma kulodu dabalaiso.    **11:11:** Diye 13:46

Yu odoonee ee see o odoo doloso dabalame yimapoo gilimado simiso. Esiga hamamee Godeeye Yu odoo ee yimapoo gilimado siboga, diayo kookaiyo gie badeli talaiso. Goo egee odoo wediaso see gie badeli too egeesi masi moloso.

<sup>16</sup> Esiga niba ege, niyo wo wogai mapoo soo ee pepooko podoloso Godeeyo dalame peegoo magooga, wo wogai mapoo soo toowa onosee Godeeyo dalaiso. Osoloso homo onosee egeesi moloso, homo too ee Godeeyo dalame yimapoo teneega, o dee onosee Godeeyo dalaiso.\*

### *Olipi homo maga wudu taka*

<sup>17</sup> Esiga Yu odoo ee olipi homo dadabaya segei dee egeesi masi doso. Osoloso Yu odoonee ee olipi homo dobudu meli dee egeesi masi doso. Esino olipi homo dadabaya segei dee abo Godeeye kookoobuguloso, see dobudu meli olipi homo eyo dee koodo sibilesa ogusaso. Esiga Yu odoonee niba egeesi masi badoso. Godeeye niba homo dadabaya segei mapoo olo ogusugaso. Esiga olipi homo dadabaya segei oso nimapoo gie ka tenemoloso.

<sup>18</sup> Esino olipi homo dadabaya segei masi dee peegoo kookoobugume, see Yu odoonee niyo o debi mapoo ogusugaloso egee molo goo omaga, niso nediliyo si haga na howee. Bei, niyo homo too mapoo gie badeli koo teneli. Esino tooso dee nimapoo gie badeli ka teneli.

<sup>19</sup> Esiga niyo hageesee takalai malaiso, "Iyo o debi talame homo dee egee olo peegoo kookoobuguso."

<sup>20</sup> Egeesi ma kulodu niyo tei takoo. Bei, Yu odooso tei telega poogoloso doboome ogoloso homo dee masi peegoo kookoobuguso. Esem niyo tei too maga homo dee kobugu su omapoo olo ogusugaso. Esiga niba goo omapoo niso nediliyo si haga

na howee. Esino niba ebia sabolo debee.

<sup>21</sup> Bei, Godeeye homo tei o deede peegoo kookoobugu egeesi masi solone niyo tei telega dogo, niba nose peegoo egeesee kookoobig-ileiso.

<sup>22</sup> Esiga niba medee goolee, Godee diya mesie, osoloso Godee yo goo tokenee mapoo diya goweli. Esiga yayo Yu odoo abo yimaga peegoo diyadee eyo nei dimapoo dala teneliso. Esino niyo yayo mesili goo mapoo tei toloso osee dogo, Godeeye nei nimapoo mesileiso. Esino niyo yimapoo tei telega dogo, Godeeye niba homo dee masi peegoo kobig-ileiso.

<sup>23</sup> Egeesi ma kulodu Yu odooso see Godee mapoo tei toga, Godeeye diba see tobu homo dee masi todilesa, dieso ogusuga melee omapoo ogusugileiso. Bei, goo hagee moodoolai Godee mapoo kitulugu moloso.

<sup>24</sup> Esiga niba medee goolee, Yu odoonee niba olipi homo dobudu meli dee koodoloso see olipi homo dadabaya segei mapoo ogusuga masi ka moloso. Esino homo eyo goolee egeesee koo oluguli. Yu odoo ee tei olipi homo dadabaya segei o dee egeesi masi doso. Esiga Godeeye olipi homo dadabaya segei o dee peegoo kookoobugu ee see dieso olugulee mapoo ogusugilei yimapoo haga kodianee.

### *Isael odo see Godee mapoo gilimado sibilei*

<sup>25</sup> Esiga tei telaga odo emegei, goo mada magoo melee ayo nimapoo woola taka, egeesega niba niso nediliyo si howelega dabalame. Egeesi ma kulodu goo mada melee ee hagoso, Godeeye koo mesili goo ee Isael odo abo mapoo teneeso. Esino goo ogoso kookaiyo osee malaime. Esino Yu odoonee Godeeye daga hoogoo hesia sabolo tobuloso,

\* **11:16:** To hageeyo bei ee egeesi moloso. Daga hoogoo Eibalaham, Aisek, osoloso Yekob hagee biaso Yu odo dia wiligi odo tebisaloso Godeeyo odo doloso debeiso. Esiga dibada amawe dio onosee hamamee Godeeyo odo doloso dabalaiso. **11:17:** Epe 2:11-19 **11:22:** Yon 15:2, 4

diayo Yesu mapoo tei toloso doga, hamamee koo mesili goo dimapoo egee molo ee pagalaiso.

<sup>26</sup> Osoloso diayo tei too ee ogoloso, nei Isalael odoo susuga dia gie badeli pidileiso. Bei, Godeeyo to booka mapoo hogugu oso egeesee takooso, “Gie badeli pidili odoo ee Sayon mi maga sibileiso.

Isalael odoo susuga oso goo toke-nee tolone egee do goo ee yayo peegoo magalaiso.

<sup>27</sup> Osoloso ayo dibolo to magoo ee dodolone, dia goo tokenee hapoloso boobado bigileiso,” deeso.

<sup>28</sup> Esiga epedee hamapoo Yu odoo aboso to tekepo mapoo gowoolone Godee mapoo ha tolone ka doso. Goo egeesi maga to tekepo ee Yu odoonee nimapoo simiso. Esino Yu odoo ee Godee tei eyo hesia odoo oso. Bei, Yu odooso tei Godee o odoo doloso dabalai goo ee Godeeye dia amawe dio daga debei mapoo to olo edidi magooso. Goo egeesi maga Yu odoo dimapoo Godeeye gooma ka moloso.

<sup>29</sup> Bei, Godeeye tei o odoo hesialoso, yayo emegei di bi dimapoo wulayo teneega, yo o goo goolee see su koo widili.

<sup>30</sup> Esiga Yu odoonee niyo daga Godee gowoolone debeiso. Esino see Yu odooso Godee gowoome, nei Godeeye see Yu odoonee niba sooloo dalaso.

<sup>31</sup> Esiga niyo daga Godeeyo to gowoolone debei egeesee solone, epei see Yu odooso Godeeyo to gowoolone ka doso. Esino Godeeye niba sooloo dala egeesee solone, hamamee see Yu odoo nose egeesee sooloo dalaiso.

<sup>32</sup> Esiga Godeeye odoo susuga ee goo tokenee ma kulodu olo holoo-gooso, see hamamee dimapoo yayo sooloo deli goo ee eligilame.

### *Godeeyo hu dokodoo poude*

<sup>33</sup> O, tei takoo. Godeeyo goo goolee sabolo osoloso yayo goolee-doo ee diya toowa osoloso diya goodomou. Esiga edebeeyo yayo to magoo eyo bei sabolo, osoloso o goo ee gooleedalai koo tebili.

<sup>34</sup> Bei, Godeeyo to booka mapoo hogugu oso egeesee takooso, “Odo agayo Godeeyo goo goolee eyo bei ka gooleedoowo?

Osoloso odoo agayo yo ka kokodo takasomo?

<sup>35</sup> Osoloso Godeeye yimapoo nei tenelame, daga malalo odoo agayo Godee mapoo bi ka teneeba? Haye, odoo mauwe.”

<sup>36</sup> Bei, bi susuga ee Godeeye moodoo. Osoloso bi susuga yayo medee ka bamoloso. Osoloso bi susuga ee o. Esiga odoo susuga oso hedebe o hu dokodoo poudoolone kookaiyo osee dabalai tekepo. To hagee tei goo.

## 12

### *Nibada su Godee mapoo tenee*

<sup>1</sup> Esiga tei telaga odoo emegei, Godeeye imapoo sooloo deli goo toowa ee olo eligiso. Esiga niyo nibada su ee emegei di bi gie meli masi Godee mapoo tenelai, a goomogo. Bei, goo ogoso Godee mapoo goomoga tenelaiso, osoloso niba Godeeyo odoo doloso peegoo pi magoo goo ee eligileiso. Goo ogoso tei Godeeyo tou talai sabolo ka tobuoso.

<sup>2</sup> Esiga niba mi goo oso nibada goo goolee ee opusomo dee na seeye dee. Esino Godeeye nibada goo goolee ee opusomo dee ka seeye dee. Niyo egeesee seega, niba Godeeye goomoga goo ee medee gooleedalaiso. Goo ee, tekepo gweli goo, osoloso yimapoo goomoga teneli goo, osoloso teedee badeli goo.

<sup>3</sup> Godeeye sooloo dolone pidi maga ayo o diye di odoo dalame, yayo

a olo hesiaso. Esiga to hagee ayo nimapoo ka taka. Niso nediliyo si howolone na debee. Esino tei too goo Godeeye nimapoo tenee oso niba niso nediliyo medee egege.

<sup>4</sup> Esiga ibada su hedebe mapoo ogusuga opusomo opusomo di moloso, osoloso dia tou onosee opusomo opusomo di moloso.

<sup>5</sup> Egeesi ma kulodu iba nosee Keliso sabolo hedebe doloso egeesee ka doso. Iba ogusuga opusomo opusomo di oso su hedebe mapoo ogusugaloso ka doso.

<sup>6</sup> Esiga Godeeye iba sooloo dolone pidi maga Dio Tei oso imapoo wulo emegei di goo opusomo opusomo di imapoo tenee ee moloso. Egeesi ma kulodu Godee maga to tolosoko kokodo takomo silame tou namapoo tenee daga, nayo tei too namapoo egee molo goo sabolo to osee takomo sile.

<sup>7</sup> Osoloso namapoo odoo pidili tou tenee daga, no sosee ma kulodu badolone tou egee osee temelee. Osoloso namapoo Godeeye to eligilame tou tenee daga, no Godeeye to osee eligimelee.

<sup>8</sup> Osoloso emegei kitulugu sabolo badalame pidili to takeli tou ee namapoo tenee daga, nayo badolone pidili to osee takemelee. Osoloso emegei di bi teneli tou ee namapoo tenee daga, no tou egee tolone badolone toowa osee tenemelee. Osoloso wiligi odoo doloso badeli tou ee namapoo tenee daga, no badolone tou egee medee temelee. Osoloso odoo pidili tou ee namapoo tenee daga, no goomoga sabolo diba osee pidimelee.

### *Tei telaga odoo oso dabalai goo*

<sup>9</sup> Esiga tei telaga odoo emegei, sooloo ma kuloduga niyo emegei nei sooloo dolo, nei sooloo dolo dolone ka debee. Osoloso goo tokenee ee hegilone goo tekepo ono medee kibiya kookoode.

<sup>10</sup> Esino niyo nee soosoo gweli egeesi masi nee odoo diya goolone, goomoga sabolo dimapoo mesie.

<sup>11</sup> Esiga niba Lodeeyo tou talai na wabede. Esino nibada sooloo ma kuloduga goomoga sabolo, osoloso Dio Tei oso kitulugu sabolo o tou ka te.

<sup>12</sup> Esiga Godeeye gie badeli nimapoo tenelai goo mapoo dulone bolone goomoga sabolo ka debee. Osoloso dala goo sabolo hegi goo sabolo ee ma kulodu medee kibiya debee. Osoloso biame susuga Godee mapoo takolone ka debee.

<sup>13</sup> Egeesi ma kulodu tei telaga odoo bi tebile poogoo daga, niyo diba pidi. Osoloso tei telaga odoo soo siboga, diba nee mosopoo ido pele.

<sup>14</sup> Osoloso odoo aboso nimapoo dala teneega, nei Godeeye dimapoo dala tenelame na takee. Esino wulo diba pidilame Godee mapoo ka takee.

<sup>15</sup> Esiga goomoga ma kulodu debeli odoo sabolo hedebe doloso goomogolone debee. Osoloso goohele goo ma kulodu debeli odoo sabolo hedebe doloso gooholone debee.

<sup>16</sup> Egeesi ma kulodu nee odoo sabolo hedebe doloso ka debee. Osoloso niba goo goolee toowa too doloso niso nediliyo si na howee. Esino niso nediliyo pepooko doloso odoo wuluge sabolo hedebe dalai na gowee.

<sup>17</sup> Esiga odoo aboso nimapoo goo tokenee moodooga, nei niyo dimapoo goo tokenee moodoolone na debee. Esino odoo susuga oso goo tekepo deli goo ee tolone ka debee.

<sup>18</sup> Egeesi ma kulodu niyo odoo susuga sabolo medee mesie sabolo dabalai goo ono diya kitulugi.

<sup>19</sup> Esiga tei telaga odoo emegei, odoo aboso nimapoo goo tokenee moodooga, nei niyo goo tokenee egeesi masi dimapoo na moodee. Esino Godeeye nei dimapoo

**12:4:** 1Kol 12:12, 27

**12:6:** 1Kol 12:4-11; 1Pita 4:10-11

**12:10:** 1Pita 1:22

**12:12:** 1Tes 5:16-18

**12:13:** Hib 13:2

**12:14:** Mat 5:44; 1Kol 4:12

**12:16:** Prov 3:7

**12:17:** 1Tes 5:15

**12:19:** Deut

32:35; Mat 5:39



tenelame, wulo yimapoo deede  
peegee. Bei, Godeeyo to booka  
mapoo hogugu oso egeese takooso,  
“Godeeye egeese takooso,  
‘Ayo odoosusuga dibada goo tokenee  
eyo nei teneliso.’”

<sup>20</sup> Esino niba goo hageesi moodee,  
“Namapoo ha teli odoos e hodia  
badoga,  
nayo yimapoo nei tenee.  
Osoloso yayo howo nalapaga sabolo  
badoga,  
nayo yimapoo howo keenee.  
Esino nayo egeese seega,  
nei yayo eyo nediliyo o goo toke-  
nee ee ogoloso ebileiso.”

<sup>21</sup> Esiga goo tokenee oso niba na  
dagadiye dee. Esino niyo goo tekepo  
tolone debei maga goo tokenee ee  
dagadi.

## 13

### *Gamalee odoos dia to mapoo mesilone debee*

<sup>1</sup> Esiga odoos susuga oso gamalee  
odoo dibada to mapoo mesilone  
dabalai tekepo. Bei, gamalee odoos  
susuga oso dieso goomoga maga  
mi omapoo wiligi doloso koo doso.  
Esino Godeeye kitulugu dimapoo  
teneme, diba mi omapoo wiligi  
doloso ka doso.

<sup>2</sup> Esiga odoos agayo gamalee odoos  
dia to mapoo mesilega dogo, diba  
Godee mapoo koo mosioso. Goo  
egeesi maga diayo goo moodoo eyo  
nei dala talaiso.

<sup>3</sup> Egeesi ma kulodu goo tekepo  
tomo silesibili odoos oso gamalee  
odoobolo koo ebili. Esino goo  
tokenee tomo silesibili odoos oso  
gamalee odoobolo obulone ka doso.  
Esiga niyo gamalee odoobolo ebi-  
lega dabalai goomogoga, niba wulo  
goo tekepo tolone dabalai tekepo.  
Egeese seega, gamalee odoos oso  
niba ogoloso nimapoo goomogalaiso.

<sup>4</sup> Esiga gamalee odoos diba  
Godeeyo tou teli odoos doloso doso,

diayo niba pidilame. Esino niyo  
goo tokenee toga, niyo diba bolo  
ebilei tekepo. Bei, Godeeye dimapoo  
kitulugu olo teneeso, diayo nimapoo  
nibada goo tokenee eyo nei tenelone  
dabalame. Egeesi ma kulodu  
kitulugu diayo too egee goo mauwe  
koo moloso.

<sup>5</sup> Esiga nibada goo tokenee eyo  
nei teya doloso gamalee odoos dia  
to mapoo mesiloso silesibe. Bei,  
niba olo gooleedoos, goo hagee goo  
tekepo.

<sup>6</sup> Esiga gamalee odoos oso Gode-  
eye dimapoo tou tenee ee medee  
tekepo tolone dabalame, tei telaga  
odoo niyo tekisi molee soolone de-  
bee.

<sup>7</sup> Esiga gamalee odoos oso takolone,  
“Niba amapoo tekisi molee tenelame  
tobuloso magoo ee amapoo tenee,”  
dee takooga, niyo tobuloso yimapoo  
tenee. Osoloso dia to mapoo  
mesiloso silesibe. Osoloso dia hu  
dokodoo poudoolone ka debee.

### *Niba nee odoos diya sooloo dolone debee*

<sup>8</sup> Esiga niyo bi wulo wulayo  
toga, eyo nei saga magee. Niyo  
egeese seega, goo egee omapoo  
koodobileiso. Esino nee odoos sooloo  
deli goo ee hoo poogoo me. Esiga nee  
odoo nei sooloo dolo, nei sooloo dolo  
dolone debeli goo ee na koodobie.  
Niyo egeeseelone dogo, goo oso  
niba Godeeyo tei magoo goo susuga  
sabolo tobuloso dabalaiso.

<sup>9</sup> Bei, Godeeyo tei magoo goo abo  
egeesi moloso, emegei dia kooka  
sobo sabolo osoloso emegei dia  
kooka giso sabolo goo heli teli  
tei, osoloso emegei wooloomali tei,  
osoloso emegei dia bi heli teli tei,  
osoloso emegei dia bi talame gilee  
tei. Osoloso tei magoo abo moloso.  
Esino tei magoo susuga eyo bei ee  
hagoso.

“No nediliyo diya sooloo deli,  
egeese solone nee odoos diya  
sooloo dele.”

<sup>10</sup> Esiga sooloo deli goo ee ma kulodu emegei mapoo hegi goo sabolo, osoloso dala goo sabolo teneli koo moloso. Bei, sooloo deli goo oso tei magoo goo susuga ma kulodu taka goo sabolo teiba moloso.

<sup>11</sup> Esiga ayo epedee hagee takoo goo ee tolone debee. Bei, iba olo biame hamameedee mapoo doso. Esiga tiesa maga see hogoogabie. Bei, iyo daga tei too biame mapoo gie badeli pidili goo ee eli sage meleeso. Esino epedee hamapoo olo hegi simiso.

<sup>12</sup> Egeesi ma kulodu neliga olo duga, mi hadobilei olo koola too-booso.\* Esiga neliga ma kulodu dobolone goo tokenee teli goo ee poogoloso, see gadeebugu mapoo dobolone, mopoodoo doloso goo tekepo tolone dabalai tekepo.

<sup>13</sup> Esiga iba gadeebugu mapoo debeli odo masi medee tekepo doloso dobomo. Esino iyo yugune naloso halabili, osoloso emegei dia sobo goo heli teli, osoloso toso agadigeli, osoloso biligeli goo, osoloso emegei kweli goo ee ma kulodu dabalai tekeponee.

<sup>14</sup> Esino ee ma kulodu Lodee Yesu Kelisowo goo ee niyo dugo masi kaloso ka debee. Osoloso nibada suso goomoga oso goo tokenee teli goo mapoo dadalai na goolee.

## 14

### *Nemegei tei too odo mapoo to tokenee na takee*

<sup>1</sup> Esiga nima kulodu odo tei too medee kibilega egee do ee emegei dolone ide. Osoloso dibada goo goolee opusomo opusomo di ee ogoloso dibolo toso na agadige.

<sup>2</sup> Bei, tei too odo heeso eyo goo goolee oso nei susuga ee nalai tekepo deliso. Esino tei too kibile poogoo

odoo heeso eyo goo goolee oso gala hwei nalai tei deliso.

<sup>3</sup> Esiga nei susuga nalai tekepo deli odo oso see gala hwei nalai tei deli odo mapoo gowoolai tekeponee. Osoloso see gala hwei nalai tei deli odo oso nei susuga nalai tekepo deli odo ee tokenee dalai tekeponee. Bei, Godeeye odo nei susuga nali ee odo tokenee dee koo takeli.

<sup>4</sup> Esiga nimapoo kitulugu mauwe, niyo odo heeyo tou teli odo ee tokenee sisilei. Bei, hedebe o wiligi odo oso o tou teli odo eyo goo ee midileiso. Esiga o tou teli odo oso Lodeeye pidi kitulugu maga o tou ee medee tekepo talaiso.

<sup>5</sup> Osoloso see biame eyo goo maga odo heeso egeese takalai malaiso, “Biame hee ono diya tei dolone, nei biame abo ee tei mauwe,” dee takalai malaiso. Osoloso nei odo heeso takolone, biame susuga ee hedebe, dee takalai malaiso. Egeesi ma kulodu goo hamaga odo susuga oso dieso goolee maga dabalai tekepo.

<sup>6</sup> Bei, biame hedebe mapoo tei deli odo oso yo Lodee goolone ka seli. Osoloso nei susuga nali odo oso yo Lodee goolone nei susuga naliso. Bei, yayo goomoga to Godee mapoo takoloso nei naliso. Osoloso gala hwei nalai tei deli odo oso yo Lodee goolone, goomoga to Godee mapoo takoloso nei segei ono naliso.

<sup>7</sup> Esiga mipoo hamapoo wulo iso goomoga goo ee tolone koo doso. Osoloso iyo wedilei onosee wulo iso goomoga goo maga koo wodumoloso.

<sup>8</sup> Esino iyo mipoo hamapoo dobolone osoloso wedilone, Lodee mapoo goomoga goo tenelai tekepo. Esiga iyo mipoo toowa hamapoo egee do ee ma kulodu, osoloso iyo wedilei mapoo iba wulo Lodeeye odo doloso dabalaiso.

**13:11:** Epe 5:14; 1Tes 5:6-7    **13:12:** 1Yon 2:8    \* **13:12:** *neliga sabolo mi hadobilei* - goo eyo bei ee egeesi moloso. Neliga eyo bei ee Yesuye sibilega iyo epedee hagee do biame ee takooso. Osoloso mi hadobilei ee Yesuye see wedi sibilei biame ee takooso.    **13:13:** Luka 21:34; Epe 5:18    **13:14:** Epe 5:11    **14:1:** Loum 15:7    **14:2:** Gen 9:3-4    **14:3:** Kol 2:16    **14:4:** Mat 7:1; Yem 4:11-12  
**14:5:** Gal 4:10-11    **14:8:** Gal 2:20

<sup>9</sup> Goo egeesi maga Keliso toloso see gie badeli mapoo hogadiso, yayo odoos gie egee do sabolo osoloso odoos wedia dia wiligi odoos doloso badalame.

<sup>10</sup> Esiga niyo bei kasalame nee tei too odoos ee tokenee ka sisiliyo? Osoloso see niyo bei kasalame nee tei too odoos ee ka goweliyo? Bei, iba susuga Godeeyo howo woola tebisileiso, yayo ibada goo midilame.

<sup>11</sup> Bei, Godeeyo to booka mapoo hogugu oso egeesee takooso,

“A wiligi odoos, Lodee, kookaiyo gie badeli ee aso. Osoloso ayo tei goo egeesee takooso,

Odoos susuga oso mo homo beiyopoo gauwuloso takolone,

a tei Godeeso dolone dabalaiso,”  
dee takaso.

<sup>12</sup> Esiga odoos hedebe hedebe di oso goo iso moodoo eyo bei ee Godee mapoo takalaiso.

*Nayo nei nali goo maga nee odoos ee tokenee mapoo na gido di*

<sup>13</sup> Esiga iyo ibada tei too odoos eyo goo ee ogoloso wulo goo gooleeso nei midi nei midi dee na soomo. Osoloso nee tei too odoos oso goo tokenee teyaga, niyo yo tagodibigilame goo hee na moodee.

<sup>14</sup> Esiga Lodee Yesuye amapoo olo eligiso, nei susuga nalai ee tei mauwe. Esino odoos heeso takolone, nei abo nalai tei daga, yo nei egee nelega tei doloso osee badalai tekepo.

<sup>15</sup> Egeesi ma kulodu nayo nei nolone dabalai goo oso nee tei too odoos mapoo hegi goo tonomologa, nayo odoos egee sooloo dolone koo seeso. Esino nayo nei susuga nolone egee bado goo oso nee odoos ee tokenee na peye dee. Bei, Kelisoye yo halo olo taso.

<sup>16</sup> Niyo goolone goo hee ee tekepo dee gooleega, niba obeeyamo, nibada goo ee ogoloso, odoos aboso maneyaga.

<sup>17</sup> Bei, Godeeye wiligi doloso badeli goo mapoo nei nalai sabolo, osoloso howo nalai sabolo oso goo toowa koo moloso. Esino Dio Tei oso kitulugu maga Godeeyo howo woola tekepo badalai goo sabolo, osoloso nee odoos sabolo mesie badalai goo sabolo, osoloso goomoga sabolo badalai goo oso goo toowa ka moloso.

<sup>18</sup> Esiga edebeeyo goo egeesi ma kulodu badolone Keliso mapoo mesilone badoga, Godeeye odoos egee bia mapoo goomogalaiso. Osoloso odoos aboso yo odoos tekepo dalaiso.

<sup>19</sup> Esiga iba mesie goo tosibilei goo ee tolone dabalame esilone ka dobomo. Osoloso ibada odoos oso tei too ma kulodu kitulugu sabolo badalame, nei pidi nei pidi dolone dobomo.

<sup>20</sup> Esiga nei nayo nali oso Godeeye odoos hee ma kulodu tou too ee tokenee na peye dee. Nei susuga nalai tei mauwe. Esino nei susuga ee ma kulodu nayo nei hee ne oso nee tei too odoos ee goo tokenee mapoo gido duga, no goo tokenee toso. Esiga nayo yo halo nei egee na ne.

<sup>21</sup> Egeesi ma kulodu nayo o howo woola gala hwei nelega pagalai tekepo, osoloso wain i nelega pagalai tekepo, osoloso goo abo moodelega pagalai, goo oso nee tei too odoos hee goo tokenee talame gido diyaga.

<sup>22</sup> Egeesi ma kulodu nayo goolee oso nei susuga nalai tekepo daga, nei egee osee namalai tekepo. Esino nayo goolee oso nei abo nalai ono haga tekeponee dee gooleega, no wulo nei abo ee namalai tekepo. Nayo goo bakadio hamaga kasee gooleesomo, goo hagee hedebe nee goo, osoloso Godeeyo goo oso. Osoloso edebeeyo goo eyo tomo sili ee goo tekepo doloso gooleedoloso, o goo goolee oso goolee, yo goo tokenee tele, dee gooleega, yo goomogalai tekepo.

<sup>23</sup> Esino edebeeyo goo goolee baka-dio doloso badolone, nei susuga ee ma kulodu nei hee nalai ee tekeponee. Egeeseega Godeeye yimapoo goo tokenee to, dee takalaiso. Bei, yo tei telega goo egee ka toso. Esiga goo yayo tedeli goo mapoo tei telega poogoloso see toga, yo goo tokenee toso.

## 15

### *Nee odoowo goo ee diya goolone ka debee*

<sup>1</sup> Esiga tei too ma kulodu kibiloso debeli odoowoo iyo, tei too kibile poogoo odoowoo ee pidilei tekepo. Osoloso iso nediliyo ibano goolone hedebe iso goomoga goo ee tolone na debee.

<sup>2</sup> Esino ibada odoowoo diya goolone, iyo diba medee pidilone dabalai tekepo, diba goomoga sabolo dobolone, diayo tei too ma kulodu kibiloso dabalame.

<sup>3</sup> Bei, Keliso eyo goomoga goo ee tomo sile. Kelisoye Godee mapoo taka goo maga, Godeeyo to booka mapoo hogugu oso egeesee takooso, “Edebeeyo no tokenee sisiga, yayo a tokenee sisiso,” diso.

<sup>4</sup> Esiga goo susuga ee Godeeyo to booka mapoo daga hoogoo olo hoguguso, imapoo eligilone iba pidilame. Goo egeesi maga iyo mesie sabolo dobolone, Godeeye imapoo gie badeli tenelai mapoo dulone dobolone ka balaga moloso.

<sup>5-6</sup> Esiga tei too ma kulodu medee kibiloso dabalai goo sabolo, osoloso emegei pidilei goo sabolo Godee maga imapoo ka siboso. Esiga ayo Godee mapoo taka, niyo Yesu Kelisowo goo ogoloso ee dodolone, nima kulodu goo goolee medee hedebe oso ka malame. Osoloso niba nisono susuga hodobo ibada Lodee Yesu Kelisowo Ama Godeeyo hu dokodoo poudoolone dabalame.

### *To tekepo ee Yu odoowoo sabolo osoloso*

#### *Yu odoowoo diba pidilame ka moloso*

<sup>7</sup> Esiga Kelisoye niba idoo, egeesee solone niba nose nee odoowoo ide. Niyo egeesee solone dogo, edebeeyo goo hagee ogoloso Godeeyo hu dokodoo poudileiso.

<sup>8</sup> Esiga ayo nimapoo taka, Kelisoye Yu odoowoo ee halo mesilone tou teli odoowoo doloso badalame simiso, Godeeye dia amawe dio mapoo to edidi magoo goo ee tobuloso moodeli goo ee eligilame.

<sup>9</sup> Osoloso Yu odoowoo oso Godeeye dimapoo sooloo deli goo eligi maga o hu dokodoo poudulame. Bei, Deibidiye Godee mapoo taka goo ee Godeeyo to booka mapoo hogugu oso egeesee takooso,

“Esiga ayo Yu odoowoo dima kulodu badolone nee hu dokodoo poudileiso.

Osoloso goomoga kosaiya poulone badolone nee hu dokodoo poudileiso.”

<sup>10</sup> Osoloso Godeeyo to booka mapoo hogugu hee hagoso egeesee takooso, “Yu odoowoo niba, Yu odoowoo sabolo hedebe doloso goomoga dokodoo poude.”

<sup>11</sup> Osoloso Godeeyo to booka mapoo hogugu hee hagoso egeesee takooso, “Yu odoowoo niba, Godeeyo hu dokodoo poude.

Osoloso odoowoo susuga goomoga kosaiya poulone o hu dokodoo poudeye dee.”

<sup>12</sup> Osoloso Aisayaye egeesee hoguguso,

“Wiligi odoowoo hagoso Yesi\* o bala ma kuloduga sibileiso,

yayo Yu odoowoo ee wiligi doloso badalame.

Osoloso Yu odoowoo oso yimaga gie badeli talame dulone dobolone balaga malaiso.”

15:2: 1Kol 10:24, 33    15:3: Psa 69:9    15:4: 2Tim 3:16    15:7: Loum 14:1    15:8: Mat 15:24

15:9: Diye 3:25; Psa 18:49    15:10: Deut 32:43    15:11: Psa 117:1    15:12: Isa 11:10; Yili 5:5

\* 15:12: **Yesi** hagee, wiligi odoowoo Deibidiyo ama. Yesi dio Deibidi dio dobosoo wediaso. Osoloso dugo bei poogoloso hamamee Yesu soomagooso. Yesu yo Yesi bolo bala hedebe.



13 Niyo gie badeli teneli Godee mapoo tei too goo maga, yayo nimapoo mesie sabolo, osoloso goomoga sabolo oso nimapoo toowa doloso meleye dee, Dio Tei oso kitulugu maga nimapoo Godeeye gie badeli tenelai mapoo dulone dobolone balagamologa, nimapoo goomoga egee molo oso toowa doloso malame.

*Poloye o tou maga taka*

14 Esiga tei telaga odoo emegei, a tei toso, goo tekepo oso nima kulodu toowa doloso moloso. Osoloso a see tei toso, niyo Kelisowo goo ee medee gooleedoloso, see nee odoo pidili to oso nei pidi nei pidi dolone debeli goo ee, niba olo gooleedooso.

15 Esino goo susuga hagee niyo boobado bigiyaga, ayo to hogugu hagee ma kulodu nimapoo weliga ka yiligebiga.

16 Bei, Godeeye sooloo dolone pidi goo maga a Yesu Keliso o tou teli odoo diso, ayo Yu odoonee dima kulodu tou talame. Osoloso a Godee ogo odoo ogo doloso domo badeli odoo masi tou mesie tolone, Godeeyo to tekepo ee takomo silame. Esiga Dio Tei oso kitulugu maga, Yu odoonee diba Godeeyo dalame peegoo pi magalaiso. Goo egeesi maga diba Godee mapoo goomoga teneli emegei di bi masi malaiso.

17 Esiga ayo Yesu Keliso sabolo hedebe doloso badolone, Godeeyo tou too maga a goomoga sabolo ka badoso.

18 Egeesi ma kulodu ayo goo abo maga takalaime. Esino hedebe Kelisoye amaga tou tolone ayo taka maga, osoloso ayo goo moodoo maga, Yu odoonee oso Godee mapoo tei too goo ee ayo ebilega woola takalaiso.

19 Osoloso ayo Dio Tei oso kitulugu maga goo toowa opusomo di moodoo ee ogoloso, diayo Godee

mapoo tei tooso. Esiga ayo Kelisowo goo maga to tekepo susuga takomo silone, Yelusalem maga bei mooloogooloso abaga dino Ilulikum mi mapoo dilesa koodobiaso.

20 Esiga a diya goomogoso, Kelisowo goo dule poogoo mosobia omapoo dilesa to tekepo takomo silame. Egeeseelone a koo goomegeli, odoo heeso omou segei mapoo ayo moso tegelai.\*

21 Bei, Godeeyo to booka mapoo hogugu oso egeesee takooso,

“O goo gooleedele poogoo odoo oso o goo ee gooleedalaiso.

Osoloso o goo dule poogoo odoo oso o goo duloso medee gooleedalaiso.”

*Poloye tei telaga odoo Loum mi mapoo debeli ee agala dilame goomoga*

22 Goo egeesi maga ayo to tekepo takomo silone, niba agalame sibilei biame egele.

23 Esino ayo mi hamapoo tou too ee olo hosudooso. Esiga ayo sibilesa niba agalai goomogoso. Bei, ayo dugo abo ee ma kulodu niba agala sibilame goomegeliso.

24 Esiga a Spein mi mapoo dulone Loum mi omapoo sibilesa niba agalai goomogoso. Egeesi ma kulodu ayo goomoga sabolo biame deiyepo nibolo hodobo badoboso, see Spein mi mapoo dilame seega, niyo a pidi.

25 Esino ayo nimapoo sibilei ee epedee mologa, Yelusalem mapoo tei telaga odoo mapoo emegei di bi todileiso.

26 Bei, tei telaga odoo Make-doniya mapoo debeli odoo sabolo, osoloso Akaya mapoo debeli odoo oso Yelusalem mapoo tei telaga bi mauwe odoo ee pidilame molee mooloogoloso amapoo teneeso, ayo dimapoo todilame.

15:16: Loum 1:5; 11:13    15:20: 2Kol 10:15-16    \* 15:20: goo eyo bei ee, mi omapoo odoo heeso Godeeyo tou olo bei mooloogoo mapoo see Poloye dilesa domo abaga bei mooloogalai, yo koo goomegeli.    15:21: Isa 52:15    15:22: Loum 1:13    15:25: 1Kol 16:1-4    15:26: 1Kol 16:1; 2Kol 8:1; 9:2, 12; Diye 24:17    15:27: 1Kol 9:11

<sup>27</sup> Esiga Makedoniya odo sabolo, osoloso Akaya odo oso goomoga sabolo molee hagee mooloogooso. Bei, Yu odo dimaga gie badeli pidilei goo ee Yu odoonee dimapoo simiso. Esiga see diayo nei biso Yelusalem mapoo debeli tei telaga odo ee pidilei tekepo diso.

<sup>28</sup> Esiga emegei di bi diayo mooloo-goo ee ayo todilesa Yelusalem odo mapoo teneloso, see Spein mi mapoo dulone domopoo niba agalaiso.

<sup>29</sup> Esiga a gooleedooso, ayo nimapoo siboga, Kelisoye kitulugu maga ayo goo tekepo toowa nimapoo moodoolaiso.

<sup>30</sup> Esiga tei telaga odo emegei, ibada Lodee Yesu Kelisowo hu maga, osoloso Dio Tei oso sooloo dala maga ayo nimapoo ka howaso, niyo mo tou su ee tolone, niyo tei medee a halo Godee mapoo takolone ka dabalame.

<sup>31</sup> Egeeseelone niyo Godee mapoo takeeye, Yesu mapoo tei tele poogoo odo Yudiya mi mapoo debeli oso amapoo dala teneeyaga. Osoloso see takeeye, ayo molee Yelusalem mapoo toduga, tei telaga odo Yelusalem mapoo debeli oso ogoloso goomogalame.

<sup>32</sup> Esiga Godeeye goomogoga, a goomoga sabolo nimapoo sibileiso. Osoloso ayo nibolo hodobo badolone, hasaloso see kitulugu talaiso.

<sup>33</sup> Esiga ayo Godee mapoo taka, mesie teneli Godeeye nibolo hodobo badalame. Goo hagee tei goo.

## 16

### *Poloye tei telaga odo mapoo emegei di to taka*

<sup>1</sup> Esiga ibada omoo Poibe yo Kenekeleya mi mapoo debeli tei telaga odo dima kulodu dikou tou medee tekepo tolone badoso.

<sup>2</sup> Esiga sobo hagoso nimapoo siboga, Godeeyo odo oso moodeli egeesee solone, niyo Lodeeyo hu maga yo idoloso yo medee pidi. Bei,

goo abo maga yayo a medee pidilone, odo abo onosee yayo medee diya pidimeleeso.

<sup>3</sup> Osoloso ayo emegei di to Pilisila mapoo osoloso omo Akwila mapoo takee. Bei, diba abolo hodobo Yesu Kelisowo tou teli.

<sup>4</sup> Osoloso diayo mo gie badeli ee medee pidilame, nei diba dala tolosa wedilame mopoodoo doloso debeiso. Goo egeesi maga ayo dimapoo diya goomogoso. Osoloso Yu odoonee dia sosee susuga ososee dimapoo diya goomogoso.

<sup>5</sup> Osoloso dia moso ma kulodu howo gisilame mooloogoodoloso debeli odo dimapoo ayo emegei di to takee.

Osoloso ayo gooma odo Epainetus mapoo ayo emegei di to takee. Bei, Asiya mi toowa ee ma kulodu yayo daga malalo Keliso mapoo tei tooso.

<sup>6</sup> Osoloso Meli mapoo ayo emegei di to takee. Bei, yayo niba halo tou toowa tooso.

<sup>7</sup> Osoloso mo soosoo Anadolonikus sabolo osoloso Yuniyas mapoo ayo emegei di to takee. Bei, diayo abolo hodobo neliga moso ma kulodu debeiso. Egeesi ma kulodu diye di odo dima kulodu odo bakadio hagee hu toowa too odo. A Keliso mapoo tei telega badoboome, daga diba olo tei tolosa debeiso.

<sup>8</sup> Osoloso ayo gooma odo Lodee sabolo hedebe doloso badeli Amipiliyatus mapoo ayo emegei di to takee.

<sup>9</sup> Osoloso ibada odo ibolo hodobo Kelisowo tou teli odo hee Ulubanus mapoo ayo emegei di to takee. Osoloso ayo gooma odo Stakus mapoo ayo emegei di to takee.

<sup>10</sup> Osoloso Apeles mapoo ayo emegei di to takee. Yayo dala ma kulodu badolone Keliso mapoo tei tolosa badebeiso. Osoloso Alistobuluseeyo moso kulodu debeli odo mapoo ayo emegei di to takee.

<sup>11</sup> Osoloso mo soosoo ma kulodu badeli odo hee Helodiyon mapoo ayo emegei di to takee. Osoloso

Nalikisus eyo moso mapoo debeli tei telaga odoo mapoo ayo emegei di to takee.

<sup>12</sup> Osoloso sobo Tulupaina sabolo, osoloso omolo Tuluposa mapoo ayo emegei di to takee. Bei, sobo hagee bia oso Lodeeyo tou toowa teliso. Osoloso sobo ayo gooma Pelisis mapoo ayo emegei di to takee. Bei, yinosee Lodeeyo tou toowa teliso.

<sup>13</sup> Osoloso Lodeeyo tou medee tekepo teli odoo Lupus mapoo ayo emegei di to takee. Osoloso owee mapoo ayo emegei di to takee. Bei, yayo mo wee masi badolone a medee pidimeleeso.

<sup>14</sup> Osoloso ayo emegei di to Asunkilitus, osoloso Pelegon, osoloso Helemes, osoloso Patolobas, osoloso Helemas, osoloso tei telaga odoo dibolo hodobo hedebe deli odoo mapoo takee.

<sup>15</sup> Osoloso Pilologus, osoloso Yuliya, osoloso Neleyus, osoloso obooba, osoloso Olumpas, osoloso tei telaga odoo susuga dibolo hodobo hedebe deli mapoo ayo emegei di to takee.

<sup>16</sup> Esiga niba emegei dolone dee nei hai nei hai dolone ka debee. Osoloso tei telaga odoo Kelisowo sosee susuga hamapoo debeli oso emegei di to nimapoo ka taka.

#### *Poloye hamameedee kokodo taka*

<sup>17</sup> Esiga tei telaga odoo emegei, nima kulodu domo pili odoo sabolo, osoloso tei telaga odoo peegoo gido dili odoo ee medee ege. Bei, diayo eligimo silesibulone, tei goo niyo duloso tei too goo sabolo tobuloso koo eligili. Esiga niba dimaga peegoo dooboobigi.

<sup>18</sup> Bei, odoo egee biaso ibada Lodee Kelisoye goomoga goo ee koo dedeli. Esino dieso goomoga goo ee dodomo silone, toso hodolone goo tokenee

gooleedele poogoo odoo ee goo toke-nee mapoo gido diliso.

<sup>19</sup> Osoloso niyo Lodee mapoo tei toloso yimapoo mesie sabolo sili goo ee, tei telaga odoo susuga oso duloso olo gooleedooso. Esiga goo egeesi maga a diya goomogo. Esino a diya goomogo, niyo goo tekepo talai goo ono gooleedoloso, tokenee goo talai ee gooleedelega poogoloso dabalame.

<sup>20</sup> Osoloso mesie tosibili Godeeye Saitenso kitulugu ee guobigilei koola toobooso, niyo yo dagadilame. Esiga ayo Godee mapoo takooso, ibada Lodee Yesuye niba sooloo dolone pidilame.

#### *Polowo odoo oso Loum odoo mapoo emegei di to taka*

<sup>21</sup> Abolo tou teli odoo Timoti yinosee emegei di to nimapoo ka taka. Osoloso mo soosoo Lukiyas sabolo, osoloso Yason sabolo, osoloso Sospate oso diayo emegei di to nimapoo ka taka.

<sup>22</sup> Esiga Telitiyus ayo Polowo to hagee ka hogugu. Ayo Lodeeyo hu maga nimapoo emegei di to ka taka.

<sup>23</sup> Osoloso moso ayo hagee bado eyo ama Gaiyuseeye emegei di to nimapoo ka taka. Moso hageeyo kulodu tei telaga odoo susuga oso howo gisilone debeliso. Osoloso Kolin mi toowa ee ma kulodu molee gibadeli odoo Elastuseeye emegei di to nimapoo ka taka. Osoloso ibada omolo Kuwalituseeye emegei di to nimapoo ka taka.\*

#### *Poloye to hamameedee taka*

<sup>25</sup> Esiga iba Godeeyo hu dokodoo poudoomo. Bei, yayo to tekepo ayo hagee takomo silo to omaga niyo tei too goo omapoo kitulugu tenelai teiba. To tekepo Yesu Kelisowo goo hagee daga hoogoo mada meleeso.

**16:13:** Maka 15:21 **16:16:** 1Kol 16:20; 1Pita 5:14 **16:17:** Mat 7:15; Tait 3:10 **16:18:** Pil 3:19; 2Pita 2:3 **16:19:** Loum 1:8; 1Kol 14:20 **16:20:** Gen 3:15 **16:21:** Diye 16:1-2; 19:22; 20:4 **16:23:** Diye 19:22; 1Kol 1:14 \* **16:23:** To hogugu hagee peipa abo mapoo besee 24 hogugu moloso: Esiga ayo Godee mapoo takooso, ibada Lodee Yesu Kelisoye niba susuga sooloo dolone pidilame. Goo hagee tei goo. **16:25:** Epe 1:9; 3:5, 9; Kol 1:26; Loum 1:5

<sup>26</sup> Esino kookaiyo badeli Godeeye to teneeso, to tekepo hagee Godee maga to toloso kokodo takomo silesibili odoo oso booka mapoo hogugulame. Goo egeesi maga to tekepo ee epei olo woola yilige buguso, odoo susuga oso Keliso mapoo tei toloso o to mapoo mesimo silesibilame.

<sup>27</sup> Esiga goo medee gweli Godee hedebe o hu ee Yesu Keliso maga kookaiyo dokodoo osee poudumelee. Goo hagee tei goo.



## 1 Tesalonika Poloye Tesalonika odo dimapoo to hogugu tenee

### *1 Tesalonika booka goo eyo bei*

Polo Kolin mi mapoo badolone, Tesalonika odo dimapoo to hagee hoguguso. Polo daga Tesalonika mapoo di biame mapoo edebeeyo o to duloso tei tooso. Esino Yu odooso goo hagee ogoloso Polo habuguso (Diye di odo 17:1-10 omaga egeesee ka takooso). Esiga Poloye tei telaga odo hagee bia diya gooleebugulone, kokodo takeli to hagee hoguguloso dimapoo teneeso, diayo dala ma kulodu dobolone, Godee mapoo tei toloso medee kibiya dabalame. Osoloso tei telaga odo susuga oso Yesu siboga biame mapoo yayo badalai mi mapoo palai goo ee gooleedoloso dabalame diayo hoguguloso teneeso.

<sup>1</sup> To hogugu hagee Polo, Sailesi, osoloso Timoti iyo Tesalonika mi ma kulodu debeli tei telaga odo nimapoo ka teneeso. Niba Ma Godee sabolo, osoloso Lodee Yesu Keliso sabolo hedebe doloso doso. Esiga iyo Godee mapoo takooso, yayo niba sooloo dolone pidilame osoloso mesie sabolo dabalame.

### *Tesalonika odo oso tei too*

<sup>2</sup> Iyo biame susuga niba halo Godee mapoo takolone, nibada goo maga yimapoo goomegeliso.

<sup>3</sup> Egeesi maga iyo niba Godee mapoo takolone goo hagee gooleebigiliso. Niyo tei too maga tou too sabolo, osoloso odo abo sooloo dologa pidili sabolo, osoloso edebeeyo nimapoo dala tenee ee ma kulodu dobolone, Lodee Yesu Kelisoye see sibileiso doloso, bolone tei toloso doso.

<sup>4</sup> Tei telaga odo, emegei, iba gooleedooso, Godeeye niba sooloo dolone, niba o odo dalame hesigasoo.

<sup>5</sup> Bei, iyo to tekepo nimapoo tosimi ee wulo todee mosoowe tosbileso ka takele. Esino iyo Dio Tei oso kitulugu maga ka taka. Osoloso iba to tekepo hagee kibiya tei toloso nimapoo eligiso. Osoloso iyo niba pidilame nibolo debei ee niba gooleedooso.

<sup>6</sup> Osoloso niyo ibada goo sabolo, osoloso Lodeeyo goo ee peedeeso. Egeesi maga niyo to hagee duloso toloso, dala ee ma kulodu doboome, Dio Tei oso goomoga sabolo to hagee tooso.

<sup>7</sup> Esiga tei telaga odo susuga Makedoniya mapoo debeli sabolo, osoloso Akaya mapoo debeli oso nibada goo duloso padalai tekepo.

<sup>8</sup> Esiga Godeeye nimaga eligi goo ee hedebe Makedoniya sabolo Akaya sabolo mapoo dudobigile. Haye, niyo tei too goo ee mi susuga mapoo olo dudobuguso. Esiga nibada goo ee iyo mi abo mapoo see tobu takomo dilei ee goo haga toowanee.

<sup>9</sup> Bei, mi susuga ee ma kulodu edebeeyo iyo nibada mosopoo siboga, niyo to tekepo too ee takeliso. Egeeseelone, diayo niyo gamenee godee poogoloso see tei gie badeli Godee mapoo sibileso, o to mapoo mesimo sili goo ee takeliso.

<sup>10</sup> Osoloso diayo Godeeyo owoloye ta maga Godeeye hogadi oso Kei mi ma dokodooga sibileiso doloso niyo egee bamolo goo ee takeliso. Odo ee Yesu. Godeeye midilei biame mapoo, yayo komonolone tokenee eyo nei dala tenelai biame mapoo, Yesuye tei telaga odo iba susuga peegoo gilimado dileiso.

## 2

### *Poloye Tesalonika mi mapoo tou too*

<sup>1</sup> Tei telaga odo, emegei, iyo nibolo hodobo dobolone, biame wulo mosoowe hosule.

<sup>2</sup> Esiga niba gooleedooso, iyo daga nimapoo sibilame, Pilipai mi mapoo doboome, edebeeyo imapoo to tokenee takolone, dala tenee goo ee.

Esino ee ma kulodu ibada Godeeye iba pidime, edebeeyo iba gowe ee ma kulodu iba ebilega, Godeeyo to tekepo nimapoo takaso.

<sup>3</sup> Bei, iyo eligi goo ee gamenee goonee, osoloso tokenee gweli goo maga koo eligiso. Esiga iyo nimapoo gamenee takalaime.

<sup>4</sup> Esino iyo Godeeyo to tekepo ee eligimo silesiboso. Bei, Godeeye iba teiba doloso hesigaloso o to tekepo takomo silesibe, diso. Esiga iyo tou hagee tomo silo odoo goomogalame sile. Haya! Godee ibada sooloo ma kulodu egeli yo goomogalame ka siloso.

<sup>5</sup> Osoloso niba nosee gooleedooso, niyo imapoo sibilame wulo gamenee toso hedele. Osoloso iba nei molee talame to tekepo ka takele. Godeeye goo hagee tei diso.

<sup>6</sup> Egeesi maga nibolo osoloso odoo susuga oso imapoo goomogalame koo seli. Esino Kelisoye diye di odoo iyo toowa doloso niba balame, imapoo kitulugu meleeso.

<sup>7</sup> Esino iyo egeesele sele. Bei, iyo niba holope masi oweeye owolo dio bali egeesi masi bameleeso.

<sup>8</sup> Esiga iyo niba diya sooloo dolone goomoga sabolo hedebe Godeeyo to tekepo nimapoo ka tosibile. Haya. Ibada gie badeli sabolo nimapoo tenelame ka simi. Bei, niba iyo gooma odoo.

<sup>9</sup> Tei telaga odoo, emegei, nibolo dobolone iyo nali bi sabolo, osoloso iyo goomoga bi abo sabolo tebilame, iyo ibada suso gesi sabolo biame sabolo tou toowa tomo silee, niba gooleedooso. Goo egeesi maga, iyo Godeeyo to takomo silesibulone, nimapoo hegi goo teneeyaga, bi koo howali.

<sup>10</sup> O, iyo tei telaga nibolo dobolone, iyo tokenee goo hee tele. Esino iyo nibolo hodobo medee teedee dobolone, Godeeye o howo woola goo tekepo deli goo ee iyo tomo silesibiliso. Esiga goo hagee niba olo

gooleedooso. Osoloso Godee nosee goo hamapoo tei diso.

<sup>11</sup> Esiga niba gooleedooso, maye owolo bamele egeesi masi, niba iyo egeesi bameleeso.

<sup>12</sup> Iyo niba Godeeyo howo woola kibiya dabalame, eli opusomo opusomo di maga nimapoo pidili to takaso. Bei, Godeeye niba imoloso, niyo Godeeye wiligi doloso badeli mapoo gadilesi dobolone, yo toowa doloso yibolo hodobo dabalame.

<sup>13</sup> Osoloso iba see Godee mapoo goomoga to takooso. Bei, niyo iyo Godeeyo to taka duloso dobolone, to hagee edebeeyo eyo gooleeso takooso, dee takele. Esino niyo to hagee tei Godee maga siboso doloso medee tooso. Esiga Godeeye o to hagee sabolo tei telaga odoo nima kulodu tou tomoloso.

<sup>14</sup> Esiga niba gooleedooso, Yu odoo Yudiya mi mapoo Yesu Keliso mapoo tei telaga odoo dimapoo dala tenemelee goo ee. Egeesi maga, goo egeesi oso nimapoo peledabaso. Goo ee nibada odoo oso nimapoo dala teneliso.

<sup>15</sup> Yu odoo oso daga hoogoo Godee maga to toloso kokodo takomo sili odoo piliguso, osoloso diayo Yesu Keliso wooloomaso. Osoloso iyo Godeeyo to mi abo mapoo takomo silesibume, diayo iba peegoo hasisobigiliso. Esiga Godeeye Yu odoo dimapoo koo goomegeli. Osoloso diayo odoo susuga mapoo gowe toowa moloso.

<sup>16</sup> Egeeseelone, diayo Yu dele poogoo odoo dimapoo iyo to tekepo todilesi takeme, Yu dele poogoo odoo oso gie badeli teyaga, diayo imapoo hamaga takalame seeso. Goo hageesi maga, dia tokenee susuga oso dieso dimapoo kadadigamo pologa, Godeeye komonolone dala toowa hoo poogoo mauwe dimapoo tenelaiso.

*Poloye see Tesalonika mi mapoo dilame goomoga*

<sup>17</sup> Esiga tei telaga odoo emegei, edebeeyo iba nibada mi maga hasiso bugume, iyo biame deiyepo mapoo niba poogoo dilesa dobolone, niba boobado bigile. Esino iyo niba see agalame diya goomogolone, nimapoo sibilame wegeegeeso.

<sup>18</sup> Esiga iyo niba agala sibilame goomegeliso. O, tei taka, Polo ayo niba agalame sibilame wegeegeliso. Esino Saitenso iba hamaga takeliso.

<sup>19</sup> Iyo niba agala sibilame goomegeliso. Bei, ibada Lodee Yesu see wedi siboga, ogoo goo oso imapoo goomoga ka tenelaiyo? Osoloso ogoo goo oso iyo o howo woola ebilega kibiya ka dabalaiyo? Ee nibaso. Niyo tei too oso iyo tou tekepo too ee woola yilige bigileiso.

<sup>20</sup> Bei, Godeeye nibada goo maga imapoo goomoga tenelaiso.

### 3

<sup>1-2</sup> Esiga iyo niba agalame sibilei biame dagadime, see gowoolone, wulo Timoti nimapoo diye dolone, iba Atene mi mapoo debeiso. Ibada omolo Timoti hagee ibolo tou tomo silone, Godeeyo to tekepo Kelisowo goo ee takomo sili odoo oso. Esiga iyo yo nimapoo diye diso, yayo niyo tei too ma kulodu kibiya dabalame kokodo takalame.

<sup>3</sup> Bei, dala hagee ma kulodu odoo heeso tei too peegeeyaga. Osoloso niba gooleedooso, tei teli goo ee ma kulodu dala sabolo moloso.

<sup>4</sup> Esiga iba nibolo hodobo dobolone, dala goo oso sibilei nimapoo olo takaso. Esiga dala goo oso epedee imapoo peledaba, niba gooleedooso.

<sup>5</sup> Goo egeesi maga, ayo niyo tei too goo ee dulega badalai, a goweso. Egeeseelone, ayo Timoti nimapoo diye diso. Bei, ayo niba halo goo diya kodumeleeso, niba Saitenso game-nee taka mapoo homodobuoga, oso iyo niba halo tou too goo ee wulo mosoowe hosudeeyaga.

<sup>6</sup> Esino Timotiye epedee nibolo badoboso, see wedi sibilesa, yayo nibada goo imapoo takeme du medee tekepo. Bei, yayo niyo tei too goo sabolo, emegei sooloo deli goo sabolo tolone egee do goo ee yayo sibilesa imapoo takaso. Osoloso yayo imapoo niyo iba goolone dobolone, iba agala sibilame goomoga goo ee takaso. Egeesi ma kulodu nei iyo niba agala sibilame diya gooleeso.

<sup>7</sup> Esiga tei telaga odoo emegei, iyo dala goo sabolo hegi goo sabolo ma kulodu dobolone, niyo tei too goo ee Timotiye imapoo sibilesa takeme du oso iba pidiso.

<sup>8</sup> Bei, iyo niyo Lodee mapoo tei toloso kibiya debei goo ee duloso diya goomogolone ka doso.

<sup>9</sup> Goo egeesi maga, iyo niba gooleebugulone, goomoga to Godee mapoo taka hoo poogoo mauwe moloso. Bei, iba Godeeyo mudugiyopoo dobolone, nibada goo oso imapoo goomoga toowa teneeso.

<sup>10</sup> Osoloso gesi sabolo biame sabolo, niba see agalai ee gooleebugulone, Godee mapoo takolone ka doso. Egeesi ma kulodu, niyo tei too goo ma kulodu, goo heeso tebilega mologa, iyo sibilesa goo ee tebilame pidileiso.

<sup>11</sup> Esiga iyo Godee mapoo takooso, ibada Ama Godee sabolo osoloso ibada Lodee Yesu sabolo oso iyo nimapoo sibilei eli medee hoodo magalame.

<sup>12</sup> Osoloso iyo see Godee mapoo takooso, Lodeeye nima kulodu sooloo dala goo egee molo kibilame. Osoloso iyo niba diya sooloo egee dolomolo egeesi masi, see niyo nima kulodu osoloso odoo susuga ma kulodu emegei sooloo dala goo sabolo dabalame.

<sup>13</sup> Osoloso iba see Godee mapoo takooso, ibada Lodee Yesuye yayo hesiga odoo sabolo sibilei biame mapoo, niyo tei too ma kulodu kibiya dobolone, ibada Ama Godeeyo

mudugiyopaga, tekepo doloso tokenee goo mauwe odo doloso dabalame.

## 4

### *Godeeyo mudugiyopaga tekepo doloso badalai goo*

<sup>1</sup> Tei telaga odo emegei, tekepo doloso badalai goo maga Godee mapoo goomoga tenelai goo ee iyo nimapoo olo eligiso. Esiga a gooleedooso, niba egeesee goo ma kulodu ka doso. Esino tekepo goo nima kulodu egee molo oso toowa dalame, epedee ayo Lodee Yesuwo hu maga nimapoo ka taka.

<sup>2</sup> Iyo Yesu Kelisoye kitulugu maga nimapoo eligi goo ee, niba olo gooleedooso.

<sup>3</sup> Bei, Godee yo goomogoso, niyo o howo woola tokenee mauwe teedee dabalame. Esiga niba giso sabolo sobo sabolo heli telega tei doloso teedee debee.

<sup>4</sup> Esiga niba odo susuga eyo howo woola tekepo doloso, osoloso goo tokenee mauwe doloso dabalame, niba su kookoode.

<sup>5</sup> Osoloso nibada su oso goo heli talame goomoga goo ee dodolone na debee. Bei, Godee gooleedele poogoo odo oso goo hageesi teliso.

<sup>6</sup> Goo egeesi maga, nemegei tei too odo eyo osobo heli toloso yimapoo hegi goo na tenee. Bei, Lodeeye goo tokenee hageesi teli odo mapoo tokenee eyo nei dala tenelaiso. Iyo daga hoogoo nimapoo kitulugu takolone goo egeesi na te diso.

<sup>7</sup> Bei, Godeeye ibolo osoloso nibolo hesiga ee iyo goo tokenee ma kulodu dabalame ka sele. Esino iyo Godeeyo howo woola mapoo goo tokenee mauwe doloso kibiya dabalame, yayo iba hesigasoo.

<sup>8</sup> Esiga edebeeyo to hagee dadalai gowooga, yo odo to mapoo gowoolone koo seeso. Esino yayo

Godeeye nimapoo Dio Tei egee tenemolo o to mapoo gowooso.

<sup>9</sup> Esiga niba sooloo dala ma kulodu dobolone, tei telaga odo oso emegei nei pidi, nei pidi dalai goo ee, niba gooleedooso. Bei, Godeeye sooloo dala goo ee nimapoo olo eligiso. Esiga iyo goo hamapoo see nimapoo hogugulei ee goo haga toowanee.

<sup>10</sup> Emegei, niyo Makedoniya mi mapoo debeli tei telaga odo mapoo sooloo dolone dobolone egee pidimolo, iba gooleedooso. Esiga iyo niba goo egeesi ma kulodu dobolone, goo oso diya toowa dalame kitulugu sabolo ka taka.

<sup>11</sup> Esiga niba nemegei sabolo medee mesie debee. Osoloso niba nibada su ee pidilei maga tou tolone dobolone, emegei dia goo na takee. Bei, iyo goo hagee daga nimapoo olo eligiso.

<sup>12</sup> Niyo goo egeesi tomo siloga, peegoo debeli odo oso nibada goo ogoloso tekepo dalaiso. Osoloso niso nediliyo pidilame nee odo mapoo na be.

### *Yesuye sibilei eyo goo*

<sup>13</sup> Emegei tei telaga odo, niyo odo wedia eyo goo gooleedelega badalai, iba koo goomogo. Peegoo debeli odo oso odo wedia halo gooholone diya pupusigeliso. Bei, diba odo wedia oso see hogogadilei goo ee diba gooleedele. Esino peegoo debeli odo diayo odo wedia halo diya goohele sabolo debeli egeesi masi na debee.

<sup>14</sup> Bei, iba Yesuye ta maga see hogadi goo mapoo tei teliso. Esiga iba see tei toso, Yesuye see wedi siboga, Godeeye tei telaga odo wedia ee Yesubolo sibe dalaiso.

<sup>15</sup> Osoloso Lodee eyo taka to ee iyo nimapoo ka taka, goo ee Lodeeye sibilei biame omapoo, odo wedia osee mologa, iba wedilega gie hagee do odo oso saga malalo Yesu mapoo palaime.



<sup>16</sup> Esino Lodee eyo Kei mi ma dokodooga sibulone, to kitulugu sabolo, osoloso Godeeyo momaiye dia wiligi odoo eyo to sabolo, osoloso Godeeyo kibu i sabolo sibileiso. Egeeseega Keliso mapoo tei tolosa odoo wedia oso daga malalo hogogadileiso.

<sup>17</sup> Diba olo pologa, iba wedilega epedee hagee do odoo sabolo, osoloso odoo wedia hogogadi sabolo, hodobo mooloogoodoloso, kei ma dokodoo Lodee tugodalame palaiso. Osoloso iba Lodee sabolo badoboso kookaiyo osee badalaiso.

<sup>18</sup> Esiga niba nemegei nima kulodu egee do odoo oso odoo wedia maga diya goolee sabolo debeeyaga, kibilame to hagee dimapoo takee.

## 5

### *Yesuye sibilei goo mapoo mopoodoo de*

<sup>1</sup> Tei telaga odoo emegei, iyo goo hageesi oso peledabalai biame ee nimapoo see tobu hogugulei goo haga toowanee.

<sup>2</sup> Bei, niba olo gooleedooso, Lodeeye see wedi siboga, heli teli odoo oso gesi sibili egeesi masi sibileiso.

<sup>3</sup> Biame omapoo odoo abo oso egeese takalaiso, "Epee! Biame diya tekepo. Imapoo goo hee mauwe, goomoga goo oso moloso," dalaiso. Egeese takaga mologa, haga booloogelega dala goo oso dimapoo siboga tokenee palaiso. Esiga niba goolee, sobo koowasi oso yayo holope soomagalame, dala oso yimapoo sibili yo gooleedoloso badoga koo peledabelee. Esiga goo hagee egeesi masi. Esiga odoo abo oso biame ee gooleedoloso badoga ka sibileime. Esiga biame omapoo odoo heeso peegoo pulo dilei tebileime.

<sup>4</sup> Esino tei telaga odoo emegei, niba neliga ma kulodu koo debeli.

Osoloso niba heli teli odoo oso nibada mosopoo siboga, niba dio diliso. Esino Lodeeyo biame oso siboga, niba dio dileime. Bei, niba biame oso sibilei mapoo mopoodoo doloso bolone doso.

<sup>5</sup> Esiga niba biame gadeebugu mapoo kulodu silesibili odoo oso. Esiga iba tei telaga odoo gesi neliga ma kulodu koo debeli.

<sup>6</sup> Esiga iba tieseli odoo oso debi masi na dobomo. Esino iba mopoodoo doloso ibada su oso tokenee teyaga kookoodoloso bolone ka dobomo.

<sup>7</sup> Bei, tieseli odoo oso gesi tieseliso. Osoloso yugune nalagaloso halabagali odoo oso gesi yugune nalagaliso.

<sup>8</sup> Esino iba biame gadeebugu ma kulodu debeli odoo oso. Esiga iba tekepo, mopoodoo doloso dobolone, ibada su oso tokenee teyaga kookoodoloso bolone dobomo. Esiga ha teli odoo oso o su tioso woodeyaga gooloogalame, ki bi o su mapoo kaliso. Esiga iba egeesi masi Saiten oso gamenee taka mapoo homodobiyaga, iba Yesu mapoo tei tolone dobolone, emegei sooloo dolone dobomo. Osoloso ha teli odoo oso o wiligi mapoo tioso woodeyaga gooloogalame, ki bi wiligi mapoo meliso. Esiga iba egeesi masi Saiten oso gamenee taka mapoo homodobiyaga, iba gie badeli talame tei tolone dobomo.

<sup>9</sup> Bei, Godeeye iba hesiga hagee, yayo komonolone dala tenelame ka hesigele. Esino ibada Lodee Yesu Keliso maga gie badeli talame ka hesiga.

<sup>10</sup> Esiga Kelisoye iba halo olo taso, iyo yibolo hodobo dabalame. Esiga iyo dobosu wedioga, goo oso iyo Keliso sabolo dabalai goo ee opusomo dalaima.

<sup>11</sup> Esiga niba nee odoo oso tei too ma kulodu kibiya dabalame, pidili toso nei takoo, nei takoo dolone ka debi. Esino a gooleedooso, niba egeeseelone doso.

*To hamameedee kokodo taka*

<sup>12</sup> Tei telaga odoo emegei, iyo nimapoo taka, nibada sosee wiligi odoo tebisa sabolo, osoloso Godeeyo to eligili odoo sabolo mapoo mesiloso dimapoo goomoga tenee. Bei, diayo nima kulodu tou toowa diya tolone doso.

<sup>13</sup> Esiga diayo tou too maga niyo diba sooloo dolone, dimapoo mesie. Egeeseelone nemegei odoo sabolo medee mesiloso debee.

<sup>14</sup> Osoloso nima kulodu tou talai mapoo wabedeli odoo oso tou talame toso diya takee. Osoloso odoo howo woola tou talai simili odoo mapoo pidi to oso pidilone debee. Osoloso koo kibili odoo pidilone debee. Osoloso niba nemegei odoo sabolo mesiloso dobolone, saga kamanabugu dolone na debee.

<sup>15</sup> Egeeseelone dobolone, ede-beeyo nimapoo tokenee goo hee toga, nei na tenee. Esino niba nima kulodu osoloso odoo susuga ma kulodu mesie sabolo tekepo goo ono tolone ka debee.

<sup>16</sup> Biame susuga ma kulodu goomogolone debee.

<sup>17</sup> Egeeseelone dobolone biame susuga Godee mapoo takolone debee.

<sup>18</sup> Osoloso goo susuga ma kulodu Godee mapoo goomoga to takolone debee. Bei, Godeeye Kelisowo odoo oso goo hageesi talai ee goomogoso.

<sup>19</sup> Esiga niba Dio Tei oso nimapoo tou talai na hamaga takee.

<sup>20</sup> Egeeseelone, Godee maga to tolosokokodo takomo sili odoo oso Godeeye taka duloso to takooga omapoo na gowee.

<sup>21</sup> Esino to mapoo medee dui, osoloso medee goolee, goo egee tei Godee maga simi beleso agalame. Goo egee tei goo daga, to mapoo tei te.

<sup>22</sup> Osoloso tokenee goo telega debee.

<sup>23</sup> Esiga iyo Godee mapoo takooso, mesie goo teneli Godee yayo medee

todoloso badalai goo ee nimapoo tenelame. Osoloso iba see Godee mapoo takooso, ibada Lodee Yesu Keliso oso sibilei biame mapoo bamo dulone, nibada dio maga, osoloso nibada su maga, osoloso niyo goolee maga tokenee mauwe poogoloso dabalame.

<sup>24</sup> Esiga Godeeye nimapoo goo hagee moodoolaiso. Bei, niba hesiga Godee yayo to taka ee dadalai koo pegeli.

<sup>25</sup> Tei telaga odoo emegei, niyo iba halo Godee mapoo takolone debee.

<sup>26</sup> Osoloso nemegei tei telaga odoo mapoo emegei di to takolone ka debee.

<sup>27</sup> Ayo Lodeeyo hu maga niyo to hogugu hagee tei telaga odoo susuga mapoo hesigalame ka taka.

<sup>28</sup> Esiga ayo Godee mapoo takooso, ibada Lodee Yesu Kelisoye niba sooloo dolone pidilame.

## 2 Tesalonika Poloye see tobu Tesalonika odoo dimapoo to hogugu tenee

*2 Tesalonika booka goo eyo bei*

Polo dio Timoti dio diayo to daga malalo hogugu ee (1 Tesalonika) Tesalonika sosee mapoo teneeso. Osoloso see hamamee a 6 poogoloso to hagee hoguguso. Bei, Tesalonika sosee ma kulodu debeli tei telaga odoo abo oso dibada tou susuga ee poogoloso see wulo dobolone Yesuye sibilei goo ee bolone debeiso. E-eme Poloye goo egee ogoloso see tobu dimapoo kokodo taka to hagee hoguguloso teneeso. Osoloso odoo abo oso Yesuye sibilei goo mapoo dooboo goolone bolone doboome, Poloye Yesuye sibilei goo ee see medee dimapoo eligiso.

<sup>1</sup> To hogugu hagee Polo, Sailesi, osoloso Timoti, iyo Tesalonika mi ma kulodu debeli tei telaga odoo nimapoo ka teneeso. Niba Ma Godee sabolo, osoloso Lodee Yesu Keliso sabolo hedebe doloso doso.

<sup>2</sup> Esiga iyo Godee mapoo takooso, Ma Godee sabolo osoloso Lodee Yesu Kelisoye niba sooloo dolone pidilame osoloso mesie sabolo dabalame.

*Kelisoye see sibilei goo*

<sup>3</sup> Tei telaga odoo emegei, niyo tei too goo sabolo nemegei sooloo deli goo sabolo oso nima kulodu egee kauwu maga, iyo Godee mapoo goomoga to takalai tekepo.

<sup>4</sup> Esiga niba dala goo sabolo hegi goo sabolo ee ma kulodu tei tolone dobolone kibiloso osee egee do maga, iyo goomoga sabolo Godeeyo sosee abo mapoo debeli tei telaga odoo mapoo nibada goo takomo silesibiliso.

<sup>5</sup> Niyo tei too maga dala egee to goo oso, Godeeye odoo susuga dia goo

medee tekepo midilei goo ee woola ka eligiso. Goo egeesi maga Godeeye niba yayo wiligi doloso badeli mapoo gasibilei teiba dalaiso. Egeesi maga Godeeye wiligi doloso badeli goo maga niyo dala ka toso.

<sup>6-7</sup> Esiga Godeeye hedebe hooda tei goo moodeliso. Esiga Yesuye see wedi siboga, odoo nimapoo dala egee tenemolo dimapoo Godeeye nei dala tenelaiso. Osoloso odoo dala ma kulodu egee do nimapoo hasali tekepo tenelaiso. Osoloso ibolosee hasali tekepo tenelaiso. Lodee Yesuye see wedi siboga, o momaiye kitulugu susuga sabolo Kei mi ma dokodooga dou paiya sabolo sibileiso.

<sup>8</sup> Osoloso yayo sibileso, Godeeyo goo mapoo goweli odoo sabolo, osoloso to tekepo Kelisowo goo mapoo koo mesili odoo dimapoo nei dala tenelaiso.

<sup>9</sup> Omapoo Lodeeye diba tokenee poloso togobigileiso, osoloso o mudugiyopaga yayo diba toloso o kitulugu toowa maga peegoo togobisaga, diayo dala omapoo dobolone dala hoo poogoo me poogoloso osee dabalaiso.

<sup>10</sup> Osoloso yayo sibilei biame omapoo, o odoo oso yimapoo goomoga tenelone Yesuwo hu dokodoo poudileiso. Bei, Yesu yayo daga diba pidi maga. Osoloso tei telaga odoo susuga oso Yesu mapoo howoodalaiso. Esiga ee ma kulodu nibolo hodobo dabalaiso. Bei, niyo to tekepo iyo nimapoo takeme, niyo tei too maga.

<sup>11</sup> Iba goo hamapoo niba halo, Godee mapoo biame susuga takolone doso, niyo yayo goomoga goo ee tolone dabalame. Bei, niyo goo egeesi ee tolone dabalame, Godeeye niba hesigaso. Osoloso iyo see Godee mapoo takooso, nimapoo goo goolee tekepo egee molo toloso, Godeeye kitulugu maga nibada suso tou talame. Osoloso see niyo tei

too ma kuloduga egee kauwu tou ee medee talame.

<sup>12</sup> Esiga iyo dokodoo hagee takoo goo ee, edebeeyo nibada goo tekepo ogoloso ibada Lodee Yesuwo hu dokodoo poudilame ka seeso. Osoloso Lodee Yesuye nei nibada hu dokodoo poudoolone goomoga tenelame. Esiga ibada Godee osoloso Lodee Yesu Kelisoye sooloo dolone pidi maga goo hagee ka siboso.

## 2

### *Tei magoo mapoo koo mesili odo*

<sup>1</sup> Tei telaga odo emegei, ibada Lodee Yesu Kelisoye sibilei goo sabolo osoloso yayo iba gilimadoloso hodobo yo tugodalai goo sabolo nimapoo takalai iba goomogo.

<sup>2</sup> Esiga odo aboso sibilesi takolone, “Lodeeyo biame olo simiso,” dee takooga duloso, dio dulone sooloo habasagolone, dia to mapoo tei na te. Osoloso diayo takolone, “Dio Tei oso imapoo goo hagee ka eligiso,” dee takooga dia to mapoo tei na te. Osoloso see diayo takolone, “Polo diayo imapoo to hogugu tenelone egeesee taka,” dee takooga goo onosee omapoo tei na te.

<sup>3</sup> Esiga goo hageesee susuga ee ma kulodu odo heeso niba gamenee na takee dee. Bei, Lodeeyo biame oso sibilei mologa, daga goo bakadio oso peledabalaiso. Esiga odo aboso Lodee gowoolone yimapoo miligi pileiso. Osoloso tei magoo mapoo koo mesili odo oso peledabalaiso. Esino hamamee yo dou ma toodalaiso.

<sup>4</sup> Yayo o su eyo nediliyo si howolone, edebeeyo goomegeli godee susuga ee tokenee dolone, hedebe yo tekepo doloso si howolaiso. Egeeseelone, yayo dileso Godeeyo tei moso mapoo badolone anosee tei Godee dalaiso.

<sup>5</sup> Esino ayo nibolo silone, goo susuga hagee nimapoo takomo silee goo ee, niyo boobado bugusomo?

<sup>6</sup> Esiga epedee hamapoo tei magoo mapoo koo mesili odo oso sibilesi goo tokenee teyaga hamaga taka goo ee niba olo gooleedooso. Yo tei o biame Godeeye magoo mapoo woola ka peledabalame yo hamaga takaso.

<sup>7-8</sup> Esino tei magoo mapoo koo mesili goo oso mada odo ma kulodu olo goo moodoo moloso. Esino goo egeesi oso toowa peyaga, goo tokenee teyaga hamaga takeli odo oso hamaga takoloso badoso. Osoloso hamamee goo tokenee teyaga hamaga takeli odo ee peegoo duga, tei magoo mapoo koo mesili odo ee biame omapoo peledabalaiso. Esino Lodee Yesuye sibilesi, o maga maga poodi sabolo osoloso yayo toowa doloso kitulugu sabolo oso tei magoo mapoo koo mesili odo ee wooloomaloso pagalaiso.

<sup>9</sup> Esiga tei magoo mapoo koo mesili odo oso siboga, yo Saitenso kitulugu sabolo sibileiso. Osoloso yayo Saitenso kitulugu maga goo toowa opusomo di moodoomo sileiso.

<sup>10</sup> Yayo egeeseemo silone, goo tokenee opusomo opusomo di maga peegoo debeli odo ee gamenee goo maga diba talaiso. Osoloso diba ee ma kulodu dobolone wedileiso. Bei, diba gie badeli to mapoo gowoolone tei tele.

<sup>11</sup> Goo egeesi maga Godeeye goo tiadili goo toowa dimapoo tenelaiso, diayo tei magoo mapoo koo mesili odo oso gamenee goo taka mapoo tei talame.

<sup>12</sup> Esiga edebeeyo tei goo mapoo tei telega poogoloso, see tokenee goo goomegeli odo ee Godeeye dibada goo midiloso dimapoo tokenee eyo nei dala tenelaiso.

### *Kibiya debee*

<sup>13</sup> Tei telaga odo emegei, Lodeeye sooloo dala oso nibolo hodobo moloso. Osoloso iyo niba halo Godee



mapoo goomoga to takalai tekepo. Bei, Godeeye daga hoogoo niyo gie badeli talame niba olo hesigaso. Esiga niyo Dio Tei oso kitulugu maga goo tokenee mauwe dobolone, niyo tei goo mapoo tei too maga Godeeye nimapoo gie badeli olo teneeso.

<sup>14</sup> Godeeye iyo to tekepo hagee takomo silo maga niyo gie badeli talame niba iso, osoloso Yesu Keliso yo toowa dolone niba yibolo hodobo dabalame.

<sup>15</sup> Esiga tei telaga odoo emegei, iyo nimapoo eligi goo sabolo osoloso to hoguguloso tenee sabolo medee kibiya toloso tei too ma kulodu kibiya debee.

<sup>16-17</sup> Esiga iyo Godee mapoo takooso, ibada Lodee Yesu Keliso sabolo osoloso Ma Godee sabolo oso niba pidilone nimapoo kitulugu tenelaiso, niyo goo tekepo tomo silone to tekepo komo silame. Bei, ibada Ama Godeeye iba sooloo dolone imapoo kookaiyo moloso osee malai pidili goo ee teneeso, iyo goomoga sabolo gie badeli yayo tenelai ee bolone dabalame.

### 3

#### *Niyo iba halo Godee mapoo takee*

<sup>1</sup> Tei telaga odoo emegei, Lodeeyo goo oso mi susuga mapoo saga dudobigilame, niyo iba halo Godee mapoo takee. Bei, iba goomogoso, Godeeyo to mapoo niyo tei toloso mesie egee do egeesi masi odoo mi susuga mapoo egee do diba nosee egeesee dabalame.

<sup>2</sup> Egeesi ma kulodu tokenee odoo oso imapoo dala teneeyaga, Godeeye iba pidilame yimapoo takee. Bei, odoo susuga oso Godee mapoo haga tei tele.

<sup>3</sup> Esino Godee eyo to kitulugu magoo ee dadalai koo pegeli. Esiga yayo niba kitulugu teneloso niba medee balaiso, tokenee odoo Saiten yayo nimapoo dala teneeyaga.

<sup>4</sup> Esiga iba Lodee mapoo tei toso, niyo iyo taka goo ee tomoloso, osoloso hamamee osee tomalaiso.

<sup>5</sup> Esiga iyo niba halo Godee mapoo takooso, Lodeeye pidi maga Godeeye sooloo dala goo ee medee gooleedoloso dabalame. Osoloso dala ma kulodu kibiya dobolone Yesuye dala ma kuloduga kibiya badebei egeesi masi dabalame.

#### *Kitulugu sabolo tou ka te*

<sup>6</sup> Tei telaga odoo emegei, iyo Yesu Kelisowo hu maga nimapoo diya ka taka. Tei telaga odoo aboso iyo eligi to ee dedelega pegeli sabolo osoloso tou talai wabedeli odoo dimaga peegoo dooboobigi.

<sup>7</sup> Bei, iyo debei goo ee niba olo gooleedooso. Esiga niba nosee egeesee dabalai tekepo. Bei, iyo nibolo hodobo debei ee ma kulodu iba wabodo buguloso debele.

<sup>8</sup> Osoloso iba odoo heeyo nei nali bi iyo wulayo koo nali. Haye, iba nei molee teneloso nei ka nali. Osoloso biame sabolo gesi sabolo ibada su oso tou toowa teliso, iyo nei nali bi talai eyo nei magalai ee talame. Iyo egeesee seega nimapoo hegi goo tenelega pagalame.

<sup>9</sup> Iyo egeeseemo silone, niyo iba pidi doloso takalai kitulugu meleeno goo ee woola yilige bigile. Esino iyo nibolo hodobo dobolone, iba tou toowa teliso, niyo ibada goo ee padalame.

<sup>10</sup> Osoloso iyo nibolo hodobo silee biame mapoo, iyo nimapoo eligi goo ee hagoso. Odoo hee tou talai wabada daga, yimapoo nei nali bi na tenee.

<sup>11</sup> Osoloso iyo nima kulodu odoo aboso tou talai goweli goo ee taka iba duso. Egeeseelone diba tou telega wulo mosoowe domo silesibulone odoo heeyo goo ee takomo silesiboso.

<sup>12</sup> Iyo odoo egeesi mapoo Yesu Kelisowo hu maga ka taka, diayo goo egee poogoloso nei nali bi talai eyo

nei magalai ee talame tou tolone dabalame.

<sup>13</sup> Esino tei telaga odoe emegei, niyo goo tekepo talai mapoo na wabede.

<sup>14</sup> Goo egeesi ma kulodu odoe heeso iyo to hoguguloso tenee hamapoo mesilega poogooga, niyo o goo odoe woola yilige bigi. Osoloso yibolo hedebe dee na see. Egeeseega yayo goo hagee ogoloso similone wabedelega badalame.

<sup>15</sup> Esino ee ma kulodu yo ha teli odoe dee na see. Wulo yimapoo toso kokodo takee. Bei, yayo nibolo hodobo tei too ma kulodu badoso.

*Poloye emegei di to hamameedee taka*

<sup>16</sup> Esiga ayo Godee mapoo takooso, goo susuga ee ma kulodu mesili teneli Lodeeye biame susuga nimapoo mesili goo tenelame, osoloso Lodeeye nibolo hodobo badalame.

<sup>17</sup> A Polo, ayo hamapoo mo deeso emegei di to hagee ka hoguga. To ayo hogugu goo ee hagoso. Niyo hamapoo medee hoodo ogoloso to hogugu susuga ee ayo hogugudoo dalame. Esiga ayo egeesee hoguguliso.

<sup>18</sup> Esiga ayo Godee mapoo takooso, ibada Lodee Yesu Kelisoye niba sooloo dolone pidilame.

## 1 Timoti Poloye Timoti mapoo to hogugu tenee

### *1 Timoti booka goo eyo bei*

Poloye Godeeyo to takomo silee biame mapoo Timotiye yayo eligi goo ee duloso tei tooso. Osoloso Poloye mi susuga mapoo Godeeyo to takomo sileeme, yayo yibolo sileeso. Osoloso hamamee Timotiye tei telaga odoo Epeses mi mapoo debeli ee bolone badoboome, Poloye to hogugu hagee yimapoo teneeso. To hogugu hagee ma kulodu sosee medee balai goo omaga kokodo takaso.

<sup>1</sup> A Polo. Ibada gie badeli pidili Godeeye, osoloso Yesu Kelisoye a hesialoso diye di tou ee amapoo teneeso. Osoloso iba Yesu Kelisoye see wedi sibilei ee dulone bolone ka doso.

<sup>2</sup> Ayo to hogugu hagee Timoti namapoo ka tonowa. Tei too ma kulodu no tei mo holo masi badoso.

Ayo Godee mapoo taka, Ma Godeeye, osoloso ibada Lodee Yesu Kelisoye, no sooloo dolone pidilame, osoloso mesie goo namapoo tenelame.

### *Gamenee eligi eyo goo maga kokodo taka*

<sup>3</sup> A Makedoniya mi mapoo dulone ayo namapoo to kitulugu sabolo olo takaso, nayo Epeses mi mapoo badalame. Esiga a goomogo, nayo mi omapoo osee badalai. Bei, nayo omapoo badolone, odoo aboso gameenee goo egee eligimo silesibo ee hamaga takalame.

<sup>4</sup> Odoo hagee biaso adaga dia gesa-boo ee tei telaga odoo mapoo diya oposusumo silesiboso. Osoloso diayo dia adagaso balomo simi goo ee diya oposusumo silesiboso. Esino oposusu goo hagoso wulo odoo susuga mapoo toso agadili goo ee tosiboso. Esiga diayo eligi goo oso edebeeyo tei

too goo maga Godeeyo tou talai ee koo pidili.

<sup>5</sup> Esiga nayo gamenee goo eligili odoo ee hamaga takalai tekepo, tei telaga odoo oso emegei medee diya sooloo dolone dabalame. Sooloo deli goo ee sooloo ma kulodu goo toke-nee mauwe maga, osoloso Godeeyo howo woola tokenee mauwe doloso gooleedeli goo maga, osoloso Yesu Keliso mapoo medee kibiya tei too maga sibiliso.

<sup>6</sup> Esino gamenee goo eligimo silesibili odoo aboso goo tekepo omaga miligi piaso. Goo egeesi maga diayo goo bei mauwe takomo silesibiliso.

<sup>7</sup> Esiga tei magoo Godeeye Moses mapoo tenee ee diayo eligimo silesibilei, diba goomogoso. Esino tei magoo goo eyo bei ee, diba gooleedele. Osoloso to dieso taka eyo bei ee medee gooleedele. Diba wulo boobadolone Godeeye tei magoo ee hageesi molodoo dolone, doo-boo eligimo silesibiliso.

<sup>8</sup> Esino iba gooleedoo, edebeeyo tei magoo ee medee eligiga, tei magoo ee medee tekepo malaiso.

<sup>9</sup> Bei, tei magoo hagee odoo goo tekepo teli ee goolone hoguguloso ka tenele. Esino odoo tei magoo gababili mapoo, osoloso odoo tei magoo dadalai goweli mapoo, osoloso odoo Godee mapoo miligi pieli mapoo, osoloso odoo goo tokenee teli mapoo, osoloso tedele poogoloso wulo mi goo mapoo dodomo silesibili odoo mapoo, osoloso dibada owee wooloomali odoo mapoo, osoloso ama wooloomali odoo mapoo, osoloso odoo abo piligili odoo mapoo,

<sup>10</sup> osoloso gisoso sobo goo heli teli mapoo, osoloso gisoso emegei giso goo heli teli mapoo, osoloso soboso emegei sobo goo heli teli mapoo, osoloso odoo idoloso nei mauwe tou talame odoo abo mapoo neiso teli odoo mapoo, osoloso gamenee takeli odoo mapoo, osoloso goo midili mapoo tei yilone gamenee takeli odoo mapoo, osoloso Godeeye tei goodee eligi goo

sabolo tebile poogoloso goo abo teli odoo mapoo ka tenee.

<sup>11</sup> Eligi goo susuga egee to tekepo ma kulodu ka moloso. To tekepo ee Godeeye amapoo olo teneeso, ayo odoo mapoo takomo silame. To tekepo hagoso Godeeye toowa doloso badeli goo sabolo, osoloso yayo medee tekepo badeli goo ee yilige bigiliso.

*Godeeye sooloo deli goo maga  
Poloye goomoga to taka*

<sup>12</sup> Amapoo kitulugu teneli ibada Lodee Yesu Keliso mapoo, ayo goomoga to taka. Bei, yayo amapoo tei dolone, ayo o tou talame, yayo a hesiaso.

<sup>13</sup> Ayo daga tei telega badolone, Kelisowo hu maga to tokenee takeliso. Osoloso Yesu Keliso mapoo tei telaga odoo mapoo, ayo dala goo sabolo hegi goo sabolo teneliso. Esino Godeeye a sooloo dolone mo goo tokenee eyo nei tenele. Bei, biame omapoo a tei telega badolone, goo mawo tomo silee susuga ee, a medee kibiya gooleedele.

<sup>14</sup> Osoloso ibada Lodeeye a diya sooloo dolone medee pidiso. Goo egeesi maga ayo Yesu Keliso mapoo tei tolone, odoo abo sooloo deliso. Bei, ayo yibolo hedebe doloso ka badoga.

<sup>15</sup> Yesu Kelisoye goo tokenee teli odoo ibada gie badeli pidilame mipoo hamapoo simiso. Esiga to egee tei dolone, iyo duloso omapoo tei talai tekepo. Esino goo tokenee teli odoo susuga ee ma kulodu, hedebe ayo diya tokenee badebeiso.

<sup>16</sup> Esino ayo egeesee badoboome, Yesu Kelisoye sooloo dolone a see idooso, edebeeyo goo hagee ogoloso Yesuye goo tokenee teli odoo susuga mapoo saga kemenelega pegeli goo sabolo, osoloso mesie sabolo egee bado goo ee gooleedalame. Osoloso edebeeyo yimapoo tei toloso

badolone badoboso kookaiyo gie badeli ee talame.

<sup>17</sup> Godee yo wiligi odoo toboloso kookaiyo osee badoso. Yo koo teli, osoloso odoo susuga oso yo koo egeli. Osoloso Godee hedebe yayo badoso. Esiga tekepo, iyo o hu dokodoo poudoolone, yimapoo goomogolone badalai goo oso kookaiyo moloso osee malaiso. To hagee tei goo.

*Poloye Timoti mapoo tei too ma  
kulodu  
medee kibiya badalame kokodo taka*

<sup>18</sup> Mo holo Timoti, Godee maga to toloso kokodo takomo silesibili odoo oso daga namaga taka to ee medee goolee. Osoloso to diayo taka ee anosee goolee molone, ayo namapoo to hogugu hagee ka tonowa. Esiga nayo Godeeyo to eligimo silone, to egee medee kookodoloso kibiya badebee, ha teli odoo oso ha tolone medee kibiya tebeli egeesi masi, nayo Godeeyo tou kibiya talame.

<sup>19</sup> Osoloso nayo Yesu Keliso mapoo tei too goo ee medee kibiloso badolone, nee sooloo ma kulodu goo goolee tekepo egee molo ee tobuloso tolone badebee. Bei, odoo aboso dia sooloo ma kulodu goo goolee tekepo egee molo ee gooleedoloso medee koo dedeli. Goo egeesi maga, diayo Keliso mapoo tei too goo ee poogooso.

<sup>20</sup> Esiga odoo hagee bia dima kulodu Humenayos dio osoloso Alesanda dio oso doso. O bakadio ee ayo Saiteneeyo dee mapoo magooso. Bei, o bakadio oso Godeeyo goo dooboo eligimo silesibili goo omaga Godeeyo hu tokenee peli goo ee dieso hoodo ogoloso omapoo pagalame.

## 2

*Godee mapoo takeli goo ee eligi*

<sup>1</sup> Esiga goo toowa ayo kitulugu sabolo namapoo hagee takoo ee egeesi moloso. Tei telaga odoo iyo Godee mapoo goomoga to sabolo



yimapoo takolone, odoosusuga pidilame yimapoo takalai tekepo.

<sup>2</sup> Osoloso wiligi odoosabolo, osoloso gamalee odoosusuga ee Godeeye pidilame iyo yimapoo takalai tekepo. Bei, iyo hodobomesie goo ma kulodu dobolone, Godeeye goomoga goosabolo, osoloso odoosusuga mapoo gootekepo tolone dabalame.

<sup>3</sup> Bei, iyo odoosabo halo Godee mapoo takooga, iba gootekepo toso. Egeeseega ibada gie badeli pidili Godee yo goomogalaiso.

<sup>4</sup> Godee yo goomogoso, odoosusuga oso gie badeli pidili talame, osoloso Godeeyo goomaga teigoodee sabolo gooleedalame.

<sup>5</sup> Bei, Godee hedebe yayo ka badoso, osoloso Godee ogo odoosogodolosodomo badeli odoohedebe Yesu Kelisoye badoso.

<sup>6</sup> Biame Godeeye magoo mapoo Yesuye o su teli mapoo magooso, odoosusuga ee see eyoneiso idilame. Goo egeesi maga, iba ogoloso gooleedooso, Godeeye odoosusuga dia gie badeli pidilei, yo goomogoso.

<sup>7</sup> Esiga to ayo hagee takoo ee teigoo. Ayo gamenee koo takooso. Esiga ayo Godee mapoo takooso, ibada Lodee Yesu Kelisoye niba susuga sooloo dolone pidilame. Goo hagee teigoo.

<sup>8</sup> Esiga mi susuga mapoo teitelaga odoosohowogisilame mooloogoodolosodoga, mooloogoodoo ee ma kulodu gisoteedee debeli oso dibada dee dokodoo peligadoloso Godee mapoo takolone dabalai, a goomogo. Esino dima kulodu toso agadigilone kamana sabolo dabalai, a koo goomogo.

<sup>9</sup> Osoloso tei too sobo oso dugodiayo kalakalai ee medee ogoloso kalai, a goomogo. Esino edebeeyo

dimapoo balagalame, diba dugonei toowaso teli kalakalai sabolo, osoloso wudu tiegisilei, a koo goomogo. Osoloso yogold deli oso moodeli bisabolo gie masidaloso kalai, a koo goomogo.\*

<sup>10</sup> Esino Godee mapoo mesili sobo oso emegei pidilone, gootekepo tolone dabalai tekepo.

<sup>11</sup> Godeeyo to takeli odoosogodeeyo to takomologa, sobosomedee dulone dobolone googoolee toloso to omapoo mesimo silesibe.

<sup>12</sup> Egeesi ma kulodu sobosogisowiligi doloso dobolone Godeeyo to dimapoo eligilame, ayo koo takooso. Esino soboso to mauwe dobolone Godeeyo to onomedee dulei tekepo.

<sup>13</sup> Bei, Godeeye daga Adam moodooloso see hamamee Ipi moodooso.

<sup>14</sup> Egeesi ma kulodu Adameeye Saitenso gamenee taka mapoo teitele. Esino sobosogamenee taka goomappoo tei toloso Godeeye teimagoogee gababiaso.

<sup>15</sup> Esiga soboso holo sooloogolone dabalai tekepo. Egeeseelone diayotei too ma kulodu kibiloso, Godeeye goomegeli goo ee tolone sabolo, osoloso sukookoodolosodobolone, odoosusuga ee sooloo dolone doga, Godeeye dia gie badeli pidileiso.

### 3

#### *Sosee bali odoos*

<sup>1</sup> Esiga to ayo hagee takoo ee teidolone, iyo duloso omapoo teitalai tekepo. Edebeeyo sosee balai gooleega, yo tou tekepo talame goomogoso.

<sup>2</sup> Esiga odoosobosodiba maneyaga, sosee bali odoososo odoosusuga eyohowowoola tekepo badolone, sobohedebe huloso badalai tekepo. Osoloso yo googoolee tekepo ee

**2:6:** Loum 3:29-30; Gal 1:4    **2:7:** Diye 9:15; Gal 2:7-8; 2Tim 1:11    **2:9:** 1Pita 3:3-5    \* **2:9:** Poloye badebei biame omapoo, sobo aboso dugo nei toowaso teli kalakaloso, wudu tiegisaloso, bi abomedee tekepo dia su mapoo kalakaliso, gisoso ogoloso diba gilame, osoloso odoosohowowoola dieso mopoodoo doo ee eligilame. Esino teitelaga sobo oso howogisilame mooloogoodolosodobolone gooegeesi moodoolai, Polo yo goomegele.    **2:10:** 1Tim 5:10    **2:12:** 1Kol 14:34    **2:13:** Gen 2:7, 21-22; 1Kol 11:8-9    **2:14:** 2Kol 11:3; Gal 3:1-6    **3:1:** Diye 20:28    **3:2:** Tait 1:6-9

dodolone badebee. Osoloso yo eyo nediliyo o su medee kookoodoloso badebee. Osoloso yo mesiloso badebee. Osoloso odoo soo simi mapoo emegei dolone badebee. Osoloso to tekepo medee eligili odoo doloso badebee.

<sup>3</sup> Osoloso yo yugune naloso boobadolone na badebee. Osoloso saga kamana buguloso emegei woolone na badebee, esino mesiloso badebee. Osoloso toso agadigilone na badebee. Osoloso yo molee haga na gie.

<sup>4</sup> Osoloso yo osobo sabolo osoloso owolo dio medee bolone badebee. Osoloso owolo dio oso o to duloso mesilone dabalame dimapoo eligi.

<sup>5</sup> Esino yayo osobo sabolo osoloso owolo dio sabolo medee balai tebile daga, yayo tei telaga odoo kasee balaisomo? Yayo diba medee balai tebileime.

<sup>6</sup> Osoloso odoo epedee gie tei too oso sosee balame hudi magalai tekeponee. Bei, yayo eyo nediliyo si hoowa goo omaga homodobuloso nei Godeeye yimapoo dala te neeyaga. Bei, goo hedebe egeesi masi, Saiten yo daga eyo nediliyo si hoowa goo omaga homodobuloso nei dala tooso.

<sup>7</sup> Esiga peegoo debeli odoo oso sosee bali odoo hageeyo goo ee ogoloso tekepo dalai soowa. Egeeseega odoo susuga oso yimaga to tokenee hee takalaima. Osoloso Saitenso yo goo tokenee talame gido duga, yo o ti gama mapoo gadileime.

### *Dikon odoo*

<sup>8</sup> Dikon odoo diba nosee medee todolone debee. Osoloso diba biame susuga ma kulodu medee tei goo takolone i bakadio dolone na debee. Osoloso diba yugune naloso boobadolone na debee. Osoloso molee talame gamenee takolone na debee.

<sup>9</sup> Osoloso Godeeyo howo woola tokenee mauwe egee do goo ee gooleedoloso dobolone, Godeeye

eligi goo mapoo tei too goo ee medee kookoode.

<sup>10</sup> Esiga odoo agayo dikon tebisilei daga, tei telaga odoo oso daga odoo egee bia dia goo ee medee egege. Egeesi ma kulodu dibada goo susuga tekepo daga, odoo egee bia oso dikon odoo ka tebiseye dee.

<sup>11</sup> Esiga dikon sobo\* hesieli goo onosee egeesi moloso. Diba nosee medee todolone debee. Osoloso emegei dia goo na takee. Osoloso dibada su dieso nediliyo medee kookoode. Osoloso diayo tou too ma kulodu medee goosa tolone ka debee.

<sup>12</sup> Egeesi ma kulodu dikon odoo oso sobo hedebe huloso badebee. Osoloso diayo dibada holo sabolo, osoloso dia moso kulodu debeli odoo ee medee balai tekepo.

<sup>13</sup> Esiga dikon odoo oso tou medee toga, tei telaga odoo oso ogoloso odoo egee bia tekepo dalaiso. Egeesee taka duloso dikon odoo oso Yesu Keliso mapoo tei too goo ee odoo mapoo takalai ebilega kibiya dabalaiso.

### *Iyo Godee gooleedalai goo eyo bei*

<sup>14</sup> A goomogoso, nayo egee bado mapoo saga sibilame. Esino ayo wulo to hogugu hagee namapoo ka tonowa.

<sup>15</sup> Bei, ayo saga sibilega poogooga, to hogugu hagoso Godeeyo soosoo oso goo talai ee namapoo eligileiso. Bei, Godeeyo soosoo hagee bia ee gie badeli Godeeyo sosee oso. Esiga Godee o sosee hagee omou masi oso Godeeyo goo maga tei goodee ee pupodou ka moloso.

<sup>16</sup> O. Tei takoo. Tei goodee Godeeye yilige bugu oso diya toowa ka moloso. Goo ee, Kelisoye tei odoo poloso sileeme, odoo aboso yo egeiso. Osoloso Dio Tei oso yo odoo tekepo doloso woola eligiso. Osoloso Godeeyo momaiye oso yo egeiso.

**3:7:** 2Kol 8:21    **3:11:** Tait 2:3    \* **3:11:** *dikon sobo* - goo hagee dikon odoowo osobo, o, dikon sobo ee takoo malaiso.    **3:16:** Yon 1:14; Kol 1:23; Maka 16:19

Osoloso o odoo oso mi opusomo opusomo di mapoo debeli odoo mapoo o goo takomo silesibume,  
odoo bei oso yimapoo tei tooso.  
Osoloso Godeeye yo Kei mi mapoo ido palaso.

#### 4

##### *Gamenee eligili odoo oso eligi goo mapoo na deedee*

<sup>1</sup> Dio Tei oso woola egeesee takooso, “Biame hoo poogoo hamapoo odoo aboso tei too goo ee pagalaiso. Osoloso gamenee takeli dio sabolo, osoloso bo holo oso eligi goo ee, gamenee eligili odoo oso eligiga, odoo aboso goo omapoo dadalaiso,” diso.

<sup>2</sup> Esino goo hageesi eligimo silesibili odoo ee wulo gamenee takeli odoo oso. Osoloso diba dieso nediliyo si howoolone silesibilei ono goolone, goo tekepo sabolo, osoloso goo tokenee ee ogoloso dia sooloo ma kuloduga gooleedalai koo tebili. Bei, dia goo goolee ee tokenee paga, tekepo sabolo tokenee sabolo diayo gooleedalai tebile.

<sup>3</sup> Osoloso diayo sobo hulei goo sabolo, osoloso nei abo nalai sabolo tei deliso. Esino Godeeye iyo nalame nei susuga moodooso. Esiga tei too odoo oso nei ee nalame, daga Godee mapoo goomoga to takalai tekepo.

<sup>4</sup> Bei, bi susuga Godeeye moodoo ee medee tekepo. Egeesi ma kulodu iyo nei abo ee tokenee dee takalai tekeponee. Esino iyo Godee mapoo goomoga sabolo nei egee nalai tekepo.

<sup>5</sup> Bei, Godeeyo to sabolo, osoloso Godee mapoo taka goo oso nei hagee tekepo deliso.

##### *Kelisowo tou teli odoo tekepo doloso badalai goo*

<sup>6</sup> Nayo to hagee tei telaga odoo mapoo medee eligilone badoga, no Yesu Kelisowo tou teli odoo tekepo

dalaiso. Osoloso nayo nei naga kitulugu egee to egeesi masi, nayo to tekepo mapoo tei teli goo sabolo, osoloso goo tekepo eligi mapoo nayo dodolone badoga, goo oso namapoo kitulugu tenelaiso.

<sup>7</sup> Egeesi ma kulodu, no gesaboo oposusu duga, goo omapoo na deedee. Bei, oposusu egee tei goonee, osoloso ogoso odoo koo pidili. Esino no Godeeye goomoga goo ee talai goo ono nee suso edidilone badebee.

<sup>8</sup> Bei, nee su oso kitulugu sabolo badalame edidili goo ee goo haga toowanee. Esino nayo Godeeye goomoga goo ee tolone badalai goo ono diya toowa ka moloso. Bei, goo hagoso epedee iyo mipoo hamapoo hagee do eyo gie badeli sabolo, osoloso badoboso kookaiyo gie badeli see hamamee talai goo ee pidileiso.

<sup>9</sup> To hagee tei goo taka. Esiga odoo susuga oso to hagee duloso tei talai tekepo.

<sup>10</sup> Osoloso goo egeesi maga tei telaga odoo iyo to tekepo ee odoo mapoo eligimo silesibilone, tou toowa ka toso, odoo susuga oso to hagee duloso dadalame. Bei, iba gooleedooso, Godee yo gie badeli. Osoloso iba gooleedooso, yayo odoo susuga eyo gie badeli pidilame goomogoso. Osoloso to tekepo mapoo tei toloso dedeli odoo mapoo, yayo dibada gie badeli pidili odoo doloso badoso.

<sup>11</sup> Esiga to susuga ayo hagee hogugu ee tei telaga odoo oso mesilame, nayo dimapoo eligilone to kitulugu sabolo takee.

<sup>12</sup> Esiga nayo epedee hamapoo holaiso gie kauwa doloso egee bado goo omaga, odoo heeso no pepooko dee na seeye dee. Esino odoo susuga oso nee goo ogoloso dadalame, goo tekepo tolone badebee, nayo to keli maga, osoloso nayo badeli goo maga, osoloso nayo emegei sooloo deli goo maga, osoloso nayo tei too goo maga,

osoloso nayo todolone badeli goo maga.

<sup>13</sup> Osoloso no ayo sibilei ee bolone, Godeeyo to odoosusuga mapoo hesigaloso diba eligilone, kokodo takolone ka badebee.

<sup>14</sup> No goolee, daga sosee wiligi odoos tebisa oso nee wiligi mapoo tolosogodee mapoo takolone, Godeeye namaga yilige bugu goo ee takaso. Esem Dio Tei oso namapoo tou hee talame kitulugu teneeso. Esiga nayo kitulugu sabolo tou egee tolone ka badebee.

<sup>15</sup> No ayo taka goo susugahagee medee dodolone, kitulugu sabolo tolone ka badebee, odoosusuga oso nayo goo gooleeso kauwa ee agalame.

<sup>16</sup> No badalai gosabolo, osoloso goonayo eligilei ee medee ogoloso, goo tekepo osee tomo sile. Nayo egeeseega Godeeye nee gie badeli sabolo, osoloso odoos nayo eligime du, egee bia dia gie badeli sabolo pidileiso.

## 5

### *Tei telaga odoos mapoo mesie sabolo takee*

<sup>1</sup> Giso daga kauwa oso tei tolosobadolone, goo tokenee tomolo ogoga, nayo yimapoo toso kitulugu sabolo na takee. Esino nayo nama mapoo to medee mesie sabolo takeli egeesi masi, nayo yimapoo medee mesie sabolo kokodo takee. Osoloso nayo nomolodee mapoo to medee mesie sabolo takeli egeesi masi, nayo giso holaiso gie kakauwa mapoo medee mesie sabolo kokodo takee.

<sup>2</sup> Osoloso nayo noowee mapoo to medee mesie sabolo takeli egeesi masi, nayo sobo daga kakauwa mapoo medee mesie sabolo kokodo takee. Osoloso nayo nomolodee mapoo to medee mesie sabolo takeli egeesi masi, nayo sobo obuo mapoo medee mesie sabolo, osoloso medee goo goolee tekepo goolone ka kokodo takee.

### *Sobo bauwe medee pidi*

<sup>3</sup> Sobo bau holo mauwe ee pidili odoos me daga, tei telaga odoos oso goo ee ogoloso diba pidilei tekepo.

<sup>4</sup> Esino sobo bau yo owolosabolo, osoloso o eiye dio daga, diayo tei tolosogee du goo ee dodolone, yo pidilei tekepo. Diayo egeeseelone daga, goo oso diba pepusodoboome, owee dio osoloso dibada eiye dio diba pidilone debei, eyo nei pidilone ka seeso. Bei, diayo goo egeesi moodoolai, Godee yo goomogoso.

<sup>5</sup> Egeesi ma kulodu sobo bau yo pidilei odoos me poogoloso badolone, a Godeeye pidileiso doloso, gesi sabolo biame sabolo Godee mapoo takolone badeliso.

<sup>6</sup> Esino sobo bau oso eyo goomoga goosono dodomo siloga, yo Godee magadomo puloso ka badoso.

<sup>7</sup> Esiga tei telaga odoos sobo bauwe holo mauwe medee pidilame, nayo dimapoo takee. Diayo egeeseega, odoosusuga oso diba ogoloso dia tou maga to tokenee hee takalaime.

<sup>8</sup> Esino edebeeyo takolone, yo tei too ma kulodu Keliso dedeli odoos doloso, see o soosoo sabolo osoloso o moso kulodu debeli odoos sabolo medee pidilega badoga, yo tei too ma kulodu koo badoso. Osoloso o goo tokenee oso tei tele poogoo odoos eyo goo tokenee ee dagadiso.

<sup>9</sup> Esiga sosee ma kulodu tei telaga odoos sobo bauwe medee pidilame, edebeeyo dia hu toga, wulo sobo bauwe dugo 60 dagadileso, giso hedebe obuloso badebei egee do eyo hu ono ka teye dee.

<sup>10</sup> Osoloso diba edebeeyo goo tekepo tomo silesibili sobo deli. Osoloso dibada owolo dio medee tekepo bali sobo. Osoloso diba odoosoo pidili sobo. Osoloso diba tei telaga odoos abo mapoo mesilone tou teli sobo. Osoloso diba dala ma kulodu debeli odoos ee pidili sobo. Osoloso diba goo tekepo susuga tomo silesibili sobo. Esiga sobo bauwe egeesi masi eyo hu ono talai tekepo.



11-12 Esino edebeeyo sobo bauwe dia hu toga, sobo gie kakauwa oso bau moodoo egee do dia hu na teye dee. Bei, diayo bau dobolone soseeso diba pidilame, to magolone, iba Kelisowo tou teli sobo dolone, see giso obileime deliso. Esino see hamamee giso obilei diya goomogoga, diba see Keliso mapoo miligi pialoso giso obiliso. Diayo egeesee moodeli goo maga, dieso to edidi magoo ee gababuoga, diba goo tokenee teliso.

13 Osoloso goo hee egeesi moloso. Nayo sobo gie kakauwa oso bau moodoo ee soseeso pidilame hu toga, diayo tou talai wabodolone, wulo goo mauwe mosopoo silesibulone, emegei dia goo takolone dabalaiso.

14 Esiga sobo gie kakauwa oso bau moodooga egee do oso see giso obuloso, holo sooloogaloso dia soosoo medee balai, a goomogo. Diayo egeeseega iba goweli odoosoo dia goo maga to tokenee takalai tebileime.

15 Esino sobo gie kakauwa oso bau moodooga egee do abo oso Keliso mapoo miligi pialoso Saiteneeyo to duloso ee dodolone ka doso.

16 Egeesi ma kulodu tei too sobo oso o soosoo ma kulodu sobo bauwe dogo, yayo egee bia medee bamelee, tei telaga odoosoo sosee ma kulodu debeli oso diba diya musumiyaga. Egeeseega sosee ma kulodu tei telaga odoosoo egee do oso sobo bauwe pidili odoosoo mauwe egee do ono pidilei eli tekepo agalaiso.

### *Sosee bali odoosoo medee pidilei goo*

17-18 Esiga Godeeyo to booka mapoo hogugu oso egeesee takooso, "Bulumakau be yo tou tomo siloga, yo nei nalame o maga tiso na tialeegee." Osoloso Godeeyo to booka mapoo hogugu oso see egeesee takooso, "Tou teli odoosoo o tou too eyo nei talai tekepo." Esiga sosee bali odoosoo odoosoo mapoo Godeeyo to eligilone dobolone tou toowa teliso. Esiga tei telaga odoosoo

sosee ma kulodu debeli oso bali odoosoo dia to mapoo duloso mesiloso diba medee bamelee. Egeeseelone diayo dia tou medee goosa tolone, Godeeyo to kitulugu sabolo eligiga, dia too eyo nei tenee. 19 Esiga odoosoo heeso sibilesosoo namapoo takolone, "A sosee bali odoosoo oso goo tokenee tomo silee egeeso," dee takooga, nayo o to mapoo duloso saga tei na te. Esino odoosoo bakadio, o, bakadio hedebe di oso sibilesosoo namapoo takooga, dia to mapoo tei ka te.

20 Egeesi ma kulodu sosee bali odoosoo oso goo tokenee tomo silee ee nayo tei ogoga, nayo tei telaga odoosoo susuga eyo howo woola yimapoo diya takee. Nayo egeeseega, sosee wiligi odoosoo tebisa abo oso goo hagee ogoloso goo tokenee talai ebileiso.

21 Godee sabolo, Yesu Keliso sabolo, osoloso diayo hesia momaiye dia howo woola kitulugu sabolo ayo ka taka, nayo mo to duloso omapoo dadalame. Egeeseelone hedebe hediliwe pidilone na badebee.

22 Osoloso nayo sosee bali odoosoo hudi magolone, yayo badebei goo ee medee egegelega, nee deeso o wiligi mapoo tolosoo Godee mapoo na takee. Esino nayo egeesee moodooga, o goo tokenee maga nobolo hodobo hegi talaiso. Esino no goo tokenee teyaga, nee su no medee teedee.

23 Timoti, no howodee namologa, no nee gemedei dalaiso. Esino biame abo mapoo wain i pepooko ne. Egeeseega nee gemedei ma kulodu dala meli ee mauwe pagalaiso.

24 Sosee balai hudi magalame mooloogoodoo ee ma kulodu, odoosoo aboso odoosoo howo woola goo tokenee teliso. Esiga dia goo midilega ogoloso gooleedeliso. Esino odoosoo abo dia goo tokenee mada meli ee hamamee see weliga yilige bigileiso.

25 Egeesi maga goo tekepo odoosoo aboso teli ee woola moloso. Esino goo tekepo odoosoo aboso teli ee saga yilige bigileime. Esino goo ee

hamamee see woola yilige buguga agalaiso.

## 6

*Nei mauwe tou teli odoo sabolo osoloso dia wiligi odoo tebisa sabolo*

<sup>1</sup> Tei telaga nei mauwe tou teli odoo diayo dibada wiligi odoo tebisa dia to mapoo mesilone dabalai tekepo, edebeeyo goo ee ogoloso iyo eligi goo maga osoloso Godeeyo goo maga to tokenee takelega pagalame.

<sup>2</sup> Nei mauwe tou teli odoo dia wiligi odoo tebisa abo ee tei telaga odoo oso. Esino diayo dia wiligi odoo tebisa dia to mapoo mesilega pagalai tekeponee. Esino diayo goomoga sabolo dia wiligi odoo tebisa dia to mapoo medee mesiloso silesibilei tekepo. Bei, dia wiligi odoo tebisa onosee tei telaga odoo oso. Osoloso nei mauwe tou teli odoo oso dia wiligi odoo tebisa ee sooloo dolone debeliso.

*Molee diya gweli goo ee goo tokenee*

Esiga Timoti, ayo taka goo ee, nayo odoo mapoo eligilone kokodo takolone badebee.

<sup>3</sup> Osoloso edebeeyo eligi goo hee tolosa odoo mapoo eligimo siloga, yo ibada Lodee Yesu Kelisoye Godeeyo goo maga tei goodee eligi goo sabolo koo tobuoso.

<sup>4</sup> Odoo hageesi masi yo goo goolee tekepo gweli yimapoo mauwe. Esino wulo eyo nediliyo yo tekepo dolone si howeli odoo oso. Osoloso odoo hageesi oso eligi opusomo opusomo di maga toso agadilei, yo diya goomegeliso. Osoloso toso agadili hagoso goo hageesi tosibiliso. Goo ee, emegei kweli goo sabolo, osoloso biligeli goo sabolo, osoloso emegei dia goo maga to tokenee takeli goo sabolo, osoloso emegei dia goo maga tokenee gweli goo sabolo,

<sup>5</sup> osoloso odoo abo domo pili goo sabolo tosibiliso. Osoloso o goo goolee ee olo tokenee pa. Esiga

yimapoo tei goo mauwe moloso. Osoloso yayo goolee, Godeeye goomoga goo ee dodomo sili goo oso yo bi bei doloso badalai, dee gweliso.

<sup>6</sup> Esino odoo agayo Godeeye goomoga goo ee dodolone, bi yimapoo egee molo maga goomoga sabolo badoga, yo mipoo hamapoo badolone, yo bi bei doloso badeli masi badalaiso.

<sup>7</sup> Bei, mipoo hamapoo ibada owee diayo iba bi sabolo sooloo magele. Esiga iba wedioga, ibada bi sabolo dileime.

<sup>8</sup> Esiga nei sabolo, osoloso kali bi sabolo imapoo egee molo ee olo ibolo teiba dalai tekepo.

<sup>9</sup> Esino bi bei doloso badalame gweli odoo ee goo tokenee mapoo saga gido duga, yo goo tokenee teliso. Odoo hageesi masi diba ti gama ma kulodu beso gadili egeesi masi doso. Bei, diayo bi bei doloso dabalame goolee oso goo tokenee susuga talame, diba gido duga tokenee palaiso.

<sup>10</sup> Bei, edebeeyo molee diya goomogoga, yayo molee talame, goo tokenee bei opusomo opusomo di teliso. Esiga odoo aboso molee diya goomoga goo maga dia tei too goo ee poogoloso peegoo diyadeeso. Dieso egeesee goolee oso dimapoo goohele goo tosibiliso.

*Timoti, no goo tokenee susuga maga peegoo di*

<sup>11</sup> Esino Timoti, no Godeeyo odoo. Esiga no goo tokenee susuga ogamaga peegoo di. Osoloso no Godeeyo howo woola tekepo badolone, yayo goomoga goo ee tolone badebee. Osoloso tei too ma kulodu osee badolone, emegei diya sooloo dolone ka badebee. Osoloso dala goo susuga ee ma kulodu medee kibiya badebee. Osoloso mesie sabolo badebee.

<sup>12</sup> Badoboso kookaiyo gie badeli nayo ee talame, no tei too ma kulodu

medee diya kitulugi. Bei, nayo odoo susuga eyo howo woola badolone, nayo Godee mapoo tei toloso egee bado goo ee takeme, Godeeye gie badeli egee namapoo tenelame no ka idoo.

<sup>13</sup> No goolee, Godeeye bi susuga mapoo gie badeli teneliso. Osoloso Yesu Kelisoye o goo maga Pontiyus-Paillet eyo howo woola tei goo takaso. Esiga Godeeyo howo woola, osoloso Yesuwo howo woola ayo toso kitulugu sabolo namapoo taka,

<sup>14</sup> nayo ibada Lodee Yesu Kelisoye sibilei biame ee bamo dulone, goo tokenee mauwe badolone, ayo namapoo kokodo taka to ee dodolone badebee.

<sup>15</sup> Esiga Yesu yo biame Godeeye magoo omapoo sibileiso. Osoloso Godee yo wiligi odoo susuga eyo wiligi odoo. Osoloso yo gidebeli odoo susuga dia tei gibadeli odoo oso. Esiga hedebe yimapoo goomogolone badalai tekepo.

<sup>16</sup> Godee hedebe yayo kookaiyo gie ka badoso. Osoloso yayo egee bado koola mapoo dilei iyo koo tebili. Bei, yo diya gadeebugu ma kulodu badeliga. Esiga odoo heeso yo egele. Tei takoo, odoo heeso yo agalai koo tebili. Yimapoo kookaiyo moloso osee meli kitulugu ee moloso. Esiga iyo biame susuga hedebe o hu dokodoo poudoolone badalai tekepo. To hagee tei goo.

*Bi bei odoo oso o odoo pidi*

<sup>17</sup> Nayo bi bei odoo mapoo to hagee kitulugu sabolo takee, diayo dieso nediliyo si howoolone, dia molee oso dia gie badeli tekepo dabalaiso doloso gooleeyaga. Bei, molee saga hosudalai malaiso. Esino diba hedebe Godee mapoo tei tolone badalai tekepo. Bei, Godee hedebe yayo iba pidiliso. Osoloso hedebe yayo iba goomogalame goo tekepo ee imapoo tenelone badoso.

<sup>18</sup> Osoloso see diayo odoo susuga mapoo goo tekepo tolone dobolone,

diba pidilone dabalame dimapoo to kitulugu sabolo takee. Egeeseelone diayo dia molee oso odoo bi tebile poogoo ee pidilone dabalame.

<sup>19</sup> Diayo goo egeesi tolone dogo, goo oso hamamee diba pidilei bi ee Kei mi mapoo mooloogoo magoo molo agalaiso. Osoloso diayo bado-boso kookaiyo gie badeli talaiso.

<sup>20</sup> Timoti emegei, Godeeye tou namapoo tenee ee medee be. Osoloso goo Godeeye goweli ee duloso omapoo hamamee na deedee. Osoloso to tekepo mapoo goweli odoo dia to mapoo na mesie. Bei, diayo dieso diba goo gooleedoo odoo deliso, esino diba goo dooboo eligimo silesiboso.

<sup>21</sup> Esiga odoo aboso goo hageesi goolee sabolo dobolone, tei too ma kuloduga peegoo diyadeeso.

Ayo Godee mapoo taka, yayo niba sooloo dolone pidilame.

## 2 Timoti Poloye Timoti mapoo to hee hoguguloso tenee

### *2 Timoti booka goo eyo bei*

To hogugu hagee Poloye neliga moso tegei ma kulodu badolone, Timoti mapoo see hoguguloso teneeso. Bei, edebeeyo yo wooloomalai biame olo koola toobooso doloso gooleeso. Esiga Timotiye tei too ma kulodu kibiloso badalame, Poloye kokodo taka to hagee hoguguloso yimapoo teneeso. Bei, Timotiye Polowo goo tekepo ee padalai, yo goomogaso.

<sup>1</sup> A Polo, Yesu Kelisoye diye di odoo. Osoloso Godeeye goomoga maga a hesialoso diye di tou ee amapoo teneeso, ayo o to odoo mapoo eligimo siloga, edebeeyo to ee duloso tei talame. Osoloso Yesu Keliso mapoo tei too goo maga di-ayo badoboso kookaiyo gie badeli talame.

<sup>2</sup> To hogugu hagee mawo diya gooma holo Timoti namapoo ka tonowa.

Ayo Godee mapoo taka, Ma Godeeye, osoloso ibada Lodee Yesu Kelisoye, no sooloo dolone pidilame, osoloso mesie goo namapoo tenelame.

### *Poloye Timoti mapoo kokodo taka*

<sup>3</sup> Timoti, ayo no goolone Godee mapoo goomoga to takeliso. Osoloso biame susuga sabolo, osoloso gesi susuga ayo no halo Godee mapoo takeliso. Osoloso mo awe diayo Godee mapoo tei toloso sibadee egeesi masi anosee Godee hedebe omapoo tei tooso. Egeeseelone Godeeyo howo woola tokenee mauwe egee bado goo ee a gooleedoloso, ayo o tou ka tomoloso.

<sup>4</sup> Osoloso iyo hodobo dooboso ayo no poogoo dime, nayo a goolone pisa ee ayo koo boobado buguso. Esiga

amapoo goomoga toowa malame, no ayo see agalai, a diya goomogo.

<sup>5</sup> Nayo Yesu Keliso mapoo tei toloso kibiya egee bado, a gooleedoo. Esiga nayo tei too goo egeesi masi ee daga nee eiye Lois mapoo meleeso. Osoloso see noowee Yunike mapoo meleeso. Esiga a tei toso, tei too goo egeesi oso epedee hamapoo namapoo moloso.

<sup>6</sup> Goo egeesi maga ayo namapoo ka taka. Bei, ayo daga nee wiligi mapoo deeso toloso Godee mapoo takeme, Dio Tei oso namapoo tou talame kitulugu teneeso. Esiga tou egee pailame dou masi tooee.

<sup>7</sup> Bei, Godeeye imapoo Dio Tei tenee egee iba ebilame ka tenele. Esino yayo imapoo Dio Tei tenee oso imapoo kitulugu sabolo, sooloo deli goo sabolo, osoloso goo tokenee teyaga ibada su kookodeli goo ee tenee.

<sup>8</sup> Esiga ibada Lodee Yesu Kelisowo goo ee, nayo odoo mapoo takalai na simiye. Osoloso Kelisowo goo takomo silee maga, ayo neliga moso ma kulodu hagee bado goo omaga no na simiye. Esino nayo mo tou su tolone, Godeeye namapoo tou tenee ee dala ma kuloduga kitulugu sabolo osee tomo di. Bei, Godeeye namapoo kitulugu ka tenemologa.

<sup>9</sup> Godeeye ibada gie badeli pidiso, osoloso yayo iba o odoo doloso gilimadooso. Iyo goo tekepo tolone doboome ka sele. Haye, Godeeye bi susuga moodelega badolone, eyo goomoga goo ee dodolone iba ka gilimadoo. Osoloso Yesu Kelisoye iba halo goo moodolai goo maga, Godeeye iba sooloo dolone pidilame goomoga magooso.

<sup>10</sup> Osoloso ibada gie badeli pidili Yesu Kelisoye egee sibo goo oso Godeeye sooloo dolone pidili goo ee see woola yilige buguso. Osoloso teli oso kitulugu ee me pagalame, yayo olo dabaso. Osoloso badoboso kookaiyo gie badeli goo ee to tekepo

1:2: Diye 16:1; 1Tim 1:2

1:3: Diye 23:1

1:5: Diye 16:1

1:6: 1Tim 4:14

1:7: Loum 8:15

1:9: Epe 2:8-9; Tait 3:5

1:10: Hib 2:14



maga, yayo woola yilige buguso.

<sup>11</sup> Godeeye a hudi magooso, ayo diye di tou talame, osoloso ayo odo mapoo to tekepo hagee takalame, osoloso Kelisowo goo ee o odo mapoo eligilame.

<sup>12</sup> Esiga ayo tou hagee tolone, dala goo ma kuloduga similega badolone tou ka tomoloso. Bei, ayo tei toloso hagee dodomo du odo ee, a gooleedooso. Odo ee Yesu. Esiga a gooleedooso, to tekepo yayo amapoo taka ee, eyo medee osee bamo dimeleso, yo see wedi sibileiso.

<sup>13</sup> Esiga tei goo ayo namapoo eligime nayo du ee odo mapoo eligi. Osoloso no Yesu Keliso sabolo hedebe doloso badeliga, tei too ma kulodu osee badebee, osoloso emegei sooloo dolone ka badebee.

<sup>14</sup> Osoloso ima kulodu badeli Dio Tei oso pidili maga, Godeeye namapoo Yesuwo goo maga to tekepo tenee ee medee be, edebeeyo to egee see opusomo diyaga.

<sup>15</sup> Osoloso no see gooleedooso, tei telaga odo Asiya mi mapoo debeli susuga oso a poogoloso diyadeeme, Pigelos dio osoloso Helemogenes dio onosee a poogoloso diyadeeso.

<sup>16-17</sup> Osoloso Onesipoloseeye Loum mi mapoo sibileso a agalame diya esiamo sileeso. Osoloso a neliga moso ma kulodu ki tiso tialogoloso badebei ogoloso, yayo similega a pidimeleso. Esiga ayo Godee mapoo ka taka, Lodeeye Onesipolos sabolo osoloso o moso kulodu debeli odo ee sooloo dalame.

<sup>18</sup> Osoloso Godeeye goo midilei biame mapoo o goo medee sooloo dala sabolo midilame. Esiga ayo Epeses mi mapoo badoboome, yayo a medee pidimelee goo ee Timoti, no olo gooleedooso.

## 2

*Keliso halo ha teli odo masi kitulugu sabolo badebee*

<sup>1</sup> Mo holo emegei, Yesu Kelisoye sooloo dolone pidili goo oso namapoo kitulugu teneeye dee.

<sup>2</sup> Osoloso ayo odo howo woola namapoo eligi goo ee, odo no medee tei deli mapoo nayo eligi, diayo see odo abo mapoo eligilame.

<sup>3</sup> Esiga Yesu Keliso halo ha teli odo tekepo masi dala ma kulodu tou tomo silei na gowee.

<sup>4</sup> Bei, no ege, ha teli odo tekepo oso o wiligi odo ee goomogalame, hedebe yayo o to mapoo mesimo siliso. Egeeseelone yayo tou hee peegoo koo teli.

<sup>5</sup> Osoloso no ege, hoguli odo oso hogua ma kulodu, odo abo dagadilame, yayo tei magoo susuga medee dedelega poogooga, yo hogua eyo nei talaime.

<sup>6</sup> Osoloso no see ege, nei howo segeli odo tou toowa too oso, o nei howo segei oso bi moodoogaloso melee ogoloso daga malalo eyo talai tekepo.

<sup>7</sup> Esiga to ayo hagee hogugu ee nayo medee gooleede. Bei, to ayo hogugu hageeyo bei ee nayo medee gooleedalame, Lodeeye namapoo goo goolee tekepo tenelaiso.

<sup>8</sup> Deibidiyo amawe Yesu Keliso ta maga hogadi goo ee, nayo osee goolomo sile. To tekepo hagee ayo takomo siloso.

<sup>9</sup> Esiga ayo to tekepo hagee takomo sileeme, odo aboso a mesiya masi toloso ki tiso tialogoloso neliga moso ma kulodu husooso. Esino Godeeyo to tekepo hagee tiso tialogoloso koo moloso.

<sup>10</sup> Goo egeesi maga ayo Godeeye hesia odo ee halo dala ma kulodu tou osee ka tomoloso, diayo Yesu Keliso mapoo tei toloso dia gie badeli pidilame, osoloso yibolo kookaiyo badoboso medee tekepo badalame.

<sup>11</sup> Esiga tei goodee ee hagoso. Iba Keliso sabolo taga, iba see yibolo hodobo gie dabalaiso.

12 Osoloso iyo dala ma kulodu medee kibiya dogo,  
goo ogoso iba wiligi odoo doloso hamamee yibolo hodobo mipoo hagee gidabalaiso.

Osoloso odoo howo woola iyo o goo gadadiga,  
nei odoo howo woola yinosee ibada goo gadadileiso.

13 Esino iyo tei too ma kulodu badolone yo boobado buguga,  
nei yayo iba boobado bigileime. Bei, yo eyo to edidi magoo ee gababuloso see opusomo dalai koo tebili.

*Yesuwo tou teli odoo tekepo*

14 Esiga to ayo namapoo hoguguloso hagee tenee ee nayo tei telaga odoo mapoo medee eligimelee. Osoloso diayo goo pepooko maga toso egee agadigamolo, Godeeyo howo woola dimapoo takee. Bei, goo egeesi oso odoo hee koo pidili. Esino to ee dulone egee do ono wulo tokeene peliso.

15 Timoti, tou nayo too ee Godeeye ogoloso goomogalame, osoloso nee tou too oso namapoo simili goo tenelega pagalame, nee tou medee kitulugu sabolo te. Osoloso nayo Godeeyo to odoo mapoo eligilone, dooboo dagadilega medee tei goo ono ka eligimelee.

16 Esino goo Godeeye goweli sabolo, osoloso goo mauwe opusumo silesibili odoo omaga, no peegoo di. Bei, goo egeesi oso odoo Godee maga peegoo gilimado diliso.

17 Egeesi oposusu goo oso agagisa masi toowa poloso odoo su naliso. Humenayos dio Piletus dio oso goo egeesi oposusumo silesibiliso.

18 Odoo hagee biaso tei eligi goo maga peegoo diyadeeso. Osoloso diayo takolone, odoo wedia maga see hogogabili goo ee olo peledabaso, doloso takomo silesibume, odoo aboso goo ee duloso dibada tei too olo tokenee paso.

19 Esino Godee mapoo tei telaga odoo ee kibiya osee doso. Diba omou mi neligi doloso segei egeesi masi moloso. Omou omapoo Godeeye to hogugu hagoso ka moloso, "Godeeye o odoo dee ee gooleedeliso," diso. Osoloso to hee hogugu ee egeesi moloso, "Edebeeyo takolone, 'A Godee dedeliso,' dee takooga, yo goo tokenee maga peegoo di," diso.

20 Esiga bi bei odoowo moso kulodu peleta opusomo opusomo di moloso. Peleta abo yo gold deli oso moodoo. Osoloso abo yo siliba deli oso moodoo. Wo toowa nali biame mapoo peleta omapoo wo magoloso naliso. Osoloso peleta abo ee bogoso moodoo. Osoloso abo homosoo moodoo. Biame susuga peleta omapoo wo magoloso naliso.

21 Esiga to hageeyo bei ee egeesi moloso: tei telaga odoo dia goo tokenee susuga ayo hogugu mapoo miligi pialoso dogo, Godeeye diba toloso goo toowa mapoo maligileiso. Bei, Godeeye odoo egeesi masi ee o dalame peegoo pi magalaiso. Esiga yayo o wiligi odoo eyo tou ee medee tekepo talame mopoodoo doloso badalaiso.

22 Esiga holaiso gie kakauwa oso goo tokenee talai diya goomegeli goo maga no peegoo dilesi badebee. Osoloso Godeeyo howo woola tekepo badolone, tei too goo sabolo, osoloso emegei sooloo deli goo sabolo, osoloso odoo abo sabolo mesie badalame kitulugi. Egeesi ma kulodu Godeeyo howo woola goo tokenee mauwe dobolone, Godeeyo hu dokodoo poudili odoo diba nose egeesee dabalai tekepo.

23 Osoloso goo bei mauwe sabolo, osoloso to dooboo takeli goo maga toso agadigeli odoo omaga, no peegoo dooboobigi. Bei, no gooleedooso, goo egeesi oso biligeli goo ee tosibiliso.

24 Esiga Lodeeyo tou teli odoo oso toso agadigilone na badebee.

Esino yayo odoosusuga sabolomedee mesiloso badolone, saganamanabugu dolone na badebee. Osoloso yo eligili odoosusuga doloso badebee.

<sup>25-26</sup> Osoloso yayo eligiga goweli odoosusuga mapoo, nei yayo dimapoo mesie sabolo kokodo takolone badebee. Bei, Saitenso yayo goomoga goo tomo silesibilame diba gilimadooso. Esino eligili odoosusuga tei goomedee eligiga, goo oso Godeeye pidi maga dibada goo goolee su wuduloso, tei goo eligi ee tolososaiteneeyo goo ee pagalai malaiso.

### 3

#### *Biame hamameedee eyo goo*

<sup>1</sup> Goo hagono medee gooleede. Bei, biame hamameedee mapoo dala goosabolo, osoloso hegi sabolo ososibileiso.

<sup>2</sup> Bei, biame omapoo edebeeyo o odoosusuga goolega, wulo dia su ono diya goolone dabalaiso. Osoloso diayo molee diya goomogalaiso. Osoloso diayo odoosusuga abo pepooko dolone, diba dieso nediliyo si howalaiso. Osoloso diayo odoosusuga abo dia goo maga to tokenee takalaiso. Osoloso diayo dibada ama dio sabolo, osoloso oweedio dia to mapoo mesilone dabalaimo. Osoloso diayo emegei dimagabi tolososusuga eyo nei dimapoo goomoga to takalaimo. Osoloso diayo Godee mapoo mesilega dabalaiso.

<sup>3</sup> Osoloso diayo emegei sooloo deloga dabalaiso. Osoloso diayo odoosusuga heeyo goo tokenee boobado bigili goo ee malaimo. Osoloso diayo emegei dia goo maga gameenee takolone dabalaiso. Osoloso diayo goo tokenee talai mapoo diasu kookoodalaimo. Osoloso diayo

emegei goolega dobolone, dala tene-malaiso. Osoloso diayo goosusuga tekepo ee diya gooolone dabalaiso.

<sup>4</sup> Osoloso diayo emegei dala talame tiasalaiso. Osoloso diayo goosusuga hamamee peledabalai omapoo kibiya goolega, dieso goolee goo ono tomo sileiso. Osoloso dieso nediliyo goolee diba odoosusuga toowa, deegoolaiso. Osoloso diayo dia su osogoomoga goo ono tomo silesibilone, diayo nei Godee goolega dabalaiso.

<sup>5</sup> Odoosusuga egeesi oso gamenee tei too odoosusuga masi badolone, diayo nei Godeeyo kitulugu mapoo tei telega dabalaiso. Esiga goo tokenee ayohogugu ee tomo sili odoosusuga omaga peegoo dooboobigi.

<sup>6-7</sup> Bei, odoosusuga hageesi oso silesibilone, emegei dia moso tagaga ma kulodu galaga peleso, sobo goomedee koo gweli ee kukulo egliso, sobo ogoso goo diayo eligi ee dadalame. Sobo hageesi masi oso biame susuga goo dia eligi dulame goomegeliso. Esino diayo tei goodee gooleedalai ee koo tebili. Bei, dia goo tokenee sabolo, osoloso diasusogoomoga goo oso dimapoo kadadigamo palaga.

<sup>8</sup> Esiga daga hoogoo, Yanes dio Yambeles\* dio Moses mapoo wegigasosusuga. Esiga goo hedebe egeesi magagamenee goo eligili odoosusuga epedee hamapoo egee do oso Kelisowo goo maga tei goo eligi mapoo wegigamoloso. Bei, dia goo goolee olo tokenee polososo, tei too goo ee mepoogoo.

<sup>9</sup> Esino diayo goo tomo sili oso biame sagelaimo. Bei, dia goosusuga tokenee ee odoosusuga susuga eyo howo woola yilige bigileiso. Goo hedebe egeesi onosee Yanes dio Yambeles dio mapoo peledabaso.

#### *No mo goo peedee*

**3:1:** 1Tim 4:1    **3:5:** Mat 7:15, 21; Tait 1:16    **3:8:** Exo 7:11    \* **3:8:** *Yanes dio Yambeles dio* - Odoosusuga hagee bia googooosusuga moodeli odoosusuga, diba Isipi mi mapoo debeli. Moses dio Isipi odoosusuga dia wiligi odoosusuga taba dia howo woola diayo goo toowa opusomo di gamenee moodooso. Egeesi ma kulodu diayo kitulugosusuga oso Moseseeye kitulugu Godee maga too sabolo teiba, ee Isipi wiligi odoosusuga mapoo eligilame, diba goomogaso. (Oposusuga hagee Exodus 7:11-22 mapoo moloso.)    **3:10-11:** Diye 13:14-52; 14:5, 8-20

10-11 Esiga Timoti, no ayo eligi goo sabolo, osoloso ayo badeli goo sabolo, osoloso ayo talame goomegeli goo sabolo, osoloso ayo tei too goo sabolo, osoloso ayo mesie sabolo sooloo deli sabolo badebei goo ee, no olo gooleedooso. Osoloso Antiyoka mi mapoo, osoloso Ikoniyum mi mapoo, osoloso Listala mi mapoo edebeeyo amapoo hegi goo sabolo, osoloso dala teneme, ee ma kulodu ayo kibiloso badebei goo ee, no olo duso. A dala susuga ee ma kulodu osee badebeiso. Esino dala susuga ee ma kuloduga, Lodeeye a idoloso peegoo diso.

12 O. Tei takoo, odo agayo Yesu Keliso sabolo hedebe doloso, Godeeye goomoga goo ee dodolone badalai goomogoga, edebeeyo dimapoo dala tenemalaiso.

13 Osoloso ee ma kulodu goo toke-nee teli odo sabolo, osoloso game-nee goo eligili odo dia goo toke-nee oso toowa dalaiso. Osoloso di-ayo odo abo mapoo gamenee goo eligi maga tei goodee maga peegoo gilimado dileiso. Osoloso diba nosee dieso nediliyo peegoo gilimado dileiso.

14 Esino Timoti, daga Godeeyo to tekepo namapoo eligime, nayo to omapoo medee tei tooso. Esiga eligi goo omapoo medee kibiya kookoodoloso badebee. Bei, namapoo eligi odo ee, no olo gooleedooso.

15 Esiga no pepooko maga bei mooloogoloso sibulone, Godeeyo to booka mapoo hogugu goo ee, no olo gooleedooso. Osoloso Godeeyo to mapoo kitulugu moloso, namapoo goo goolee tekepo tenelai, nayo Yesu Keliso mapoo tei toga gie badeli talame.

16-17 Godeeyo to booka mapoo hogugu susuga ee Godee maga simi. Esiga Godeeyo to booka mapoo hogugu goo oso odo mapoo tei goo eligilone, edebeeyo dooboo dagaduga, tei goo eligi mapoo ka ido

sibo domoloso. Osoloso Godeeyo to booka mapoo hogugu goo oso edebeeyo tekepo badeli goo ee eligiliso, Godeeyo odo oso mopoodoo doloso goo tekepo susuga tomo silesibilei ee tebilame.

## 4

### *Poloye Timoti mapoo to hamameedee kokodo taka*

1-2 Yesu Kelisoye mipoo hamapoo wiligi odo doloso badalame see wedi siboga, yayo odo susuga epedee gie hagee do sabolo, osoloso odo wedia sabolo dia goo midileiso. Esiga ayo Yesu Kelisowo howo woola, osoloso Godeeyo howo woola, namapoo ka taka, nayo to tekepo ee odo mapoo eligilame. Osoloso Godeeyo to dulei goomegeli odo mapoo, osoloso Godeeyo to dulei goweli odo mapoo nayo Godeeyo to medee takee. Egeeseelone edebeeyo gamenee eligi goo mapoo tei toga, nayo diba to tekepo sabolo tei eligi goo mapoo see ido sibo dolone ka badebee. Osoloso diayo see goo tokenee teyaga, Godeeyo toso diba medee pidilone ka badebee. Osoloso nayo dimapoo Godeeyo to eligilone, medee mesie sabolo dimapoo kitulugu tenelone badebee.

3 Bei, odo aboso to tekepo eligi goo mapoo gowoolai biame ee sibileiso. Egeeseelone dieso goomoga goo ee dodolone, eligili odo abo ee gilimado sibileiso, to diayo dulei goomoga goo ee dimapoo eligilame.

4 Egeeseelone, diayo tei eligi goo ee poogoloso see gesaboo oposusu mapoo medee dulone dabalaiso.

5 Esino goo susuga ee ma kulodu, no tei goo ono kibiya kookoodoloso, no nediliyo nee su kookoodoloso badolone, dala ma kulodu kibiya badebee. Osoloso to tekepo eligilone badolone, tou susuga Godeeye namapoo tenee ee medee temelee.



<sup>6</sup> Esiga Timoti, ayo namapoo kokodo taka. Bei, edebeeyo a wooloomaloso mipoo hagee poogoo dilei biame olo koola tooboo.

<sup>7</sup> Esino tou Godeeye amapoo tenee ee medee kibiya tomo sibilesu hosu-dooso. Egeesi ma kulodu ayo tei too ee medee kibiloso badoso.

<sup>8</sup> Esiga ayo Godeeyo howo woola tekepo badeli goo maga, yayo Kei mi ma dokodoo mopoodoo doloso magoo nei oso a bamoloso. Esiga goo medee teiba midili odo Lodeeye siboga, nei ee amapoo tenelaiso. Osoloso yayo nei hedebe amapoo tenelai mauwe. Haye, odo agayo yayo sibilei mapoo bolone goomoga sabolo dogo, diba onosee nei talaiso.

<sup>9</sup> Timoti, ayo hagee bado mapoo saga sibilame, no weegeegee.

<sup>10</sup> Bei, odo abolo badeli Dimaseeye mi toowa eyo goo goomoga maga, a poogoloso see Tesalonika mi mapoo diso. Esino Kelesekeseye Galesia mi mapoo Godeeyo tou talame diso. Osoloso Taites onosee Dalamatiya mi mapoo Godeeyo tou talame diso.

<sup>11</sup> Egeesi ma kulodu hedebe Luka ono abolo hamapoo badoso. Esiga nayo amapoo sibulone Maka ido sibeye. Bei, yayo mo tou pidiliga.

<sup>12</sup> Esino ayo Tikikus Epeses mi mapoo diye diso.

<sup>13</sup> Esiga Timoti, nayo siboga, mo kekeisu dugo kali Tolowasee mi mapoo, Kalopuseeyo moso mapoo deede poogoo ee tosibeye. Osoloso mo booka onosee tosibeye. Osoloso nayo mo booka gala koloso moodoo ee tosibilei, a diya goomogo.

<sup>14</sup> Egeesi ma kulodu ki biso bi moodoogali odo hee Alesandaye amapoo dala toowa tenemeleeso. Esino Lodeeye yimapoo nei dala tenelaiso.

<sup>15</sup> No obeeyamo, nayo odo ogono medee ege. Bei, iyo eligi goo ee yayo diya wegigeliso.

<sup>16</sup> Esiga ayo daga malalo goo midili mapoo pala biame omapoo, odo heeso a pidilame abolo pele. Esino odo susuga oso a poogoo diso. Esino ayo Godee mapoo taka, yayo dibada goo tokenee ee hapoloso boobado bigilame.

<sup>17</sup> Esino Lodeeye a pidilone abolo badebei maga, goo midili odo oso a teli mapoo tenele. Esino ayo to tekepo ee Yu odoonee goo midili mi koola mapoo tebisamelee mapoo takalame, yayo a pidiso.

<sup>18</sup> Esiga edebeeyo amapoo dala tenelame seega, dala ee ma kulodu Lodeeye a pidileiso. Osoloso yayo a Kei mi ma dokodoo ido palaiso. Esiga odo susuga oso biame susuga hedebe Godee mapoo mesilone yimapoo goomoga poudilei tekepo. To hagee tei goo.

<sup>19</sup> Esiga ayo emegei di to ee Plisila sabolo, osoloso Akwila mapoo takoloso, see Onesipolos sabolo, osoloso o moso kulodu debeli odo mapoo takee.

<sup>20</sup> Elastuseeye Kolin mi mapoo osee badebeiso. Osoloso Tolopimus yo paiye neme, ayo yo Miletus mi mapoo hologooso.

<sup>21</sup> Esiga dugo telega mologa, no sibilei eli esialoso ayo hagee bado mapoo sibilame weegeegee.

Yubulus sabolo, osoloso Pudes sabolo, osoloso Linos sabolo, osoloso Kalaudiya sabolo, osoloso tei telaga odo susuga sabolo, oso diayo emegei di to ee namapoo takooso.

<sup>22</sup> Ayo Godee mapoo taka, Lodeeye nobolo badalame, osoloso yayo niba sooloo dolone pidilame.

## Taites Poloye Taites mapoo to hogugu tenee

*Taites booka goo eyo bei*

Poloye mi abo mapoo Godeeyo to takomo sileeme, Taites yibolo hodobo sileeso. Osoloso hamamee Poloye Taites yo Kiliti mi te mapoo sosee bamalame omapoo hologooso. Esiga to hogugu hagee ma kulodu Poloye Taites mapoo sosee bali odoosoo badalai goo ee hoguguloso teneeso.

<sup>1</sup> A Polo, Godeeyo tou teli odoosoo. Osoloso Yesu Kelisoye a diye diso, ayo Godeeye hesia odoosoo mapoo Yesuwo goo maga tei goo eligiga, diayo tei too ee kauwulame. Bei, tei goo ogosoo diayo Godeeye goomoga goo ee tomosilesibulone dabalai goo ee eligileiso.

<sup>2</sup> Osoloso diayo Godee maga kookaiyo badoboso gie badeli talai ee balame, ayo diba pidilone ka badoso. Bei, gamenee koo takeli Godeeye daga bi susuga moodelega badolone, yayo kookaiyo badoboso gie badeli hagee imapoo tenelame to olo edidi magooso.

<sup>3</sup> Esiga biame yayo magoo mapoo ibada gie badeli pidili Godee yayo o to tekepo amapoo yilige buguloso a diye diso, ayo odoosoo mapoo to tekepo ee takalame.

<sup>4</sup> Esiga ayo to hogugu hagee Taites namapoo ka tonowa. Bei, tei too ma kulodu no tei mo holo masiga.

Esiga ayo Godee mapoo taka, Ma Godeeye, osoloso ibada gie badeli pidili Yesu Kelisoye no sooloo dolone pidilame, osoloso mesie goo ee namapoo tenelame.

*Sosee bali odoosoo*

<sup>5</sup> Ayo no Kiliti mi te mapoo holo-goloso poogoo diso, nayo mi pepooko susuga mapoo sosee bali odoosoo hudi

magalame, osoloso sosee yo tou hosudele poogoo ee hosudalame.

<sup>6</sup> Nayo egeeseemo silone, ayo namapoo sosee bali odoosoo goo taka ee no goolee sabolo sile. Bei, sosee bali odoosoo yo odoosoo susuga eyo howo woola goo tokenee mauwe badebee. Osoloso yo sobo hedebe huloso badebee.\* Osoloso owolo dio oso tei tolosoo dobolone, ama dio owee dio eyo to mapoo mesilone ka debee. Osoloso diba wiligi me poogoloso susoo goomoga goo tokenee ee tolone na debee.

<sup>7</sup> Edebeeyo sosee balai goomogoga, yo odoosoo susuga eyo howo woola goo tokenee mauwe badebee. Bei, Godeeye o odoosoo medee bali tou ee yimapoo teneega. Osoloso eyo nediliyo na si hoowee. Osoloso saga na kamana bigi. Osoloso yugune naloso na halabee. Osoloso na bilige. Osoloso molee talame gamenee na takee.

<sup>8</sup> Esino yayo odoosoo soosimi pidilone ka badebee. Osoloso yo goo tekepo goolone badebee. Osoloso yo o su eyo nediliyo medee kookode. Osoloso yo Godeeye tekepo deli goo ee tolone badebee. Osoloso Godeeyo howo woola medee teedee badebee.

<sup>9</sup> To tekepo ee tei goodee, osoloso to hagee opusomo dee koo seli. Yayo to tekepo iyo eligimo silee mapoo kibiya kookoodoloso badebee, tei goodee eligilone odoosoo abo pidilame. Osoloso to tekepo mapoo goweli odoosoo eli dooboo dagadi goo ee ogoga, yayo dimapoo goo eligilame.

*Kiliti odoosoo aboso gamenee goo eligi*

<sup>10</sup> Ayo namapoo egeesee ka taka. Bei, sosee ma kulodu Godeeyo to mapoo koo mesili odoosoo abo dosoo. Diba goo eyo bei mauwe wulo to booweliso. Osoloso diayo gamenee goo odoosoo mapoo eligilone, tei goo maga diba peegoo gilimado diliso.

**1:2:** Kol 1:27    **1:4:** 2Kol 8:23; Gal 2:3; Loum 1:7    **1:6:** 1Tim 3:2-7; 2Tim 2:24-26    \* **1:6: sobo hedebe huloso badebee** - goo hagee, yo sobo hedebe huloso badalai, o, yo sobo hedebe mapoo goo malosoo badalai ee takoo malaisoo.    **1:10:** 1Tim 4:7

Goo hageesi egee tomo silesibo ee tei telaga Yu odoo\* aboso ka seeso.

<sup>11</sup> Esiga diayo egee eligimo silesibo goo ee hamaga takee. Bei, soosooso tei too goo ee diayo tokenee pomo silesiboso. Osoloso diayo molee talame gamenee goo hagee eligimo silesibiliso.

<sup>12</sup> Egeesi ma kulodu daga hoogoo Kiliti mi te mapoo badeli eligili odoo heeso, o odoo dia goo maga takolone egeesee takaso, “Kiliti odoo susuga diba gamenee takeli odoo. Osoloso diayo dibada suso goomoga goo tokenee ee dodolone ka doso. Osoloso diayo tou talai gowoolone, wulo nei diya toowa nolone ka doso,” diso.

<sup>13</sup> Yayo goo taka hagee ee tei goo taka. Esiga Taites, nayo gamenee goo eligi mapoo tei teli odoo hagee bia ogoloso dimapoo diya takemelee, diayo gamenee goo eligi ee poogoloso, see goo tekepo eligi mapoo medee kibiya tei ka talame.

<sup>14</sup> Osoloso diayo Yu odoo dia adaga dia goo egee oposusumo silesibo ee peegeeye dee. Osoloso diayo Godeeyo goodee mapoo goweli odoo dia tei magoo mapoo egee mesimo silesibo onosee peegeeye dee.

<sup>15</sup> Esiga Godeeyo howo woola subugo mauwe badeli odoo mapoo, bi susuga medee tekepo subugo mauwe moloso. Esino goo tokenee tolone Yesu mapoo tei tele pegeli odoo dimapoo bi susuga subugo mauwe koo moloso. Bei, goo goolee tekepo dimapoo melee ee olo tokenee paga. Esiga goo tekepo sabolo, osoloso goo tokenee dieso teli ee ogoloso koo gooleedeli.

<sup>16</sup> Esiga diayo takolone, “Godee iba gooleedooso,” dee takeliso. Esino diayo goo tokenee teli oso Godee mapoo tei telega pegeli goo ee eligiliso. Diba diya tokenee odoo. Osoloso diba Godee mapoo koo mesili. Osoloso diba goo tekepo talai koo

tebili.

## 2

### *Tei goodee eligi mapoo deede*

<sup>1</sup> Esino Taites, nayo tei telaga odoo mapoo Yesu Kelisowo goo maga tei goodee eligili sabolo teiba eligi.

<sup>2</sup> Egeeseelone nayo giso adaga medee eligi, diayo mesie sabolo dobolone, dieso nediliyo dibada su medee kookoodoloso dabalame. Osoloso odoo susuga eyo howo woola medee tekepo dabalame. Osoloso diayo tei too medee kibiloso dobolone, odoo susuga diya sooloo dolone ka dabalame. Osoloso diayo dala goo ma kulodu kibiya dabalame.

<sup>3</sup> Osoloso nayo sobo adaga medee eligi, diayo dia suso Godeeye goomoga goo ee tolone ka dabalame. Osoloso dimapoo takee, diayo emegei dia goo maga to tokenee takelega dabalame. Osoloso diayo yugune naloso halabagamo silesibiyaga, medee takee. Osoloso goo tekepo tolone dabalai goo ee diayo odoo mapoo eligilone dabalame, nayo dimapoo eligi.

<sup>4</sup> Esiga diayo goo egeesi moodooga, sobo gie kakauwa diayo dibada giso sabolo, osoloso owolo dio sooloo deli goo ee eligilei tebileiso.

<sup>5</sup> Osoloso diayo sobo gie kakauwa oso goo tekepo tolone, Godeeyo howo woola subugo mauwe dobolone, dia su medee kookoodeli goo ee eligilei tekepo. Osoloso omo dio sabolo, osoloso owolo dio sabolo medee balai goo onosee eligi. Osoloso omo dio eyo to mapoo mesili goo ee eligi, tei tele poogoo odoo oso goo ee ogoloso, Godeeyo to maga to tokenee takelega pagalame.

<sup>6</sup> Osoloso giso gie kakauwa dibada su medee kookoodeli goo ee dimapoo eligi.

<sup>7</sup> Osoloso edebeeyo nee goo susuga ogoloso padalame, nayo hedebe goo tekepo tolone ka badebee. Osoloso

\* **1:10:** Yu odoo hagee biaso egeesee eligiliso, tei telaga odoo susuga oso Yu odoo dia tei magoo ee dodolone kolo koolai tekepo deliso. **1:11:** 1Pita 5:2; 2Tim 3:5-6 **1:13:** 2Tim 4:2 **1:14:** 1Tim 4:7 **1:16:** 1Yon 1:6; 2:4 **2:3:** 1Tim 3:11 **2:5:** Epe 5:22 **2:7:** 1Tim 4:12

nayo Godeeyo to eligiga, goo tekepo goolone medee ka eligi.

<sup>8</sup> Nayo Godeeyo to dooboo dagadi-lega medee eligi, namapoo goweli odoosoo oso imaga to tokenee takalai similame.

<sup>9</sup> Osoloso nayo see tei telaga odoosoo nei mauwe tou teli mapoo takee, diayo dia wiligi odoosoo eyo to mapoo mesiloso, diayo goomoga goo ee tolone, dibolo toso agadigelega pagalame.

<sup>10</sup> Osoloso diayo dia wiligi odoosoo eyo bi heli talai tekeponee. Esino diayo medee tei dolone, tou medee goosa tolone dabalai tekepo, dia wiligi odoosoo oso dia goo tekepo ogoloso, yayo dia goo ee tekepo dalame. Osoloso ibada gie badeli pidili Godeeyo goo maga eligi goo ee tekepo dalame.

<sup>11</sup> Tei telaga odoosoo oso goo egeesi tolone dabalame, nayo dimapoo eligi. Bei, Godeeye iba sooloo dolone pidili goo maga Yesu Keliso mipoo hamapoo meiyee diso, yayo odoosoo susuga ibada gie badeli ee pidilame.

<sup>12</sup> Godeeye sooloo dolone pidili goo oso imapoo ka eligi moloso, mi goo Godeeye goweli iyo ee dedelega pagalame. Osoloso iba epedee hamapoo dobolone, ibada su iso nediliyo kookoodoloso, Godeeye goomoga goo ee tolone, o howo woola teedee dabalame.

<sup>13</sup> Esiga iyo goo egeesi tolone dobolone, Yesu Kelisoye mipoo hamapoo sibilei goo ee dulone ka bamoloso. Yo tei Godee, osoloso yo ibada gie badeli pidili odoosoo. Yayo see wedi siboga, eyo toowa doloso badeli goo sabolo sibileiso. Goo susuga egee iba gooleedooso. Esiga yayo see wedi sibilei ee bolone iba goomoga sabolo ka doso.

<sup>14</sup> Yayo iba halo olo taso, iyo goo tokenee ma kulodu doboome, yayo iba neiso toloso peegoo gilimado dilame. Egeeseelone yayo olo taso, iyo o odoosoo doloso dobolone, o howo woola

medee teedee dabalame. Osoloso iyo goo tekepo talai ee diya goolone dabalame.

<sup>15</sup> Esiga nayo goo susuga hagee kitulugu sabolo medee kokodo takee, tei telaga odoosoo oso goo ee tolone dabalame. Esino diayo goo omapoo mesilega poogooga, nayo dimapoo diya takee. Nayo egeesi eligi goo ee ogoloso edebeeyo hedebe nayo eligi mapoo mesilei tekepo. Egeeseelone odoosoo heeso nayo eligi goo ee goo mauwe, dee na takeeye dee.

### 3

#### *Tei telaga odoosoo oso dabalai goo*

<sup>1</sup> Esiga Taites, nayo tei telaga odoosoo mapoo goo hageesi see tobu eligimelee, diayo diba gibadeli gamalee odoosoo dia to mapoo, osoloso mosobia eyo wiligi odoosoo tebisa dia to mapoo mesilone dabalame. Egeeseelone diayo goo tekepo susuga ee talai olo mopoodoo doloso dabalame.

<sup>2</sup> Osoloso diayo emegei dia goo maga to tokenee takolone na debee. Esino diba toso agadigelega mesie sabolo dobolone, emegei sooloo dolone dabalai tekepo.

<sup>3</sup> Esiga no iyo daga tei telega debei goo ee goolee. Iba tei telega dobolone, goo medee koo gweli odoosoo doloso debeiso. Iyo Godeeyo to mapoo mesilega doboome, odoosoo aboso iba tei goodee maga peegoo gido diliso. Osoloso goo tokenee iyo gilee goo ee osee tomo silone pagalai tebile. Iyo odoosoo abo mapoo goo tokenee moodeliso, osoloso emegei dia bi ogoloso talame diya gweliso. Osoloso edebeeyo iba hegiliso, eseega nei iyo diba hegiliso.

<sup>4-5</sup> Esino ibada gie badeli pidili Godeeye o mesie goo ee imapoo eligilone iba sooloo dolone, yayo ibada gie badeli pidiso. Esiga iyo goo tekepo teme, yayo iba ka pidile. Esino yayo ibada goo tokenee



hapoloso Dio Tei imapoo tenee maga, yayo sooloo dolone iba pidiso, iyo see gie badeli dia toloso dabalame.

<sup>6</sup> Ibada gie badeli pidili Yesu Kelisoye ibada goo tokenee hapalame ta goo omaga, Godeeye o Dio Tei ima kulodu badalame su goodegela wulayo teneeso.

<sup>7</sup> Esiga Godeeye iba sooloo dolone pidi maga, o howo woola iba olo odo tekepo doloso doso. Esiga iba kookaiyo badoboso gie badeli ee talame ka bamoloso.

<sup>8</sup> To hagee tei goo, osoloso to hagoso odo susuga pidilei kitulugu moloso. Esiga a goomogo, nayo goo hagee tei telaga odo mapoo medee eligilame. Nayo egeese seega, diba goo tekepo tolone odo susuga pidilone medee dabalaiso.

<sup>9</sup> Esino goo wulo bei mauwe magatoso agadigeli odo omaga peegoo dooboobigi. Osoloso edebeeyo o adagaso balomo simi goo ee oposulone, Moseseeye tei magoo goo ee dadalame toso agadigaga goo ee, nayo ogoloso na deede. Bei, goo susuga hagoso odo koo pidili.

<sup>10</sup> Osoloso odo agayo gamenee eligi goo ee toloso sosee ma kulodu eligimo silone odo domo piga, nayo yo hamaga takee. Osoloso yayo nee to dulega poogooga, see tobu hamaga takee. Esino yayo nee to dulega poogoloso see osee eligimo siloga, yo peegoo wulo peegee.

<sup>11</sup> Odo ogoso tei goodee eligili maga miligi pia goo ee, no gooleedooso. Osoloso goo yayo tomo sili oso Godeeyo howo woola yo odo tokenee doloso egee bado goo ee woola eligiliso.

### *Emegei di to hamameedee taka*

<sup>12</sup> Ayo Atemas, o, Tikikus namapoo diye dalaiso. Osoloso yo nayo egee bado mapoo peledobooga, nei nayo Nikopolis mi mapoo sibilesa a tugodalame weegee. Bei, dugo bi-

ame mapoo a mi omapoo badalai, a goomogo.

<sup>13</sup> Osoloso Apolos sabolo, osoloso gamaleeyo tei magoo diya gooleedo odo Sinasi pidilone, diba mi hee mapoo dilame dogo, bi diayo dulone todilei tobuloso dimapoo tenee.

<sup>14</sup> Osoloso tei telaga odo oso goo tekepo tolone dobolone, bi tebile poogoo odo ee pidilei tekepo. Bei, ibada odo oso tei too ma kulodu dobolone, wulo goo mauwe mosoowe dabalai tekeponee.

<sup>15</sup> Esiga odo susuga abolo debeli oso namapoo emegei di to ka taka. Esiga Taites, see nayo iyo emegei di to taka hagee, nobolo hodobo debeli tei telaga odo dimapoo takee.

Ayo Godee mapoo taka, yayo niba susuga sooloo dolone pidilame.

## Palimon Poloye Palimon mapoo to hogugu tenee

### *Palimon booka goo eyo bei*

Palimon hagee bi bei odoo, osoloso yo Kolosi mi mapoo badeli. Esino yo tei toloso badolone, Polo dio emegei doloso badebeiso. Egeesi ma kulodu Onisimas yo Palimoneeyo tou teli odoo doloso badolone, nei mauwe tou temeleso. Egeesi ma kulodu Onisimaseeye o wiligi odoo Palimon maga pulo dilesa Polo tugodoloso yibolo badebeiso. Osoloso Poloye eligi goo maga yo Yesu mapoo tei tooso. Egeesi ogoloso Poloye Palimon mapoo to hogugu hagee teneeso, Palimon o tou teli odoo Onisimaseeye see wedi dilesa, Palimoneeye badebei mapoo peledobooga, yayo yimapoo nei dala tenelega, yo goomoga sabolo see ka idalame.

<sup>1</sup> A Polo, Yesu Kelisowo goo ee takomo silee maga, neliga moso ma kulodu badeli odoo ee aso. Ibada omolo Timoti asalo hamapoo dobolone, iyo ibada odoo ibolo tou hedebe teli Palimon namapoo to hogugu hagee ka tonowa.

<sup>2</sup> Osoloso tei telaga odoo nee moso kulodu howo gisili odoo mapoo to hogugu hagee ka tonowa. Osoloso to hogugu hedebe hagonosee ibada obooba Apiya, osoloso ha teli odoo masi Godeeyo tou mapoo kibiloso ibolo badeli Alakipus nimapoo ka tonowa.

<sup>3</sup> Ayo Godee mapoo taka, Ma Godeeye, osoloso ibada Lodee Yesu Kelisoye niba sooloo dolone pidilame, osoloso mesie goo ee nimapoo tenelame.

*Palimoneeye sooloo deli goo sabolo osoloso tei too goo*

<sup>4</sup> Palimon, ayo biame susuga Godee mapoo takolone no halo goomoga to takeliso.

<sup>5</sup> Bei, nayo Lodee Yesu mapoo tei too goo ee, a duliso. Osoloso nayo Godeeyo odoo susuga ee sooloo dolone egee bado goo sabolo, a duliso.

<sup>6</sup> Nayo Yesu mapoo olo tei tooso. Goo egeesi maga, nayo tei telaga odoo sabolo hedebe doloso ka badoso. Esiga ayo Godee mapoo taka, hedebe deli goo hagosu no pidilone, iba Keliso sabolo hedebe doloso hagee do goo maga, goo tekepo susuga iyo teli goo ee medee gooleedalame.

<sup>7</sup> Molo emegei, nayo Godeeyo odoo ee sooloo dolone dimapoo goomoga tenelone egee bado goo oso, amapoo kitulugu sabolo, osoloso goomoga toowa sabolo ka tenemoloso.

### *Onisimas yo tei nomolo masi hesie*

<sup>8</sup> A Kelisowo diye di odoo doloso badoga, amapoo kitulugu moloso, nayo goo tekepo talame, ayo namapoo to kitulugu sabolo takalai.

<sup>9</sup> Esino ayo no diya sooloo doloso. Esiga ayo namapoo wulo ka woosowa. Bei, a Polo, Yesu Kelisowo tou teli goo maga neliga moso ma kulodu badolone olo adaga poloso ka badoso.

<sup>10</sup> Ayo Onisimas yo halo namapoo ka taka, nayo yo pidilame. Bei, a neliga moso ma kulodu badolone, yayo tei talame ayo yo pidiso. Esiga epedee hamapoo ayo ama masi ka badoso.

<sup>11</sup> Daga Onisimaseeye nee tou teli odoo doloso badebei omapoo yayo no medee pidile. Esino epedee yayo tei toloso badolone, asalo pidilei teiba.

<sup>12-13</sup> Onisimas yo ayo diya gooma odoo. Esiga yo abolo hodobo hamapoo badalai, a goomogo. Bei, ayo to tekepo takomo silee eyo goo maga neliga moso ma kulodu ka badoso. Esiga no halo yayo a

pidilone badalai, a goomogo. Esino ayo yo namapoo see wedi diye deeso.

<sup>14</sup> Bei, ayo namapoo wooselega yo hamapoo gidoloso badalai tekeponee. Egeesi ma kulodu nayo a pidilame, ayo no seselai, a koo goomogo. Esino no goomoga oso, nayo a pidilei, a goomogo.

<sup>15</sup> Onisimaseeye biame deiyepo mapoo no poogoo dileso badebeiso. Esino ayo goolee, goo ogoso peledabaso, yo see hamamee namapoo wedi sibilesos biame susuga nobolo hodobo badalame.

<sup>16</sup> Esiga nayo yo see idoga, yo wulo nama hemi badolone nei mauwe tou teli odoos, dee na goolee. Bei, yinosee epedee Keliso mapoo tei too odoos. Esiga yo ayo diya gooma. Esiga nei nayo yo nei mauwe tou teli odoos dolone, Lodee mapoo tei too ee ma kulodu nomolo masi diya goolone badebee.

<sup>17</sup> Esiga asalo Kelisowo tou hodobo teliga, ayo no agalame siboga, nayo a idili, Onisimaseeye namapoo siboga yinosee egeesee ide.

<sup>18</sup> Egeesi ma kulodu Onisimaseeye namapoo goo tokenee hee olo too daga, osoloso yayo nee bi hee nei tenelega tolosos badoga, goo onosee amapoo takee, ayo nei magalaiya.

<sup>19</sup> A Polo, ayo mo deeso to hagee ka hoguga: bi yayo too eyo nei ee ayo namapoo tenelaisos.\* Esino no gooleedoosos, nayo Keliso maga gie badeli talame, ayo no pidisos. Esiga a goomogoga, ayo no halo pidi goo eyo nei, ayo namapoo takalai, a teiba. Esino ayo namapoo takalaime.

<sup>20</sup> Esiga molo emegei. Iyo Keliso mapoo tei too ee ma kulodu dogas, nayo Lodee halo Onisimas ee see ide. Eseega a goomoga sabolos badalaisos.

<sup>21</sup> Ayo namapoo egee takoo goo hagee nayo tolosos, Onisimas halo goo tekepo abo talai goo ee, a goolee-

doso. Goo egeesi gooleedolosos, ayo to hogugu hagee namapoo ka tonowa.

<sup>22</sup> Osoloso goo hee hagosos. Ayo neliga mosos ma kuloduga peegoo peledabalame, niyo Godee mapoo takolone debelisos. Esiga Godeeye goomogoga, a peegoo peledobolosos see niyo egee do mapoo sibileisos. Esiga ayo omapoo sibilesos badalai debi mopoodos de.\*

### *Emegei di to hamameedee taka*

<sup>23</sup> Kelisowo goo ee takomos silee goo maga neliga mosos ma kulodu abolos badeli odoos hee Epapalasonosee yayo emegei di to ee namapoo taka.

<sup>24</sup> Osoloso abolos hodobo tou teli odoos Makaye, osoloso Alistakuseeye, osoloso Dimaseeye, osoloso Lukaye, emegei di to onosee namapoo ka taka.

<sup>25</sup> Ayo Godee mapoo taka, ibada Lodee Yesu Kelisoye niba sooloo dolone pidilame.

**1:16:** 1Tim 6:2 \* **1:19:** Poloye o deeso to deiyepo hagee nei tenelai goo maga hogugusos. Esino to abo Poloye odoos hee mapoo takeme, yayo hogugu malaisos. **1:22:** Pil 1:25; 2:24 \* **1:22:** Poloye to hogugu susuga hagee Palimon mapoo hogugulosos teneesos. Esino to besee 22 ee ma kulodu egee molo, ee yayo Kolosi mi mapoo debeli tei telaga odoos dimapoo to hogugulosos teneesos. **1:23:** Kol 1:7 **1:24:** Kol 4:10-14

## Yemes To Yemeseeye hogugu

*Yemes booka goo eyo bei*

Yemes booka hogugu hagee Yesuwo omolo. Yayo Yelusalem sosee wiligi doloso badolone, mi abo mapoo debeli tei telaga odo mapoo to hogugu hagee teneeso, diayo Keliso mapoo tei too maga dala egee tomolo ee ma kulodu medee kibiya dabalame.

<sup>1</sup> Emegei! A Yemes, Godee sabolo osoloso Yesu Kelisowo tou teli odo. Ayo Yu odo bala 12\* mi opusomo opusomo di mapoo egee dobomo du nimapoo to hagee ka hoguguso.

*Dala goo sabolo goo tokenee mapoo gido dili goo sabolo*

<sup>2</sup> Tei telaga odo emegei, dala goo susuga oso nimapoo siboga, goomoga sabolo ee ma kulodu ka debee.

<sup>3</sup> Bei, niba gooleedooso, dala goo hageesee oso sibiliso, iyo tei too kibiya beleso agalame. Egeesi ma kulodu iyo dala goo ee ma kulodu kibiya daga, goo oso iyo tei too ee ma kulodu mesie sabolo debeli goo ee eligiso.

<sup>4</sup> Esiga niyo tei too goo ee kibilame, mesie goo nima kulodu egee molo oso osee mele dee. Niyo egeesee seega, goo susuga ee ma kulodu niba kibiya dabalaiso.

<sup>5</sup> Esiga odo hee niyo goo goolee tekepo tebile daga, yayo Godee mapoo takalai tekepo. Bei, Godeeye yimapoo simili goo tenelaime. Esino Godeeye o odo pidilei goomoga toowa mologa, yayo yo pidileiso.

<sup>6</sup> Esino yayo Godee mapoo tei toloso yimapoo takooga, goo bakadio na goolee. Bei, goo bakadio gweli odo ee poo siboga, howo ki simi

oso egee holodu odo yo egeesi masi badoso.

<sup>7-8</sup> Odo egeesi yimapoo goo goolee hedebe koo moloso. Esino goo susuga ee ma kulodu goo goolee bakadio doloso badoso. Esiga yayo Godee mapoo taka goo ee nei talaiso doloso goalai tekeponee.

<sup>9</sup> Esiga tei telaga bi mauwe debeli odo niba goomege. Bei, Godeeye o howo woola niba toowa diso.

<sup>10</sup> Osoloso tei telaga bi bei odo niba Godeeye pepooko daga, niba goomege. Bei, osoko biame mapoo osokoso pukusi mapoo pounoga, siligaloso egee wodio, niba nose egeesee selaiso.

<sup>11</sup> Osoloso osokoso sibulone palapalawa tekepo mapoo pounoga, palapalawa tekepo oso wodoloso miyomoo dologa dibiliso, niba nose egeesee selaiso. Esiga bi bei odo niyo nibada tou tolone daga, niba wedileiso.

<sup>12</sup> Odo heeso dala ma kulodu kibiya badolone tei too goo pegel-ega badoga, Godeeye yo pidileiso. Bei, yo dala ma kulodu tei too kibiya badoga, Godeeye yimapoo nei kookaiyo badoboso gie badeli tenelaiso. Esiga kookaiyo badoboso gie badeli hagee Godeeye yimapoo diya goolee sabolo debeli odo mapoo tenelame to magooso.

<sup>13</sup> No goo tokenee talame gido duga, “a goo tokenee talame Godeeye gido du,” dee na goolee. Bei, tokenee goo oso Godee gido dilei tebile. Osoloso Godeeye o odo ee tokenee goo mapoo koo gido dili.

<sup>14</sup> Esino odo eyo tokenee goo talame diya gweli goo oso yo kukuga ka gido dili.

<sup>15</sup> Osoloso tokenee goo talame gweli goo hagoso suso goo talame gido dileiso. Osoloso suso tokenee goo too hagoso kauwuloso see odo mapoo teli goo tosibileiso.

1:1: Mat 13:55; Gal 1:19; Diye 15:13; 1Pita 1:1  
1:2: Loum 5:3-5

\*

1:1: **Yu odo bala 12** egee eyo bei Yu odo tei talaga odo ee takooso. 1:3: 1Pita 1:7 1:5: Prov 2:3-6 1:10: Isa 40:6-7



<sup>16</sup> Esiga tei telaga odoo ayo gooma niba goolee, Godeeye odoo koo gido dili.

<sup>17</sup> Bei, tokenee mauwe tekepo goo susuga ee Ma Godeeye egee bado dokodooga sibiliso. Egeesi ma kulodu bi yayo moodoo a, giwo, osoloso osoko diayo melee mi hedebe omapoo koo meli, esino diba biame heeso mi hee ma molo osoloso mi hee ma molo deliso. Esino diba moodeli Godee yo opusomo dee koo seli.

<sup>18</sup> Esiga eyo goomoga goo ee dodolone, Godeeye o to tekepo maga imapoo gie badeli goo ee olo teneeso, yayo moodoo bi susuga ma kulodu iyo malalo dabalame.

### *Godeeyo to duloso suso tou tolone debee*

<sup>19</sup> Esiga tei telaga odoo ayo gooma, niba dui, odoo susuga oso saga duli odoo doloso dabalai tekepo. Egeeseelone niba saga to takeli goo sabolo osoloso saga kamana bigili goo sabolo ee ma kulodu na debee.

<sup>20</sup> Bei, edebeeyo komonolone goo peledabeli oso Godeeyo howo woola mapoo tekepo doloso badeli goo sabolo koo tobuoso.

<sup>21</sup> Esiga nima kulodu Godeeyo howo woola goo tokenee susuga sabolo osoloso suso goo tokenee teli sabolo peegee. Osoloso niyo Godeeyo to duloso too goo ee mesie sabolo kibiya toloso debee. Bei, to omapoo kitulugu moloso, niyo gie badeli talai.

<sup>22</sup> Esiga niba Godeeyo to duloso yayo egee takoo goo ee tolone debee. Bei, niba Godeeyo to duloso yayo egee takoo goo ee telega doga, niba niso nediliyo dooboo gooleeso.

<sup>23-24</sup> Bei, edebeeyo Godeeyo to duloso suso tou telega badoga, yo edebeeyo dio egeli mapoo eyo nediliyo ogoloso poogoloso o mudu saga boobado bigili egeesi masi badoso.

<sup>25</sup> Esino edebeeyo Godeeye kokodo taka to tekepo ee medee

ogoloso boobado bigilega medee dodomologa, yayo goo susuga tomo sili ma kulodu Godeeye pidileiso. Godeeye kokodo taka to medee tekepo oso odoo susuga tokenee goo maga gilimolone ka badoso.

<sup>26</sup> Egeesi ma kulodu edebeeyo eyo nediliyo yo Godeeyo goo diya gooleedooso doloso, tokenee goo takalame o maga kookodelega poogooga, yayo Godeeyo goo gooleedoo ee goo mauwe moloso. Osoloso yo eyo nediliyo dooboo gooleeso.

<sup>27</sup> Esino edebeeyo gilibo holo sabolo osoloso bauwe sabolo dala ma kulodu debei ee pidilone badolone, mi toowayo tokenee goo maga o su eyo gibadoga, Godeeye yayo tei too goo ee medee teedee dalaiso.

## 2

### *Odoo abo pilega tokenee odoo sabolo tekepo odoo sabolo hodobo dabalai goo*

<sup>1</sup> Tei telaga odoo emegei, niba ee ibada toowa Lodee Yesu Keliso mapoo tei telaga odoo oso. Esiga niba odoo abo ogoloso, diba ee tekepo dolone dimapoo goomogolone, odoo abo ee tokenee dolone diba na gowee.

<sup>2</sup> Goo hageesee ee takooso, odoo heeso niyo mooloogoodoloso howo gisilone doga, dugo medee tekepo sabolo bi abo medee tekepo kaloso gasibileiso. Egeeseega epedee omapoo bi mauwe odoo onosee dugo tokenee kaloso gasibileiso.

<sup>3</sup> Egeeseega niyo dugo tekepo kaloso gasimi odoo mapoo, "No malalo hamapoo sibilesi bie," dee takoloso, see hamamee dugo tokenee kaloso gasimi odoo mapoo, "No hamamee hoogoo dilesi tebide o, miyomoo bie," dalaiso.

<sup>4</sup> Esino niyo goo egeesee egee moodoo, niba ogoo goo moodoo-somo? Niba wulo odoo abo ono tekepo dolone, odoo abo ee tokenee,

deeso. Esiga goo goolee tokenee nima kulodu egee molo oso odo abo dooboo midiliso.

<sup>5</sup> Esiga tei telaga odo ayo gooma, niba goo hagee medee dui! Godeeye mi toowa ma kulodu bi mauwe odo ee hesigaso, diayo dibada sooloo ma kulodu tei too goo oso toowa doloso dabalame. Osoloso diayo Godeeye wiligi doloso badeli mapoo gadilame. Bei, Godeeye yo goolee sabolo sili odo mapoo to kitulugu magooso, yayo wiligi doloso badeli mapoo gadilame.

<sup>6</sup> Esino goo ee ma kulodu niyo bi mauwe odo ee goo mauwe odo deliso. Esino niba kasi maga bi bei odo mapoo hamamee ka dadaga malala? Egee bia oso nimapoo dala teneloso goo midili mapoo ido diliso.

<sup>7</sup> Osoloso diayo nibada Lodee Yesu Kelisowo hu tekepo maga to tokenee takeliso.

<sup>8</sup> Godeeyo to booka ma kulodu kokodo taka to toowa egeesee moloso,

“No nediliyo diya sooloo deli egeeseelone no nemegei odo mapoo diya sooloo dele,” diso.

Esiga niyo kokodo taka to hagee medee deedeega, niba eli mapoo doso.

<sup>9</sup> Esino niyo goolee ma kulodu odo abo ee tekepo dolone, odo abo tokenee daga, niba tokenee toso. Egeesi maga Godeeyo to oso takooso, niba tei magoo gababili odo diso.

<sup>10</sup> Bei, edebeeyo Godeeye tei magoo susuga medee dodolone, tei magoo hedebe gababuoga, yo tei magoo susuga ee gababuoso.

<sup>11</sup> Esiga Godeeye egeesee takaso, “Niyo odo heeyo sobo sabolo giso sabolo goo heli na te,” diso. Osoloso Godee hedebe oso see egeesee takaso, “Odo na wooloome,” diso. Osoloso no odo heeyo sobo sabolo giso sabolo heli koo teli, esino odo

wooloomolone badoga, no tei magoo gababili odo oso.

<sup>12</sup> Esiga niyo to kei susuga sabolo osoloso suso goo too susuga sabolo obeeyamo. Bei, niba tokenee goo maga peegoo gilimadoo dili tei omaga nibada goo midileiso.

<sup>13</sup> Esiga goo midilei biame mapoo, Godeeye emegei koo sooloo deli odo ee sooloo dala goo sabolo midileime. Esino Godeeye goo midilei biame mapoo emegei sooloo deli odo ee sooloo dala goo sabolo midiga, diba ebilega goomoga sabolo dabalaiso.

*Tei too ma kulodu su sabolo tou talai*

<sup>14</sup> Esiga tei telaga odo emegei, edebeeyo eyo nediliyo yo tei too odo doloso, yayo suso tou too me daga, yayo tei too ee goo mauwe. Odo egeesee seli ee yayo tei too oso yimapoo gie badeli tenelaime.

<sup>15</sup> Egeesi ma kulodu emegei tei too odo oso nei egeesi sabolo osoloso dugo egeesi sabolo me badeliso.

<sup>16</sup> Egeeseega nayo yimapoo takolone, “Emegei, medee dilesos, dugo kaloso badolone wo ne,” dee takooga, nayo yimapoo bi tebile poo-goo tenelega wulo egeesee takoloso poogooga, no tekepo goo koo toso.

<sup>17</sup> Esino bei, tei too oso obusomo molone suso goo too mauwe mologa, tei too ee goo mauwe.

<sup>18</sup> Egeesi ma kulodu odo heeso egeesee takalai malaiso, “No tei too teiba. Esino a wulo suso goo teli odo,” dalaiso. Egeeseega nei ayo odo omapoo egeesee takalaiso, “Bei kasolone nayo suso goo too mauwe badolone, nayo tei too goo ee woola ka eligileiyo? Esino suso tekepo goo teli odo ayo mo suso goo too maga ayo tei too goo ee eligileiso,” diso.

<sup>19</sup> Esiga nayo Godee hedebe egee bado mapoo tei teliso. Goo ee tekepo. Esino bo holo sabolo Godee hedebe egee bado mapoo tei tolone ebiliso.

<sup>20</sup> Esiga no goo goolee mauwe odoo, tei too ee suso tou too me daga, tei too egee goo mauwe. Esiga no goo hagee ayo namapoo eligilame ka sala?

<sup>21</sup> Ibada amawe Eibalaham yo Godeeyo howo woola mapoo tekepo odoo diso. Bei, yayo tei toloso suso tou too maga. Goo ee yayo egeese siso, yayo owolo Aisek ee Godee mapoo gala wooloso teneli dousulu mapoo wooloomalame dokodoo magooso. <sup>22</sup> Esiga no goolee. Eibalahameeye tei too sabolo osoloso suso tou too sabolo oso medee teibaso. Osoloso yayo suso tou too oso yayo tei too ee kauwudooso.

<sup>23</sup> Goo hagoso Godeeyo to booka ma kulodu taka goo sabolo tobulone egeese takaso, “Eibalahameeye Godee mapoo tei teme, Godeeye yayo tei too ogoloso o howo woola yo tekepo odoo diso.” Goo egeesi maga Godeeye Eibalaham yo tei mo odoo diso.

<sup>24</sup> Esiga niba goolee. Odoo susuga oso hedebe tei too maga Godeeyo howo woola tekepo odoo dee koo seeso. Haye. Suso tou too sabolo osoloso tei too maga Godeeyo howo woola odoo susuga ee tekepo deliso.

<sup>25</sup> Osoloso iba see domo sili sobo Leihabeeye goo too ee ogoso. Yibolosee yayo goo too oso Godeeyo howo woola yo tekepo diso. Bei, yayo Yeliko odoo dia mosobia mada agalame di Isalael odoo ee pidilone, yayo o mosopoo iyadoloso palaso. Osoloso see yayo diba eli hee maga diye dulone dibada gie badeli pidiso.

<sup>26</sup> Esiga odoo o su mapoo dio mauwe odoo ee ta. Esiga tei too goo onosee egeesi moloso, edebeeyo yayo tei too ee suso tou telega badoga, yayo tei too ee goo mauwe moloso.

### 3

#### *Nibada i medee kookoode*

**2:21:** Gen 22:9-12    **2:22:** Hib 11:17-18    **2:23:** Gen 15:6; 2Chr 20:7; Isa 41:8    **2:25:** Josh 2:1-21; Hib 11:31    **3:6:** Mat 12:36-37; 15:11, 18-19

<sup>1</sup> Tei telaga odoo emegei, niyo susuga eligili odoo doloso dabalai, a koo goomogo. Bei, niba olo gooleedooso, Godeeye goo midilei biame mapoo eligili odoo susuga ibada goo ee Godeeye diya kitulugu sabolo midileiso.

<sup>2</sup> Egeesi ma kulodu iba susuga eli dooboo dagadiliso. Esino edebeeyo yayo to taka ma kulodu eli dooboo dagadilega badoga, odoo yayo tei too ee kauwa moloso. Esiga odoo hageesi oso eyo nediliyo o su susuga kookoodalai teiba moloso.

<sup>3</sup> Esiga iba dio masi hagee ogoso. Edebeeyo hosee be ma dokodoo buloso dilame gooleega, yo bi pepooko hosee be eyo maga mapoo magoloso tiso su mapoo bagagoo, su mapoo bagagoo dalaiso. Osoloso ti omapoo toloso dulone hosee be oso edebeeyo goolee mi mapoo dilame ti ee gimo dileiso. <sup>4</sup> Osoloso dio masi hee hagoso. Abei toowa mapoo silesibili du onosee egeesi moloso.

Du oso poo toowa simi ma kulodu osee dumologa, du egee dooboo dileime. Bei, du egee toowa, esino du mali suda pepooko hee osio mapoo moloso. Oso du tosili odoo oso goomoga mi mapoo mamodiliso.

<sup>5</sup> Esiga ibada maga ma kulodu i pepooko egee egeesi moloso. Ibada su mapoo bi susuga egee molo ma kulodu i ee diya pepooko moloso. Esino yayo toso hodolone diya doko topeliso. Wulo goolee, dobu ee dou pepookoso gigaloogooga, dobu susuga douso nadiliso.

<sup>6</sup> Esiga i ibada maga ma kulodu egee molo onosee egeesi masi moloso. Bei, i oso ibada su mapoo tokenee teneliso. Esiga iso tokenee bei mooloogooloso odoo su susuga dou masi nadiliso. Dou hagee Dou mi maga bei mooloogooloso ibada i mapoo gigaligiliso. Egeeseega dou hagoso edebeeyo gie badeli nadoloso tokenee peliso.

<sup>7</sup> Egeesi ma kulodu odoo susuga

oso gala seebee opusomo opusomo di só, osoloso beliyeso kolo dili, osoloso howo kulomoo debeli ee see badalame poopeliso.

<sup>8</sup> Esino edebeeyo i ee be masi poopooloso badilei tebile. Bei, i diya tokenee. Esiga yayo sa masi odo wooloomalame mopoodoo doloso moloso.

<sup>9</sup> Esino i hedebe hagoso ibada wiligi taba Ma Godee mapoo goomoga poudiliso. Osoloso i hedebe hagoso see Godeeye yo egeesi masi moodoo odo susuga mapoo dala tenelame to takeliso.

<sup>10</sup> Esiga maga hedebe hamaga Godee mapoo goomoga poudilei sabolo, osoloso odo dala tenelai goo takeliso. Esiga tei telaga odo emegei, ima kulodu goo hageesi oso malai tekeponee.

<sup>11</sup> Esiga howo ou hedebe maga howo sokousoo sabolo howo kakada sabolo dilei tebile.

<sup>12</sup> Osoloso sibolo homo oso wewee koo peli. Osoloso kobolomee homo oso sibolo koo peli. Haye. Osoloso howo ou sokousoo maga howo kakada koo sibili.

### *ODOO AGAYO TEKEPO GWELI KA BADO-SOMO?*

<sup>13</sup> Esiga nima kulodu odo agayo tekepo badalai goolee sabolo ka badosomo? Yo tekepo badalame goo goolee omaga o suso tou too ee eligilei tekepo. Egeeseelone yo eyo nediliyo doko topalai goo goolee sabolo na badebee.

<sup>14</sup> Esino niba mada nibada sooloo ma kulodu emegei hegili goo sabolo osoloso hedebe niso nediliyo gweli goo sabolo mologa, niba tekepo goo gweli odo dee na takee. Bei, niyo egeesee egee takoo niba tei goo koo takooso.

<sup>15</sup> Niba mada goo tokenee hageesi goolee sabolo badolone, niso nediliyo niba tekepo dee takooga, goo goolee egee Godee maga koo sibili. Esino goo goolee egee mi

goo oso goo goolee sabolo osoloso Saitenso goo goolee maga ka siboso.

<sup>16</sup> Osoloso mi kamapoo emegei hegili goo sabolo osoloso hedebe eyo nediliyo gweli goo sabolo mologa, mi omapoo abo puloso molone tokenee goo susuga oso kauwuleiso.

<sup>17</sup> Esino tekepo badalai goo Godee maga egee sibo goo oso imapoo eligiso. Malalo goo toowa ee tokenee mauwe goo oso, osoloso mesie goo, osoloso emegei gweli goo, osoloso emegei dimapoo mesili goo, osoloso sooloo deli goo, osoloso emegei pidili goo, osoloso odo abo pilega tokenee odo sabolo tekepo odo sabolo hodobo dabalai goo, osoloso tei takeli goo.

<sup>18</sup> Esiga edebeeyo odo abo sabolo mesie badolone emegei odo sabolo mesie badalai goo eligiga, odo egee bia dima kulodu tekepo goo oso malaiso.

## 4

### *Godee mapoo hegi sibadee*

<sup>1</sup> Esiga ogo goo oso biligeli goo sabolo toso agadigeli goo sabolo nimapoo ka tosibiliyo? Nibada goo goolee ma kulodu tokenee goo talame goomoga goo egee molo oso tosibiliso. Bei, nibada goo goolee ma kulodu tokenee goo talame goomoga goo oso tekepo gweli goo sabolo biligamoloso.

<sup>2</sup> Niba bi goomegeliso, esino niba bi ee koo teli. Esiga nimapoo emegei hegili goo oso molone, emegei wooloomaliso. Esino goo hagoso niyo goomoga goo sabolo koo tebili. Esiga niba toso agadigilone biliso. Esino goo hagoso niyo goomoga goo sabolo koo tebili. Bei niso Godee mapoo koo woosali.

<sup>3</sup> Osoloso niyo Godee mapoo woosaga, nei tenelega pegeli goo ee bei hagoso. Niyo tokenee gweli goo sabolo woosaloso see bi ogoso niso goomoga goo talai daga ka seli.



<sup>4</sup> Goo goolee bakadio gweli odo niba medee Godee sabolo hedebe doloso koo debeli! Esiga niba goolee, mi goo mapoo goomegeli oso Godee mapoo ha toso. Esiga edebeeyo mi goo sabolo hedebe doloso siloga, yo Godee sabolo ha tomoloso.

<sup>5</sup> Esiga niba Godeeyo to booka mapoo hogugu hagee goo mauwe gooleesomo? Bei, Godeeyo toso egeesee takooso, “Godeeye imapoo Dio Tei tenee oso iyo hedebe Godee goolee sabolo silesibilame diya goomogoso,” diso.

<sup>6</sup> Esino Godeeye iba sooloo dolone medee pidiliso, iyo silesibilone hedebe yo goolee sabolo silesibilame. Esiga Godeeyo to booka mapoo hogugu oso egeesee takooso,

“Godeeye odo eyo nediliyo dokodoo topeli odo susuga goweliso.

Esino odo eyo nediliyo pepooko deli odo ee sooloo dolone medee pidiliso,” diso.

<sup>7</sup> Esiga niba Godeeyo mudugiyopoo niso nediliyo pepooko dee osoloso o to mapoo mesimo silesibe. Osoloso Saitenso tokenee mapoo gido dilame gamenee taka ee ma kulodu kibiloso dobolone o to mapoo gowee. Bei, niyo egeeseega Saiten yo nimaga peegoo pulo dileiso.

<sup>8</sup> Esiga niba Godee mapoo hegi sibadee. Egeeseega Godee yinosee nima hegi sibileiso. Esiga tokenee odo niba edebeeyo o dee subugo hapili egeesi masi nibada tokenee maga Godee mapoo bidiga debee. Osoloso goo goolee bakadio gweli odo nibada goo goolee tokenee peegoo poogoloso, hedebe Godeeyo goo ee goolee.

<sup>9</sup> Esiga niba goomoga goo poogoloso see nibada goo tokenee mapoo goohele sabolo pupusugulone debee.

<sup>10</sup> Osoloso Godeeyo mudugiyopoo niso nediliyo pepooko dee.

Egeeseega Godeeye niba dokodoo poudileiso.

*Nemegei tei too odoowo goo maga to tokenee na takee*

<sup>11</sup> Esiga tei telaga odo emegei, nima kulodu nee odoowo goo maga to tokenee na takee. Niyo nee odoowo goo maga to tokenee takolone yo tokenee to daga, Godeeye tei magolone emegei sooloo dele dee taka goo ee tokenee deeso. Egeeseega Godeeye tei magoo mapoo medee kibiya koo deedeeso. Osoloso niso nediliyo tei magoo maga goo midili wiligi tebisa deeso.

<sup>12</sup> Esino iyo goo omapoo ogoso. Hedebe Godeeye tei mageli odo doloso badolone goo midili odo doloso ka badoso. Godee hedebe yayo gie badeli pidili doloso badolone odo susuga mapoo dibada tokenee eyo nei teneli doloso ka badoso. Esiga nayo nee odoowo goo ogoloso, no tokenee odo dee takalai tekeponee.

*Godigi gooso peledabalai, iba gooleedele*

<sup>13</sup> Esiga odo aboso egeesee take-liso, “Iba godigi mi abo mapoo dileso sitowa moso togoloso dobolone dugo hedebe ma kulodu molee toowa talaiso,” deliso. Esiga to egeesee takeli odo niba to hagee medee dui.

<sup>14</sup> Bei, niba godigi gooso peledabalai gooleedele. Nibada gie badeli ee dei i masi moloso. Bei, dei i moloso see saga guododili egeesee masi moloso.

<sup>15</sup> Esino niba wulo to hageesee takalai tekepo, “Godeeye goomogoga, iba dobolone goo hagee tolone dabalaiso,” dalaiso.

<sup>16</sup> Esino niba niso nediliyo dokodoo topolone niso talai goo ee takolone doso. Esiga eyo nediliyo dokodoo topeli ee goo tokenee.

<sup>17</sup> Esiga edebeeyo tekepo goo talai ee o goo goolee mapoo meleeno, goo

ee telega poogooga, yo goo tokenee toso.

## 5

*Bi bei odoo oso bi mauwe odoo mapoo dala egee tenemolo eyo nei Godeeye tenelaiso*

<sup>1</sup> Bi bei odoo niba mo to dui! Niba goohele sabolo pupusugulone debee. Bei, nimapoo dala goo siboso.

<sup>2</sup> Esiga nibada bi susuga ee toke-nee palaiso. Osoloso nibada kali bi babooso nalaiso.

<sup>3</sup> Nibada molee mosopoo mooloo-goo magoo egee eyo mosoowe to-kenee palaiso. Nibada molee to-kenee pa oso, nibada tokenee goo ee ka eligiso. Esiga goo midilei bi-ame omapoo nibada molee tokenee pa oso, niba dou masi nadalaiso. Esiga niba boobadaga odoo. Bei, niba kasalame biame hamameedee ee bolone, bi bei mooloogoo maloso ka debeiyo?

<sup>4</sup> Esiga niba ege, niyo nibada tou teli odoo oso, nibada nei howo segei mapoo tou telagamo silesibume nei tenele. Esiga diayo nimapoo gowoolone, Godee mapoo pidilei goo maga pupusugulone doso. Esiga ibada Godee kitulugu toowa yayo diayo pupusiga melee goo ee olo duso.

<sup>5</sup> Egeesi ma kulodu niyo mi toowa hamapoo dobolone, bi bei doloso, niso goomoga goo ee tolone de-beiso. Esiga niba be hu poopooloso kauwuga wooloomaloso nali niba be egeesi masi doso. Bei, niba niso goomoga goo sabolo niso nediliyo poopooloso kauwuga, goo midilei biame omapoo, be masi piligilame doso.

<sup>6</sup> Osoloso niyo tekepo odoo susuga ee goo midili mapoo iyado peleso dibada goo midiloso diba piligi deliso. Esino odoo hagee bia oso nimapoo goo koo moodeli.

*Dala ma kulodu dulone bolone medee kibiya debee*

<sup>7</sup> Esiga tei telaga odoo emegei, niba Lodeeye sibilei mapoo dulone bolone ka debee. Goo ee egeesi masi moloso, edebeeyo nei howo sogoloso howo sibabeleso baliso. Howo simi oso o nei howo segei pologa kakauwuloso ko pa oso telegabeleso baliso.

<sup>8</sup> Esiga nei howo segeli odoo oso o nei howo oso kakauwulame bali egeesi masi niba dulone bolone medee kibiya ka debee. Bei, Lodeeye sibilei olo koola toobooso.

<sup>9</sup> Esiga tei telaga odoo emegei, nee odoo mapoo takolone, “nibada to-kenee oso ka see,” dee na goolee. Bei, niyo egeeseelone doge, Godeeye nibada goo midiloso tokenee eyo nei tenelaiso. Esiga niba ege, goo midili odoo ee osulu miyopoo olo tobudoso.

<sup>10</sup> Esiga tei telaga odoo emegei, niba Godee maga to toloso kokodo takomo sili odoo oso debei ogoloso, niba nosee egeesi masi debee. Bei, diayo Godeeyo hu maga to takomo silesibulone dala ma kulodu mesie sabolo debeliso.

<sup>11</sup> Esiga edebeeyo dala ma kulodu kibiya badoga, Godeeye yimapoo goomogolone badoso. Esiga niba Yobowo goo olo gooleedooso. Yo dala ma kulodu mesie goo sabolo medee kibiya badebeiso. Esemee Godeeye yimapoo goomogolone, yimapoo goo moodoo olo duso. Bei, Godeeye odoo susuga sooloo dolone ka badoso.

<sup>12</sup> Tei telaga odoo emegei, goo toowa hagono medee dui! Niba tei goo takalame, Kei mi sabolo, osoloso mipoo toowa sabolo, osoloso bi abo sabolo hesigaloso tei na magee. Esiga odoo heeso nimapoo sibilesou hagee teye dee takooga, niyo goo egee talai goomogoga, yimapoo hedebe niyo goomoga goo ee takee. Osoloso niba goo egee talai gowooga, niyo hedebe gowe goo ee takee. Bei, niyo egeese selega tei magooga, Godeeye nibada goo midiloso niba tokenee odoo dalaiso.

*Godee mapoo takeli goo ee  
kitulugu moloso*

<sup>13</sup> Esiga niyo debei ma kulodu, ede-beeyo hegi goo mologa, yayo Godee mapoo takalai tekepo. Osoloso ede-beeyo goomoga goo sabolo badoga, yayo goomoga kosaiya sabolo Godeeyo hu dokodoo poudoolone badalai tekepo.

<sup>14</sup> Osoloso nima kulodu edebeeyo paiye sabolo badoga, yayo sosee wiligi tebisa gilimadalai tekepo, diayo yimapoo sibileso, Lodeeyo hu sabolo olipi iso sooloso, yo halo Godee mapoo takalame.

<sup>15</sup> Osoloso diayo tei toloso Godee mapoo takooga, paiye weidileiso. Bei, Lodeeye diayo Godee mapoo taka to ee duga, paiye ka weidoso. Egeesi ma kulodu, odoo yimapoo goo tokenee hee too mologa, omapoo Lodeeye hapoloso boobado bigileiso.

<sup>16</sup> Esiga niso nima kulodu, nibada goo tokenee ee yiligebuguloso howo gise goo oso nei takoo, nei takoo dolone ka debee, Godeeye nima kulodu paigiga odoo egee do tekepo moodoolame. Bei, Godeeyo howo woola mapoo tekepo badeli odoo oso Godee mapoo takeli goo ee diya kitulugu moloso.

<sup>17</sup> Esiga ibada amawe Ilaya yo iba egeesi masi badebeiso. Yayo howo sibilega pagalame dokodoo kibiya takeme, howo sibilega dugo bakadio hedebe di poogoloso a 6 poogooso.

<sup>18</sup> Osoloso yayo see howo sibilame, dokodoo kibiya takeme, howo see simiso. Esem nali bi segei see paladeeso.

<sup>19-20</sup> Esiga tei telaga odoo emegei, nima kulodu odoo hee oso tei goodee maga peegoo duga, odoo heeso yo see ido sibilei tekepo. Bei, niba goolee, edebeeyo emegei tokenee goo maga goo tekepo mapoo ido siboga, yo odoo egee kookaiyo moloso osee meli teli mapoo duga, o gie badeli pidilone ka seeso. Egeeseega

biame omapoo Godeeye o goo toke-nee hapoloso boobado bigileiso.

## 1 Yonee To Yoneeye hogugu

### *1 Yonee booka goo eyo bei*

Gamenee goo eligili odoo oso sosee susuga mapoo eligimo silesibulone, Yesuye odoo su toloso mi hamapoo sile dee takomo silesibiliso. Osoloso diayo eligi eyo kulodu goo tokenee talai goo ee haga goo toowanee, dee takomo silesibiliso. Osoloso emegei pidilei sabolo haga goo toowanee deliso. Diayo eligi goo hageesi eligimo silesibume, Yesu o hamamee dili odoo hee, Yonee olo adaga poloso badolone, goo hagee ogoloso to hogugu hagee sosee susuga mapoo teneeso. Bei, Yonee goomegele tei telaga odoo sosee susuga mapoo egee do oso see gamenee goo eligili odoo oso eligi mapoo hamamee deedeeyaga. Esino diayo daga Kelisowo goo du ee medee kibiya toloso dabalame, yo goomogaso.

### *Yesu yo gie badeli teneli to oso*

<sup>1</sup> Iyo nimapoo gie badeli teneli to eyo goo hoguga. Goo ee daga bei mooloogoo mapoo yo badebeiso. Iyo o goo duloso ibada howoso yo tei egeiso. Osoloso ibada deeso yo sigeso.

<sup>2</sup> Gie badeli oso woola yiligebugume egeiso. Esiga iyo yo tei egeiso. Kookaiyo gie badeli yimapoo moloso, esiga iyo nimapoo woola ka taka. Yo daga Ma Godeebolo badebeiso. Osoloso yo imapoo yiligebuguso.

<sup>3</sup> Esiga iyo duloso egei goo ee nimapoo ka taka, niyo ibolo hedebe dalame. Osoloso iba Ma Godee sabolo owolo Yesu Keliso sabolo hedebe doloso doso.

<sup>4</sup> Esiga iyo goo hamaga nimapoo osoloso imapoo goomoga goo oso kauwuloso malame, to hagee hoguguloso ka teneeso.

### *Godee yo gadeebugu*

<sup>5</sup> Esiga iyo Keliso maga du goo ee see nimapoo hagee yiligebuguso. Goo ee, Godee yo gadeebugu. Yimapoo neliga hee mauwe.

<sup>6</sup> Egeesi ma kulodu odoo susuga iyo takolone, iba Godee sabolo hedebe deliso doloso, see neliga ma kulodu silesiboga, iba wulo gamenee takooso. Esiga iba tei goo koo deedeeso.

<sup>7</sup> Esino Godeeye gadeebugu ma kulodu egee bado egeese badolone, iba see gadeebugu ma kulodu doga, oso tei telaga odoo iba susuga hedebe doloso dobolone ka salai. Egeeseega owolo Yesuwo sawo oso ibada tokenee susuga hapoloso tabigileiso.

<sup>8</sup> Egeesi ma kulodu iyo takolone, “Iba tokenee mauwe odoo,” dee takooga, iba iso nediliyo gamenee takooso. Esiga imapoo tei goo mauwe.

<sup>9</sup> Esino iyo ibada tokenee goo ee Godee mapoo yiligebuguga, yayo ibada tokenee goo ee hapoloso boobado bigileiso, osoloso goo tokenee susuga hapoloso iba Godeeyo howo woola see medee teedee moodoolaiso. Bei, yayo o to kitulugu magoo ee dodolone, hooda hedebe tei goo moodoolaiso.

<sup>10</sup> Osoloso iyo takolone, “Iba tokenee goo koo teli,” dee takooga, iyo Godee yo gamenee takeli odoo dolone ka salai. Egeesi maga Godeeyo to oso ibada sooloo ma kulodu koo moloso.

## 2

### *Keliso ee iba pidili*

<sup>1</sup> Mawe dio ayo gooma, niyo goo tokenee teyaga, hogugu hagee nimapoo ka tonowa. Esino nima kulodu odoo heeso tokenee toga, niba goolee. Odoo heeso ima hodiokooga toboloso iba halo Godee mapoo takoomoloso, odoo ee medee teedee odoo Yesu Kelisoso.



<sup>2</sup> Esiga Kelisoye ibada goo toke-nee maga taso. Egeesi maga goo tokenee susuga peegoo togobuguso, Godeeye imapoo nei tenelega pagalame. Esino hedebe ibada goo tokenee peegoo tabigilame tele. Haye, odoos susuga mipoo toowa mapoo debeli sabolo dibada tokenee peegoo tabigilame ka ta.

<sup>3</sup> Osoloso odoos susuga iyo Godeeye kokodo taka to mapoo mesimo silesiboga, iba yo gooleedoos doloso gooleedalaiso.

<sup>4</sup> Esino edebeeyo takolone, “Godee a gooleedoos,” dee takoloso, see yayo Godeeye kokodo taka to mapoo koo mesimo siloga, yayo wulo game-nee goo goolone ka seeso. Esiga odoos egeesi mapoo tei goo mauwe.

<sup>5</sup> Esino edebeeyo Godeeye kokodo taka to mapoo mesimo siloga, odoos egeesi masi oso o sooloo ma kulodu Godee gweli goo ee kauwuloso moloso. Osoloso iba goo egeesi maga iyo tei Godee sabolo hedebe di goo ee gooleedeliso.

<sup>6</sup> Goo ee edebeeyo takolone, “A Godee sabolo hedebe doloso badoso,” dee takooga, odoos yo Yesuye badebei egeesi masi badebee.

<sup>7</sup> Ayo gooma odoos, ayo nimapoo kokodo takeli to hoguguloso hagee tenee goo ee dianee. Esino niyo daga tei tolosoko kokodo taka to ee hagosoko. Bei, kokodo takeli to nape hagee niso daga hoogoo olo duso.

<sup>8</sup> Esino kokodo takeli to nape hamapoo goo dia onosee moloso. Bei, goo dia tei ee Keliso ma kulodu osoloso nima kulodu eligiso. Goo egeesi maga neliga mauwe poogoomo dime, gadeebugu moloso.

<sup>9</sup> Odoos agayo takolone, a gadeebugu mapoo badoso doloso, tei too odoos hee gowooga, odoos ee neliga ma kulodu osee badoso.

<sup>10</sup> Esino odoos agayo emegei tei telaga odoos sooloo dologa, yo gadeebugu ma kulodu badoso. Esiga gadeebugu ee ma kulodu badolone,

tei too odoos hee tokenee mapoo homobilame moodoolaimo.

<sup>11</sup> Esiga ee ma kulodu odoos agayo tei too odoos gowoolone badoga, yo neliga ma kulodu badoso. Yo neliga ma kulodu badolone, eyo egee du eli koo ogoso. Bei, neliga goo oso o howo gooloogooga.

<sup>12</sup> Esiga mawe dio ayo gooma, ayo to hogugu hagee nimapoo ka tonowa.

Bei, nibada goo tokenee Yesu maga hapoloso boobado buguso.

<sup>13</sup> Osoloso adaga nimapoo to hogugu hagee ka tonowa.

Bei, niyo daga bei mooloogoo maga badebei odoos Yesu ee niba gooleedoos.

Osoloso see gie kakauwuga nimapoo to hogugu hagee ka tonowa.

Bei, niyo tokenee odoos Saiten sabolo ha too ee ma kulodu niyo olo dagadiso.

Osoloso mawe dio ayo see to hogugu hagee ka tonowa.

Bei, ibada ama Godee niba olo gooleedoos.

<sup>14</sup> Osoloso adaga nimapoo to hogugu hagee see ka tonowa.

Bei, niyo daga bei mooloogoo maga badebei odoos Yesu ee niba gooleedoos.

Osoloso gie kakauwuga nimapoo to hogugu hagee ka tonowa.

Bei, niba kitulugu odoos oso.

Osoloso Godeeyo to oso nima kulodu mologa, niyo tokenee odoos Saiten ee olo dagadilesodo.

### *Mi toowa hageeyo goo mapoo goomegeli goo*

<sup>15</sup> Esiga niba mi toowa hageeyo goo sabolo osoloso ee ma kulodu bi susuga egee molo mapoo haga na goomege. Edebeeyo mi toowa hageeyo goo mapoo diya goomogoga, o sooloo ma kulodu Ma Godee goolee goo ee mauwe.

2:5: Yon 14:21, 23

2:7: Yon 13:34; 2Yon 1:5-6

2:8: Loum 13:12; Yon 1:9

2:9: 1Yon 4:20

2:10: Loum 14:13

2:11: Yon 12:35

2:15: Loum 8:7

<sup>16</sup> Esiga mi toowa hageeyo goo diya goomoga maga goo hagee peledabalaiso. Suso goomoga goo sabolo, osoloso mi toowa hageeyo kulodu bi egee molo ogoloso goomegeli goo sabolo, osoloso bi bei doloso badolone, si howeli goo sabolo. Esino goo susuga hagee Ma Godee maga koo sibili, esino mi toowa hagee eyo goo oso.

<sup>17</sup> Mi toowa hagee sabolo osoloso edebeeyo goomegeli goo susuga sabolo mauwe pagalaiso. Esino Godeeye goomoga goo tomo sili odoo ee badoboso kookaiyo osee badalaiso.

### *Keliso mapoo ha teli odoo*

<sup>18</sup> Mawe dio, biame hoo pagalai koola toobooso. Esiga Keliso mapoo ha teli odoo oso sibilei goo ee nimapoo olo takaso. Esino Keliso mapoo ha teli odoo abo epedee olo peledabaso. Egeesi maga biame hoo pagalai koola tooboo doloso iba ka gooleedoso.

<sup>19</sup> Esino odoo hagee bia daga ibolo hodobo siloso see iba poogoloso diso. Bei, diba tei ibolo hedebe doloso debele. Diba tei ibolo hodobo debei diepi, iba poogoo dile pegeliyo. Esino diayo iba poogoloso di oso tei diayo ibolo hedebe delega poogoo goo ee ka yilige buguso.

<sup>20</sup> Esino nimapoo Kelisoye Dio Tei olo teneeso. Egeesi maga niba susuga tei goo ee olo gooleedooso.

<sup>21</sup> Esiga ayo nimapoo hoguguloso epedee hagee tenee goo ee niyo tei goo gooleedelega doga koo seeso. Esino tei goo ee niba olo gooleedooso. Bei, tei goo ee ma kulodu gamenee takeli goo mauwe.

<sup>22</sup> Osoloso gamenee takeli odoo ogumo? Edebeeyo Yesu yo Kelisonee dee takooga, odoo ee gamenee takeli odoo oso. Esiga yo Keliso mapoo ha teli odoo oso. Bei, odoo hagoso Yesu yo Kelisonee dee takooga, yo

Ma Godee sabolo osoloso owolo Yesu mapoo gowoolone miligi piaso.

<sup>23</sup> Esiga odoo agayo Godeeyo owolo Yesu mapoo gowoolone miligi piaga, yo Ma Godee sabolo hedebe doloso koo badoso. Esino edebeeyo Godeeyo owolo Yesuwo goo woola yilige buguga, yo Ma Godee sabolo hedebe doloso badoso.

<sup>24</sup> Esiga to tekepo daga niyo du mapoo tei toloso ka debee. To oso nibada sooloo ma kulodu mologa, Ma Godee sabolo osoloso owolo Yesu sabolo hedebe doloso dabalaiso.

<sup>25</sup> Esiga Kelisoye imapoo kookaiyo badoboso gie badeli tenelame to kitulugu magooso.

<sup>26</sup> Osoloso odoo aboso gamenee eligi goo eligimo silesiboga, ayo epedee o goo ee hoguguloso nimapoo ka tonowa.

<sup>27</sup> Esino nimapoo Kelisoye Dio Tei olo teneeso. Osoloso Dio Tei oso nibada kulodu badolone, niba ka eligimoloso. Esiga odoo heeso tei goo eligilei niba koo goomogoso. Bei, Dio Tei oso niba tei goo susuga olo eligimoloso. Esiga yayo eligi ee ma kulodu, tei goo ee eligilone, gamenee goo koo eligiso. Esiga niba Dio Tei oso eligi goo mapoo dodolone, Yesu sabolo hedebe doloso osee debee.

### *Godeeyo owolo dio*

<sup>28</sup> Esiga mawe dio ayo gooma, niba Keliso sabolo hedebe doloso osee debee. Egeesee seega yayo simi mapoo o mudugiyopaga kitulugu sabolo ebi-lega tebisileiso.

<sup>29</sup> Godee yo goo tekepo moodeli niba gooleedooso. Osoloso niba gooleedooso, goo tekepo tomo sili odoo ee Godeeyo owolo dio doloso doso.

## **3**

<sup>1</sup> Esiga ibada Ama Godeeye iba susuga diya sooloo dala goo toowa goo ee medee goolee! Yayo sooloo dala maga iba yayo owolo dio deliso. Esiga iba tei owolo dio doloso doso.

Esino mi toowa goomegeli odoo oso Godeeyo goo diba gooleedele. Goo egeesi maga diba ibada goo gooleedele.

<sup>2</sup> Esiga emegei, iba Godeeyo owolo dio doloso doso. Esino iba medee gooleedele, iyo hamamee dabalai goo ee. Esino iba gooleedooso, Keliso siboga, iba see yo masi palaiso. Bei, iyo tei yo agalaiso.

<sup>3</sup> Esiga edebeeyo goo hamapoo bolone dulone badoga, odoo oso tokenee mauwe Keliso masi badalai tekepo.

<sup>4</sup> Esiga edebeeyo goo tokenee tomo siloga, yayo Godeeyo tei magoo gabagamo siloso. Bei, tokenee goo ee tei magoo gababili.

<sup>5</sup> Niba olo gooleedooso, Kelisoye simi ee odoo susuga ibada tokenee hapoloso boobado bigilame ka simi. Bei, yimapoo tokenee hee mauwe.

<sup>6</sup> Edebeeyo Keliso sabolo hedebe doloso badoga, yo tokenee goo osee tomo sileime. Esino edebeeyo tokenee goo osee tomo siloga, Kelisowo goo yo gooleedele, osoloso yimapoo tei tele.

<sup>7</sup> Mawe dio ayo gooma, niba obeeyamo, odoo aboso eligi maga niba peegoo na gilimado di dee. Goo tekepo teli odoo ee Godeeyo howo woola tekepo badoso. Esiga yo Kelisoye Godeeyo howo woola tekepo egee bado yinosee egeesi badoso.

<sup>8</sup> Esino edebeeyo goo tokenee tomo siloga, yo Saiteneeyo odoo. Bei, Saiten yayo daga bei mooloogoolone tokenee odoo doloso badebei osee osee badoso. Esiga Godeeyo owoloye Saitenso tou teli ee guobigilame ka simi.

<sup>9</sup> Osoloso edebeeyo Godeeyo owolo doloso badoga, yo goo tokenee osee tomo sileime. Bei, Godeeyo tei gie badeli yima kulodu moloso. Esiga yayo see goo tokenee tomo silei tebile. Bei, yo Godeeyo owolo.

<sup>10</sup> Esiga goo hageesi maga iyo Godeeyo owolo dio sabolo osoloso Saiteneeyo owolo dio sabolo medee kibiya ka gooleedoso. Odoo agayo tekepo goo telega poogooga, yo Godeeyo owolonee. Osoloso tei too odoo sooloo delega poogooga, yo Godeeyo owolonee.

*Nei sooloo dolo, nei sooloo dolo dalai*

<sup>11</sup> Daga eligi goo niyo du hagosu. Esiga iyo nei sooloo dolo, nei sooloo dolo dolone dabalai tekepo.

<sup>12</sup> Esiga niba Keineeyo goo na peedee. Bei, yo Saiteneeyo odoo doloso badolone, omolo wooloomaso. Bei kasalame Keineeye omolo ka wooloomayo? Bei, Kein yo goo tokenee tomo sili, esino omoloye Godeeyo howo woola goo tekepo tomo sili.

<sup>13</sup> Esiga tei telaga odoo emegei, tei tele poogoo mi toowa mapoo debeli odoo oso niba hegioga, haga na goolee.

<sup>14</sup> Osoloso iba gooleedooso, iyo tei telaga odoo sooloo dologa, iba teli maga see gie badeli mapoo dabagaso. Esino odoo agayo yimapoo sooloo dala goo mauwe daga, yo ta masi osee badoso.

<sup>15</sup> Osoloso odoo agayo tei telaga odoo hegioga, yo odoo wooloomali odoo oso. Esiga niba olo gooleedooso, odoo wooloomali odoo ee dibada kulodu kookaiyo badoboso gie badeli mauwe.

<sup>16</sup> Goo hamaga tei sooloo deli goo ee ka gooleedoso. Yesu Kelisoye iba halo o su teli mapoo magooso. Esiga iba nose tei too odoo ee halo, ibada gie badeli peegoo magalai tekepo.

<sup>17</sup> Odoo yimapoo bi teiba oso tei too odoo bi mauwe badoga ogoloso, yo pidilega poogooga, o sooloo ma kulodu Godee goolee goo mauwe.

<sup>18</sup> Mawe dio emegei, iyo emegei sooloo dolo doloso wulo toso takalai

tekeponee. Esino suso pidilone tei sooloo dalai tekepo.

*Godeeyo howo woola ebilega kitulugu sabolo dabalai*

<sup>19-20</sup> Esiga iyo emegei sooloo dologa, egeesi maga iyo tei Godeeyo owolo doloso do goo ee gooleedalaiso. Esino ibada sooloo maga goolee oso takolone iba tokenee odoo, dee takooga, iba ebileime. Esino iba Godeeyo howo woola ebilega kitulugu sabolo dabalaiso. Bei, Godee yo toowa osoloso yayo ibada sooloo oso goolee dagadiso, osoloso goo susuga iyo moodeli yo gooleedoo.

<sup>21</sup> Esiga tei telaga odoo emegei, ibada sooloo maga goolee goo oso takolone, iba tokenee odoo, dee koo takooga, iba ebilega poogoloso Godeeyo howo woola dabalaiso.

<sup>22</sup> Egeesi ma kulodu iyo yimapoo woosaga, yayo goo ee imapoo tenelaiso. Bei, iyo yayo kokodo taka to mapoo mesiliso, osoloso yayo goomoga goo ee tomoloso.

<sup>23</sup> Esiga yayo kokodo takolone egeesee takaso, “Niba Godeeyo owolo Yesu Keliso mapoo tei te. Osoloso yayo eligi ee dodolone, emegei nei sooloo dolo, nei sooloo dolo dolone debee,” diso.

<sup>24</sup> Edebeeyo Godeeye kokodo taka to mapoo mesilone dodomo siloga, diba yibolo hedebe doloso badoso. Osoloso nei Godee dibolo hedebe doloso ka badoso. Osoloso iba gooleedooso, Godee ibolo hedebe doloso badoso. Bei, yayo o Dio Tei imapoo teneloso badoso.

## 4

*Eligi goo susuga medee ege*

<sup>1</sup> Tei telaga odoo emegei, niba obeeyamo. Bei, gamenee goo eligili odoo bei mipoo toowa hamapoo olo silesiboso. Esiga odoo heeso sibileso takolone, “Ayo eligi goo hagee eligimo silo Dio Tei maga

siboso,” dee takooga, o to duloso yimapoo saga tei na te. Esino niyo yayo egee eligimo silo tei Godee maga sibabeleso, medee hoodo ege.

<sup>2</sup> Esino niba diayo eligi eyo kulodu Godeeyo Dio Tei hageesee gooleedalaiso. Diayo eligi oso takolone Yesu Godee maga sibileso odoo polososo mi hamapoo badebeiso daga, oso diayo eligi goo ee tei Godee maga siboso.

<sup>3</sup> Esino odoo agayo takolone Yesu Godee maga sibileso odoo ka pele, dee takooga, yayo eligi goo ee Godee maga sibile. Odoo ee ma kulodu Keliso mapoo ha teli dio tokenee badoso. Esiga Keliso mapoo ha teli dio tokenee mipoo toowa hamapoo sibileisogo dee takeme dumelee ee olo sibileso badoso.

<sup>4</sup> Mawe dio emegei, niba Godeeyo owolo dio doloso doso. Esiga niyo gamenee goo eligili odoo oso eligi duloso o to mapoo tei tele poogoo oso, niyo diba dagadiso. Bei, odoo susuga ibada kulodu Dio Tei egee bado oso kitulugu oso tei tele poogoo mi toowa mapoo debeli odoo dima kulodu dio egee bado oso kitulugu ee dagadiso.

<sup>5</sup> Gamenee goo eligili odoo hagee bia Godee gooleedele. Esiga biame susuga silesibulone mi goo ee eligimo silesibili. Osoloso mi odoo Godee gooleedele poogoo oso dibada to mapoo medee duliso.

<sup>6</sup> Esino iba Godeeyo odoo doloso doso. Esiga tei Godeeyo odoo oso ibada to medee duliso. Esino Godeeyo owolonee oso ibada to ee medee koo duli. Goo egeesi maga Dio Tei sabolo gamenee takeli dio sabolo medee hoodo agalaiso.

*Godeeye sooloo deli*

<sup>7</sup> Tei telaga odoo emegei, iyo emegei nei sooloo dolo, nei sooloo dolo dolone dabalai tekepo. Bei, sooloo deli goo ee Godee maga sibile. Esiga odoo agayo emegei sooloo



dologa, yo Godeeyo owoloso, osoloso yo Godee gooleedooso.

<sup>8</sup> Esino odoo agayo emegei sooloo delega poogooga, yo Godee gooleedele. Bei, Godee yo sooloo deli.

<sup>9</sup> Esiga Godeeye iba sooloo dala goo ee yebugulone owolo hedebe mipoo toowa hamapoo meiyee diso, iyo yimaga kookaiyo badoboso gie badeli talame.

<sup>10</sup> Esiga tei sooloo deli goo hagoso. Iyo Godee sooloo deli goo osonee. Esino Godeeye iba sooloo dolone owolo meiyee diso, ibada goo tokenee maga talame, osoloso goo tokenee susuga peegoo togobigilame.

<sup>11</sup> Tei telaga odoo emegei, Godeeye iba diya egeesee sooloo dalaso. Esiga iyo emegei nei sooloo dolo, nei sooloo dolo dolone dabalai tekepo.

<sup>12</sup> Edebeeyo Godee egele. Esino iyo emegei nei sooloo dolo, nei sooloo dolo dolone doga, Godee ibolo hedebe doloso badoso. Osoloso yayo sooloo dala oso ibada kulodu kauwuloso malaiso.

<sup>13</sup> Esiga Godeeye o Dio Tei imapoo teneeso. Egeesi maga iba gooleedooso, iba Godee sabolo hedebe doloso badoso, osoloso Godee ibolo hedebe doloso ka badoso.

<sup>14</sup> Osoloso Ma Godeeye owolo mipoo toowa hamapoo meiyee diso, yayo mi odoo oso gie badeli ee pidilone badalame. Osoloso iyo goo hagee ogoloso ka takomo silesiboso.

<sup>15</sup> Esiga odoo agayo takolone, Yesu Godeeyo owolo dee takooga, Godee yibolo hedebe doloso badoso, osoloso yinosee Godee sabolo hedebe doloso badoso.

<sup>16</sup> Godeeye iba diya toowa sooloo dala goo ee olo gooleedooso. Esiga iyo Godeeye iba sooloo dala goo mapoo tei toloso kibiya ka doso.

Godee yo sooloo deli. Esiga odoo agayo sooloo dolone badoga, yo Godee sabolo hedebe doloso badoso, osoloso nei Godee yibolo hedebe doloso badoso.

<sup>17</sup> Iba goo midilei biame mapoo ebilega kitulugu sabolo dabalame, Godeeye sooloo deli goo ee toowa poloso imapoo teneeso. Bei, iba Keliso masi mi hamapoo ka doso.

<sup>18</sup> Edebeeyo Godeeye yo sooloo deli goo ee gooleedoo daga, yo ebileime. Esiga sooloo deli goo toowa poloso egee molo oso ebili goo habigileiso. Esino iba Godeeye ibada tokenee eyo nei tenelai mapoo obuga, yayo sooloo dala goo ee imapoo kauwule.

<sup>19</sup> Iba susuga dobolone sooloo deliso. Bei, Godeeye daga malalo iba sooloo dalaga.

<sup>20</sup> Osoloso odoo heeso takolone, "A Godee diya gweliso," doloso see tei too odoo heiga sabolo badoga, yo gamenee takeli odoo oso. Bei, odoo egeesi masi oso tei too odoo yayo egeli sooloo delega badoga, yo Godee koo egeli kasee goolaiyo?

<sup>21</sup> Kokodo takeli to hagee Godeeye imapoo olo teneeso. Odoo agayo Godee diya gooleega, emegei tei too odoo sabolo diya sooloo dalai tekepo.

## 5

### *Godeeyo owolo mapoo tei talai goo*

<sup>1</sup> Esiga edebeeyo tei tolone Yesu Godeeye hesia Keliso daga, yo Godeeyo owolo oso. Osoloso odoo agayo Ma Godee gooleega, yo Godeeyo owolo dio sooloo doloso.

<sup>2</sup> Iyo Godee diya goolone, yayo kokodo taka to mapoo mesiloso silesiboga, oso iyo Godeeyo owolo dio sooloo dala goo ee gooleedooso.

<sup>3</sup> Bei, iyo Godee gweli goo eyo bei hagoso. Iyo yayo kokodo taka to mapoo mesiloso silesibileiso. Osoloso yayo kokodo taka to ee imapoo haga kodianee.

<sup>4</sup> Esiga Godeeyo owolo dio oso diayo tei too maga mi goo oso kitulugu ee dagadilesos doso.

<sup>5</sup> Esiga odoo agayo mi goo sabolo ha too kitulugu ee ka dagadiyo? Edebeeyo Yesu Godeeyo owolo dolone tei toga odoo oso, mi goo sabolo ha too kitulugu ee dagadilesa badoso.

*Kookaiyo gie badeli Yesu mapoo moloso*

<sup>6</sup> Osoloso Yesu mi hamapoo sibilesa, Godeeyo owologo dalame howo oluguso. Osoloso homo bulubo magoo mapoo tolone o sawo sologo buguso. Esiga Yesuye mi hamapoo simi ee hedebe howo olugulame sibile. Esino howo oluguloso sawo sologobigilame ka simi. Osoloso Dio Tei oso tei goo hagee imapoo takooso. Bei, Dio Tei oso hedebe tei goo ee takemeliso.

<sup>7</sup> Esiga goo bakadio hedebe di hagoso Kelisowo goo ka eligiso.

<sup>8</sup> Goo ee Dio Tei, osoloso howo olugu, osoloso sawo sologo bugu goo oso imapoo Kelisowo goo ka yilige buguso. Ee ma kulodu goo bakadio hedebe di oso goo hedebe eligiso.

<sup>9</sup> Esiga edebeeyo egei goo ee imapoo yilige buguga duloso, iba tei teliso. Esino ee ma kulodu Godeeye imapoo egee takoo goo diya toowa. Esiga iyo duloso medee kibiya kookoodalai tekepo. Bei, yayo imapoo owolowo goo ee tei goo takaso.

<sup>10</sup> Esiga odoo agayo Godeeyo owolo mapoo tei toga, Godeeye owolowo goo maga tei goo taka to mapoo o sooloo ma kulodu tei too osee moloso. Esino odoo agayo Godeeye owolowo goo mapoo tei goo taka to mapoo tei telega poogoo odoo oso Godee gamenee takeli odoo, deliso.

<sup>11</sup> Esiga Godeeye imapoo owolowo goo mapoo tei taka to hagoso. Godeeye imapoo badoboso kookaiyo gie badeli teneeso. Gie badeli egee owolo Yesu maga imapoo ka teneli.

<sup>12</sup> Osoloso edebeeyo owolo Yesu mapoo tei toga, yimapoo gie badeli

egee olo moloso. Esino odoo agayo Godeeyo owolo mapoo tei telega poogoo, yimapoo gie badeli egee mauwe.

*Yoneeye to hamameedee taka*

<sup>13</sup> Esiga ayo Godeeyo owolo mapoo tei telaga odoo nimapoo to hogugu susuga hagee ka tonowa, niyo badoboso kookaiyo gie badeli too goo ee gooleedalame.

<sup>14</sup> Esiga iba gooleedooso, iyo Godee yimapoo takolone iyo goomoga goo ee yayo goomoga goo sabolo tobuloso woosaga, yayo ibada to duleiso.

<sup>15</sup> Egeesi ma kulodu yayo iyo yimapoo taka duso doloso, ogoo goo yimapoo woosaga, yayo goo ee imapoo teneliso.

<sup>16</sup> Esiga edebeeyo emegei tei too odoo oso telega pagalai tokenee tomolo ogoga, yayo Godee mapoo takalai tekepo, Godeeye o gie badeli pidilame. Esiga ayo hagee takoo goo ee, odoo teli mapoo koo ido dili goo ee taka. Esino teli mapoo ido dili goo tokenee moloso. Esiga ayo hagee takoo goo ee, teli mapoo ido dili goo tokenee teli odoo ee halo Godee mapoo takalame ayo koo takooso.

<sup>17</sup> Tekepo goonee susuga egee, tokenee goo oso. Esino tokenee susuga oso teli mapoo koo ido dili.

<sup>18</sup> Esiga iba gooleedooso, edebeeyo Godeeyo owolo doloso badoga, yo goo tokenee osee tomo sileime. Bei, Godeeyo owolo Yesu yayo yo medee bamoloso. Osoloso tokenee odoo Saitenso yo tokenee palaime.

<sup>19</sup> Esiga iba gooleedooso, iba Godeeyo owolo dio. Esino imaga mi toowa ma peegoo egee do Saitenso bamoloso.

<sup>20</sup> Osoloso see iba gooleedooso, Godeeyo owolo olo simiso. Osoloso yayo imapoo goo gweli medee tekepo olo teneeso, iyo tei Godee gooleedalame. Esiga iyo tei Godee sabolo, osoloso owolo Keliso sabolo hedebe doloso doso. Esiga Yesu tei

Godeeso. Osoloso kookaiyo bado-  
boso gie badeli yimaga imapoo ka  
teneli.

<sup>21</sup> Esiga mawe dio emegei, niba  
medee badolone gamenee godee  
maga peegoo dooboobigi.

## 2 Yonee Yoneeye to see tobu hogugu

*2 Yonee booka goo eyo bei*

Daga Godeeyo to eligimo silone, odoo eligimo silesibili oso mi hee maga hee mapoo du. Osoloso mi hee maga hee mapoo du domo silesibulone, Godeeyo to takomo silesibiso. Osoloso mi ee ma kulodu tei telaga odoo oso diba medee pidiso. Esino Godeeyo to takomo silesibili odoo mooloogoodoo ee ma kulodu gameenee goo eligili dibada mooloogoodoo onosee silesibiso. Esem diye di odoo Yoneeye goo hagee ogoloso tei telaga odoo oso gamenee goo eligili odoo pidiyaga to hagee ka hogugu.

<sup>1-2</sup> Esiga tei telaga odoo nibada amawe ayo Godeeye hesia wee osoloso owolo dio mapoo to hogugu hagee ka teneeso. Ayo niba diya gooleeso. Hebebe ayo niba diya koo gooleeso. Esino tei goo gooleedoo odoo susuga sabolo niba diya goolone doso. Bei, tei goo ee ibada sooloo ma kulodu egee molo oso imapoo kookaiyo moloso osee malaiso.

<sup>3</sup> Ayo Godee mapoo takooso, Ma Godeeye owolo Yesu Keliso sabolo oso odoo susuga iba sooloo dolone pidilame, osoloso imapoo mesie goo tenelame. Bei, iyo tei goo mapoo tei toloso emegei sooloo dala sabolo doso.

<sup>4</sup> Esiga nee holaiso aboso Ma Godeeye kokodo taka to mapoo tei toloso dodomo di duloso a diya goomogaso.

<sup>5</sup> Osoloso wee emegei, to hogugu hagee namapoo dianee. Esino iyo daga du sooloo deli goo ee see ka hoguga. Esiga iyo dobolone emegei nei sooloo dolo, nei sooloo dolo dolone dabalai tekepo.

<sup>6</sup> Esiga sooloo deli goo eyo bei hagoso. Iyo Godeeye kokodo taka to

ee medee dadalai tekepo. Bei, niyo Godee diya goolee sabolo dobolone emegei nei sooloo dolo, nei sooloo dolo dolone dabalai tekepo. Esiga niba daga hoogoo goo hagee olo duso.

<sup>7</sup> Esiga gamenee goo eligili odoo bei oso mipoo toowa hamapoo silesiboso. Odoo egee bia oso silesibulone, Yesu Kelisoye tei odoo poloso mi hamapoo silee goo ee koo eligili. Osoloso odoo agayo goo hageesee eligimo siloga, yo gamenee goo eligili odoo oso, osoloso yo Keliso mapoo ha teli odoo oso.

<sup>8</sup> Esiga niba medee debee, gameenee goo eligili eyo to mapoo tei tolone, Godee maga nei telega peegeeyaga. Esiga niyo tou toowa too eyo nei talame, medee kibiloso ka debee.

<sup>9</sup> Osoloso edebeeyo Kelisoye eligi kibiya kookodelega poogoloso, see eligi hee mapoo yayo diya kookoodoga, yo Godee sabolo hedebe doloso koo badoso. Esino odoo agayo Kelisoye eligi kibiya kookoodoga, yo Ma Godee sabolo osoloso owolo Keliso sabolo hedebe doloso badoso.

<sup>10</sup> Esiga odoo agayo Kelisoye eligi goo ee eligimo sibilega, see eligi hee eligimo siboga, emegei doloso nibada mosopoo na ido di.

<sup>11</sup> Bei, odoo agayo odoo hageesi masi sabolo emegei daga, yayo o tou tokenee too sabolo hedebe deeso.

<sup>12</sup> Ayo nimapoo takalai goo abo moloso. Esino wulo to hogugu oso nimapoo takalai a koo goomogo. A mawo nimapoo sibilesi nibolo hodobo to kalai ee a goomogoso. Osoloso ayo omapoo siboga, iyo hodobo goomoga poudileiso.

<sup>13</sup> Esiga Godeeye hesia noomoo eyo holaiso diayo emegei di to namapoo ka taka.



## 3 Yonee Yoneeye to see bakadio hedebe di hogugu

### *3 Yonee booka goo eyo bei*

Yoneeye to hogugu hagee tei too odoo Gaiyus mapoo teneeso. Bei, Gaiyuseeye Godeeyo to eligimo silesibili odoo oso o mi mapoo sibume, yayo pidi goo ee dume. Osoloso sosee wiligi odoo taba Diotelepese mapoo yayo gowe to hamapoo hoguguso. Bei, odoo hagoso Godeeyo to eligimo silesibili odoo pidilei gowoolone odoo aboso diba pidiyaga hamaga takeliso.

<sup>1</sup> Ayo gooma odoo Gaiyus, tei telaga odoowo namawe ayo no diya gweli namapoo to hogugu hagee ka tonowa.

<sup>2</sup> Ayo gooma odoo, a tei toso, no pailega medee tekepo bado malaiso. Esino ayo no halo Godee mapoo takooso, nayo goo susuga ee ma kulodu medee tekepo badalame. Esino a gooleedooso, no tei too ee ma kulodu tekepo badoso.

<sup>3</sup> Osoloso tei telaga odoo emegei aboso sibilesi, nayo tei goo mapoo kibiya kookoodoloso osee dodomolo goo ee takeme duloso, a diya goomogaso.

<sup>4</sup> Esiga goo abo toowa oso amapoo goomoga toowa koo teneli. Esino mo awe diayo tei goo ee deedeega ogoloso, a diya goomegeliso.

<sup>5</sup> Ayo gooma odoo, nayo to tekepo eligimo silesibili odoo oso eligimo silone, nee mi mapoo odoo soo masi siboga, nayo egee pidi goo ee tekepo.

<sup>6</sup> Osoloso diayo sibilesi nayo sooloo dala goo sabolo bado goo ee ibada sosee hamapoo sibilesi takaso. Godeeyo to eligimo silesibili oso nee mi mapoo sibilesi see dilame doboome, diayo eli domopoo nalai nei dimapoo tenelone, Godeeye goomoga goo sabolo tobuloso tenee.

<sup>7</sup> Bei, diba Keliso halo, tou tomo silesibulone, tei tele poogoo odoo maga bi koo teli.

<sup>8</sup> Esiga Gaiyus no asalo diba medee pidilei tekepo. Iyo odoo hagee bia pidiga, diayo to tekepo eligimo silesibili sabolo hedebe doloso dabalaiso.

<sup>9</sup> Osoloso ayo goo hamaga sosee omapoo to hoguguloso olo teneeso. Esino Diotelepeseeye to ee duloso mesile. Bei, nima kulodu sosee mapoo yayo wiligi doloso badalame diya goomogaso.

<sup>10</sup> Esiga ayo siboga, yayo goo tokenee teli sabolo osoloso ibada goo maga gamenee taka goo ee woola yilige bigileiso. Osoloso yo goo hedebe egee moodele. Esino yayo Godeeyo to eligimo silesibili o mi mapoo siboga, hamaga takeliso. Osoloso see sosee odoo oso Godeeyo to eligimo silesibili odoo ee pidiyaga, yayo hamaga takeliso. Esino ee ma kulodu yayo taka tei telega poogoloso, sosee odoo abo oso Godeeyo to eligimo silesibili odoo pidiga, yayo diba sosee maga peegoo mageliso.

<sup>11</sup> Esiga ayo gooma odoo, tokenee odoo eyo goo ogoloso o goo ma malo na peedee. Esino goo tekepo hedebe ee temelee. Odo agayo goo tekepo ee tomologa, yo Godee sabolo hedebe doloso badoso. Esino odoo agayo tokenee goo tomologa, yo Godee gooleedele.

<sup>12</sup> Esiga odoo susuga oso Demetiliyus odoo eyo goo tekepo deliso. Osoloso o suso tou too oso tei goo sabolo tebiliso. Osoloso iba nosee yo tekepo odoo dee takeliso. Esiga no olo gooleedooso, iba tei goo hedebe ee takeli.

<sup>13</sup> Ayo namapoo goo abo takalai moloso. Esino wulo to hogugu oso namapoo takalai a koo goomogo.

<sup>14</sup> A mawo namapoo sibilesi nobolo hodobo to kalai a goomogo.

<sup>15</sup> Esiga ayo Godee mapoo takooso, Godeeye namapoo mesie goo tenelame. Osoloso nee odoo diayo

namapoo dibada emegei di to takaso.  
Esiga nei nayo ibada odo omapoo  
egee do mapoo, ibada emegei di to  
dimapoo takee.

## Yuda Yudaye to hogugu

### *Yuda booka goo eyo bei*

Yuda booka hoguguli odo hagee Yesuwo omolo Yuda oso malaiso. Esiga yayo tei telaga odo susuga mapoo pidi to hagee hoguguloso teneeso, diayo gamenee goo eligi mapoo tei teyaga. Bei, gamenee eligili odo oso tei telaga odo ee peegoo gilimado di ogoloso.

<sup>1</sup> A Yuda, Yesu Kelisowo tou teli odo, osoloso Yemeseyo omolo. Ayo Ma Godeeye hesia odo nimapoo to hogugu hagee ka tonowa. Bei, Ma Godeeye niba sooloo deliso, osoloso Yesu Kelisoye niba medee ka bamoloso.

<sup>2</sup> Ayo Godee mapoo taka, yayo sooloo deli goo sabolo, osoloso mesie goo sabolo, osoloso Godeeye niba gweli goo oso nimapoo toowa doloso ka malame.

### *Gamenee goo eligili odo dia goo maga kokodo taka*

<sup>3</sup> Tei telaga odo emegei, iyo Godee maga gie badeli pidili too goo ee ayo olo daga nimapoo hoguguloso tenelame diya goomogaso. Esino ayo goo hee maga to hogugu hagee ka tonowa. Godeeye opusomo dee koo seli tei goodee eligi ee o odo imapoo teneeso. Esiga tei goodee eligi egee odo aboso see opusomo diyaga, niyo medee bamelee.

<sup>4</sup> Bei, gamenee eligili odo oso tei telaga odo masi nibada mooloo-goodoo ma kulodu galaga sibilesi nibolo hodobo ka doso. Esiga odo hagee biaso eligilone, Godeeye iba sooloo dolone pidilone, iyo goo tokenee talai koo hamaga takeli doloso eligiliso. Osoloso adaba sobo sabolo giso sabolo goo heli talai ee tei mauwe deliso. Osoloso see diayo

ibada wiligi odo Lodee Yesu Keliso mapoo goweliso. Osoloso odo hagee biaso Godee mapoo mesilega silesibiliso. Esino Godeeye odo hagee bia dia goo maga goo midilame daga hoogoo to olo edidi magooso.

<sup>5</sup> Egeesi ma kulodu ayo goo niso gooleedo ee see nimapoo medee eligilei, a goomogo. Esiga niba goolee, Godeeye Isalael odo pidilone, Isipi mi maga peegoo gilimado diso. Esino see hamamee Isalael odo abo yimapoo tei tele poogoo odo ee yayo piliguso.

<sup>6</sup> Osoloso niba goo hee hagee goolee. Godeeyo momaiye aboso kitulugu Godeeye dimapoo tene sabolo tou talai goomegelega, wulo see abaga kitulugu toowa talai ee goolone, mi Godeeye dimapoo tene ee poogoloso diyadeeso. Esemee Godeeye diba ki ti moloso kookaiyo osee meli oso tiegisaloso wulu neliga poogoo mapoo huyasoloso doso, biame hamameede mapoo dia goo ee ka midilame.

<sup>7</sup> Osoloso Sodom mi sabolo, osoloso Gomola mi sabolo, osoloso mi pepuso abo koola omapoo bumodi dibada goo ee, niba goolee. Momaiyeso goo tokenee too egeesi masi diayo tooso. Bei, mi omapoo adaba sobo sabolo giso sabolo heli teli goo tokenee oso molone, gisoso emegei giso sabolo goo heli teliso. Esiga Godeeye dibada mi ee douso nadalame dou tooso. Odo egee bia dimapoo, osoloso momaiye egee bia dimapoo peledaba goo oso, Godeeye goo tokenee teli odo dia goo tokenee eyo nei dala dimapoo tenelai goo ee eligiso. Dala goo hagee kookaiyo moloso osee meli Dou mi ee takooso.

<sup>8</sup> Egeesi maga gamenee eligili odo hagee bia onosee egeese seliso. Diayo dia sapootieli ee Godee maga sibili dolone, ee dodolone, dia suso goo tokenee teliso. Osoloso diayo

Godee mapoo mesilega dobolone, Godeeyo momaiye susuga eyo goo maga to tokenee takeliso.

<sup>9</sup> Esino momaiye susuga dia wiligi odo Maikoleeye Saiten sabolo Moses ta eyo kou maga toso agadiga\* omapoo, yayo Saiten mapoo to tokenee hee takele. Esino yayo wulo Saiten mapoo egeese takaso, "Godeeye namapoo nei dala tenelaiso," diso.

<sup>10</sup> Esino gamenee goo eligili odo hagee biaso goo diayo gooleedele poogoo maga to tokenee takeliso. Osoloso diba gala seebeeso dieso goomoga goo teli egeesi masi doso. Esiga dieso goomoga goo ee tolone egee do ogooso diba tokenee peliso.

<sup>11</sup> Esiga diba dala talaiso! Bei, diayo Keineeyo goo deede maga. Bei, Keineeye omolo wooloomaso. Osoloso diayo Balameeyo goo\* ee dodolone, molee talame goolee maga tokenee tolone ka doso. Osoloso diayo Kolayo goo\* ee dodolone, Godeeyo to mapoo mesilega doso. Esiga Godeeye diba tokenee palaiso.

<sup>12</sup> Esiga niyo emegei sooloo deli wo ne\* ee ma kulodu odo hagee biaso dieso nediliyo diba ono diya goolone, similega wo nalagaliso. Goo egeesi maga diba bi subugobolo masi dobolone, niyo debei ee tokenee polone ka doso. Osoloso osoko biame mapoo howo hemiye mologa, howo sibilega pooso guobigili diba egeesi masi doso. Osoloso diba homo su oso ko peli biame mapoo ko peliga pegeli egeesi masi doso. Osoloso

diba homo siliga peegoo alaga bigili egeesi masi doso.

<sup>13</sup> Esiga abei mapoo howo ki toowa sibulone makawo sabolo sibili egeesi masi, diayo dia simili goo woola egeese eligiliso. Osoloso diba kei ma dokodoo giwo boobadomo sili egeesi masi doso. Esiga Godeeye wulu goodomou olo mopoodoo dooso, diayo neliga omapoo kookaiyo dooso osee dabalame.

<sup>14-15</sup> Esiga Adameeye balomo simi ee ma kulodu amawe dio 7 omapoo badeli Inokeeye malalo gooso peledabalai omaga takolone, odo hagee bia dia goo maga egeese takaso, "Niso ege, Lodeeye o momaiye diya bei sabolo siboso, mi odo susuga dia goo ee midilame. Osoloso Godee mapoo koo mesili odo oso goo tokenee too sabolo, osoloso Godee maga duwa taka eyo nei yayo dimapoo dala tenelame siboso," diso.

<sup>16</sup> Esiga diayo goweli goo ee yilige bugulone emegei dia goo takomo silesibiliso. Egeeseelone diayo suso goomoga goo mapoo dodomo silesibilulone, dieso nediliyo diba teiba dolone si howeliso. Osoloso see diayo odo abo maga bi diayo goomegeli ee talame to hadaliso.

### *Tei too mapoo kibiloso debee*

<sup>17</sup> Esiga emegei, niba ibada Lodee Yesu Kelisoye Diye di odo oso malalo gooso peledabalai taka ee goolee.

<sup>18</sup> Bei, diayo nimapoo egeese takaso, "Lodee mapoo osoloso o

**1:9:** Dan 10:13, 21; 12:1; 2Pita 2:11; Yili 12:7; Zec 3:2 \* **1:9: Maikol dio Saiten dio toso agadiga** - Moses teme, Godeeye Maikol mapoo takolone, Moses tayo kou todilesi midoose, diso. Esino Saitenso Maikol dio toso agadilone egeese takaso, "Amapoo kitulugu moloso, Moses tayo kou todilei. Bei, Moseseeye Isipi odo hee woolooma maga," diso. Esino Maikoleeye Moses tayo kou ee Saiten mapoo tenelai goodoogaso. **1:10:** 2Pita 2:12 **1:11:** Gen 4:7-8; 1Yon 3:12; 2Pita 2:15; Num 22:1-41; 16:1-35 \* **1:11: Balameeyo goo** - Balam yo Godee maga to toloso kokodo takomo sili odo. Daga hoogoo Moseseeye badebei biame omapoo yo badebeiso. Esino yo Isael odoonee. Yo molee talame goolee maga, yayo Godee mapoo wegigaso. \* **1:11: Kolayo goo** - Daga hoogoo Kolaye Godee mapoo wegigime, mi goodaso. Esem o odo sabolo mi ma kulodu misigedubuloso miso togo doloso wediaso. Esiga oposusu hagee Numbers 16:1-35 mapoo moloso. **1:12:** 2Pita 2:13, 17 \* **1:12: emegei sooloo deli wo ne** - Daga hoogoo tei telaga odo oso mooloogoodoloso, diayo hedebe doloso emegei sooloo dolone debeli goo ee kauwulame nei naliso. Osoloso diayo wo ne hoo poogolone Yesu gooleebugu wo naliso. **1:14-15:** Gen 5:18, 21-24 **1:18:** 2Pita 3:3



odoo mapoo manolone duwa takeli odoo oso biame hamameedee mapoo sibileiso. Osoloso diayo sibileso dia suso goomoga goo susuga ee tolone dabalaiso," diso.

<sup>19</sup> Esiga odoo hagee biaso tei too ma kulodu debeli odoo ee domo piliso. Osoloso diba nosee mipoo hageeyo goo goomegeli odoo oso. Osoloso dibada kulodu Dio Tei mauwe.

<sup>20</sup> Esino tei telaga odoo emegei, Godeeyo goo maga tei eligi goo mapoo niyo olo tei tooso. Esiga tei eligi goo ee ma dokodoo nibada gie badeli ee moso masi tege. Osoloso Dio Teiso kitulugu maga Godee mapoo takolone debee.

<sup>21</sup> Osoloso Godeeye niba sooloo dolone badoso doloso goolone, Godee mapoo hegi sibileso debee. Osoloso Lodee Yesu Kelisoye sooloo dala maga kookaiyo badoboso gie badeli ee talame dulone bolone ka debee.

<sup>22</sup> Osoloso tei too kibile poogoo odoo ee sooloo dolone pidilone debee.

<sup>23</sup> Osoloso odoo aboso Dou mi mapoo diyadeega, niyo ogoloso see saga gilimado sibe. Osoloso nee odoo oso goo tokenee toga, diba medee sooloo dala sabolo pidilone dobolone, niso nediliyo medee bamelee, niba nosee dibada goo tokenee hedebe omapoo dedeyaga.

### *Godeeyo hu dokodoo poude*

<sup>24</sup> Godee yo kitulugu. Esiga yayo nibada tei too homodobiyaga niba pidilei, yo teiba. Osoloso yayo niba goo tokenee mauwe odoo doloso, niba o mudugiyopoo dabalame gilimado sibilei, yo teiba. Esiga niba omapoo goomoga sabolo dabalaiso.

<sup>25</sup> Esiga iyo Godeeyo hu dokodoo poudomo. Bei, Godee hedebe hagoso ka badoso. Osoloso ibada Lodee Yesu Kelisoye iba halo tou too maga Godeeye ibada gie badeli pidiso. Esiga hedebe yayo toowa doloso ka badoso. Osoloso yayo bi susuga eyo wiligi odoo doloso ka

badoso. Osoloso kitulugu susuga ee yimapoo moloso. Bi susuga moodel-ega badolone, yo egeesee badebeiso. Osoloso yo epedee hamapoo egeesee badoso. Osoloso yo see hamamee kookaiyo osee egeesee badalaiso. Goo hagee tei goo.

## Pidi to abo

**Diye di odoo** Hu hagee Yesuye o hamamee dili odoo 12 mapoo hu dia hagee hediso. Osoloso hamamee Polo nose mooloogoodoo hageeyo kulodu dileso diye di odoo hu tooso.

**Godee maga to toloso kokodo takomo silesibili odoo** Odoo hagee bia oso Godeeye taka duloso odoo mapoo takeliso. Osoloso ee ma kulodu daga hoogoo odoo egeesi masi oso Godee maga to toloso o booka mapoo hoguguliso. Esiga to hogugu hagee Godeeye To Magoo Booka Nape ee ma kulodu hogugu moloso. Odoo hageesi masi oso hamamee peledabalai goo sabolo, osoloso Godeeye pidili to ee odoo mapoo takeliso.

**Pelisi odoo** Hu hagee Yu odoowo mooloogoodoo hu heeso. Odoo mooloogoodoo hagosu Moseseeye tei magoo sabolo, Godeeyo to tosili odoo oso to hogugu susuga sabolo, medee dodomo siliso. Esino egeesi ma kulodu odoo hagee bia oso diayo goolee maga tei abo magoloso, see Godeeyo tei magoo sabolo hodobo magooso. Osoloso diayo Godeeyo tei magoo sabolo, osoloso dia tei sabolo ee dodolone, diesono diba tekepo dolone, odoo abo tokenee deliso. Goo egeesi maga Yesuye odoo hagee bia dimapoo takolone, dieso nediliyo toowa deli odoo diso.

**Sedisi odoo** Hu hagee Yu odoo mooloogoodoo heeyo hu. Esiga odoo opusomo opusomo di hagee bia oso mooloogoodoo hagee ma kulodu de-beiso: tei moso wiligi tebisa, osoloso dia soosoo dio, osoloso Godee ogo odoo ogo doloso debeli odoo abo, osoloso bi bei odoo, osoloso Yu wiligi odoo tebisa abo. Mooloogoodoo hagosu Loum odoo sabolo emegei dolone, hee Pelisi odoo goweliso. Osoloso diayo Godeeye To Magoo Booka Nape ee ma kulodu Moseseeye tei magoo mapoo tei tolone, hee Godee maga to toloso kokodo takomo

silesibili odoo oso to hogugu mapoo tei koo teli. Osoloso diayo odoo wedia oso ta maga see hogabilei goo mapoo tei koo teli.

**Tei eligili odoo** Yu odoowo mooloogoodoo abo diba Godeeye tei magoo ee eligili odoo deliso. Daga hoogoo odoo hagee bia oso Moseseeye tei magoo sabolo, osoloso Godee maga to toloso kokodo takomo silesibili odoo oso Godeeye To Magoo Booka Nape eyo kulodu hogugu ee gooleedalame sukulu talame diliso. Osoloso diayo tei goo ee sukulu toloso medee gooleedoloso sibilesi Godeeye tei magoo eligili odoo hu teliso. Esiga odoo hagee bia oso Yu odoowo howo gisili moso mapoo Godeeye tei magoo eligimo siliso. Esino egeesi ma kulodu odoo abo hagee bia oso Pelisi odoo dia mooloogoodoo ee ma kulodu debeliso. Esiga edebeeyo takolone, Yesu yo eligili odoo, deliso. Esino yo odoo eligilei goo ee gooleedalame sukulu talame dile.

**Deibidi** Deibidi hagee daga hoogoo Yesu soomagelega molome, Isalael odoowo wiligi odoo toboloso badebeiso. Yayo wiligi odoo toboloso badolone, Godeeye goomoga goo temeleso. Esiga Deibidiyo goo ee hesigilei gooleega, goo ogo Godeeye To Magoo Booka Nape ee ma kulodu Samuel booka mapoo moloso.

**Moses** Esiga Moses hagee daga hoogoo Deibidi sabolo Yesu sabolo soomagelega molome, daga yo badebeiso. Osoloso Isalael odoo Isipi mi mapoo dala ma kulodu doboome, yayo diba gilimadoloso peegoo gilimado diso. Osoloso Godeeye yimapoo tei magoo teneeso, Isalael odoo oso tei magoo ee medee dadalame.

**Godeeyo to booka** Epedee hamapoo Godeeyo to hogugu booka egee tomolo Godeeye To Magoo Booka Nape sabolo Dia sabolo hodobo gooloogoo doloso hogugu booka ee tomoloso. Esino Yu odoo sabolo, osoloso tei telaga odoo daga

debei sabolo, oso Godeeyo to booka mapoo hogugu temelee ee wulo booka hedebe, ee Booka Nape oso. Esiga Diye di odoo booka mapoo, Godeeyo to hogugu booka ee Booka Nape ee takooso.

**Yu odoowo hasali biame** Godeeye mipoo sabolo, osoloso kei sabolo, osoloso bi susuga ee ma kulodu egee molo sabolo, biame 6 ee ma kulodu moodoso. Osoloso biame 7 mapoo yo hasaso. Esiga biame egee Sadee pepooko oso. Esiga Yu odoo oso Sadee pepooko biame mapoo tou telega dobolone, Godee mapoo takolone debeliso. Osoloso daga Yesu mapoo tei telaga odoo sabolo Sadee pepooko biame mapoo Godee mapoo takolone debeliso. Esino Yesu ta maga hogabuloso Kei mi ma dokodoo pala ogoloso hamamee, diayo Sadee pepooko biame poogoloso see Sadee toowa biame mapoo Godee mapoo takolone dobolone Yesu gooleebugu wo naliso.

**Yu odoowo howo gisili moso** Yu odoo oso bia mi susuga ee ma kulodu diayo howo gisili moso opusomo opusomo di meleeso. Moso hageeyo kulodu diayo Godee mapoo takeliso. Osoloso diayo Moseseeye tei magoo sabolo, osoloso Godee maga to toloso kokodo takomo silesibili odoo oso to hogugu ee hesigaloso, goo eyo bei ee medee hoodo egeliso. Egeesi ma kulodu Polo obakadio Yesu dio Yu odoowo howo gisili moso mapoo peleso Godeeyo to takomo siliso.

**Yu odoowo tei moso** Moso hagee Yu odoowo howo gisili moso sabolo hedebe. Esino moso hagee wulo hedebe Yelusalem mi mapoo tegei melee. Yu odoowo tei moso hamapoo goo toowa ee hagoso. Yu odoo oso Godee mapoo goomogalame, osoloso dibada goo tokenee hapalame, gala hu opusomo opusomo di hado peleso moso kulodu weliso. Esino odoo wuluge oso moso hageeyo kulodu peleso gala hu koo weli, hedebe Godee ogo odoo ogo doloso debeli odoo oso

odoo susuga ee halo moso omapoo peleso gala hu ka weli. Egeesi ma kulodu goo tokenee hapalame gala hu weli odoo ee, Moses osoloso emei Elon osoloso amawe dio oso moso kulodu debeliso.

**Godeeye gababia wo nali** Godeeye gababia wo nali hagee Yu odoo dimapoo goo diya toowa. Bei, wo ne hamapoo dobolone, Godeeye teli tosibili momaiye mapoo Isipi bia odoo dia holope malalo soomagoo piligimo diye neme piligu goo ee gweliso. Esiga Yesuye o hamamee dili odoo gilimadoloso, Godeeye gababia wo hagee nolone dobolone, see Yesu gooleebugu wo nali goo hagee bei mooloogooso.

**Isipi mi maga peegoo di ee gooleebugu wo nali** Wo nali hagee Yu odoo dimapoo goo diya toowa. Wo nali hagee bei mooloogolone, Godeeye gababia ee malalo gesi hedebe mapoo naliso. Osoloso omaga bei mooloogoloso sadee hedebe ma kulodu, Isipi mi maga peegoo di ee gooleebugulone wo ne ee ma kulodu debeiso. Wo nali hageeyo kulodu nei abo naliso, osoloso palawa wo masi yist sabolo hemele poogoo sabolo siloso naliso.

**Pentikos biame** Esiga Pentikos biame hagee Godeeye gababia wo naloso hamamee biame 50 poogoloso omapoo bei mooloogooso. Biame hamapoo Yu odoo oso dibada homolee mapoo nei segei gooloogaloso nala pogolone Godee mapoo goomoga poudiliso. Goo hagee Yu odoowo goo. Esino Yesu Keliso mapoo tei telaga odoo iyo takolone, biame egee sosee oso bei mooloogoo biame, dee takeliso. Osoloso Dio Tei oso meledaba biame deliso.

**Loum** Hu hagee mi edebeeyo bia eyo hu, osoloso mi omapoo debeli odoowo hu. Loum mi hagee, Yu odoowo mi maga koolanee, Itali mi toowa eyo kulodu melee. Mi abo mapoo debeli odoo diba Loum odoo bolo diya ebigeli. Bei, Loum odoo diba diya kitulugu odooga. Osoloso

diayo du medee tekepo moodoogaliso. Osoloso ha teli bi sabolo medee tekepo moodoogaliso. Egeesi maga diayo kitulugu oso mi abo diayo gibadebeiso. Esiga Yesuye badebei biame mapoo diayo Loum odoo hee Paileteeye Yu odoo dia mi mapoo dileso gibadebeiso. Osoloso hamamee diye di odoo oso silesibi biame mapoo see Peliks mapoo Yu odoo dia mi gibadalame diye diso. Osoloso Peliks dileso hamamee odoo hee Pestus yo diye diso, Yu odoo gibadalame.

**Sisa** Esiga Sisa hu hagee odoo hunee. Esino wulo Loum mi ee gibadeli wiligi odoowo hu oso. Esiga daga hoogoo Yesu soomagoo biame mapoo Sisa-Ogastaseeye Loum mi gibadebeiso. Osoloso see tobu Yesuye ta biame domo mapoo Sisa-Taibilyeseeye Loum mi gibadebeiso. Osoloso diye di odoo oso silesibi biame mapoo Sisa-Kolodiyaseeye Loum mi gibadebeiso. Osoloso Diye di odoo booka hoo poogoo hamameedee mapoo Poloye Loum mi mapoo di biame oso Sisa-Neloye gibadebeiso.



## Pidi to abo

### D

#### Deibidi

Deibidi hagee daga hoogoo Yesu soomagelega molome, Isalael odoowo wiligi odoo toboloso badebeiso. Yayo wiligi odoo toboloso badolone, Godeeye goomoga goo temeleso. Esiga Deibidiyo goo mapoo to kalai gooleega, booka nape Semiyolo mapoo moloso.

#### Diye di odoo

Hu hagee Yesuye o hamamee dili odoo 12 mapoo hu dia hagee hediso. Osoloso hamamee Polo nose mooloogoodoo hageeyo kulodu dilesa diye di odoo hu tooso.

### G

#### Godee maga to toloso kokodo takomo silesibili odoo

Odoo hagee bia oso Godeeye taka duloso odoo mapoo takeliso. Osoloso ee ma kulodu daga hoogoo odoo egeesi masi oso Godee maga to toloso o booka mapoo hoguguliso. Esiga to hogugu hagee Godeeye To Magoo Booka Nape ee ma kulodu hogugu moloso. Odoo hageesi masi oso hamamee peledabalai goo sabolo, osoloso Godeeye pidili to ee odoo mapoo takeliso.

#### Godeeye gababia wo nali

Godeeye gababia wo nali hagee Yu odoo dimapoo goo diya toowa. Bei, wo ne hamapoo dobolone, Godeeye teli tosibili momaiye mapoo Isipi bia odoo dia holope malalo soomagoo piligimo diye neme piligu goo ee gweliso. Esiga Yesuye o hamamee dili odoo gilimadoloso, Godeeye gababia wo hagee nolone dobolone, see Yesu gooleebugu wo nali goo hagee bei mooloogooso.

#### Godeeyo to booka

Epedee hamapoo Godeeyo to hogugu booka egee tomolo ee Godeeye To Magoo Booka Nape

sabolo Dia sabolo hodobo gooloo-goo doloso hogugu booka ee tomoloso. Esino Yu odoo sabolo, osoloso tei telaga odoo daga debei oso Godeeyo to booka mapoo hogugu temelee ee wulo booka hedebe, ee Booka Nape oso.

### I

#### Isipi mi maga peegoo di ee gooleebugu wo nali

Wo nali hagee Yu odoo dimapoo goo diya toowa. Wo nali hagee bei mooloogolone, Godeeye gababia ee malalo gesi hedebe mapoo naliso. Osoloso omaga bei mooloogoloso sadee hedebe ma kulodu, Isipi mi maga peegoo di ee gooleebugulone wo ne ee ma kulodu debeiso. Wo nali hageeyo kulodu nei abo naliso, osoloso palawa wo masi yist sabolo hemele poogoo sabolo siloso naliso.

### K

#### Keliso

Keliso dee egee takoo hu eyo bei ee Godeeye hesia dolone ka takooso.

### L

#### Lam be

Lam be dee egee takoo sipi be hu gie kauwa ee takooso. Bei, Isalael odoo oso tokenee goo hapalame sipi be gie kauwa wooloomaloso Godee mapoo teneliso.

#### Lodee

Lodee dee egee takoo hu eyo bei ee wiligi odoo taba dolone ka takooso.

#### Loum

Hu hagee mi edebeeyo bia eyo hu, osoloso mi omapoo debeli odoowo hu. Loum mi hagee, Yu odoowo mi maga koolanee, Itali mi toowa eyo kulodu melee. Mi abo mapoo debeli odoo diba Loum odoo bolo diya ebigeli. Bei, Loum odoo diba diya kitulugu odooga. Osoloso diayo du medee tekepo moodoogaliso. Osoloso ha teli

bi sabolo medee tekepo moodoogaliso. Egeesi maga diayo kitulugu oso mi abo diayo gibadebeiso. Esiga Yesuye badebei biame mapoo diayo Loum odoo hee Paileteeye Yu odoo dia mi mapoo dileso gibadebeiso. Osoloso hamamee diye di odoo oso silesibi biame mapoo see Peliks mapoo Yu odoo dia mi gibadalame diye diso. Osoloso Peliks dileso hamamee odoo hee Pestus yo diye diso, Yu odoo gibadalame.

### M

#### **Mesaya**

Hibulu dia toso Mesaya dee egee takoo sabolo, osoloso Guliki toso Keliso dee egee takoo goo eyo bei ee, hedebe Godeeye hesia dolone ka takooso.

#### **Moses**

Moses hagee daga hoogoo Deibidi sabolo Yesu sabolo soomagelega molome, daga yo badebeiso. Osoloso Isalael odoo Isipi mi mapoo dala ma kulodu doboome, yayo diba gilimadoloso peegoo gilimado diso. Osoloso Godeeye yimapoo tei magoo teneeso, Isalael odoo oso tei magoo ee medee dadalame.

### O

#### **Odoo Holo**

Yesuye eyo nediliyo takolone, a Odoo Holo, dee taka hagee, yo tei odoo dolone ka takomo silee.

### P

#### **Pelisi odoo**

Hu hagee Yu odoowo mooloogoodoo hu heeso. Odoo mooloogoodoo hagosoo Moseseeye tei magoo sabolo, Godeeyo to tosili odoo oso to hogugu susuga sabolo, medee dodomo siliso. Esino egeesi ma kulodu odoo hagee bia oso diayo goolee maga tei abo magoloso, see Godeeyo tei magoo sabolo hodobo magooso. Osoloso diayo Godeeyo tei magoo sabolo, osoloso dia tei sabolo ee dodolone, diesono diba tekepo dolone, odoo abo tokenee deliso. Goo egeesi maga Yesuye odoo hagee bia

dimapoo takolone, dieso nediliyo toowa deli odoo diso.

#### **Pentikos biame**

Pentikos biame hagee Godeeye gababia wo naloso hamamee biame 50 poogoloso omapoo bei mooloogooso. Biame hamapoo Yu odoo oso dibada homolee mapoo nei segei gooloogaloso nala pogolone Godee mapoo goomoga poudiliso. Goo hagee Yu odoowo goo. Esino Yesu Keliso mapoo tei telaga odoo iyo takolone, biame egee sosee oso bei mooloogoo biame, dee takeliso. Osoloso Dio Tei oso meledaba biame deliso.

### S

#### **Sedisi odoo**

Hu hagee Yu odoo mooloogoodoo heeyo hu. Esiga odoo opusomo opusomo di hagee bia oso mooloogoodoo hagee ma kulodu debeiso: tei moso wiligi tebisa, osoloso dia soosoo dio, osoloso Godee ogo odoo ogo doloso debeli odoo abo, osoloso bi bei odoo, osoloso Yu wiligi odoo tebisa abo. Mooloogoodoo hagosoo Loum odoo sabolo emegei dolone, hee Pelisi odoo goweliso. Osoloso diayo Godeeye To Magoo Booka Nape ee ma kulodu Moseseeye tei magoo mapoo tei tolone, hee Godee maga to toloso kokodo takomo silesibili odoo oso to hogugu mapoo tei koo teli. Osoloso diayo odoo wedia oso ta maga see hogabilei goo mapoo tei koo teli.

#### **Sisa**

Sisa hu hagee odoo hunee. Esino wulo Loum mi ee gibadeli wiligi odoowo hu oso. Esiga daga hoogoo Yesu soomagoo biame mapoo Sisa-Ogastaseeye Loum mi gibadebeiso. Osoloso see tobu Yesuye ta biame domo mapoo Sisa-Taibilyeseeye Loum mi gibadebeiso. Osoloso diye di odoo oso silesibi biame mapoo Sisa-Kolodiyaseeye Loum mi gibadebeiso. Osoloso Diye di odoo booka hoo poogoo hamameedee mapoo

Poloye Loum mi mapoo di biame oso Sisa-Neloye gibadebeiso.

**T**

### **Tei eligili odo**

Yu odoowo mooloogoodoo abo diba Godeeye tei magoo ee eligili odo deliso. Daga hoogoo odo hagee bia oso Moseseeye tei magoo sabolo, osoloso Godee maga to toloso kokodo takomo silesibili odo oso Godeeye To Magoo Booka Nape eyo kulodu hogugu ee gooleedalame sukulu talame diliso. Osoloso diayo tei goo ee sukulu toloso medee gooleedoloso sibilesi Godeeye tei magoo eligili odo hu teliso. Esiga odo hagee bia oso Yu odoowo howo gisili moso mapoo Godeeye tei magoo eligimo siliso. Esino egeesi ma kulodu odo abo hagee bia oso Pelisi odo dia mooloogoodoo ee ma kulodu debeliso. Esiga edebeeyo takolone, Yesu yo eligili odo, deliso. Esino yo odo eligilei goo ee gooleedalame sukulu talame dile.

**W**

### **Wo mana deli**

Daga hoogoo Yu odooso dugo 40 ee ma kulodu miwe poogoo mi mapoo silesibume, Godeeye wo mana deli hagee diayo nalame teneliso. Mana deli hagee, wo masi heliye pepooko dooboo hadali.

**Y**

### **Yu odoowo hasali biame**

Godeeye mipoo sabolo, osoloso kei sabolo, osoloso bi susuga ee ma kulodu egee molo sabolo, biame 6 ee ma kulodu moodooso. Osoloso biame 7 mapoo yo hasaso. Esiga biame egee Sadee pepooko oso. Esiga Yu odo oso Sadee pepooko biame mapoo tou telega dobolone, Godee mapoo takolone

debeliso. Osoloso daga Yesu mapoo tei telaga odo sabolo Sadee pepooko biame mapoo Godee mapoo takolone debeliso. Esino Yesu ta maga hogabuloso Kei mi ma dokodoo pala ogoloso hamamee, diayo Sadee pepooko biame poogoloso see Sadee toowa biame mapoo Godee mapoo takolone dobolone Yesu gooleebugu wo naliso.

### **Yu odoowo howo gisili moso**

Yu odo oso bia mi susuga ee ma kulodu diayo howo gisili moso opusomo opusomo di meleeso. Moso hageeyo kulodu diayo Godee mapoo takeliso. Osoloso diayo Moseseeye tei magoo sabolo, osoloso Godee maga to toloso kokodo takomo silesibili odo oso to hogugu ee hesigaloso, goo eyo bei ee medee hoodo egeliso. Egeesi ma kulodu Polo obakadio Yesu dio Yu odoowo howo gisili moso mapoo peleso Godeeyo to takomo siliso.

### **Yu odoowo tei moso**

Moso hagee Yu odoowo howo gisili moso sabolo hedebeenee. Esino moso hagee wulo hedebe Yelusalem mi mapoo tegei melee. Yu odoowo tei moso hamapoo goo toowa ee hagoso. Yu odo oso Godee mapoo goomogalame, osoloso dibada goo tokenee hapalame, gala hu opusomo opusomo di hado peleso moso kulodu weliso. Esino odo wuluge oso moso hageeyo kulodu peleso gala hu koo weli, hedebe Godee ogo odo ogo doloso debeli odo oso odo susuga ee halo moso omapoo peleso gala hu ka weli. Egeesi ma kulodu goo tokenee hapalame gala hu weli odo ee, Moses osoloso emei Elon osoloso amawe dio oso moso kulodu debeliso.